


Teoso sãkire
amaneri



New Testament in Apurinã (BR:apu:Apurinã)

Teoso sãkire amameri

New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022
253eac7-f0c7-5b49-b6be-65ee5354d0ed

Contents

Mateo	1
Marko	51
Arókasi	80
Xoão	132
Átosi	167
Homano	210
1 Korĩto	230
2 Korĩto	247
Karásia	259
Épeso	267
Piriposi	274
Koroso	279
1 Tesarónika	284
2 Tesarónika	288
1 Tximótxio	290
2 Tximótxio	296
Txito	300
Piremō	303
Epireo	304
Txiako	318
1 Petro	323
2 Petro	329
1 Xoão	333
2 Xoão	338
3 Xoão	339
Xota	340
Apokorípisi	342

MATEO

*Xesosi Nirimaneakori Iua Apisapanika Auakani
(Arókasi 3.23-38)*

¹ Xesosi Teoso mereëkiti itxaua. Uai aua Xesosi apika atokiriakorini uāka. Xosee inakori Xesosi iri atoko İkorapokoriti. Apraãoni, Taviini pakini Xesosi apika atokiriakorini atoko. Ininiã Xesosi Taviini, Apraãoni pakini imi atoko itxa.

² Ininiã ia atoko itxa:

Kitxakapirika Apraão, Isaki iri.

Isaki, Xakoo iri.

Xakoo, Xotaa itariakorikata iri.

³ Xotaa, Péresi, Sera pakini iri. Inorona Tamara.

Péresi, Ésirõ iri.

Ésirõ, Arão iri.

⁴ Arão, Aminatapi iri.

Aminatapi, Nasoõ iri.

Nasoõ, Sáomõ iri.

⁵ Sáomõ, Póasi iri. Póasi inoro Haapi.

Póasi, Opetxi iri. Opetxi inoro Hotxi.

Opetxi, Xesee iri.

⁶ Xesee, Tavii iri. Tavii Isaeokini auíte itxaua.

Tavii, Saromão iri. Saromão inoro mitxi Oria İtanoro. Eereka Tavii takaro oa.

⁷ Saromão, Hopoão iri.

Hopoão, Apia iri.

Apia, Asa iri.

⁸ Asa, Xosapaa iri.

Xosapaa, Xorão iri.

Xorão, Osia iri.

⁹ Osia, Xotão iri.

Xotão, Akasi iri.

Akasi, Esekia iri.

¹⁰ Esekia, Manasee iri.

Manasee, Amõ iri.

Amõ, Xosia iri.

¹¹ Xosia, Xekonia itariakorikata iri. Iuasaaki İkorakanani kãkiti Isaeokini maİkaãka.

Papirõnia tixinimoni anikaãkana.

¹² Papirõnia anikikona atoko,

Xekonia, Saratxieo iri.

Saratxieo, Soropapeo iri.

¹³ Soropapeo, Apiotxi iri.

Apiotxi, Eriakiĩ iri.

Eriakiĩ, Asoo iri.

¹⁴ Asoo, Satoki iri.

Satoki, Akĩ iri.

Akĩ, Eriotxi iri.

¹⁵ Eriotxi, Ereasa iri.

Ereasa, Mataã iri.

Mataã, Xakoo iri.

¹⁶ Xakoo, Xosee iri. Iua Xosee, Maria İtaniri. Xesosi, iua Teoso Mereëkiti itxaua. Inoro Maria.

¹⁷ Apraão, iua ãkiri, imekaniri, apika mekaniri, apika mekaniri ãkiri, apika mekaniri apika mekaniri, apiko itxaãpota. Tavii auakasaaki, katosipeka pakini ninoa uãka. Eereka aua Tavii, Tavii ãkiri, imekaniri, apika mekaniri, apiko itxaãpota. Katosipeka pakini ninoa uãka. Iuasaakiika Xoteoakori anikaãka Papirõnia tixinimoni. Ninoa mekaniriakori katosipeka inakasaaki, Xesosi iponaniãpeka.

Xesosi İponaniini Pirena

(Arókasi 2.1-7)

¹⁸ Ia atoko itxapaniko Xesosi. Teoso mereëkiti iponaniãkasaaki, Maria ominapatari Xosee. Oİtaniriuatini apisapanika, omotokiãri amarini Erekari Matamatakoti sikakiti. ¹⁹ Xosee

uākatarī Maria kamari maerekati ātikata. Atāo inakarinoka kamakari iua, ininiā kona inirekari kākiti imaropiretiniri oa kamixi onini. Kākiti sauaki osiniā, Xosee ! inirekaro opētauatini, kotxi erekari kamakari iua. Ininiā inirekari itakanapiniro oa, ixika kākiti mimarotakaniā. ²⁰ Ikara atoko inini ixiniremoni, Teoso nitiri iaxitikiiri apoka itaponemoni. Ininiā itxa:

–Xosee, Taviini apika mekaniri pite. Kona pipīkaperō Maria papakapini pītanoro īkapani, kotxi Erekarī Matamatakoti, iuara kamixipeka txiitakaro. ²¹ Auako oa ākiri. Pitakauākariko Xesosi itxauako, kotxi imaktxakari kākiti maerekani –itxa Teoso nitiri. “Xesosi” popīkari sākireē, iuatxikana, “Kākiti Maerekani Makatxakakari,” itxa.

²² Apikomoni Teoso nitiri txari:

–Ikara atoko inakari auapeka, kotxi kitxakapiriāka Teoso sākire sāpiretakari sāpiretapekari ikara sākiretxi. ²³ Kitxakapiriāka ia atoko itxa:

Hīkenakotari. Sito kikikata masiriākato mixiuatoko. Auako oimi. Itakauākataāka Emanoeo inakori

–itxa Teoso nitiri Xoseemoni. “Emanoeo” popīkari sākireē “Teoso atekata aua.”

²⁴ Xosee merekasaaki, iua auikari Teoso nitiri sākire. Ininiā itanorouata Mariakata. ²⁵ Eereka amarini iponaniākasaaki, Xosee takauākatarī Xesosi itxaua. Amarini iponaniini apisa iua iisiriāka Mariakata.

2

Atokatxi Pokīkinimoni Auakani

¹ Xesosi iponaniā Pereē inakori sitatxiti, Xotéia tōpa, Erotxi auītetxi inakasaakiaua. Iuasaaki atokatxi pokīkinimoni auakani sari Xerosareē sitatxitimoni Pereē takote. Iōriki imarotakani ninoa.

² Ininiā itxana kākitimoni:

–Naniparari amarini Xoteo auīte inakariaua? Ate itikapekaro iōrikite atokatxi pokīkinimoni. Oa iōriki oerekaua auītetxi Apiananiri iponaniāpeka. Ininiā ate apoka uai akapotoreēkiniaua iua apisatoō, kotxi Apiananiri itxaua –itxana ninoa.

³ Erotxi ikara ikenakoenetakasaaki, kona erekaxinireri. Kona inirekari āti auītetxi apokini. Ininiā ikinimane Xerosareē auakani kona erekaxinirena, kotxi ninoa pīkari Erotxi. ⁴ Ininiā iua apotiitana sasetotxi auīteakori, kaiōkatsoparerini pakini. Ininiā Erotxi pimaāna:

–Nanipa Teoso Mereēkiti iponaniāko? –itxa.

⁵ Ninoa apakapapiretari:

–Pereē sitatxiti, Xotéia tōpa aua. Ia atoko itxapaniko Teoso sākire sāpiretakari iōkatsopatakiti kitxakapiriāka:

⁶ Pereē sitatxiti auakani, Xotéia tōpa, hīte sitatxine poiāori, iuaritika kona hīpētauatape, kotxi hīte sitatxineē iponaniāko Isaekokini auīte. Kākiti mīkiikakari itxauako –itxa ninoa auītetxiakori Erotximoni.

⁷ Ininiā Erotxi akiritana ninoa iōriki imarotakani, ninoanani imisākiretini īkapani. Ininiā ipimaāna:

–Mītxipitipanika kirisaakipa hītikataro oa iōriki? –itxa ninoamoni.

Ininiā ninoa sāpiretari. ⁸ Iposo atoko iokanatanā Pereēmoni:

–Hīsako Pereēmoni amarini hinitini īkapani. Hāpokasaakiri, hīsāpiretano. Ininiā nota apaka sako, iua apisatoō nikapotoreēkiniaua īkapani –itxa Erotxi.

Txamari inirekari okiniri Xesosi, kotxi !inirekari āti auītetxi auini.

⁹ Erotxi sākire ikenakotakana atoko, ipotorikana. Iōriki atokatxi pokīkinimoni itikakitona īkiika. Anikana Xesosi auinimoni. Iuaātaā oa iōriki iotoka. ¹⁰ Ninoa atamatakasaakiro iōriki, iteene ipoxokoniuatana. ¹¹ Ininiā apokana aapoko. Iroāna. Apokarina amarini inoro Mariakata. Ininiā ikapotoreēkauana Xesosi apisatoō. Itxarina:

–Apiananiri pitxaua. Aāuīte pitxaua –itxana.

Iposo atoko itiina imaktxakana. Ininiā imaktxakarina erekari imīkitina auītetximoni isikakitina īkapani. Isikarina oro, īsēso inakori, miha inakori pakini. Īsēso, miha pakini kamariāro peerekari. ¹² Ininiā eereka Teoso sāpiretana iōriki imarotakanimoni itaponeēna:

–Kona hīkanapiriāpe Erotximoni –itxa Teoso ninoa taponemoni.

Ininiā ninoa kanapiriākasaaki auinimoni, āti kimaporitimoni isana.

Exitomoni Xosee, Maria Pakini Sini

¹³ Iōriki imarotakani sipeka atoko, Teoso nitiri iaxitikiiri sāpiretari Xosee itaponemoni:

–Paiamata. Pōkitikaua. Panikari amarini, inoro apaka Exito tixinimoni. Himitekā. Kona hīkanapiriāpe nota masāpiretakanisaakii, kotxi Erotxi nitari amarini okiniri īkapani –itxa Teoso Xoseemoni.

¹⁴ Ininiã Xosee:

—Nisapitikako —itxa.

Ininiã iua İkanõkatika Xosee õkitikaua. Aiamata Exito tõpamoni isini, amarini anikini İkapani. Ininiã imimitekari amarini inorokata Exitomoni. ¹⁵ Erotxi ipinakasaaki, iuasaaki İkanapiriãko. Kona İkanapiriã Erotxi ipinini apisa. Ia atoko itxapaniko kitxakapiriã Teoso sãkire sãpiretakari sãpiretakiti: Nãkiritariko namarite Exito tixini itakanapini.

Amarini Okiko Pirena

¹⁶ Erotxi imarotakasaakiri İõriki imarotakani sipe inakasaaki, İ imisãkiretaikarina iua, ininiã iua omanãkarauata. Ininiã amarini ipikananipeka inakanıua, apaka axapitipanika inakanıua, imakinikana okãkitaka Pereẽ sitatxitiã auakani. İkara atoko itxa, kotxi İõriki imarotakani sãpiretari ipikananipeka oa İõriki tokiã. ¹⁷ Kitxakapiriã Teoso sãkire sãpiretakari Xeremia inakori sãpiretakiti iaõka auape iuasaaki. ¹⁸ Iua txari:

Hamaa sitatxiti İkenakotaãkako aõsaãtxi. Hakeo atoko sitoakoro txiapatako oimiakori matinani. !Onirekari kãkiti mĩkapiritiniro oa, kotxi oimiakori kona auaiãka.

Exito Tixini İkanapiriınina

¹⁹ Erotxi ipinaka atoko, Xosee Exito tixini auakasaaki, Teoso nitiri misãkiretari iua itaponemoni. ²⁰ İtxari:

—Põkitikaua, pimikanapiriãri amarini, inorokata İsaeo tixinimoni. Amarini kinirão okaka inakani kona auaiãka —itxari.

²¹ Ininiã Xosee mikanapiriãri amarini, inorokata Xotẽia tõpamoni, İsaeo tixinimoni. ²² Txamari imarotakasaakiri Akirao, Erotxi ãkiri auõtetxi ininiua irini tikini, Xosee pĩkari Xotẽia tõpa auini. Ininiã Teoso nitiri iuaikana itaponemoni sãpiretari aõiãtaã isini İkapani. Ininiã Xosee, Maria, Xesosi pakini sari Karirẽia tõpamoni İsaeo tixini. ²³ Nasaree sitatxiti kaikota itxana. Ia atoko itxa kitxakapiriã Teoso sãkire sãpiretakani sãpiretakiti iaõka inini. Ninoã txari:

Nimereẽkiti, Nasareekiri itxauako.

3

Xoão Kapatxisareri Sãpiretakiti

(Marko 1.1-8; Arõkasi 3.1-20; Xoão 1.19-28)

¹ Eereka Xesosi aneẽpe. Iuasaaki Xoão kapatxisareri, ãparaã makipakaniãtaã Xotẽia tõpa aua. Iuaã iua oerekari Teoso sãkire kãkitimoni. ² Iua txa:

—Himaerekani hĩtakanapako, kotxi Teoso mereẽkiti paõtiki apokako iua İkinipoko auõte ininiua İkapani —itxari Xoão.

³ Kitxakapiriã İsaia inakori, Teoso sãkire sãpiretakari, sãpiretapekari Xoão pirena. İtxari: Auako kiki ãparaã makipakaniãtaã. İsaõpirenauatoko. İtxariko: “Hõeretariko kimapori Apiananiri apokini apisapanika. İtũkaõpo erekari hĩkamako iua napini İkapani,” itxa İsaia kitxakapiriãka.

⁴ Xoão takari mãkatxi kamero piti kamakori. Kamero kãkiti pira. İpakioõsere aamata kamakori. İnikari txĩtxiri. İtximari mapaã İtopakero. ⁵ Kãkiti Xerosareẽkini, İkinimane Xotẽia tõpakini, İkinimane Xotão tinikata auakani pakini sari İkenakotinirina İkapani. ⁶ Iuaã ninoã sãpiretari Teosomoni maerekati İkamakitina, imaerekani İmakatxakini İkapani. Eereka iua patxisatana Xotão uiniti.

⁷ Txama Xoão atapakasaakina pariseokori, satoseokori pakini apokini iuamoni ipatxisatikona İkapani, iua txana:

—İmini kãsiiri anaakorirai hĩte. Teoso misiritapitikai himaerekani xika. Himitekini ! auari. Hinirekari hĩpatxisatiko, txamari ! hinirekari hĩtakanapiniri himaerekani.

⁸ Hinirekiniãri himaerekani hĩtakanapini, ininiã hĩkamarike erekari. İkara atoko ininiã, hõerekari Teoso atão hĩtakanapiniri himaerekani. ⁹ Hãkixiniremoni ! hĩxinikapiri: “Teoso apakapapitikaauako ate, kotxi ate atokirini Apraãoni txaua,” !hĩtxapeko. Ari, nota sãpiretai hĩte, Teoso nirekiniãri, iposotari ia kai soroã Apraãoni mekaniriakori İkamini. Kona Apraãoni posotari anikini Teosomoni. ¹⁰ Aamina maereka iriti atoko hĩtxa. Teoso iposopeka hĩte İxipokini. Kãkiti auari İkitaite kauanari aamina maereka iriti itokini İkapani. İkinika aamina maereka iriti tokaãkako. Xaminaã oka inaãkanako. Teoso kamakiti iua atokokana itxa. Ininiã Teoso kitaite kauanapeka, aamina kotsa sauakiko tĩkane. Iua atokokana ininiã, Teoso aiamatapeka hĩte İxipokini İkapani.

¹¹ —Hĩte nipatxisata ãparaã. Hĩpatxisatiko oerekari maerekati hĩkamakiti hĩtakanapapeka. Nota tikini apoãkari patxisataiko hĩte Erekari Matamatakotiã, xaminaã pakini. Apiatakari itxaua iua. !Apakata iua takote napokini İkiti mata nimakatzakini İkapani, kotxi iua apiata. Nota poiãoka. İmakatzakari himaerekani, itxiko metao ãki auakari arikini atoko.

¹² Katakarererī āpokari ahoisi otāta imakatzakini ikapani. Otāta arikaāka. Oki nīkataāka ikiena nīkatikoātaā. Iua atokokana Teoso nīkatariko kākiti erekarini. Maerekati kamakani arikaākako xamina maxipoākatiā –itxa Xoāo.

Xesosi Patxisatiko Pirena

(Marko 1.9-11; Arókasi 3.21-22)

¹³ Iuasaaki Xesosi potorika Kariréia tōpa. Isari Xotāo uunitimoni, Xoāo patxisatiniri ikapani. ¹⁴ Txamari Xoāo txari Xesosi:

–Pite nirekatari nota patxisatinii? !Apakata, kotxi pitemoni maerekati !auari. Notara nirekari pite patxisatinino nota –itxa Xoāo.

¹⁵ Xesosi apakapapiretari:

–Apakatapitika pipatxisatinino. Uatxa akamariko ikinika Teoso nirekaākiti –itxa.

Ininiā Xoāo:

–Ateeneka.

¹⁶ Eereka ipatxisataāka atoko ikanīkīta imiriī. Iuasaakipeka iaxiti takaka. Ininiā kākiti atapari Erekari Matamatakoti katzakaāpotini kamoā atoko inakari. Xesosimoni oāpoka.

¹⁷ Eereka Teoso sākiraūata iaxiti:

–Pite namarite, nitiretakiti, napokaerekatai, kotxi nirekakiti pikama –itxa Teoso.

4

Satanasi Nirekari Xesosi Kaminiri Maerekati

(Marko 1.12-13; Arókasi 4.1-13)

¹ Erekari Matamatakoti anikari Xesosi āparaā makipakaniātaā Satanasi atamakaerekatiniri ikapani. ² Iuaā Xesosi takanapari inipokotini Teoso imisākiretini ikapani. Koarēta pokamara, koarēta ikanōkati pakini itakanapari inipokotini. Ininiā inatxikatani iuani.

³ Ininiā iuasaakiiika Satanasi apoka Xesosimoni. Iua katamakaerekarerī itxaua. Itxari:

–Pite Teoso ākiri pininiāua, ininiā ere kai soro komiri pitxīkitaka –Satanasi txari Xesosi.

⁴ Xesosi apakapapiretari:

–Kona nikamari pite paniātakiti, kotxi Teoso sākire iōkatsopatakorī txari:

Kona komirinanini txīkitakari kākiti ātipirika auini tīkane. Ikinika Teoso sākirera txīkitakari kākiti ātipirika auini tīkane

–itxa Xesosi Satanasimoni.

⁵ Eereka Satanasi anikari Xesosi Xerosareēmoni. Iua sitatxi akiritaāka Teoso nakiti. Satanasi anikari Xesosi Teoso misākiretiko aikotimoni apiata otano tsokitiri nopini. ⁶ Ininiā Satanasi txari Xesosi:

–Teoso ākiri pininiāua, pokaua xiti. Ininiā ikinipoko kākiti imarotariko Teoso ākiri pininiāua, kotxi Teoso sākire iōkatsopatakorī txari:

Teoso iokanatanako iniritiakori iaxitikini pite inīkatinina tīkane. Ninoā maīkai pimap-inakani tīkane, ininiā pikarouatini !auari. Kona kai soro karotari pikiti,

–itxa Satanasi.

⁷ Xesosi apakapapiretari:

–Teoso sākire iōkatsopatakorī apaka txari:

Kona patamakaerekatapiri Apiananiri piTeosone.

⁸ Eereka Satanasi anikari Xesosi ātiātaā iuaīkana. Itano xiratarimoni anikari. Iuaā Satanasi oerekari ikini itixiti, ikinika tiitxiti iuaā auakari pakini. ⁹ Ininiā itxa:

–Pikapotoreēkiniāua nota apisatoō piteosonetinino, ininiā ikinika nisikaiko –itxa Satanasi.

¹⁰ Xesosi apakapapiretari:

–Konapitini. Pisipeka Satanasi. Teoso sākire iōkatsopatakorī txari:

Apiananiri piTeosone, iuanokara piteosoneta. Iua ikapaninokara piparīkauatako

–itxa Xesosi.

¹¹ Ininiā Satanasi takanapa txari iua. Ininiā Teoso nitiriakori iaxitikini apoka Xesosi-moni inīkatinirina ikapani, kotxi itapara !auaika.

Xesosi Mipotorikari Iparīka Kariréia Tōpa

(Marko 1.14-15; Arókasi 4.14-15)

¹² Xesosi kenakoenetakasaakiri Xoāo kapatxisarerī kateia āki takiko, isari Kariréia tōpamoni. Nasaree sitatxitimoni isa. ¹³ Ininiā eereka itakanapari Nasaree sitatxiti. Kapanaoō sitatxitipeka aua itxa. Kapanaoō, Kariréia poa takote, apaka Seporō, Natarii pakini tōpati takote. ¹⁴ Kitxakapirīka Isaia, Teoso sākire sāpiretakari sāpiretapekari, iuaā Xesosi auako. Ia atoko Teoso sākire txapeka:

¹⁵ Seporō, Natarii pakini tōpati ipoa mitari takote, Xotāo uuniti ipiniā. Kākiti takauākatari iua itixi, Kariréia tōpa. Xoteo minakanua tixine itxaua. Iuaā Erekari apokako. ¹⁶ Ninoā

kākiti, ipiā auakani, !imarotari Teoso. Ipiāniātaā ninoa auanāta. Ninoa atamatariko tirikapi. Ikamara mitari. Iua tirikapi iopinipokotako ipiā auakani sauaki. Ikara atoko itxa Isaía kitxakapirika.

¹⁷ Xesosi apokasaaki Kapanaoō sitatxiti, imipotorikari oerekarauatini. Ia atoko itxa:

—Himaerekani hītakanapa, kotxi iposope Teoso hīauite ininua —Xesosi txana ikinipoko kākiti.

Xesosi Akiritari Ipi Ipi Pakini Kokatsaāriti

(Marko 1.16-20; Arókasi 5.1-11)

¹⁸ Xesosi Kariréia poa tiniā itīpokotakasaaki, itikari ipi kiki, Simāo Petro inakori, itari Ātree inakori pakini. Itakanātarina hetxi. Kokatsaāriti itxauana. ¹⁹ Ininiā Xesosi akiritana ninoa: —Masa notakata. Hītakanapariko hōkatsaātini parīkatxiti. Noerekaiko hīte Teoso sākire hōerekini ikapani, kākiti imarotini ikapani —itxa Xesosi.

²⁰ Ininiā iuasaakiika ninoa takanapari okatsaātinina. Xesosikata sa itxana.

²¹ Apikomoni itīpokotakasaaki, atamatana Txiako, Xoāo pakini. Sepeteo anaakori itxauana. Ninoa irikata kanauā auanāta. Ihetxina iotsaānātana. Ininiā Xesosi akiritana ninoa. ²² Iuasaakipeka itakanaparina iri, kanaua pakini. Xesosikata sa itxana imoianatinirina ikapani.

Xesosi Amianatakani Imakananitini

(Arókasi 6.17-19)

²³ Xesosi sari ikini Kariréia tōpamoni. Aiko Xoteoakori apotiitiniātaāua isa. Iuaā isāpiretana Teoso iokanapirena erekari, Teoso kākiti auite inini pirena. Apaka erekepeka itxīkitakana amianatakani. ²⁴ Xesosi kamakiti, apaka isāpiretakiti, iaripiretapeka ikinika Síria tixini. Ininiā kākiti minana itomaneri amianatakani iuamoni. Ikini sereti amianari auakini sari iuamoni. Kākiti maerekati matamatakoti Satanasi nitiri auaitotakiti apoka iuamoni. Apaka kākiti mapitxiritakani apoka. Apaka titinanakakari amianariti auakini apoka. Apaka kākiti maposota tīpokotakani pakini apoka Xesosimoni. Ikinikana erekape itxīkitakana ninoa. ²⁵ Itomaneri sari iua tikini. Kākiti Kariréiakini, tesi pakini sitatxitikini, Xerosareēkini, kākiti Xotéia tōpakini, Xotāo uniti ipiniākini pakini sari iua tikini.

5

Xesosi Sākirauata Ixirata Auīte Nopini

(Kapitoto 5, 6, 7)

¹ Xesosi itomaneri kākiti atapakasaaki, ixirata nopini isa, topāka itxa oerekarauatini ikapani. Imoianariakori apotiitaua iuamoni. ² Iuasaaki oerekana ia sākiretxiti:

Kirimonipa Teoso Sikatari Erekeri?

(Arókasi 6.20-23)

³ —Teoso takari erekari kākitimoni, ia atoko inakanimoni. Ninoa nirekari Teoso nirekēkiti ikaminina, iuaritika imarotarina !iposotarina Teoso nirekēkiti ikaminina, ininiā amanaārina Teoso sikaposotiiretinina ninoa. Teoso takari erekari kākiti ikara atoko inakanimoni. Ninoa sari Teoso auītetxi ininiātaāua.

⁴ —Teoso takari erekari kākitimoni, ia atoko inakanimoni. Mitxi ninoa txiapata imaerekanina xika. Ininiā eereka Teoso mīkapiritana ninoa, amarini mīkapiritiko atoko.

⁵ —Teoso takari erekari kākitimoni, ia atoko inakanimoni. Pataparaxinirena ninoa, iuaritika !itxitarina āti. Iamonīkarina āti. Teoso sikapanikariko ikinika itixi ikara atoko inakanimoni.

⁶ —Teoso takari erekari kākitimoni, ia atoko inakanimoni. Ninoa iteene nirekari erekari-noka ikaminina. Nipokori inirekinina atoko, āparaā inirekinina atoko, ninoa iteene nirekari erekari ikaminina. Ininiā Teoso sikana ninoa ikinipoko erekari inirekakitina.

⁷ —Teoso takari erekari kākitimoni, ia atoko inakanimoni. Ninoa amonīkari ninoa misiritakani, ininiā iua atokotxikana Teoso amonīkanako ninoa kaamonīkarerini.

⁸ —Teoso takari erekari kākitimoni, ia atoko inakanimoni. Ninoa kamari Teoso nirekēkitinoka, ininiā ninoa aōkitariko Teoso.

⁹ —Teoso takari erekari kākitimoni, ia atoko inakanimoni, kauārerinimoni. Ninoa parīkauata neenamtxi xipokini ikapani. Ininiā ninoa akiritaākako Teoso anaakori.

¹⁰ —Teoso takari erekari kākitimoni, ia atoko inakanimoni. Ninoa kamari erekari, ininiākara apanakini kākiti misiritana. Ninoa erekari kamakani auako Teoso auītetxi ininiātaāua.

¹¹ —Teoso takari erekari hītemoni, apanakini misiritakasaakii, imisākirepiretakasaakii, aāpirena ikamakasaaki hītemoni nota sākire hāuikini xika. ¹² Poxokonoka hītxako, kotxi Teoso

sikai hīparīka īki ito, itixine hāpokasaaki. Hīte misiritiko atokokana Teoso sākire sāpiretakani kitxakapirīka misiritaāka, ininiā hīpoxokoniuatoko –itxa Xesosi.

Iōkira Pirena

(*Marko 9.50; Arókasi 14.34-35*)

¹³ Iuaīkana Xesosi sākirauiata:

–Iōkira erekarō atoko hītxaua ikinimane īkapani. Iōkira matxoatapeka onakasaaki, ininiā lapakata otxoa kanapiriini iuaīkana. Ininiā oōkaāka. Kākiti kitakaro, kotxi kona otxaika.

Tirikapi Pirena

¹⁴ –Tirikapi atoko hītxaua ikinimane kākiti īkapani. !Hīposotari hīkipatiniri sitatxi xirata nopini auakari, kotxi ikinimane atamatarī tirikapi. ¹⁵ Kākiti !itakari tirikapi kopiti āki. Itakarina itano ikini aapokotxiti iopinikini īkapani. ¹⁶ Iua atokokanera hītxako, kotxi erekari hīkamakiti tirikapi kamara atoko itxa. Erekarinokara hīkamako. Ininiā apanakini atamatarī erekari hīkamakiti. Ininiāra itxarina aīri iaxitikirimoni: “Peerekai pite.”

Teoso Sākire Moisesi Apakapakiti

¹⁷ Iuaīkana Xesosi sākirauiata:

–Kona hītxape: “Xesosi xipokariko Teoso sākire Moisesini apakapakiti,” kona hītxape. Apaka, “Kitxakapirīka Teoso sākire sāpiretakani sāpiretakiti Xesosi xipokako,” kona hītxape. Kona ikara inakari !nixipoka. Nota ina ikinipoko ninoa sāpiretakiti nikamini īkapani. ¹⁸ Atāōpitika ikinika Teoso sākire apokako. Kona xatiki Teoso sākire iōkatsopatakori kona xipoka. Iaxiti, itixi pakini xipokini apisa Teoso sākire !ixipoka. Apokapitikako imakinika isākire. ¹⁹ Teoso sākire ipaniātakiti apiari aua, apaka poiāori aua. Kākiti makamakaniāri ikinika Teoso sākire, oerekiniāri apanakini ikinika Teoso sākire imakamakani īkapani, poiāori itxaua Teoso auitexi ininiātaāua. Āti kākitipekana, ikaminiāri ikinika Teoso sākire, oerekiniāri apanakini ikinika Teoso sākire ikamini īkapani, apiari itxaua Teoso auitexi ininiātaāua. ²⁰ Ia nisāpiretai. Kaiōkatsopareriakori, pariseoakori pakini !ikamari atāo inakari Teoso nireēkiti. Ininiā hīte kaminiāri ninoa atokotxikana, !hāuiriāka hīiroini Teoso auitexi ininiātaāua. Atāo inakari Teoso nireēkiti hīkaminiā, hīroōpitika iuaā.

Omanākaretxi Pirena

²¹ –Hīte imarotari kākiti kitxakapirīka sāpiretaāka. Ia atoko inaāka: “Kona apanakini hōkape. Kokaniri anikaākako imisiritikomoni,” inaāka kitxakapirīka. ²² Uatxa apikomoni nota sāpiretaiko hīte. Maxikatīka pomanatiniāri pitari, panikaākako pimisiritikomoni. Pite napetiniāri pitari, ininiā auitexiakori misiritapitīkai. Pakiritiniāri pitari: “Kīkītei,” ininiā pimisiritiko pāitiki apokako. Nota txai hīte, kona erekari kokaniri. Iua atokokana kona erekari hinaperauatini. Hinaperauatiniā, ininiā maerekani misiritikoātaā hīsapitīkako.

²³ –Ininiā hīsikasaaki Teoso apisatoō hīsikakiti hīsikini īkapani, iuasaaki hīxinikari hītari homanatakiti. ²⁴ Iuasaakiika hītakanapariko hīsikakiti iuaā hīsikiniri apisa. Hīsako kati-maritika homanatakitimoni. Himisākiretari, homanākare hīxipokini īkapani. Iposo atoko kanapiriā, hīsikakiti tīkane sika hītxako Teosomoni –itxa Xesosi.

²⁵ Iuaīkana Xesosi sākirauiata:

–Kākiti kinirāo apoitakinīāi, ininiā pimisiritiko mereēkarimoni iua anikini apisapanika, katimariā pisa iuamoni. Pimisākiretari iua, kotxi pimisiritiko mereēkari sikaiko pite pimisiritakirimoni. Ininiā eereka iua takai kateia āki. Iuaā pikaikotako. Ininiā apisapanika pimisākiretariko iua pomanakiri. ²⁶ Atāo nisāpiretai, kona posipikari kateia ikinika pimisiritiko mereēkari paniātakiti pimīlkitxitakanisaaki –itxa Xesosi.

Kīpa Txīkitakai Maerekati Pikamini?

²⁷ Xesosi apikomoni sākirauiata:

–Hīte imarotapekari kitxakapirīka sāpiretakori: “Pītanoro minakotokatika kona pisirīkape.” ²⁸ Kitxakapirīka ikara atoko itxama. Nota sāpiretaiko hīte apikomoni. Sito atamatarari kinirāo oakata sirīkaka inakari, iuara kamapekari maerekati ākixinireē. ²⁹ Kona pauiritapiri maerekati pikamini txīkitaākari pitekata ikaikotini. Patamatakiti txīkitakinīāi maerekati pikamini, pimakatxakari poki, oka pitxari, kotxi maerekati pikaminiā, maerekani misiritikoātaā pokaākako. Apiaerekata Teosokata ātipirika pauini āti pokinoka pauini. ³⁰ Piuako pikikomoni auakari txīkitakinīāi maerekati pikamini, ininiā pisauaka, oka pitxa, kotxi maerekati pikaminiā, maerekani misiritikoātaā pokaākako. Apiaerekata mauakotikai pauini ātipirika Teosokata. Kona pauiritapiri maerekati kaikotini pitekata. Pitakanapariko maerekati.

Kīki Ītanorokata Itakanapakakini

(*Mateo 19.3-9; Marko 10.2-12; Arókasi 16.18*)

³¹ –Kitxakapirīka ia atoko itxa sākiretxi:

Pītanoro pitakanapiniā, aātsopa pisika oamoni İtanorotxi takanapiko aātsopati.

³² Iuaritika nota sāpiretaiko hīte, ! hītakanapaperoko pītanoro. Pitakanapiniāro, ininiā maerekati pikamapitika, kotxi eereka oa atxiīti nirekakari āti kiki. Ininiā iuasaaki oa kamari maerekati apaka pite xika. Apaka oa takakari kamari maerekati. Apakata pitakanapiniro pītanoro, ātikata osirīkiniā —itxa Xesosi sākire.

Atāopitika Inakari Sākiretxi

³³ Iuaīkana Xesosi sākirauata:

—Hīte imarotapekari kitxakapirīka sākiretxiti. Ia atoko itxapaniko: “Hīkamariko imakinika hīkamaenetakiti. Hīkamariko hīkamaenetakiti Teoso İkapani,” itxa. ³⁴ Notara sāpiretai hīte apikomoni: “Nikamapitikariko,” pinakasaaki, ! pakiriuākatapiri Teoso tixine uāka, kotxi iuaā Teoso auītetxi ininiātaūa. “Nikamapitikariko,” pinakasaaki, kona apikomoni pakir-itape. ³⁵ “Nikamapitikariko,” pinakasaaki, ! pakiriuākatapiri itixi uāka, kotxi Teoso uai aua apaka. “Nikamapitikariko,” pinakasaaki, ! pakiriuākatapiri Xerosareē uāka, kotxi auītetxi Apiananiri sitatxine itxa. ³⁶ “Nikamapitikariko,” pinakasaaki, ! pakiriuākatapiri pikīi uāka, kotxi !apakata pitxīkitakiniri piāko pomama inini, kasarori inini. Ātika piāko kona piposotari pitxīkitakiniri kasarori inini, pomamari inini. ³⁷ “Ari,” pinakasaaki, pikamapitikariko. “Kona,” pinakasaaki, kotxi kona piposotari pikaminiri. Kona āti sākiretxi ! pikamape. Maxikatīka kamakori sākiretxiti Satanasi sākire itxaua —itxa Xesosi.

Xikatxitakanīua Pirena

(Arókasi 6.29-30)

³⁸ Xesosi oerekarautapanika:

—Ia atoko kitxakapirīka sākiretxiti: “Neenamatsixaaki āti makatxakiniāri poki, pixikatx-itariko. Iuasaaki pimakatxakariko iua oki apaka. Pitsirīi pataka āti kākiti xika, pixikatx-itariko. Iuasaaki iua tsirīi apaka pimapatakako,” itxa sākiretxi kitxakapirīka. ³⁹ Txamari nota sāpiretaiko hīte apikomoni. Kona hīxikatxitapiri maerekati hītemoni auakasaaki. Āti aritiniāri pitoō, ininiā pikirioka ipinitoō iaritini İkapani. ⁴⁰ Atxiīti āti nirekari anikinii pimisiritiko mereēkarimoni, kotxi iua nirekari pite sikiniri pimāka iuamoni iua txineirote pimasikakani xika. Ininiā anikinii apisapanika, pisikariko pimāka inirekakiti, apaka apikomoni āti pimāka. Ikara atoko hīkamako. ⁴¹ Ia āti sākiretxiti: Āti paniātiniāi itii panikini āti ōti, ininiā ipi ōti panikari itii. Poerekariko pitraōki. ⁴² Atxiīti āti amanaāi pitii, ininiā pisikariko iuamoni inirekakiti. Iua amanainiāi pitii “Akamoni iuaīkana !nisikai,” ininiā iuasaaki pisikariko iuamoni —itxa Xesosi.

Pomanatakini Pītretini

(Arókasi 6.27-28, 32-36)

⁴³ Iuaīkana Xesosi sākirauata:

—Hīkenakotapekari ia sākiretxiti: “Hītiretariko hinirimane. Homanatariko himokaiakari.” Ikara atoko kitxakapirīka auari. ⁴⁴ Ikara atoko itxama. Nota sāpiretaiko hīte ipini-moni. Kona homanatapiri himokaiakari. Hītiretariko iua apaka. Hamanaāri Teoso hīte omanatakani erekari isikini İkapani. ⁴⁵ Apakatapitika amokaiakarimoni erekari akamini, kotxi Teoso kamari atokatxi kākiti erekarini auiniātaā iopinikini İkapani, apaka maerekani auiniātaā iopinikini İkapani. Iua iokanatarı āparaā atāo inakari kamakanimoni, apaka atāo minakati kamakanimoni. ⁴⁶ Hīte tirketakaninani hītiretiniā, kinirepa Teoso sikari erekari hītemoni hinirimanenokara hītirketakasaaki? Kotxi kākiti maerekati kamakani apaka tīretari ninoa tīretakani. ⁴⁷ Hīte misākiretakaninani himisākiretiniā, kākiti Teoso mimarotakani atoko hītxa, kotxi ninoa misākiretakani imisākiretana. ⁴⁸ İkinipoko hīri iaxiti auakari kamakiti erekari, ininiā iua atokokana hītxīkitakariko İkinipoko hīte kamakiti erekari —itxa Xesosi.

6

Xesosi Oerekari Teoso Sikiko

¹ Iuaīkana Xesosi sākirauata:

—Erepaniko. Erekarı pikamakasaaki, kona pikamapiri piuikiniua İkapani, erekari pikamakiti apanakini imarotini İkapani. Pikaminiāri erekari apanakini apokaerekatini İkapani, kona papakapari piparīka İki iaxiti, āri iaxiti auakari sikakiti. ² Aua kākiti ia atoko inakari. İkamakiti atxiīti erekari, txamari İxinikakiti kona erekari. Kākiti ikara atoko inakari sikarauatakasaaki minakati matiitimoni aiko Xoteo apotiitiniātaūa, apaka mapara kākiti napiniātaā, inirekarina İkinimane itikiniri erekari İkamakitana. Inirekarina kākiti İuikinina. Ikara atoko !pitxape minakati matiitimoni pisikarauatakasaaki. Pixinikariko ia: Ninoa apakapapekari İkinika erekari kākiti sikakiti, txamari !apakaparina erekari Teoso sikakiti. ³ Pisikarauatakasaaki minakati matiitimoni, kona paıiritapiri piuako pısaneremoni auakari imarotiniı piuako pikikomoni auakari sikakiti. ⁴ İkara atoko ininiā,

pitenani imarotari pisiäkiti. Piri iaxitikiri, ikinipoko atamatakari, iikixitaiko kākiti apisatō —itxa Xesosi.

Teoso Misäkiretiko Pirena
(Arókasi 11.2-4)

⁵ Iuaĩkana Xesosi sākirauata:

—Teoso himisäkiretakasaaki, kona hĩkamapiri kamisirienereri atoko hinini. Ninoa potxtari itiminina aiko Xoteo apotiitiniātaāua, kimaporĩ apaka, Teoso imisäkiretini ĩkapani. Ininiā ikinimane itikana. Hixinikari. Ninoa apakapapekari poxokonitxi uai ĩkorapokoriti auakari. Txamari ninoamoni atāo poxokonitxi !auari. ⁶ Teoso pimisäkiretakasaaki, pisa pitenani auiniātaā. Kona pauiřitapiri āti kaikotini pitekata Teoso pimisäkiretakasaaki. Iuaā pimisäkiretari piri matamatakoti. Iuaā iua atamataiko pite. Eereka isikaiko erekari iaxitikiri.

⁷ —Teoso pimisäkiretakasaaki, pimixinikariko pisäkire. Maxikatĩka kona pisäkirauatape uakata. Teoso sākire mauĩakati xinikari Teoso kenakotiniri isäkire kotxi kaiāori isäkire. ⁸ ĩkara atoko !pikamape pimisäkiretakasaakiri iua, kotxi pisäkirauatini apisapanika Teoso imarotapekari pinirekakiti. ⁹ Ia atoko hĩtxako Teoso himisäkiretakasaaki:

“Aĩri iaxiti auakari, ate nirekari piuāka paxitiko.

¹⁰ Anirekari ikini itixiti auakani auĩtetinii pite. Pite tixine pinireēkiti kamiko atokokana, anirekari pinireēkiti kamiko ĩkorapokoriti,

¹¹ Nipokori ikiniōtika pisikauako.

¹² Pimaxinĩkaretariko maerekati akamakiti. Maerekati atemoni kamakori amaxinĩkaretini atokokana pimaxinĩkaretariko.

¹³ Kona panikapeua aātaerekatikomoni. Pisikakauako ate, maerekati sauaki aāuakasaaki. ĩkara atoko piposota, kotxi pitenanira auĩtetxi txaua. Pitenanira kaposotiire. Ātipirika peerekai pite. Ameē.”

ĩkara atoko hĩtxako Teosomoni.

¹⁴ —Pimaxinĩkaretiniāri maerekati āti kamakiti pitemoni, ininiā piri iaxiti auakari maxinĩkaretari maerekati pite kamakiti apaka. ¹⁵ Pimaxinĩkaretaniāri maerekati āti kamakiti pitemoni, ininiā piri iaxitikiri kona maxinĩkaretari maerekati pite kamakiti apaka —itxa Xesosi.

Nipokori Takanapiko Pirena

¹⁶ Iuaĩkana Xesosi sākirauata:

—Aua kākiti ia atoko inakari. ĩkamakiti atxiĩti erekari, txamari ixinikakiti kona erekari. Kākiti ĩkara atoko inakari takanapari inipokotini Teosokata isäkirauatini ĩkapani. Txamari ninoa nirekari ikinimane imarotiniri itakanapinirina inipokotinina, kākiti iuikinina ĩkapani. Ininiā ninoa matinaniuata itooāna ĩkara kākiti imarotini ĩkapani. Atāo nĩtxai, ninoa apakapapekari ĩkinika erekari kākiti sikakiti, txamari !apakaparina erekari Teoso sikakiti. Kona ĩkara atoko !pitxape nipokori pitakanapakasaaki Teoso pimisäkiretini ĩkapani. ¹⁷ Hĩte ĩkara atoko !hĩkamape. Hinipokotini hĩtakanapakasaaki Teoso himisäkiretini ĩkapani, hārokatoōtaua. Hōeretari hiāko. ¹⁸ Ininiākara apanakini !imarotari hĩtakanapiniri hinikini. Ininiā hĩri matamatakoti, iuananira itikariko hĩkamakiti, apanakini mimarotakiniti, ininiā isikaiko hĩparĩka ĩki —itxa Xesosi.

Pitiretakiti

(Arókasi 12.33-34)

¹⁹ Iuaĩkana Xesosi sākirauata:

—Maxikatĩka kona papotiitapiri pitiretakiti uai auakari, kotxi atxiĩti kamara nikari pitii. Atxiĩti oerēkata. Atxiĩti kũtiriri ĩtirĩkari iua. ²⁰ ĩkara atoko kona pikamape. Papotiitariko pitiretakiti Teoso tixineē, kotxi iuaā !auari kamara. Iuaā tiĩtxi !oerēkata. Kona ĩxipoka. Kũtiriri !ĩtirĩkari iua. ²¹ Pitiretakiti auiniātaā, iuaā pixinikapika. Iuaā pinirekari pauini —itxa Xesosi.

Tirikapi ĩtotxiākiri Pirena

(Arókasi 11.34-36)

²² —Poki tirikapi atoko itxa piĩto ĩkapani. Poki ereka inakasaaki, ipinikare aua pākixinireē, ininiā pinireēkiti imakinika erekari. Erekarinokara patamatiniā, erekari pixinire. ²³ Txamari poki oerekasaakii maerekati pikamini, ipiā apoka pākixiniremoni. Iuasaaki tirikapi kamara na xatiki !auari pitemoni —itxa Xesosi.

Ipi Auĩtetxi Pirena

(Arókasi 16.13; 12.22-31)

²⁴ Iuaĩkana Xesosi sākirauata:

—! Apakata kākiti parīkauatini ipi iauūtena ĩkapani, kotxi atxiūti āti omanata, āti itireta. Atxiūti āti apokaerekata, āti inorita. Iua atokokana kākiti kona posotari iparīkauatini tiitxi ikinipoko iamotini ĩkapani, Teoso ĩkapani iparīkauatakasaaki. ! Apakata piauūtetetini Teoso, txineiro piauūtetetakasaaki.

Teoso Nīkatiniua Ate
(*Arókasi 12.22-31*)

²⁵—Ininiā nitxai: Pinirekari nipokori, iāriā pakini auāki pinini ĩkapani. Apaka pinirekari mākatxi piūto ĩkapani. Ikara pinirekini xika maerekaxiniretika kona pitxape. Erekarini nipokori. Apiaerekata pixinire. Erekarini mākatxi. Apiaerekata piūto. Ininiā ātipirika ! pixinikapiri nipokori, mākatxi pakini pinitini. ²⁶ Kona pipīkarauatape nipokori poiāo auakasaaki. Pixinikariko kotipiriki. Kona ninoa takarauata. Kona apotiitari ikiena. Kona ipotetari ikiena. Iuaritika piri iaxitiki sikakienata ninoa. Ininiā ninoamoni nipokori ! ixipoka. Teoso apia xinikai hīte. Ininiā kona pipīkarauatape. ²⁷ Kinirepa maerekaxiniretinoka pitxa? Pimaerekaxinirene ! itxikitakai apikomoni āti oara pauini.

²⁸—Kinirepa maerekaxiniretinoka pitxa pimāka pinirekini xika. Aāui pixinikako. Kona aāui parīkauata. !Ikamari imāka, iuaritika aāui peeri. ²⁹ Kitxakapirīka auūtexi Saromāo inakori, iteene katiiri itxaua. Kaiāori imāka ereri, iuaritika apia ereri ikinika aāui. ³⁰ Aāui ! okanani aua. Uatxa aua. Katana ikatikata iotikaāka. Iuaritika Teoso nīkatari aāui. Ininiā apiata inīkakai hīte. Ikamamākatapitikai. Poiāonoka hīte auikari Teoso sākire. Ikara xika maerekaxiniretinoka hītxa.

³¹—Ininiā maerekaxiniretinoka kona hītxape. “Kipa ninika? Kipa niāta? Nāpa napokari mākatxi?” kona hītxape. ³² Teoso sākire mauīākani maerekaxiniretinoka itxana ikara atoko. Piri iaxiti auakari imarotari pinirekaākiti. Ininiā maerekaxiniretika ! pitxape. ³³ Merepitpanika pinirekariko Teoso piauūte ininiāua. Iua nireēkiti pinitako, ininiā atāo inakarinoka pikamako. Ikara atoko inakari pikaminiā, pite nirekakiti apaka isikaiko. ³⁴ Maerekaxiniretinoka kona pitxape katana pinirekakiti pixinikini xika. Pinirekakiti auapitikako katana, iuaritika mitxipanika kona pixinikapiri ikara maerekaxiniretika, kotxi ikiniōtika aua ikara atoko inakari —itxa Xesosi.

7

Apoūretxi Pirena
(*Arókasi 6.37-38, 41-42*)

¹ Iuaīkana Xesosi sākiraūata:

—“Kona erekari pikamakiti,” kona pitxape ātimoni, ininiākara Teoso kona txai pite: “Kona erekari pite kamakiti,” !itxai, ² kotxi Teoso misiritai pimaerekani xika, āti pite misiritini atokokana. Iteene pimisiritiniāri āti imaerekani xika, iteene Teoso misiritai pite, pite maerekani xika. ³ Ikara ia atoko. Pisāpiretari āti: “Aāsorō aua poki āki,” txamari kona pimaākatari aātxirata pite oki āki auakari. Kinirepa ikara atoko inakari pikama? ⁴ ! Apakata pisākire pitarimoni: “Pauiritano aāsorō poki āki auakari nimakatzakini.” Ikara atoko pininiā !erekari, kotxi aātxirata aua pite oki āki. ⁵ Maerekati kamakari pite, kotxi pikamakiti erekari atxiūti, txamari maerekatinoka pixinikakiti. Pimakatzakariko aātxirata pite oki āki auakari merepanika, ininiā eereka apakata patamatini aāsorō pitari oki āki auakari pimakatzakini. Ikara oerekaua piteka maerekani auakasaaki, pitakanapariko piteka maerekani, ininiā eereka apakata pimoianatini āti iua maerekani itakanapini ĩkapani.

⁶—Kākiti kona sikari Teoso nakiti anāpamoni, kotxi atxiūti iua anāpa kirioka, akatsata txai. Iua atokokana Teoso nakiti kona asika Teoso mapaxitakatimoni, kotxi iua anāpa atoko. Eereka iua misiritapitikai.

—Apaka kona pinoakitsa ereri kona pisika irarimoni, kotxi iua katxaratari. Iua atokokanera Teoso mapaxitakanimoni kona hīsikari Teoso nakiti, kotxi eereka imisiritari Teoso nakiti noakitsatxi irari misiritini atoko —itxa Xesosi.

Kona Hītakanapapiri Teoso Himisākiretini
(*Arókasi 11.9-13*)

⁷ Iuaīkana Xesosi sākiraūata:

—Teosomoni pamanarauatakasaaki, papakapariko pinirekakiti. Pitarauatakasaaki, papokapitikariko pinirekiti. Aīri iaxitiki pakiritiniā, iua apakapipiretai. Ia atoko itxako: “Pikanikauata. Piīroā,” itxako. ⁸ Ikinika amanarauatakari apakapariko inirekakiti. Nitarauatakari apokariko initakiti. Teoso akiritakari apakapaākapitikako. ⁹ Amarini amanainiāri iri komiri, atauako kai sorokani isikitari imi? ¹⁰ Ximaki amanainiāri, atauako iminikani isikari? Konapitini. Irītxi kona kamari ikara atoko inakari. ¹¹ Kākiti maerekani

apaka imarotari erekari isikini amaritenamoni. Aïri iaxitikiri apiata imarotari isikiniri erekari iua anaakorimoni, ninoa amanaåkasaakiri.

Āti Pitiretini Pirena

¹² –Pixinikariko. Natokopa pinirekari apanakini tiretini pite? Ininiā iua atokokana pitiretariko apanakini. Ikara atoko itxa ikinika Teoso paniātakiti aātsopaā auakari, apaka Teoso sākire sāpiretakani sāpiretakiti kitxakapirīka –itxa Xesosi.

Ipi Kimapori Pirena

(Arókasi 13.24)

¹³ Iuačkana Xesosi sākiraauata:

–Teoso tixine hīroā axapitiri ĩronakikoātaā. Mitari ĩronakikoātaā sikari sari maerekani misiritikoātaā. Iua kimapori mitari, kotxi itomaneri kākiti sari iuaā. ¹⁴ Axapitiri ĩronakikoātaā, kimapori axapitiri. Iua apo sari auapininiika inini tixinemoni. Iua kimaporiti axapitiki, kotxi poiāoka kākiti sari iua kimaporiti –itxa Xesosi.

Omina, Ori Pakini Pirena

(Arókasi 6.43-44)

¹⁵ Iuačkana Xesosi sākiraauata:

–Erepaniko. Auapitika Teoso sākire sāpiretakari, txamari iua na atāo isāpireta, kotxi isāpiretari iua sākire Teoso sākirekata. Ikoketari. Atāo inakari ikoketa maerekatikata. Erepaniko. Pamonońkoniri iua. Mapara patamatakasaakiri, soti auite atoko itxa. Ākixiniremoni ākiti atoko itxa. ¹⁶ Pimarotari kākiti ikara atoko inakari, kotxi patamatari ninoa kamakiti maerekati. Inako mina kona iritari kīpaima. Aanaia kona iritari pama. Iua atokotxikana kākiti maerekati kamakani kona kamari erekari. ¹⁷ Ikinika aamina erekari, erekari iri. Aamina maerekati, ininiā maerekati iri. ¹⁸ Aamina erekari kona posotari maerekati iritini. Iua atokokana aamina maerekati kona posotari erekari iritini. ¹⁹ Aamina maereka iriti itoāka, arika inaāka. ²⁰ Ininiā aamina iriāra kākiti imarotari ereka inini. Iua atokokanera kākiti imarotaāka –itxa Xesosi.

Kākiti Teoso Tixine ĩročkani

(Arókasi 13.25-27)

²¹ Iuačkana Xesosi sākiraauata:

–Apanakini txano nota: “Pite niauīte” inakani, !isapanina Teoso auītetxi ininiātaūua. Niri iaxiti auakari nireēkiti kamakarinanira sapaniko iuaā. ²² Itixi xipokini ōtisaaki, itomaneri kākiti maxikatika akiritano: “Pite aūite apiatakari. Papakapaua. Aōerekapekari pisākire apanakinimoni. Aōmitikapekari maerekati matamatakoti pīuākaā. Akamapekari posotiiretxi kaiāopokori,” itxanako ninoa. ²³ Txamari nitxanako: “Kona nimarotai hīte. Hīsipiniikaua. Maerekatira hīkama.” Ikara atoko nisāpiretanako ninoa, kotxi maerekati kamakani itxauana –itxa Xesosi.

Aapokotxi Kamakari

(Arókasi 6.46-49)

²⁴ Iuačkana Xesosi sākiraauata:

–Nisākire kenakotakari, nisākire nīkaenetakari, ia kiki kimaroreri atoko itxa. Ia kiki kamakasaakiri aapoko, iopitimita aapokotxi tsota. Otsomori ikama. ²⁵ Ininiā āparaā kipakasaaki, uini apoātakasaaki, ĩtima apisatakasaaki, aapoko kona irika, kotxi iua tsota itakapekari otsomori. Nisākire kenakotakani nisākire nīkaenetakani, iua kiki kimaroreri atoko itxana.

²⁶ –Nisākire kenakotakari, nisākire miinīkaenetakati, kākiti miīketiti atoko itxa. Iua kamari aapoko ikipatxiteē. ²⁷ Ikipakasaaki, uini apoātakasaaki, ĩtima apisatakasaakiri, aapoko irika. Irika, kotxi aapokotxi !otsomori. Poiāo tsomikari. Irikasaaki, ikinika xipoka. Ikara atoko itxa nisākire miinīkaenetakati. Iua imarotapitikamari, txamari !ikamari. Ikara atoko nisākire mapaxitakani –itxa Xesosi.

Xesosi Posotiire Pirena

²⁸ Xesosi oerekarauatini xipoka atoko, kākiti xinikari: “Paimatireri Xesosi. Iua imarotari atāo.” ²⁹ Ikara atoko ixinikana, kotxi Xesosi imarotapitikari Teoso sākire oerekini. Kaposotiireri iua isākirauatakasaaki. Kaiōkatsoparerini atoko kona itxa. Ninoa kona imarotari Teoso sākire Xesosi imarotiniiri atoko.

¹ Xesosi ixirata iokiriitaka atoko, itomaneri kākiti sari iua tikini. ² Iuasaaki amianatakari maere matati apoka iuamoni. Ikapotoreēkaua iua apisatoō. Itxari:

—Nimarotari pinirekiniā, erekapeka pitxīkitakano nota —itxa.

³ Xesosi maātakari iua. Ininiā itxa:

—Ari, ninirekapitikari. Erekapekai —itxari.

Iuasaakipeka erekapeka itxa. ⁴ Ininiā Xesosi:

—Kona ikora !pisāpiretapi apanakinimoni. Uatxa sasetotximoni pisa. Poerekaua iuamoni erekapeka pinini. Moisesini paniātakiti atoko pikama. Pikaminiāri ipaniātakiti atoko, ininiā ikinimane imarotari erekapeka pinini —itxa Xesosi.

Ereka isari Xesosi paniātakiti ikamini ikapani.

Sotato Auīte Nitiri Makananitiko
(Arókasi 7.1-10)

⁵ Kapanaoō sitatxiti apokasaaki, sotatoakori auīte sari Xesosimoni. Homano itxaua. Iua iteene amanaāri Xesosi:

⁶ —Xesosi, ninitiri iteene amianata naapoko. Iikininana. !Itūpokotaika. Inikoriātsiitari —itxari Xesosi.

⁷ Ininiā Xesosi:

—Iuaā nisako erekape inini ikapani —itxa Xesosi.

⁸ Ininiā iua Homano:

—Konapitini. Pite auītetxi apiatakari pitxaua. Nota poiāorino. !Apakata naapoko piīroini. Pisākirenani piokanata. Ininiā erekapeka itxako ninitiri. ⁹ Nimarotari ikeranani apakatako, kotxi nota kamari nota auīte paniātakiti. Apaka sotato auīte nitxaua nota. Nisākirauataksaaki, nisotatone kamapitikari nipaniātakiti. Nota txari: “Pisa.” Iuasaakipeka isa. Nitxari āti: “Pina.” Iuasaakipeka ina itxa. “Ia pikama,” nitxari ninitiri. Iuasaakipeka ikamari. Ininiā pisākirenani apakatapitika —itxari Xesosi.

¹⁰ Isākire Xesosi kenakotakasaaki, iteene ipotxitari isākire. Iposo atoko itxa:

—Atāo nitxai. Isaeo auakani poiāo auikari nisākire. Ia Homano itxaua, iuaritika apiata iua auikari nota posotiire. Kona nitikapanikari kākiti Isaeo auakari auikiniri nisākire ia kiki auikiniri atoko. ¹¹ Nota sāpiretai hīte, itomaneri kākiti āti uāka atokatxi pokīkini tixinimoni auakani, atokatxi ereēkokini tixinimoni auakani apaka, itomaneri itixi auakani kiiniritauatako Teoso auītetxi ininiātaūa. Ninoa nipokotako anirimanekata kitxakapirīka auakanikata. Apraō, Isaki, Xakoo pakinikata inipokotana. ¹² Iuasaaki apanakini Apraō apika mekaniriakori kona sari iua Teoso kiiniritemoni, kotxi ninoa !auikari Teoso sākire. Piākatximoni iokanataākanako. Iuaā itxiapatana, akatsakatsiriītauanako imisiritikona xika —itxa Xesosi sākire.

¹³ Ininiā Xesosi txari sotatoakori auīte:

—Pisa paapokomoni. Pite auikari niposotiire pinitiri erekape inini ikapani. Uatxa auape pinirekakiti —itxa Xesosi.

Ininiā initiri iuasaakipeka erekape itxa.

Simāo Petro Imakiro Makananitiko
(Marko 1.29-34; Arókasi 4.38-41)

¹⁴ Iposo atoko Xesosi sari Petro aapokomoni. Iuaā apokasaaki, atamataro Petro imakiro. Osirimata nopini osirīkanāta. Oāpoomata. ¹⁵ Ininiā Xesosi takapiotaua ouako nopini. Iuasaakipeka apoomari xipoka. Ininiā oōkitikaua. Osikakienatana ninoa.

Xesosi Makananitana Amianatakani

¹⁶ Mapiāpeka inakasaaki, kākiti anikana itomaneri maerekati matamatakoti auaiītotakini iuamoni. Isākireē omitikana maerekani matamatakoni. Imakananitana ikinikana amianatakani. ¹⁷ Ikara atoko itxa Xesosi, kotxi inirekari Isaia sākire iaōka apokini. Kitxakapirīka Teoso sākire sāpiretakari Isaia inakori txari:

Iua taretariko amianatakari. Imaktxakariko aamianare. Imakananitaua. Iuaka atatsi-irauata ate ikapani.

Kākiti Xesosi Imoianatinina Nireēkani
(Arókasi 9.57-62)

¹⁸ Itomaneri kākiti iuakata auakasaaki, Xesosi txari imoianariakori:

—Masa ipiniāmoni —itxana.

¹⁹ Iuasaakipeka āti kaiōkatsopareri apoka Xesosimoni. Itxa:

—Koerekareri, nota iposope nisini pite nirekinimoni —itxa.

²⁰ Ininiā Xesosi:

—Atauako pinirekatari pisini notakata? Aripa aua auini iriko. Araākani auari ikoa. Txamari nota kākiti itari iaxitiki !auari nimakiniātaā —itxa Xesosi.

²¹ Ātipekana apoka Xesosimoni. Xesosi moianari iua. Itxari:
 –Niaūte, pauiritano niri nikatanapini merepanika, kotxi kiomātxipekari iua. Eereka nisa pitekata –itxari.

Iteene iua linirekari isini Xesosikata. ²² Xesosi apakapapiretari:
 –Notakata pisa uatxa. Nisākire mauīākani ipikani atoko itxana. Ininiā pauiritana ipikani katiniri inirimane nisākire mauīākani –itxa Xesosi.

Xesosi Iotokakiniri Ītima Pirena
 (Marko 4.35-41; Arókasi 8.22-25)

²³ Iposo atoko, Xesosi imoianariakorikata iereētaua, ĩpiriātina ĩkapani. ²⁴ Mokatanitika ĩtima kataparari apoākata. Tsakati okari āparaā kanaua āki. Iuasaaki Xesosi imakanāta.

²⁵ Imoianariakori sari iuamoni. Ōpirīkarina. Akiripoakatana:
 –Apiananiri, ĩpauiritapiri apinini. Apinanapanoka –itxana.

²⁶ Ininiā Xesosi:
 –Kinirepa hīpīkarauata? Poiāonoka hāuikari niposotiire –itxa.
 Iposo atoko ōkitikaua, pinita itxari ĩtima, tsakati pakini. Iuasaakipeka ĩtima, tsakati pakini iotoka. ²⁷ Ininiā imoianariakori tsorīkaāta. Itxana:

–Natokopa inakaripa ia kiki? Ītima, tsakati pakini kenakotari isākire –itxana imoianariakori.

Ipi Kiki Maerekani Matamatakoni Auaītotakini
 (Marko 5.1-20; Arókasi 8.26-39)

²⁸ ĩpiniā apokasaakina Xerasa tōpamoni, itaōkitarina ĩpi kiki itomane maerekani matamatakoni auaītotakini. Akauariā auanātana. Paneenamana. Ikara xika kākiti pīkari akauarimoni isinina. ²⁹ Xesosi inaāpotakasaaki, maerekani matamatakoni ĩtoāna auakani akiripoakata:

–Xesosi, Teoso ākiri pitxaua. Kiripa pinirekaka atemoni? Pite ina uaimoni amisiritiko ōti apisapanika pimisiritiniua ĩkapani atxiīti? –itxarina.

³⁰ Ikara ininiātaā takote auana itomane irariakori. Ikira atoko inipokonātana. ³¹ Ininiā maerekani matamatakoni txari:

–Ate pomitikiniā, irariakorimoni piokanataua –itxarina.

³² Ininiā Xesosi:

–Hīsipeka ninoamoni –itxa.
 Iuasaakipeka irariakori ĩtoā ĩroāna. Ininiā imakinikana irariakori miteēkata. Iokiriīkatana. Ipoamoni isana. Iuaā ikomokana, axāpoāta itxana. ³³ Ninoa irariakori nīkatakani miteka sitatximoni. Iuaā ikinika isāpiretana irari ĩpinini pirena, kiki maerekani matamatakoni auaītotakini pirena apaka. ³⁴ Ininiā ikinimane sitatxikini sari Xesosi itaōkitarina ĩkapani. Iua itaōkitakasaakina, amanaārina ninoa tixine itakanapini ĩkapani.

9

Matīpokotakati Pirena
 (Marko 2.1-12; Arókasi 5.17-26)

¹ Ininiā Xesosi iereētaua kanauaā. Ikanapiriā iua auinimoni Kapanaoō sitatxitimoni. ² Ātikaka kikiakori minari matīpokotakati Xesosimoni. Xesosi imarotari ninoa auikiniri iua sākire. Ininiā itxari:

–Namarite, pipoxokoniuatoko. Pimaerekani makatxakapeēkaika –itxa.

³ Iuasaaki aua ātikaka kaiōkatsoparerini iuaā. Ninoa ākixinireē itxana:

–Kona erekari isākire. Teosonanira posotari kākiti maerekani imakatzakini –itxana ninoa.

⁴ Xesosi imarotari maerekati ixinikakitina ākixinireēna. Ininiā iua txa:

–Kinirepa hīuākatari nisākire maerekati inini? ⁵ Nītxari iua imaerekani nimakatzakini, txamari ! himarotari imaerekani atāo nimakatzakini. “Pōkitikaua. Pītipokota,” nininiā, himarotari nisākire atāo ininiāua, kotxi hītikari. Niposotiire imaerekani nimakatzakini ĩkapani, niposotiire iua nōkitikini ĩkapanitxikana. ⁶ Ininiā uatxaika noerekai hīte, Teoso iokanatanota hītari iaxitiki ĩkorapokoritimoni kākiti maerekani nimakatzakini ĩkapani –itxa Xesosi.

Ininiā itxari matīpokotakatimoni:

–Pōkitikaua. Pisirimata pikoseka, sipe pitxa paapokomoni –itxa Xesosi.

⁷ Iuasaakipeka iua ōkitikaua, aapokomoni sipe itxa. ⁸ Ikara inakari apanakini itikasaaki, ĩpīkarauatana.

–Peerekari Teoso, kotxi iua oerekari iposotiire kākitimoni –itxana.

*Mateo Pirena**(Marko 2.13-17; Arókasi 5.27-32)*

⁹ Ikara inakari oereka atoko Xesosi sipeka. Isikasaaki, itaōkitari Mateo inakori. Auītetxiakori txineirote apotiitakari iua. Xesosi napakasaaki, iitopākanāta txineiro apakapiniātaā. Ininiā Xesosi txari:

—Masa notakata pimoianatinino ĩkapani.

Ininiā Mateo ōkitikaua, Xesosikata sa itxa. ¹⁰ Eereka Xesosi imoianariakorikata nipokota Mateo aapoko. Txineiro apotiitakani, apanakini kākiti maerekati kamakani pakini apoka Xesosikata inikinina ĩkapani. Kākiti kona potxtitari txineiro apotiitakani, kotxi ninoa sĳkaro oa txineiro āti uāka auīteakorimoni. ! Neerekana ninoa. ¹¹ Pariseoakori itikari ninoa nipokotini, ininiā itxana Xesosi moianariakorimoni:

—Kinirepa hĳauīte nipokota txineiro apotiitakanikata, maerekanikata? —itxana.

¹² Ininiā Xesosi kenakotari ninoa sĳkire. Itxa:

—Maerekati kamakari amianatakari atoko itxa. Ninoa nirekari erekape ininina. Kākiti mamianatakani !nirekari ĩpini sikakarimoni isinina. Amianatakaninoka nirekari ĩpini sikakarimoni isinina. Hĳte linirekari nota makatxakiniri himaerekani, kotxi hĳte uākatari ! auari himaerekani. ¹³ Hĳxinikariko ia Teoso sĳkire iōkatsopatakori:

Hĳsĳkarauata notamoni. Apiaerekata hiamonĳkiniri apanakini.

Nota ina ĩkorapokoriti kona kākiti “atāo inakarinoa kamakarino nota” inakani ĩkapanini, kotxi ninoa uākatari erekarini ininiāuana, txamari kona erekana. Kākiti maerekati kamakani ĩkapanira nina nota uai imaerekanina itakanapinina ĩkapani —itxa Xesosi.

*Nipokori Takapaniko Teoso Misĳkiretiko ĩkapani**(Marko 2.18-22; Arókasi 5.33-39)*

¹⁴ Eereka Xoāo kapatxisareri moianariakori apoka Xesosimoni. Itxana:

—Ate, pariseoakori pakini atakanapari anĳpokotini itokata Teoso amisĳkiretini ĩkapani. Kinirepa pite moianariakori !itakanapari inikinina Teoso imisĳkiretinina ĩkapani? —itxana.

¹⁵ Ininiā Xesosi apakapapiretana:

—Nota kiiniri kamakari atoko nitxa. Kiki nirekiniā ĩtanorouatini, ikamari kiiniri. Iuasaaki imoianariakori kona nirekari imatinaniuatinina, iua ninoakata auakasaaki. Ininiā kona itakanaparina inikinina Teoso imisĳkiretinina ĩkapani. Āti ōti nimaĳkaĳkako. Nanĳkaĳkako ninoa mauakaniātaā. Iuasaakiko itakanaparina inikinina Teoso imisĳkiretinina ĩkapani —itxa Xesosi.

Mĳkatxi Tĳapanatiko Pirena

¹⁶ —Kiomĳtxiakori kitxakapirĳka auakani sĳkirekata kona hĳkokepapi nota sĳkire. Ikara hĳkaminiā, ininiā mĳkatxi kitxakari amaneriā hĳtĳapanatini atoko itxa. Mĳkatxi kitxakari amaneriā kona hĳtĳapanatape, kotxi parokasaakiri, amaneri txiĳika, ininiā ikatsorĳkari mĳkatxi kitxakari. Ininiā mitari ĩtsorĳkare. Mĳkatxi amaneri nota oerekakiti atoko. Mĳkatxi kitxakari, kākiti kitxakapirĳka oerekakiti atoko itxa. Hĳkokekiniāri kitxakapirĳka oerekakiti, amaneri oerekakitikata, imakinika xipoka.

Sako Aamata Kamakori

¹⁷ —Kitxakapirĳka kākiti takari ĳariā sako aamata kamakori āki. Iuasaaki kona kākiti takari amaneri ĳariā kitxakari mata āki, kotxi ĳariā txiōkaĳtakasaaki, itĳkaĳpota. Ininiā omata kitxakari tsorakitako, kotxi paikori. Kona itĳka. Ininiā ĳariā katxaka. ĳariā, aamata pakini xipoka. Amaneri matariā itakaĳka ĳariā amaneri. Ikara atoko ininiā, erekapitkari. Kona ĳxipokapaniko. Iua atokokana kona hĳkokepapiiko kiomĳtxi kitxakapirĳka oerekakiti nota oerekakitikata —itxa Xesosi sĳkire.

*Xoteoakori Auīte Pirena**(Marko 5.21-43; Arókasi 8.40-56)*

¹⁸ Xesosi sĳkirauatapanika, inakasaaki Xoteoakori auīte apoka iuamoni. ĩkapotoreĳkaua Xesosi apisatoō. Itxa:

—Namarite opinanapanoka. Masa. Piuako pitaka oa nopini, ininiā kona opina —itxari Xesosi.

¹⁹ Ininiā Xesosi imoianariakorikata ōkitikaua, iuakata sa itxana.

*Xesosi Mĳka Mĳatakakoro**(Mateo 9.20-22; Arókasi 8.43-48)*

²⁰ Isikasaakina, sito apoka iua porikimoni. Oamianare oārĳka liotokiniāro. Tosikanani oamianatini. Oĳpokasaaki, omaĳtakari imĳka ĳmapotomatare. ²¹ Oĳkixiniĳre ōtxa:

—Imĳka nimaĳtakiniā, erekape nitxako —otxa.

Ininiā otĳkakari imĳka. ²² Iuasaakipeka Xesosi kirioka, atamata itxaro:

–Namarite, kataparaxinire pitxako. Pauikari niposotiire, ininiã erekapekai –itxaro. Iuasaakipeka oa erekape.

Xáiro Ákero Ókitikiko Pirena
(*Marko 5.35-43; Arókasi 8.49-56*)

²³ Iposo atoko Xesosi sari Xoteoakori auíte aapokomoni. Iuaã apokasaaki, iiroã. Itikari sokonaki xókakani, itomaneri kákiti txiapatakani apaka. ²⁴ Ininiã Xesosi:

–Mapara hña, kotxi oa amarini kona opina. Omakanãta –itxa Xesosi.

Ininiã ninoa napetari Xesosi:

–!Omakanãta. Opípe. Pite !imarotari –inapetarina.

²⁵ Ikinimane mapara isikasaakina, Xesosi sari oa átokoromoni. Imaãkaro ouako. Iuasaakipeka oókitikaua. ²⁶ Ikara ene iaripireta iua tópa.

Xesosi Kósiãrepeka Txíkitakari Mõsiãreti

²⁷ Iposo atoko Xesosi sipe. Iuasaaki ipi mõsiãreni sari iua tikini. Iuasaaki ninoa akiripoakata:

–Tavii apika mekanirii, piamoníkaua ate –itxana.

²⁸ Aapokotxi Xesosi iroãkasaaki, ninoa iroã apaka. Ininiã Xesosi:

–Hãuikatarini niposotiniri erekapeka nitxíkitakinii híte? –itxa Xesosi.

Ininiã ninoa:

–Ari, Apiananiri –itxana.

²⁹ Ininiã itakapiotaua ninoa oki nopini. Ininiã itxa:

–Ari, hãuikakiti iaóka itxako –itxa Xesosi.

³⁰ Iuasaakipeka ninoa kósiãrepeka itxana. Ininiã Xesosi:

–Kona hñãpiretapiri nikamakiti apanakinimoni –itxa Xesosi.

³¹ Eereka ninoa sipe. Txamari iaripiretarina ikamakiti ikinika iua tópa.

Masãkireti Pirena

³² Ninoa kiki potorikasaaki, masãkireti anikaãka Xesosimoni. Iua kona kasãkireri, maerekati matamatakoti auaítotakiti xika. ³³ Iuasaaki Xesosi omitikari iua maerekati matamatakoti. Iuasaakipeka iua kiki sãkirauata. Itomaneri kákiti itikari. Iuasaakiika ninoa tikoka. Ininiã itxana:

–Ikinika Isaeo tixiniã auakani, mitxi !itikapanikari ikora atoko inakari –itxana.

³⁴ Txamari pariseoakori txari:

–Xesosi omitikari maerekati matamatakoti Satanasi posotiireë –itxana.

Na atão ninoa sãkire.

Xesosi Ikini Sitatxiti Sini

³⁵ Ininiã Xesosi sari ikini sitatxiti tópa. Aapokotxi auiniãtaã apaka isa. Oerekarauata aiko Xoteo apotiiniãtaãua. Isãpiretari Teoso iokanapirena erekari, Teoso auítetxi ininiãua pirena. Apaka erekapeka itxíkitakana ikinipoko amianatakani. Ikini sereti amianari aua kákitimoni. Ikinika imakananita. ³⁶ Atamatakasaakina ninoa kákitipokoni, iamoniãkana ninoa, kotxi soti auíte miniãkatakoni atoko itxana, kotxi !imarotarina isinimonina. Imaãkauana.

³⁷ Ininiã itxari imoianariakori:

–Kaiãori kákiti iposope auikiniri nisãkire, txamari !imarotarina nisãkire, kotxi likenakotapanirina. Ninoa kiki erekari atoko itxana. Imakinika iposope iuaã. Ininiã iposope auikinirina nisãkire. Txamari, poiãoka paríkauatakani aua nisãkire isãpiretinina ikapani.

³⁸ Ininiãkara himisãkiretariko Apiananiri iaxitikiri iokanatinina paríkauatakani iua sãkire auíãkani apotiitinina ikapani. Ikara atoko hñtxako Teosomoni –itxa Xesosi.

10

Xesosi Mereña Tosi Imoianariakori

(*Marko 3.13-19; Arókasi 6.12-16*)

¹ Xesosi mereña tosi imoianariakori. Isikari iposotiire ninoamoni maerekati matamatakoti omitikinina ikapani. Isikari iposotiire ninoamoni amianatakani imakananitinina ikapani, ikinika amianari inokasaakina ninoa amianatakani. ² Naia imoianariakori uãka: Merepitipanika auari Simão Petro inakorima, apaka itari Átree inakorima. Auari Txiakoma, apaka itari Xoãoma. Ninoa Sepeteo anaakori. ³ Auari Piripima, Patoromeoma, Tomeema. Apaka auari Mateoma, txineiro apotiitakari. Apaka áti Txiakoma, Aoepo ákiri. Aua Tateoma. ⁴ Aua Simãoma, Homano omanatakari. Apaka aua Xotasi Isikariotxi inakorima. Iua Xesosi mĩkapiritakari itxaua. Ninoa Xesosi moianariakori itxauana.

Xesosi Iokanataka Imoianariakori Kákitimoni

(*Marko 6.7-13; Arókasi 9.1-6*)

⁵ Ininiā Xesosi iokanatanana ninoa isākire isāpiretinina. Ia atoko òtākikana:

—Kona hīsipeko Xoteo minakonimoni, apaka Samaria tōpa sitatxitimoni kona hīsipeko. ⁶ Hīsako kākiti Isaeo tixinikinimoni. Hinirimanemoni, Xoteoakorimoni hīsako. Ninoa soti auīte pīpinanaākani atoko itxana. ⁷ Hāpokasaaki kākitiimoni, hītxariko: “Teoso ikinimane auīte ininiua manapi paītiki apokako.” ⁸ Himakananitanako amianatanani. Maere matati erekapeka hītxikitakako apaka. Ipīkani hōkitikako. Homitikariko maerekati matamatakoti kākiti auāitotakini. Ikara atoko hīkamako. Kona hīte ikitxitari Teoso hāpakapakiti ikapani. Ininiā ikara atokokana hītxako. Kona hinirekapiri kākiti ikitxitini hīte, hīte sikakiti ikapani. ⁹ Kona hanikapero txineiro oro kamakoro. Pirata kamakoro, ātiāo txineiro apaka, kona hanikape. ¹⁰ Uatxa hianaxitakasaaki, sako mata !hanikape. Āti himāka !hanikape. Āti hīkiti mata kona hanikape. Hītsonere !hanikape. Kona himaākapeua, kotxi parīkauatakani apakapariko nipokori. Hinirekakiti apokapitikako.

¹¹ —Sitatxi hāpokasaaki, hinitari kākiti Teoso sākire kenakotakani, hīte apakapakani. Hīkaikota ninoakata. Eereka kona hīsipe āti aapokomoni hīkaikotini ikapani. ¹² Aapokotxi āki hīroākasaaki, hītxako: “Erekari Teoso sikakiti kaikotako hītekata,” hītxako. ¹³ Kākiti ipoxokoniritika apakapiniāi, hītxako: “Teoso takari erekari hītemoni,” hītxako. Imanirekakaniāi, hītxariko: “Teoso kona takari erekari hītemoni.” ¹⁴ Atxiiti aapokotxi hāpokasaaki, kākiti iuaātaā !apakapai. Atxiiti !inirekarina hīsākire, ininiā iuaasaaki hīsipeka. Hītakanapariko iuaātaā. Hīpotorikasaaki, hīmakatzakari kipatxi hīkiti mataā auakari. Ininiā iuaasaaki ninoa imarotari Teoso kona apokaerekatana. ¹⁵ Hīxinikariko ia nisākire. Kākiti misiritiko òti apokasaaki, ninoa apiata misiritaāka. Sotoma sitatxiti auakani, Komoha sitatxiti auakani pakini misiritaāka poiāoka —itxa Xesosi.

Misirikaretxi Pirena

(Marko 13.9-13; Arókasi 21.12-19)

¹⁶ Iuaīkana Xesosi sākirauata:

—Erepaniko, pamonōkoniri. Hīte soti auīte atoko hītxa, kotxi !kaposotiirei hīte, iuaritika niokanatai kākitiimoni. Ninoa ākiti atoko, ininiā erepaniko. Ininiā kimarorei hītxako. Imini kamororeri atoko hītxako. Ininiā maerekati ninoa auakiti kona misiritai. Iuaasaakiika kamao atoko hītxako, kotxi kamao !imisiritari kākiti.

¹⁷ —Erepaniko. Araōkire hītxako. Auako kākiti kinirāo anikinii maxikatīika kākiti misiritiko mereēkanimoni. Apanakini xirokaiko hīte maxikatīika aiko āki Xoteo apotiitiniātaāua. ¹⁸ Nota sākire hāuikini xika hanikaākako auītetxiakorimoni himisiritiko himarotini ikapani. Ikara atoko ininiā, iuaasaaki erekapitirari, kotxi hīsāpiretariko nota sākire iuaā auakanimoni, Xoteo minakonimoni apaka.

¹⁹ —Kākiti misiritiko mereēkarimoni hanikikosaaki, kona himaākapeua hīsākirauatini apisa. Teoso sikaiko hīsāpirena tīkane. ²⁰ Sākiretxi hīsāpiretakiti kona hīte sākireni. Erekari Matamatakoti, iuarako sikariko sākiretxi hīsākirauatini ikapani iuaasaaki.

²¹ —Āti òti hītari sikaiko hīte homanatakinimoni okinii ikapani, kotxi hīte auikari nota sākire. Iua atokokanerako irītxi sikariko imi ātimoni okiniri ikapani, kotxi imi auikari nota sākire. Auako apaka imi omanatinina iri, inoro pakini, kotxi inoro, iri pakini auikari nota sākire. Iua sikanako ātimoni okinina ikapani. ²² Ikinimane omanataiko hīte nota sākire hāuikini xika, iuaritika hāuikiniāri nisākire ātipirika, nimakatzakai himapinakani ikapani. ²³ Sitatxiā hāuakasaaki, himisiritikosaaki, āti sitatxitimoni himitekako. Atāo nota sāpiretai hīte. Kona hīte xipokapaniri hīparīka ikini sitatxiti Isaeo tixini hītari iaxitiki kanapiriini apisa —itxa Xesosi sākire.

Apiatakari, Poiāori Pakini

²⁴ Iuaīkana Xesosi sākirauata:

—Apaiaōkarauatakari poiāo. Koerekareri apiata. Apaka nitiritxi poiāo. Iauīte apiata. ²⁵ Apakatapitika apaiaōkarauatakari koerekareri imarotakiti iaōka imarotini. Iua atokokanera nitiritxi iua auīte atoko inini. Apanakini akiritano nota “Peosepoo,” Satanasi inakori. Ininiā itakauākatai hīte hīuāka apia maerekati, kotxi nota anaakorirai hīte —itxa Xesosi.

Kipatakori !Auari

(Arókasi 12.1-3)

²⁶ —Ininiā kona !hīpīkapena ninoa maerekati kamakani, kotxi nota kanapiriākasaaki, kona kipatakori auapanika. Ikinika imarotaākako. ²⁷ Hītemoni ikanōka nimaasakapiretakiti, ikara nisākire hākiripoakatako aapokotxi nopini imakinika kākiti imarotini ikapani. Uatxa hītemoninani nisāpiretakiti āti òti ikinimanemoni hīsāpiretakoti.

Kīpa Apīka?

(Arókasi 12.4-7)

²⁸ Kona hīpīkapena hīito okakani, kotxi !iposotarina hīxinire okinina. Hīpīkariko Teoso, kotxi iuanokara posotari iokanatinii hīte, hīito, hīxinire pakini maerekani misiritikoātaā. Iuara hīpīkako.

²⁹ —Ipi kotipiriki īki poiāo, ātika txineiro otanoka. Iuaritika hīri iaxiti auakari tiretana ninoa. Imauiritakaniāri, kona ātika ipina. ³⁰ Kipakinipa piāko pikiiā auakari aua? !Pimarotari. Teoso imarotapitikari, kotxi iteene inīkatai, ininiākara !hīpīkarauatape. ³¹ Kotipiriki īki poiāo, iuaritika Teoso tiretari kotipiriki. Ininiākara kona hīpīkarauatape. Kaiāopokori kotipiriki auiniā, iuaritika hīte īki apiata, ininiā Teoso tiretapitikai hīte —itxa Xesosi.

Xesosi Tiretakani, Xesosi Manirekakani Pakini
(Arókasi 12.8-9)

³² Xesosi sākirauatapanika:

—Apanakini apisatoō hīsāpiretiniāri: “Xesosi nakiti nitxaua nota,” iua atokokanerako nitxariko niri iaxiti auakari apisatoō: “Nota nakitipitikara iua,” nitxako —itxa Xesosi. ³³ Hīsāpiretiniāri apanakini: “Xesosi nakiti !nitxaua nota,” iuasaaki nisāpiretari niri iaxiti auakari: “Kona nota nakitini iua.”

Pinirekakiti Pirena

(Marko 8.34-35; Arókasi 12.49-53; 14.26-27)

³⁴ —Kona hīxinikapiri nota ikorapokoriti napokini neenamatzxi nixipokini īkapani. Kotxi kākiti auikari nisākire, ininiā eereka apanakini omanatana. Kona neenamatzxi xipokapanika, kotxi nota minari niposotiire maerekati nixipokini īkapani. ³⁵ Nota apokini xika imi omanatana iri, inoro pakini, kotxi ninoa auikari nisākire. Tīīrotxi omanataro oimakiro, kotxi āto omanatano nota, āto tiretano nota. ³⁶ Iuasaaki pinirimane pimokaiakarinarikaroko itxauanako.

³⁷ —Poiāoka pitiretiniāno nota, apiata pitiretiniāna pinoro, piri pakini, kona erekari nimoianari pininiua. Apiata pitiretiniāna pamariteakori, kona erekari nimoianari pininiua. ³⁸ Nota kinirāo moianataka hinakasaaki, notakata hīsa. Himamūteenekakanisaakiri himisir-itiko nota īkapani, ininiā ! apakata himoianatinino. ³⁹ —Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata —itxa Xesosi.

Hīte Apakapakani Pirena

(Marko 9.41)

⁴⁰ Iuaīkana Xesosi sākirauata:

—Kākiti hīte apakapakani, apakapano nota apaka. Nota apakapakari apakapari nota iokanatakari apaka. ⁴¹ Papakapiniāri Teoso sākire sāpiretakari, kotxi iua sāpiretari Teoso sākire, ininiā papakapari erekari Teoso sikakiti iua apakapakiti iaōka. Papakapiniāri atāo inakari kamakari, kotxi iua kamari atāo inakari, ininiā papakapari erekari Teoso sikakiti iua apakapakiti iaōka. ⁴² Pisikiniāri āparaā nimoianari poiāorimoni iātini īkapani, kotxi nimoianari itxaua, Teoso iikxitapitikai pite —itxa Xesosi.

11

Xoāo Kapatxisareri Tikini Sikani

(Arókasi 7.18-35)

¹ Xesosi moianariakori tosi pakini isākire oerekini xipoka atoko, Xesosi sipe. Isa āti sitatxitimoni, eereka āti sitatxitimoni Karirēia tōpa itxaāpota oerekarauatakasaaki. Teoso sākire isāpiretari kākiti.

² Xoāo kapatxisareri, kateia āki auakasaaki, ikenakoenetari Xesosi kamakiti, ininiā iokanataro ipi imoianariakori Xesosimonikari.

³ Ininiā Xoāo txari imoianariakori:

—Hīpimaāri Xesosi: “Pitekani iaxiti īkari, kākiti iātapakiti pitxataua? Ātikani atxiiti aiātapakiti pitxataua?” hītxariko —itxa Xoāo.

Ininiā ninoa sipe. Ipimaārina Xesosi Xoāo sākire iaōka. ⁴ Ininiā Xesosi apakapapiretana:

—Hīkanapiriā Xoāomoni. Hīsāpiretari hīkenakotakiti, hātamatakiti pakini. ⁵ Hīte atamatapekari mōsiāreti kōsiārepeka inini. Matīpokotakati tīpokotapeka. Hātamatapekari maere matati erekapeka inini. Makenakokiti kakenakokipeka. Ipīkani ōkitikapekaua. Teoso iokanapirena erekari sāpiretapekaika minakati mauapikinitinimoni. Pakini hātamatapeka. Ikara hīsāpiretako Xoāomoni. ⁶ Kākiti iteene auikiniāri nota sākire, Teoso takari erekari uamoni. Ikara nisākire hīsāpiretari Xoāo —itxa Xesosi.

⁷ Ininiā ninoa sipe. Isikasaakina, Xesosi sāpiretari Xoāo pirena itomaneri kākitimoni. Ia atoko itxa:

—Kipa ĩkai hĭte, Xoão kapatxisarerimoni hĭsikasaaki, ãparaã makipakaniãtaã iua auakasaaki? Hĭte sari iuamoni, kotxi ãtixika isãkire aua. Teoso sãkirenoka isãpireta. Ĩtima ãpokaxitikasaaki, katsotati ipinimoni ipapĭka, iuaĭkana ipinimoni ipapĭka inini atoko kãkiti, kotxi isãkire kita ãti, isãkire uatxa ãtião, isãkire katana iuaĭkana ãtião, itxaãpota isãkire. ĩkara atoko !itxa Xoão.

8—Kipa ĩkai hĭte Xoãomoni hĭsikasaaki? Hĭte sari iuamoni, kotxi !inirekari tiitxi, txineiro pakini. !Kakaroneri imãka, kotxi !ikaikota auĭteti aapoko. Auĭteti aapoko peereri mãkatxi.

9—Kipa ĩkai hĭte iuamoni hĭsikasaaki? Hĭte sari iuamoni, kotxi iua Teoso sãkire sãpiretakari itxaua. Atãopitika Teoso sãkire sãpiretakari itxaua. Iua Xoão Teoso sãkire sãpiretakari apiari.

10—Teoso sãkire iõkatsopatakori kitxakapirĭka txari:

Niokanatariko nisãkire sãpiretakari kãkitimoni pite apisa, papokini isãpiretini ĩkapani, kãkiti iposope inini ĩkapani.

11 Atãopitikara. ĩkinimane sauaki Xoão kapatxisareri apiatakari itxaua. Iuaritika Teoso auĭtetakari poiãori inakari apia imarotariko Teoso kamakiti tĭkane. ¹²Xoão auakasaaki Teoso auĭtetakani misiritaãka, kotxi kãkiti kaneenamari naiatana ninoa. Ninoa nirekari ixipokini-rina Teoso auĭteti ininiua ĩkorapokoriti. Uatxapiima auapanika ikara atoko inakari. ¹³Xoão apokini apisapanika, ĩkinika Teoso sãkire sãpiretakani, ĩkinika Teoso sãkire iõkatsopatakani, sãpiretari Teoso auĭteti ininiua pirena. Xoão apokasaaki, iua apaka oerekari Teoso auĭteti ininiua pirena.

14—Kitxakapirĭka Teoso sãkire sãpiretakani sãpiretaua:

Ãti Teoso sãkire sãpiretakari Erĭasi atoko inakari apokako,

itxana. Iuakara Xoão. Hãuikiniãri nisãkire, hãuikariko iuara apokapeka. ¹⁵Kakenakokii, ininiã hĭkenakotariko nisãkire —itxa Xesosi.

16—Kanatokopa itxa kãkiti ĩkorasaaki auakani? Amarini sarauatini atoko itxana ĩkorasaaki auakani. Ninoa amarini topãka tiitxi amotikoãtaã. Apanakini amarini txitana apanakini amarini. Itxana: ¹⁷“Ate xikarauata hĭte serenini ĩkapani, txamari ! ĩhserena. Kãkiti pĭkasaaki xikariti axikareta, txamari ! ĩhĭxiapata.” Ninoa amarini sarauatini atoko itxana ĩkorasaaki auakani, ¹⁸kotxi Xoão kapatxisareri apoka ĩkorapokoriti. Itakanapari inikini Teoso imisãkiretini ĩkapani. !Ītari ovaã. Iuaritika hĭte txari: “Maerekati matamatakoti auãĭtotari Xoão,” ĩhĭtxari. ¹⁹Nota ĩtari iaxitiki apoka ĩkorapokoriti. !Nitakanapari ninikini. ĩkiniõtika ninipokota. Niãtari ovaã. Ininiã hĭte txari: “Iua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisãkirepirenãtano. Kimaroreri atão inakari kamari erekarinani. Kãkiti atamatakasaakiri ikamakiti, imarotari kimaroreri atão inakari ininiua —itxa Xesosi.

Sitatxi Auakani Teoso Sãkire Mauĩãkani

(Arõkasi 10.13-15)

²⁰ Ininiã Xesosi pinitana Korasiĩ sitatxiti auakani, Petsãita sitatxiti auakani pakini, kotxi kaiãopokori iposotiire ikamapeka iuaãtaã, iuaritika kona itakanaparina maerekati. ²¹ Xesosi txana ninoa:

—Kãkiti Korasiĩ auakani himisiritaãkako. Kãkiti Petsãita auakani hĭte apaka misiritaãkako. Kitxakapirĭka Txiro, Sitoõ pakini sitatxitikini kamari maerekati, ininiã Teoso xipokana ninoa arikatxiã. Ninoa atamataãkamariko nota posotiire hĭte atamatiniri atokokana, ininiã ninoa mãkatamariko sako mata. Itakamariko atapani iũtoãna. Ikara atoko ininiã, ninoa oerekari maerekati itakanapinina. ²² Nisãpiretai hĭte ia: “Kãkiti misiritiko õtisaaki, Txirokini, Sitoõkini pakini misiritaãka poião. Hĭte apiata.” ²³ Hĭte Kapanaoõkinipekana, Teoso ãkiri aua ĩtekatata. Hĭte itikapekari ito posotiiretixi iaxitiki. Txamari hõkakatapeãkako maerekani misiritikoãtaã. Nikamakiti ĩtemoni Sotoma auakani sauaki nikamaãkamako, kona ninoa xipokamako. Auapanikamanako. ²⁴ Ininiã nitxai hĭte: “Himisiritikosaaki, apiata himisiritaãka. Poiãoka Sotomakini misiritaãka,” —itxa Xesosi.

Teoso Imarore Apakapakani

(Arõkasi 10.21-22)

²⁵ Iuasaaki Xesosi misãkiretari iri:

—Niri, pitixine auakani auĭte pitxaua. Uai ikini itixiti auakani auĭte apaka pitxaua. Peerekai pite, kotxi na poerekari pimarore kãkiti kimarorerinimoni, iuikakanimoni. Pite oerekari pimarore kãkiti poiãorinimoni, miuikakanimoni. ²⁶ Ari niri, ikara atoko pinireka. ĩkara atoko papokaerekata —itxari iri.

²⁷ Eereka imisãkiretari kãkiti:

—Niri sikapekano ĩkinika. Kãkiti ĩmarotano nota Teoso ãkiri nininiua. Nirinokara atão imarotano nota. Apaka kãkiti na atão imarotari niri. Notanokara imarotari niri, kotxi iua ãkiri nitxaua. Kãkiti nirekiniãri imarotiniri niri, nota oerekari niri iuamoni.

²⁸ –Iteene minari atoko itxa himaerekani. Hinireka hĭtakanapiniri iua, txama ! hĭposota hĭtakanapiniri. Hĭsĭpakiniĭ himaerekani xika, hina notamoni hĭtomatini ĩkapani. Iuasaaki nimakatzakari himaerekani. ²⁹ Hĭtakariko nipaniĭtakiti hĭkixinireĕ. Hĭpaiaĕkariko nota pirena. Erekapitkari hĭpaiaĕkiniri ninirekakiti, kotxi kona kaneenamano. Kona nota napetari kĕkiti. Niuikiniua ! auari. ĩkara atoko ininiĭ, hĭxinire tomatapitika. ³⁰ Hĭposotapitkari nipaniĭtakiti hĭkamini, notakata hĭparĭkauatiniĭ. Nipaniĭtakiti !kasĕpaniri. Kona kamimari. Peerekari nipaniĭtakiti –itxa Xesosi.

12

Tomatiko Őti Pirena

(Marko 2.23-28; Arĕkasi 6.1-5)

¹ Mapaĕti atoko tomatiko ŕtisaaki, Xesosi imoianariakorikata napaĕpota triko takikoĕtaĕ. Inatxitana. Inapaĕpotakasaakina, imakatzakarona triko iki mapaki inikinirona ĩkapani.

² Pariseoakori ĩkara itikasaaki, itxarina Xesosi:

–Patamata. Pimoianariakori kamari ate mauiritakiniti. Ninoa parĭkauata tomatiko ŕtisaaki –itxana.

³ Ininiĭ Xesosi:

–Atxiĭti kona hĕtatsopapanikari Taviini kamakiti imoianariakorikata kitxakapirĭka inatxitakasaakina? ⁴ Iua ĭroĕ Teoso misĕkiretikoĕtaĕ. Imoianariakorikata inikari komiri Teosomoni sikakori. Sasetotxinokara auiritaĕka iua komiri inikinina. Apanakini !auiritaĕka inikiniri. Iuaritika ninoa sasetotxiakori tiretari Taviini, imoianariakori pakini inatxitakasaakina. ⁵ Atxiĭti kona hĕtatsopapanikari Moisesini ĭĕkatsopatakiti. Iua auiritari sasetotxi parĭkauatini tomatiko ŕtisaaki, Teoso misĕkiretiko aikotiĕ. Iuasaaki ninoa !ikamari maerekati, kotxi iparĭkauatana Teoso misĕkiretiko aikotiĕ. ⁶ Atĕo misĕpiretai, hĭte paniĭtakiti poiĕori. Nota paniĭtakiti apiari. ⁷ Teoso sĕkire iteene hĕuikasaaki, kona hĕpoĭtana kĕkiti maxikatĭka, kotxi Teoso sĕkire txari:

Nota nirekari apanakini hĭtoretini. Pimatiretakanisaakiri ĕti, ! apakata pisikarauatini notamoni. Iuasaaki kona ninirekari pisikakiti, itxa Teoso kitxakapirĭka.

⁸ –Nota hĭtari iaxitkiri posotari ĩkinipoko ninireĕkiti nikamini tomatiko ŕtisaaki, kotxi Apiananiri nitxaua –itxa Xesosi.

Motĭkauakotakari Pirena

(Marko 3.1-6; Arĕkasi 6.6-11)

⁹ Xesosi ĩkara inaĕka atoko, isa aiko Xoteoakori apotiitiniĕtaĕua. ¹⁰ Iuaĕ aua kiki motĭkauakotakari. Iuaĕ aua apaka pariseoakori Xesosi kinirĕo apoĭtaka inakani tomatiko ŕtisaaki iparĭkauatini xika. Ninoa amanaĕri Xesosi:

–Atauako apakata atxiĭti tomatiko ŕtisaaki, erekape pitxĭkitakiniri kĕkiti? –itxarina.

¹¹ Ininiĭ Xesosi pimaĕna:

–Hĭpira soti auĭte tomatiko ŕtisaaki aariko ĕki irikiniĕ, himakatzakatar? Atĕopitkara Teoso sĕkire auiritapitkari kĕkiti makatzakiniri ipira tomatiko ŕtisaaki. ¹² Soti auĭte poiĕori, kĕkiti apiari. Ininiĭ Teoso sĕkire auiritapitkari tomatiko ŕti erekape nitxĭkitakiniri kĕkiti –itxa Xesosi.

¹³ Ininiĭ itxari kiki motĭkauakotakarimoni:

–Poerekauakotauako –itxa.

Oerekauakotakasaakiaua, erekape itxa, ipini uako atokopeka itxa. ¹⁴ Iuasaaki pariseoakori sipeka atoko, ninoakakarika misĕkiretakakauana:

–Natokopa atxatari Xesosi aĕkini? –itxakakana.

Nĭtirixi Teoso Mereĕkiti

¹⁵ Xesosi imarotakasaakiri ninoa okaenetiniri iua, iuasaakipeka Xesosi sipeka. Ito-maneri kĕkiti sa iuakata. ĩkinika amianatakani erekapeka itxĭkitaka. ¹⁶ Xesosi !auiritana isĕpiretinirina ikamakiti apanakinimoni. ¹⁷ ĩkara atoko itxa Xesosi, Teoso sĕkire sĕpiretakari Isaia inakori sĕpiretakiti iaĕka apokini ĩkapani. Ia atoko itxa Teoso Isaiamoni:

¹⁸ Ia ninitiri nimereĕkiti. Ia nitiretakiti napokaerekatakiti. Nota sikariko Erekar Mata-matakoti iuamoni. Iua sĕpiretariko nota sĕkire Xoteo minakonimoni.

¹⁹ !Katapasĕkiri ahoa kimaporiti ĭtiniĕpo isĕkirauatakasaaki. !Inenamauata. !Itxitakaka apanakinikata kĕkiti napiniĕtaĕ.

²⁰ Apanakini Teoso sĕkire auĭĕkani oiĕkapeta ĕkixinireĕna. Itapara !auari. Ninoa aanaia katxitoĕkari atoko itxana. Iuaritika kona imapirinikari iua aanaia katxitoĕkari. Iua atokokana kona ixipokari iua sĕkire auĭĕkani mataparani. Itĕretana. Apanakini Teoso sĕkire auĭĕkani, kona iteene auikari Teoso sĕkire. Ininiĭ ninoa tirikapi

iopinikare xapitikiri atoko itxana, iuaritika kona iua oakari. Iua atokokana kona ixipokana Teoso säkire auiäkani. Ikamaäpotari erekari, erekarinoka käiatini ikapani.
²¹ Xoteo minakanuia auikariko iua säkire.
 Itxa Isafa säpirena kitxakapirika.

Maerekani Matamatakoni Omitikiko
 (Marko 3.20-30; Arókasi 11.14-23)

²² Iuasaaki käkiti anikari kiki maerekati matamatakoti auaïtotakiti Xesosimoni. ! Isäkirauata. Mõsiäreti itxaua iua, maerekati matamatakoti xika. Xesosi erekepeka txïkitakari iua. Iuasaaki kösiärepeka, kasäkirepeka itxa. ²³ Iuasaaki kaiäopokori käkiti iuaä tsorïkaäta. Ininiä ipimaäkakuana:

–Atauako ia kiki aäuïte Taviini apika mekanirikani? Atxiïti Teoso iokanatakitikani? – itxana.

²⁴ Pariseoakori ikara ikenakotakasaakina:

–Konapitini. Maerekati matamatakoti auiïte Peosepoo inakori sikari iposotiïre Xesosimoni maerekati matamatakoti omitikini ikapani –itxana pariseoakori.

²⁵ Xesosi imarotari ikara ixinikakitina. Ininiä itxa Xesosi:

–Käkiti tixine auakani ninoakakarika inaiatakakiniäuana, ixipokakakauana. Iarikape-nako. Iua atokokana käkiti aapokoä auakani inaiatakakiniäuana, ixipokakakauanako.

²⁶ Iua atokokana Satanasi nitiriakori, ninoakakarika inaiatakakiniäuana, ixipokako Satanasi tapara. ²⁷ Hite säkire, Peosepoo sikari iposotiïre notamoni maerekati matamatakoti nomitikiini ikapani. Ininiä nota pimaäi: “Kipa sikari posotiïretxi hïte moianariakorimoni, maerekati matamatakoti omitikiniäuana ikapani?” Himoianariakori säpiretai: “Teosonoka sikari posotiïretxi maerekati matamatakoti omitikakanimoni.” ²⁸ Teoso posotiïreë nomi-tikari maerekani matamatakoni. Ikara atoko ininiä, Teoso oerekai iua apokapeka hïtemoni hïauiïte inini ikapani.

²⁹ –Kiki pataparari iua aapoko auiniä, kona kiïtiriri ïroä ïtiriuatini ikapani. Kiïtiriri iaxirikiniäri iua kiki pataparari, iuasaakiika apakata iïtirïkiniri itii.

³⁰ –Notakata maparïkauatakani omanatano nota. Imamoianatakaniäno, inirekari ni-parïka ixipokini. ³¹ –Ininiä nisäpiretai. Apakata Teoso makatzakiniri ikinipoko maerekati käkiti kamakiti, imaerekani Teoso imisäkirepiretini pakini. Txamari Erekari Matamatakoti misäkirepiretakari maerekani makatzakiko kona auari. ³² Käkiti misäkirepiretiniäno nota hïtari iaxitikiri, eereka amanainiäri Teoso ikara imaerekani imakatzakini, ininiä Teoso makatzakapitikari. Käkiti misäkirepiretiniäri Erekari Matamatakoti, ! kimakatzakikori ikara maerekati ikamakiti –itxa Xesosi.

Aamina Iri Pirena
 (Arókasi 6.43-45)

³³ Ininiä Xesosi säkirauata iuaïkana pariseoakorimoni:

–Aamina atoko hïtxa. Aamina erekari ininiä, iri erekari apaka. Aamina maerekati ininiä, iri apaka ! erekari. Patamatiniäri amäïiri, pamarotari imina. ³⁴ Nimarotai hïte. Imini katsiïri atoko hïtxaua hïte. Hïte maerekati kamakanii. Ininiä ! hïposotari erekari hïsäpiretini, kotxi häkixinire ! erekari. Hinamaä hïsäpiretakiti häkixinireë potoriäkari itxaua. ³⁵ Käkiti erekari ininiä, erekarinoka isäkire, kotxi iua äkixinireë erekarinoka aua. Käkiti maerekati ininiä, isäkire maerekati apaka, kotxi maerekatinoka auari iua äkixinireë. ³⁶ Atäo nisäpiretai hïte. Ikinipoko käkiti säkire Teoso atamakaerekata xipokatxi ötisaaki. Iuasaaki Teoso mereëri käkiti misiritiko. Maxikatïka hïsäpiretakiti kona apakata. Kona iua potxitari. Ininiä iuasaaki iua pimaäi: “Kinirepa ikara atoko pisäkire?” itxako. ³⁷ Pisäkire ereka ininiä, ixika ! auari Teoso misiritinii. Pisäkire maerekati ininiä, pisäkire maerekati xika Teoso misiritai –itxa Xesosi.

Pariseoakori Nirekari Xesosi Oerekiniri Iposotiïre
 (Marko 8.11-12; Arókasi 11.29-32)

³⁸ Ätikaka kaiökatsoparerini, pariseoakori pakini txari:

–Koerekareri, takaötxikari Teoso posotiïre poerekaua ate, aätamatiniiri ikapani, Teoso iokanatinii ïkorapokoriti aimarotini ikapani –itxarina.

³⁹ Xesosi apakapapiretana:

–Käkiti uatxarinii ! erekana. Itakanaparina Teoso. Hïte nirekari noerekinii Teoso takaötxikare, iposotiïre. Konapitini. Kona noerekai hïte. Kitxakapirika Teoso säkire säpiretakari Xonasini inakori auakasaaki, Teoso kamari posotiïretxi. Ikara atoko in-akari posotiïretxi Xonasini auakasaaki, iuaïkana ikamapanïkariko. Iua posotiïretxi Teoso takaötxikare itxapanikaua hïte ikapani. Iua takaötxikarinoka Teoso takaötxikare hïte ikapani.

⁴⁰ Xonasi kaikota ximaki mitari tikako āki ipi āti pakini ōti. Iua atokokanerako hītari iaxitiki napako ipi āti pakini ōti ipikani auiniātaā.

⁴¹ —Itixi xipokini ōtisaaki, kākiti Nínivi sitatxiti auakani sākiraupatitikako. Ninoa txai hīte: “Kona erekai hīte, kotxi ! hītakanapari himaerekani. Ate takanapari amaerekani Xonasi sākire akenakotakasaaki,” itxanako ninoa. Uatxa uai aua hīte apisatoō Xonasi apiatakari. Imisākiretai hīte, iuaritika kona ! hītakanapari himaerekani.

⁴² —Xipokatxi ōtisaaki, sito Sapaa auakani auīte sākiraupatitikako. Oa ōtakoxiti auakaro, iuaritika osari Saromāmoni imatire okenakotini ikapani. Uatxa apopeka Saromāo apiatakari, iuaritika hīte !auikari nota sākire —itxa Xesosi.

Maerekati Matamatakoti Kanapiriini Pirena

(*Arókasi 11.24-26*)

⁴³ Iuaikana Xesosi sākiraauta:

—Maerekati matamatakoti kiki auaitotakiti takanapakasaakiri iua kiki, iua maerekati matamatakoti saāpota āparaā makipakaniātaā, ikaikotiniātaā inītini ikapani, txamari ! apokari. ⁴⁴ Ininiā itxa: “Nikanapiriāpiriko mitxi nauinimoni nipotorikinimonikari,” itxa iua maerekati matamatakoti. Ininiā ikanapiriā. Apokasaaki, āti iuaā auakari !auari. Oere-tapeēkaika. Iposope āti auini ikapani. ⁴⁵ Ininiā apana apikomoni setxi pakini maerekani matamatakoni apia maerekanitakani. Imakinikana aua iua kiki itoā. Ininiā iua kiki mitxi poiāoka imaerekani, eereka apia maerekanita. Ikara atoko itxako kākiti uatxarini maerekani —itxa Xesosi.

Xesosi Inoro, Itariakori Pakini

(*Marko 3.31-35; Arókasi 8.19-21*)

⁴⁶ Xesosi sākiraauta itomane kākitimoni, inakasaaki oāpoka inoro, itariakorikata. Iporikiti auana. Ipikapiretarina. ⁴⁷ Ininiā āti txari Xesosi:

—Pinoro, pitariakori ikiraā iporikiti auana. Inirekakarina imisākiretinii pite —itxa.

⁴⁸ Ininiā Xesosi:

—Keropa ninoro? Kiripa nitariakori? —itxa Xesosi.

⁴⁹ Ininiā imioakari imoianariakori:

—Hātamata. Uai aua ninoro, nitariakori pakini. ⁵⁰ Niri iaxitiki nirekaākiti kamakanira, ninoara nitariakori, nitaroakoro, ninoro txaua —itxa Xesosi.

13

Katakareri Pirena

(*Marko 4.1-9; Arókasi 8.4-8*)

¹ Iua ōtisaaki Xesosi takanapari iua aapokotxi. Ipoa tiniā isa. Iuaā ipoa tiniā iitopāka. ² Iuaā auana itomaneri kākiti. Apotiitauana iua takote. Ininiā kanaua āki iereētua, topāka itxa oerekarauatini ikapani. Ninoa kaikota imiriī. ³ Ininiā itori sāpirenatxi atāo inakari oerekiko isāpiretana ninoa Teoso imarotinina ikapani.

Ia atoko itxa:

—Katakareri potorika itakarauatini ikapani. ⁴ Takari iki itakaāpotakasaaki, okaāpotakasaaki, ātikaka irika kimapori tiniāpo. Kotipiriki apoka. Inikari imakinika. ⁵ Apanakini irika kai auiniātaā. Poiāoka kipatxi auari, ininiā mokatanitika ipitxaka. ⁶ Txamari, atokatxi papatakari inakasaaki, arikari iua takari. Otxiaroka, kotxi kona kakotsari. ⁷ Apanakinipekana irika aanaia auiniātaā. Ininiā aanaia aneē takari takote. Aāpitsa lapinokari takari, oka txari. ⁸ Apanakinipekana irika kipatxi erekariātaā. Ininiā iriuata. Ātiātaā āti takari iriuata seē oki pakini. Ātiātaā takari iriuata sesēta oki pakini. Ātiātaā āti takari iriuata rīta oki pakini. ⁹ Kakenakokii, ininiā hīnenakotariko nisākire —itxa Xesosi.

Kākiti Mimarotakiniti Xesosi Sāpiretini Pirena

(*Marko 4.10-12; Arókasi 8.9-10*)

¹⁰ Imoianariakori apoka Xesosimoni. Ipimaārina:

—Kinirepa sāpirenatxi atāo inakari oerekiko pisāpiretari kākiti? —itxarina.

¹¹ Ininiā Xesosi:

—Kākiti xinikiniāri Teoso auītetxi ininiāua pirena, auapitika kaiāopokori ninoa mimarotakiniti, kotxi Teoso kona oerekana ninoa. Teoso oerekai hīte ninoa mimarotakiniti. ¹² Teoso sākire auakiti, iua sākire kīpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makīpitakati, imarore xapiti iuamoni auakari makatxakaākako. ¹³ Nisākiraupatitakasaaki kākitikata, nisāpiretana sāpirenatxi atāo inakari oerekiko, kotxi kokiri kākiti, iuaritika !atamatari Teoso kamakiti. Kakenakokiri kākiti, iuaritika !imarotari Teoso sākire. ¹⁴ Ininiā apokapeka Isaía sākire kitxakapiriāka, kotxi iua sāpiretari Teoso sākire:

Hikenakotapiikamari nisäkire, iuaritika ! himarotari. Hïtikapiikamari nikamakiti, iuaritika ! himarotari,

15 kotxi ! hinirekari himarotiniri atão inakari. ! Hinirekaikari nisäkire hïkenakotini. ! Hinirekaikari nikamakiti hâtamatini. Hinirekaâkamariko, hâtamatamariko nikamakiti. Hinirekaâkamariko, hïkenakotamariko nisäkire. Hinirekaâkamariko, himarotamariko nisäkire. Hïkanapiriaâkamako notamoni, nimaktxakamariko himaerekani, itxa Teoso.

16 –Hïtepekana, Teoso sikari erekari hïtemoni, kotxi hõki atamatapitikari iua kamakiti. Hïkenakoki kenakotapitikari iua sâkire. 17 Atão nisâpiretai. Itomaneri Teoso sâkire sâpiretakani, apanakini kiki atão inakari kamakani pakini kitxakapirïka nirekari atamatiniri hïte atamatakiti, txamari kona atamatarina. Inirekarina ikenakotinirina hïte kenakotakiti, txamari kona ikenakotarina –itxa Xesosi.

Katakareri Pirena Oerekiko
(Marko 4.13-20; Arókasi 8.11-15)

18 Xesosi sâkirauanâtapanika:

–Hïtakaõtxikari ikara sâpirenatxi atão inakari oerekiko, katakareri pirena. Noerekai ikara. 19 Kâkiti kenakotakasaakiri Teoso auïtetxi ininiua pirena, imimarotakaniâri ikenakotakiti, kimapori kâkiti katxaratakiti ikotaxiti atoko itxa iua âkixinire, kotxi Satanasi apoka iuamoni. Imaktxakari Teoso sâkire iua âkixinireê apokakari. Teoso sâkire takariki atoko itxa.

20 –Takariki kai auiniâtaâ iriâkari, Teoso sâkire ipoxokoniritika apakapakari atoko itxa. 21 Itxama kona okanani aua, kotxi kona kakotsari. Omatatiko inakasaaki, inapetiko inakasaaki, Teoso sâkire auikini xika, itakanapari Teoso sâkire auikini.

22 –Âti kâkitipekana kenakotari Teoso sâkire, txamari ixinikapikari tïtxi, nipokori, iparïka pakini. Ikinipoko ixinikapika, ininiâ maerekaxiniretinoka itxa. Txineiro ipotxitini xika ! inirekaikari Teoso sâkire. Takariki aanaia auiniâtaâ iriâkari atoko itxa iua. Takari mariti atoko itxa iua âkixinire.

23 –Âti kâkitipekana ikenakotakasaakiri Teoso sâkire, atão iua auikari. Iua âkixinire kipatxi erekari atoko itxa. Takari mininiua atoko, iua kâkiti minari atxiïti seï pakini kâkiti Teosomoni isâkire auikinina ikapani. Atxiïti iminari sesêta pakini kâkiti. Atxiïti iminari trïta pakini kâkiti Teosomoni isâkire auikinina ikapani –itxa Xesosi.

Katsotati Ahoisi Atoko Inakaro

24 Iuaïkana Xesosi sâpiretari âti sâpirenatxi atão inakari oerekiko. Ininiâ ia atoko itxa:

–Teoso auïtetxi ininiua ia atoko itxa. Teoso katakareri atoko itxa. Iua katakareri takari erekari takariki ikikioteê. 25 Âti ïkanõkati ikinimane imakasaaki, imokaiakari apoka. Itakaro katsotati ahoisi atoko inakaro ahoisi sauaki. Kona !otxa. Iposo atoko ïkorape itxa. 26 Takari aneêka atoko, oriuaata. Iuasaaki kâkiti imarotapekari katsotati ahoisi atoko inakaro auapeka. Kona otxa. 27 Ininiâ katakareri nitiriakori apoka iauïtemonina. “Auïtetxi, pite takaro takariki erekaro. Nanipa oina katsotati?” itxana ninoa.

28 –“Amokaiakari takari,” itxa.

–“Pinirekatari amaporokiniri?” itxana initiriakori.

29 –“Kona. Katsotati himaporokiniâ, atxiïti himaporokaro nitakare apaka.

30 Hïtakanapari imakinika aneinina ikapani. Oamikosaakirako, omaktxakaâka. Ininiâ iuasaakiko nipaniâtaiko hïte: ‘Merepanika himaktxakaroko katsotati. Hâpotiitaro. Xaminamoni oka inaâkako. Iposo atoko hâpotiitari ahoisi. Hïtakari nikiena nïkatiko aikoti âki.’”

Mostata Pirena
(Marko 4.30-32; Arókasi 13.18-19)

31 Iuaïkana Xesosi oerekari âti sâpirenatxi atão inakari oerekiko. Ininiâ ia atoko itxa:

–Teoso auïtetxi ininiua, kiki takiniro mostata iki ikikioteê atoko itxa. 32 Mostata iki axapitiki. Apanakini takariki apiata, iuaritika oaneêka atoko amananiikaro. Aamina otxaua. Ininiâ kotipiriki ina. Ikamari ikoa okatiâ –itxa Xesosi.

Tirekakari Pani
(Arókasi 13.20-21)

33 Xesosi iuaïkana sâpiretari sâpirenatxi atão inakari oerekiko. Ininiâ ia atoko itxa Xesosi:

–Teoso auïtetxi ininiâtaâua ïkorapokoriti ia atokokana itxa. Sito kosekari tirekakari pani. Okoketari axapiti tirekakari pani kaiâopokori triko panikata, âparaâkata. Eereka ikinika ipe tirekaâpota otxa.

Säkiretxi Atão Inakari Oerekiko
(Marko 4.33-34)

³⁴ Xesosi säkirauatakasaaki käkitikata, isäpiretari säpirenatxi atão inakari oerekiko. Ikara säpirenatxinokara isäpiretari käkiti. ³⁵ Ininiã kitxakapirîka Teoso säkire säpiretakari säpiretakiti apokapeka, kotxi iua txari:

Nisäkirauatakasaaki käkitikata, nisäpiretari säpirenatxi atão inakari oerekiko. Itixi kamikosaakipanika aua käkiti mimarotakiniti. Ikara noerekako käkitimoni, itxa Teoso säkire.

Xesosi Säpiretari Katsotati Pirena

³⁶ Eereka Xesosi takanapana ninoa käkitipokoni. Iïroã aapokotxi. Imoianariakori apoka iuamoni. Itxana:

—Poerekaua ate ikara säpirenatxi atão inakari oerekiko, katsotati pirena, mixikanani pisäpiretakiti. Ate limarotari —itxana.

³⁷ Ininiã Xesosi:

—Hîtari iaxitikiri, iua erekari oki taäkari itxaua. ³⁸ Itixi iua kikio atoko itxa. Teoso auïtetakani takariki erekari atoko itxana. Käkiti Satanasi nakitiakori iua katsotati atoko itxana. ³⁹ Katsotati takakari Teoso nakitiakori mokaiakari itxaua. Satanasi itxaua. Itixi xipokini ôti iua takari amiko ôti atoko itxa. Teoso nitiriakori iaxitikini ninoa takari amakani atoko itxana. ⁴⁰ Iua katsotati apotiitaäka, xaminamoni oka inaäka. Iua atokotxikana inaäka itixi xipokini ôti. ⁴¹ Hîtari iaxitikiri iokanatanako initiriakori itiximoni. Apotiitarinako maerekati oerekakani. Apotiitarinako ikinimane maerekati kamakani. ⁴² Iposo atoko Teoso nitiriakori okana ninoa xaminamoni. Iuaã iteene itxiapatana. Akatsatsiriïtauana. ⁴³ Iuasaaki atão inakarinnoka kamakani aua iotximerena Teoso auïttxi ininiãtaäua. Atokatxi iotximere atoko itxa ninoa iotximere. Kakenakokii, ininiã hikenakotariko nisäkire —itxa Xesosi.

Txineiro Kipatakoru Pirena

⁴⁴ —Teoso auïttxi ininiua, txineiro itomanero kipatakoru atoko itxa. Oa txineiro kipataäka kikio. Äti ôti kiki napaäpotakasaaki, apokaro, ininiã iuaïkana ikipataro. Iteene ipoxokoniua, ininiã ivëttxitari ikinika itii, iua kikio iamotini ikapani. Eereka sa itxa iua kikio iamotini ikapani. Ikara atoko itxa Teoso auïttxi ininiua.

Pérora Inakori Pirena

⁴⁵ —Teoso auïttxi ininiua, pérora iamotakari atoko itxa. Iua nitari pérora apia erekari. ⁴⁶ Pérora iteene erekari apokiniã, ikinika itii ivëttxita iua pérora iamotini ikapani.

Hetxi Pirena

⁴⁷ —Teoso auïttxi ininiua hetxi ipoaã taäkori atoko itxa. Ikini sereti ximaki apotiita hetxi. ⁴⁸ Ixäpokasaaki kaiotaroariti kosekaäpotari itakoãmoni. Iuaã kaiotaroariti iitopäka. Imereërina ximaki. Ximaki erekari kotariã itaka. Käkiti maniäkiniti mapara oka. ⁴⁹ Xipokatxi ôtisaaki ikara atoko itxa. Teoso nitiriakori mereëriko käkiti. Mapara itakarina erekarini. Mapara itakarina maerekani. ⁵⁰ Ininiã xaminamoni okanako käkiti maerekati kamakani. Iuaã itxiïtana. Akerakitatsiriïtauana, kotxi patsiiri.

Kitxakapirîka Oerekakori, Amaneri Oerekakori Pakini

⁵¹ Xesosi pimaäna imoianariakori:

—Hite imarotatari ikara atoko inakari nisäpiretakiti? —itxa.

—Äri, aimarotapitikari —itxarina.

⁵² Ininiã Xesosi:

—Kaiökatsopäri oerekikosaaki Teoso auïttxi ininiua imarotini ikapani, imarotari amaneri oerekakori, apaka kitxakari oerekakori. Kaapokori atoko itxa. Iua kaapokori makatxakari apokaerekatakiti maretä äki inikatakiti. Amaneri, kitxakari apaka imakatxaka.

Nasaree Auakani Kona Auakari Xesosi Säkire
(Marko 6.1-6; Arókasi 4.16-30)

⁵³ Ikara säpirenatxi atão inakari oerekiko ixipokapiretaka atoko, Xesosi sipe. ⁵⁴ Ikanapiriã Nasaree sitatxitimoni. Ininiã oerekarauata aiko Xoteoakori apotiitiniãtaäua. Ininiã käkiti tsorîkaäta isäkire ikenakotakasaakina. Itxana:

—Kiripa sikatari iua imarore? Kiripa sikaposotiiiretari iua? ⁵⁵ Aapokotxi kamakari äkiri iua. Inoro Maria. Itariakori Txiaiko, Xoão, Simão, Xotasi pakini. ⁵⁶ Itaroakoro uai apaka aua. Nanipa apaiäökari ikinika imarore? —itxana.

⁵⁷ Ininiã kona inirekarina iua. Ininiã Xesosi txari:

—Teoso sākire sāpiretakari paxitaāka, txamari Teoso sākire sāpiretakari itixineē auakasaaki, inirimane sauaki auakasaaki, !ipaxitaāka. Isākire !auikaāka —itxa Xesosi.

⁵⁸ Ininiā Xesosi kona kamari itori Teoso posotiire iuaā Nasaree sitatxiti auakani ikapani, kotxi kākiti iuaākini !auikari isākire.

14

Xoāo Kapatxisareri Ipinini Pirena

(Marko 6.14-29; Arókasi 9.7-9)

¹ Iuasaaki Erotxi Kariréia auakani auite txaua. Iuasaaki ikenakopiretari Xesosi pirena. ² Iuasaaki itxana initiriakori:

—Iua Xoāo kapatxisareri ipīpekariika ōkitapekaua. Iuakara Xesosi txaua. Ininiā uatxa apiata iposota ikamini —itxa Erotxi.

Txamari Xesosipitikara. Kona Xoāoni iua. ³ Mitxi Erotxi paniātari Xoāo kapatxisareri iaxirikiko, itari Piripi itanoro xika. Ouāka Erotxia. Oomanatari Xoāo, ininiā itakaāka kateia āki. ⁴ Mitxi Xoāo kapatxisareri txari Erotximoni:

—Kona erekari pitari itanorokata pisirīkini. !Apakata pikamakiti —itxa.

⁵ Ininiā Erotxi nirekamari okiniri Xoāo, iuaritika kona okari, kotxi ipīkana Xoāo sākire auīākani. Ninoa uākatari Xoāo, Teoso sākire sāpiretakari ininiua. ⁶ Erotxi kamari kiiniri auini ōti pirena. Erotxia ākero serena iua Erotxi apisatoō, ikemaītxitakini apisatoō pakini. Ininiā oserenini kamari ninoa poxokoniuatini. ⁷ Ininiā Erotxi poxokoniuatakasaaki itxa:

—Nisikai imakinika pinirekēiti pitemoni —itxaro oa.

Ininiā osari onoromoni. ⁸ Onoro nirekari Xoāo okiko, ininiākara oamanaāri Xoāo kii prato nopini. Ininiā otxari Erotximoni:

—Xoāo kapatxisareri kii ninireka prato nopini.

⁹ Ininiā Erotxi kona erekaxinireri. Kipa ikama? Kotxi ikinimane ikemaītxitakini kenakotari isikaenetiniri oa nirekakiti oamoni. Ininiā iua paniātari oa nirekakiti sikiko oamoni. ¹⁰ Ininiā iua iokanatari sotatoakori kateiamoni Xoāo kii tsotakiko ikapani. ¹¹ Ininiā ninoa minari ikii prato nopini. Isikarina oamoni. Oa sikari onoromoni. ¹² Eereka Xoāo moianariakori sari kateiamoni. Ninoa anikari iito akauarimoni. Iuaā ikatarina. Eereka ninoa sari Xesosimoni. Isāpiretarina Xesosi Xoāo ipinini pirena.

Sīko Mio Kākiti Xesosi Sikakienatini

(Marko 6.30-44; Arókasi 9.10-17; Xoāo 6.1-14)

¹³ Xesosi kenakopiretakasaakiri Xoāo okiko, ipotorika kanauaā. Ātiātaā iuanani auini nire isa, txamari itomaneri kākiti imarotari Xesosi sinimoni. Ininiā itakanaparina sitatxi. Isana imiriū iua sinimoni. ¹⁴ Iua kanīkītakasaaki, atapari kākiti apokaāpotini. Ininiā iua amonīkana ninoa. Imakananitana amianatakani.

¹⁵ Mapiāpeka inakasaaki, imoianariakori apoka iuamoni. Itxarina:

—Mapiāpeka. Uai aapokotxi mauakaniātaā, ininiā uai nipokori !uari. Piokanatari kākiti aapokotximoni, ininiā iamotarina nipokori iuaātaā —itxana imoianariakori.

¹⁶ Xesosi apakapapiretana:

—Nota kona iokanataka isinina. Hītekarako sikakienatana ninoa —itxa Xesosi.

¹⁷ Ininiā ninoa:

—Komiri ipi ipi āti pakininokara aua atemoni. Ipi ximaki apaka aua. !Apakata —itxana.

¹⁸ Ininiā Xesosi:

—Himina uai notamoni —itxa.

Ininiā imoianariakori minari Xesosimoni. ¹⁹ Eereka iua paniātari kākiti xiti topākini. Eereka ikosekari komiri sīko, ximaki ipi pakini. Ininiā iua ionakaāta iaxiti. Itxari:

—Niri pisikakiti peerekari —itxa.

Ininiā imaxinīkaāpotari. Isikaāpotana imoianariakori. Ninoa sikaāpotana kākiti.

²⁰ Ikinikana nipokota. Ikinimane:

—Kamitopekaua ate —itxana.

Eereka imoianariakori apotiitari itetakori. Ininiā xāpokaka itxarina tosi kotari.

²¹ Iuasaaki sīko mio kikiākini nipokota. Sitoākini, amarini pakini nipokota apaka.

Xesosi Ipoa Nopini Itīpokotini

(Marko 6.45-52; Xoāo 6.15-21)

²² Eereka ipaniātana imoianariakori kanauaā iereētiniua iua apisa ipiriātina ikapani. Ninoa sipeka. Iua kaikota kākiti itakapiretini nire. ²³ Kākiti itakapiretanapaka atoko, Xesosi sari oxiratarimoni, Teoso imisākiretini nire. Īkanōkapeka inakasaaki, iuanani iuaā aua. ²⁴ Iuasaaki kanaua ipoa apanīkakiāpeka. Ītima apiākatara kanaua. Ininiā tsakati iteene apoākata.

²⁵ Imaropirīkatapeka inakasaaki Xesosi sari ninoamoni. Itīpokota ipoa nopini.
²⁶ Imoianariakori atapakasaakiri Xesosi ipoa nopini itīpokotini, ninoa pīkarauata.

—Kamiri napani —itxana.

Akiripoakatana. ²⁷ Iuasaakipeka Xesosi:

—Kataparaxinire hītxako. Notara. Kona hīpīkarauatape —itxa.

²⁸ Ininiā Petro sākirauata:

—Apiananiri. Xesosi pininiāua, pipaniātano pitemoni napokini ipoa nopini —itxa Petro.

²⁹ Ininiā Xesosi:

—Uai pina —itxari.

Ininiā Petro katxaka. Ipotorika ianini ipoa nopini Xesosimoni isini. ³⁰ Txamari kata-parari Itimati itikasaaki, ipīkarauata, ininiā ipatapiā itairakaāpota. Ininiā iua akirikata:

—Apiananiri. Pimaīkano.

³¹ Iuasaakipeka Xesosi maīkari iua. Itxari:

—Poiāoka pauikari nīposotiire. Kinirepa kona atāo pauikari? —itxa Xesosi.

³² Iuaīkana morōkoka itxauana kanaua āki. Iuasaaki itima iotoka. ³³ Imoianariakori kapotoreēkaua Xesosi apisatoō:

—Apiananiri pitxaua. Atāopitikara Teoso ākiripitikarai —itxana.

Xesosi Makananītana Amianatakani Xenesareekini

(Marko 6.53-56)

³⁴ Ipoa ipiriātana, Xenesaree tōpamoni apoka itxana. ³⁵ Iuaā kākiti imarotari Xesosi, ininiā iokanapireta kākiti ninoa tixine takote auakanimoni:

—Amianatakani himina.

Ininiā kākiti minari itomane amianatakani Xesosimoni. ³⁶ Amianatakani amanaāri Xesosi:

—Pauritaua pimāka mapotomatare atakapiotini —itxana.

Ikinimane imāka takapiotakani makananitaāka.

15

Xoteoakori Itike Pirena

(Marko 7.1-13)

¹ Iuasaaki pariseoakori, kaiōkatsopareriakori pakini apoka Xesosimoni. Xerosareēkini ninoa. Ipimaārina Xesosi:

² —Kinirepa pimoianariakori kona kamari aātokiriakorini sākire iaōka, kotxi inipokotakasaakina, kona arokauakotauana —itxana.

³ Ininiā Xesosi apakapapiretana:

—Hītepekana, kinirepa kona hīte kamari Teoso sākire iaōka? Hīte kamari hōereēkitinokara,

⁴ kotxi Teoso txari: “Pipaxitariko piri. Pipaxitaroko pinoro.” Apaka Teoso txari: “Piri, pinoro pimisākirepiretiniā, pokaākako.” ⁵ Txamari hīte oerekari kākiti: “Kākiti auakitū iri, inoro pakini nirekiniā, iua manirekakaniāri isikiniri ninoamoni, isāpiretana: ‘Ia nota auakitū nisika Teosomoni.’” Ininiā !isikari ninoa nirekakiti ninoamoni. ⁶ Ininiā hīte oerekari kākiti mapaxitakanina iri, inoro pakini. Ininiākara hīte sākire hōereēkiti kipatari Teoso sākire. ⁷ Hīte txari: “Akamapitikari Teoso sākire iaōka,” txamari kona hīte kamari. Atāopitikara Isaīa sākire kitxakapirīka. Iua sāpiretari Teoso sākire hīte pirena. Teoso txari:

⁸ Kamisirienererini ninoa kākiti. Ninoa sākireēnanira ipaxitanona. Ākixinireēna ! inirekanona.

⁹ Maxikatīlka ninoa kapotoreēkaua nota apisatoō. Maxikatīlka ninoa txano: “Ateosone pitxaua,” kotxi ninoa !oerekari nota sākire. Ninoaka sākire oerekana, txamari “Teoso sākire asāpiretai” itxana.

Itxa Teoso Isaīamoni kitxakapirīka —itxa Xesosi.

Ākixiniretxi Txiko Pirena

(Marko 7.14-23)

¹⁰ Xesosi akiritana kākiti, ininiā itxana:

—Hīkenakota himarotini ikapani. ¹¹ Nipokori, piixirākakiti kona kamatzikotari pākixinire. Pisākire maerekati, pinamaā potoriākari, iuara txikotapitikari pākixinire —itxa Xesosi.

¹² Iuasaaki Xesosi moianariakori apoka iuamoni. Itxarina:

—Pimarotatari pariseoakori !apokaerekatari ikara pisākire ninoamoni?

¹³ Ininiā Xesosi:

—Kākiti takari atoko itxa. Ininiā ikinika takari niri iaxitikiri mataākiniti maporokaākako.

¹⁴ Kona hīmaākatapena pariseoakori. Ikiikakani mōsiāreni atoko itxana. Mōsiāreti mīkiikiniāri

mõsiãreti, ikinipoko irikako aariko åki. Iua atokokana maerekati õtåkikiniãri maerekati, imakinika ninoa sari imisiritikoåtaå —itxa Xesosi.

¹⁵ Ininiã Petro:

—Poerekaua ate ikara sõpirenatxi atåo inakari oerekiko. Ate !imarotari —itxa.

¹⁶ Ininiã Xesosi:

—Hite apanakini atoko hõtxa atxiiti? Kona himarotapanikari? ¹⁷ Himarotari. Nipokori hinamaå hixiråkakiti hitikakomoni isa. Eereka hitikatakasaaki, inapa. ¹⁸ Hixåkire hinamaå pokåkakaripotrika håxixiniree. Iuara txikotari kåkiti åkixinire. ¹⁹ Kotxi håxixiniree hixinikakiti maerekati potrika. Okaniuatakatxi, åti kåkiti itanorokata siråkiko nire, anokaretxi, itiruatakatxi, misirienereTXi, åti misåkirepiretiko pakini potrika håxixiniree. ²⁰ Ikara atoko inakaranira txikotari kåkiti åkixinire. Kåkiti marokauakotakanuia kona txikotari åkixinire —itxa Xesosi.

*Xoteo Minakatoua Auikiniri Xesosi Såkire
(Marko 7.24-30)*

²¹ Ikara atoko inaåka atoko Xesosi sipe. Isipeka Txiro, Sitoõ pakini tõpamoni. ²² Iuasaaki sito Kanaaåkerõ, iuaå auakaro, apoka Xesosimoni. Iteene oamanaari:

—Apiananiri, Tavii apika mekaniri, piamonåkano. Maerekati matamatakoti auaõtoto namarite. Iua iteene misiritaro oa —otxari.

²³ Txamari Xesosi kona apakapapiretaro oa. Imoianariakori apoka Xesosimoni. Itxana: —Piokanataro, osipekako. Atemoni åtipirika oåkiripoanåta —itxana. ²⁴ Xesosi apakapapiretaro oa:

—Niokanataåka Isaeokini ninåkatini åkapani. Ninoa soti auite ppinanaåkani atoko itxana. Txamari pite kona Isaeokero. Pite åto uåka —itxa.

²⁵ Iuaritika oa sito apoka iuamoni. Okapotoreekaua iua apisatoõ. Ininiã oa:

—Apiananiri, pimakananitaro namarite —otxari.

²⁶ Ininiã Xesosi:

—Isaeokini amarini atoko. Nota ninoa iri atoko. Kona erekari amarini komirite nimixirikini, anåpamoni nisikini åkapani —itxaro.

²⁷ Ininiã oa:

—Ari, atåopitikara pisåkire. Anåpa atoko nitxaua, iuaritika anåpa nikari nipokori iriåkari kaapokori patapi koa —otxa.

²⁸ Ininiã Xesosi:

—Atåopitikara. Sito, pite iteene auikari niposotiire. Pinirekakiti nikamapitikako —itxaro. Iuasaakipeka oimi erekapeka otxa.

Xesosi Erekepeka Txåkitakari Kåkiti

²⁹ Eereka Xesosi sari Kariråia poatimoni. Iuaå oxirataro nopini topåka itxa. ³⁰ Itomane kåkiti iuamoni apoka. Ninoa minari iuamoni kåkiti mõsiãreni, masåkireni, matpokotakani, apanakini amianatakani itomaneri pakini. Xesosi makananitana ninoa. ³¹ Kåkiti iuaå auakani tsoråkaåta, kotxi itikarina Xesosi makananitinina amianatakani. Kåkiti masåkireti sårirauatapeka. Kåkiti matpokotakati pokotapeka. Mõsiãreti, kõsiãrepeka itxapeka. Ikinimane txari:

—Peerekari Teoso, Isaeo auakani Teosone —itxana.

*Xesosi Sikakienatana Ipi Ipi Pakini Mio Kåkiti
(Marko 8.1-10)*

³² Xesosi akiritana imoianariakori. Itxana:

—Nota amonåkana naia kåkiti. Ipi õti, åti õti pakini notakata auana. Uatxa kona minakati kona auari inikinina åkapani. Kona nota iokanatana ninoatxiritika, kotxi arikama iptaxitamana, irika itxamana —itxa Xesosi.

³³ Ininiã imoianariakori txari:

—Nanipa ate apokari nipokori komiri naia kåkiti asikakienatini? —itxana.

³⁴ Ininiã Xesosi:

—Kipakinipa komiri aua hitemoni? —itxa Xesosi.

Ininiã ninoa:

—Setxi komiri, åtikaka ximaki axapitiri pakini —itxana.

³⁵ Ininiã Xesosi:

—Hipaniåtana kåkiti xiti topåkani —itxa Xesosi.

³⁶ Eereka imaåkari ninoa setxi komiri, ximaki pakini. Itxari Teoso:

—Erekapitikari ia komiri, ximaki pakini pite sikakiti.

Mapixinika itxari komiri, ximakikata. Eereka xanakaãpota itxari imoianariakorimoni. Ininiã ninoa xanakaãpotari kãkitimoni. ³⁷ Ikinika nipokota. Kamitopeka itxana. Imoianariakori xãpokakari setxi kotari nipokori itetakori. ³⁸ Ipi ipi pakini mio kikiãkini nipokotapeka, apaka sitoãkini, amarini pakini. ³⁹ Eereka Xesosi iokanatana kãkiti aapokomonina. Iposo atoko iereẽtaua kanaua åki. Makataã tõpamoni isa.

16

Teoso Takaõtxikare

(Marko 8.11-13; Arõkasi 12.54-56)

¹ Pariseoakori, satoseoakori pakini sari Xesosimoni. Inirekarina Xesosi kerokiniri, ininiã itxarina Xesosi:

–Takaõtxikari, Teoso posotiire poerekaua ate, aãtamatiniri ìkapani, Teoso iokanatinii ìkorapokoriti aimarotini ìkapani –itxarina.

² Txamari Xesosi txana:

–Na noerekai. Mapiãnika iaxiti põkamarari inakasaaki: “Peereõtiri katana,” hõtxa. ³ Iua atokokana ìkanõkapanika iaxiti põkamarari, piãkaxitita inakasaaki: “Åparaãnapani. Kataparari ìtimatipani,” hõtxa. Himarotapitükari takaõtxikari iaxiti auakari. Txamari kona himarotari Teoso kamanãtakiti ìkorakanani. Hisãkirauatakasaaki, kãkiti erekarini atoko hõtxa, txamari maerekati hõkama. ⁴ Kãkiti uatxarini ! erekana. Itakanaparina Teoso. Hõte nirekari noerekini Teoso takaõtxikare, iposotiire. Konapitini. Kona noerekai hõte. Kitxakapirõka Teoso sãkire sãpiretakari Xonasi inakori auakasaaki, Teoso kamari posotiiretxi. Ikara atoko inakari posotiiretxi Xonasi auakasaaki, iuaikana ikamapanikariko. Iua posotiiretxi Teoso takaõtxikare itxapanikaua hõte ìkapani. Iua takaõtxikarinoka Teoso takaõtxikare hõte ìkapani –itxa Xesosi.

Iposo atoko Xesosi takanapana, sipe itxa.

Pão Tireẽkari Pirena

(Marko 8.14-21)

⁵ Xesosi imoianariakorikata ìpiriãtari ipoa. Ipinia apokasaakina, imoianariakori xinikaro pão imaxinõkaretikona. ⁶ Iuasaaki Xesosi õtãkikana ninoa:

–Erepaniko. Pariseoakori, satoseoakori pakini pãote tireẽkari pamonõkoniri –itxana imoianariakori.

⁷ Ininiã imoianariakori misãkiretakakaua:

–Pão amaxinõkaretini xika Xesosi ikara atoko txaua ate –itxana imoianariakori.

⁸ Xesosi imarotari imisãkiretakakinuana, ininiã iua:

–Kinirepa himisãkiretakakaua, pão himaxinõkaretini xika? Kona iteene hãuikari ninõkatini.

⁹ Atauako kona kãkitekapanikai hõte? Atauako himaxinõkaretepekari pão sikonoka siko mio kãkiti nisikakienatini? Hõxinikariko kipakinipa kotari hõxãpokaka pão itetakoro? ¹⁰ Atauako kona hõxinikariko ãti õti ipi ipi pakini mio kãkiti setxinoka pãoõ nisikakienatini? Hõxinikariko kipakinipa kotari hõxãpokaka pão itetakoro? ¹¹ Hõte nõtãkikasaaki: “Erepaniko. Pariseoakori, satoseoakori pakini pãote tireẽkari pamonõkoniri,” ninakasaakii, kinirepa kona himarotari kona pãoni ikara atoko nitxai hõte? –itxa Xesosi ninoamoni.

¹² Iuasaakiika imarotarina kona pão tireẽkarini monõkori txaua. Imarotarina pariseoakori, satoseoakori pakini sãkirera, ninoa oereẽkitira, monõkori txaua.

Petro Auikari Xesosi Teoso Åkiri Ininiãua

(Marko 8.27-30; Arõkasi 9.18-21)

¹³ Xesosi sari Sesaréia-Piripi sitatxiti takote. Iuaã ipimaãna imoianariakori:

–Kipa kãkiti uãkatano nota hõtari iaxitikiri?

¹⁴ Ininiã imoianariakori:

–Åtikaka uãkatoi Xoãoni kapatxisarerini iuaikana õkitikaua inakarii. Apanakini uãkatoi Erãsini iuaikana õkitikaua inakarii. Apanakinipekana uãkatoi Xeremiani iuaikana õkitikaua inakarii. Minakanisaaki åtikaka: “Åti Teoso sãkire sãpiretakari iuaikana õkitikaua inakarii,” itxaina –itxarina.

¹⁵ Ininiã Xesosi:

–Hõtepekana, kipa hõte uãkatano nota? –itxana ninoa.

¹⁶ Simão Petro apakapipiretari:

–Teoso mereẽkitirai pite. Teoso mapikati åkirirai pite –itxari iua.

¹⁷ Ininiã Xesosi:

–Simão Petro, Xoão åkiri, Teoso takari erekari pitemoni, kotxi kona kãkitini sãpiretai Teoso åkiri nininiu. Niri iaxitikirira sãpiretai. ¹⁸ Nisãpirenauatapanika pitemoni. Piuãka Petro. Kai sorotxikana piuãka. Kai aapokotxiti kamakari mereẽri kai kaikori xiti itakini ìkapani,

aapokotxi iua kai nopini ikamini ikapani, ininiã aapokotxi ! irika, kotxi kaikori nopini aua. Aapokotxi kamakari takari kai kaikori xiti. Iua kai atoko itxa ikara Teoso sãkire, isãpiretakiti pitemoni. Kãkiti nota nakitiakori naapoko atoko, ninoa sauaki nauini ikapani. Napotiinãtapanikari kãkiti naapoko ikapani. Satanasi tapara kona posotapaniri ixipokiniri ia naapoko. ¹⁹ Nipaniãtai Teoso sãkire pisãpiretini kãkitimoni. Xavi nisikinii atoko itxa ikara, kotxi kãkiti aukasaakiri Teoso sãkire iiroã Teoso auitexi ininiãtaãua. Ikorapokoriti kãkiti kamakiti pimauiritakaniã, Teoso tixine apaka ! auiritaãka. Ikorapokoriti kãkiti kamakiti pauiritiniã, apaka auiritaãka Teoso tixine —Xesosi txari Petro.

²⁰ Iposo atoko Xesosi:

—Teoso mereëkiti nininiua, apanakinimoni ! kasãpirena hãtxapeko —itxana imoianari-akori.

Xesosi Sãpiretari Ipinini

(Marko 8.31-9.1; Arókasi 9.22-27)

²¹ Iua õtisaaki Xesosi potorika isãpiretinina imoianariakori:

—Nisako Xerosareëmoni. Iuaã kiomãtxiakori, kaiõkatsoparerini, sasetotxi auiteakori pakini misiritanoko. Iposo atoko oka ninaãkako. Ipi ãti õtisaaki iuaikana nõkitikaãkako. Iuaikana aua nitxako —itxana.

²² Ininiã Petro misãkiretari Xesosi iuanoka inakasaaki. Itapararitika itxari:

—Konapitini, kona ikara atoko inakari kona auapani pitemoni, Apiananiri. Kona Teoso auiritapaniri ikara atoko piniko —itxari.

²³ Ininiã Xesosi kirioka Petromoni.

—Pisipiniikaua Satanasi. Nikimapore katokapareri atoko pitxa, kotxi pite nireëkiti kãkiti nireëkiti atokotxikana. Pite nireëkiti kona Teoso nireëkiti atokoni —itxari.

Xesosi Moianari Atão Inakari

(Marko 8.34-38; Arókasi 9.23-27)

²⁴ Iposo atoko Xesosi misãkiretana imoianariakori:

—Notakata kinirão sika pinakasaaki, piteka nireëkiti kona pinirekape. Notakata kinirão sika pinakasaaki, nota misiritiko atokokana pimisiritãkako. Ia atoko pinirekiniã, notakata pisapitakako. ²⁵ Pite ãtipirika kaminiãri pite nireëkitinoka, ininiã pinireëkiti xipokapitakako pitekata. Pite nireëkiti pimanirekakaniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata. ²⁶ Atxiiti papakapari ikinipoko tiitxi, ikini itixiti auakani tii, pinakiti ikapani. Atxiiti iua tiitxi xika kona pikipitari Teoso sãkire, ininiã kona pikaikota ãtipirika Teosokata. Ikara atoko ininiã, erekari atxiiti ikinipoko tiitxi auini? Konapitini. Apiaerekata Teosokata ãtipirika pikaikotini. ! Apakata kãkiti iikixitini Teoso, iuamoni isini ikapani. ²⁷ Nota hitari iaxitikirri apokako ninitiriakorikata. Iuasaaki niri iotximeretxikana nota iotximeretako. Iuasaakirako erekari isika erekari kamakanimoni. Iparikana iki isika iparikana iaõka. Txamari imisiritanako maerekati kamakani. ²⁸ Atãopitakara nisãpiretai hite. Uai uatxa aua kãkiti, ninoa imarotapanikariko nota hitari iaxitikirri auitexi nininiua. Ikara imarotinina apisa kona ipinapanikana —itxa Xesosi.

17

Moisesi, Eriasi Pakini

(Marko 9.2-13; Arókasi 9.28-36)

¹ Seisi õti napaka atoko Xesosi anikana Petro, Txiako, Xoão pakini. Xoão Txiako itari. Ikanikana oxiratarini nopinixiti. Ninoanani anika iuaã. ² Iuaã ninoa atamatarini iua. Ipinimonipo itxapeka. Itoõ iotximere atokatxi iotximere atoko itxa. Imãka serõka ipinikare atoko itxa. ³ Iuasaakipeka Moisesi, Eriasi pakini tokiã iuaã, misãkireta itxarina Xesosi. ⁴ Ininiã Petro akiritari Xesosi:

—Apiananiri, erekapitakari uai aãuini. Pinirekiniãri, nota kamari ipi ãti pakini papiri uai. Pite nakiti ikapani, Moisesi nakiti ikapani, Eriasi nakiti ikapani nikama.

⁵ Petro sãkirauanãtakasaaki, katxiãri pomëkoriri ninoa nopini apoka. Katxiãri ãki Teoso txari:

—Ere namarite, nitiretakiti. Napokaerekatarini iua, kotxi ikamari ninirekakiti. Hikenakotariko iua sãkire.

⁶ Xesosi moianariakori ikara atoko inakari ikenakotakasaakina, iteene ipikarauatana, ininiã iriãkatana xitipe. Itoõna ikipatana. ⁷ Xesosi sari ninoamoni. Itakauakotaua ninoa nopini. —Hõkitikaua. Kona hãpikarauatape —itxana.

⁸ Ininiã itikapokotana. Xesosinoka aua.

⁹ Oxiratarini xirata iokiriãpotakasaakina, Xesosi txana ninoa:

—Kona hīsāpiretapiri apanakinimoni hītīkakiti. Nota hītari iaxitikiri nipina iuaīkana naua ninaka atokoikarako hītīkakiti mixikanani hīsāpiretako —itxana.

—Ateeneka —itxarina.

¹⁰ Xesosi moianariakori pimaāri iua:

—Kinirepa kaiōkatsoparerini oerekaua: “Eriasi apokako Teoso mereēkiti apokini apisa?”

¹¹ Ininiā Xesosi apakapapiretana ninoa:

—Ari, atāopitikara ninoa sākire. Merepitipanika Eriasi apokapitika. Iua kamari imakinika iposope inini ikapani. ¹² Ari, nisāpiretai, Eriasi apokapeka. Txamari kākiti !imarotari iua. Imisiritarina iua inireēkitina iaōka. Iua atokotxikana itxanonako nota hītari iaxitikiri. Imisiritanona —Xesosi txana Petro, Txiako, Xoāo pakini.

¹³ Ininiā imoianariakori imarotari Xesosi sākire. Eriasi, Xoāo kapatxisareri itxaua.

Amarini, Maerekati Matamatakoti Auaītōtakiti Pirena

(Marko 9.14-29; Arókasi 9.37-43)

¹⁴ Ikanapiriākana atoko, itomaneri kākiti apotiitiniātaāua apokasaakina, kiki apoka Xesosimoni. Ikapotoreēkaua iua apisatoō. ¹⁵ Itxari:

—Apiananiri, piamonikari namarite. Maerekati matamatakoti auaītōtari iua. Atatsiirauata. Xaminaā irikapika. Kāuaāriā ikomokapika. ¹⁶ Niminamari namarite pimoianariakorimoni. Ninoa kona posotari erekapeka itxīkitakinirina.

¹⁷ Ininiā Xesosi txari:

—! Kauikarei hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimiteenekini? Himinari amarini notamoni —itxana.

¹⁸ Apokaāka atoko, Xesosi txitari iua maerekati matamatakoti:

—Pisipe.

Ininiā iua maerekati sipe. Iuasaakipeka iua amarini erekapeka itxa.

¹⁹ Eereka imoianariakori apoka Xesosimoni. Iuasaaki ninoanoka aua iukata. Imisākiretarina:

—Kanatokopa ininiāpa ate kona posotari maerekati matamatakoti aomitikini?

²⁰ Ininiā Xesosi:

—Kona atāoni hāuikari nisākire, ininiā kona hīposotari homitikiniri iua. Atāoenepitikara nisāpiretai hīte. Mostata iki axapitikiri. Axapitipitika nisākire hāuikiniā, mostata iki atoko nisākire hāuikiniā, hīposotari ia ōtanoxiratarī hīpaniātini: “Pite oxiratarī, uai posipika, ikaimoni pisa,” ininiā oxiratarī sapitikamako. Hīte posotari ikinipoko hinireēkiti hīkamini. ²¹ Txamari himamisākiretakaniāri Teoso, hinīpokotini himatapanakaniā Teoso himisākiretini ikapani, ininiāra kona hīposotari maerekati matamatakoti homitikini —itxa Xesosi.

Xesosi Iuaīkana Sāpiretari Ipinini

(Marko 9.30-32; Arókasi 9.43-45)

²² Kariréia tōpa apokasaakina, Xesosi misākiretana imoianariakori:

—Nota, hītari iaxitikirino mīkapiritaākako. Nisikaākako kikiakorimoni inirekaākitina ikaminina tīkane. ²³ Ninoa okano nota. Ipi āti pakini ōtisaiki iuaīkana nōkitikauako, iuaīkana aua nitxako —itxana ninoa.

Ikara inakari ikenakotakasaakina, imatinaniuatana.

Txineiro Teoso Misākiretiko Aikoti Īkapani

²⁴ Kapanaoō sitatxiti apokasaakina, kikiakori sari Petromoni. Ninoa kiki apakaparo txineiro Teoso misākiretiko aikoti nīkatakani amanaākito. Ipimaārina Petro:

—Hīte oerekakari sikataro txineiro Teoso misākiretiko aikoti nīkatakani amanaākito? — itxarina iua Petro.

²⁵ Ininiā Petro:

—Ari, isikapitikaro —itxa.

Eereka Petro iroā aapokotxi āki ikara sākiretixiti Xesosi isāpiretini ikapani. Xesosi sākirauata, Petro masākirauatakani apisa:

—Petro, ikini itixiti kipa sikataro txineiro auītetxiakorimoni? Atauako auītetxi nirimane sikataro? Atauako kākiti ātiātaā ikanikani sikataro? —itxari.

²⁶ —Kākiti ātiātaā ikani sikaro txineiro auītetximoni —itxa Petro.

—Ari atāopitikara. Ininiā kona auītetxi nirimani sikaro txineiro iuamoni. Iuaritika asikapitikaro. ²⁷ Txineiro amasikakaniā, txineiro apotitakani ! apokaerekataua. ! Anirekari ikara atoko inakari. Ininiā ipoa pisa. Pokatsaāta. Pimanamākarō ximaki merepitipanika pimaīkakito. Onamaā papokaro txineiro ota aīkitxirauatini ikapani. Oa

txineiro ota apakata nota sikakito ikapani, pite sikakito ikapani apaka. Panika. Pisikaro oa txineiro Teoso misäkiretiko aikoti nïkatakanimoni –itxa Xesosi.

Ininiã Petro kamari Xesosi säkire iaõka.

18

Kiripa Käkiti Apiatakari Txataua?

(Marko 9.33-37; Arókasi 9.46-48)

¹ Iuasaaki Xesosi moianariakori apoka iuamoni.

–Teoso auïtetxi ininiãtaãua, kipa käkiti apiatakari txataua? –itxana.

² Xesosi akiritari amarini axapitiri. Ninoa apisatoõ taka itxari.

³ –Atãopitikara nota säkire. Himaerekani himatakanapakanisaaki, Teoso nireëkiti himakamakanisaaki, amarini axapitiri atoko himinakanisaaki, kona hisapani Teoso auïtetxi ininiãtaãua. ⁴ Ia amarini axapitiri !iuikaua. Käkiti ia amarini atoko inakarira, iuaka polãotakiniãua, iuara apiatakari itxaua Teoso auïtetxi ininiãtaãua. ⁵ Nota nireëkiti pikamakaasaaki, pipoxokoniritika papakapiniãri amarini ia atoko inakari pinakasaaki, papakapano nota apaka –itxa Xesosi.

Maerekati Oerekakari

(Marko 9.42-48; Arókasi 17.1-2)

⁶ Xesosi säpirenautapanika:

–Käkiti txïkitakiniãri amarini, nota säkire auïãkari, maerekati ikamini, !apakata. Ereka-mariko kai mitari iua käkiti maerekati oerekakari iaxirikanokitaãkamako, iposo atoko ipoa apanïkakiã okaãkamako ipinini ikapani. ⁷ Käkiti ikini itixiti auakani misiritaãkako, kotxi auari käkiti maerekati apanakini kamini txïkitakakani. Auapika käkiti ikara atoko inakani. Ninoa misiritaãkako. ⁸ Piuako txïkitakiniãri maerekati pikamini, ininiã pitsotakari, oka pitxariko. Pikiti txïkitakiniãri maerekati pikamini, ininiã pitsotakari, oka pitxariko. Kotxi maerekati pikaminiã arikatxi maxipokatimoni pokaãkako. Apiaerekata mauakotikai pauini ätipirika Teosokata. Apiaerekata makititikai pauini ätipirika Teosokata. Pauiritiniãri maerekati pikamini txïkitaãkari pitekata ikaikotiniã, ininiã pite kamari maerekati apaka, ininiã arikatxi maxipokatimoni pokaãkako. ⁹ Iua atokokana poki txïkitakiniãri maerekati pikamini, pimaporoka, oka pitxariko. Kotxi maerekati pikaminiã, arikatximoni maerekani misir-itikoãtaã pokaãkako. Apiaerekata Teosokata ätipirika pauini äti pokinoka pauini. Kona pauiritapiri maerekati pikamini txïkitaãkari pitekata ikaikotini –itxa Xesosi säkire.

Soti Auïte Pïpinanaãkari

(Arókasi 15.3-7)

¹⁰ –Ikinipoko amarini pipaxitako, kotxi niri tixine au niri nitiriakori. Ninoa nïkatari amarini. Niri apisatoõ ätipirika iniritiakori auapika, ininiã käkiti mapaxitakaniãri amarini, isãpiretarina niri. ¹¹ Nota hitari iaxitikiri napoka ïkorapokoriti käkiti pïpinanaãkani atoko inakani napokini ikapani, kotxi ïmarotarina Teoso kimapore.

¹² –Kiãtokopa itxa hïxinikakiti? Kiki uua ipiraakori soti auïte seï pakini. Txamari ätika pïpinanaka. Kiãtokopa itxa? Itakanapari ipiraakori novëta novi pakini. Isari oxiratarimoni. Initari iua pïpinanaãkari. ¹³ Ipiraakori novëta novi na pïpinanaka, ininiã ipoxokoniuata. Apokasaakiri iua pïpinanaãkari, iteene ipoxokoniuata. ¹⁴ Iua atokokana hïri iaxitikiri kona nirekari amarini ätika pïpinanakini. Hïri nirekari imakinika amarini imarotiniãri ikimapore iuamoni sikari apo –itxa Xesosi säkire.

Maerekati Pitemoni Kamakari

¹⁵ –Pitari nisäkire auïãkari kaminiãri maerekati pitemoni, ininiã pisa iuamoni. Pitenoka pisa iuamoni. Iuanani pimisäkiretako. Põtãkikiniri ikïpitakasaaki, pimoianari iuaikana itxapekaua. ¹⁶ Põtãkikiniri imakïpitakanisaaki, ipi käkiti panikako iuamoni. Ipi minakanisaaki ätika panika iuamoni. Ininiã iuaikana põtãkikari iua maerekati kamakari. Iuasaaki pitekata sikani apaka ötãkikari. Kotxi Teoso säkire iõkatsopatakori oerekaua käkiti säkire kenakotakani, käkiti kamakiti itikakani ipi äti pakini auiniã, apakata apanakini atão inakari imarotini ikapani. Ipi äti minakanisaaki, ipi apakata. ¹⁷ Ninoa pitekata sikani säkire imakïpitakanisaaki, pisãpiretana käkiti Teoso misäkiretikoãtaã apotitakaniãri. Ninoa ikinipoko Teoso säkire auïãkani ötãkikariko iua. Imakïpitakanisaakiri ninoa säkire, himarotari atão maerekati kamakari itxaua iua. Teoso säkire mauïãkati atoko itxaua iua, kotxi kona inirekari ötãkikiko. Ate mokaiakari moianari atoko itxaua –itxa Xesosi säkire.

Pauiritakiti, Pimauiritakiniti Pakini

¹⁸ –Atãopitikara nitxai hïte. ïkorapokoriti käkiti kamakiti himauiritakiniti, Teoso tixine apaka !auiritaãka. ïkorapokoriti käkiti kamakiti häuiritakiti, apaka auiritaãka Teoso tixineë.

¹⁹ –Apikomoni ia nisäpiretai. Pite xinikakititxikana äti xinikiniä apaka, hinirekakiti hamanainiäri Teoso, niri iaxitikiri sikapitikai hamanaäkiti. ²⁰ Käkiti apotiitakasaakiaua nota ixinikinina ikapani, nota ninoakata aua. Atxiiti ipi ätinoka aua. Atxiiti ipinoka aua. Iuaritika nota aua ninoakata –itxa Xesosi.

Nitiritxi Äti Matiretakati

²¹ Petro sari Xesosimoni, pimaä itxari Xesosi:

–Apiananiri, kipakinikatapa napakapari nitari, maerekati ikaminano ätipirika inakasaaki? Setxikata atxiiti?

²² Ininiä Xesosi:

–Kona, kona setxikatani papakapari iua. Setxikata setëta papakapari iua, ininiä ätipirika papakapari.

²³ –Apikomoni noerekai papakapiniri käkiti, maerekati ikamakasaaki pitemoni. Teoso auñteti ininiua patrão ia atoko inakari itxa. Ia patrão nirekari iniriakori iikixitiniiri iua. ²⁴ Ininiä iua iaötaru txineiro isikakitopeka. Iuasaaki initiri minaäka iuamoni. Mitxipeka iua patrão sikari tesi mirão txineiro ota iua initirimoni. Txineiropokoni. Oa txineiro isikasaaki, itxari initiri: “Äti öti iuaäkana pisikano oia nitxineirote,” itxari initirimoni. Txamari, lisikaro, kotxi !oäuuaika. ²⁵ Kona katxineiroteri. Ininiä ipatrãoote paniätari ivëtxitiko iua, itanoro, imiakori, itii ikinipoko, ipatrãoote iikixitini ikapani. ²⁶ Iua initiri ikara inakari säkiretxiti ikenakotakasaaki, ipatrãoote apisatoö ikapotoreëkaua. Itxari iua: “Piätaparoko. Ikinika pitxineirote nisikaiko,” itxari ipatrãootemoni.

²⁷ –Ininiä ipatrãoote amonikari. “Kona ninirekaikaro nitxineirote pisikinino.” Ininiä auiritari isini.

²⁸ –Ininiä sipe itxa. Iua nitiritxi mitxi sikapekaro txineiro iua inakoto sei ota äti ipatrãoote nitirimoni. Poäonoka oa txineiro. Iuasaaki, aapokomoni isikasaaki, aökitari iua äti nitiritxi ipatrãoote nitiri. Imaäkari inoakiä. “Uatxa pisikano nitxineirote,” itxari.

²⁹ –Ininiä imoianari kapotoreëkaua iua apisatoö. “Piätaparoko. Ikinika pitxineirote nisikaiko,” itxari.

³⁰ –Txamari mitxiri nitiritxi: “!Niätapaikaroko,” itxari. Ininiä kateiamoni ieretakakitäkari imoianari txineiro xika. “Ikinika nitxineirote pisikasaakiikanoko, pikatxakako,” itxari. ³¹ Ikara inakari ene apanakini iua patrão nitiriakori kenakotakasaaki, ninoa naiataua. Ininiä isana ipatrãootemonina. Isäpiretarina initiri iokanatiniri äti initiri kateiamoni. ³² Ininiä iua patrão akiritari iua initiri: “Pite maerekati pitxaua, kotxi kita pite amanaäno nota niamonikini, ininiä piikixitini !ninirekaika. ³³ Kinirepa kona pite amonikari pimoianari nota amonikini atokokana? Kona erekai,” itxari.

³⁴ –Ininiä ipatrãoote iteene naiataua. Iokanataru iua kateiamoni imisiritikomoni ipatrãoote txineirote okinika imasikakanisaaki.

³⁵ Ininiä Xesosi xipokapiretari ia isäpirena:

–Niri iaxitikiri iua atokokana txauko hite, maerekati äti kamakasaakii hitemoni himamaxinikaretakanii häkixinireë –itxa Xesosi.

19

Kiki Itanorokata Itakanapakakini

(Mateo 5.31-32; Marko 10.1-12; Arókasi 16.18)

¹ Ikara inaka atoko Xesosi potorika Kariréia tōpa. Isa Xotéia tōpamoni uini Xotão ipiniä. ² Iuaä itomaneri käkiti sari iuamoni. Erekapeka itxikitakana amianatakani.

³ Pariseoakori apaka sari iuamoni. Inirekarina Xesosi kerokiniri isäkire. Ininiä ipi-maärina Xesosi:

–Auiritaäka atxiiti kiki takanapiniro itanoro, itakanapiniro inirekasaaki? –itxarina.

⁴ Ininiä Xesosi:

–Hite imarotapekari ia Teoso säkire iökatsopatakori:

Kitxakapirika merepitipanika ikinipoko Kamakari kamari käkiti, kiki inini, sito onini apaka ikamari käkiti.

⁵ Ikara atoko ininiä, kiki takanapari iri, inoro pakini, itanorokata auini ikapani, ininiä ninoa ätika atoko itxauana,

itxa Teoso säkire iökatsopatakori. ⁶ Ininiä kona ipi litxaukauana. Ätika itxauana. Ikara atoko ininiä, !erekari käkiti kalarikiniri Teoso apotiitakini –Xesosi txana ninoa.

⁷ Ininiä ninoa pariseoakori pimaäri:

–Ikara atoko ininiä, kinirepa Moisesi paniätari kiki iökatsopatiniri äätsopa, itanoro itakanapini äätsopate, ininiä eereka auiritari iua iokanatiniro oa?

⁸ Ininiä Xesosi apakapapiretana:

—Moisesi auiritai hītanoro hītakanapini, kotxi paikori hīxinire. Teoso nireēkiti hīmanirekakani xikara, Moisesi auiritai hītanoro hītakanapini. Txamari kitxakapirīka merepītipanika kona kiki takanaparo ītanoro. ⁹ Ininiā nitxai hīte, kiki takanapiniāro ītanoro, ātikata masirīkatoka, iua kamari maerekati. Itakiniāro āto sito, maerekati apiata ikama, kotxi ! imaākatari Teoso paniātakiti. Oa itakanapakito taākari apaka kamari maerekati —Xesosi txana ninoa.

¹⁰ Ininiā imoianariakori ikara ikenakotakasaakina, itxarina Xesosi:

—Ītaniritxi, Ītanorotxi ! auiritaāka itakanapakakinina, ininiā erekapiimana imītaniriuatakanina —itxarina.

¹¹ Ininiā Xesosi:

—Erekapitikari kākiti Ītanorouatini. Ātikakanoka Teoso kona nirekari Ītanorouatinina.

¹² Īxika auapitika kākiti mītanorouatakani. Kotxi ātikaka kiki auakasaaki, iūtona kona apakata ninoa takinoro sito. Apanakinipekana ikisauakatsikitiko xika kona ninoa posota itakinirona sito. Apanakinipekana kona nirekari Ītanorouatini Teoso auītetxi ininiāua ātipirika isāpiretini īkapani. Teoso manirekakaniāri pite Ītanorouatini, ininiā kona pītanorouatape —itxa Xesosi.

Xesosimoni Amarini Apokini

(Marko 10.13-16; Arókasi 18.15-17)

¹³ Iposo atoko kākiti minana amarini Xesosimoni. Inirekarina ninoa kii nopini iuako itakini. Inirekarina Xesosi misākiretiniri Teoso amarini īkapani. Txamari imoianariakori txitana. !Auiritana amarini anikinina Xesosimoni. ¹⁴ Ininiā Xesosi txana imoianariakori:

—Hāuiritanako amarini notamoni apokini. Kona hīotokakapena notamoni apokinina.

Kotxi kākiti Teoso auītetakani amarini atoko itxauana —itxana.

¹⁵ Ininiā iuako itaka ninoa kii nopini. Iposo atoko ĩkorape itxa.

Ātokori Ito Txineiroteri

(Marko 10.17-31; Arókasi 18.18-30)

¹⁶ Ātokori apoka Xesosimoni.

—Koerekareri erekarii, kiripa erekari nikama ātipirika Teosokata nauini īkapani? —itxari.

¹⁷ Ininiā Xesosi:

—Kininiāpa “erekari” pitxano? Kākiti erekari ! auari. Teosonanira erekari. Teosokata ātipirika pauini pinirekiniā, pikamariko Teoso paniātakiti.

¹⁸ —Īkiripa? —itxa.

Ininiā Xesosi:

—!Pokaniuatape. !Pisirīkape āti Ītanorokata. !Piītiriuatape. Poxiene !pikamape. ¹⁹ Piri, pinoro pakini pīpaxitako. Pitiretanako apanakini, piteka pitiretiniua atokokana, pitxapaniko —itxari.

²⁰ —Nikamapitikari ikara atoko pinakiti. Kiripa apikomoni nikamaā Teosokata ātipirika nauini īkapani? —itxari.

²¹ —Īkinika kinirāo kamaka pinakasaaki, ikinika pitii pivētxitako. Txineiro papakapakito pisika kākiti matxineirotenimoni. Ikara atoko inakari pikaminiā, Teoso tixine papokasaaki ĩkinipoko erekari auiniiko pite. Pitii pivētxitaka atoko, notakata sa pitxako —Xesosi txari.

²² Iua ātokori ikara ikenakotakasaaki, isipe. Imatinaninoka itxari ātokori, kotxi kaiāori itii. !Inirekari itii ivētxitini. ²³ Ininiā Xesosi txana imoianariakori:

—Atāopitikara ia nitxai hīte. Pamimari katxineiroterini auītetiniri Teoso. ²⁴ Apikomoni nisāpiretai. Atauako kamero napatari ākorike sonakiā? Apia mimari kākiti katxineiroterini auītetiniri Teoso —itxana.

²⁵ Xesosi moianariakori ikara ikenakotakasaakina, itsorīkaātana. Ninoa uākatari katxineiroterinimoni txineiro aua, kotxi Teoso apokarekatana ninoa, ininiā txineiro isika ninoamoni, ninoa uākatakiti. Ininiā ninoa pimaāri:

—Katxineiroteri maposotakaniāri Teoso tixinemoni isini, kipa posotari iuaā isini? —itxanātana.

²⁶ Xesosi atamatana. Apakapapiretana:

—Kākitika kona posotari. Teoso posotari ĩkinipoko ikamini.

²⁷ Petro misākiretari Xesosi:

—Atepekana, ate takanapapekari ĩkinipoko pitekata asini īkapani. Ikara atoko aniniā, kiripa ate apakapako? —itxari.

²⁸ Ininiā Xesosi:

—Atāopitikara nitxai hīte. Nota, hītari iaxitikiri niitopākako auītetxi itopanere nopini. Iuasaaki ĩkini itixiti amaneri itxauako. ĩkinipoko atamatanoko nota hītari iaxitiki iotximere. Iuasaaki hīte nisākire kīpitakani apaka topākako auītetxi itopanere nopini. Iua iitopaneretxi tosi pakini. Tosi nirimanetxi Isaeo tixine auakani auīteakori hītxauako.

²⁹ Atxiiti nota ikapani pitakanapari paapoko, pitariakori, pitaroakoro. Atxiiti nota ikapani pitakanapari piri, pinoro, pamarite. Atxiiti pitakanapari pikikiote nota ikapani. Ikara pitakanapakasaaki nota ikapani, apiata papakapariko. Itori papakapariko. Ikara atoko pininiã nota ikapani, ãtipirika paua Teosokata. ³⁰ Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki —itxa Xesosi sãkire.

20

Ova Takakoriãtaã Parïkauatakani

¹ Xesosi txari:

—Teoso auitexi ininua ia kakikioteri atoko itxa. Ia kakikioteri takapekari txipokori ova inakoro ikikioteẽ. Ovanoka itaka. Oiõpeka onakasaaki, iua kakikioteri potorika ïkanõkapanika. Initari parïkauatakani ova amakani ikapani. ² Aõkitakasaakina, ipimaãna: “Hĩnirekatari parïkatxi?” itxa.

—“Ari, anirekapitikari,” itxana.

—“Atauako ãtoka txineiro ota pirata kamakori apakata ãti õti pokamara piparïka ïki ikapani?” itxana.

—“Ari, apakatapitika,” itxana. Kotxi ãtoka ota pirata kamakori iuaaaki atão parïkatxi ïki ãti õti pokamara kãkiti parïkauatini ïki. Ininiã itakaremoni iokanataka iparïkauatinina ikapani.

³ —Novi oarape inakasaaki iuaïkana ipotorika. Nipokori vëtxitikoãtaãmoni isa. Iuaã atamatana kãkiti maparïkauatakani. ⁴ Ininiã imisãkiretana: “Hĩte apaka atxiiti nirekatari hïparïkauatini nitakareãtaã, ininiã niïkitxitai atão inakari hïparïka ïki,” itxa. Ininiã ninoa apaka sari.

⁵ —Apaniãxitipeka inakasaaki iuaïkana iokanataka apanakini parïkauatakani itakaremoni. Itinïtikitakasaaki iuaïkana iokanataka apanakini parïkauatakani itakaremoni. Mitxi isãkire atokokana itxa isãkire ninoamoni. ⁶ Mapiãnikata takotepeka inakasaaki iuaïkana isa parïkauatakani initini. Apokapanikana maparïkauatakani. Ipimaãna: “Kinirepa ia õti maparïkauatani hïtxa?” itxana.

⁷ —“Kotxi kona kãkiti sikaua parïkatxi,” itxarina.

—“Nitakareãtaã hïsa. Iuaã hïparïkauata. Hĩte apakapariko hïparïka ïki erekari,” itxana.

⁸ —Ïkanõkapeka inakasaaki kakikioteri akiritari initiri apiari: “Parïkauatakani pakirita. Piïkitxitana. Merepanika piïkitxitana kikata parïkauatakani. Eereka piïkitxitana tinïtikita parïkauatakani, pitxaãpotako,” itxari.

⁹ —Kikata parïkauatakani imakinikana apakapari ãtoka txineiro ota pirata kamakori. ¹⁰ Kikiãkini ïkanõkapanika parïkauatakani ikara itikasaakina, oãkatarina: “Ate apakaparoko apiatako aparïka ïki,” itxamana. ãtoka txineiro ota pirata kamakoro imakinikana apakapana. ¹¹ Txineiro apakapakana atoko, omanãkarauatana. “!Erekari kakikioteri,” itxanãtana. ¹² Ininiã ninoa txari iua: “Naia kikata parïkauatakani poiãoka iparïkauatana. ãto oaranoka iparïkauanãtana. Ate parïkauata ikiniõtika kapatakariã. Ate parïkauatapitipo, txamari pite ïkitxitaua ate naia piïkitxitini atokokana. Kona erekai,” itxarina.

¹³ —Iua kakikioteri apakapapiretana: “Nitiretakini, kona nota misirienetai hĩte. Ïkanõkapanika nipimaãni: ‘Atauako ãtoka txineiro ota pirata kamakori apakata ãti õti pokamara piparïka ïki ikapani?’ nitxai mixikanani. Ininiã hĩte: ‘Ari, apakatapitika,’ hïtxa. Ininiã na nimisirienetai hĩte. ¹⁴ Ininiã txineiro nisikakito hanikaika. Haãpokomoni hïspeka. Nota nirekari niïkitxitinina hĩte tikini parïkauatakani hĩte niïkitxitini iaõka. ¹⁵ Atauako kona erekari nota txineirote ninirekakitimoni nisikini? Hĩte xikotano, erekari nikamini xika,” itxana ninoa.

¹⁶ Xesosi xipokari isãpirena:

—Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki. Teoso aiatana kaiãopokori kãkiti itixine isinina ikapani, txamari poiãonoka iua mereẽ —itxa Xesosi.

Iuaïkana Xesosi Sãpiretari Ipinini

(*Marko 10.32-34; Arõkasi 18.31-34*)

¹⁷ Xesosi Xerosareẽmoni ikimaporitakasaaki, akiritana imoianariakori. Ninoanoka imisãkireta.

¹⁸ —Hĩkenakotari nisãkire. Xerosareẽmoni asako. Iuaã nota hĩtari iaxitikiri mïkapiritaãkako. Sasetotxi auitëakori, kaiõkatsoparerini pakinimoni nisikaãkako, ininiã ninoa apotiãtaua. Iuaaakiko ninoa txari: “Okaãkapitikako.” ¹⁹ Eereka ninoa sikano Xoteo minakonimoni. Ninoa napetano. Ixirokítatanona aãpitsaã. Iposo atoko aamina ipiriãmitakariã tokakita

ninaãkako, oka itxanonako. Ipi ãti õtisaaki nõkitikauako, iuaĩkana aua nitxako –itxa imoianariakorimoni.

Txiako, Xoão Pakini Amanaãkiti
(Marko 10.35-45)

²⁰ Eereka Sepeteo itanoro apoka Xesosimoni. Ominana imi Txiako, Xoão pakini. Ninoa Txiako, Xoão pakini Xesosi moianariakori. Okapotoreẽkaua iua apisatoõ.

–Atauako ninirekakiti pikaminano? –otxari.

²¹ –Kipa pinireka? –itxaro.

–Ikinĩmane auĩte pinakasaakiua, ninirekari naia ipi namariteni auĩtetxiakori ininiãuana pitekata. Pauiritatana pitekata iitopãkinina, ãti pikikomoni inini, ãti pisaneremoni inini? –otxari.

²² Ininiã Xesosi apakapapiretana ninoa:

–! Himarotari hamanaãkiti. Mapaõti napa atoko iteene nimisiritaãkako. Atauako hiõposotatari hãtatsiitniri notakata? –itxana ninoa.

–Aposotapitika –itxarina.

²³ –Atãopitikara hãtatsiirauata notakata, txamari kona notani mereẽna kãkiti nikikomoni, nisanaremoni topãkakani ikapani. Nirira mereẽpekana ninoa kãkiti notakata topãkini ikapani –itxana.

²⁴ Apanakini Xesosi moianariakori kenakoenetari Txiako, Xoão pakini amanaãri Xesosi auĩtetxi ininiuana ikapani, ininiã omanatana. ²⁵ Ininiã Xesosi akiritana ninoa imakinikana iuamoni.

–Himarotari Xoteo minakaniua auĩteakori paniãtari kãkiti ikinika auĩteakori nireẽkiti ikaminina ikapani. Kona atão itiretana kãkiti. Kãkiti kona kamari auĩtetxiakori mauir-itakiniti. ²⁶ Kona ninoa auĩtetxiakori atoko ! hĩtxape. Atão apiari pininiua pinirekiniã, pimoianatariko apanakini. ²⁷ Apanakini auĩte pininiã pinirekiniã, nitiritxi pitxauako merepanika. ²⁸ Ikara atoko nitxa nota hĩtari iaxitiki iikorapokoriti napokasaaki. Ninitiri ! auari. Ikorapokoriti napoka, kãkiti nitiri nininiua ikapani, kãkiti nitiretini ikapani. Ikorapokoriti napoka pipinini ikapani, kaiãopokori kãkiti mapinakani ikapani, kotxi nota iĩkitxirauata ninoa mapinakani ikapani –itxana ninoa.

Ipi Mõsiãreni Xesosi Makananitini
(Marko 10.46-52; Arõkasi 18.35-43)

²⁹ Xerikoo sitatxiti ipotorikasaakina, itomaneri kãkiti sari Xesosikata, imoianariakori pakinikata. ³⁰ Iuasaaki ipi mõsiãreni topãkanãta kimapori tiniãpo. Xesosi napaãpotini ikenakotakasaakina, akiritana:

–Apiananiri, aãuĩte Taviini apika mekanirii, piamonĩkaua ate –itxarina.

³¹ Kãkiti iuaã pinitana:

–Himaãtako –itxana.

Txamari apiata akirikatana:

–Apiananiri, aãuĩte Taviini apika mekanirii, piamonĩkaua ate –itxarina.

³² Ininiã Xesosi iotoka. Akiritana ninoa mõsiãreni. Apokana iuamoni.

–Kipa hinireka nikaminii hĩte? –itxa.

³³ –Apiananiri, aĩtikapokotini anireka.

³⁴ Ininiã Xesosi amonĩkana. Okina nopini itakari iuako. Iuasaakipeka kõsiãrepekana, sa itxana Xesosikata.

21

Xesosi Xerosareẽ Apokaãpotini
(Marko 11.1-11; Arõkasi 19.28-40; Xoão 12.12-19)

¹ Xesosi imoianariakorikata imatokoãpotari Xerosareẽ. Apokana Petxipaxee inakori aapokotxiti, õtanoxiratarĩ takote Oriva inakori xiratamoni. Iuaã Xesosi iokanatanana ipi imoianariakori aapokotximoni.

² –Hĩsa ikiraã kaixiti auakari aapokotxitiã. Iuaxiti hãpokasaaki, hãpokaroko xomẽta iaxiriãkoro oimikata. Hĩkoxirikana. Uaimoni mina hĩtxanako. ³ ãti misãkiretakasaakii: “Kinirepa hĩkaxirikatarĩ pirãtxi?” Ininiã hĩte: “Apiananiri nirekana,” hĩtxako. Ininiã iua auiritai himininina –itxana ninoa.

⁴ Kitxakapirĩka Teoso sãkire sãpiretakari sãpiretakekari ikara atoko inakari. Ininiã iua sãpiretakiti kitxakapirĩka atão inakari apokapeka. ⁵ Iua txari: Hĩtxariko Xerosareẽ auakanimoni: “Hãtamata. Hĩauĩte apokaãpota hĩtemoni. !Kaneenamari.

Xomẽta nopini iitopãkanãta. Xomẽta ãkiri nopini isaãpota,” hĩtxako ninoamoni, itxa Teoso sãkire sãpiretakari kitxakapirĩka.

⁶ Ininiã Xesosi moianariakori sari. Ipaniãtakiti iaõka ikamana. ⁷ Ininiã iminaro xomêta oimikata. Itakarina imãkana inopinina Xesosi topãkini ikapani. Ininiã Xesosi topãka xomêta ãkiri nopini. ⁸ Itomaneri kãkiti katamêkari imãkana kimapori ãpo. Apanakini sauakari aãxike. Ikasiãkaxikeãpotarina aãxike kimapori ãpo. Ikara atoko ikamana, Xesosi paxitiko oerekinina ikapani. Imãkana nopini, aãxike nopini, xomêta napaãpota. ⁹ Kãkitipokoni iikiakani. Kãkitipokoni Xesosi tikini ikani. Imakinika saãpotakasaakina, akirikatana:

–Peerekari Tavii apika mekaniri. Teoso posotiirekata ikari, Teoso nireêkiti kamakari iua. Teoso sikariko erekari iuamoni. Peerekari Teoso, iaxiti apiko nopinixiti auakari. Apiananiri itxaua –itxãpokatana.

¹⁰ Ininiã Xesosi apokaepka Xerosareê. Iuasaaki ikinimane Xerosareê auakani tsoriãkaata. –Kirinapanipa ikira kiki inatari? –itxanãtakakana.

¹¹ Kãkiti Xesosikata ikani sãpiretana:

–Xesosikara ikira. Teoso sãkire sãpiretakari, ikira. Nasaree sitatxitikiri, Kariréia tãpa auakari ikira –itxana.

Pirãtxi Vêxtitakani Omitikiko

(Marko 11.15-19; Arókasi 19.45-48; Xoão 2.13-22)

¹² Xesosi iroã aiko ãki Teoso misãkiretikoãtaã. Omitikenatana tiitxi vêtxitakani. Amoti-itakani Teoso misãkiretikoãtaã auakani omitikenata. Ikitakari txineiro vêtxitakani mesate. Kamao vêtxitakani topãkini apaka ikitaka. ¹³ Xesosi misãkiretana:

–Teoso sãkire iõkatsopatakori txari:

Ia naapoko, “Teoso misãkiretiko aikoti” akiritaãkako, itxa. Txamari hite txikitakari ia aiko kãtiririni iomaãtiniãtaã ininiua –itxa Xesosi.

¹⁴ Mokirini, kãkiti matãpokotakani pakini apoka Xesosimoni Teoso misãkiretiko aikotiã. Erekaepka itxikitakana ninoã. ¹⁵ Iuasaaki amarini Teoso misãkiretikoã auakani iteene akirikata:

–Peerekari aãũte Taviini apika mekaniri –itxanãtana.

Sasetotxi auãteakori, kaiõkatsoparerini pakini itikari Xesosi posotiire, kãkiti erekaepka itxikitakini. Ninoã kenakotari amarini akiritakiti:

–Peerekari aãũte Taviini apika mekaniri.

Ininiãkara ninoã omanãkarauata. ¹⁶ Ininiã imisãkiretarina Xesosi:

–Pikenakotatari ikara amarini akiritakiti? –itxana.

–Nikenakotapitikari. Hite atatsopatapekari ia Teoso sãkire iõkatsopatakori:

Ãtokoriakori, amarini pakini, ninoapeka apaka txariko: “Peerekari iua,” itxanako, itxa Teoso sãkire iõkatsopatakori. Ininiã Teoso sãkire iaõka ninoã kamanãta. Ininiã erekapitikari ninoã akiritakiti –itxa Xesosi.

¹⁷ Iposo atoko itakanapana. Ikorape itxa. Itakanapari Xerosareê. Isa aapokotximoni Petãnia inakorimoni. Iuaã itxiaka.

Piko Mina Marito Pirena

(Marko 11.12-14, 20-25)

¹⁸ Katimatinikata iuaãkana Xesosi sari sitatximoni. Ipxinipokoriti inatxita. ¹⁹ Atamataro piko mina kimapori itiniãpo. Isa oamoni txipokori itximini ikapani. Txamari otsopanani auaro. Iuasaaki itxa:

–Kona kariikaiko –itxaro.

Iuasaakipeka otxiaroka.

²⁰ Imoianariakori ikara itikasaakina, itsorikitaãtana.

–Ii natokopa otxape katimari otxiarokini? –itxanãtana ninoã.

²¹ Ininiã Xesosi:

–Atão nisãpiretai. Teoso sãkire hãuikiniã, hite posotari hãkaminiri mixikanani nikamakiti atoko inakari. Piko mina txiarokini nitxikitakini atoko, hãposota hãkamini. Teoso sãkire iteene hãuikiniã, apiata hãkamako. Hãposotamariko hãpaniãtiniri ikira ixirata: “Põkitikaua. Ipoamoni oka pitxaua.” Iuasaakipekamako ixirata ipoamoni oka itxamauako. ²² Pite atão pauikiniãri Teoso sãkire, iua pimisãkiretakasaaki, ikinipoko pamanaãkiti Teoso sikai –itxa Xesosi.

Xesosi Paniãtakari Moerekakoni

(Marko 11.27-33; Arókasi 20.1-8)

²³ Xesosi iroã Teoso misãkiretiko aikotiã. Kãkiti oerekasaaki, sasetotxi auãteakori, kiomãtxiakori pakini apaka iuaã. Ipimaãrina Xesosi:

–Kipaniãpa pikamari ikora pikamakiti? Kipa paniãtai? –itxarina.

²⁴ Ininiã Xesosi:

–Nota apaka pimarauatako hitemoni. ãtinoka nipimaãiko hite. Nota pimaãkitiko hitemoni hisãpiretiniãno, nota apaka sãpiretai hite hãpimaãkiti notamoni, ininiã nisãpiretai nota

paniätakari uäka apaka. ²⁵ Ia nipimaäi hïte: “Kïpa paniätari Xoõoni ipatxisarauatini? Teosokani paniätari Xoõo? Käkïtikani paniätari Xoõo?” –itxana.

Ininiä ninoa misäkiretakakaua:

–“Teoso paniätari,” aniniä, “Kinirepa kona häuikatarï isäkïre?” Xesosi txamaua eereka.

²⁶ “Käkïtirä paniätari Xoõo,” aniniä, apanakini omanatamaua, kotxi ninoa uäkatarï Xoõo Teoso säkïre säpiretakari ininiua.

Ikara atoko itxana imisäkiretakakiniua. ²⁷ Ininiä apakapapiretana:

–!Aimarotarï iua paniätakari.

Ininiä Xesosi:

–Nota apaka kona säpiretai nota paniätakari uäka.

Iri Säkïre Kïpitakari, Iri Säkïre Makïpitakati Pakini

²⁸ –Hïxinïkarïko ia nisäpiretakitiko: Kïkï auari ipi imi. Akïritari anekari. “Namarite uatxa piparïkauata nitakare ova auiniätaä,” itxari imi.

²⁹ –Ininiä imi anekari: “!Nisapani. !Ninïrekari nïparïkauatini,” itxari. Eereka ixinïkaxit-inäta. “Ari, nisapïtikako,” ininiä isa iri takaremoni.

³⁰ –Iua kïkï akïritari imi manerïtakari. Ipaniätari iua atokokana. Iua imi: “Ari, nisapïtikako.” Txamari, lisari.

³¹ –Ininiä ïkirïpa kamatarï iri paniätakiti? –itxa Xesosi.

Ininiä ninoa kiomätxiakori, sasetotxi auïteakori pakini apakapapiretari:

–Anekariä.

Ininiä Xesosi:

–Atäöpïtika nisäpiretai hïte. Kïtïriri apokako Teoso auïtetxi ininiätaäua hïte apisapanika. Kanokarero apokako Teoso auïtetxi ininiätaäua hïte apisapanika. ³² Kotxi Xoõo kapatxisarerini apoka hïtemoni. Oerekai erekari kimaporiti. Txamari kona hïte auikari isäkïre. Kïtïriri, kanokarero pakini auikari isäkïre. Iuasaaki hïmarotarï ninoa maerekati kamakani takanapïniri imaerekanina. Ikamarina erekarïnoka. Hïte itïkapekari. Txamari hïte kona takanapari himaerekani. Kona häuikari Xoõo säkïre, ininiä iua kïkï säkïre makïpitakati atoko hïtxa, kotxi hïsäkïre: “Akïpitapïtikari Teoso säkïre,” txamari kona hïkïpitari –itxa Xesosi.

Parïkauatakani Maerekani

(Marko 12.1-12; Arókasi 20.9-19)

³³ –Äti säpirenatxi atäo inakari oerekiko nisäpiretai. Hïkenakota –Xesosi txana.

–Kïkï kakïkïoterï takaro txïpokori ova inakoro. Ovanoka itaka. Iposo atoko ipïriketarï. Eereka iuaätaä ikamari ova katsonakïko. Iposo atoko ikamari aapokotxi ötãnorï, ikïnipoko itakare atamatïni ïkapani. Iposo atoko ïkïtxitana kïkïäkïni itakare nïkatakani ïkapani. Ininiä ninoa nïkatarï itakare. Eereka kakïkïoterï sari äti itixiti. ³⁴ Ova manapi ïnakasaakï, iokanatana inïtirïakori itakare nïkakanïmoni, ova apakapïnina ïkapani.

³⁵ –Txamari, ninoa maïkapeña inïtirïakori. Ixïrokïtatarïna äti. Okapïrïna äti. Äti kai sorïä ikïporïnakana. ³⁶ Iuaïkana iua kakïkïoterï iokanatana inïtirïakori. Iuasaakï ito iokanata. Mïtxïrïni atokokana itakare nïkatakani txapena nïnoani. ³⁷ Eereka ïmapotökïre iokanatarï imi nïnoamoni. Iuäkatarï: “Namarite iua, ininiä ninoa paxïtari iua,” itxa.

³⁸ –Txamari, imi atapakasaakïna, imisäkiretakakana: “Erepani imi. Maökari, ininiä okïnïka itakare kaïkotïnaua atemoni.” ³⁹ Ininiä ïmaïkarïna imi. Kïkïo xïrïpïrexiti anïkarïna. Iuaä oka itxapïrïna.

Ininiä Xesosi pïmaäri käkïti iua takote auakani:

⁴⁰ –Ininiä iua kakïkïoterï ïkasaakï, kiätokopa itxatanako ninoa kïkïäkïni? –itxa Xesosi.

⁴¹ Ininiä ninoa iua takote auakani apakapapiretari:

–Kakïkïoterï okanako ninoa maerekati kamakani. ïkïtxïtanako apanakini itakare nïkatakani ïkapani, ininiä ninoa sïkapïtikarïko ova oïökasaakï –itxarïna Xesosi.

⁴² Ininiä Xesosi:

–Hïte atatsopatapekari ia ïökatsopatakori Teoso säkïre:

Kai aapokotxi kamakani kona nïrekari äti kai sorï. Iua kai imanïrekakïnïti kai apïari itxapekaua. Apanakini kai sorï maïkakarï itxaua. Teosokara txïkïtakari ïkara atoko inïni. Ikara peerekari atemoni.

Nota hïtari ïaxïtkïrï iua kai atoko nïtxaua. Peerekari Teoso, kotxi nota hïtari ïaxïtkïrï käkïti manïrekakïnïti. Teoso txïkïtakano nota apïananïrï nïnïniäua.

⁴³ –Ininiä nisäpiretai hïte, Teoso kona hïauïte ! itxäïkauako. Iua mereërikïo apanakini käkïti inakïtiakori ïkapani. Ninoa kamapïtikari Teoso nïreëkiti. ⁴⁴ Apïkomoni Teoso säkïre ïökatsopatakori säpiretaua iua kai apïari atoko inakari. Itxari:

Käkïti iua kai nopïni irïkasaakï, ïkarouata iua. Kai käkïti nopïni irïkïniä, !auaïka käkïti, –Xesosi txana ninoa.

⁴⁵ Sasetotxi auñteakori, pariseoakori pakini kenakotakasaakiri ikara sãpirenatxi atão inakari oerekiko Xesosi sãpiretakiti, ninoa ! apokaerekatarina isãpirena, kotxi imarotarina ninoa takari nãkatakani maerekani atoko inakani itxauana. ⁴⁶ Ininiã ia xika inirekarina imaãkinirina. Txamari ! imaãkarina, kotxi ipãkarina kãkiti iuaã apotiitakaniua. Kãkitimoni Xesosi atão Teoso sãkire sãpiretakari itxaua.

22

Kiiniri Itanorouatiko Pirena (Arókasi 14.15-24)

¹ Iuaãkana Xesosi sãkirauatakasaaki kãkitikata, isãpiretari sãpirenatxi atão inakari oerekiko. Itxari:

² —Teoso auñtetxi ininiãua ia auñtetxi atokokana. Ia auñtetxi kamari kiiniri imi itanorouatini ikapani. ³ Ipaniãtari initiriakori akiritinina ikemañtxitakini kiiniriã ininina ikapani. Txamari ikemañtxitakini ! inirekari ikiiniriteã isinina. ⁴ Iuaãkana lokanatarari apanakini initiriakori ikemañtxitakinimoni. “Hĩtxanako: ‘Nipokori iposopeka. Nokapekari kema auñte, kema auñte ãkiri pakini. Paĩpepokori. Imakinika niposotapekari. Hĩsapoka kiinirimoni,’ hĩtxanako.” Ininiã ninoa kamari isãkire iaõka.

⁵ —Txamari ikemañtxitakini ! imaãkapiretarina. Iparĩkamoni isana. Ætikaka sari kikiomoni. Apanakini sari ãtiãtaã tiitxi ivẽtxitinimoni. ⁶ Apanakinipekana maĩkapena initiriakori, noropata, oka itxapena. ⁷ Iua auñtetxi ikara inakariene ikenakotakasaaki, iteene inaiataua. Lokanatarari isotatoneakori ninoamoni. Ininiã okapena ninoa kokanirini. Iotikapirina ninoa aapoko.

⁸ —Eereka iua auñtetxi akiritana apanakini initiriakori: “Kiiniri namarite itanorouatini pirena iposopeka. Txamari merepitipanika nikemañtxitakini ! erekana. ⁹ Iua atoko ininiã, hĩsa ahoaãtaã, kãkiti napanakiniãtaã. Hĩkemañtxitana ikinimane haõkitakini,” itxana ninoa.

¹⁰ —Ininiã isana ahoaãtaã. Ikemañtxitana ikinimane aõkitakini. Apotiitarina kãkiti itanapoko. Maerekani, erekarini pakini apotiitana. Anikana kiinirimoni, ininiã kãkitipokoni xãpoãkata.

¹¹ —Iua auñtetxi atamatana ikemañtxitakini. Atamatari kiki mãkatxi itanorouatikosaaki ieretaãkori mieretaãkati. ¹² Ininiã akiritari iua: “Nimoianari, kiãtokopa piĩroã naapoko, kotxi mãkatxi itanorouatikosaaki ieretaãkori kona pieretaka?” Iua kona kasãkireri.

¹³ —Ininiã iua auñtetxi paniãtari initiriakori: “Himaãkariko. Hĩaxirikariko iuako, ikitinota pakini, anika hĩtxariko mapara. Piãkatximoni hõkariko,” itxana initiriakori. Iuaãtaã kãkiti txiapatiniãtaã, kãkiti akerakitatsiriĩtiniãtaã.

¹⁴ Xesosi xipokapiretari isãpirena.

—Itomaneri kemañtxitakoni. Txamari poiãoka mereẽkoni —itxana ninoamoni.

Homano Auñte Itxititiko Pirena (Marko 12.13-17; Arókasi 20.19-26)

¹⁵ Ninoa pariseoakori sipeka. Eereka apotiitauana. Imisãkiretakakana. Ixinikaxitinãtarina:

—Anirekari Xesosi kerokiniri isãkire, aãpoĩtiniri ikapani. Ininiã kiãtokopa atxatari apimainiri ikerokiniri ikapani? —itxanãtakakana.

¹⁶ Ininiã ninoa pariseoakori paniãtana ãtikaka ninoa oerekakini, apaka ãtikaka Erotxi sãkire auñakani, Xesosimoni isinina ikapani. Ininiã isana iuamoni. Imisãkiretarina. Pariseo sãkire iaõka isãpiretana.

—Koerekareri, aimarotari atãoenepitikara pisãkire. Atãoenepitikara pisãpiretari Teoso nirekiti akaminĩ ikapani. Pite na piãkarauata xatiki kãkiti sãkire xika. Ætinoka pisãkire pisãpireta ikinakariti kãkitimoni. Apanakinimoni pisãpiretakiti iuatxikana pisãpiretari apanakinapemoni. ¹⁷ Ininiã pisãpiretaua. Atãokani txineiro asikini Homanoakori auñtemoni, Sesa inakorimoni? Apakata amasikakaniri iuamoni? —itxarina iua.

¹⁸ Xesosi imarotari ninoa nirekari ikerokiniri isãkire. Ininiãkara itxana:

—Kinirepa hinirekari nikerokiniri nisãkire? Kona erekai hĩte. Hĩsãkirauatakasaaki, kãkiti erekarini atoko hĩtxa, txamari maerekati hĩkama. ¹⁹ Hõerekano txineiro ota Homano auñte asikini ikapani.

Ininiã iminarona txineiro ota.

²⁰ —Kisanõkapa ia? Kiuãkapa aua uai? —itxana ninoa.

²¹ —Ari, Homano auñte —itxana.

—Ininiãkara hĩsakariko Sesamoni iua nakiti. Hĩsakariko Teosomoni iua nakiti —Xesosi txana ninoa.

²² Ikara apakapapirenatxi ikenakotakasaakina itsorĩkaãtana.

—Pamatireri iua —itxanãtakakana.

Ininiã itakanaparina, sipeka itxana.

*Ip̄kari Ōkitikiniua Mauikakoni
(Marko 12.18-27; Arókasi 20.27-40)*

²³ Iua ōtisaakipeka ātikaka satoseo apoka Xesosimoni. Satoseo inakoni !auikari ip̄kani iuaikana ōkitikiniua.

²⁴ —Koerekareri, Moisesinira oerekari ia sākiretxiti: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatarī amarini iua itarini ip̄ipekarini uãka,” itxa Moisesini. ²⁵ Setxi itaritxiakori aua mitxi ikorapokoriti. Apia anekatakari itaniriua. Eereka ip̄ipe meenetika, ininiã itari takaro iuani tikinitakito. ²⁶ Iua atokokana iua itari ip̄ipe meenetika. Āti itari iuaikana takaro iuani tikinitakito. Txamari iua atokokana ip̄ipe meenetika. Iua atokokana txaãpota ikinika itariakori. ²⁷ Eereka oa sito apaka op̄ipe. ²⁸ Ininiã ip̄kani iuaikana ōkitikasaakia iuaikana auãki ininina, ĩkiripa oitaniri aua oakata iusaaki? Kotxi ikinimane ninoa setxi itariakori takapekaro oa —itxarina iua.

²⁹ Ininiã Xesosi:

—Hite kerokari, kotxi !himarotari Teoso sākire iōkatsopatakori. !Himarotari Teoso postōire apaka. ³⁰ Ip̄kani iuaikana aua inakasaaki, kona ninoa itaniriuaatka. Teoso nitiriakori iaxitikiñi atokoepka itxanako. ³¹ Hite !auikari ip̄kani ōkitikiniua iuaikana auãki inini. Atauako kona hātatsopatapanikari Teoso sãpiretakiti hitemoni? Iara isãpiretai:

³² Apraão, Isaki, Xakoo pakini Teosonekarano nota,

itxa Teoso. Ininiã Apraão, Isaki, Xakoo pakini auãkipanika itxana, kotxi auãki inakani Teosonera iua. Ninoa uatxa auãki inakani, kotxi kona ip̄kani Teosoneni Teoso —itxa Xesosi.

Iusaaki kãkitipokoni kenakotari ikara Xesosi sākire. ³³ Xesosi sākire ikenakotakasaakina, itsorikaãtana, kotxi paimatireri Xesosi apakapapiretakiti satoseoakorimoni.

*Teoso Paniãtakiti Apiari Akamini
(Marko 12.28-34)*

³⁴ Xesosi ĩkiteritika apakapapiretari satoseo pimainiri, ininiã satoseo !ipimarauataika. Pariseoakori kenakotari ikara, ininiã apotiitauana. ³⁵ Pariseo, Moisesi sākire oerekakari, iua nirekamari Xesosi kerokiniri isākire. Ininiã ipimaãri:

³⁶ —Koerekareri, ĩkiripa Teoso paniãtakiti apiari txataua? Kipa apiaerekata Teoso nireẽkiti akamini? —itxa.

³⁷ Ininiã Xesosi apakapapiretari:

—“Pitiretariko Apiananiri piTeosone, ikinipoko pinireẽkitiã, ikinipõkixinireẽ, ikinipoko pixinikakitiã pakini.” ³⁸ Ikara atoko inakari Teoso merepitipanika paniãtaua akamini. Ia ipaniãtakiti akamini apiari itxaua. ³⁹ Iuaikana Teoso paniãtaua. Ia ipaniãtakiti apaka apiari. Merepanika ipaniãtakiti akamini atoko itxa. “Piteka pitiretiniãua atokotxikana, pitiretariko āti.” ⁴⁰ Iteene atiretiniãri Teoso, iteene atiretiniãri āti, ininiã akamapitikari apanakini Teoso paniãtakiti, Moisesinimoni isãpiretakiti. Iteene atiretiniãri Teoso, iteene atiretiniãri āti, ininiã akamapitikari Teoso sākire sãpiretakani paniãtakiti apaka —Xesosi txari iua.

*Teoso Mereẽkiti Tavii Apika Mekaniri
(Marko 12.35-37; Arókasi 20.41-44)*

⁴¹ Pariseoakori apotiitapanikaua inakasaaki, Xesosi pimaãna ninoa:

⁴² —Teoso mereẽkiti pisãpiretano. Kiripa apika mekaniripa iua? —itxana ninoa.

Ninoa apakapapireta:

—Ari, Taviini apika mekanirira —itxana.

⁴³ Ininiã Xesosi:

—Ikara atoko ininiã, kinirepa Erekari Matamatakoti kamasãkiretari Tavii: “Teoso mereẽkiti niaũte itxaua,” ina sākiretini? ⁴⁴ Kotxi Tavii txari:

Apiananiri misãkiretari niaũte: “Nota kikomoni piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niaũte,

itxa Taviini. ⁴⁵ Ininiã Tavii akiritari Teoso mereẽkiti “niaũte.” Ikara atoko ininiã, kiãtokopa itxa Teoso mereẽkiti Tavii apika mekaniri ininiãua? —Xesosi txari pariseoakori.

⁴⁶ Kona imarotarina, ininiã kona kasãkirena ninoa. Ikara eereka kona kãkiti pimarauataika Xesosimoni, kotxi ip̄karina Xesosi imarore.

¹ Ininiã Xesosi misäkiretana imoianariakori, itomaneri kãkiti iuaã auakani apaka. ² Ia atoko isãpiretana:

—Kaiõkatsoparerini, pariseoakori pakini, Moisesini sãkire oerekakani itxauana. ³ Ininiãra ikinika kaiõkatsoparerini, pariseoakori pakini paniãtakiti hikamako, kotxi ninoo sãpiretari Moisesini sãkire Teoso oerekakiti. Ikara erekari. Txamari kona ninoo kamari Moisesini paniãtakiti. Ikara !erekari. Ininiã ninoo kamakiti atoko !hikamape. Kotxi isãkirena erekari, txamari ikamakitina !erekari. ⁴ Ninoo kaiõkatsoparerini, pariseoakori pakini, kiki ia atoko inakari ninoo. Ia kiki takari iminani imoianariakori porikiã, txamari iuaka na xatiki nirekari iporikitiniri. Kaiõkatsoparerini, pariseoakori pakini, ikara kiki atoko itxana. Ninoo paniãtakiti iua iminani atoko itxa.

⁵ —Pariseoakori kamari erekari apanakini atamatini ikapaninoka, eureka ininina apanakini uãkatini ikapaninoka. Himarotari kãkiti ieretakari Teoso sãkire iõkatsopatakori aãkoana xapitikiri ãki. Eereka iaxirikarina iteãtaãna, iuakonotaãna pakini. Ninoo kaiõkatsoparerini, pariseoakori pakini takari aãkoana mitari apanakini atamatini ikapaninoka. Paftanori itsarãpe imãkana apanakini atamatini ikapani. ⁶ Kiinirisaaki ninoo nirekari kãkiti potxitiniãtaã iitopãkinina. Aiko ãki Xoteoakori apotiiniãtaãua inirekarina kãkiti potxitiniãtaã iitopãkinina. ⁷ Apokaerekatarina okapiretikona ipaxitikona kienatxi vëtxitikoãtaã. Apokaerekatarina kãkiti akiritinina: “Koerekareri” inikona.

⁸ —Txamari, ãtinani hite oerekari txaua, Teoso mereëkitira iua. Koerekareri hiniko ! hãuritapeko, kotxi himakinikara hïtaritakakaua. ⁹ Kona ikorapokoriti auakari “niri,” !hïtxape, kotxi ãtinani aïri auari iaxiti auakari. ¹⁰ Apaka apanakini akiritinini “aãuïte,” !hãuritapeko, kotxi ãtinani hãuïte. Teoso mereëkiti itxaua. ¹¹ Auïtetxi pininiua pinirekiniã, apanakini nitiri atoko pitxauako. ¹² Iua “Auïtetxi nitxaua,” inakari, Teoso txïkitakariko nitiritxi itxauako. Iua “Nitiritxi nitxaua,” inakari, Teoso txïkitakariko auïtetxi itxauako.

Xoteo Auïteakori Misiritaãkako
(Marko 12.40; Arókasi 11.37-44, 52; 20.47)

¹³ Iuaãkana Xesosi sãkirauata:

—Erepaniko hite kaiõkatsoparerinini, pariseoakorii pakini. Hīsãkire atxiiti erekari, txamari kona hikamari hīsãkire iaõka. Kinirão iroãkari apisapanika aapokotxi tore totakani atoko hitxa, kotxi hite iotokakari kãkiti Teoso sãkire atão auikini, ininiãkara hite iotokakari kãkiti iroini Teoso auïtetxi ininiãtaãua. Hite kona iroã. Apaka kona hite auiritana kinirão iroãkani. ¹⁴ Erepaniko hite kaiõkatsoparerinini, pariseoakorii pakini. Hīsãkire atxiiti erekari, txamari kona hikamari hīsãkire iaõka. Hite mixirikari tikinitakoro aapoko. Himisirienetana. Teosokata hīsãkirauatakasaaki, itori sãkiretxi hikama apanakini, “paimatirena” inini ikapaninokara. Ikara xika himisiritiko apiatako.

¹⁵ —Erepaniko hite kaiõkatsoparerinini, pariseoakorii pakini. Hīsãkire atxiiti erekari, txamari kona hikamari hīsãkire iaõka. Hite sari õtakoxiti. Hïpiriãtari kãuaãri. Imiriõ õtakoxiti hĩa, hīsãkire auikakari hininini ikapani. ãtinoka hīsãkire auikakari auniã, iuaritika hĩa iuaxiti. Eereka hõerekari iua ikinipoko himarotakiti. Eereka hite maerekani xika, iua kiki maerekani apiatako. Isapitika hitekata maerekani misiritikoãtaã.

¹⁶ —Erepaniko hite. Mõsiãreni atoko hitxa, iuaritika hinirekari hõerekiniiri Teoso kimapore apanakinimoni. !Hïposotari. Hite oerekari apanakini ia hīsãkire: “‘Ia nikamapitikako’ pinakasaaki, Teoso misãkiretiko aikoti pakiriũãkatakasaaki, pimamakaniãri, kona pimisiritaãkako,” itxa hite sãkire. Iuaãkana hite sãkire: “‘Nikamapitikariko,’ pinakasaaki, Teoso misãkiretiko aikoti ãki auakoro oro pakiriũãkatakasaaki, pikamapitikariko pikamaenetakiti. Ikara pimamakaniãri, pimisiritaãkako,” itxa hite sãkire.

¹⁷ —Hite mõsiãreni atoko. Kona kũkitei hite. !kiripa apiari? Orokani? Teoso misãkiretiko aikotikani? Teoso misãkiretiko aikoti apiari, kotxi oa oro aiko ãki aua, ininiã aiko txïkitakaroro oro Teoso nakito oniniãua.

¹⁸ —Hite oerekari apanakini ia hīsãkire apaka: “‘Nikamapitikariko’ pinakasaaki, Teosomoni sikakori takikoãtaã pakiriũãkatakasaaki, pikamaenetakiti pimamakaniãri, kona pimisiritaãkako. ‘Nikamapitikako,’ pinakasaaki, Teosomoni sikakori takikoãtaã nopini takakori pakiriũãkatakasaaki, pikamapitikariko pikamaenetakiti. Pimamakaniãri, pimisiritaãkako,” itxa hite sãkire.

¹⁹ Hite mõsiãreni atoko hitxa. !Kũkitei hite. !kiripa apiata? Sikakorikani? Sikakori takikoãtaãkani? Sikakori takikoãtaã apiata, kotxi sikakori inopini takikosaaki, iuaasaakipeka Teoso nakitipeka. Ininiã sikakori takikoãtaã txïkitakari sikakori Teoso nakiti ininiãua. ²⁰ Ininiã pisãpiretakasaakiri Teoso pikamaenetakiti, Teoso sikakori takikoãtaã pakiriũãkatiniã, iuatxikana iua nopini auakari pakiriũãkata. ²¹ Pakiriũãkatakasaakiri Teoso misãkiretiko aikoti, iua atokotxikana pakiriũãkatari Teoso, kotxi iua aiko ãki aua.

²² Pakiriuākatakasaakiri Teoso tixine, ininiā iua atokotxikana pakiriuākatari Teoso topākini. Iua atokotxikana pakiriuākatari Teoso, kotxi Teoso topākini nopini iitopāka Teoso.

²³ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Ipixini hinakiti hīsikari Teosomoni. Tesi hītii auiniāi, hīsikari āti Teosomoni. Tesi txineiro ota auiniāi, hīsikari āto Teosomoni, hītixaāpota. Ikara hīkamakiti erekari. Nipokori koke, oteraā, erva tosi, komīnio, axapitikiiri inakari, iuaritika ipixini hīsika Teosomoni. Ikara Teoso paniātakiti hīkamapitika. Txamari, Teoso paniātakiti apiari !hīkama, kotxi !hīkamari atāo apanakinimoni. !Hiamonīkana apanakini. Hīkamaenetakiti !hīkama. Ikinika Teoso paniātakiti hīkamako. ²⁴ Mōsiāreni atoko hītixaua, iuaritika hinirekari hōerekiniiri Teoso kimapore apanakinimoni. !Hīposotari. Himakatxakaro xikiri iāriā āki komokakaro, txamari hīxirapoataro kamero, kotxi Teoso paniātakiti poiāori hīkama, txamari ipaniātakiti apiari kona hīkama.

²⁵ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hōeretari hīto maparakiri, txamari hākixinireē !erekari. Papotxinanii, patirenanii, paitirii. ²⁶ Hīte pariseoakorii, mōsiāreni atoko hītixa. Merepitipanika himakatxakariko maerekati hākixinire auakari, ininiā hīto erekatxikana. Hākixinire ereka ininiā, hīkamakiti ereka apaka.

²⁷ —Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Kai auīte iriko, ipīkari takikoōtaā atoko hītixa. Mapara txīta kasarori minapaākapeka, ininiā mapara peerekari. Txamari, iriko āki ipinakari api, arakapoakatakari aua. ²⁸ Iua atokokanera hītixa. Kākiti uākatai hīte atāo inakarinnoka kamakani hininiua, kotxi hinopini ererini hītixaua. Txamari, hākixinire !ereri, kotxi maerekatinnoka hīkama. Hīsākire atxiīti erekari, txamari kona hīkamari hīsākire iaōka —itxa Xesosi sākire.

Xoteo Auīteakori Misiritiko
(Arókasi 11.47-51)

²⁹ Iuaīkana Xesosi sākiraauata:

—Erepaniko hīte kaiōkatsoparerinii, pariseoakorii pakini. Hīsākire atxiīti erekari, txamari kona hīkamari hīsākire iaōka. Hīkamari akauari Teoso sākire sāpiretakanini ikapani. Peereri akauari hīkama. Hīkamari akauari ipīkani atāo inakarinnoka kamakani ikapani. Txīta himinapa akauariā. Aūi hītaka iuaātaā. ³⁰ Hītixari: “Kitxakapirīka aātokiriakorini okana Teoso sākire sāpiretakani. Atepitika auaākamako iusaaki, konimako ate okana ninoa,” hītixa. ³¹ Teoso sākire sāpiretakanini okakani mekaniriakorini hītixaua hīte. Kotxi hītekara txari: “Aātokiriakorini okana Teoso sākire sāpiretakani.” Hīte maerekati kamakani ninoa atokokana hītixa. ³² Hātokiriakorini mipotorikari Teoso sākire sāpiretakani okinina. Hīte xipokapanikanako ātikaka kaikotakani Teoso sākire sāpiretakani.

³³ —Imini atoko hītixa. Imini anaakori atoko hītixa hīte. Himisiritaākapitikako maerekani misiritikoōtaā. Himitekini !auari. ³⁴ Ininiā nisāpiretai hīte. Niokanatanipakari hītemoni Teoso sākire sāpiretakani, Teoso iokanapirena imarotakani, koekarerini pakini niokanata hītemoni. Txamari ātikaka hōka, aamina ipiriāmitakari nopini hītokakitana apanakini. Apanakinipekana hīxirokitata aiko Xoteo apotiitiniātaāua. Eereka hāsikatikinitana ninoa āti sitatxitimoni sikani, eereka āti sitatxitimoni, eereka āti sitatxitimoni hītixaāponāta ninoa hāsikatikinitini. ³⁵ Ininiā hīte misiritaākako ikinika atāo inakari kamakani okiko xika. Kitxakapirīka Apeo inakorini okapeēka. Atāo inakari kamakari iua. Ikinimane okapekoni tikinimoni okapeēka Sakariani, Parakia ākiri. Iua Sakariani okapeēka sikakori takikoōtaā takote Teoso misākiretiko aikoti āki. ³⁶ Atāopitikara nisāpiretai hīte. Kākiti uatxa auakani apakapariko misirikaretxi ninoa ekekarini okapekoni xika —itxa Xesosi sākire.

Xerosareē Xesosi Tiretini
(Arókasi 13.31-35)

³⁷ Iuaīkana Xesosi sākiraauata:

—Xerosareē auakanii, Xerosareē auakanii, hīte okapekana Teoso sākire sāpiretakani. Kai soroā hīkiporonakana ninoa hītemoni Teoso iokanatakini. Kaiōkatani ninirekamari ninīkatinii, patari oimiakori omīkita patapi otakini atokokana nitxanakamaiko hīte. Txamari !hāuiritano nota nīkatinii. ³⁸ Ikara atoko inakari xika haāpoko asikaākako. Teoso !auaika hītekata. ³⁹ Nisāpiretai. Ia ōti hātamatano, eereka !hātamataikano. “Teoso takari erekari uaimoni ikarimoni, Apiananiri posotiireē ikarimoni,” hinakasaaki, iusaakinanirako hātamatano nota —itxa Xesosi.

¹ Teoso misäkiretiko aikoti Xesosi potorikasaakipeka, imoianariakori apoka iuamoni.

—Patamata. Peerepokori aikoniri —itxarina.

² Ininiä Xesosi:

—Ari, hâmatatari ere aikoniri? Atâopitkara nisâpiretai hîte. Koniko kai kaikotapani âti kai nopini. Imakinika kai irikaâkako —itxana.

Misirikaretxi Apokaenetini

(Marko 13.3-13; Arókasi 21.7-19)

³ Iposo atoko Xesosi sari oxiratarimoni, Oriva inakorimoni. Iuaâ topâka itxa. Imoianari-akori sari iuamoni. Ninoanoka auari iuaâtaâ.

—Pisâpiretaua kirisaakiparako aiko Teoso misäkiretiko irikataâkako. Natokopa ininiâparako ate imarotatari pite kaiama kanapirikape pinini? Natokopa ininiâparako aimarotatari itixi xipokini ôti kaiamapeka inini ôti? —itxarina Xesosi.

⁴ Ininiä Xesosi:

—Erepaniko. ! Hâuiritapena apanakini misirienetinii. ⁵ Kotxi apokako kâkiti itomaneri “Teoso mereëkiti nitxaua nota,” inakani. Ninoa misirienetana itomaneri. ⁶ Hîkenakopiretariko neenamatzî ene uaimoni, ôtakoxiti apaka. Iuaritika ! hîpîkaruatape. Kotxi auapitikako neenamatzî. Txamari itixi xipokini ôti ! apokapanika. ⁷ Ikara inakari apisapanika, âti uâka neenamauatoko âti uâkakata. Apanakini auite inirimaneakata neenamauatoko apanakini auitekata inirimane pakinikata. Âtiâtaâ kâkiti inkoriârîko natxi. Âtiâtaâ amianari inokanako kâkiti. Âtiâtaâ itixi iakeêkatakata. ⁸ Ikara atoko itxako misirikaretxi potorikini. Sito amarini tsii atoko itxako iuaasaaki.

⁹ —Iuaasaaki hîte maïkaâkako, himisiritiko îkapani. Iposo atoko oka hinaâkako. Nisäkire hâuikini xika ikinimane omanataiko hîte. ¹⁰ Iuaasaaki itomaneri ! auikaikari Teoso sâkire. Itakanapapekarina Teoso kimapore. Imîkapiritakakanako. Omanatakakanako. ¹¹ Apokako kâkiti “Nota Teoso sâkire sâpiretakari nitxaua,” inakari. Txamari kona atâo. Ninoa misirienetanako itomaneri kâkiti. ¹² Kâkiti tiretiko poiâotako, kotxi maerekanitxi iarikako ikini itixitimoni. ¹³ Iuaasaaki kâkiti mûteenekiniârî misirikaretxi, imatakanapanakiârî Teoso sâkire, auapikako âtipirika Teosokata. ¹⁴ Teoso iokanapirena erekari, Teoso auîtetxi ininiâua, sâpiretaâkako ikini itixiti auakani, ikini kâkiti imarotiniârî îkapani. Ikara inakari auâka atokoikarako itixi xipokini ôti apokako.

Iteene Maerekanitxi Apokini

(Marko 13.14-23; Arókasi 21.20-24)

¹⁵ Xesosi sâpirenauatapanika:

—Hîte itikariko iteene maerekatî kamakari timini aiko Teoso misäkiretiko âki. Kîtxakapirîka Tanieo inakori, Teoso sâkire sâpiretakari, sâpiretapekari ikara ene. Hîte ia atatsopatakani, himarotariko ikara. ¹⁶ Ikara atoko inakari hîtikasaaki hîte İkorapokoritî Xotéia auakani, oxiratarimoni himitekako. ¹⁷ Ikara ôti apokasaaki haâpoko nopini hâuiniâ, katima hîtxako himitekini. !Apakata haâpoko âki hîti himakatzakini. ¹⁸ Kikio hîparîkuanâtakasaaki, haâpokomoni ! hîkanapiripe himâka hâpini îkapani. ¹⁹ Ikara ôti apokasaaki, kamixironi, kaxitakareroni pakini iteene atatsiitariko. Pasâpaniri ninoa mitekini. ²⁰ Hamanaârîko Teoso katxîkareri mauakani himitekini ôtisaaki. Hamanaârîko tomatiko ôtisaaki ikara inakari mauakani îkapani. ²¹ Kotxi ikara mitekatzî ôtisaaki kâkiti iteene atatsiitariko imisiritiko. Ikara ôti apisa kâkiti !imarotari iteene imisiritiko. Itixi kamikosaakipanika ! auari ikara atoko inakari misirikaretxi. Ikara mitekatzî ôti napaâka atoko kâkiti !imarotaikari iteene imisiritiko. Ikara ôti apiatoko kâkiti misiritiko. ²² Teoso poiâotakari iua ôti ikinipoko kâkiti mapinakani îkapani. Ito ôti ininiâ, kâkiti !auaika. Ipoiâotakari iua ôti, kotxi itiretana kâkiti imereêkini.

²³ —Iuaasaakiko âti: “Ia kiki Teoso mereëkiti aiâtapakiti inakari,” inakasaakii, !hâuikapiri. Âtipekana: “İkira Teoso mereëkiti inakari,” inakasaakii, !hâuikapiri. ²⁴ Kotxi apokako kâkiti paxirari kamakari, “Teoso mereëkiti hiâtapakitino nota,” inakari, “Teoso sâkire sâpiretakari nitxaua nota,” inakari. Ninoa kamariko posotîiretxi kâkiti tsorikitaâtini îkapani. İnirekarina kâkiti Teoso mereëkini imisirienetinina. ²⁵ Hîkenakota. Nôtâkikai hîte ikara inakari apokini ôti apisa.

²⁶ —Hîte sâpiretikosaaki: “Hîkenakota. Teoso mereëkiti aiâtapakiti âparaâ makîpaniâtaâpekarari,” hinikosaaki, !hîsipe iuaâ. Hîsâpiretikosaaki: “İrîko âkirari iua,” hinikosaaki, kona hâuikapiri. ²⁷ Kotxi nota hîtari iaxitikiri nikanapiriâkasaaki, İkara atokoni nitxa. Mêkokari atoko itxa nota hîtari iaxitikiri nikanapiriâkasaaki, kotxi mêkokari atokatxi pokîkinimoni imêkoka, isapitipo atokatxi ereêkokinimoni, ininiâ ikinimane itikariko. Iua atokokana nota hîtari iaxitikiri napokini. İkinimane itikanoko nota. ²⁸ Aâtamatakasaakiri

maiiori apotiitiniua, aimarotari ipikari iuaātaā auini. Iua atokokana nota kanapiriākasaaki, ikinimane imarotari napokini.

Kākiti Itari Iaxitikiri Kanapiriini
(Marko 13.24-27; Arókasi 21.25-28)

²⁹ Xesosi sāpirenauatapanika:

—Apikomoni nisāpiretai nikanapiriini pirena. Iua inikoriākori napaka atoko, atokatxi piākako. Kasiri kona ponikaikako. Iōriki iaxitikero irikako. Iaxiti iōriki auiniātaā auakari iakeēkatakako. ³⁰ Iuasaaki Teoso takaōtxikare auako iaxiti, nota hītari iaxitikiri kaiamapeka uai nikanapiriini himarotini ikapani. Ikara atoko inakasaaki, ikini kākititi itixi auakani txiapatakako, kotxi ninoa atapanoko nota kākiti itari iaxitikiri katxiāri āki nikatxakaāpotini. Nitapararitika napaōkatakako, kotxi ikinimane auite nitxauako iuasaaki. Niotximerekata nikatxakaāpota. ³¹ Okenakotaākkako koitxi mitaro, trōpeta inakoro. Iuasaakipekako niokanatanana ninitiriakori itixi iaōka kākiti Teoso mereēkini apotiitakani ikapani.

Piko Mina Pirena
(Marko 13.28-31; Arókasi 21.29-33)

³² Xesosi sāpirenauatapanika:

—Nisāpiretai sāpirenaxi atāo inakari oerekiko, piko mina pirena, nikanapiriini apiata himarotini ikapani. Pooioporipeka onakasaaki, otomorekasaaki, “Kamoī apokanapanoka,” hītxa. ³³ Iua atokokana, ikara misirikaretxi mixikanani nisāpiretakiti hītikasaaki, himarotapekariko nota kaiama kanapirikapeka ninini. ³⁴ Ia nisākire atāo. Itixi auakani ! ixipoka ikinipoko nisāpiretakiti mapokakani apisa. ³⁵ Iaxiti xipokapitikako. Ikoraxiti apaka xipokapitikako. Iuaritika nota sākire lixipoka.

Kākiti !Imarotari Xesosi Apokini Manapi
(Marko 13.32-37; Arókasi 17.20-37)

³⁶ Xesosi sāpirenauatapanika:

—Kākiti !imarotari ikara ōti, nota hītari iaxitikiri nikanapiriini ōti. Teoso nitiriakori iaxitikini apaka ! imarotari ikara ōti. Nirinanira imarotari. ³⁷ Nota hītari iaxitikiri nikanapiriākasaaki, kixakapiriāka Noee auakasaaki atoko itxako. ³⁸ Xirataātxi apisa ikinimane nipokota, iāta itxa. Kiki, sito itaniriuata. Ikara atokokanera itxa Noee maporo āki iereētini ōti. ³⁹ Ikara apisa !imarotarina ipininina tūkane. Mokatanitika xirataātxi apoka, ikinikana xipoka itxana. Nota hītari iaxitikiri nikanapiriākasaaki, iua atokokanerako itxa, ininiā iposope hīttxako.

⁴⁰ —Iuasaaki nikanapiriini ōtisaaki, ipi kiki parīkauanāta kiki. Teoso nitiri iaxitikiri anikariko āti, āti kaikota itxako. ⁴¹ Ipi sito atarokiri kamakani, āto anikaākkako, āto takanapaākkako. ⁴² Ininiā iposope hīttxako, kotxi kona himarotari hīauite kanapiriini ōti. ⁴³ Hixinikariko. Kaapokori imarotaākkamariko kiitiriri apokini ōti, !imakamako. !Auiritamariko kiitiriri anikiniri itii. ⁴⁴ Kiitiriri apoka kākiti miātapakinitipanika. Iua atokokanerako nota apokako himimarotakinitipanikarako. Ininiā iposope hīttxako nota hītari iaxitikiri hiātapini —itxa Xesosi sākire.

Nitiritxi Erekarī, Nitiritxi Maerekati Pakini
(Arókasi 12.41-48)

⁴⁵ —Ininiā Teoso nitiriakori erekarini hīttxauako. Nisāpiretai nitiritxi kimaroreri inakari, kotxi iua kīpitari ipatrāote sākire. Iuakara ipatrāote paniāta, apanakini initiriakori inīkatini ikapani. Isikakienatanana ipatrāote nitiriakori, nipokori sikiko manapi. ⁴⁶ Iua initiri poxokoniua ipatrāote paniātakiti iaōka ikaminiā, ipatrāote apokasaaki iposope itxa. ⁴⁷ Atāopitikara nitxai hīte. Iua patrāo paniātatariko iua initiri ikinika inakiti inīkatini ikapani. ⁴⁸ Nitiritxi maerekatipekana xinikari: “!Katimari ikanapiriā nipatrāote,” itxa. ⁴⁹ Ininiā apanakini nitiritxi ixiroka. Inipokota, iāta poātakanikata. ⁵⁰ Ininiā ipatrāote kanapiriāko imiātapakinitipanika. Ikanapiriāko initiri mimarotakinitipanika. ⁵¹ Ininiā ipatrāote xirokitatariko aāpitsāā. Iposo atoko imisiritaākkako maerekaniakata, “Erekapitikaaua ate,” inakanikata. Iuaā kākiti txiapata, akatsatsiriūtaua ātipirika. Ininiā ikara nitiritxi maerekati atoko kona hīttxape —itxa Xesosi sākire.

25

Tesi Ātokoroakoro Pirena

¹ Xesosi sāpirenauatapanika:

—Ia nisāpirena oerekai Teoso auītetxi ininiāua. Tesi ātokoroakoro kosekari tirikapi. Isana kimaporiā. Iātaparina ipatrāotena. Iua inapanikako kiinirimoni itanorouatini ikapani. ² Sīko ātokoro kiikiterini, sīko miikiteni. ³ Miikiteni anikari tirikapi koana, txamari !anikarina

tirikapiã. ⁴ Kiiķiterini anikari tirikapi koana. Apaka anikarina tirikapiã. ⁵ Ipatrãotena ! katimari apokini. Ininiã itaponoka ininiãna, imakanãtana.

⁶—Apaniķanõka ikenakotarina: “Apokanapanoka. Hišapoka. Hãpiãkatari.”

⁷—Ininiã ãtokoroakoro õkitikaua, tirikapi iopotokaka, sa itxana. ⁸ Ninoa miķiteni amanaãri kiķiterini tirikapiãte, kotxi miķiteni tirikapite oakaarita.

⁹—Kiķiterini apakapapiretana: “Kona. Tirikapiã ate nakiti ! apakata hite iķapani. Ate iķapaninokara apakata. Hiša tirikapiã vëxtitakarimoni. Hiamotariko.”

¹⁰—Ininiã ninoa miķiteni sari tirikapiã iamotinina. Ninoa sikasaaki, ipatrãotena apoka. ãtokoroakoro iposope inakani iroã iuakata aapokotxi ãki itanorouatakari kiiniritiã. Itore totaãka.

¹¹—Eereka ãtokoroakoro tirikapiã amotakani kanapiriã. Ninoa akirita: “Patrão, patrão, pimatakakinaua itore airoini iķapani,” itxana.

¹²—Ipatrãotena apakapapireta: “Hišipeka. Atão nisãpiretai. !Nimarotai hite.”

¹³ Xesosi sãkirauata:

—Erepaniko. Iposope hitxako, kotxi !himarotari nota hĩtari iaxitikiiri kanapiriini õti. ! Himarotari amonikitaauako napokini —itxa Xesosi.

Ipi ãti Pakini Nitiritxiakori

(Arõkasi 19.11-27)

¹⁴ Xesosi sãpirenauatapanika:

—Nikanapiriini ia atoko itxapaniko. Kiki aiamatapeka õtakoxiti ãti itixitimoni isini iķapani. Ininiã akiritari initiriakori. “Hinikatariko ikini nitii,” itxana. ¹⁵ Isikari initiri apia imaroretakari txineiro ota siķo mio. ãti initiri isika txineiro ota ipi mio. ãti initiri poiãoka imarotakari ãtika mio txineiro ota isikari iua. Eereka sipe itxa.

¹⁶—Siķo mio apakapakari amotari tiitxi, eereka vëxtita itxari. Ikara atoko ininiã apakaparo txineiro ota tesi mio. ¹⁷ Iua ipi ãti mio apakapakari iua atokokana itxa. Iua apakaparo ipi ipi pakini mio txineiro ota. ¹⁸ Iua ãtika mio txineiro ota apakapakari, ikisakari kipatxi, taka itxaro txineiro iua aariko ãki. Ikataro ipatrãote txineirote.

¹⁹—Eereka okananixiti inaka atoko ipatrãotena kanapiriã. Akiritana: “Kiãtokopa hitxataro nitxineirote?” itxana. ²⁰ Iua siķo mio apakapakari minari tesi mio. Iua sãpiretari ipatrãote: “Patrão, pite sikano siķo mio txineiro ota. Patamata. Napakapari apikomoni siķo mio txineiro ota pite iķapani,” itxa.

²¹—Ipatrãote apakapapiretari: “Erekapitikai pite. Erekeri nitiritxi pitxaua. Erekeri pinĩkatiniro nitxineirote. Erekapitikari pinĩkatiniroi poiãoka nisikini. Ininiã nauiritaitoko itomaneri pinĩkatini. Ininiã pipoxokoniuatoko notakata,” itxa.

²²—Iua ipi mio ota apakapakari apoka. Iminaro ipi ipi pakini mio. Isãpiretari ipatrãote: “Patrão, pite sikano ipi mio txineiro ota. Patamata. Apikomoni nota apakaparo ipi mio txineiro ota pite iķapani,” itxa.

²³—“Erekapitikai pite. Erekeri nitiritxi pitxaua. Erekapitikari nitxineirote pinĩkatini. Erekeri poiãoka pinĩkatini. Ininiã itomane nitakanapako pinĩkatini iķapani. Ininiã pipoxokoniuatoko notakata,” itxa.

²⁴—Eereka iua ãtika mio txineiro ota apakapakari apoka. Iua sãpiretari ipatrãote: “Patrão, nimarotai pite. Pataparaxinirei pite. Pite amotari pikiena, kotxi kona pite takarauata. Pite apari pikiena pimaparĩkauatakaniãtã. ²⁵ Nipĩkarauatiniã, nikipataro pitxineirote kipatxi ãki. Patamata. Oia pitxineirote,” itxa.

²⁶—“Nitiritxi maereketi iareri pitxaua pite. Pimarotari niamotiniri nikiena, kotxi ! nitakarauata. Pimarotari nota apari nikiena nimaparĩkauatakaniãtã. ²⁷ Ikara atoko ininiã, pimanirekakaniãri piparĩkauatini, kinirepa kona pisikataro nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa.

²⁸ Ininiã ãti ipaniãta:

—“Pimakatzakariko iua mio ãtika mio auakiti. Tesi mio txineiro ota auakitimoni pisika. ²⁹ Kotxi apikomoni isiãkako iua itomaneri auakiti, ininiã apiata auinariko iua. Iua poiãoka auakiti, inakito mixiriãkãkako. ³⁰ Ia ninitiri iareri hõka mapara piãkatximoni. Iuaã kãkiti txiapata. Akerakitatsiriãta itsii xika.”

Ikinimane Apotiãtãkako Xesosi Apisatoõ

³¹ Apikomoni Xesosi sãpirenauata:

—Nota hĩtari iaxitikiiri nikanapiriãkasaaki auĩtetxi ninakasaakiaua, ikinika Teoso nitiriakorikata, niitopãkako auĩtetxi itopanere nopini. Peerekari iuasaaki. Ikinimane paxitanoko nota. ³² Ikinĩ uãkati kãkiti apotiãtãkako nota apisatoõ. Iuasaaki nikaarikikitatanako ninoa. Soti auĩte, kapra pakini piratakari ipiraakori koketakaniaua ikaiarikitatini atokokanera, nota hĩtari iaxitikiiri kaiarikitatana ikinimane kãkiti. ³³ Pirãtxi piratakari takiniri soti auĩte

ikikomoni, itakiniri kapra isanaremoni, iua atokokanera nota hītari iaxitiki takari kākiti erekarini nikikomoni. Kākiti maerekani nitaka nisanaremoni.

³⁴—Eereka nota kākiti auīte txanako ninoa kākiti erekarini nikikomoni auakani: “Niri sikari erekari hītemoni. Hina. Hīroā auītetxi nininiātaāua. Ia auītetxi nininiātaāua maiamatapeēkaika hīte ikapani itixi kamikosaakipeka. ³⁵ Mītxipeka ninatxitakasaaki, hīte sikakienatapekano nota. Niposonatakasaaki, āparaā hīsikapekano. Āti itixiti nīkasaaki, hīte apakapapekano nota. ³⁶ Nimamākanisaaki, mākatxi hīsikapekano. Namianatakasaaki, hinīkatapekano. Kateia āki nauakasaaki, himotikaētapekano. Ininiā hīroā,” nota kākiti auīte txanako kākiti erekarini.

³⁷—Ininiā kākiti atāo inakari kamakani apakapapiretariko: “Apiananiri, kirisaakipa pinatxitakasaaki, asikakienatai? Kirisaakipa piposonatakasaaki, āparaā asikai? ³⁸ Kirisaakipa āti itixiti pīkasaaki, aāpakapai? Kirisaakipa pimamākanisaaki, mākatxi asikai? ³⁹ Kirisaakipa pamianatakasaaki, anīkatai? Kirisaakipa kateia āki pauakasaaki, amotikaētai?” itxanonako nota.

⁴⁰—Ininiā nota kākiti auīte apakapapiretanako: “Atāopitikara nitxai hīte. Kākiti poiāori, nisākire auīākari, hītiretiniā, iusaaki nota hītiretini atokokana hītiretari,” nitxanako ninoa.

⁴¹—Iusaaki nitxanako nisanaremoni auakani: “Hīsipeka. Teoso misiritako hīte, kotxi ! hīpitaru iua sākire. Hīsipeka arikatxi maxipokatimoni. Teoso kamari iua arikatxi, Satanasi misiritikoātaā tīkane, Satanasi nitriakori misiritikoātaā tīkane. Hīsipeka iuamoni.

⁴² Kotxi ninatxitakasaaki nipokori ! hīsikano. Niposonatakasaaki, āparaā ! hīsikano. ⁴³ Āti itixiti nīkasaaki, !hinirekano haāpoko napokini. Nimamākanisaaki, kona mākatxi ! hīsikano. Namianatakasaaki, !hinīkatano. Kateia āki nauakasaaki, !himotikaētano,” itxanako kākiti maerekani.

⁴⁴—Ininiā ninoa apakapapiretariko: “Apiananiri, pinatxitakasaaki, piposonatakasaaki, pamianatakasaaki, pimamākanisaaki, kateia āki pauakasaaki, āti itixiti pīkasaaki, kirisaakipa ate !apakapai?” maerekani txanoko nota.

⁴⁵—Ininiā nota kākiti auīte apakapapiretanako ninoa: “Atāopitikara nitxai hīte. Himanirekakanisaakiri hītiretiniri kākiti poiāori nisākire auīākari, iusaaki ! hinirekari nota hītiretini,” nitxanako ninoa.

⁴⁶—Ininiā Teoso iokanatanako ninoa maerekani kamakani misiritikoātaā. Iuaātaā ninoa misiritaākapikako. Imisiritikona kona xipokaikako. Kākiti atāo inakarinoka kamakani auapininiika imaxipopekaniika Teosokata —itxa Xesosi.

26

Xesosi Okaenetiko Pirena

(Marko 14.1-2; Arókasi 22.1-2; Xoāo 11.45-57)

¹ Ikara inakari isāpiretaka atoko, Xesosi misākiretana imoianariakori:

²—Hīte imarotari ipi ōti napaka atoko aua Pāska inakori kiiniriti. Iua kiiniriti auakasaaki nota hītari iaxitiki nisikaākako nimokaiakariakorimoni. Aamina Īpiriāmitakari nopini nitakaākako. Iua atoko ipina nitxako —Xesosi txana imoianariakori.

³ Iusaaki sasetotxi auīteakori, kaiōkatsopareriakori, kiomātxiakori pakini apotiitaua. Sasetotxi auīte apiatakari Kaipasi inakori aapoko āki apotiitauana. ⁴ Imapapiretarina Xesosi imaīkinina ikapani. Inīrekarina Xesosi imaīkinina apanakini mimarotakinitika. Imisākiretakakana Xesosi okinina ikapani.

⁵—Kiinirisaaki !amaīkapaniri. Amaīkiniāri, apanakini kākiti naiatamaua ate —itxakakana.

Sito Kamariāro Mīkaro

(Marko 14.3-9; Xoāo 12.1-8)

⁶ Xesosi auanāta aapokotxi Petānia inakoriātaā. Isari Simāo inakori aapokomoni. Iua Simāo mītxi amianatakari, maere matati. Eereka erekapekari. ⁷ Simāo aapoko Xesosi auakasaaki, sito apoka iuamoni. Ominari kopitipaki kai kamakori, kai arapāstiro inakori. Kopitipaki xāpoka kamariāro. Oa pakaronero. Xesosi nipokonātakasaaki, oa sito kitakaro kamariāro ikiā.

⁸ Imoianariakori itikari Xesosi kiiā okitakiniro, ininiā ninoa naiataua:

—Kinirepa oa ioanataro kamariāro? ⁹ Kinirepa kona ovētxitataro? Ovētxitāākamaroko oāpakapamaroko txineiro ito, matxineirotenimonikari osikini ikapani —itxakakana.

¹⁰ Xesosi imarotari ninoa ikara atoko ininina.

—Kinirepa homanataro oia sito? Erekari okaminano notamoni. ¹¹ Auapikanako matxineiroteni hītekata. Kona nota auapani hītekata. ¹² Oia kitakaro kamariāro nikiiā, nota iposope ninini nikatiko apisa. ¹³ Atāo nisāpiretai hīte. Teoso iokanapirena erekari sāpiretikoātaā ikini itixiti, isāpiretaākako apaka oia sito kitakiniro kamariāro nikiiā, ininiā kākiti ikini itixiti auakani xinikapikaro oa —Xesosi txana ninoa.

Xotasi Sari Sasetotxi Auñteakorimoni
(*Marko 14.10-11; Arókasi 22.3-6*)

¹⁴ Eereka Xesosi moianari Xotasi Isikariotxi inakori sari sasetotxi auñteakorimoni.

¹⁵ —Xesosi nisikiniái hitemoni, kiripa hite sikano nota? —itxana ninoa.

Ininiá ninoa:

—Asikaiko tríta txineiro ota pirata kamakoro —itxana ninoa.

Ininiá iiktxitarina. ¹⁶ Eereka Xotasi iátpari Xesosi poiáonoka kákitikata auakasaaki, imíkapiritiniri íkapani.

Páskoa Kiiniriti Kamiko

(*Marko 14.12-21; Arókasi 22.7-13*)

¹⁷ Páo miátiákati níkiko kiiniriti potorikini óti, Xesosi moianariakori apoka iuamoni.

—Namonipa ate maiamatari Páskoa kiiniriti pite íkapani? —itxarina iua.

¹⁸ —Hisa sitatximoni. Nisápiretakiti iaóka hinitari kiki. Hápokasaakiri, hñtxariko iua: “Koerekareri txai, ipinini tñkane kaiamapeka. Ikamariko kiiniri Páskoa inakori pite aapoko imoianariakorikata,” hñtxako.

¹⁹ Ininiá imoianariakori kamari Xesosi paniátakiti iaóka. Imaimatari ikinika kiiniri íkapani.

²⁰ Íkanókapaka inakasaaki, Xesosi imoianariakorikata topáka inipokotinina íkapani.

²¹ Inipokotakasaakina, Xesosi txana:

—Atáo nisápiretai hite. Átika hite sauaki míkapiritanoko nota.

²² Ininiá imoianariakori tsoríkaáta. Iteene imatinianuatana. Áti pimaári:

—Apiananiri, atauako notakani?

Iua atokokana átipekana:

—Apiananiri, atauako notakani?

Ikara atoko itxanátana ikinikana, ipimaaápotinirina Xesosi. ²³ Ininiá Xesosi apakapapiretana:

—Ia tiitxiá notakata níkakari míkapiritanoko. ²⁴ Nota hñtari iaxitikiri okaákako. Teoso sákire iókatsopatakori sápiretapekari nipinini tñkane. Nota hñtari iaxitikiri míkapiritakari iteene misiritaákako. Erekamariko maponaniákatika inaákamako.

²⁵ Ininiá Xotasi kamíkapirireri misákiretari Xesosi:

—Koerekareri, atauako notakani?

Xesosi apakapapiretari:

—Ari, pitepitikara.

Xesosi Íto, Iaréka Pakini

(*Marko 14.22-26; Arókasi 22.14-23; 1 Koríto 11.23-25*)

²⁶ Inipokonátakasaakina, Xesosi kosekari komiri. Imisákiretari Teoso:

—Erekapitikari ia komiri pisikakiti atemoni —itxa.

Eereka imaxiníkitari, sika itxari imoianariakorimoni.

—Apakapa, nika hñtxako. Ia níto —itxana.

²⁷ Eereka ikosekari iákoanatxi iáriá auini. Imisákiretari Teoso:

—Erekapitikari ia iáriá pisikakiti atemoni —itxa.

Eereka sika itxari iákoanatxi ninoamoni:

—Hikinika hiátariko. ²⁸ Ia niaréka xiketakari makatzakariko kaiíopokori kákiti maerekani. Teoso sápiretapekari kákiti ikamaenetakiti amaneri kákiti íkapani. Ia niaréka oerekari kákiti, Teoso kamapekari ikamaenetakiti. ²⁹ Atáo nisápiretai. !Niátaikaroko ovapeé, Teoso auñtetxi ininiátaáua nimapokakanisaaki. Iuaá napokasaaki niátari. Amaneri iáriáti niátako hñtekata —itxana imoianariakori.

³⁰ Xipoka atoko ixikaretarina xikari Teoso íkapani. Eereka isana oxiratarimoni Oriva inakorimoni.

Xesosi Sápiretari Petro Kipatiniri Iua

(*Marko 14.27-31; Arókasi 22.31-34; Xoáo 13.36-38*)

³¹ Iuaá Xesosi misákiretana imoianariakori:

—Ia íkanókati hñkinika hñte takanapanoko nota, kotxi Teoso sákire iókatsopatakori sápiretapekari ikara atoko inakari. Itxari:

Nokariko soti auñte piratakari, ininiá ikinika ipiraakori iarikitatoko,

itxa Teoso sákire iókatsopatakori. ³² Ininiá eereka nota nipinaáka atoko, iuaíkana nókitaákaua atoko, nisako hñte apisa Kariréiamoni —itxa.

³³ Ininiá Petro apakapapiretari:

—Nota !nitakanapai pite. Atxiíti ikinimane takanapai, iuaritika kona nota takanapai —itxa.

³⁴ Ininiã Xesosi:

—Atão nisãpiretai. Ia ìkanõkati patari sãkirauatini apisapanikako, “! Nimarotari iua,” pitxanoko ipi ãti pakinikata.

³⁵ Ininiã Petro:

—Ikara atoko !nitxapanii pite. Nikipatinii apisapanikamako, nipinamako. Ìkinika Xesosi moianariakori ikara atoko itxana.

Xesosi Misãkiretiniri Teoso Xetsémani Inakoriãtaã

(Marko 14.32-42; Arókasi 22.39-46)

³⁶ Eereka Xesosi sari imoianariakorikata Xetsémani inakoriãtaã. Xesosi:

—Uai hïitopãka. Ìkiraã nisako Teoso nimisãkiretini ìkapani —itxa Xesosi.

³⁷ Anikari Petro, Sepeteo anaakori ipi pakini uakata isinina. Iuaã Xesosi tsorïkaãnãta, imaromaxiretari. ³⁸ Imisãkiretana ninoo:

—Nixinire imaromaxiretari. Iteene nimaxire, ininiã okaaritano. Uai hïkaikota. Araõkire hïtxako —itxana ninoo.

³⁹ Apikomoni isa, pamaka itxa, misãkireta itxari Teoso:

—Niri, atauako apakata pimakatxakiniri nimisiritiko akamoni ìkari? Kona ninirekari natatsiirauatini. Iuaritika pite nirekiniãri, ininiã nota apaka nirekari —itxari Teoso.

⁴⁰ Iuasaaki ikanapiriã ipi ãti imoianariakori auiniãtaã. Ninoo imakanãta:

—Petro, atauako kona hïte mïteenekari hïtikapokotini ãto oaranoka? ⁴¹ Erepaniko. Hinirekasaakiri maerekati hïkamini, !hïkamapiri. Araõkire hïtxako. Himisãkiretariko Teoso, ininiã !hïkamari maerekati. Kãkiti xinire atxiiti !inirekari maerekati ikamini. Txamari kãkiti ïto tapara poiãoka, ininiã ikamari maerekati. Ininiã erepaniko —Xesosi txari Petro.

⁴² Iuaïkana isa apikomoni Teoso imisãkiretini ìkapani:

—Niri, pinirekiniãri natatsiitiniri nimisiritiko akamoni ìkari, ininiã nikamapitkariko pinirekakiti —itxari Teoso.

⁴³ Iuaïkana ikanapiriã imoianariakorimoni. Imakanãtapanikana. Itaponoka itxana. Kona iposotarina ikoatinina. ⁴⁴ Iuaïkana Xesosi takanapana, iuaïkana ikanapiriã iuaãtaãkana. Iuaïkana misãkireta itxari Teoso. Mitxi atokokana itxa isãkire.

⁴⁵ Iuaïkana ikanapiriã imoianariakorimoni:

—Himakanãtapanika? Hïtomanãtapanika? Nisikiko manapi apopeka. Nota hïtari iaxitikiri nimïkapiritaãka maerekanimoni nisikiko, inireëkitina ikaminina ìkapani. ⁴⁶ Hõkitikaua. Masipeka. Hãtapa. Ìkiraã ina nota mïkapiritakari —itxana ninoo.

Xesosi Maïkiko Pirena

(Marko 14.43-50; Arókasi 22.47-53; Xoão 18.1-11)

⁴⁷ Xesosi sãkirauanãtapanika inakasaaki, Xotasi, Xesosi mitxi moianari, apoka. Iuakata ina itomaneri kãkiti, saasara mïkani, piriri mïkani pakini. Sasetotxi auïteakori, kiomãtxiakori pakini iokanatana ninoo. ⁴⁸ Iua Xotasi kamïkapirireri sãpiretapekana ninoo:

—Iuapitipankarako napitxokapaniko. Hïmaïkariko iua napitxokakiti.

⁴⁹ Xotasi apoka. Xesosimonipitipo isa.

—Ereëkai koerekareri.

Eereka apitxoka itxari. ⁵⁰ Ininiã Xesosi txari Xotasi:

—Nitiretakiti, pikamariko pinirekakiti. Nauritai —itxari.

Iuasaakipeka Xotasikata sikani sakata Xesosimoni, maïka itxarina. ⁵¹ ãti Xesosi moianari kosekaro saasara. Isuaaãkatari sasetotxi auïte apiatakari nitiri. Itsotakãpitatari.

⁵² Ininiã Xesosi txari:

—Pitaka saasara mitxi oãuiniãtaã. !Pineenamauatape. Ikeekotxi himaïkiniã, ãti õti hïpinako ikeekotxi xika. ⁵³ !Pimarotari niposottiire. Nota nirekiniãri, nakiritari niri moianatinino nota. Nakiritiniãri, iuasaakipeka iua iokanatamariko seï mio initiriakori nota imaktxakinina ìkapani. ⁵⁴ Kona nakiritari niri, kotxi Teoso sãkire iõkatsopatakori sãpiretapekari nimaïkiko ïkane ia atoko inakari.

⁵⁵ Iuasaaki Xesosi misãkiretana iuamoni ìkani:

—Kinirepa himinari saasara, piriri pakini himaïkinino ìkapani? !Kïtirino nota. !Kikeekono nota. Ìkiniõtika niitopãka Teoso misãkiretiko aikoti ãki noerekinii hïte. Iuasaaki kona himaïkano. ⁵⁶ Ia atoko himaïkano, kotxi kitxakapiriãka Teoso sãkire sãpiretakani iõkatsopatapekari ia atoko himaïkinino. Ininiã Teoso sãkire iõkatsopatakori iaõka uatxa apokapeka —itxa Xesosi. Iuasaakipeka Xesosi moianariakori asikari iua, miteka itxana.

Xesosi Xoteo Auïteakori Apisatoõ

(Marko 14.53-65; Arókasi 22.66-71; Xoão 18.12-14, 19-24)

⁵⁷ Ninoo Xesosi maïkakani anikari Xesosi Kaipasi aapokomoni. Iua Kaipasi sasetotxi auïte apiatakari itxaua. Iuaãtaã kaiõkatsopareriakori, kiomãtxiakori pakini apotiitapekaua

iuasaaki. ⁵⁸ Ninoa anikasaakiri Xesosi, Petro sari Xesosi tikini. Ikira atoko auaāponāta. Sasetotxi auīte apiatakari aapoko takote isa. Iroā pirikere āki. Iitopāka Kaipasi nitiriakorikata. Kiatokopa inaākapani Xesosi, ininiāra isa Xesosi tikini imarotini ikapani.

⁵⁹ Kaipasi aapoko āki Sasetotxi auīteakori, kiomātxiakori, ikinika Xoteo auīteakori pakini nitana kākiti aāpirena kamakani Xesosi okinina ikapani. ⁶⁰ Itori kākiti sāpiretari aāpirena Xesosi ikamapiretinina. Txamari ixika !uari Xesosi okinina ikapani.

Eereka apokana ipi aāpirena kamakani. ⁶¹ Ninoa txari:

–Ia kiki txari: “Nota posotari aiko Teoso misākiretiko nirikini. Ipi āti ōtsaaki niposotari iuaīkana nōkitikiniri,” itxa isākire.

Kona atāo ninoa sākire. ⁶² Sasetotxi auīte apiatakari ōkitikaua.

–Kona papakapapiretari pitemoni apoīrauatakani? Atāokani piposotari ikara atoko pikamini? –itxari Xesosi.

⁶³ Xesosi lkasākireri. Ininiā sasetotxi auīte apiatakari iuaīkana misākiretari Xesosi:

–Uatxa nipimaāi Teoso mipikati apisatoō. Atāonani pisāpiretaua. Pite, Teoso mereēkiti pitxataua? Teoso ākirikai pite? –itxari Xesosi, kotxi inirekari Xesosi kerokiniri isākire.

⁶⁴ –Ari, iuapitikanano. Nisāpiretaiko hīte hīkinika. Hātamariko kākiti itari iaxitikiri topākini Kaposotūireri kikomoni. Hātapariko kākiti itari iaxitikiri uai apokaāpotini katxiāri āki –Xesosi txana ninoa.

⁶⁵ Sasetotxi auīte apiatakari kenakotari ikara Xesosi sākire. Iuasaakipeka iua matsorākari imāka, kotxi kona xatiki ipotxitari Xesosi sākire.

–Maerekati isākire: “Teoso ākirirano,” itxa. ! Anirekaikari apanakini kamapiretiniri Xesosi. Uatxaika hīkenakotapekari isākire maerekati. ⁶⁶ Kiātokopa atxatari Xesosi? –itxana ninoa.

–Ixika auapeka ipinini ikapani ininiā uatxa okaākapitikako –ninoa txari iua.

⁶⁷ Eereka ikiisokatoōtarina. Iāsokarina. Apanakini aritoōtari Xesosi.

⁶⁸ –Pite Teoso mereēkiti pininiāua, pisāpiretaua, kipa aritai? –itxarina iua.

Inapetarina.

Petro Kipatari Xesosi Imarotini

(Marko 14.66-72; Arókasi 22.54-62; Xoāo 18.15-18, 25-27)

⁶⁹ Iuasaaki Petro topākanāta mapara pirikeri āki. Ātokoro Kaipasi nitero sari iuamoni.

–Pite Xesosi Kariréiakiri moianaripitikarai –otxari iua.

⁷⁰ Txamari iua kipatari ikinimane apisatoō.

–!Nimarotari ikara atoko pinanātakiti.

⁷¹ Ininiā isa pirikeri Iroānakikomoni. Iuaā āto ātokoropekana Kaipasi nitero atamatarari iua. Ininiā osāpiretana kākiti iuaā auakani:

–Xesosi Nasareekiri moianaripitikara ikira –otxa.

⁷² Iuaīkana ikipatari:

–Teoso imarotari iua kiki nimimarotakani –itxa.

⁷³ Eereka paītiki atoko kikiākini iuaā auakani sari Petromoni:

–Pite atāopitika iua moianaripitikarai, kotxi pisākire ipinimoni. Kākiti Kariréiakiri sākire atokokana, Xesosi sākire atokokana pitxa pite sākire –ninoa txari Petro.

⁷⁴ Ininiā Petro apakapapiretana:

–Atāo nisākire minakaniāua Teoso misiritanoko. Nisākire atāopitika. !Nimarotari iua kiki –itxama.

Iuasaakipeka patari sākirauata. ⁷⁵ Ikara ikenakotakasaaki, Petro xinikari Xesosi sākire, kotxi mitxipe Xesosi txari iua: “Patari sākirauatini apisapanikako, ipi āti pakinikata, ‘! Nimarotari iua,’ pitxanoko.” Ininiā Petro sipeka. Itxiapakata.

27

Xesosi Pirato Apisatoō

(Marko 15.1; Arókasi 23.1-2; Xoāo 18.28-32)

¹ Katimatiniākata sasetotxi auīteakori, kiomātxiakori pakini apotiitua. Imisākiretakana:

–Kiātokopa atxatari Xesosi aōkini? –itxana.

² Eereka iaxirikākitakarina Xesosi, anika itxarina Homano auīte Pōsio Pirato inakorimoni, sikanapa itxarina.

Xotasi Ipinini

(Átosi 1.15-19)

³ Xotasi, Xesosi mīkapiritakari, kenakoenetakasaakiri Xesosi ipinini tīkane, maerekaxiniretinoka itxa, kotxi iuaka sikari Xesosi imokaiakariakorimoni okiko tīkane. Iuaīkana isipikaro trīta txineiro ota pirata kamakoro sasetotxi auīteakori, kiomātxiakori pakinimoni.

⁴—Nota kamari maerekati. Nimīkapiritari Xesosi. Ixika !auari iua ipinini ikapani —itxana ninoa.

Ininiā ninoa:

—Pite kamakiti xikakara. Pitekara sikaua ate Xesosi.

⁵ Ininiā Xotasi okaro txineiro ota Teoso misākiretiko aikoti āki, eereka isipe ātiātaā. Iuaātaā iuaka iaxirikanokitapeua, aamina porīā iaxirikaua, arōka, ipīpe itxa.

⁶ Teoso misākiretiko aikoti āki sasetotxi auiteakori kosekaro oa txineiro.

—Oia txineiro kiki okiko iki. Ia xika ate !auiritaāka aāpotiitiniro oia txineiro āto txineirotikata Teoso misākiretiko aikotiākero. ⁷ Kiātokopa atxtataro oia txineiro? —itxakakana.

Eereka ninoa imarotape. Iamotarina kiki, tiitxi kamakari kikiote, Xoteo minakaniua ikatiko tīkane. ⁸ Oa txineiro kiki okiko iki xika, Xesosi okiko iki xika, iua akauari takauākataāka “Arēkatxi Akauariti” inaāka. Uatxa akiritaākapanika iuaātaā “Arēkatxi Akauariti.” ⁹ Iua atoko ininiā, kitxakapirīka Teoso sākire sāpiretakari Xeremia inakori atāo txari:

Isaao auakani iikixitari trīta ota pirata kamakoro Teoso mereēkiti okiko ikapani.

¹⁰ Eereka isikarona oa txineiro ota tiitxi kamakarimoni, ikikiote iamotinina ikapani, kotxi Teoso nirekari ia atoko ikaminina,

itxa Xeremia kitxakapirīka. Ininiā Xeremia sākire iaōka apopeka iuasaaki.

Xesosi Pirato Apisatoō

(Marko 15.1-5; Arōkasi 23.1-5; Xoāo 18.28-38)

¹¹ Iuasaaki Xesosi tima Homano auite Pirato inakori apisatoō. Pirato pimaāri Xesosi:

—Pitekani Xoteoakori auite txataua?

—Ari, iuapitikarano —itxari.

¹² Eereka sasetotxi auiteakori, kiomātxiakori pakini apoītari Xesosi. !Kasākireri Xesosi iuasaaki. ¹³ Ininiā Pirato txari:

—Atauako kona pikenakotatari apoītiniina?

¹⁴ Xesosi !kasākireri, ininiā Pirato tsorīkaāta. Ākixinireē iua:

—Kininiāpa !kasākireri?

Xesosi Okiko Nirekiko

(Marko 15.6-15; Arōkasi 23.13-25; Xoāo 18.38-19.16)

¹⁵ Ikini kiiniriti Pāscoa inakori, Homano auite sikakari ātika kateia āki auakari kākiti nirekakiti. ¹⁶ Iuasaaki aua kateia āki auakari Pahapasi inakori. Ikinimane imarotari iua.

¹⁷ Itomaneri kākiti apotiitakasaakiua, Pirato pimaāna ninoa:

—Īkiripa kateia āki auakari hinireka nisikakini? Pahapasikani? Xesosi Teoso mereēkiti inakorikani? —itxana ninoa.

¹⁸ Pirato imarotari Xesosi isikinina iuamoni ixikotinirina xika.

¹⁹ Iuasaaki Pirato topākanāta kākiti misiritiko isāpiretini pakita āki. Iuasaaki itanoro iokanapireta iuamoni.

—Maerekati !pikamape iua kikimoni, kotxi ixika !auari pokiniri. Erekari iua. Minipani nitaponetari iua kiki, ininiā maerekaxiniretinoka nitxa —otxari.

²⁰ Mapara sasetotxi auiteakori, kiomātxiakori pakini misākiretana kākiti iuaātaā apotiitakaniua:

—Piratimoni hītxako: “Pisikakariko Pahapasi. Pokākitakariko Xesosi,” hītxariko —itxana kākiti.

Ininiā ninoa auikari isākirena. ²¹ Eereka Pirato pimaāna kākiti iuaā apotiitakaniua:

—Īkiripa kateia āki auakari hinireka nisikakini?

Ininiā ninoa akirikata:

—Pahapasira.

²² —Kiātokopa nitxtari Xesosi, Teoso mereēkiti inakorima? —itxa Pirato.

Ikinikana apakapapiretana:

—Aamina Īpiriāmitakari nopini pitokakitariko.

²³ Ininiā Pirato:

—Kixikapa? Maerekati likama —itxa.

Iuasaakipeka ninoa iteene akiripoakatana:

—Aamina Īpiriāmitakari nopini pitokakitariko.

²⁴ Ininiā Pirato kona sāpiretakari Xesosi isikakini, kotxi ninoa neenamauatanapanoka. Ikosekari āparaā. Arokauakotaua ninoa apisatoō.

—Na nota xikani ia kiki ipinako. Hīte xikakara ia kiki ipina —Pirato txana ninoa.

²⁵ Ikinimane apakapapiretari:

—Atãopitikara. Misirikaretxi auiniã okiko xika, ate, aamariteni pakini apakapariko iua misirikaretxi —itxana.

²⁶ Iuasaakipeka Pirato sikakari Pahapasi. Eereka ipaniãtari Xesosi xirokitatiko aãpitsaã. Eereka isikari Xesosi isotatonemoni aamina İpiriãmitakari nopini itokakitinirina ũkane.

Sotatoakori Napetiniri Xesosi

(Marko 15.16-20; Arókasi 22.63-65; Xoão 19.2-3)

²⁷ Ininiã sotatoakori anikari Xesosi ninoa auite aapokomoni. Iuaã akiritarina apanakini sotatoakori, ininiã ikinimane sotatoakori ákitari Xesosi. Inapetarina. ²⁸ Imakatzakarina Xesosi mãka. Mãkatxi pókamarari ieretaka itxarina. ²⁹ Eereka itakarina saporieãa kotipiario kamakori ikiã. Iuako ikikomoni taka itxari aãke. Ininiã itxĩkitakarina Xesosi auitexi atoko ininiãua. Eereka ikapotoreẽkauana iua apisatoõ, napeta itxarina Xesosi:

—Aũite —itxarina Xesosi inapetinina.

—Xoteo auitekai pite —itxarina.

³⁰ Ikiisokarina. Iua aãke ikosekana, arikiita itxapikarina. ³¹ Inapetarina, eereka imakatzakarina mãkatxi pókamarari. Iua nakiti imãka iuaĩkana ieretaka itxarina. Eereka mapara anika itxarina, aamina İpiriãmitakari nopini itokakitinirina İkapani.

Xesosi Tokakitaãka Aamina İpiriãmitakari Nopini

(Marko 15.21-32; Arókasi 23.26-43; Xoão 19.17-27)

³² Xesosi anikaãpotakasaakina, aõkitarina Sireni sitatxitikiri, Simão inakori. Ninoa paniãtari iua, Xesosi anikakiti aamina İpiriãmitakari, anikini İkapani, kotxi Xesosi !iposo-taikari anikiniri. Ininiã Simão anikari. ³³ Apokana Kóokota inakoriãtaã. Apanakini akiritari “Kiitãtatxi” inaãka akiritiko. ³⁴ Iuaã iãriãmoni ikoketarina pinĩtxi kipixiãri, sika itxarina Xesosimoni, Xesosi iãtini İkapani, imakini İkapani. Atapixiãtaãka atoko, !iãtari. ³⁵ Ininiã itokakitarina Xesosi aamina İpiriãmitakari nopini. Inaãka atoko ikamarina sarauatxi kai soroã. Sarauatxi kãiatakani apakapari Xesosi mãka. Kitxakapirĩka Teoso sãkire sãpiretakari sãpiretakekari ikara atoko inini ũkane. Iua txari:

Ixanakarina nimãka. Sarauatxi ikamana nimãka apakapakani imarotinina İkapani.

Itxa Teoso sãkire sãpiretakari kitxakapirĩka. ³⁶ Sarauatxi xipoka atoko iitopãkana. Imoiaãrina Xesosi, kãkiti manikakaniri İkapani. ³⁷ Aamina İpiriãmitakariã iki nopini itakarina iõkatsopatakori: “Xesosi, Xoteoakori Auite,” itxa iõkatsopatakori. Ikara xika okaãka Xesosi.

³⁸ Xesosi takote itokakitarina ipi kiĩtiririni aamina İpiriãmitakari nopini, ãti Xesosi kikomoni, ãti Xesosi sanaremoni. ³⁹ Kãkiti iuaã napakani napetari, nokonoko itxa kiitana. Maerekaeneti isãkirepiretarina Xesosi:

⁴⁰ —Pite txari: “Aiko Teoso misãkiretiko niriãka atoko, ipi ãti õtisaaki iuaĩkana nõkitikari,” pitxa. Piteka pimakatzakaua. Pite Teoso ãkiri pinakasaakiaua, pikatzaka. Ikara atoko itxa sãkiretana kãkiti iuaã napakani. ⁴¹ Iua atokotxikana itxana sasetotxi auiteakori, kaiõkatsoparerini, kiomãtxiakori pakini ikara atoko inapetarina Xesosi:

⁴² —Iua makananitapekari apanakini. Txamari iuaka !iposotari imakananitinua. Iua Isaeo auakani auite ininiãua, iuaka imakatzakamauako. İkatxakiniã, ate auikari iua sãkire. ⁴³ Iua auikari Teoso sãkire. Maiãtapari. Atauako Teoso nirekari imakatzakiniri iua uatxa, itxa iua txari: “Teoso ãkirirano nota,” itxa —itxana.

⁴⁴ Kiĩtiririni iuakata tokakitakoni apaka maerekaeneti isãkirepiretarina Xesosimoni.

Xesosi İpinini Pirena

(Marko 15.33-41; Arókasi 23.44-49; Xoão 19.28-30)

⁴⁵ Apaniãxiti itixi piãka. Ipi ãti pakini oara ipiãka. ⁴⁶ Ipi ãti pakini oarape kikatamonipeka Xesosi iteene akirikata:

—Erii, Erii, aremaa sapakatani.

Ikara Epiro sãkire. Ia atatsopatakari sãkireẽ, “NiTeosone, niTeosone, kinirepa pitakana-pano?”

⁴⁷ Kãkiti iuaã auakani kenakotari Xesosi sãkire. Ninoa uãkatari akirinãtiniri Eriasi.

⁴⁸ Ininiã ãti mitaka, mapoa atoko inakari iãka itxari iãriã katxioãrimoni. Aãke mapotõkire taka, isirĩka itxamari Xesosi iãtini İkapani. ⁴⁹ Txamari apanakini:

—Kona pisikapiri. Atxiiti Eriasi makatzakari iua —itxana.

⁵⁰ Iuaĩkana Xesosi iteene akirikata. Eereka iokanatarari ixinire Teosomoni, eereka ipiãpe.

⁵¹ Iuasaakipeka mãkatxi mata Teoso misãkiretiko aikoti ãki arõkakari tsorakita. Itano itsorakita. İxitipeka apoka. Mitxi iua mãkatxi mata !auirĩtari kãkiti İroini Teosonani Auini Pakitaãtaã. Itsorakitakasaaki, itixi iakeẽkata. Kai mitari xoreka iuasaaki. ⁵² Apanakini akauari xoreka. Itomaneri kãkiti ipĩkani Teoso nakitiakori iuaĩkana õkitikapekaua. ⁵³ Osipikarina akauari. Xesosi iuaĩkana õkitikaãkaua atoko, isana Xerosareõmoni, Teoso nakiti sitatxitimoni. Iuaã itomaneri kãkiti itikana ninoa iuaĩkana õkitikakanua.

⁵⁴ Sotato auñte, sotatoakori Xesosi moiaäkani apaka, itikarina Xesosi ipinini. Imarotarina itixi iakeëkatini, ininiã iteene ipikarauatana.

—Atãopitikara Teoso äkiri itxaua —itxana.

⁵⁵ Itoro sitoäkini ikira atoko atamanãtari Xesosi. Kariréia tōpa Xesosi poterikasaaki ninoa sitoäkini moianatari iua. ⁵⁶ Maria Matarena inakoro iuaã aamina ipiriãmitakari ikira atoko auanãta apaka. Txiaxo, Xosee pakini inoro, Maria inakoro iuaã aua. Sepeteo anaakori inoro iuaã auanãta apaka.

Xesosi Ikatiko Pirena

(Marko 15.42-47; Arókasi 23.50-56; Xoão 19.38-42)

⁵⁷ İkanōka katxineiroteri Xosee inakori, Arimateia sitatxitikiri, apoka. Iua apaka Xesosi sãkire auñakari itxaua. ⁵⁸ İsa Piratomoni. Xesosi ito amanaã. Ininiã Pirato paniãtari isikiko. ⁵⁹ Ininiã Xosee anikari Xesosi ito. Mãkatxi mataã iapirika itxari. Mãkatxi mata amaneri arinio inakoriã iapirikari. ⁶⁰ Eereka taka itxari akauari äki. Iua akauari amaneri, Xosee kisakakiti kai auñte iriko. İkamari iua akauari ipikasaaki ikatiko İkapani. Xesosi ito iriko äki itaka atoko ikakanapiritari kai meraminapoari, itota itxari akauari iriko, sipe itxa. ⁶¹ İusaaki Maria Matarena inakoro, äto Maria inakoro apaka topãkanãta akauari apisatoõ.

İmoiaãrina Xesosi Akauari

⁶² İua õti sesta veira, tomatiko õti apisa. Iua õti Xoteoakori parĩkauatapitipo, tomatiko õti imaparĩkauatakanı İkapani. Katimatinĩkata sasetotxi auñteakori, pariseoakori pakini sari Piratomoni. ⁶³ Ninoa txari:

—Ate xinikari iua kamisirienereri sãkire. Iua txari: “Nipĩkasaaki eereka ipi äti pakini õtisaaki iuaĩkana nõkitikauako.” ⁶⁴ Pipaniãtana pisotatoneakori ipi äti pakini õti akauari imoiainina. Imamoiaãkaniãrina, imoianariakori İkanōka sari iuaã ito iitirĩkinina. Ininiã eereka isãpiretarina kãkiti: “Teoso õkitikapekari iua. İuaĩkana auãki itxapeka,” itxamana ninoa imoianariakori. Ininiã ikara misirieneretxi apiatama eereka. Mitxiri misirieneretxi poiãoka —itxarina Pirato.

⁶⁵ —Ininiã hanikari sotatoakori akauari moiaäkani tĩkane. Hĩsa. Hĩtotariko akauari sona —Pirato txana.

⁶⁶ Ininiã isana iuaã. Akauari sona iteene itotinina İkapani. İtikarina Pirato takaõtxikare itore nopini. Sotatoakori iuaã kaikota. İmoiaãrina akauari.

28

Xesosi İuaĩkana Auãki İnini

(Marko 16.1-8; Arókasi 24.1-12; Xoão 20.1-10)

¹ Tomatiko õti xipoka atoko, tomĩko İkanōkapanika Maria Matarena, oa äto Maria pakini sari akauarimoni.

² Ninoa saãpotakasaaki, katimaritika itixi iakeëkata itapararitika. İusaaki Teoso nitiri iaxitikiri katxaka. İkatapakiritari kai akauari tore, topãka itxa iua kai nopini. ³ İtoõ atokatxi iotximere atoko itxa. İmãka mapoa saro atoko itxa. ⁴ Sotatoakori, akauari moiaäkani, kikinanaãkata, ipikarauatinina. İrikana xitipeka. İpikani atokopeka itxana.

⁵ Eereka ninoa sitoakoro apoka akauari. Teoso nitiri misãkiretana:

—!Hĩpĩkarauatape. Nimarotari hĩte nitanãtiniri Xesosi, aamina ipiriãmitakari nopini tokak-itakori. ⁶ !Auaika uai. Teoso õkitikapekari iua. İkara iua sãpiretapekai hĩte. Uai hina. Hĩtamatarı ito mitxi auiniãtaã.

Ininiã ninoa atamatarı.

⁷ —Katima hĩtxako imoianariakorimoni hĩsini İkapani. Hĩsãpiretana: “İuaĩkana auapeka itxa Xesosi. Teoso õkitikapekari iua. İua sari hĩte apisapanika Kariréiamoni. İuaã haõkitariko iua,” hĩtxako ninoamoni. İkara atoko nitxa nisãpirena hĩtemoni —itxa Teoso nitiri.

⁸ Ininiã ninoa takanapari akauari. İpĩkareritikana, ieneniritikana isana. İmitekana Xesosi moianariakorimoni õkitikiniua isãpiretini tĩkane. ⁹ Ninoa mitekaãpotakasaaki, ipixinipokoritı Xesosi tokiã ninoamoni:

—Hĩtepinı ina —itxana.

Ininiã ninoa kapotoreëkaua iua apisatoõ, maĩkakitita itxarina.

—Peerekai. Apiananiri pitxaua —itxanãtana.

¹⁰ Ininiã Xesosi:

—Kona hĩpĩkarauatape. Nitariakorimoni hĩsa. Hĩsãpiretana Kariréiamoni isinina. İuaã aõkitanonako nota —Xesosi txana ninoa Mariaakoro.

Ininiã ninoa sipe.

Sotatoakori Xesosi Akauare Moiaäkani

¹¹ Sitoākini sikasaaki, ātikaka sotatoakori akauari moiaākani kanapiriā sitatximoni. Isāpiretarina itikakitina sasetotxi auīteakorimoni. ¹² Ininiā sasetotxi auīteakori, kiomātxiakori pakini apotiitaua ikara ene ixinikinina ikapani. Eereka isikarina itoro txineiro sotatomoni, atāo imasāpiretakanina ikapani apanakinimoni. ¹³ Ininiā sasetotxi auīteakori, kiomātxiakori pakini txana:

—Hītxariko apanakinimoni: “Xesosi moianariakori apoka ikanōka aimakasaaki. Itirīkarina Xesosi īto,” hītxako. ¹⁴ Hīauīte Pirato imarotakasaakiri himakini, ininiā ate misākiretariko iua, ininiā kona himisiritaāka himakini xika —itxarina sotatoakorimoni.

¹⁵ Ininiā sotatoakori apakaparo txineiro, sāpireta itxarina kākiti Xesosi moianariakori itirīkiniri Xesosi īto. Ikara aāpirena iaripireta Xoteoakorimoni. Uatxa apaka ikara aāpirena auīākapanika.

Xesosi Apoka Imoianariakorimoni

(*Marko 16.14-18; Arókasi 24.36-49; Xoāo 20.19-23; Átosi 1.6-8*)

¹⁶ Ōsi pakini Xesosi moianariakori sari oxiratarimoni Xesosi paniātinimoni Kariréia tōpamoni. ¹⁷ Ninoa atamatari Xesosi. Ikapotoreēkauana iua apisatoō.

—Peerekai. Apiananiri pitxaua —itxanātana.

Txamari ātikaka kona iteene auikari iua Xesosi ininiāua. ¹⁸ Xesosi apoka ninoa takote, misākireta itxana ninoa:

—Teoso txīkitakano itixine auakani auīte nininiāua. Itxīkitakano ikoraxiti auakani auīte apaka nininiāua. Ininiā ikinika posotiiretxi aua notamoni. ¹⁹ Ininiā nipaniātai. Hīsako ikini uākati kākitimoni ikini itixitika. Hōerekana ninoa nisākire. Hīpatxisatana nisākire kīpitakani niri uākaā, imi uākaā, Erekarī Matamatakoti uākaā pakini hīpatxisatanako. ²⁰ Hōerekana ninoa ikinika nipaniātakiti ikaminina ikapani. Hīxinikariko ia. Nota ātipirika auako hītekata. Hītekata nauiniritika itixi xipokako —itxa Xesosi sākire.

MARKO

Hoão Kapatxisarereri Sãpiretakiti

(Mateo 3.1-12; Arókasi 3.1-20; Xoão 1.19-28)

¹ Ia Xesosi Kristo iokanapirena erekari. Teoso ãkiri itxaua Xesosi.

² Teoso sãkire sãpiretakani iõkatsopataru ia:

Niokanatariko niokanapirena aniãkari kãkitimoni kimapori oeretini ikapani pite uai apokini apisa.

³ Iua auako ãparaã makipakaniãtaã. Isãpirenauatoko: “Hõeretariko kimapori Apiananiri apokini apisapanika. Itikaãpo erekari hikamako iua napini ikapani,” itxa iua.

Itxa Teoso sãkire iõkatsopatakori kitxakapirika.

⁴ Ikara atoko Xoão kapatxisarereri ãparaã makipakaniãtaã aua. Ipatxisatakasaakiri kãkiti, isãpiretari ia pirena:

–Hitakanapariko maerekati hikamakiti. Hipatxisataãkako. Ininiã Teoso makatzakariko maerekati hikamakiti –itxa Xoão kapatxisarereri.

⁵ Ikinimane kãkiti Xotéia auakani Xerosareë sitatxiti auakani pakini sari Xoãomoni isãkire ikenakotinina ikapani. Ninoa sãpiretakasaakiri maerekati ikamakitina, ipatxisatana uini Xotão inakoriãtaã.

⁶ Xoão takari imãka kamero piti kamakori. Itakari ipakiomatare pirãtxi mata kamakori. Inikari txitxiri. Mapaã itxima. ⁷ Iua txari kãkitimoni:

–Nota poiãori. Nota tikini apokako apiatakari. !Apakata nikapotoreëkinuia iua takote ikiti mata nimakatzakini ikapani, kotxi nota poiãoka. Iua apiata. ⁸ Nota patxisatai ãparaãnokara. Iua patxisataiko Erekari Matamatakotiã. Iuasaaki hite apakapariko Erekari Matamatakoti.

Xesosi Patxisatiko Pirena

(Mateo 3.13-17; Arókasi 3.21-22)

⁹ Iuasaaki Xesosi apoka Nasaree sitatxiti, Kariréia tãpamoni. Iuasaaki Xoão kapatxisarereri patxisataru iua uini Xotão inakoriãtaã. ¹⁰ Xesosi kanikãtakasaaki, iua itikari iaxiti takakini. Iuasaaki Erekari Matamatakoti katxaka kamoã katxakini atoko. Iua nopini apoka. ¹¹ Iuasaakipeka Teoso iaxitiki txari:

–Pite namarite, nitiretakiti, napokaerekatai, kotxi ninirekakiti pikama.

Satanasi Atamakaerekatini Xesosi

(Mateo 4.1-11; Arókasi 4.1-13)

¹² Iuasaaki Erekari Matamatakoti iokanataru Xesosi ãparaã makipakaniãtaã. ¹³ Iuaãtaã ikaikota koarãta õti. Iuasaaki Satanasi atamakaerekatari iua. Iuaãtaã auari kaxipirini kaneenamarini. Ininiã Teoso nitiriakori iaxitikini nãkatari Xesosi.

Xesosi Mipotorikiniri Iparika Kariréia Tõpa

(Mateo 4.12-22; Arókasi 4.14-15)

¹⁴ Xoão kateia ãki takikosaaki, Xesosi sari Kariréia tãpamoni. Iuaãtaã isãpiretari Teoso iokanapirena erekari, Teoso auãttxi ininiãua pirena. ¹⁵ Itxari:

–Teoso keto apopeka. Iua auãttxi ininiua apokaãpotapeka. Ininiã hitakanapariko hi-maerekani. Hãuikariko Teoso iokanapirena erekari –itxa Xesosi.

¹⁶ Xesosi tãpokota Kariréia poati tiniã. Iuasaaki atamatana ipi hetxi takakani, Simão Petro, itari ãtree pakini. Iua atamatana itakinirina hetxi. ¹⁷ Ininiã Xesosi txana:

–Uatxa masa notakata. !Himaãkaikariko ximaki. ãtião hãparika auako. Nisãkire hããpiretako kãkitimoni –itxa.

¹⁸ Ininiã iuasaaki ninoa takanapari hetxi, sa itxana Xesosikata.

¹⁹ Apikomoni ninoa saãpota. Itikana Txiako, itari Xoão pakini. Ninoa Sepeteo anaakori. Kanaua miramaneri ãki auanãtana iuasaaki. Hetxi iotsaãnãtana. ²⁰ Iuasaaki iua akiritana ninoa. Ininiã ninoa takanapari iri, iri nitiriakori pakini kanaua ãki. Eereka isana Xesosikata.

Kiki Maerekati Matamatakoti Auãtotakiti

(Arókasi 4.31-37)

²¹ Xesosi imoianariakorikata apoka Kapanaoõ sitatxiti. Ininiã tomatiko õtisaaki Xesosi sari aiko Xoteo apotiiniãtaãua oerekarauatini ikapani. ²² Iua sãkire kenakotakani tsorikaãta, kotxi kona kaiõkatsoparerini atokoni !itxa. Iua oerekakiti sãkiretxiti pataparari, kotxi !isãpiretari ãti koerekareri sãkire apanakini kaiõkatsoparerini atoko. Iuaka sãkirekara isãpireta.

²³ Iuasaaki aiko āki Xoteo apotiitiniātaāua aua kiki maerekati matamatakoti auakiti. Iua akiripoakata:

²⁴ —Xesosi Nasaree sitatxitikiri. Kipa pinireka atemoni? Pite ina ate pixipokini ikapanikani? Erekarinoka kamakarii. Teoso nakiti pitxaua —itxa.

Ikara atoko iua akiripoakata, kotxi iua maerekati matamatakoti pīkari Xesosi.

²⁵ Ininiā Xesosi itapararitika txari:

—Piotoka. Pitakanapariko ere kiki ito.

²⁶ Iuasaaki maerekati matamatakoti iōkokaītotari. Ikatxakasaaki, akiripoakata.

²⁷ Kākiti iuaātaā auakani tsorīkaāta. Iuasaaki imisākiretakakauana:

—Kiripa? Atxiiti oerekakori sākiretxiti amaneri apopeka? Iua sākire kaposotiireri. Ipaniatakiti maerekati matamatakoti kamapeka —itxanātana.

²⁸ Ininiā ikara pirena iaripireta ikini Kariréia tōpati.

Xesosi Makananitiniro Simão Petro Imakiro

(Mateo 8.14-15; Arókasi 4.38-39)

²⁹ Ininiā Xesosi, Txiaxo, Xoāo pakini takanapakasaakiri aiko Xoteo apotiitiniātaāua, isana Simão, Átree pakini aapokomoni. ³⁰ Iuasaaki Simão imakiro apoomata. Osirīkanāta. Ininiā ninoa sāpiretari Xesosi oamianare. ³¹ Ininiā Xesosi sari oamoni. Imaīkaro ouako. Ōkitikaro. Iuasaakipeka oāpoomare ! auaika. Ininiā opotorika oparīkautini, ninoa kiena okamini ikapani.

Xesosi Makananitinina Amianatakani

(Mateo 8.16-17; Arókasi 4.40-41)

³² Ininiā mapiānikata kākiti minana ikinipoko amianatakani, maerekati matamatakoti auaitotakini pakini iuamoni. ³³ Ininiā ikinimane iua sitatxi auakani apotiitaua aapokotxi tore takote. ³⁴ Ininiā Xesosi makananitana itomaneri amianatakani. Kaiāopokori amianari auakini imakananita. Apaka omitikana itomaneri maerekani matamatakoni. Iuasaaki ! auritana ninoa sākirauatini, kotxi ninoa imarotari Teoso ākiri ininiua Xesosi.

Xesosi Sāpiretiniri Teoso Sākire

(Arókasi 4.42-44)

³⁵ Ikanōkapanika mapiāpanika Xesosi ōkitikaua. Itakanapari aapokotxi. Iuanoka sari kākiti mauakaniātaā iri iaxitikiri imisākiretini ikapani. ³⁶ Eereka Simão imoianariakorikata sari Xesosi initinina ikapani. ³⁷ Ninoa apokasaakiri, itxana:

—Ikinimane nitai —itxarina.

³⁸ Xesosi apakapapiretana:

—Masa ātiātaā kākiti aapokomoni. Iuaā nisāpiretariko Teoso sākire, kotxi ikara atoko itxa nīparīka kākitimoni. ³⁹ Xesosi sari ikini Kariréia tōpa. Aiko Xoteo apotiitiniātaāua isāpiretari Teoso sākire. Apaka omitikana maerekani matamatakoni kākiti itoā auakani.

Kiki Maere Matati

(Mateo 8.1-4; Arókasi 5.12-16)

⁴⁰ Amianatakari maere matati apoka Xesosimoni. Ikapotoreēkaua iua apisatoō. Iua iteene amanaāri:

—Nimarotari, pinirekiniāri piposotari erekape pitxīkitakinino —itxa.

⁴¹ Ininiā iuasaaki Xesosi iteene tiretari iua. Itakari iuako iua nopini. Itxari:

—Ari, ninirekapitikari. Erekapekai uatxa.

⁴² Iuasaakipeka amianari !auaika. Erekapekari iua.

⁴³ Xesosi iokanatarari iua. Iuasaaki isāpiretari iua:

⁴⁴ —Kona pisāpiretapiri apanakini pitemoni nikamakiti. Uatxa merepanika pisa sasetotxiakorimoni. Poerekari piito ninoamoni. Eereka pikamariko Moisesini paniātakiti. Ikara atoko oerekari kākiti atāo erekapekani pinini —itxari.

⁴⁵ Iuaritika isāpiretapikari Xesosi kamakiti. Ininiā iaripireta ikara pirena. Ikara xika Xesosi !iposotaika isini aapokotximoni. Ikaikota kākiti mauakaniātaā. Iuaritika kākiti sari iuamoni.

2

Matīpokotakati Pirena

(Mateo 9.1-8; Arókasi 5.17-26)

¹ Eereka mapaōtipeka inaka atoko iuaīkana Xesosi Kapanaoō sitatxiti apoka itxa. Iaripireta Xesosi inirimane aapoko apokini. ² Iuasaakipeka mirikiniti kākiti apoka iuamoni, ininiā iua aapokotxi xāpoka. Apotiitauana ironakikoātaā apaka. Ininiā !apakata apanakini kākiti iroini aapokotxi āki. Iuasaaki Xesosi sāpiretari Teoso sākire kākitimoni. ³ Iuasaaki ipi ipi pakini kikiakori minari matīpokotakati. ⁴ Kākiti itomaneri ironakikoātaā

aua, ininiã kona iposotarina Xesosi takote apokinina. Ininiã aapokotxi nopini, Xesosi manapi ninoa sonatari iua matipokotakati iokatxakinina tũkane Xesosimonikari. Iposo atoko isikakaãpotarina iua manapi. ⁵ Xesosi imarotari ninoa atão auikiniri iua sãkire. Ininiã Xesosi txari matipokotakatimoni:

—Namarite, pimaerekani makatxakapeẽkaika —itxa.

⁶ Iuasaaki ãtikaka kaiõkatsopareriakori topãkanãta iuaã. Itsorĩkañãtana. Ixiniõremoninani:

⁷ —Kinirepa ia kiki ikara atoko itxa? Maerekati isãpiretakiti, kotxi Teosonanira posotari imakatxakiniri kãkiti maerekani —itxa ninoa sãkire.

⁸ Iuasaakipeka Xesosi imarotari ninoa xinikakiti ãkixiniõreña. Ininiã Xesosi txana ninoa: —Kininiãpa ikara atoko hitxa xinireta? ⁹ Nitxari iua imaerekani nimakatxakini, txamari !himarotari imaerekani atão nimakatxakini. “Põkitikaua. Pisirimata pikoseka, sipe pitxa,” nininiã, iuasaaki himarotari nisãkire atão ininiãua, kotxi hitikari. Niposotiire imaerekani nimakatxakini ìkapani, niposotiire iua nõkitikini ìkapanitxikana. ¹⁰ Ininiã uatxaika noerekai hite, Teoso iokanatanõ nota hitari iaxitikiri ìkorapokoritimoni kãkiti maerekani nimakatxakini ìkapani —itxana kaiõkatsopareriakori.

¹¹ Ininiã matipokotakatimoni itxa:

—Põkitikaua. Pisirimata pikoseka, sipe pitxa paapokomoni —itxa.

¹² Iuasaakipeka iua õkitikaua. Iksekari isirimata. Ìkrape itxa ikinimane okiãtaã. Imakinika kãkiti tũkoka.

—Peerekari Teoso kamakiti. Kona mitxi ate itikari ìkora atoko inakari —itxanãtana kãkiti.

Mateo Pirena

(*Mateo 9.9-13; Arõkasi 5.27-32*)

¹³ Ininiã iuaĩkana isari ipoamoni. Kaiõopokori kãkiti apotiũtaua iukata. Iuasaaki oerekana ninoa. ¹⁴ Isaãpotakasaaki, atamatari Arevii inakori. ãti iuaĩka Mateo inaãka. Aopeo inakori ãkiri itxaua iua. Iitopãkanãta auĩtetxiakori txineirote apakapiniãtaã. Ininiã Xesosi txari:

—Masa notakata.

Iuasaakipeka õkitikaua, Xesosikata sa itxa.

¹⁵ Eereka Xesosi nipokota Arevii aapoko. Itori auĩtetxiakori txineirote apakapakani, itori apanakini maerekani, topãkanãta Xesosi takote, imoianariakori takote pakini. Kaiõopokori kãkiti aua iuasaaki, kotxi kaiõopokori kãkiti Xesosikata sikani. ¹⁶ Pariseoakori, kaiõkatsopareriakori pakini itikari Xesosi auĩtetxiakori txineirote apakapanikata, apanakini maerekanikata pakini inipokotini. Ininiã kaiõkatsopareriakori, pariseoakori pakini pimaãna Xesosi moianariakori:

—Kinirepa hinipokota auĩtetxiakori txineirote apakapanikata, maerekanikata? —itxana.

¹⁷ Xesosi ikara ikenakotakasaaki, itxana:

—Kãkiti mamianatakani kona nirekari kãkiti pinĩtxi imarotakari. Amianatakaninokara nirekari pinĩtxi imarotakari. Nota uai apoka maerekani nakiritini ìkapani, imaerekanina itakanapinina ìkapani. Kona nakiritari kãkiti “atão inakari kamakani” uãkatakaniua —itxa Xesosi.

Nipokori Takanapiko Teoso Misãkiretiko Ìkapani

(*Mateo 9.14-17; Arõkasi 5.33-39*)

¹⁸ ãti õti Xoõo moianariakori, pariseoakori pakini takanapari inikinina Teoso imisãkiretinina ìkapani. Iuasaaki kãkiti pimaãri Xesosi:

—Kinirepa Xoõo moianariakori, pariseoakori pakini takanapari inikinina Teoso imisãkiretinina ìkapani, txamari pite moianariakori kona ikara atoko !itxana.

¹⁹ Ininiã Xesosi:

—Kiiniri kãkiti ìtanorouatakasaaki, ìtanorouatakari aua iuaã, ininiã kona kãkiti takanapari inikini iuasaaki. Kona iua ìtanorouatakari nirekari kãkiti natxitini. Ininiã iua auakasaaki ninoakata, ikinimane nipokota.

²⁰ Ininiã nota ìtanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisãkiretinina ìkapani. ãti õti nota !auaika nimoianariakorikata. Iuasaakiikarako itakanaparina inipokotinina Teoso imisãkiretinina ìkapani.

Amaneri Mãkatxi Pirena

²¹ Kona kãkiti tãpanetari mãkatxi kitxakari mãkatxi mata amaneriã. Mãkatxi mata amaneri itxikika, ininiã kitxakari tsorakita.

Amaneri Sako Aamata Kamakori

²² Kona kãkiti takari iãriã amaneri sako kitxakari aamata kamakori ãki. Itakiniãri, koanatxi kitxakari aamata kamakori tsorakita, ininiã iãriã xikepoata, ininiã koanatxi !

kikeikari. Sako amanerī āki itakaāka iāriā amanerī. Iua atokokana kona hīkoketari kitxakari sākiretxiti amanerī sākiretxitikata.

Tomatiko Ōti Pirena

(Mateo 12.1-8; Arókasi 6.1-5)

²³ Tomatiko ōti Xesosi imoianariakorikata napaāpota kikio triko takikoōtaā. Ininiā ninoa makatxakaro triko iki mapaki inikinirona ikapani. ²⁴ Pariseokori atamatana, ininiā itxarina:

—Kinirepa ninoa parīkauata tomatiko ōtisaaki? —itxana.

²⁵ Ininiā Xesosi apakapapiretana:

—Kona hātatsopatapanikari Taviini kamakiti? Iua, imoianariakorikata natxitakasaaki, kona himarotatari ikamakiti? ²⁶ Iua iroā Teoso misākiretikoōtaā. Apiataa inakori sasetotxi auite apiatakari iusaaki. Iuaā Tavii nikari komiri Xesomoni sikakori. Sasetotxinokara auiritaāka iua komiri inikinina. Apanakini ! auiritaāka inikiniri. Txamari Tavii sikari imoianariakori inikinina ikapani.

²⁷ —Tomatiko ōti kamaāka, kākiti ito ereka inini ikapani. Kona kākiti kamaāka tomatiko ōti auini ikapani. ²⁸ Nota hītari iaxitikiri posotari ikinipoko ninireēkiti nikamini tomatiko ōtisaaki, kotxi Apiananiri nitxaua —itxa Xesosi.

3

Motīkauakotakari Pirena

(Mateo 12.9-14; Arókasi 6.6-11)

¹ Iuaīkana Xesosi imoianariakorikata iroā aiko Xoteokori apotiitiniātaāua. Iuaā apokari kiki motīkauakotakari. ² Ininiā iuaā auakani txari

—Atxiiti iua erekapeka txīkitakari motīkauakotakari uatxa tomatiko ōtisaaki?

Ninoa xinikari ikara atoko inini, kotxi ninoa kinirāo apoitaka txari Xesosi. ³ Ininiā Xesosi akiritari iua motīkauakotakari:

—Uaimoni pina —itxari.

⁴ Iposo atoko ipimaāna iuaā auakani:

—Kipa atāo Teoso paniātaua akamini tomatiko ōtisaaki? Maerekati akaminikani? Erekarī akaminikani? Ipaniātataua āti amakananitini? Ipaniātataua āti aōkini?

Txamari ninoa !kasākirena. ⁵ Xesosi atamatana. Iusaaki inaiataua, iuaritika imatinani-ua, kotxi ninoa linirekari atāo imarotinina. Ininiā Xesosi txari iua motīkauakotakari:

—Pisiriūkauakota —itxari.

Ininiā itamēkauakota. Erecape itxa iuako. ⁶ Ininiā pariseokori poterika iuaā. Isana Erotxi sākire auīākanimoni. Iuaātaā ninoa xinikari Xesosi okaenetinina.

Itori Amianatakani Sari Xesosimoni

⁷ Ininiā Xesosi sari Karirēia poamoni. Iusaaki itori kākiti Karirēia tixinikini, Xotēia tixinikini pakini sari iuamoni. ⁸ Xerosareē sitatxitikini, Itoméiakini, Xotāo ipiniākini, Txirokini, Sitoōkini pakini sari iuamoni. Ninoa kenakoenetari ikamakiti, ininiā iuamoni isana. ⁹ Ininiā ipaniātana imoianariakori:

—Kanaua himina, kotxi kaiāopokori kākiti katikaāpotano. Ininiā kanaua āki niereētaua — itxa Xesosi.

¹⁰ Iusaaki kaiāopokori kākiti erekapeka itxīkitakapeka. Apanakini amianatakani nirekakari imaātakinirina Xesosi, erekapeka ininina ikapani. Ininiā ikatikaāpotarina Xesosi, kotxi kaiāori kākiti. ¹¹ Maerekati matamatakoti auakini atamatakasaakiri Xesosi, irikana Xesosi apisatoō. Akiripoatana:

—Teoso ākiripitikai pite.

¹² Ininiā Xesosi kona auiritana ninoa: “Teoso ākiripitikai,” ininina.

Xesosi Mereēna Tosi Imoianariakori

(Mateo 10.1-4; Arókasi 6.12-16)

¹³ Iposo atoko Xesosi sari ōtanoxiratarimoni, akirita itxana inirekaākini. Ininiā ninoa sari iuamoni. ¹⁴ Ininiā iua mereēna tosi kikiakori iuakata kaikotakani tīkane, Teoso sākire sāpiretakani ikapani. ¹⁵ Iua sikari iposotiire ninoamoni, amianatakani erekapeka itxīkitakinina ikapani, apaka maerekati matamatakoti omitikinina ikapani. ¹⁶ Ininiā akiritari Simāo. Xesosi takauākatari Simāo āti iuāka. Petro itxaua. ¹⁷ Akiritana Txiaako, itari Xoāo pakini. Sepeteo anaakori itxauana. Xesosi takauākatana ninoa Poanexi. Poanexi Popikari sākireē “Ikarokirauari anaakori.” ¹⁸ Akiritana Ātree, Piripi, Patoromeo, Mateo, Tomee, Txiaako pakini. Aopeo ākiri itxaua iua Txiaako. Akiritana Tateo, Simāo pakini. Homano omanatakari iua Simāo. ¹⁹ Akiritari Xotasi Isikariotxi inakori apaka. Xesosi mikapiritakari itxaua iua Xotasi Isikariotxi. Pakini Xesosi akiritakini imoianariakori ininiuana ikapani.

*Maerekani Matamatakoni Omitikiko**(Mateo 12.22-32; Arókasi 11.14-23; 12.10)*

²⁰ Iuaikana áti aapokotxitimoni isa Xesosi, imoianariakorikata. Iuasaaki mirikiniti kákiti iuaikana apotiitaua. Ikara atoko ininiá kona ninoa nipokota. !Apakata inipokotinina, kotxi mirikiniti kákiti aua iuaá. ²¹ Xesosi nirimane kenakotari kákiti apotiitiniua iuakata. Ininiá isana iua apinina ikapani.

—Imapitxiritapeka —itxana.

²² Kaiõkatsopareriakori Xerosareë ikani apoítari Xesosi maerekati ikamini. Ninoa sáikire:

—Peosepoo inakori auaítotari iua. Ininiá Peosepooa omitikari maerekati matamatakoti —itxana.

Peosepoo Satanasi itxaua. Apanakini sáikire:

—Maerekani matamatakoni auíte sikaposotiiretari Xesosi maerekati matamatakoti omitikini.

²³ Ininiá Xesosi akiritari kákiti isáikire ikenakotinina ikapani. Sápirenatxi atáo inakari oerekiko isápiretana ninoa. Ipimaána:

—Natokopa itxa Satanásika omitikiniua? ²⁴ Auítetxi tixine auakani naiatakakiniáua, ixipokaákanako. ²⁵ Kákiti aapoko áki auakani ninoakakarika neenamauatinia, ixipokaákanako apaka. ²⁶ Iua atokokana, Satanasi nitiriakori, ninoakakarika naiatakakiniáua, Satanasi tapara xipokako.

²⁷ —Kona kákiti íroá kiki mitapoari aapoko áki iitiriuatini ikapani. Kiniráo iitiriuataka, ininiá iaxirikari mitari mitxi. Iposo atoko inirekaákiti iitirika.

²⁸ —Ari, atáopitikara nota txai híte. Apakata Teoso makatxakiniri ikinipoko maerekati kákiti kamakiti, imaerekani Teoso imisáikirepiretini pakini. ²⁹ Txamari átipekana maerekati kamakari aua. Erekari Matamatakoti misáikirepiretakari maerekani makatxakiko kona auari. Ikara atoko inakani inikoriáriko imisiritiko maerekani misiritikoátaá —itxa Xesosi.

³⁰ Xesosi ikara atoko itxa, kotxi pariseoakori txari: “Iua auari maerekati matamatakoti.”

*Xesosi Inoro, Itariakori Pakini**(Mateo 12.46-50; Arókasi 8.19-21)*

³¹ Iuasaaki itariakori inorokata apoka porikiti. Ipaniátarina áti akiritiniri Xesosi. ³² Iuasaaki itori kákiti topákakani ákitari Xesosi. Isápiretarina:

—Pitariakori, pinoro apaka porikiti aua. Initanátaí —itxarina.

³³ Ininiá Xesosi apakapapireta:

—Kiripa nitariakori, ninoro pakini?

³⁴ Iua atamatana itakote topákakani:

—Hátamata, uai aua ninoro, nitariakori pakini. ³⁵ Teoso nireékite kamakani nitariakori, nitaroakoro, ninoro pakini itxauana —itxa Xesosi.

4*Katakareri Pirena**(Mateo 13.1-9; Arókasi 8.4-8)*

¹ Iuaikana Xesosi oekarauata ipoa takote. Kákiti mirikiniti, ininiá imorókokaua kanaua áki. Iitopáka. Ninoa aua imirií, ininiá iua kanauaá oekarauata. ² Itori Teoso sáikire oerekana ninoa sápirenatxi atáo inakari oerekikoá. Itxana:

³ —Híkenakota. Katakareri takarauata. ⁴ Itakarauatakasaaki itakareki irika kimapori tiniápo. Ininiá kotipirikí nikari itakareki.

⁵ —Apanakini itakareki irika kai auiniátaá, kipatxi mauakaniátaá. Atáoka ipitxaka. ⁶ Kipatxi poiáoka auiniá atokatxi pataka apokasaaki itxarika. Omakotsani xika osonáka.

⁷ Apanakini irika inako saualí. Inako aneékasaaki, okari takari. !Iriuata. Ipiná.

⁸ —Apanakini irika kipatxi auiniátaá. Ininiá iriuata. Áti poiáoka iriuata, trítakata. Áti apiata iriuata, sesétakata. Áti kaiáopoko iriuata, seíkata.

⁹ —Kakenakokii, ininiá híkenakotariko nisáikire —itxa Xesosi.

*Kákiti Mimarotakinini Xesosi Sápiretini Pirena**(Mateo 13.10-23; Arókasi 8.9-15)*

¹⁰ Iuanani imoianariakorikata auakasaaki, ipimaárina Xesosi:

—Poerekaua mixikanani sápirenatxi atáo inakari oerekiko pisápiretakiti? —itxarina.

¹¹ Ininiá isápiretana:

—Teoso sáikire mauíákani limarotari Teoso auítetxi ininiua. Teoso oerekai híte ninoa mimarotakinini. Teoso oerekana ninoa isáikire sápirenatxi atáo inakari oerekikoá. ¹² Atxiíti ninoa iteene atamatari Teoso oerekakiti, uaritika limarotarina atamatakítina. Atxiíti iteene

ikenakotarina Teoso sākire, iuaritika !imarotarina ikenakotakitina. Imarotāākamariko, akiritaākamariko Teoso, ininiā Teoso makatxakamariko ninoa maerekani.

¹³ Ininiā Xesosi txari:

—Himarotatari ikara sāpirenatxi atāo inakari oerekiko?

—!Aimarotari —itxana.

—Ininiā natokopa ininiāparako himarotatari apanakini sāpirenatxi atāo inakari oerekiko?

¹⁴ Ininiā imimarotakinitina oerekana:

—Iua takarauatakari takari Teoso sākire. ¹⁵ Aua kākiti kimapori tiniāpo takarekitxi irikiniātaā atoko inakani. Ininiā Teoso sākire ikenakotakasaaki Satanasi apoka. Ininiā imaktxakari Teoso sākire ākixinireēna apokakari.

¹⁶ —Aua kākiti kai auiniātaā atoko inakani. Ninoa kenakotakasaakiri Teoso sākire, uasaakipeka apakaparina ipoxokoniritikana. ¹⁷ Itxamana, kona kakotsari. Imaxikiko apokiniā, imisiritiko Teoso sākire auikinina xika apokiniā, uasaaki itakanaparina Teoso sākire.

¹⁸ —Aua kākiti aanaia auiniātaā atoko inakani. Ninoa kenakotapitikari Teoso sākire.

¹⁹ Txamari maerekaxiniretinoka itxana. Txineironoka inirekana, ininiā ikara misiriene-tana ninoa. Kaiāopokori inireēkitina, Teoso manirekakiniti. Maerekaxiniretinoka ininina, txineiro, inireēkitina pakini inako atoko itxa, ininiā !ixinikaikarina Teoso sākire, ininiā kona iriuata.

²⁰ Aua kākiti kipatxi erekari auiniātaā atoko inakani. Ninoa auikari Teoso sākire. Iriuatana. Āti iriuata poiāoka, trītakata. Āti iriuata apiata, sesētakata. Āti iriuata ito, seīkata.

Tirikapi Pirena

(*Arókasi 8.16-18*)

²¹ Xesosi pimaāna ninoa:

—Nanipa hītakari tirikapi? Kopiti ākikani hītakatari? Amesa patapikani hītakatari? Kon-apitini. Hītakari itano imakinika lopinikini ikapani. ²² Iomaātakori āti ōti oerekaākako. Kīpatakori oerekaākako, kotxi nota imarotapitikari hīkamakiti. ²³ Kakenakokii, ininiā hīkenakotariko nisākire —itxa Xesosi.

²⁴ Xesosi sākirauatapanika:

—Hītakaōtxikariko nisākire. Imakinika hīkenakotako. Erepaniko pikamakiti ātimoni, kotxi pite kamakititxikana kamaāka pitemoni. Erepaniko, kotxi apiata ikamaāka pitemoni. ²⁵ Teoso sākire auakiti, iua sākire kīpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makīpitakati, imarore xapiti iuamoni auakari makatxakaākako.

Takariki Pirena

²⁶ Apikomoni Xesosi txari:

—Teoso auītetxi ininiāua kiki takariki taākari atoko itxa. ²⁷ Itakaruata. Imaka īkanōka. Āti iparīka ikama pokamara. Iuasaaki itakare pitxakapeka. Kona iua imarotari otomorekini. ²⁸ Merepanika otomoreka. Iposo atoko opitxaka. Eereka opa aua. ²⁹ Oaneēpeka onakasaaki katakareri makoapataro, kotxi oamiko manapipeka itxa.

Ikara atoko itxa Teoso auītetxi ininiāua.

Mostata Pirena

(*Mateo 13.31-32; Arókasi 13.18-19*)

³⁰ Xesosi sākirauatapanika. Itxari:

—Natokopa itxa Teoso auītetxi ininiāua? Īkiripa sāpirenatxi atāo inakari oerekiko oerekaau? Ia atoko itxa: ³¹ Teoso auītetxi ininiāua mostata oki atoko itxa. Axapitikiro oa. Apanakini iki apiata. ³² Otakaāka atoko opitxaka. Eereka oaneē. Apanakini takari itano apiata oa. Amaripokoro okati. Kotipiriki takari okoa okatiā. Iua atokotxikana Teoso auītetxi ininiātaāua.

Merepanika poiāo kākiti. Eereka apiata. Eereka kaiāopokori kākiti auītetari Teoso. Txamari iuasaaki Satanasi apoka ninoamoni kotipiriki apokini atokokana.

³³ Kaiāopokori sāpirenatxi atāo inakari oerekiko isāpiretana, Teoso sākire imarotininina ikapani. Ninoa imarotakasaakiri isākire, apiata isāpiretana. Imimarotakanisaakiri isākire, poiāonoka isāpiretana. ³⁴ Teoso sākire oerekasaakina ninoa, sāpirenatxi atāo inakari oerekikonoka isāpireta. Eereka imoianariakorinoka auakasaaki iuakata, oerekana ikara imarotininina ikapani.

Xesosi Iotokakiniri Ītima

(*Mateo 8.23-27; Arókasi 8.22-25*)

³⁵ Iua ōtipanika mapiānikata itxana imoianariakori:

—Maīpiriāta ipoa. Īpiniāmoni masa —itxana.

³⁶ Ininiã itakanapana itomaneri kãkiti. Iuasaaki imoianariakori anikari Xesosi kanauaã. Apanakini kanaua axapitiri apaka sari ninoakata. ³⁷ Ìpiriãtakasaakina Ìtima kataparari apoka ninoamoni. Tsakati kataparari, ininiã àparaã ierepeëpokataua kanaua àki. Kanaua sakikaariãpotape.

³⁸ Iuasaaki Xesosi ikapokiãmoni imakanãta. Isirimata nopini imakanãta. Ninoa Õpirikari iua:

—Kona pimaãkataua ate. Kona pitiretataua? Apinanapanoka —itxana.

³⁹ Ininiã imereka. Ipinitari Ìtima:

—Piotoka. Auapika pitxako —itxari ipoa.

Ininiã itSORIKaxitita. Ìtima iotoka. Tsakati iotoka apaka. ⁴⁰ Ininiã Xesosi:

—Natokopa ininiãpa kapikarei hite? Kinirepa hite kona auikano nota? —itxana ninoa.

⁴¹ Apiapikareta ninoa. Ininiã ninoa:

—Kinakaripa ia kiki, kotxi Ìtima, tsakati pakini auikari iua sãkire —itxana.

5

Kiki Maerekani Matamatakoni Auaãtotakiti

(Mateo 8.28-34; Arókasi 8.26-39)

¹ Xesosi imoianariakorikata apoka àtiãtaã Xerasa tõpa, Kariréia poa ipiniã. ² Xesosi kanikãitakasaaki, kiki ina iuamoni. Iua akauariãtaã auakari. ³ Iuaãtaã iua auanãta. Kãkiti ! iposotari Ìtxikiniri iua. Ìtxikare metao kamakori karakãtapekata. ⁴ Kaiãokatanã kãkiti Ìtxikari iuako, ikiti pakini metaoã, txamari ikakarakitsatari metao. !Apakata kãkiti nãkatimiri iua. ⁵ Ìkanõka, pokamara pakini ixirataãtaã akiripoanãta akauari auiniãtaã. Kai soroã iuaka ikisauakitataua. ⁶ Òtakopanika atapari Xesosi inini. Ininiã imiteëkata iuamoni. Ikapotoreëkaua iua apisatoõ.

—Apiananiri pitxaua —itxa.

⁷ Akiripoakata:

—Xesosi, Teoso àkiri pitxaua. Apiananiri àkiri pitxaua. Kipa pinireka nota Ìkapani? Teoso uãkaã namanaãi pite, kona pimisiritapeno —itxa maerekati matamatakoti. ⁸ Ìkara atoko itxa kotxi Xesosi paniãtari:

—Maerekati matamatakoti pisipeka. Pitakanapari ere kiki —itxari.

⁹ Xesosi pimaãri:

—Kipa piuãka? —itxari.

Iua apakapapiretari:

—“Itori” ninaãka niuãka. Kotxi itori maerekani matamatakoni ate.

¹⁰ Iteene iua amanaaãpotari Xesosi:

—Kona piokanatapeua àtiãtaã.

¹¹ Iuasaaki auari kaiãopokori irari ixiratamoni nipokonãtakani. ¹² Maerekati matamatakoni iteene amanaãri Xesosi:

—Piokanataua ate irarimoni. Pauiritaua ate sini ninoamoni —itxanãtana.

¹³ Ininiã Xesosi iokanatanã. Iuasaakipeka maerekani matamatakoni takanapari iua kiki, Ìroã itxana irari Ìtomoni. Iuaãtaã auari ipi mio irari. Ninoa Ìroãkasaaki, irari miteëkata oiokiriãtini ipoamoni. Komoka, axãpoãta itxana iuasaaki.

¹⁴ Irari nãkatakani miteka sitatximoni, aapokotxi poião auinimoni pakini. Isãpiretana kãkiti itikakitina. ¹⁵ Eereka isana Xesosimoni. Iuasaaki atamatarina kiki mitxi maerekati auaãtotakiti. Iitopãkanãta. Mãkatxi auapekari. Atão Ìkitapeka auari. Iuaritika ninoa pikarauata. ¹⁶ Itikakani sãpiretari apanakini iua kiki pirenã, irari pirenã pakini. ¹⁷ Kãkiti iuaãtaã auakani paniãtari Xesosi osipikiniri iuaãtaã.

¹⁸ Xesosi iereëtakasaakiaua kanaua àki, iua kiki amanaãri iuakata isini Ìkapani. ¹⁹ Xesosi ! auiritari. Itxari:

—Pisa pinirimanemoni. Pisãpiretana Apiananiri kamakiti pite Ìkapani. Pisãpiretana iua iteene iamoniãkai pite. ²⁰ Ininiã iua sipe. Iuaãtaã auari sitatxi tesi pakini. Iua kiki sari ninoa tesi sitatxitimoni. Isãpiretari kãkiti Xesosi kamakiti iua Ìkapani. Iuaãtaã auakani tsorãkaãta:

—Anekani, peerekari Teoso —itxana.

Xãiro Amanaãkiti Pirenã

(Mateo 9.18-19; Arókasi 8.40-42)

²¹ Ininiã eereka Xesosi Ìpiriãta ipoa. Ininiã ipoa Ìtiniã kaiãopokori kãkiti apotiãtaua iuakata. ²² Aiko Xoteo apotiãtiniãtaãua sikani auãte apoka iuamoni. Akiritaãka Xãiro iua. Iua kapotoreëkaua Xesosi apisatoõ. ²³ Iua iteene amanaãri Xesosi:

—Namarite opinanapanoka. Masa notakata. Pitakari piuako oa nopini erekape onini Ìkapani.

²⁴ Ininiã Xesosi sari iuakata. Kãkiti kinapokope itxakata isinina.

Xesosi Mãka Maãtakakaro
(*Mateo 9.20-22; Arókasi 8.43-48*)

²⁵ Iuasaaki sito amianatakaro apoka. Tosikanani oa arêka ! iotoka. ²⁶ Okinika otxineiroteê oïkitxitapekari oamianare imarotakani. Kaiãopokori ipitamaro. Txamari ninoa ! iposotari imaktxakinirina oamianare. Kona erekaro. Apiata oamianare. ²⁷ Okenakoenetakasaakiri Xesosi napini, osari iuamoni. Omaãtakari imãka, ²⁸ kotxi oa-moni: “Nimaãtakiniãri imãka, iuasaakiika erekapekano,” otxanãta oxinikakiti. ²⁹ Ininiã omaãtakasaakiri, oarêka iotoka. Iuasaakipeka oimarotari erekape onini.

³⁰ Iuasaakiika Xesosi posotiire sari oamoni. Ininiã ikirioka kãkiti sauaki. Eereka ipimaãna:

–Kipa maãtakatari nimãka? –itxa.

³¹ Iuasaaki imoianariakori apakapapiretari:

–Apiananiri, patamata. Itomaneri kãkiti kinapokopeka, iuaritika pite pimaãri kãkiti: “Kipa maãtakatano?” pitxa –itxana.

³² Iuaritika Xesosi nitari imãka maãtakakari. ³³ Iuasaaki oa sito imarotari erekape onini, ininiã okapotoreêkaua iuamoni. Opïkarauata. Okikinanaka. Eereka osãpiretari ikinika oamianare iuamoni. ³⁴ Ininiã Xesosi txaro:

–Namarite, pite erekapekai uatxa, kotxi pauikari niposotiire. Pisipiniikaua, erekax-nirepekai –itxa Xesosi.

Xáiro Ákero Ôkitikiko
(*Mateo 9.23-26; Arókasi 8.49-56*)

³⁵ Xesosi sãkirauatakasaaki oakata, apanakini Xáiro nitiriakori apoka. Itxari:

–Pamarite !auaika. Opïpeka. Pauiritari Xesosi kanapiriini.

³⁶ Ininiã Xesosi limaãkatari ikara pirena. Itxari Xáiro:

–Kona pipïkarauatape. Pauikano –itxari.

Ininiã ninoa sari Xáiro aapokomoni. ³⁷ Xesosi auiritana Petro, Txiako, Txiako itari Xoão pakini sini iuakata. !Auiritana apanakini sini iuakata. ³⁸ Ninoa apokasaaki Xáiro aapoko, kãkiti iuaãtaã auakani !imarotarina ikamakitina. Ikinipoko kãkiti txiapanãta, akiripoakanãtana. ³⁹ Xesosi ñroã. Itxana:

–Kinirepa iteene hïtxiapanãta? Kinirepa hãkiripoanãta? Amarini !lipina. Oimakanãta –itxa.

⁴⁰ Ininiã inapetarina iua. Ininiã iokanatanana ninoa mapara. Oïri, onoro, Xesosi moianariakori pakini ñroã amarini auiniãtaã. ⁴¹ Imaïkaro ouako. Iuasaaki isãpiretaro oa isãkireê:

–Taritaa komii.

Popïkari sãkireê: “Amarini pökitikaua.” ⁴² Iuasaakipeka oökitikaua. Oñpokota. Oa amarini aua tosi anokanani. Iuasaaki ninoa iteene tsorïkaãta. ⁴³ Ininiã Xesosi paniãtana:

–!Hisãpiretapiri apanakini nimakananitiniro oa.

Apaka ipaniãtana isikakienatiniro oa.

6

Nasaree Auakani Kona Auikari Xesosi Sãkire
(*Mateo 13.53-58; Arókasi 4.16-30*)

¹ Xesosi imoianariakorikata potorika iuaã. Nasaree sitatxitimoni isana. Iuaãtaã mitxi Xesosi aneê. ² Tomatiko ôtisaaki iua oerekari kãkiti aiko Xoteo apotiitiiniãtaãua. Xesosi sãkire kenakotakani tsorïkaãta. Itxana:

–Nanipa apaiaõkarauata, ikara atoko imarotini? Kipa oerekari imarore? Ikamakiti oerekari apiata imarore aua. Kininiãpa ñkora atoko itxa posotiireta? ³ Ate imarotari iua, kotxi aapokotxi kamakari itxaua iua. Maria ãkiri iua. Iua itariakori Txiako, Xosee, Xota, Simão pakini itariakori itxauana. Itaroakoro apaka aua uai, ininiã ate imarotari iua –itxana.

Ikara xika kona ninoa auikari isãkire.

⁴ Ininiã Xesosi txana ninoa:

–Teoso sãkire sãpiretakari paxitaãka, txamari Teoso sãkire sãpiretakari itixineê auakasaaki, iuaã auakani, inirimane, iua aapoko ãki auakani pakini lipaxitari. !Auikarina iua sãkire –itxa.

⁵ Ininiã iuaã kona ikamari iposotiire apiari. Iuako itaka ãtikaka amianatakani nopini, ininiã amianatakani erekapeka itxikitaka. ⁶ Itsorïkaãta, kotxi iuaã auakani ! auikari isãkire. Ininiã iua tãpa isari aapokotximoni. Oerekarauata iuaã. Eereka isari apanakini aapokotxitimoni. Iuaïkana oerekarauata. Itxaãpota iuaãtaã.

Xesosi Iokanatanana Imoianariakori Kākitimoni.

(Mateo 10.5-15; Arókasi 9.1-6)

⁷ Xesosi akiritana imoianariakori tosi pakini. Ipi iokanata ātiātaā, iuaīkana ātiātaā iokanatanana ipi. Ikara atoko iokanaāpotana imoianariakori. Iposotiire isikana ninoa maerekani matamatakoni omitikinina īkapani.

⁸ Itxana:

—Kona minakati hanikape. Hītsonerenoka hanika. Kona hītii, kona auatxi, kona txineiro !hanikape. ⁹ Hīkiti mata hīeretaka. Ātika kasipiri hīmāka hanika. ¹⁰ Sitatxi hāpokasaaki, ātika aapokotxinanirako hāua. Iua sitatxi hāuakasaaki, hīkaikota iua kākiti aapoko. Kona hāuape āti kākiti aapoko. ¹¹ Kākiti mapakapanisaakii, hīsākire imakenakotakanisaakina, ininiā hītakanapana. Hīpotorikasaaki, hīkaxipokari kipatxi hīkiti mataā auakari, ininiā ikara atoko hōerekana ninoa maerekani ininiuana. Kākiti misiritiko sāpiretiko ōti apokasaaki, Sotoma sitatxi auakani misiritiko auapitika. Iuasaaki Komoha sitatxi auakani misiritiko auapitika. Iuaritika sitatxi auakani hīte mapakapani misiritaākako apiata iusaaki.

¹² Ininiā isana. Isāpiretari kākiti imaerekani itakanapini.

¹³ Mirikinini maerekati matamatakoti iokanatanana. Iītxiā itakana amianatakani nopini. Ininiā erekapeka itxīkitakana amianatakani.

Xoāo Kapatxisareri Ipinini

(Mateo 14.1-12; Arókasi 9.7-9)

¹⁴ Auītetxi Erotxi inakori kenakopiretari Xesosi pirena. Xesosi uāka iaripireta ikini tōpati. Ininiā Erotxi xinikanāta:

—Ikara Xesosi, Xoāo kapatxisareri itxaua. Uatxa iua ōkitikapekaua. Iuakara Xesosi itxa. Ininiākara iposotiire aua iuamoni.

¹⁵ Ātikaka uākatari Xesosi Eriasi ininiuana. Ātikaka uākatari Xesosi Teoso sākire sāpiretakari kitxakapirīka ininiuana.

¹⁶ Ikara Erotxi kenakopiretakasaaki, itxari: —Xoāokara nitsotakakiitakitikara iua Xesosi txa. Ipīpekariika iuaīkana ōkitikapekaua —itxa.

¹⁷ Mitxi Erotxi takaro itari Piripi Itanoro. Ouāka Erotxia inakoro. Oa xika Erotxi maīkari Xoāo. Iaxiriītōtari, kateia āki taka itxari. ¹⁸ Xoāo takaāka kateia āki, kotxi itxari Erotximoni: —!Erekari pitari Itanoro pitakini —itxari.

¹⁹ Ikara xika Erotxia apaka omanatari Xoāo. Oa iteene kinirāo okaka otxamari Xoāo. Kona oposotari oōkiniri iua, ²⁰ kotxi Erotxi pīkari Xoāo. Iua imarotari, atāo inakarinoka kamakari, erekarinoka kamakari ininiuana Xoāo. Xoāo sākire ikenakotakasaaki, !iteene !imarotari isākire, iuaritika iua apokaerekatari ikenakotiniri isākire.

²¹ Erotxi kamari isaiā kiiniriti. Iua kemaītxitana sotato auītēakori, Kariréia auakani auītēakori, apanakini auītēakori pakini. ²² Ininiā Erotxia ākero apoka iua kiiniritiā. Iuasaaki oserenapirīkata Erotxi apisatoō, ikemaītxitakini apisatoō pakini. Ninoa potxitari oserenini. Ininiā Erotxi txaro oa ātokoro:

—Pinirekakiti pamanaāno, ininiā nisikai. ²³ Atāo pitikara nisikai pamanaākiti. Nitixine pinirekiniā, ipixini nisikai —txaro.

²⁴ Ininiā oa miteka onoromoni. Oa pimaā txaro onoro:

—Kiripa pamanaātari? —otxaro.

Ininiā onoro txaro:

—“Xoāo Kapatxisareri kii prato nopini ninireka,” pitxari. Ikara atoko pamanaāri iua —otxaro.

²⁵ Ininiā katimariā okanapiriā kiiniri auiniātaā iuaīkana. Katimariā auītēximoni osa. Oamanaāri iua:

—Ninirekari Xoāo kapatxisareri kii prato nopini —otxa.

²⁶ Ininiā Erotxi maerekaxiniretinoka itxa, kotxi mitxi iua sāpiretaro oa amanaākiti isikiniro oa ikemaītxitakini apisatoō. Ininiā ! apakata imasikakaniāri isikaenetakiti.

²⁷ Ininiā katimariā ipaniātari sotatoakori okiniri Xoāo:

—Ikii hīmīna —itxa.

Ininiā isana kateiamoni. Itsotakakiitarina Xoāo. ²⁸ Pirato nopini itakarina ikii, sika itxarona ātokoro. Ininiā oa sikari onoromoni.

²⁹ Ininiā Xoāo moianariakori kenakopiretakasaakiri Xoāo okiko pirena, isana kateiamoni. Aparina iito. Itakarina iito kai iriko āki.

Sīko Mio Kākiti Xesosi Sikakienatini

(Mateo 14.13-21; Arókasi 9.10-17; Xoāo 6.1-14)

³⁰ Ininiā Xesosi iokanatakini kanapiriā iuamoni. Apoka itxana Xesosimoni. Isāpiretarina ikamakitina, oerekakitina pakini. ³¹ Iuasaaki kaiāopokori kākiti aua iuaātaā, ininiā !apakata inipokotinina. Ininiā:

—Amasipeka kākiti mauakaniātaā atomatini ikapani —itxana.

³² Ininiā kanauaā iereētauana. Īpiriātarina ipoa. Isana kākiti mauakaniātaā. ³³ Kākiti itikari Xesosi inapaāpotini, ininiā ninoa miteka. Īopiriārina ipoa koropoa, apoka itxana Xesosi apisapanika. ³⁴ Iua kanīkitakasaaki apisamoni mirikiniti kākiti, ininiā iamoniākana, kotxi soti auite ipitiki mauakiniti atoko itxana. Iuasaaki Xesosi oerekana kaiāori Teoso sāpiretakiti.

³⁵ Ininiā mapiāpeka inaāpotiniā, Xesosi moianariakori iuamoni apoka. Itxarina:

—Kona kākiti aapoko auari uai. Uatxa mapiaāpepeka. ³⁶ Ininiā pipaniātana kākiti isinina ikapani nipokori iamotinina tīkane.

³⁷ Ininiā Xesosi:

—Hitekarako sikakienatana ninoa —itxana.

Ininiā ninoa:

—Pinirekatari asini komiri aamotini ikapani? Oito kasiriti kākiti parīkauatini ĩki anireka komiri ĩki naia kākiti nikini ikapani —itxana.

³⁸ Ininiā Xesosi pimaāna ninoa:

—Kipakinipa komiri katari aua? Hātariko —itxa.

Ninoa imarotakasaakiri, apoka iuamoni. Itxana:

—Sīko pakini komiri katari, ipi ximaki pakini aua —itxarina.

³⁹ Xesosi paniātana ikinika kākiti topākini katsotati nopini. ⁴⁰ Ātiātaā iitopākana sīkoēta, ipinimoni iitopākana seī. Imakinikana ikara atoko itxaāpotana iitopākinina.

⁴¹ Ininiā Xesosi kosekari sīko pakini komiri, ipi ximaki pakini. Iuasaaki ionakaāta iaxiti:

—Erekapitikari pisikakiti —itxa.

Eereka imaxiōpekarī komiri. Isikari imoianariakori. Imoianariakoripekana sikaāpotana apanakini. Iuaīkana imapirinikari ximaki, xanaka itxari imakinikana. ⁴² Ikinimanekana nipokota, kamitopeka itxana. ⁴³ Ininiā imoianariakori apotiitari ximaki itetakori, komiri itetakori pakini. Tosi pakini kotari xāpoka itetakori. ⁴⁴ Iuasaaki sīko mio kikiakori nipokotakani.

Xesosi Ipoa Nopini Itīpokotini

(Mateo 14.22-33; Xoāo 6.15-21)

⁴⁵ Xesosi takapiretakasaakiri kākiti, iuasaaki iokanatana imoianariakori Īpiriātinina iua apisa, Petsāita tixinimoni isinina ikapani. ⁴⁶ Xesosi takapiretanapaka atoko, mitaxiratari nopini isa Teoso imisākiretini ikapani. ⁴⁷ Mapiāpe inakasaaki kanaua ipoa apanikakiāxitipeka aua. Iuasaaki Xesosi imiriīpanika aua.

⁴⁸ Xesosi atamatana ninoa, itapananoka itxana imekoātinina, kotxi ĩtima, tsakati pakini anikaāpotana ninoa. Ininiā ikatimaāpotakasaaki, Xesosi apokaāpota ninoamoni. Itīpokota ipoa nopini. Inapaāpoaritana imolanariakori. ⁴⁹ Ininiā ninoa atapakasaakiri ipoa nopini itīpokotini, ninoa uākatari kamiri. Ininiā ninoa akiripoakata. ⁵⁰ Ininiā iua misākiretana:

—Kataparaxinire hitxako. Notakara. Na ihīpikarauatape —itxana imoianariakori.

⁵¹ Eereka kanauaā iereētaua. Iuasaaki ĩtima iotoka itxa. Ininiā itikokitatana ninoa. Itsorīkaātana:

—Kiripa atxiīti? —itxana.

⁵² Ikara atoko isākirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

Xesosi Makananitana Amianatakani Xenesareekini

(Mateo 14.34-36)

⁵³ Xesosi imoianariakorikata Īpiriātari ipoa. Isari Xenesaree tixinimoni.

⁵⁴ Ikanīkitakasaakina apanakini itikari Xesosi.

—Xesosira —itxana.

⁵⁵ Ininiā imitekana kākiti auinimoni amianatakani apinina ikapani. Anikana isiritatana nopini Xesosimoni. ⁵⁶ Ikini sitatxiti kākiti amianatakani sirīka kimapori tiniāpo. Amanaārina Xesosi auiritinina ninoa imāka itikakinina. Ikinikana imāka tikakakani erekapeka itxīkitaka.

7

Xoteakori Īkite Pirena

(Mateo 15.1-9)

¹ Ininiā pariseakori, kaiōkatsopareriakori pakini, Xerosareē ĩkani, apotiitaua Xesosikata.

² Iuasaaki itikarina Xesosi moianariakori marokapiotakanuia nipokori inikinina apisa. Ininiā itxana:

—!Erekari imarokapiotakaniauana —itxana.

³ Pariseoakori, imakinikana Xoteoakori apaka kamari ikiomaneakori kitxakapirīkarini sākire iaōka. Inipokotinina apisapanika arokapiotauana.

⁴ Nipokori amotikoātaā Xoteoakori sikasaaki, eereka apokasaakina aapokona imaroka-piotakaniūana kona inipokotana. Tiitxi iākoanatxi, kopiti, apanakini itiina pakini arokasaakina ikiomaneakorini oerekakiti iaōka arokana.

⁵ Ininiā pariseoakori, kaiōkatsopareriakori pakini pimaāri Xesosi:

—Kinirepa pimoianariakori kona kamatarī kitxakapirīka atoko ininina? Kinirepa marokapiotakanikaua inikarina nipokori? —itxarina.

⁶ Ininiā Xesosi apakapapireta:

—Mītxipitipanika Isaia sāpiretai hīte. Atāo iua sākire, kotxi hīsākire atxiīti erekari, txamari kona hīkamari hīsākire iaōka. Iua txari:

Kamisirienenerini ninoa kākiti. Ninoa sākireēnanira ipaxitanona. Ākixinireēna !inirekanona.

⁷ Maxikatīka ninoa kapotoreēkaua nota apisatoō. Maxikatīka ninoa txano: “Ateosone pitxaua,” kotxi ninoa !oerekari nota sākire. Ninoaka sākire oerekana, txamari “Teoso sākire asāpiretai” itxana.

Ikara atoko Isaia iōkatsopatakiti Teoso sākire.

⁸ —Ininiā hītakanapapekari Teoso sākire, kākiti oereēkiti hīkamini īkapani. ⁹ Hītakanapapakari Teoso paniātakiti, hinirekaākiti hīkamini īkapani. ¹⁰ Kitxakapirīka Moisesi txari:

Pipaxitariko piri. Pipaxitaroko pinoro. Piri, pinoro pimisākirepiretiniā, pokaākako, itxa Moisesi sākire. ¹¹ Txamari hīte oerekari kākiti: “Kākiti auakiti iri, inoro pakini nirekiniā, iua manirekakaniāri isikiniri ninoamoni, isāpiretana: ‘Ia nota auakiti nisika Teosomoni.’” Ininiā !sikari ninoa nirekakiti ninoamoni. Ikara atoko inakari kākiti sikakiti Teosomoni, hīte takauākatari “Kopaā.” ¹² Ininiākara hōerekari kākiti imatiretakanina iri, inoro pakini. !Apakata hōerekakiti. ¹³ Ikara hōerekakiti xika kona hīte maākatari Teoso sākire. Apiata hinirekari kākiti oereēkiti. Auapanika itori hōereēkiti sākiretxiti ikara atoko inakari —itxa Xesosi.

*Ākixiniretxi Txiko Pirena
(Mateo 15.10-20)*

¹⁴ Xesosi iuaīkana akiritana ikinimane kākiti. Itxana:

—Hīkinika hīkenakota. Hītakaōtxikariko nisākire. ¹⁵ Imakinika hinikakiti, mapara auakari. !Ikamari ate maerekani. Hīxinireē potoriākarira kamari maerekanitxi. ¹⁶ Kakenakokii, ininiā hīkenakotariko nisākire —itxa Xesosi.

¹⁷ Ikinimane kākiti itakanapaka atoko, aapokotxi āki īroā. Iuasaaki imoianariakori pimaāri:

—Pisāpiretaua mixikanani pisāpiretakiti —itxana.

¹⁸ Ininiā iua txari:

—! Kīkīte hīte. Kona hīte imarotatari hinamaā īroākari kona kamari maerekanitxi.

¹⁹ Kotxi īroākari lisari hīxiniremoni. Hītikako āki isa. Iposo atoko hītikatakasaaki inapa. Ikara atoko ininiā, erekari ikinipoko kākiti niākiti.

²⁰ —Ixinireē potoriākari iuara kamari kākiti maerekani. ²¹ Kākiti ākixinire ipotorika ixinikakiti maerekati, anokaretxi, itiriuataktxi, okaniuataktxi, āti kākiti itanorokata isirīkini nire pakini. ²² Kākiti ākixinireē ipotorika itrenani, maerekati Satanasi oerekakiti, misirieneretxi, pētauataktxi kamakari, xikotaktxi, āti misākirepiretiko, iuikiniua, mīkiteti inini pakini. ²³ Ikinika ikara maerekati kākiti ākixinire auakari txikotarī kākiti xinire —itxa Xesosi.

*Xoteo Minakatoua Auikiniri Xesosi Sākire
(Mateo 15.21-28)*

²⁴ Xenesaree tixini Xesosi potorika. Txiro sitatxiti tōpa, Sitoō tixini pakinimoni isa. Iuaā kākiti aapoko īroā. Kona inirekari kākiti imarotiniri iua auiniātaā. Txamari ! iposotari iomaātiniaua. Kākiti imaroāpotari iua auiniātaā. ²⁵ Sito apoka Xesosimoni, kotxi oa kenakopiretari Xesosi pirena. Maerekati matamatakoti auāitotaro oimi. Oāpokasaaki Xesosimoni, okapotoreēkaua iua apisatoō.

²⁶ Oa sito sākiretari Kreko sākire. Āto uāka oa. Siropenisia tixinikero oa. Okapotoreēkasaakiaua Xesosi apisatoō, oamanaāri Xesosi:

—Pomitikenatariko maerekati matamatakoti namarite itōā auakari —otxari.

²⁷ Ininiā Xesosi:

—Xoteo !pitxaua. Maparakerorai. Pite nirekakari nisikinii Xoteoakori nakiti. Amarini mitxi nikini atāo. !Erekari nokiniri amarini kiena anāpamoni —itxaro oa.

²⁸ Oa apakapapireta:

—Atāopitikara ikara atoko pitxa, kotxi nota maparakero, anāpa atoko Xoteoakorimoni. Iuaritika kākiti auiritari anāpapiki nikiniri nipokori katxakakari amarini nipokotiniātaā patapi —otxari Xesosi.

²⁹ Ininiā Xesosi apakapapireta:

—Erekari papakapapiretini, ininiā paapokomoni pisa. Maerekati matamatakoti !auaika pamarite itōā —itxaro.

³⁰ Oaāpoko oāpokasaaki, oāpokaro oamarite sirīkanāta. Erekapekaro oa. Maerekati matamatakoti asikapekaro.

Makenakoreti Pirena

³¹ Eereka Xesosi takanapari Txiro sitatxiti tōpa. Īpirixititari Sitoō tixini. Sitatxi tōpa tesi pakini Īpirixitita. Apoka Karirēia poamoni. ³² Ātikaka kākiti minari makenakoreti Xesosimoni. Iposota atāo isākirauatini. Ninoa iteene amanaāri Xesosi:

—Piuako pitaka iua nopini kakenakorepeka inini ĩkapani —itxana.

³³ Xesosi anikari iua kiki kākiti mauakaniātaā. Itakari iuakoki ikĳipita āki. Eereka ikiisoka, taka itxari tenemaā masākireti nini nopini. ³⁴ Eereka ionakaāta iaxiti, oōka itxa:

—Epataa —itxa.

Popĳikari sākireē, “Piauāka.” ³⁵ Iuasaakipeka ikenakoki auāka, ininiā kakenakorepeka itxa. Iuasaaki inini poiōpeka apaka. Eereka erekapeka itxa isākirauatini. ³⁶ Ininiā Xesosi txana ninoa:

—Kona hīsāpiretapiri apanakini nimakananitiniri iua.

Txamari apiata ninoa sāpirenauata. ³⁷ Kākiti tsorĳkaāta:

—Ikinika ikamakiti peerekari. Makenakoreti kakenakorepeka itxa. Mimatāsākiretakati, kasākirepeka itxa —itxana.

8

Xesosi Sikakienatana Ipi Ipi Pakini Mio Kākiti

(Mateo 15.32-39)

¹ Eereka mapaōti itomaneri kākiti apotiitaua Xesosimoni. Nipokori xipokapeka, ininiā Xesosi akiritana imoianariakori. Itxana ninoa:

² —Nota amonĳkana naia kākiti, kotxi ipi ōti, āti ōti pakini ōtiipeka auana notakata. Ininiā uatxa nipokori !auaika. ³ Niokanatinĳana auinimoni manipokotakatipānikana, ininiā ipixiniāpo iōkapetana. Irikana. Ātikaka ōtako ĩkani kona apakata manipokotakanika isinina —Xesosi txana imoianariakori.

⁴ Imoianariakori apakapapireta:

—Uai aapokotxi mauakaniātaā, ininiākara nāpa aāpokari nipokori ito naia kākiti asikakienatini ĩkapani? —itxana.

⁵ Ininiā Xesosi:

—ĳipakinĳpa komiri katari hĳtemoni aua?

—Setxinokara komiri aua atemoni —itxana.

⁶ Ipaniātari kākiti topākini ixiti. Imaĳkari iua komiri setxi.

—Erekari pisiākiti —itxari Teoso.

Iposo atoko imaxiōpekar komiri, sika itxana imoianariakori. Imoianariakori sika itxana apanakinimoni. ⁷ Ninoamoni aua ātikaka ximaki axapitiri. Ininiā Xesosi txari:

—Ia erekari —itxa Teosomoni.

Eereka ipaniātana imoianariakori sikiniri kākitemoni. ⁸ Ininiā ikinipoko kamitopeka itxana. Iposo atoko apotiita itxarina itetakori. Xāpokaka itxarina setxi kotarina. ⁹ Ninoa komiri nĳkakani ipi ipi pakini mio kākiti. Kamitopeka itxana.

Ininiā itakapiretanapana ninoa. ¹⁰ Iposo atoko imoianariakorikata iereētaua kanauā āki. Taomanota tōpamoni isana.

Pariseoakori Nirekari Xesosi Oerekiniri Iposotiire

(Mateo 12.38-42; 16.1-4; Arōkasi 11.29-32)

¹¹ Pariseoakori apoka Xesosimoni. Inirekarina Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aātaminiri ĩkapani, Teoso iokanatinĳ ĩkorapokoriti aimarotini ĩkapani —itxarina. ¹² Ininiā Xesosi oōka. Itxari:

—ĳinirepa kākiti uatxarini nirekari noerekiniri Teoso takaōtxikare, iposotiire? Atāopitikara nota txai hĳte, kona noerekai hĳte.

¹³ Ininiā itakanapana. Iereētaua kanauā āki. Ikanapiriā ipoa ipiniāmoni iuaĳkana.

Pāo Tireēkari Pirena

(Mateo 16.5-12)

¹⁴ Xesosi moianariakori maxinĩkaretari pão. Ātika pão porii kanaua āki aua. ¹⁵ Ininiã Xesosi õtãkikana:

—Erepaniko, pamonõkoniri pariseoakori, Erotxi pakini pãote tireẽkari —itxa Xesosi.

¹⁶ Xesosi moianariakori misãkiretakakaua:

—Ikara atoko itxaua, kotxi amaxinĩkaretari pão.

¹⁷ Xesosi imarotari ninoa sãkire, ininiã itxana:

—Kinirepa hĩsãkirauanãta pão mauakani xika? Kona himarotatapanikari niposotiire? Kona hĩikitetapanikari? Kona hinirekatari hãuikiniri nisãkire? ¹⁸ Kokimai, txamari, ! hãtamatar. Kakenakokimai, txamari !hĩkenakotari nisãkire. ¹⁹ Kona hĩxinikapanikari iuasaaki nimaxiõpekitakiti siko komiri, siko mio kãkiti nisikakienatini? Kipakinipa kotari itetakori hĩxãpokaka? —ipimaãna.

Ininiã ninoa apakapapireta:

—Tosi kotari axãpokaka.

²⁰ Xesosi txana ninoa:

—Eereka āti õti nimaxiõpekar setxi komiri porii. Nisikari ipi ipi pakini mio kãkiti. Itetakori hãpotiitakiti, kipakinipa kotari hĩxãpokaka? —ipimaãna.

Ininiã ninoa:

—Setxi kotari axãpokaka.

²¹ Ininiã Xesosi:

—Ininiã kinirepa kona hĩikitetapanikari?

Mõsiãreti Petsãita Aapokotxitikiri

²² Xesosi Petsãita aapokotxitimoni apoka. Iuasaaki kãkiti minari mõsiãreti iuamoni. Amanaãrina Xesosi maãtakiniri iua mõsiãreti. ²³ Ininiã iua anikaãpotari iuakoã kãkiti mauakanimoni. Iuaã iminapari ienemaã mõsiãreti okiã. Eereka taka itxari iuako iũtoã. Ipimaãri iua:

—Kõsiãrepekai? —itxari.

²⁴ Ininiã iua atamata.

—Nota itikapokotapeka, txamari nitikari kãkiti tĩpokotakari aamina atoko —itxa.

²⁵ Iposo atoko Xesosi iuaĩkana takari iuako mõsiãreti nopini. Eereka mõsiãreti atão itikapokotapeka. Ikinipoko atamata. ²⁶ Ininiã Xesosi iokanatar:

—Pisipeka paapokomoni. Kona pisipe Petsãita aapokotxitimoni, kotxi kona ninirekari pisãpiretiniri nikamakiti kãkitimoni —itxa Xesosi.

Petro Auikari Xesosi Teoso Mereẽkiti Ininiãua

(Mateo 16.13-20; Arókasi 9.18-20)

²⁷ Eereka Xesosi imoianariakorikata sari kãkiti poiãoka auinimoni, Sesaréia-Piripi sitatxiti takete isana. Ipxiniãpo Xesosi pimaãna imoianariakori:

—Kiripa kãkiti uãkatano nota? —itxa.

²⁸ Ninoa apakapapireta:

—Xoão kapatxisarerer iuãkataina. Apanakini “Erías inakori” iuãkataina. Ininiã apanakini “Teoso sãkire sãpiretakari” iuãkataina —itxana Xesosi moianariakori.

²⁹ Iuaĩkana Xesosi pimaãna:

—Hĩtepekana, kipa hĩte uãkatano? —itxana.

Ininiã Petro apakapapiretari:

—Teoso mereẽkiti, kãkiti iãtapanãtakiti pitxaua —itxari.

³⁰ Ininiã Xesosi txana imoianariakori:

—Teoso mereẽkiti nininiua !hĩsãpiretapiri apanakini —itxa.

Xesosi Sãpiretari Ipinini

(Mateo 16.21-28; Arókasi 9.22-27)

³¹ Ininiã ia atoko oerekarauata:

—Nota hĩtari iaxitikiri iteene atatsiirauatako. Kiomãtxiakori, sasetotxi auĩteakori, kaiõkatsoparerini pakini kona nirekapanino nota. Nokaãkako. Eereka ipi āti pakini õtisaaki iuaĩkana nõkitikauako.

³² Ikara isãpireta ikinimane kãkitimoni. Ininiã Petro anikari iua maparamoni. Itxari:

—Kona ikara atoko !pitxape. Kona erekari pisãkire ikara atoko pinini —itxa Petro.

³³ Ininiã Xesosi kirioka imoianariakorimoni. Iua txitari Petro:

—Pisipiniikaua Satanasi. Pite nireẽkiti kãkiti nireẽkiti atoktxikana. Pite nireẽkiti kona Teoso nireẽkiti atokoni —itxa Xesosi.

Xesosi Moianari Atão Inakari

(Mateo 16.24-28; Arókasi 9.23-27)

³⁴ Xesosi akiritana kãkiti imoianariakori apaka. Itxana ninoa:

—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiritaākako. Ia atoko pinirekiniā, notakata pisapitakako. ³⁵ Pite ātipirika kaminiāri piteka nireēkitinoka, ininiā pinireēkiti xipokapitakako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata.

³⁶ Atxiiti papakapari ikinipoko tiitxi, ikini itixiti auakani tii, pinakiti ikapani. Atxiiti iua tiitxi xika kona pikipitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiiti ikinipoko tiitxi auini? Konapitini. Apiaerekata Teosokata ātipirika pikaikotini, kotxi tiitxi iki poiāoka, pixinire karone apiata. ³⁷ !Apakata kākiti iikitxitiniri Teoso, iuamoni isini ikapani.

³⁸ Īkorasaaki kākiti !inirekari Teoso. Inirekari maerekatinoka. Īkorasaaki pipētatiniano nota, pipētatiniani nota sākire, ininiākara nota kākiti itari iaxitikirino pētataiko pite, uai nikanapiriākasaaki. Nikanapiriākasaaki, niri iotximere aua notamoni. Nina niri nitiriakorikata, erekarinikata.

9

¹ Xesosi txana ninoa:

—Hixinikariko ia nisākire. Apanakini hite uatxa uai auakanii, hīpinini apisapanika himarotari Teoso auitexi ininiāua. Auitexi kaposotiireri itxaua —itxa Xesosi.

Moisesi, Eríasi Pakini

(Mateo 17.1-13; Arókasi 9.28-36)

² Seisi pakini ōti napaka atoko Xesosi anikana Petro, Txiako, Xoāo pakini oxiratarimoni, mitaxiratarimoni. Iuasaaki ninoanani aua iuaā. Iuaā auakasaakina, Xesosi ito ipinipo itxa.

³ Imāka kasarori itxaua. Iotximere apaka auari. Ikara imāka saro atoko inakari, !auari. Kākiti iteene arokiniāri mākatxi, iuaritika ikara isaro atoko !auari. ⁴ Iuasaaki Eríasi, Moisesi pakini tokiā iuaā. Isākirauatana Xesosikata. ⁵ Ininiā Petro txari Xesosi:

—Koerekareri, erekapititari uai aūuini. Makamari papiri ipi āti pakini, pite ikapani, Moisesi ikapani, Eríasi ikapani —itxa.

⁶ Ikara atoko itxa Petro, kotxi !imarotaikari isākire, iteene ipīkarauatinia.

⁷ Iuasaaki katxiāri apoka ninoamoni. Katxiāri āki auana. Katxiāri āki Teoso txari:

—Ere namarite, nitiretakiti. Hīkenakotariko iua sākire —itxa.

⁸ Katimaritika Xesosi moianariakori sapotorika. Itikapokotana. Mitxi Xesosikata sākirauatakani !auaika iuaā. Xesosinokara kaikota ninoakata.

⁹ Ōtanoxirataro iokiriiāpotakasaakina, Xesosi txana:

—Mixikanani hītikakiti !hīsāpiretapiri apanakini. Nota hītari iaxitikiri nipinaka atoko iuaikana nōkitikaākaua atokoikarako, hīsāpiretariko mixikanani hītikakiti —itxana.

¹⁰ Ininiā !isāpiretarina apanakinimoni. Ninoanoka isākirauanātana:

—Natokopa itxa kākiti ipīkaripeka iuaikana ōkitikiniāua —itxanātana.

¹¹ Ipimaārina Xesosi:

—Kinirepa kaiōkatsoparerini sākire: “Teoso mereēkiti apokini apisapanikarako Eríasi apokako.” Kinirepa ikara atoko itxana?

¹² Ininiā Xesosi:

—Inipitikara Eríasi apoka merepanika, kākiti iposope inini ikapani. Teoso sākire iōkatsopataro txari: “Kākiti itari iaxitikiri iteene atatsiirauatoko. !Inirekaākako.” Kinirepa ikara atoko itxa Teoso sākire iōkatsopataro? ¹³ Nisāpiretaiko Eríasi apokapeka. Kākiti misiritapekari iuani. Inireēka iaōka imisiritarina. Teoso sākire iōkatsopataro sāpiretipekari ikara ene —itxa Xesosi.

Amarini Maerekati Matamatakoti Auaītotakiti

(Mateo 17.14-21; Arókasi 9.37-43a)

¹⁴ Ninoa apokaāpotakasaaki apanakini imoianariakorimoni, atamatana kākikipokoni. Ninoā ākitana Xesosi moianariakori. Iuasaaki kaiōkatsoparerini kākitikata itaparakiēnetakakaua. ¹⁵ Iuasaaki kākiti atapari Xesosi. Ipoxoniritikana itxana:

—Xesosi napani.

Ininiā imitekana iuamoni, okapireta itxarina:

—Piteni?

¹⁶ Ininiā Xesosi:

—Ari, notara.

Ipimaāna:

—Kininiāpa hītxitakakaua? —itxa.

¹⁷ Ininiā kiki kākiti sauaki auakari apakapiretari:

—Nota minamari namarite pitemoni. Maerekati matamatakoti auañtotari iua. !Auiritari namarite säkirauatini. ¹⁸ Iua maĩkasaakiri, okañtotari iua xiti. Iuasaaki namarite sorikipeta. Akatsaksatsiriñtaua. Itorõkañtota. Ininiã nimisäkiretamana pimoianariakori omitikiniri maerekati matamatakoti, txamari ninoa !iposotari.

¹⁹ Xesosi txari:

—! Kauikarei hñte. Maerekati kamakanii hñte. Kipakinikananipa Teoso nirekatari hñtekata nauini? Kipakinikananipa Teoso nirekatari hñte nimñteenekini? Himinari amarini notamoni —itxana.

²⁰ Ininiã ninoa anikari iua amarini Xesosimoni. Iuasaakipeka maerekati matamatakoti atamatarari Xesosi. Iuasaakipeka maerekati matamatakoti txĩkitakari amarini okaratiniua. Ininiã iua amarini iriãkata. Ikanapirikata, isorikipekata, itxĩkitakari amarini. ²¹ Xesosi pimaãri iri:

—Kirisaaakipa ipotorika ñkora atoko inini?

—Axapitipanikara ipotorika ñkora atoko inini. ²² Itokata maerekati matamatakoti okañtotari xaminamoni. Itokata okañtotari kãuaãrimoni. Inirekari okiniri iua. Piposotiniãri, pomitikariko maerekati matamatakoti. Piamonñkauako atepaniko —itxa iri säkire.

²³ Ininiã Xesosi:

—Nota posotatari? Teoso säkire auiãkari posotari ikaminiri ikinika —itxari.

²⁴ Iuasaaki iua kiki apakapapiretari iãsaritika:

—Nauikapitikari piposotiire. Axapitikinoka !nauikari, ininiã pisikaposotiiretano iteene pisäkire nauikini ñkapani.

²⁵ Isãkirauanãtakasaakina, kãkitipokoni miteẽkata ninoamoni Xesosi kamakiti imarotiniua ñkapani. Ininiã Xesosi itapararitika txitari maerekati matamatakoti:

—Pite maerekati matamatakoti. Pitxĩkitakari kãkiti masäkireti inini. Pitxĩkitakari kãkiti makenakokiti inini. Nota omitikai pite. Pipokĩka. Iuaĩkana !pñiroãpinikako iua itoã —itxa Xesosi.

²⁶ Iua maerekati matamatakoti akiripoakata. Okarañtotakari atoko, sipe itxa. Iua amarini ipĩkari ñto atokopeka itxa. Ininiã apanakini kãkiti:

—Ipĩpeka —itxarina.

²⁷ Ininiã Xesosi maĩkauakotari. Õkitikari iua, ininiã itima.

²⁸ Xesosi aapokotxi ãki auakasaaki, iuanoka inakasaaki, imoianariakori pimaãri:

—Natokopa ininiãpa kona ate posotatari maerekati matamatakoti aomitikini? —itxana iuamoni.

²⁹ Ininiã Xesosi:

—Teoso pimisäkiretakasaaki, iuasaaki pimanipokotakanianãra, iuasaaki piposotari ikara atoko inakari maerekati matamatakoti pomitikini —itxa Xesosi.

Xesosi Iuaĩkana Sãpiretari Ipinini

(Mateo 17.22-23; Arókasi 9.43b-45)

³⁰ Iuaã ipotorikana. Ñpirixitarina Kariréia tõpa. Xesosi !inirekari apanakini kenakoene-tiniri iua auiniãtaã. ³¹ Kotxi inirekari oerekinina imoianariakorinoka ipinini pirena. Ininiã Xesosi:

—Nota hñtari iaxitikiri mñkapiritaãkako. Nisikaãkako kikiakorimoni inirekaãkitina ikaminina tñkane. Ninoa okano nota. Ipi õti ãti õti inakasaaki iuaĩkana nõkitikauako —itxa.

³² Ninoa !imarotari Xesosi säkire. Ninoa pĩkari ipimainirina iua.

Kiripa Kãkiti Apiatakari Txataua?

(Mateo 18.1-5; Arókasi 9.46-48)

³³ Kapanaoõ sitatxiti apokana. Aapokotxi ãki auakasaakina, Xesosi pimaãna ninoa:

—Natokopa itxa hñsäkire, uaimoni aĩkasaaki hñtaparakienatakasaakiaua? —itxa.

³⁴ Masäkirenika itxana, kotxi kimaporianõ ninoa säkire: “Ñkiripa ate apiatakari?” itxana.

³⁵ Xesosi, iitopãka atoko, akirita itxana imoianariakori tosi pakini.

—Hĩkinika uaimoni hñttopãka. Apiatakari pininiãua pinirekiniã, piteka poiãotakaua. Ikinimane nitiri pitxauako.

³⁶ Xesosi kosekari amarini, mina itxari imoianariakori sauaki, katarata itxari.

³⁷ —Papakapiniãri amarini pipoxokoniritika, papakapano nota apaka. Papakapiniãno nota, na notananini papakapa. Iuasaaki papakapari iua uaimoni niokanatakiri —itxa Xesosi.

Maerekani Matamatakoni Omitiãkari

(Arókasi 9.49-50)

³⁸ Xoão sãpiretari Xesosi:

—Koerekareri, ate kenakotari kiki omitikinina maerekani matamatakoni pite uākaā. Kona pimoianarini iua. Ininiā ate: “Ikara atoko !pitxape,” atxari.

³⁹ Ininiā Xesosi:

—! Hīotokakapiri ikara ikamini. Kākiti nota uākaā maerekati matamatakoti omitiākari, kona imisākiireporetano. ⁴⁰ Iua ate mokaiaikari minakatiua. Atiretakiri itxaua. ⁴¹ Nota atāopitikara nitxai hīte. Atxiiti kākiti sikai āparaā, kotxi Teoso mereēkiti nakiti pitxaua. Iua kamakiti erekari, ininiā apakapapitikariko ikamakiti iki.

Maerekati Oerekakari

(Mateo 18.6-9; Arókasi 17.1-2)

⁴² ! Erekari kākiti mitari oerekiniāri amarini nota sākire auīākari maerekati ikamini. ! Erekari. Erekamariko kai mitari iaxirikaākamako iua kākiti mitari nokiā, eereka okaākamako ipoamoni ipinini ikapani. ⁴³ Piuako maerekati ikamākitakiniāi, pitsotakari. Erekamariko ātinani piuako Teosokata ātipirika pauini ikapani, kotxi maerekati pikaminiā, pisa maerekani misiritikoātaā. Iuaā xamina tirinapika. !Oakaāka. Atxiiti piuako ipi aua, txamari pite sari iuaātaā. !Erekari. ⁴⁴ Iuaā kītxi piītoā auakaro !opina. Xamina !oakaāka. ⁴⁵ Pikiti maerekati ikamākitakiniāi, pitsotakari. Erekamariko ātinani pikiti Teosokata ātipirika pauini ikapani, kotxi maerekati pikaminiā, pisa maerekani misiritikoātaā. Iuaā xamina tirinapika. !Oakaāka. Atxiiti pikiti ipi aua, txamari pite sari iuaā. !Erekari. ⁴⁶ Iuaā kītxi piītoā auakaro !opina. Xamina !oakaāka. ⁴⁷ Poki maerekati ikamākitakiniāi, pimakatxakari. Erekamariko ātinoka poki auini Teoso auītetxi ininiātaāua pisini ikapani, kotxi maerekati pikaminiā pisa maerekani misiritikoātaā. Iuaā xamina tirinapika. !Oakaāka. Atxiiti poki ipi aua, txamari pite sari iuaā. !Erekari. ⁴⁸ Iuaā kītxi piītoā auakaro !opina. Xamina !oakaāka.

⁴⁹ Iōkira nipokorimoni takiko atokokana xamina tirinakari takaākako ikinimane kākitimoni. Ikara atokokana ikinimane ataerekataākako. ⁵⁰ Iōkira erekaro. Txamari iōkira koketikosaaki kipatxikata, !erekaikaro. !Apakata xinitxi piōkiratini ikapani. Atāo iōkira atoko hītxako. !Hītxitakapeua.

10

Kiki Ītanorokata Itakanapakakini

(Mateo 5.31-32; 19.1-12; Arókasi 16.18)

¹ Xesosi potorika iuaā. Xotēia tōpa isa. Īpiriākitari Xotāo kāuaāriti. Iuaīkana kākiti apotiitaua iuamoni. Kaiāopokori kākiti, ininiā oerekarauata, mitxi oerekarauanātini atokokana.

² Kikiakori, pariseo inakanuia, apoka Xesosimoni. Ninoa nirekari Xesosi kerokiniri isākire, ininiā ipimaārina:

—Atāokani erekari kiki takanapiniro Ītanoro?

³ Ininiā Xesosi:

—Kiatokopa itxa Moisesi paniātakiti?

⁴ Ininiā ninoa:

—Moisesi paniātari kiki iōkatsopatiniri aātsopa, Ītanoro itakanapini aātsopate, ininiā eereka auiritari iua iokanatiniro oa —itxana.

⁵ Ininiā Xesosi:

—Moisesi auiritai hītanoro hītakanapini, kotxi paikori hīxinire. Teoso nireēkiti hīmanirekakani xikara, Moisesi auiritai hītanoro hītakanapini. ⁶ Kotxi merepitipanika Teoso ikinipoko ikamakasaaki, ikamari kiki, sito pakini. ⁷ Ikara atoko ininiāpitikara, kiki takanapari iri, inoro pakini, Ītanorokata auini ikapani. ⁸ Ininiā ātika atoko itxauana. Ininiā ipi kākiti ! itxaikauana. Ātinokara itxapekauana. ⁹ Ikara atoko ininiā, terekari kākiti kaiarikiniri Teoso apotiitakini —itxa Xesosi.

¹⁰ Eereka Xesosi imoianariakorikata kanapiriā aapokomonina. Iuaā apokasaakina, imoianariakori pimaāri iua ikara sākiretxiti iuaīkana oerekinina ikapani. ¹¹ Ininiā isāpiretana:

—Kiki Ītanoro takanapakari, āto sito itaka inakari, maerekati ikaminaro Ītanoro. ¹² Iua atokokana sito ōtanari takanapakaro, āti ōtanirita inakaro maerekati okaminiri ōtaniri —itxa Xesosi.

Xesosimoni Amarini Apokini

(Mateo 19.13-15; Arókasi 18.15-17)

¹³ Iposo atoko ātikaka kākiti anikari amarini Xesosimoni. Inirekarina Xesosi misākiretiniri Teoso ninoa amarini ikapani. Txamari imoianariakori txitana. ! Auiritana amarini anikinina Xesosimoni. ¹⁴ Xesosi ikara ikenakotakasaaki, !apokaerekatari. Ininiā iua:

—Hāuiritariko amarini notamoni apokini. !Hīotokakapiri, kotxi kākiti Teoso auītetakani amarini atoko itxauana. ¹⁵ Ia atāo: Kākiti mapapakapaniāri Teoso, amarini apakapiniri atoko iminakaniā, kona isa Teoso auītetxi ininiātaāua —itxa Xesosi.

¹⁶ Ininiā Xesosi kataratari amarini. Itakari iuako ikiina nopini. Amanaāri Teoso erekari itakini amarininimoni.

Ātokori Ito Txineiroteri

(Mateo 19.16-30; Arókasi 18.18-30)

¹⁷ Xesosi iuaīkana potorika. Iuasaaki ātokori miteka iuamoni. Ikapotoreēkaua Xesosi apisatoō.

—Koerekareri erekari, kiripa nikama Teosokata ātipirika nauini īkapani? —itxa.

¹⁸ Ininiā Xesosi:

—Kininiāpa “erekari” pitxano? Teosonanira erekari. ¹⁹ Pite imarotari Teoso paniātakiti. !Pokaniuatape. !Pisiriāke āti ītanorokata. !Piitiriuatape. Poxiene !pikamape. Apanakini !pimisirienetape. Piri, pinoro pakini pipaxitako —itxa Xesosi.

²⁰ Iua ātokori txari:

—Noereēkiri, axapitipanikara ninakasaaki, nikīpitari ikara Teoso paniātakiti —itxari.

²¹ Ininiā Xesosi apokaerekatari iua.

—Auapanika ātinoka pikamini tikane. Pisa. Tiitxi ikinika pinakiti pivētxitako. Txineiro papapakakito pisikako matxineirotenimoni. Eereka pimoianatanoko nota. Ikara atoko inakari pikaminiā, Teoso tixine papokasaaki ikinipoko erekari auniiko pite —itxari iua.

²² Ikara Xesosi sākire ikenakotakasaaki, imatinaniuata. Isipe. Maerekaxiniretinoka itxa, kotxi kaiāori itii.

²³ Xesosi sapotorika, misākireta itxana imoianariakori:

—Pamimapaniri katxineiroteri sini Teoso auītetxi ininiātaāua —itxa.

²⁴ Imoianariakori:

—Anekani? —itxana.

Iuaīkana Xesosi txari:

—Pamimapaniri katxineiroteri sini Teoso auītetxi ininiātaāua. ²⁵ Atauako kamero napatari ākorike sonakiā? Apia mimari kākiti katxineiroterini auītetiniri Teoso —itxana.

²⁶ Imoianariakori iteene tsorīkaānāta.

—Ininiā kipa sari Teoso auītetxi ininiātaāua? —itxana imoianariakori.

²⁷ Ininiā Xesosi apakapapiretana:

—Teoso posotari ikinipoko ikamini. Kākiti !liposotari. Teoso posotari anikiniri katxineiroteri itixinemoni —itxa.

²⁸ Petro txari:

—Ate takanapapekari ikinipoko pite amoianatini īkapani —itxari Xesosi.

²⁹ Ininiā Xesosi:

—Atāo nitxai. Paapoko pitakanapiniā, pitariakori, pitaroakoro, piri, pinoro, pītanoro, pamariteni, pikikiote, pitakanapiniā notakata pisini īkapani, Teoso iokanapirena erekari pisāpiretini īkapani, ³⁰ pitakanapakiti iua apiata nisikaiko. Īkorasaaki nisikaiko itomaneri aapokotxi, itomaneri pitariakori, itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari iuasaaki patatsiitari pimisiritiko. Iuaritika eereka Teosokata pauapika ātipirika. ³¹ Uatxa apiari inakari, iuasaakiko minakati itxauako. Uatxa minakati inakari, iuasaakiko apiari itxauako —itxa Xesosi sākire.

Iuaīkana Xesosi Sāpiretari Ipinini

(Mateo 20.17-19; Arókasi 18.31-34)

³² Xesosi imoianariakorikata Xerosareē kimaporite iāpotakasaakina, Xesosi ikiika. Iuasaaki ninoa maerekaxiniretinoka itxana. Apanakini ninoa tikini sikani pīkarauata. Ininiā Xesosi iotoka. Akiritana imoianariakori tosi pakini. Isāpiretana paītiki kākiti kamakiti iuamoni tikane. ³³ Ininiā iua:

—Hīkenakota. Xerosareēmoni asa uatxa. Iuaā nota hītari iaxitikiri sikaākako sasetotxi auīteakorimoni, kaiōkatsoapareriakorimoni pakini. Ninoa paniātariko nota okiko. Iposo atoko Xoteo minakonimoni sika ninaākako. ³⁴ Inapetanonako. Inoropatanonako aāpitsaā. Iki-isokanonako. Iposo atoko oka ninaākako. Ipi āti pakini ōti inakasaaki iuaīkana nōkitikauako —itxa imoianariakorimoni.

Txiako Xoāo Pakini Amanaākiti

(Mateo 20.20-28)

³⁵ Iposo atoko Txiako, Xoāo pakini sari Xesosimoni. Ninoa Sepeteo anaakori.

—Koerekareri, ate nirekari amanaākiti pikamini —itxana.

³⁶ Ininiā Xesosi pimaāna:

—Kipa hinireka nikaminii hīte? —itxana.

³⁷ —Pite ikinimane auīte pinakasaakiaua, pauiritaua pitekata aītopākini, pikikomoni, pisaneremoni aītopākini —itxana.

³⁸ Ininiā Xesosi:

—!Himarotari hamanaākiti, kotxi mapaōti napa atoko nota apakapariko iātatxi tsīitxiā niātini īkapani. Hīposotari ikara hiātini? Nīpatxisataākako tsīitxiā. Hīposotari ikara atoko hīpatxisatiko?

³⁹ —Aposotapitika —itxana ninoa.

Xesosi txana ninoa:

—Inīpitikara hiātariko nota iātakiti. Inīpitikara hīpatxisataākako nota patxisatiko atokokana. ⁴⁰ Txamari !nīposotari nauiritinii hīte nikikomoni, nisanaremoni hīitopākini, kotxi Teoso mereēpekana kākiti nikikomoni, nisanaremoni topākakani tīkane —itxa Xesosi.

⁴¹ Xesosi moianariakori tesi pakini kenakopiretakasaakiri Txiako, Xoōo pakini amanaākiti, ininiā ninoa omanatana. ⁴² Ininiā Xesosi akirita txana imoianariakori:

—Uaimoni hina. Hīitopāka notakata —itxana ninoa.

—Hīte imarotari Xoteo minakanua auīteakori pataparana. Ninoa auiritari kākiti kaminiri ninoa paniātakitinoka. ⁴³ Ninoa atoko !hītxape. Apiari pininiua pinirekiniā, pimoianatana apanakini. ⁴⁴ Apanakini auīte pininiā pinirekiniā, nīritixi pitxauako merepanika. ⁴⁵ Ikara atoko nitxa nota hītari iaxitiki ikorapokoriti napokasaaki. Ninitiri !auari. Īkorapokoriti napoka, kākiti nitiri nininiua īkapani, kākiti nitiretini īkapani. Īkorapokoriti napoka nipinini īkapani, kaiāopokori kākiti mapinakani īkapani, kotxi nota iikitixrauata ninoa mapinakani īkapani —itxa Xesosi.

Mōsiāreti Patximeo Inakori

(Mateo 20.29-34; Arókasi 18.35-43)

⁴⁶ Xesosi imoianariakorikata apoka Xerikoo sitatxiti. Eereka ipotorikasaaki imoianariakorikata itomaneri kākitekata, iuasaaki mōsiāreti Patximeo inakori kimapori Itiniāpo iitopākanāta. Tximeo inakori ākiri iua. Iua mōsiāreti amanaānātarō txineiro. ⁴⁷ Iua kenakotari Xesosi Nasareekiri inapaenetini, ininiā akirināta:

—Xesosi, Taviini apika mekanirii, piamonīkanoko —itxa.

⁴⁸ Ininiā apanakini kākiti pinitari:

—Māātako. !Pakirinātape —itxarina mōsiāreti.

Iuaritika apiata akirinānikata:

—Taviini apika mekani. Piamonīkanoko nota —itxanāta.

⁴⁹ Ininiā Xesosi iotoka itxa.

—Hākiritari iua mōsiāreti —itxa.

Ininiā ninoa:

—Pipoxokoniuatoko. Pōkitikaua. Akiritapekai —itxarina iua mōsiāreti.

⁵⁰ Ininiā Patximeo okanapari imāka inopinī auakari. Pakoteri ōkitikaua, sa itxa Xesosi akiritiniri manapi.

⁵¹ Ininiā Xesosi:

—Kipa pinireka nota kaminii pite? —itxari.

—Apiananiri, nōsiārera ninireka —itxari.

⁵² Ininiā Xesosi:

—Pisa. Erekapekai, kotxi pite auikari nīposotiire —itxari.

Iuasaakipeka Patximeo kōsiārepeka itxa. Xesosikata sa itxa kimaporiā.

11

Xesosi Xerosareē Apokaāpotini

(Mateo 21.1-11; Arókasi 19.28-40; Xoōo 12.12-19)

¹ Xesosi imoianariakorikata imatokoāpotari Xerosareē. Ōtanoxiratari, oriva mina takikoāta takote apokana. Iuaā aua aapokotxi Petxīpaxee inakori, Petānia inakori apaka. Iuaā Xesosi iokanatana ipi imoianariakori.

² —Hīsa ikiraā kaixiti auakari aapokotxiā. Iuaā hāpokasaaki, hāpokari xomēta ākiri iaxiriākori. Kākiti !iitopākapanika iua nopini. Hīkoxirikari. Uaimoni mina hītxari. ³ Kākiti pimaākasaakii hīte: “Kinirepa hīkoxirikatari xomēta ākiri?” hinikosaaikiko: “Apiananiri nirekari iua. Iuaākana akamoni aminariko,” hītxako.

⁴ Ininiā eereka isana. Apokarina iua xomēta ākiri iaxiriākori kimaporiā aapokotxi tore takote. Ininiā ikoxirikarina. ⁵ Ātikaka kākiti iuaā auakani:

—Kinirepa hīkoxirikatari xomēta ākiri? —itxana Xesosi moianariakorimoni.

⁶ Ininiā Xesosi paniātini iaōka apakapapiretana. Ininiā kākiti iuaā auakani:

—Ininiā hanikaikari —itxana.

⁷ Ninoa anikari xomëta äkiri Xesosimoni. Ininiä imäkana äti imäkana nopini auakari itakarina xomëta äkiri nopini Xesosi topäkini İkapani. ⁸ Apanakini käkiti matameëkari imäkana äti imäkana nopini auakari kimaporıä Xesosi napini tükane. Apanakinipekana sauakari aäxike. Kimaporıä itakaäpotarina. ⁹ Ninoa Xesosi tikini İkani, iua apisa sikani pakini akiriäpokatana ipoxokoniritikana imakinikana:

–Peerekari Teoso, Apiananiri. Iua iokanatai pite atemoni. Anirekari erekari isikini pite. ¹⁰ Peerekari Teoso, aätokirini Tavii aäuıte ininiua atokokana iuaıkana apoka. Peerekari Teoso, iaxiti apiko nopinixiti auakari. Apiananiri itxaua –itxaäpokatana.

¹¹ Xesosi apoka Xerosareë. Teoso misäkiretiko aikotimoni isa. Iuaä İroä itxa. İkinika iroko äki itikapokota. Iua atoko mapıäpe, ininiä isari Petánia aapokotxitimoni tosi imoianariakorikata.

Piko Mina Marito Pirena
(Mateo 21.18-19)

¹² İkatimatakasaaki ipotorikana Petánia. Iuasaaki Xesosi natxita. ¹³ İkira atoko atamataro piko mina. İto otsopa aua. Isari oamoni kariro iuaätiniäro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini. ¹⁴ Ininiä Xesosi:

–Käkiti İtximaıkaıko piri –ıtxari piko mina.

İmoianariakori kenakotari isäkire.

Pırätxi Vëtxitakani Omitikiko
(Mateo 21.12-17, 20-22; Arókasi 19.45-48; Xoão 2.13-22)

¹⁵ Xesosi imoianariakorikata apoka Xerosareë. Xesosi İroä Teoso misäkiretiko aikotiä. Omitikana käkiti iuaätaä amotiitakani, sikatiitakani. İkapakitikari amesa ninoa txineiro apakapakani amesane. İkapakitikari kamao vëtxitakani topäkini apaka. ¹⁶ Iua !auiritana käkiti anikniri tıtxi aiko İpirikoatinina. ¹⁷ Xesosi oerekana käkiti iuaä auakani:

–Teoso säkire İökatsopatakori txari:

Ia naapoko. “Teoso misäkiretiko aikoti” akiritaäkako, ikini itixiti auakani misäkiretinino İkapani,

itxa. Txamari hıte txıkitakari ia aiko kiıtiririni iomaätiniätaä ininiua –itxa Xesosi.

¹⁸ Sasetotxi auıteakori, kaiökatsoparerini pakini kenakotari Xesosi säkire. Ininiä ninoa tsorıkaäta. İxinikaxititana.

–Kanatokopa atxatari Xesosi aökini? –ıtxanätana.

İkinimane iteene apokaerekatari Xesosi säkire, ininiäkara sasetotxi auıteakori, kaiökatsoparerini pakini pıkarı Xesosi.

¹⁹ İpiäkapokotapeka Xesosi takanapari sitatxi imoianariakorikata.

²⁰ Katimatınıkata kimaporıä isaäpotakasaakina, atamatarona oa piko mina. Opıpe. Okotsapekara ipınakepeta apaka. ²¹ Petro xinikari iua apisapanika Xesosi säkire, ininiä akiritari Xesosi:

–Koerekareri, patamataro piko mina. “Käkiti İtximaıkaıko piri,” pinakito. Oa piko mina İpıpeka –ıtxari.

²² Ininiä Xesosi:

–Pauıkapıretariko Teoso säkire. ²³ Atäoenekara nisäpiretai. Pauıkiniäri Teoso säkire, pıposotari pıpaniätiniri ikira ötanoxıratari: “Pökıtikaua. Pokakataua potxoari uinitimoni.” Päkixınıreë iteene pauıkiniäri pisäkire iaöka apokini, ininiä apokapıtikako pamanaäkiti. ²⁴ İkara atoko ininiä nota txai hıte, Teoso pımisäkiretakasaaki, pamanaäksaakiri pınırekakiti, pauıkarıko iposope Teoso sikini, ininiä papakapapanıkarıko. ²⁵ Teoso pımisäkiretakasaaki, äti pomanatınıä, pıtakanaparıko pomanäkare. Pımaxınıkaretınıäri maerekati ikaminii, ininiä piri iaxıtikiri maxınıkaretari maerekati pite kamakiti. ²⁶ Pımamaxınıkaretanıäri maerekati äti kamakiti pıtemoni, ininiä piri iaxıtikiri kona maxınıkaretari maerekati pite kamakiti apaka.

Xesosi Paniätakari Moerekakoni
(Mateo 21.23-27; Arókasi 20.1-8)

²⁷ Iuaıkana apokana Xerosareë. Xesosi tıpokota aiko Teoso misäkiretiko pırikere äki tinıkata. İtıpokonätakasaaki, sasetotxi auıteakori, kaiökatsoparerini, kiomätxıakori pakini apoka iuamoni. ²⁸ Ininiä ninoa txari:

–Kıpaniäpa pikamari İkora pikamakiti? Kıpa paniätai? –ıtxarina Xesosi.

²⁹ Ininiä Xesosi apakapıretana:

–Nota apaka pımarauatoko hıtemoni. Ätinoka nıpımaäıko hıte. Hısäpiretinıäno, nota säpiretai hıte niokanatakiri uäka apaka. ³⁰ Kıpa paniätari Xoãoı ipatxısarauatını? Teosokani paniätari Xoão? Käkıtıkani paniätari Xoão? Hısäpiretano –ıtxana.

³¹ Ininiã ninoa xinikaxitinãta. Imisãkiretakakana. Ipimaãkakana:

–Natokopa itxa aãpakapapiretiniri iua? Aãpakapapiretiniãri: “Teoso paniãtari iua,” ininiã iua: “Kinirepa kona hãuikatari iuani sãkire?” itxapemaua. ³² Aãpakapapiretiniãri: “Kãkiti paniãtari iua,” ikinimane omanataua –itxanãtana.

Ninoa pãkari kãkiti kotxi ikinimane auikari Xoãoni atão Teoso sãkire sãpiretakari ininiua.

³³ Ikara atoko ininiã ninoa apakapapiretari Xesosi:

–Ate limarotari.

Ininiã Xesosi:

–Ikara atoko ininiã, nota !nisãpiretai hïte nïpaniãtakiri uãka.

12

Parïkauatakani Maerekani

(Mateo 21.33-46; Arókasi 20.9-19)

¹ Eereka Xesosi sãpiretana ninoa sãpirenatxi atão inakari oerekiko. Itxari:

–Kiki takarauata. Txipokori ova inakoronoka itaka. Ipiriketari. Ikamari ova maõkiko. Iposo atoko itakare apanïkakixitika ikamari aapokotxi axapitiri õtanori ikikiote imakinetini ïkapani. Iposo atoko ipaniãtana ãtikaka kikiakori itakare inïkatinina ïkapani, kotxi iua sariko õtakoxiti. Ninoa apakapamaroko ipixini ova iparïkana ïki. Iposo atoko katakareri sipe. ² Ova manapi, iua katakareri iokanatarini iniritiri ninoa kikiakorimoni ova ipixini apakapini ïkapani. ³ Txamari iua apokasaaki ninoa maïkari iua. Ixirokkitatarina. “Pisipeka,” itxarina. Miketika ikanapiripe.

⁴ –Iuaïkana katakareri iokanatarini ãti iniritiri ninoamonikana. Txamari ninoa kikiakori misiritari iua. Kai soroã ikiporonakarina, karota itxapirina ikiã. ⁵ Iuaïkana katakareri iokanatarini ãti ninoamonikana, txamari ninoa okapiri iuani. Kaiãopokori iniritiariokori iokanata ninoamoni. Apanakini inoropatana. Apanakini okana. Itxaãpotana.

⁶ –Iua katakareri auapanika ãtinoka iokanatinini ïkapani, imi iteene itiretakiti. Imapotõkire iokanatarini imi ninoamonikana. “Notamoni ninoa paxitariko namarite” itxa. Ininiã imi apoka ninoamoni. ⁷ “Katakareri ãkiri napani. Maõkari. Aõkiniãri, itakare imakinika kaikotinuaa ate,” itxakakana kikiakori.

⁸ –Ininiã ninoa maïkari katakareri ãkiri, oka itxapirina, kiki xiripire oka itxarina iïto.

⁹ –Ininiã kiripa ikama katakareri? –itxa Xesosi.

–Iua kanapiriã. Okanako ninoa kikiakori. Ipaniãtana apanakini itakare imakinetinina ïkapani –itxa Xesosi.

¹⁰ Hïte atatsopatapekari ia Teoso sãkire iõkatsopatakori:

Aapokotxi kamakani kona nirekari ãtika kai soro. Iua kai imanirekakiniti kai apiari itxapekaua. Apanakini kai soro maïkakari itxaua.

¹¹ Teosokara txïkitakari ikara atoko inini. Ikara peerekari atemoni, itxa Teoso sãkire iõkatsopatakori.

¹² Xoteo auïteakori imarotarina Xesosi sãkire. Ninoa imarotari ikamakitina takari makinetakani kamakiti atokokana, ininiã ninoa omanãkarauata Xesosi sãpiretakiti xika. Ninoa kinirão maïkaka itxarina Xesosi, txamari !maïkarina iua, kotxi ipïkarina kãkiti. Ininiã itakanaparina Xesosi, sipe itxana.

Homano Auïte ïkitxitiko

(Mateo 22.15-22; Arókasi 20.19-26)

¹³ Eereka Xoteo auïteakori iokanatanana ãtikaka Erotxi sãkire auïãkani, ãtikaka pariseoakori pakini Xesosimoni. Inirekarina Xesosi kerokiniri isãkire, kotxi ninoa nirekari Xesosi kaminiri maerekati maïkinirina ïkapani. ¹⁴ Ninoa apokasaaki, imisãkiretarina Xesosi:

–Koerekareri, ate imarotari pite sãkire atãonani ininiãua. Poerekari atãonani Teoso nirekiti kãkiti kamini ïkapani. !Pipïkari kãkiti. Kãkiti poiãori pimisãkiretini atokokana kãkiti apiari pimisãkireta apaka. Ikara atoko ininiã, pisãpiretaua. Atãokani txineiro asikini Homanoakori auïtemoni, Sesa inakorimoni? ¹⁵ Atãokani asikiniri iuamoni? Apakata amasikakaniri iuamoni? –itxana.

Xesosi imarotari isãkirena. Imarotari ninoa pimarauatini isãkire ikerokini ïkapani. ! Inirekarina atão inakari imarotinina. Ininiã Xesosi txana ninoa:

–Kinirepa hãtamakaerekatano nota? Himinaro txineirota. Ninirekari natamatiniro –itxa.

¹⁶ Ininiã iminarona.

–Kisanõkapa ia? Kiuãkapa aua uai? –itxana.

Ininiã ninoa:

–Sesa sanõka, iuãka pakini –itxana.

¹⁷ Ininiã Xesosi:

—Ikara atoko ininiā, hīsikariko Sesamoni iua nakiti. Hīsikariko Teosomoni iua nakiti — itxana.

Ininiā kasākirena ninoa, kotxi peerekari Xesosi apakapapiretakiti.

Ipīkari Ōkitikiniua Mauikakoni
(Mateo 22.23-33; Arókasi 20.27-40)

¹⁸ Kikiakori satoseo inakoni, !auikari kākiti ipīkaripeka iuaīkana ōkitikiniua iuaīkana auāki inini ikapani. Ninoa satoseo apoka Xesosimoni.

¹⁹ —Koerekareri, Moisesini iōkatsopateri ia ipaniātakiti: “Kiki meenetipanika ipininiā, iua itari takaroko tikinitakoro. Iua itari keene ininiā, itakauākatari amarini iua itarini ipīpekarini uāka,” itxa Moisesi. ²⁰ Setxi itaritxiakori aua ikorapokoriti. Apia kiomanetakari takaro sito. Txamari ipīkasaaki meenetopanika itikinitaro. ²¹ Ininiā āti itari takaro oakana. Ipīkasaaki !keenepanikaro oa. Iua atokokana itxape āti itari. ²² Ininiā imakinikana ninoa takapiimaro oa. Ikinikana ninoa meenenipanika ipīpena. Eereka oanipekana apaka opīpe. ²³ Ipīkani ōkitikasaakiaua, kirītanoropa otxatauako? Kotxi ikinikana setxi takepekaro oa — itxana.

²⁴ Ininiā Xesosi:

—Hīte kerokari, kotxi !himarotari Teoso sākire iōkatsopatakori. Teoso posotiire apaka ! himarota. ²⁵ Ipīkani iuaīkana ōkitikasaakiaua, Teoso nitiriakori iaxitikini atoko itxapekauana. ! Itanorouataikako. ²⁶ Hīte ! auikari ipīkani ōkitikiniua. Hīte atatsopatapekari Moisesi iōkatsopatakiti aanaia tirinakari pirena. Iuaasaaki Teoso misākiretari Moisesi: “Apraão, Isaki, Xakoo pakini Teosonekarano nota,” itxari Moisesimoni. ²⁷ Ikara atoko ininiā Apraão, Isaki, Xakoo pakini ōkitikapekaua iuaīkana, kotxi auāki inakani Teosonera iua. Kona ipīkani Teosoneni itxaua Teoso. Amananini hīkerokari —itxa Xesosi satoseoakorimoni.

Teoso Paniātakiti Apiari Akamini
(Mateo 22.34-40)

²⁸ Iuaātaā aua kaiōkatsoparereri. Ikenakotana ninoa misākiretakakiniua. Ikenakotari Xesosi apakapapiretakiti erekari ene. Ininiā iua pimaāri Xesosi:

—Īkripa Teoso paniātakiti apiari txataua? Kipa apiaerekata Teoso nireēkiti akamini?

²⁹ Xesosi apakapapiretari:

—Teoso paniātakiti apiari ia: “Isaao tōpa auakani, hīkenakota. Ateosone Apiananiri iua. Iuananira Teoso txaua. ³⁰ Pitiretariko Apiananiri piTeosone, ikinipoko pinireēkitiā, ikini pāixinireē, ikinipoko pixinikakitiā, ikini pitaparaxinireē pakini.” ³¹ Ātipekana Teoso paniātakiti apiari ia: “Piteka pitiretiniāua atokotxikana, pitiretariko āti.” Iuananira Teoso paniātakiti ipi apiari txaua —itxa Xesosi.

³² Ininiā iua kaiōkatsoparereri apakapapiretari Xesosi:

—Inipitikara pisākire, koerekareri. ! Auari āti Teoso. Iuanokara auari. ³³ Ininiā atiretamariko Teoso ikinipoko anireēkitiā, ikinipoko axinikakitiā, ikini ataparaxinireē. Atiretamanako apanakini aitoka atiretini atokokana. Ikara Teoso paniātakiti ipi apiari txaua. Teoso paniātakiti pirātxi aōkini iua ikapani poiāori —itxa Xesosimoni.

³⁴ Xesosi kenakotakasaakiri isākire ereka inini, itxari iua:

—Pite auīteariti Teoso.

Iposo atoko apanakini !kataparaxinireika apikomoni ipimainirina.

Teoso Mereēkiti Tavii Apika Mekaniri
(Mateo 22.41-46; Arókasi 20.41-44)

³⁵ Xesosi Teoso misākiretiko aikoti oerekaruanātakasaaki, ipimaāri:

—Kinirepa kaiōkatsoparerini sākire: “Tavii apika mekanirako Teoso mereēkiti txauako?” itxana. ³⁶ Erekar Matamatakoti kamasāpirenatakari Tavii:

Apiananiri misākiretari niauīte: “Nota kikomoni piitopākiniritika nixipokariko pimokaiakariakori. Nikamariko ninoa pikiti pitakiniātaā atoko ininiua,” Apiananiri txari niauīte,

itxa Tavii. ³⁷ Tavii akiritari iua Teoso mereēkiti “Niauīte.” Ikara atoko ininiā, natokopa itxa iua Tavii apika mekani ininiua? —itxa Xesosi.

Iuaasaaki ikinimane kākiti iuaā apitiitakaniua potxitari Xesosi sākire.

Kaiōkatsoparerini Maerekani Pirena
(Mateo 23.1-36; Arókasi 20.45-47)

³⁸ Xesosi oerekaruanātakasaaki, ōtānikana kākiti:

—Kaiōkatsoparerini moianari !hītxapeua. Ninoa potxitari mākatxi ereri ieretakinina kākiti apisatoō inapinina ikapani, kākiti atamatinina ikapani. Ninoa apokaerekatari imisākiretikona ipaxitikona nipokori sikikoātaā inapaāpotakasaakina. ³⁹ Ninoa potxitari kākiti topākini apiaerekatakari nopini iitopākinina aiko Xoteo apotiitiniātaāua. Kiiniriā ninoa potxitari

kakiiniriteri topākinimoni iitopākinina. ⁴⁰ Ninoa mixirikari tikinitakono aapoko, iuaritika okanani imisākiretarina Teoso kākiti apisatoō, ininiā kākiti uākatari ninoa erekarini atoko ininiāuana. Teoso iteene misiritanako kākiti ikara atoko inakani.

Tikinitakoro Matxineeroteto Sikakito
(*Arókasi 21.1-4*)

⁴¹ Xesosi topāka txineiro Teoso ikapani apakapikoātaā. Xesosi itikari kākiti ieretakiniro txineiro kaixa āki. Itori katxineiroterini okaro txineiro mirikinito kaixa āki. ⁴² Eereka tikinitakoro matxineeroteto apoka iuaā. Otakaro ipi txineiro otaki kaixa āki. Poiāonoka txineiro. ⁴³ Ininiā Xesosi akiritana imoianariakori.

–Inipitkara nisāpiretai hīte. Ōkora tikinitakoro matxineeroteto sikakito apiata. Apanakini sikakito poiāoka. ⁴⁴ Kotxi ninoa sikaro txineiro itetakoro. Oa matxineeroteto sikari okinika onakito –itxa Xesosi.

13

Teoso Misākiretiko Aikoti Irikiko
(*Mateo 24.1-2; Arókasi 21.5-6*)

¹ Teoso misākiretiko aikoti Xesosi pokīkasaaki, imoianari misākiretari iua:

–Koerekareri, patamata ia kai aapokotxiti itomaneri. Amaripokori. Ia aiko Teoso misākiretiko peerekari.

² Ininiā Xesosi:

–Hātamatari ia aiko mitari. Āti ōti imakinika irikaākako. Kona kai kaikotaikako āti kai nopini –itxa Xesosi.

Misirikaretxi Apokaenetini
(*Mateo 24.3-14; Arókasi 21.7-19*)

³ Xesosi topāka oxiratarini nopini Teoso misākiretiko aikoti apisatoō. Iuaā aua oriva minanape. Iuasaaki Petro, Txiako, Xoō, Ātree pakini apoka iuamoni. Ninoanoka aua iuaā.

⁴ Ipimaārina Xesosi:

–Kirisaaakipa aiko Teoso misākiretiko irikaāka? Natokopa itxa aimarotini ikara ōti apisapanika?

⁵ Ininiā Xesosi:

–Erepaniko. ! Hāuiritapiri apanakini misirienetini hīte. ⁶ Itopaniriko kākiti, “Xesosikarano,” inakanipaniko. Ninoa misirienetari kaiāopokori kākiti. ⁷ Neenamatzhi hikenakoenetakaasaaki, neenamatzhi ene hikenakoenetakaasaaki, ! hīpikarauatape. Ikara auapitakako, iuaritika kona xipokatxi ōtipanikani. ⁸ Āti uāka neenamauata āti uākakata. Āti tixini auakani neenamauatako āti tixini auakanikata. Ātikaka itixi iakeēkatakako. Kaiāopokopaniri natxi. Amarini auini tsii atoko itxapaniko.

⁹ –Erepaniko hīte. Himaikaākako, auiteximoni hīsīākako. Hinoropataākako aāpitsā āki Xoteo apotiitiniātaāua. Nota sākire hāuikini xika hīte anikaākako poiāori auiteximoni. Apiari auiteximoni apaka hanikaākako. Iuasaaki hīte sāpiretanako ninoa Teoso iokanapirena erekari. ¹⁰ Itixi xipokini apisapanika Teoso iokanapirena erekari sāpiretaākako ikini-manemoni ikini itixitikinimoni. ¹¹ Kākiti maīkasaakii hīte, anikasaakii hīte auitexiakorimoni, ! hīxinikapiri hīsākire tīkane hīsākirauatini apisapanika. Hīsākirauatakaasaaki, iuasaakipeka himarotari hīsākire. Erekarini Matamatakotū txīkitakai iuasaaki hīsākire himarotini. ¹² Kākiti sikanapariko atāo itariakori auiteximoni okiko tīkane. Iriakoritxi sikanapanako imiakori auiteximoni okiko tīkane. Eenetxiakori omanatana iriakori, inoroakoro pakini. Eenetxiakori xika ninoa okapeēka. ¹³ Nota sākire hāuikini xika, ikinimane omanatai hīte, iuaritika himatanapakaniāri nisākire hāuikini, hanikaākako Teoso tixinimoni –itxa Xesosi imoianariakorimoni.

Iteene Maerekanitxi Apokini
(*Mateo 24.15-28; Arókasi 21.20-24*)

¹⁴ Iuaīkana Xesosi sāpiretana:

–Hītikariko Maerekati Apiatakari Teoso misākiretiko aikoti āki. Kitxakapirīka Teoso sākire sāpiretakari Tanieo inakori sāpiretapekari ikara pirena. (Ininiā hīte ia atatsopanātakanii, hīkenakotariko Xesosi ōtākikinua.) Maerekati Apiatakari Teoso misākiretiko aikoti āki hītikasaaki, hīte Xotéia tōpa auakanii, himitekapoka mitaxiratarimoni. ¹⁵ Iuasaaki hīte haāpoko nopini auakanii, katima hītxako hīkatxakini. Haāpoko !hīroāpe hīti himakatzakini ikapani. ¹⁶ Hīte kikio auakanii, !hīkanapiripe haāpokomoni himāka hāpini ikapani. ¹⁷ Ikarasaaki !erekapaniri sito kamixiromoni, sito kaxitakakareromoni. ¹⁸ Teoso hamanaā himitekini kamoīsaaki, kotxi himitekini mitaāsaaki !erekari. ¹⁹ Iuasaaki atatsiiri auakatapitakako. Ia atatsiiri apiata atatsiitaākako. Kitxakapirīka itixi Teoso kamakasaaki kākiti atatsiirauata

poiãoka. Ikara atatsiiri õti apisa kãkiti atatsiirauata poiãoka. Ikara atatsiiri õti napa atoko !ikara atoko inakari atatsiiri !auaikako. ²⁰ Teoso mapoiãotakaniãari iua õti kãkiti atatsiirauatini õti, !auaikamako kãkiti. Ikinipekamako ipîpemanako. Teoso iotokakariko Ìkara atatsiiretxi, imereëkini mapinakani Ìkapani.

²¹ –Apanakini sãporetiniãa hîte: “Xesosi Teoso mereëkiti ia,” hinikosaaki, !hãuikapiri. “Xesosi Teoso mereëkiti ikiraãtaã,” hinikosaaki, !hãuikapiri. ²² Kotxi Teoso mereëkiti minakanuia apokapitikako, “Xesosikarano nota,” inakari. Apaka apanakini apokapitikako, “Teoso sãkire sãpiretakarikarano nota,” inakari. Paxirari ninoa sãkire. Kãkiti ikara atoko inakani kamariko posotiiretxi, kãkiti itikiniri Ìkapani. Ninoa nirekamari Teoso mereëkini imisrienetinina. ²³ Erepaniko. Ikara õti apokini apisapanika nõtãkikai hîte –itxa Xesosi imoianariakorimoni.

Kãkiti Itari Iaxitikiri Kanapiriini
(Mateo 24.29-31; Arókasi 21.25-28)

²⁴ –Iua misirikaretxi napa atoko atokatxi iuakapeka. Kasiri !iponikaika. ²⁵ Iõriki iaxitikero irikako. Ikinipoko kaikori iaxiti auakari ioiketaãkako. ²⁶ Iuasaakipekako ikinimane atapariko kãkiti itari iaxitikiri apokaãpotini katxiãri ãki. Itapararituka apoka. Kaiotximereri itxaua iusaaki. ²⁷ Iuasaaki iokanatana initiriakori iaxitikini itinixitimoni, ipinimoni itinixitimoni, atokatxi pokikinimoni, atokatxi ereëkokinimoni. Iokanatana initiriakori ikini itixitimoni kãkiti imereëkini apitiutinina Ìkapani –itxa Xesosi imoianariakorimoni.

Piko Mina Pirena
(Mateo 24.32-35; Arókasi 21.29-33)

²⁸ Iuaikana Xesosi sãkirauata.

–Nisãpiretai sãpirenatxi atão inakari oerekiko, piko mina pirena, nikanapiriini apiata himarotini Ìkapani. Pooiõporipeka onakasaaki, otomorekasaaki, “Kamoõ apokanapanoka,” hîtxa. ²⁹ Iua atokokana ikara misirikaretxi mixikanani nisãpiretakiti hîtikasaaki, himarotapekariko nota kaiama kanapirikapeka ninini. ³⁰ Ia nisãkire atão. Itixi auakani !ixipoka ikinipoko nisãpiretakiti mapokakani apisa. ³¹ Iaxiti xipokapitikako. Ìkoraxiti apaka xipokapitikako. Iuaritika nota sãkire lixipoka –itxa Xesosi imoianariakorimoni.

Kãkiti !Imarotari Xesosi Apokini Manapi
(Mateo 24.36-44)

³² Iuaikana Xesosi sãkirauata:

–Kãkiti !imarotari ikara õti manapi apokini. Teoso nitiriakori iaxitikini apaka !imarotari ikara õti. Nota Teoso ãkirikanera !imarotari ikara õti. Nirinanira, Teosonanira, imarotari. ³³ Hiãtapaparikako. Hikoatapikako. Teoso himisãkiretapikako. Kotxi !himarotari ikara õti apokini.

³⁴ –Nikanapiriãkasaaki, kiki õtako sikari kanapiriini atoko nitxa. Iua kiki poterikasaaki, ipaniãtana initiriakori aapoko inikatinina. Ikininape isikanapana parikatxi ikaminina. Ipaniãtari initiri aapoko toreãtaã kaikotakari, “Araõkire pitxako,” itxari. ³⁵ Nota hîtari iaxitikiri iua kiki õtako sikari atoko nitxako. Ætipirika hiãtapapikanoko, kotxi !himarotari nota apokini õti. !Himarotari mapiãtikikauako napoka. !Himarotari apaniãkanõkauako napoka. Imaropirikatauako napoka. Ìkanõkapanikauako napoka !himarotapaniri. ³⁶ Atxiiti patimari napokini, ininiã hikoatapikako, mimakatika hinini Ìkapani nota apokasaaki. ³⁷ Ininiã ãtipirika hiãtapapikanoko. Ikininapemoni apaka ikara nitxa –itxa Xesosi imoianariakorimoni.

14

Xesosi Okaenetiko Pirena
(Mateo 26.1-5; Arókasi 22.1-2; Xoão 11.45-53)

¹ Iuasaaki kãkiti apotiitaua ipi kiiniriti auakasaaki. Pãskoã kiiniriti, pão miãtiãkati nikiko kiiniriti pakini aua. Ipi õti kiiniri poterikini apisapanika sasetotxi auiteakori, kaiõkatsoparerini pakini xinixaxitita:

–Natokopa atxatariko Xesosi amaikini aõkini Ìkapani? ² !Amaikapaniri kiinirisaaki, kotxi amaikiniãari, kãkiti naiatamaua eereka –itxanãtana.

Sito Kamariãro Mikaro
(Mateo 26.6-13; Xoão 12.1-8)

³ Xesosi auanãta Petãnia aapoktxiti Simão inakori aapoko. Iua Simão akiritaãka “Maere Matati.” Simão aapoko Xesosi nipokonãtakasaaki, sito apoka. Oa minari kopitipaki kai kamakori, kai arapãstiro inakoro. Kopitipaki ãki aua kamariãro, nato inakoro. Pakaronepokoro. Oãpokasaaki Xesosimoni, opakauanakari kopitipaki. Okitakoro kamariãro Xesosi kiã. ⁴ Iuasaakipeka apanakini iuaã auakani omanãkarauata.

—Kinirepa oioanataäka kamariäro? ⁵ Ovêtxitamaro, ininiä kaiãopokomaniko txineiro oãpakapamako. Tresêtos txineiro ota prata kamakori oãpakamako. Txineiro mauakinitimoni osikiniä erekamariko —itxana.

Iteene ikapatitana. ⁶ Ininiä Xesosi:

—Ikara atoko !hîtxapero. !Homanatapero. Erekar okaminano. ⁷ Käkiti matxineiroteni auapikako hîtekata. Hinirekasaakiriko hîsikaro txineiro ninoamoni. Nota !auari ätipirika hîtekata. ⁸ Oia sito kamari ikinipoko oimarotakiti nota ikapani. Nipinini apisapanika oina notamoni. Omaritari niïto, niïto iposope inini nikatiko ikapani. ⁹ Atão nisãpiretai hîte. Teoso iokanapirena erekari säpiretikoätaä ikini itixiti, osãpiretaäkako apaka oia sito kitakiniro kamariäro nikiiä, ininiä käkiti ikini itixiti auakani xinikapikaro oa —itxa Xesosi.

Xotasi Mïkapiritiniri Xesosi

(Mateo 26.14-16; Arókasi 22.7-16, 21-23; Xoão 13.21-30)

¹⁰ Tosi pakini Xesosi moianariakori. Imoianari Xotasi inakori sari sasetotxi auiteakorimoni. Imisäkiretana ninoa Xesosi imïkapiritini ikapani, ninoamoni isikiniä ikapani. ¹¹ Ikenakotakasaakirina Xotasi säkire, ipoxokoniuatana. Isikaenatarona txineiro iuamoni. Eereka Xotasi iätapari Xesosi imïkapiritini öti.

Páskoa Kiiniriti Kamiko

(Mateo 26.17-25; Arókasi 22.7-13)

¹² Páskoa kiiniriti potorikini öti, soti auite anaakori okiko öti, Xesosi moianariakori misäkiretari iua:

—Namonipa pinirekatari Páskoa kiiniriti akamini?

¹³ Ininiä Xesosi iokanatanana imoianariakori ipi.

—Hîsa sitatximoni. Iuaä kiki äparaä kopitiä anikakari häpiäkata. Iua kikikata hîsa. ¹⁴ Iua sinimoni kaapokori himisäkireta. Hîtxariko iua: “Koerekareri nirekari imarotini, namonipa erekari imoianariakorikata inipokotini Páskoa kiiniriti ikamakasaakina?” hîtxariko. ¹⁵ Ininiä iua oerekaiko hîte itanokiri koa mitapoari. Auapeka käkiti topäkini. Imakinika oeretapeëkaika —itxana.

¹⁶ Ininiä imoianariakori sari. Sitatxi apokasaakina Xesosi säkire iaöka aua. Ininiä ninoa kamari nipokori Páskoa kiiniriti ikapani.

¹⁷ İkanökepeka inakasaaki Xesosi apoka tosi imoianariakorikata. ¹⁸ Inipokonätakasaakina, Xesosi txana:

—Atão nisãpiretai. Äti hîte notakata nipokotakari mïkapiritanoko nota —itxa.

¹⁹ Ininiäkara Xesosi moianariakori matinaniuata. Ipimaärina Xesosi:

—Notakani atxiiti?

Ätipekana:

—Notakani atxiiti?

Ininiä imakinikana ikara atoko itxana. ²⁰ Ininiä Xesosi:

—Ätika hîte notakata auakari mïkapiritano. Notakata komiri iopitiätakarikarako sikano nimokaikariakorimoni. ²¹ Nota hîtari iaxitikiri okaäkako. Teoso säkire iökatsopatakori säpiretapekari nipinini tikane. Nota hîtari iaxitikiri mïkapiritakari iteene misiritaäkako. Erekamariko maponaniäkatika inaäkamako.

Xesosi İto, Iarëka Pakini

(Mateo 26.26-30; Arókasi 22.14-23; 1 Korïto 11.23-25)

²² Xesosi imoianariakorikata nipokonätakasaaki, Xesosi kosekari komiri. Imisäkiretari Teoso:

—Erekapitikari ia komiri pisikakiti atemoni —itxari.

Imapepeeri komiri, xanaka itxari imoianariakorimoni.

—Apakapa, nika hîtxako. Ia niïto —itxana.

²³ İposo atoko koseka itxaro iäkoanatxi. Imisäkiretari Teoso:

—Erekapitikari ia iäriä pisikakiti atemoni.

Ininiä iäkoanatxi isikana imoianariakori. İkinikana iätarina iäriä. ²⁴ Ininiä Xesosi:

—Ia niarëka xiketakarari makatxakariko kaiãopokori käkiti maerekani. Teoso säpiretapekari käkiti ikamaenetakiti amaneri käkiti ikapani. Ia niarëka oerekari käkiti, Teoso kamapekari ikamaenetakiti. ²⁵ Atão nisãpiretai. !Niätaikaroko ovapeë, Teoso auïtetxi ininiätaäua nimapokakanisaaki. Iuaä napokasaaki niätari. Amaneri iäriäti niätako —itxa Xesosi.

²⁶ Eereka ninoa xikarauata Teoso ikapani. Iua atoko isana oriva mina auiniätaä, oxiratari nopini.

Xesosi Säpiretari Petro Kipatiniri Iua

(Mateo 26.31-35; Arókasi 22.31-34; Xoão 13.36-38)

²⁷ Xesosi misäkiretana imoianariakori:

—Ia ikanōkati hīkinika hīte takanapanoko nota, kotxi Teoso sākire iōkatsopatakori sāpiretapekari ikara atoko inakari. Itxari:

Nokariko soti auīte piratakari, ininiā ikinika ipiraaakori iarikitatako, itxa Teoso sākire iōkatsopatakori. ²⁸ Ininiā eereka nota nīpinaāka atoko, iuaīkana nōkitikaākaua atoko, nisako hīte apisa Kariréiamoni —itxa Xesosi.

²⁹ Ininiā Petro:

—Nota initanapanai pite. Atxiīti ikinimane takanapai, iuaritika kona nota takanapai.

³⁰ Ininiā Xesosi:

—Atāo nisāpiretai. Ia ikanōkati patari ipikata sākirauatini apisanapanikako, ipi āti pakinikata, “!Nimarotari iua,” pitxanoko —itxari Petro.

³¹ Petro apakapapiretari itaparaxinireritika:

—Atxiīti pitekata nokaāka, iuaritika kona nota sāpiretari apanakini nimimarotakanii pite. Ikininape Xesosi moianariakori Petro sākire iaōka ikamana.

Xesosi Misākiretiniri Teoso Xetsémani Inakoriātaā

(Mateo 26.36-46; Arókasi 22.39-46)

³² Xesosi imoianariakorikata apoka ātiātaā kākiti akiritakiti Xetsémani inakoriātaā. Iuaā Xesosi paniātana imoianariakori:

—Uai hītopāka. Teoso nimisākiretako —itxa.

³³ Anikari Petro, Txiako, Xoāo pakini iuakata apikomoni. Iuaā Xesosi iteene matinaniuata. Maerekaxiniretinoka itxa. ³⁴ Ininiā iua:

—Nixinire imaromaxiretari. Iteene nimaxire, ininiā okaaritano. Uai hīkaikota. Araōkire hītxako —itxana.

³⁵ Apikomoni isa. Ipamaka xitimoni, misākireta itxari Teoso. ³⁶ Itxari iri:

—Papai, pite posotari ikinipoko pikamini. !Pauritapeno paītiki natatsiiruatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.

³⁷ Eereka ikanapiriā Petro, Txiako, Xoāo pakinimoni, txamari ninoa imakanāta. Xesosi akiritari Petro:

—Simāo, himakanāta? Kona hīposotari āti oaranoka hīkoatini? ³⁸ Erepaniko. Hinirekasaakiri maerekati hīkamini, !hīkamapiri. Araōkire hītxako. Hīmisākiretariko Teoso, ininiā !hīkamari maerekati. Kākiti xinire atxiīti !inirekari maerekati ikamini. Txamari kākiti ito tapara poiāoka, ininiā ikamari maerekati. Ininiā erepaniko —itxana ninoa.

³⁹ Iuaīkana isa Teoso imisākiretinini ikapani. Teoso imisākireta, mitxi isākire atokokana itxa. ⁴⁰ Iposo atoko ikanapiriā. Txamari iuaīkana ninoa imakanātapanika. !Iposotarina ikoatinina. Ipētauatana, ininiā lkasākirena.

⁴¹ Iuaīkana ikanapiriā Petro, Txiako, Xoāo pakinimoni.

—Himakanātapanika? Hītomanātapanika? Iaōpe. Hātapana. Hītari iaxitikiri uatxa sikaākako maerekati kamakanimoni. ⁴² Hōkitikaua. Masa. Hātapana. Apokaāpota kiki nimīkapiritakiri —itxana.

Xesosi Maīkiko Pirena

(Mateo 26.47-56; Arókasi 22.47-53; Xoāo 18.1-11)

⁴³ Xesosi sākiraunanātakasaaki, Xotasi apoka. Iua Xotasi Xesosi moianarikamara. Iminana ito kiki, saasara mīkani, piriri mīkani. Sasetotxi auīteakori, kaiōkatsoparerini, kiomātxiakori pakini iokanatarari Xotasi kikiakorikata Xesosi imaīkinina ikapani. ⁴⁴ Xotasi mitxipeka sāpiretari kikiakori:

—Nota apitxokakiti Xesosipitikarako iua. Iuasaaki himaīkapekari. Erepaniko hanikasaakiri, imamitekakani ikapani —itxa.

⁴⁵ Xotasi apokasaaki, isakatapitipori Xesosimoni. Akiritari:

—Koerekareri.

Inakasaakipeka apitxoka itxari.

⁴⁶ Inakasaakipeka kikiakori maīka, anika itxarina Xesosi. ⁴⁷ Kiki iuasaaki iuaā auakari kosekaro saasara. Iua sauaākatari sasetotxi auīte apiatakari nitiri. Itsotakakīptari.

⁴⁸ Iuasaakipeka Xesosi:

—Hīte ina himaīkinino ikapani, saasarakata, piririkata. Kūtiriri atoko hītxapeno nota himaīkinino. ⁴⁹ Ikinioitika nota auanātari hītekata Teoso misākiretiko aikoti āki, noerekarauatakasaaki. Iuaā hīte !imaīkano nota, kotxi Teoso sākire iōkatsopapeēkaika hīte maīkinino kiītiriri himaīkini atoko —itxana ninoa.

⁵⁰ Iuasaakipeka ikinika Xesosi moianariakori miteka, asika itxarina iua. ⁵¹ Iuasaaki ātokori sari Xesosi tikini. Iua māka ātinoka aua iitōā pirikakari. Kikiakori maīkamari iua.

⁵² Imākanoka kaikota iuakoāna. Kasarapeka imiteka iua ātokori.

*Xesosi Xoteo Auñteakori Apisatoõ**(Mateo 26.57-68; Arókasi 22.54a, 63-71; Xoão 18.12-14, 19-24)*

⁵³ Ninoa anikari Xesosi sasetotxi auñte apiatakari aapokomoni. Iuaã ikinika sasetotxi auñteakori, kiomãtxiakori, kaiõkatsoparerini pakini apotiitaua. ⁵⁴ Petro ikira atoko isaãpota Xesosi anikakani tikini. Iroã sasetotxi auñte aapoko piriketakoríã. Iuaã iitopãka sasetotxi auñte apiatakari nitiriakorikata. Iroka xamina tinipoki.

⁵⁵ Aapokotxi åki sasetotxi auñteakori, ikinika Xoteo auñteakori pakini pimaãna kåkiti:

–Kipa imarotatari maerekati Xesosi kamini?

Ninoa nirekari Xesosi okiko imaerekani xika. Txamari !apokarina imaerekani imarotakani, kotxi likamari maerekati. ⁵⁶ Kaiãopokori kåkiti sãpiretari maerekati Xesosi kamakiti, txamari paxirari ninoa sãkire, kotxi åti sãpiretakiti ipinimoni, åti sãpiretakiti ipinimoni, itxaãpotana.

⁵⁷ Apanakini kiki õkitikaua, sãpireta itxarina ia aãpirena Xesosi ikamapiretinina. ⁵⁸ Ninoa: –Ate kenakotari isãpiretiniri: “Nirikariko ia aiko Teoso misãkiretiko aikoti kåkiti kamakiti. Ipi åti pakini õti inakasaaki nikamariko åti aiko kåkiti makamakiniti,” itxa isãkire.

⁵⁹ Txamari ikara sãkiretxi åti sãpiretakiti ipinimoni, åti sãpiretakiti ipinimoni, itxaãpota.

⁶⁰ Iposo atoko sasetotxi auñte apiatakari tima ikinimane apisatoõ. Iua pimaãri Xesosi:

–Kininiãpa na papakapapiretari ninoa sãkire? Kixikapa ninoa ikara atoko txanãtai? – itxari.

⁶¹ Txamari !kasãkireri Xesosi. !Apakapapiretari. Ininiã sasetotxi auñte apiatakari iuaãkana pimaãri:

–Pitekani Teoso mereëkiti txataua? Pitekani Teoso åkiri txataua? –itxari.

⁶² Ininiã Xesosi:

–Ari, iua åkiripitikanano. Hãtamatariko kåkiti itari iaxitikiri topãkini Kaposotiireri kikomoni. Hãtapariko kåkiti itari iaxitikiri uai apokaãpotini katxiãri åki –itxa.

⁶³ Iuasaakipeka sasetotxi auñte apiatakari matsorãkari imãka, kotxi iuãkatari Xesosi sãkire maerekati ininua.

–!Anirekaikari Xesosi kamakiti sãpiretakani. Atokopeka. ⁶⁴ Kotxi hñte kenakotapekari isãkire maerekati, “Teoso åkirirano” inini. Natokopa atxtatari iua? –itxana.

Ininiã ninoa apakapapiretari:

–Okaãkapitikako –itxarina.

⁶⁵ Apanakini kiisokari Xesosi. Mãkatxi mataã iapirikarina ikiã oki manapi imata-matakani ikapani. Iposo atoko iãsokarina.

–Pisãpiretaua, kipa åsokai? –itxarina.

Sasetotxi auñte nitiriakori apaka åsokari iua iuakoãna.

*Petro Kipatari Xesosi Imarotini**(Mateo 26.69-75; Arókasi 22.54b-62; Xoão 18.15-18, 25-27)*

⁶⁶ Iuasaaki Petro ixiti aua aapokotxi piriketakorí åki. Sasetotxi auñte apiatakari nitero åtokoro apoka iuaã. ⁶⁷ Oãtamatarí Petro irokanãtini xamina tinipoki. Oa mixinitari iua. Ininiã oa:

–Xesosi Nasareekiri moianarikai pite apaka –otxa.

⁶⁸ Ininiã:

–Kona, nota !imarotari pisãkire –itxaro.

Iuasaaki pirikere Ironakikoãtaã isari. Iuasaakipeka patari sãkirauata. ⁶⁹ Oa sasetotxi auñte nitero atamatarí iua iuaã.

–Ere kiki iua moianaripitikara –otxana ninoa Petro takote auakani.

⁷⁰ –Kona iuano nota –itxa.

Pañtiki ninoa iuaã auakani:

–Iua moianaripitikarai. Pite Kariréiakirikarai. Pisãkireëra ate imarotai –itxarina.

⁷¹ Ininiã Petro:

–Nota !imarotari kiki ikara atoko hinanãtakiti. Atãoene nimasãpiretakaniã, Teoso misiritamanoko. Teoso imarotari nota sãkire atãoka nisãpiretinii –itxana.

⁷² Ikara atoko Petro inakasaaki, iuaãkana patari sãkirauata. Ininiã Petro xinikari Xesosi sãpiretakiti iuamoni. “Ipikata patari sãkirauatini apisapanikako, ipi åti pakinikata, !Nimarotari iua, pitxanoko.” Ikara inakari ixinikasaaki, itxiapata.

15*Xesosi Pirato Apisatoõ**(Mateo 27.1-2, 11-14; Arókasi 23.1-5; Xoão 18.28-38a)*

¹ Katimatinikata sasetotxi auíteakori, kiomãtxiakori, kaiõkatsoparerini, ikinimane Xoteo auíteakorikata xinikaxitinãta. Ipaniãtarina Xesosi iaxirikiko. Iposo atoko anika, sika itxarina Piratomoni. ² Pirato pimaãri Xesosi:

—Pitekani Xoteoakori auíte txataua? —itxari.

Ininiã Xesosi:

—Ari, pisãkire atãopitikara.

³ Sasetotxi auíteakori apoiãpotari Xesosi, txamari Xesosi lkasãkireri. ⁴ Ininiã Pirato:

—Na papakapapiretari? Ninoa iteene misãkirepiretai —itxari.

⁵ Iuaritika Xesosi !apakapapiretari. Ininiã Pirato ãkixinireẽ:

—Kinirepa kona apakapapiretari? —itxa.

Xesosi Okiko Nirekiko

(Mateo 27.15-26; Arókasi 23.13-25; Xoão 18.38b-19.16)

⁶ Pãskoa kiiniriti auakasaaki, Pirato itotari isikakiniri kateia ãki auakari kãkiti nirekëiti. ⁷ Iuasaaki Xesosi mañkikosaaki, Pahapasi inakori aua kateia ãki. Iua Pahapasi apanakini kateia ãki auakanikata okaniuatapeka Homanoakori inaiatakasaakina. ⁸ Pirato sãkirauatakasaaki Xesosikata, kãkitipokoni apoka Piratomoni.

—Kateia ãki auakari pisikaka —itxarina.

⁹ Ininiã Pirato pimaãna:

—Hinirekatari nisikakiniri Xoteo auíte hïte ïkapani? —itxana.

¹⁰ Pirato iteene imarotari sasetotxi auíteakori sikari Xesosi iuamoni Xesosi ixikotinina xika. ¹¹ Sasetotxi auíteakori maasakana ninoa iuaã apotiitakaniaua:

—Hamanaãri Pirato Pahapasi isikakini ïkapani —itxana kãkitimoni.

¹² Pirato iuaïkana pimaãna:

—Natokopa nitxatari ia kiki Xoteo auíte inakori? —itxa.

¹³ Akiripoakatana:

—Aamina ïpiriãmitakari nopini hïtokakitari —itxana.

¹⁴ Ininiã Pirato:

—Kixikapa? Maerekati !ikama —itxa.

Apiata akiripoakatana:

—Aamina ïpiriãmitakari nopini hïtokakitari —itxakatana.

¹⁵ Ininiã Pirato sikakari Pahapasi ninoa ïkapani, kotxi inirekari ikamapoxokonitina ninoa kãkiti. Eereka ipaniãtari Xesosi xirokítatiko aãpitsaã. Eereka Pirato paniãtari sotatoakori tokakitiniri Xesosi aamina ïpiriãmitakari nopini.

Sotatoakori Napetiniri Xesosi

(Mateo 27.27-31; Arókasi 22.63-65; Xoão 19.1-3)

¹⁶ Ininiã sotatoakori anikari Xesosi Pirato aapoko ãki. Akiritarina ikinika sotato. ¹⁷ Iposo atoko ieretakarina mãkatxi põkamarari Xesosi itoã. Ikamarina saporieãta kotipiaro kamakori, taka itxarina Xesosi kiã.

¹⁸ —Aãuíte —itxarina Xesosi inapetinina.

—Xoteo auítekai pite —itxarina.

¹⁹ Iaritakiitarina aãkeẽ. Ikiisokarina. Ikapotoreẽkauana Xesosi apisatoõ.

—Aãuíte —itxarina Xesosi inapetinina.

²⁰ Inapetakarina atoko imakatzakarina mãkatxi põkamarari. Xesosi mãka iuaïkana iere-taka. Eereka anikarina Xesosi aamina ïpiriãmitakari nopini itokakitinirina ïkapani.

Xesosi Tokakitaãka Aamina ïpiriãmitakari Nopini

(Mateo 27.32-44; Arókasi 23.26-43; Xoão 19.17-27)

²¹ Ìpixinipokoritì itãõkitarina kiki Simão inakori. Sireni sitatxitikiri iua. Iua anaakori Arexãtri, Hopo pakini. Iuasaaki Simão apoka Xerosareẽ. Sotatoakori paniãtari iua:

—Ia aamina ïpiriãmitakari panikinari —itxana.

²² Anikarina Xesosi ixirataã, Kóokota inakoriãtaã. Xoteo sãkire “Kóokota.” Apanakini akiritari iua oxiratari uãka “Kiitãtatxi,” inaãka akiritiko. Iuaã apokana. ²³ Isikamarina iãriã pinĩtxikata, miha inakorokata, Xesosi iãtini ïkapani, itsiã imimarotakanani ïkapani, txamari !inirekaro iãtiniro. ²⁴ Ininiã itokakitarina aamina ïpiriãmitakari nopini. Eereka ikama-rina sarauatxi, Xesosi mãka apakapakanani imarotinina ïkapani. Ikara atoko apanakini anikari Xesosi mãka. ²⁵ Ìkanõkapanika novi oara itokakitapeẽka Xesosi aamina ïpiriãmitakari nopini. ²⁶ Aaminaã auari iõkatakatina, apoitiko pirena, “Xoteoakori Auíte” itxa. ²⁷ Ninoa tokakitana ipi kiitiririni apaka aamina ïpiriãmitakari nopini, ikikomoni ãti, isanaremoni ãti.

²⁸ Kitzakapirika Teoso sãkire iõkatsopatakori txari:

Okapeẽkako iua, kokaniri okiko atoko inapeẽkako.

Ininiã Xesosi okikosaaki ia Teoso sãkire iõkatsopatakori iaõka auapeka iuasaaki.

²⁹ Ninoa iuaā napakani misākirepiretapikari Xesosi:

–Kiikitei. Pite sākire: “Nirikariko Teoso misākiretiko aikoti. Ipi āti pakini ōti inakasaaki nikamari iuaākana,” pitxama. ³⁰ Ikara atoko piposotiniā, piteka pimakatxakauako, ininiā pikatxaka aamina ipiriāmitakariā –itxarina Xesosi inapetinina.

³¹ Sasetotxi auūteakori, kaiōkatsoparerini pakini napetari Xesosi:

–Iua makananitapekari apanakini. Txamari iuaka ! iposotari imakananitinia – itxakakana.

³² –Ikatzakiniārako ate aukari Teoso mereēkiti ininiāua. Ikatxakiniā, aūikari Isaeo auakani auūte ininiāua –itxakakana.

Kiitiririni iuakata tokakitakoni apaka misākirepiretari.

Xesosi Ipinini Pirena

(Mateo 27.45-56; Arókasi 23.44-49; Xoāo 19.28-30)

³³ Iuasaaki apaniāxiti ipiāka. Ikini itixitika piāka. Ipi āti pakini oara ipiāka. ³⁴ Ipi āti pakini oara napa atoko Xesosi akiripoakata:

–Erii, Erii, aremaa sapakatani –itxa.

Ia atatsopatakari sākire: “NiTeosone, niTeosone, kinirepa pitakanapano?” itxa.

³⁵ Kākiti iuaā auakani kenakotari akirinātini.

–Hikenakota. Akirinātari Eríasi –itxana.

³⁶ Iuasaakipeka kiki ina katimariā. Iākari mapoa atoko inakari iāriā katxioārimoni, aāke mapotōkire taka itxari, sika itxari Xesosi iātini ikapani.

–Mitxipanikako. Maiātapari. Atauako Eríasi makatxakatapaniri Xesosi –itxana.

³⁷ Xesosi itapararitika akiripoakata, eereka ipīpe itxa. ³⁸ Iuasaakipeka mākatxi mata Teoso misākiretiko aikoti āki arōkakari tsorakita. Itano itsorakita. Ixtipeka apoka. Mitxi iua mākatxi mata lauiritari kākiti iroini Teosonani Auini Pakitaāta. ³⁹ Sotatoakori auūte aua aamina ipiriāmitakari apisatoō. Ikenakotari Xesosi akiritini. Itikari ipinini.

–Atāopitikara Teoso ākiri itxaua ia kiki –itxa.

⁴⁰ Ātokaka sitoakoro ikira atoko atamanātarina Xesosi, Maria Matarenama, Saromeema, āto Mariama, apanakini sitoakorokata. Xesosi, Txiako pakini inoro oa Maria. Iua Txiako maneripanika inakari. ⁴¹ Xesosi Kariréia auakasaaki, ninoa sitoakoro moianatari iua. Imiparikatarina. Xesosi ipikasaakikanera apanakini sitoakoro kaiāopokoro aua iuaāta. Ninoa apoka Xerosareē Xesosikata.

Xesosi Ikatiko Pirena

(Mateo 27.57-61; Arókasi 23.50-56; Xoāo 19.38-42)

⁴² Ikara ōti, Xesosi ipinini ōti, kākiti parīkauatini ōti, kākiti tomatini ōti apisapanika, iuasaaki kikatatikipeka. ⁴³ Iuasaaki Xosee inakori, Arimateia sitatxitikiri, sari Piratonomi. Iua Xosee Xoteo auūte apanakinikata. Ikinimane paxitari iua. Iua apaka iātapari Teoso ikinimane auūte ininiua ōti apokini. Itaparaxinireritika Piratonomi isa, amanaā itxari Xesosi ito. ⁴⁴ Ininiā Pirato ākixinireē:

–Atauako patimari Xesosi ipinini? –itxa.

Ininiā ipikapiretari sotatoakori auūte. Iua apokasaaki Pirato pimaāri:

–Atauako Xesosi ipīpeka? –itxa.

⁴⁵ Ininiā iua:

–Ari, ipinapitipeka –itxari.

Ininiā Pirato:

–Panikaikari iito –itxari Xoseemoni.

⁴⁶ Iuasaaki Xosee amotari mākatxi mata erekari, arinio inakori. Eereka imakatxakari Xesosi ito. Iapirikari iito mākatxi mataā, anika itxari akauari irikomoni. Kai kisakakori āki ieretakari Xesosi ito. Eereka kai mitapoari ikatika, tota itxari iriko. ⁴⁷ Ipi Maria itikanātari Xesosi ito takikoāta, Maria Matarenama, Maria, Xesosi inakori inoroma pakini.

16

Xesosi Iuaākana Auāki Inini

(Mateo 28.1-8; Arókasi 24.1-12; Xoāo 20.1-10)

¹ Tomatiko ōti xipoka atoko mapiānikata, ipi āto pakini sito amotaro kamariāro, Xesosi ito ikamamaritinina ikapani, Maria Matarenama, Saromeema, Maria Txiako inoroma pakini.

² Katimatinikata, tomikosaaki, ikanōkapanika, atokatxi pokikasaaki, ninoa sari akauarimoni.

³ Kimaporiā isikasaakina, isākirauāpotana:

–Kipa makatxakinaua kai auūte iriko tore? –itxāpotana.

Amaripokori iua kai. ⁴Iuaā apokasaakina, atamatarina. Kai makatxakapeēkaika. ⁵Ininiā İroāna İrİko āki. Atamatarina ātokori topākanāta İkİkomonİ. İmāka İtanori, kasarori. İniniā nİnoa tikoka.

⁶İniniā iua:

—! Hİtikokape. Hİte nİtanātari Xesosi Nasareekiri, aamina İpiriāmitakari nopini tokakitakori. Őkitikapekaua iua. !Auaika uai. Hātamata. Mİtxi İtakarina İİto uai. ⁷Hİsİpeka. Hİsāpiretari Petro, apanakini Xesosi moİanariakori pakini: “Xesosi sapanikako hİte apİsa Karirēİamoni. Iuaā hİte aōkitari iua, kotxi ipinaka apisapanika isāpiretapekari İkara hİtemoni,” —İtxana nİnoa.

⁸İtimaritikana nİnoa pokİka. İmitekana. İkİkinanakana, ipİkarena xİka. !İsāpiretarina apanakini, kotxi ipİkarauatana.

Xesosi Oerekaua Maria Matarenamoni

(Mateo 28.9-10; Xoāo 20.11-18)

⁹Xesosi Őkitikasaakiua ipinaka atoko İkanōkapanika semana potorikini Őti, tomİkosaaki, oerekaua merepitipanika Maria Matarenamoni. Mİtxipe Xesosi aōkitakasaakiro oa Maria, omitikari maerekani matamatakoni setxi pakini oa İtoā auakani. ¹⁰Xesosi Őkitikasaakiua, iua oaōkitaka atoko, osari merepanika Xesosi moİanariakorimoni. İuasaaki iteene imatİnİnuatana. İtxİapanātana. Osāpiretana nİnoa:

¹¹—Xesosi İuaİkana auāki İtxapeka. Nota aōkitari iua —İtxana.

Txamari nİnoa kona auİkari osākire.

Xesosi Oerekaua İpi İmoİanariakorimoni

(Arōkasi 24.13-35)

¹²Eereka İuaka oerekaua İpi İmoİanariakorimoni, kimaporİā İsikasaakina aapokotxi mauakaniātaā. İuasaaki İtoō İpinİpo İtxa. ¹³Eereka nİnoa kanapiriā. İsāpiretana apanakini İmoİanariakori, txamari İauİkarina İsākirena.

Xesosi Oerekaua İmoİanariakorimoni

(Mateo 28.16-20; Arōkasi 24.36-49; Xoāo 20.19-23)

¹⁴Eereka Xesosi oerekaua Ősi İmoİanariakorimoni İnipokotakasaakina. Xesosi Őtākİkana: —Kİnİrepa hİte İauİkatari nota İuaİkana auāki nİnini? Kİnİrepa !hāİuİkatari nota aōkitakani sākire? !Kaiokakarekİİ —İtxa.

¹⁵İposo atoko Xesosi İtxana:

—İkİni İtİxiti hİsako. Hİsāpiretariko Teoso İokanapirena erekari İkİnİmanemoni. ¹⁶Teoso sākire auİākari patxisatakori, İuarako sari Teoso İtxİnemoni. Teoso sākire mauİkakati, Teoso mİsİritapİkariko. ¹⁷Teoso sİkaposotiİretanako İsākire auİākani, İniniā apanakini İmarotari Teosokara sİkari İposotiİre nİnoamoni. İa atoko Teoso sİkaposotiİretana. Őmitİkarina maerekani matamatakoni nota uākaā. İsākİrauātana İmİmarotakİnİtİna sākİretxitiā. ¹⁸İmaİkİniārİna İminİ, İlipİnana. İātİniārİna İkİanari, İamİanātana. !İpinana. İtakauakotaua amİanatakani nopini, İniniā amİanatakani makananiāka —İtxa Xesosi sākire.

Xesosi Anikaāka Teoso Tİxinemoni

(Arōkasi 24.50-53; Ātosİ 1.6-11)

¹⁹İmoİanariakori İmisākİretanapaka atoko, Xesosi anikaāka Teoso tİxinemoni. İuaā İua topāka Teoso kİkomoni. ²⁰Xesosi moİanariakori eereka İsİpekana, Teoso sākire İkİni aapokotxiti auakani İsāpiretinİna İkapani. Apİananiİ moİanātana. Apİananiİ sİkaposotiİretana nİnoa, İniniā apanakini İmarotari nİnoa sāpiretakiti atāo İnini. Ameē.

ARÓKASI

Arókasi Iókatsopata Teópiro Inakorimoni

¹ Nota Arókasi iókatsopata pite Teópiromoni. Iteene nipaxitai. Kákiti ito iókatsopatapekari ikinipoko Xesosi kamakiti Xoteoakori sauaki auakasaaki. ² Ninoa, nota pakini imarotari ikinipoko Xesosi kamakiti, kotxi Xesosi kamakiti atamatakani, isákire oerekakani, sápiretapekaua ate. ³ Nota apaka apaiaókapekari ikinipoko Xesosi sákire, ikamakiti pakini. Ininiã nota apokaerekatari ikinipoko Xesosi pirena niókatsopatini pite Teópiromoni. Merepitipanika ikamakiti nisápiretai. Ininiã eereka ikamakiti nisápiretai. Ininiã eereka ikamakiti nisápiretai, nitxaápotako. ⁴ Koerekarerini oerekepekai Xesosi pirena, ininiã uatxa pimarotari ninoa oerekakiti atão inini.

Xoão Kapatxisareri Iponaniini Sápiretiko

⁵ Erotxi inakori Xoteoakori auíte inakasaakia Xotéia tópa, iuasaaki auanãta sasetotxi Sakaria inakori. Sakaria auíte, apanakini sasetotxiakori auíte apaka, Apia inakori. Sakaria tanoro ouãka Isapeo otxaua. Oíri, oátokiri, oátokiri iri imakinikana sasetotxi itxauana. Oátokiri kitxakapiríkari Moisesi itari Arão inakori. Iua apaka sasetotxi itxaua. ⁶ Teoso nirekaákittinaira ikamana Sakaria, Isapeo pakini. Ninoa kamari ikinipoko iua paniãtakiti, Apiananiri paniãtakiti. Atão inakarinoka ikamana. !Ikerokarina ikamakitina. ⁷ Txamari ! keena. Isapeo !oposotari kamixi onini. Iuasaaki ikiomaneépeka.

⁸ Áti óti Sakaria, apanakini sasetotxiakorikata, paríkauanãta Teoso misákiretiko aikoti áki. Iuasaaki ninoatene iuaã paríkauata. ⁹ Sasetotxiakori itotari sasetotxi imereinina Apiananiri misákiretiko aikoti Iroini kamariãro arikini íkapani, ininiã iuasaaki ninoa mereéri Sakaria. Ininiã iua Iroã. ¹⁰ Sakaria aiko áki kamariãro arikanãtakasaaki, mapara kákiti apotiãtakanuia misákiretari Teoso.

¹¹ Iuasaakipeka Teoso nitiri iaxitikiri tokiã Sakariamoni kamariãro arikikoãtaã takote. ¹² Sakaria atamatakasaakiri, itikoãkata, píkarauata itxa. ¹³ Teoso nitiri misákiretari iua:

—Sakaria, kona pipíkarauatape. Teoso sikapitikaiko pamanaákiti. Ininiã pítanoro Isapeo keenepitíkaroko. Pitakauãkatariko pamarite Xoão. ¹⁴ Iua auakasaaki ikamapoxokoni-taiko pite, itori kákiti apaka. ¹⁵ Apiananirimoni apiari itxauako iua Xoão. Kona Xoão iãtapaniroko kapoãro. Erekarí Matamatakoti auariko iua ákixinireé. Inoro irokota ákipanika auakasaaki, Erekarí Matamatakoti auako iua ákixinireé. ¹⁶ Iua Xoão anikanako itomaneri kákiti Isaeo auakani Teosomoni. Apiananirimoni iua anikana. Ininiã iuaíkana ninoa kanapiriã iTeosonemonina, isákire auíkinina íkapani. ¹⁷ Xoão apokako Apiananiri apokini apisapanika. Erekarí Matamatakoti sikataparatarari Eriasi kitxakapiríkari. Iuatxíkana Erekarí Matamatakoti sikataparatariko Xoão. Ikara atoko ininiã, iua oerekariko irítxi iuaíkana amaritena itiretinina íkapani. Iua Xoão oerekariko kákiti Teoso paniãtakiti makamakani, imaerekanina itakanapinina, erekarinoka ikaminina íkapani. Paimatirenako ninoa iuasaakiko. Iua Xoão oerekariko kákiti iposope ininina Apiananiri apokini apisapanika — itxa Teoso nitiri Sakariamoni.

¹⁸ Ininiã Sakaria pimaãri:

—Kiãtokopa nitxa uatxa keenepeka ninini, kotxi nota, nítanoro apaka kiomaneépeka —itxa.

¹⁹ Teoso nitiri apakapapireta:

—Niuãka Kapiríeo. Nota auari Teosokata ipaniãtakiti nikamini íkapani. Teoso iokanatano pitemoni pite nimisákiretini íkapani, ia erekari pirena niminapiretini íkapani. ²⁰ Txamari na pauikari nisápiretakiti. Ia xika !kasákireikaiko, kotxi nisápiretakiti atãopitika. Teoso sikaenetakiti apokapitíkkako. Apokasaaki, pimarotariko nisákire atão ininiã. Iuasaakikíkaroko piposotari písákirauatini —itxa Teoso nitiri Sakariamoni.

²¹ Iuasaaki kákiti mapara auakani iãtapanãtari Sakaria.

—Kírípa ikamanãta Sakaria aiko áki? !Katimari —itxanãtana.

²² Ipokíkasaaki !kasákireikari. Ninoa kákiti imarotari Teoso misákiretiniri iua aiko áki itaponeé, kotxi !kasákireikari. Iuakoãnokara imisákiretana ninoa.

²³ Mapaóti iparíka xipoka atoko aapokomoni isipeka. ²⁴ Eereka Isapeo kamixipeka otxa. Onapari ípi ípi áti pakini kasiriti oaápoko. !Osari átiãtaã.

²⁵ —Apiananiri sikanono namarite. Erekarí ikaminano notamoni. Uatxa !nipëtauataika kákiti apisatoó. Keenepekaño —otxa.

Kapiríeo Iokanataãka Mariamoni

²⁶ Isapeo seisi pakini kasiriti kamixi onakasaaki Teoso iokanatarí nitiri iaxitikiri Kapiríeo Nasaree sitatxitimoni, Kariréia tópamoni. ²⁷ Iuaã iokanatarí iua átkoromoni Maria

inakoromoni. Oa kona sirīkapanika kikikata. Osāpiretapekari ātokori Xosee inakori iuakata oītaniriuatini ikapani. Xosee atokiri kitxakapirīka Xoteoakori auīte Tavii inakori. ²⁸ Teoso nitiri apokasaaki oamoni, akiritaro Maria:

—Ereēkai. Apiananiri pitekata aua. Iua mereēi pite. Ito ro sitoakoro ikini itixiti aua, iuaritika pitenanirako Teoso sika iteene erekari —itxaro oa.

²⁹ Maria pīkarauata Teoso nitiri sākire okenakotakasaaki.

—Kinirepa ikara atoko itxa sākireta? —otxa oākixinireē.

³⁰ Teoso nitiri txaro:

—! Pipīkarauatape, Maria. Teoso apokaerekatai pite. ³¹ Pimixiuatoko, keene pitxako. Pitakauākatariko pamarite Xesosi. ³² Iua Apiatakari itxauako. Apiananiri ākiri akiritaākako. Teoso Apiananiri kamariko iua auītetxi ininiāua. Kitxakapirīka Xoteoakori auīte Taviini. Taviini auītetxi ininiua atokokana, Teoso txīkitakariko Xesosi Xoteoakori auīte ininiua. ³³ Ātipirika Xoteoakori auīte, Xakooni apiko mekaniriakori auīte, itxauako. Iua auītetxi ininiua lixipoka —itxaro oa.

³⁴ Ininiā oa:

—Kiātokopa nitxa kikikata masirīkatokano, keenepe ninini? —otxa.

³⁵ Teoso nitiri apakapapiretaro:

—Erekari Matamatakoti apokako pākixinireē. Apiananiri posotiire ākitaiko pite, ininiā amarini auakari Teoso ākiri akiritaākako. ³⁶ Pinoromane Isapeo kiomātxipe, iuaritika kamixiro oa. Kākiti sākirema: “!Oposotaikari kamixi onini” iuaritika seisi pakini kasiritipe kamixi onini. ³⁷ Kotxi Teoso posotari ikinipoko ikamini —itxaro oa.

³⁸ —Nikamapitikariko Apiananiri nirekaākiti. Pisāpiretakiti iaōka ninirekapitika —otxa Maria.

Iuasaakipeka Teoso nitiri sipeka.

Maria Isapeomoni Motikini

³⁹ Mapaōti napa atoko Maria katimariā sari oxiratarimoni, Xotéia tōpamoni. Iuaā osari sitatximoni. ⁴⁰ Oīroā Sakaria aapoko. Oākiritaro Isapeo:

—Ereēkai —otxa.

⁴¹ Isapeo kenakotakasaakiri Maria akiritiniro oa, iuasaaki amarini otikakoākiri oākika. Iuasaakipeka Erekari Matamatakoti itapararitika apoka Isapeo ākixinireē. ⁴² Iuasaaki otapararitika otxaro Maria:

—Kaiāopokoro sito itixi auakani, iuaritika pitenokara Teoso sika apia erekari. Apaka Teoso sikariko erekari pamaritemoni. ⁴³ Erekari Teoso kaminano nota, kotxi niauīte inoro motikaētano. Kinirepa ia erekari Teoso kaminano, kotxi nota minakato nitxaua. ⁴⁴ Nikenakotakasaakiri “Ereēkai” pininino, namarite nitikakoākiri oākika, ipoxokoniua-tiniā. ⁴⁵ Teoso sikari erekari pitemoni, kotxi pite auikari isākire. Pite auikari isikaenetakiti atāo isikinii —otxa Isapeo Mariamoni.

Maria Xikaretakiti

⁴⁶ Maria txari:

“Erekapitikari Apiananiri notamonikari.

⁴⁷ Nipoxokoniua, kotxi Teoso nimaerekani makatxaākari itxaua.

⁴⁸ Nipoxokoniua, kotxi ixinikano nota. Initero poiāoro nitxaua. Īkorakanani eereka auakani kākiti txanoko: ‘Teoso kamapoxokonitaro, erekari isikiniro,’ txanoko nota.

⁴⁹ Nipoxokoniua, kotxi Teoso Apiananiri kaminano posotiiretxi. Maerekati ! auari iuamoni.

⁵⁰ Iua amonīkari kākiti iua paxitakani, kitxakapirīkarini, Īkorakanani auakani, eereka auakani apaka iamoniāka.

⁵¹ Pataparari iua, ininiā ikamari posotiiretxi. Teoso txīkitakana kākiti iuikakaniua minakani ininiāuana, kotxi ākixinireē iuikauana.

⁵² Teoso makatxakapekari auītetxi pataparari inakanua. Eereka auītetxi !itxauka nino. Kākiti poiāorini inakanua Teoso kamari auītetxi ininiāuana.

⁵³ Isikakienatari natxitakani. Iokanataro katxineiroteri sini. Kona xatiki isikari iuamoni.

⁵⁴ Imoianatapekana Xoteoakori, iua ikapani parīkauatakani. !Imaxinīkaretari iamoniākinina nino.

⁵⁵ Kitxakapirīka Teoso xinikari Apraōni iamoniākini. Apaka iua tikini auakani ātipirika iamoniāka, kotxi: ‘Nimoianataiko hīte,’ itxa anirimanemoni kitxakapirīkarinimoni,” otxa Maria.

⁵⁶ Okaikota ipi, āti pakini kasiriti Isapeokata. Eereka oaāpokomoni kanapiriā otxa Maria.

Xoāo Kapatxisareri Iponaniini

⁵⁷ Amarini auini òti apopeka. Isapeo auãkitakari amarini kiki. ⁵⁸ Oaãpoko takote auakani, onirimane pakini kenakotari erekari Teoso kaminaro oa, ininiã ninoa, Isapeo pakini poxokopeka itxana ninoa.

⁵⁹ Oito òtisaaki, onirimane motika oamoni, Teoso takaòtxikare amarinimoni itakinina ìkapani. Inirekarina iuãka Sakaria itakauãkatinirina, kotxi iri uãkatxikana ninoa nireka itakauãkatinirina. ⁶⁰ Txamari inoro:

–Kona Sakariani iuãka. Xoãorako akiritaãkako –otxa.

⁶¹ Ininiã ninoa txaro:

–Pinirimane àtika kona Xoão txa uãkataua.

⁶² Ninoa pimaãri amarini iri Sakaria iuakoãna amarini uãka inirekaãkiti. ⁶³ Ininiã Sakaria amanaãri iòkatsopatiko. Iòkatarì: “Imi uãka Xoão.” Ininiã ikinimane tsorìkaãta.

⁶⁴ Iuasaakipeka Teoso sikaposotiiretari isãkirauatini:

–Peerekari Teoso –itxa Sakaria.

⁶⁵ Kãkiti iua aapoko takote auakani pìkarauata. Teoso posotiire ipìkana. Ikara inakariene Sakaria, Xoão pakini pirena iaripireta oxiratarì Xotéia tòpa, ininiã kãkiti iuaãtaã sãpirenauanãta ikara pirena. ⁶⁶ Kãkiti ikara inakariene kenakotakani tsorìkaãta:

–Kanatokopa inakaripa itxatapaniua ia amarini? –itxana.

Ikinimane imarotari Apiananiri nìkatiniri iua amarini.

Sakaria Xikaretakiti

⁶⁷ Iuasaaki Erekari Matamatakoti sikaposotiiretari Xoão iri Sakaria, ininiã Sakaria sãpiretari Teoso sãkire:

⁶⁸ “Peerekari Apiananiri aTeosone, ikinimane Xoteoakori Teosone, kotxi iua apoka inakitiakorimoni imakatzakinina ìkapani, imapinakanina ìkapani.

⁶⁹ Teoso iokanatarì kãkiti maerekani makatzakakari kaposotiireri atemoni. Teoso nitiri Taviini mekanirira iua.

⁷⁰ Kitxakapirìka Teoso sãkire sãpiretakani erekarini sãpiretari ikara Teoso sãkire.

⁷¹ Teoso txari: ‘Nimakatzakaiko hìte himokaiakari mokakanii tìkane, homanatakini mokakanii tìkane.’

⁷² Isãpiretari aãtokiriakorini kitxakapirìkarini:

‘Niamonìkai. Nikamariko nikamaenetakiti hìte ìkapani,’ itxa ninoamoni. Ikara Teoso kamaenetakiti erekari.

⁷³ Kitxakapirìka Teoso txari aãtokiri Apraãoni: ‘Kona nimaxinikaretari nisikaenetakiti.

⁷⁴ Nimakatzakapitikaiko hìte himokaiakari mokakanii tìkane, ininiã hìparìkauata nota ìkapani mapìkaretika.

⁷⁵ Ininiã hìte auini erekari. Kona hìkamari maerekati hãuapanika hinakasaaki,’ Teoso txari Apraãoni.

⁷⁶ Pitepekana namarite Xoão, Teoso sãkire sãpiretakari pitxauako. Teoso Apiananiri iaxitiki sãkire sãpiretakari pitxauako. Pite sari Apiananiri apisa. Ikinika pima-iamatako iua apokini apisa, ikinika iposope inini ìkapani.

⁷⁷ Pisãpiretariko kãkiti Teoso nakitiakori, Teoso makatzakiniri maerekanitxi kãkiti kamakiti. Ininiã ninoa imarotariko ikara.

⁷⁸ Katiraòkiri aTeosone. Kaamonìkareri iua. Ininiã iua tixinekiri apokako atemoni. Atokatxi pokìkini atoko itxako. Iuasaaki ipiã !auaika, kotxi iua makatzakari amaerekani.

⁷⁹ Ininiã iua iopinikari kãkiti xinire, ipinini pìkakani xinire. Ipiãã auakani atoko ninoa. Ininiã iua iopinikari axinire Teoso kimapore aimarotini ìkapani, aãuini ereka inini ìkapani.”

Itxa Sakaria xikare.

⁸⁰ Iua amarini aneë. Teoso sãkire iaòka ikamapika. Teoso sãkire Xoteoakorimoni imasãpiretakani apisapanika àparaã makìpakaniãtaã aua Xoão.

2

Xesosi Iponaniini Pirena

(Mateo 1.1-25)

¹ Iuasaaki Homanoakori auite Sesa Akósito inakori. Iua paniãtana initiriakori iaòtiniri ikininape kãkiti iua auitexi ininiãtaãua tòpa auakani, ikini aapokotxitikini uãka imakatzakinini ìkapani. ² Mitxi Sesa Akósito likamapanikari kãkiti iaòtiko. Iuasaaki Síria tixini auakani auite Sirénio inakori. ³ Iuasaaki ikinimane sari sitatximoni iponaniiniãtaãna. Iuaã isikarina iuãkana.

⁴ Ininiã Xosee apaka sari iuaãa isikini Ìkapani. Ininiã ipotorika Nasaree sitatxiti Kariréia tópa. Xotéia tópamoni isa, Pereë sitatxitimoni. Iuaã isa, kotxi iuaã auítetxi Taviini kitx-akapiríka aua. Taviini nirimane itxaua Xosee. ⁵ Isa Mariakata. Ítanoro tíkane oa. Iuasaaki litakapanikaro. Kamixipeka otxa iuasaaki. ⁶ Pereë apoka itxana. Iuaã auakasaakina, aua itxa amarini. ⁷ Oáuãkitakari merepitipanika oimi kiki. Ininiã mākaxi mataã oiapirikari, pirātxi nipokotini tiitxitiã tere otxari amarini, kotxi kākiti imakanakiniãtaã imakinika xāpokapeka, ininiã ninoa auanãta pirātxi auiniãtaã.

Soti Auíte Piratakani Pirena

⁸ Iuaãtaã Pereë sitatxiti mapotókire Íkanõka kikiakori soti auíte piratakani nikanãtari ipiraakorina. ⁹ Iuasaaki katimaritika Apiananiri nitiri iaxitikiri tokiã ninoamoni. Iuasaaki Apiananiri iotximere iopinikari ninoa auiniãtaã, ininiã imarotarina Teoso apokini iuaãtaã. Ininiã iteene ipíkarauatana ninoa. ¹⁰ Ininiã Teoso nitiri txana ninoa:

—!Hípíkarauatape. Nota minapiretari erekari pirena ikinimane kākiti eneníkini Ìkapani, ¹¹ kotxi ia õti kākiti maerekani makatxaākari iponaniãpeka Taviini auini sitatxitiã. Iua Teoso mereëkiti. Apiananiri iua. ¹² Himarotariko nisãkire atão inini, kotxi hāpokariko ia amarini mākaxi mataã iapirikiko pirātxi nikini tiitxitiã —Teoso nitiri txana ninoa.

¹³ Iuasaakipeka itomaneri Teoso nitiriakori iaxitikini tokiã iuaãtaã. Ninoa xikarauata Teoso Ìkapani. ¹⁴ Ixikaretarina:

—Peerekari Teoso, iaxiti apiko nopinixiti auakari. Iua kamaerekaxiniretari kākiti iua apokaerekatakini —itxana ixikarena.

¹⁵ Teoso nitiriakori kanapiriã itxana Teoso tixinemoni. Iuasaaki ninoa pirātxi nīkatakani misãkiretakakaua:

—Masa Pereëmoni. Maãtamatari ikara Apiananiri sãpiretakiti —itxana.

¹⁶ Ininiã katimaritika isana Pereëmoni. Iuaã apokasaakina, initarina amarini. Apokana Xosee, Maria pakini. Ininiã atamatarina amarini pirātxi níkini tiitxitiã. ¹⁷ Ikara atamaãakana atoko, isãpirenãtarina Teoso nitiri sãpiretakiti amarini pirena ikinimanemoni. ¹⁸ Kākiti kenakotakasaakiri soti auíte nīkatakani sãpiretakiti, ikinimane tsoríkaãta iuasaaki. ¹⁹ Maria kenakotakasaakiri soti auíte nīkatakani sãpiretakiti, oa ákixinireë onīkatari ikara ene. !Omaxinīkaretari ninoa sãpiretakiti. Oxinīkapikari. ²⁰ Eereka pirātxi nīkatakani kanapiriã ipiraakori auinimoni. Imisãkiretakakana:

—Peerekari Teoso. Apiananiri iua, kotxi erekapitikari aítikakiti. Erekapitikari initiri iaxitikiri sãpiretakiti. Isãpiretakiti atãopitika, kotxi aãtamatari isãpiretakiti iaõka —itxanãtana ninoa soti auíte nīkatakani.

Xesosi Takauãkatiko

²¹ Xesosi oito õti auakasaaki, inirimane kamari Teoso takaõtxikare iitoã. Iuasaaki inirimane takauãkatari Xesosi, kotxi iua iaõka Teoso nitiri iaxitikiri sãpiretapekaro Maria oa kamixi oinini apisapanika.

Xesosi Anikiko Teoso Misãkiretiko Aikotimoni

²² Moisesini ketotiniri manapi Xosee, Maria pakini kamari Moisesini paniãtakiti iaõka amarini auakasaaki, Xosee, Maria pakini maerekani Teoso makatxakini Ìkapani. Ikara xipoka atoko anikarina Xesosi Xerosareë sitatxitimoni Apiananirimoni isikinirina Ìkapani, ²³ kotxi Apiananiri paniãtakiti iõkatsopatakori txari:

Merepitipanika iponaniãkari sikaãkako Teosomoni, kotxi Teoso nakiti iua.

²⁴ Apaka Apiananiri paniãtakiti iõkatsopatakori txari:

Amarini iponaniãkasaaki, ipi kamao pisika Teosomoni. Iminakaniã, ipi kamao ákiri pisika Teosomoni,

itxa Teoso. Ininiã Xosee, Maria pakini sari Xerosareë kamao isikinina Ìkapani.

²⁵ Iuasaaki kiki Simião inakori aua Xerosareë. Iua erekari kamakari. Ikinipoko Teoso paniãtakiti ikama. Erekari Matamatakoti auari ákixinireë. Ákixinireë iãtapanãtapikari Teoso Mereëkiti apokini, kotxi Isaeo auakani maerekani makatxaākari itxaua. ²⁶ Erekari Matamatakoti sãpiretaperari iua: “Pipinini apisa paõkitapanikariko Apiananiri Mereëkiti,” itxari Simião. ²⁷ Erekari Matamatakoti sikanireõtari Simião aiko Teoso misãkiretiko aikoti Íroini. Iuasaaki Xosee, Maria pakini Íroã iuaãtaã, Apiananirimoni Xesosi isikinina Ìkapani, Teoso paniãtakiti ikaminina Ìkapani. ²⁸ Iuasaakipeka Simião apakapari Xesosi:

—Peerekari Teoso. ²⁹ Níauíte Apiananiri, uatxa apokapeka ia amarini pisikaenetakiti. Nota pite Ìkapani paríkauatakarino. Uatxa niposotari nípinini erekaxinirepeka ninini, ³⁰ kotxi nota atamatari ia amarini piokanatakiti atemoni, amaerekani imaktxakini Ìkapani, amapinakani Ìkapani. ³¹ Pite iokanatapekari ia Íkorapokorititi ikini itixiti auakani maerekani imaktxakini Ìkapani. ³² Ia amarini tirikapi atoko, kotxi iopinikariko pikimapore, pisãkire Xoteo minakanua imarotini Ìkapani. Ia amarini tirikapi apiatakari atoko

Xoteoakorimoni pinakitiakorimoni, kotxi oerekai pite ninoamoni –itxa Simião sãkire Teosomoni.

³³ Xosee, Xesosi inoro apaka tsorikaãnãta ikara Simião sãkire ikenakotakasaakina. ³⁴ Simião amanaãri Teoso ikinipoko erekari ninoamoni isikini ikapani. Eereka imisãkiretaro Maria, Xesosi inoro:

–Teoso mereëri ia amarini Xoteoakorimoni iokanatiniri ikapani. Ia apakapakari Teoso apakapa apaka. Ia mapakapakati Teoso !apakapari. Imisiritaãkako. Ia amarini oerekari Teoso kãkitimoni, txamari itori kãkiti !auikari isãkire. ³⁵ Ikara atoko ininiã, itori kãkiti xiniãkiti kipatakori ãkixinireë, imarotaãkako. Pitepekana pite matinaniuatako. Pãkipa iouata iorotini tsii atoko itxako –itxa Simião sãkire Mariamoni.

³⁶ Iuasaaki oãua sito Teoso sãkire sãpiretakaro Ana inakoro. Panoeo ãkero oa. Oãtokiri kitxakapirika Asee inakori. Iuasaaki kiomãtxipekaro oa. Oãua setxi ano òtanirikata. Eereka ipiãpe. ³⁷ !Oitaniriuataika. Oitëta koatrokananipeka oãuini. Oa auapika Teoso misãkiretiko aikoti ãki. Iuaã ikini òti, ikini ikanõkati pakini omisãkiretapikari Teoso. Itokata otakanapari onipokotini Teoso omisãkiretini ikapani. ³⁸ Xosee, Maria pakini Simião misãkiretaka atoko Ana apoka. Omisãkiretari Teoso:

–Erekapitikari ia amarini pimereëkiti kãkiti iãtapakiti piokanatiniri atemoni –otxa. Eereka osãpirenauata Xesosi apokini pirenã Xerosareë auakanimoni kãkiti maerekani makatxaãkari iãtapakanimoni.

Nasaree Sitatxitimoni Ikanapiriina

³⁹ Xosee, Maria pakini Apiananiri paniãtakiti iõkatsopatakori imakinika ikamaãkana atoko, kanapiriã itxana Karirëia tõpamoni. Iuaã isana aapokomonina Nasaree sitatxitiã. ⁴⁰ Iua amarini aneë. Itapara auãapotari. Kimaroreri itxaua. Teoso iteene tiretari iua Xesosi.

Xesosi Misãkirenãtari Koerekareri

⁴¹ Ikinikanani Xosee, Maria pakini sari Pãskoã kiiniritimoni Xerosareë sitatxitimoni. ⁴² Xesosi tosi anopeka inakasaaki, isana Xerosareë auakari kiiniritimoni mitxi isanãtinina atokokana. ⁴³ Kiiniri xipoka atoko Xosee, Maria pakini poterika aapokomonina isinina ikapani. Iuasaaki Xesosi kaikota Xerosareë. Txamari ninoa !imarotari ikaikotini. ⁴⁴ Ninoa uãkatamari apanakini inirimanekata isini. Ikara atoko ininiã, ikimaporitana ãti õtipeka. Mapiãnikata ipixinipokoriti initamarina inirimanemoni, aõkimaneremoni. !Apokarina. ⁴⁵ Ininiã ikanapiriãna Xerosareëmoni iuaãkana initinirina ikapani. ⁴⁶ Ipi, ãti pakini òti initapiimarina. !Apokarina Xesosi. Eereka apokarina Teoso misãkiretiko aikoti ãki. Moisesi sãkire oerekakanikata iitopãkanãta. Xesosi kenakonãtari ninoa sãkire. Apaka ipimarauata. ⁴⁷ Ninoa Xesosi sãkire kenakotakani tsorikaãnãta, kotxi paimatireri iua. ⁴⁸ Xosee, Maria pakini apokasaakiri iua, kona imarotarina Xesosi parika. Inoro txari:

–Namarite, kinirepa pimisiritaua ate? Piri, nota pakini pikamamaxirexiniretaua ate. Anitapiimai. Kona aãpokai –otxari Xesosi.

⁴⁹ Ininiã Xesosi:

–Kinirepa hinitanãtano? Kona himarotatari uai niri aapoko ninirekari nauini, ipaniãtakiti nikamini ikapani –itxa.

⁵⁰ Txamari ninoa !imarotari Xesosi sãkire.

⁵¹ Ikara atoko ininiã, Xesosi kanapiriã ninoakata Nasaree sitatxitimoni. Ikinika Xosee, Maria pakini sãkire ikãpita. Inoro xinikapikari Xesosi sãkire oãkixinireë. Opotxitari oxinikiniri Xesosi sãkire. ⁵² Xesosi aneë. Imatire apaka aneë. Teoso apokaerekatari Xesosi. Kãkiti apaka apokaerekatari Xesosi.

3

Xoão Kapatxisareri Sãpiretakiti

(Mateo 3.1-12; Marko 1.1-8; Xoão 1.19-28)

¹ Homa sitatxitiã Homanookori auite Txipërio inakori iua. Kisi anokananipeka iua auitexi ininiua iuasaaki. Iuasaaki Xotëia tõpa auakani auite Põsio Pirato inakori. Karirëia tõpa auakani auite Erotxi inakori. Erotxi itari Piripi inakori. Itoreia tixini auakani auite, Takonitxi tixini auakani auite apaka itxaua Piripi. Iuasaaki Apireni auakani auite Arisãnia inakori. ² Iuasaaki Anasi inakori, Kaipasi inakori pakini sasetotxi auiteakori apiatakani itxauana ninoa. Iuasaaki Teoso sãpiretari isãkire Xoãomoni Sakaria ãkirimoni, ãparaã makipakaniãtaã auakasaaki. ³ Ininiã Xoão sari ikininape kãkitimoni, uini Xotão takote auakanimoni. Isãpiretari Teoso sãkire:

–Hitakanapariko himaerekani. Eereka patxisata hinaãkako. Ikara atoko hininiã, Teoso makatxakini himaerekani –itxanãta Xoão ikininape kãkitimoni.

⁴ Kitxakapirika Teoso sãkire sãpiretakari Isaia inakori iõkatsopatari:

Auako kiki āparaā makipakaniātaā. Isāpirenauatoko. Itxariko: “Hōeretariko kimapori Apiananiri apokini apisapanika. Itīkaāpo erekari hīkamako iua napini ikapani.

⁵ Kipatxiā ixāpōkakaākako ikini isauana. Ixirata miriī oerekataākako. Kimapori ikitokare oerekataākako. Kimapori pakota totaākako.

⁶ Ikinimane kākiti itixi auakani imarotariko Teoso makatxakiniri kākiti maerekani imapanikani ikapani,” itxanāta.

Ikara atoko itxa Isaia iōkatsopatakiti Xoāo pirena. Kimapori kākiti oerekatini atokokana, auītetxi apokini apisa, iua atokokana Xoāo nirekari kākiti iposope inini Apiananiri apokini apisa, imaerekanina itakanapinina ikapani.

⁷ Itomaneri kākiti sari Xoāomoni ipatxisatikona ikapani. Ininiā Xoāo:

—Imini katsiiri anaakorirai hīte. Teoso misiritapitikai himaerekani xika. Himitekini ! auari. Hinirekari hīpatxisatiko, txamari ! hinirekari hītakanapiniri himaerekani.

⁸ Hinirekiniāri himaerekani hītakanapini, ininiā hīkamariko erekari. Ikara atoko ininiā, hōerekari Teoso atāo hītakanapiniri himaerekani. Hākixiniremoni ! hīxinikapiri: “Teoso apakapapitikuauako ate, kotxi ate atokirini Apraāoni txaua,” !hītxapeko. Ari, nota sāpiretai hīte, Teoso nirekiniāri, iposotari ia kai soroā Apraāoni mekaniriakori ikamini. Kona Apraāoni posotari anikini Teosomoni. ⁹ Aamina maereka iriti atoko hītxa. Teoso iposopeka hīte ixipokini. Kākiti auari ikitaita kauanari aamina maereka iriti itokini ikapani. Ikinika aamina maereka iriti tokaākako. Xaminaā oka inaākanako. Teoso kamakiti iua atokokana itxa. Ininiā Teoso kitaite kauanapeka, aamina kotsa sauakiko tīkane. Iua atokokana ininiā, Teoso aiamaapeka hīte ixipokini ikapani —itxa Xoāo ninoamoni.

¹⁰ —Ikara atoko ininiā, kipa akama Teoso mamisiritakanuia ikapani? —itxarina.

¹¹ Ininiā Xoāo apakapapireta:

—Pimāka kauanata ipi auiniāi, āti pisika mākatxi kauanata mauakinitimoni. Nipokori auiniāi, pisikari nipokori mauakinitimoni —itxa Xoāo sākire.

¹² Kikiākini, txineiro apakapakani Homano auīte nitiriakori, apoka apaka ipatxisatikona ikapani.

—Koerekareri, atepékana, kipa ate kama Teoso mamisiritakanuia ikapani? —itxarina.

¹³ Ininiā Xoāo:

—Kākiti txineirote himaktxakakito, Homano auīte nireēkito iaōka himaktxakako. Apikomoni !himaktxakapero —itxana.

¹⁴ Ātikaka sotatoakori apaka pimaāri:

—Atepekana, kipa ate kama amaerekani atakanapini ikapani?

Ininiā Xoāo:

—!Himaīkapiri kākiti, itxineirote himixirikini ikapani. Kona āti maxikatīka !hāpoītape. Hīpoxokoniuatoko txineiro hāpakapakitoā hīparīka īki. !Hinirekapero apikomoni —itxa sotaokorimoni.

¹⁵ Iuasaaki kākiti iāpapanātari Teoso mereēkiti apokini. Ininiā Xoāo sāpiretakiti ikenakotakasaakina, ākixinireēna ixinikarina:

—Xoōkani Teoso mereēkiti txataua atxiīti? —itxanātana ixinikanātakitina.

¹⁶ Ininiā Xoāo:

—Āparaaānokara nipatxisatai hīte. Nota tikini apoākari patxisataiko hīte Erekarer Mata-matakotiā, xaminaā pakini. Apiatakari itxaua iua. !Apakata iua takote napokini ikiti mata nimaktxakini ikapani, kotxi iua apiata. Nota poiāoka. Imaktxakari himaerekani, itxiko metao āki auakari arikini atoko. ¹⁷ Katakakereri āpokari ahoisi otāta imaktxakini ikapani. Otāta arikaāka. Oki nīkataāka ikiena nīkatikoātaā. Iua atokokana Teoso nīkatariko kākiti erekarini. Maerekati kamakani arikaākako xamina maxipoākatīā.

¹⁸ Ikara atokora itxa Xoāo sāpirena otākikinina kākiti. Isāpiretari erekari pirena Teoso pirena kākitimoni. ¹⁹ Āti ōti Xoāo pinitari Erotxi, Kariréia auakani auīte:

—Pitakinīāro pitari Piripi Itanoro Erotxia inakoro, maerekati pikama. Apaka apikomoni maerekati pikamapitipo —itxa Xoāo.

²⁰ Ininiā iuasaaki iuaīkana Erotxi kamari maerekati, kotxi itakari Xoāo kateia āki isākire imapokaerekatakani xika.

Xesosi Patxisatiko Pirena

(Mateo 3.13-17; Marko 1.9-11)

²¹ Xoāo Erotxi māikini apisapanika ikinimane kākiti ipatxisatakasaaki, Xesosi apaka patxisataāka. Iuasaaki Xesosi sākirauatakasaaki Teosokata, iaxiti takaka. ²² Erekarer Mata-matakoti katxaka Xesosi nopini. Kamoā katxakini atoko itxa ikatxakini. Iuasaaki ikenakotaāka iaxitikiri sākire:

—Pite namarite, nitiretakiti, napokaerekatai, kotxi ninirekakiti pikama —itxa.

*Xesosi Nirimaneakori Iua Apisapanika Auakani**(Mateo 1.1-17)*

²³ Iuasaaki Xesosi potorika iparĩkauatini Teoso ikapani. Trĩta anokananipeka itxaua iuasaaki Xesosi. Kãkiti uãkatari iua Xosee ãkiri ininiãua.

Xosee iri Erii.

²⁴ Erii iri Matatxi.

Matatxi iri Arevii.

Arevii iri Meokii.

Meokii iri Xanai.

Xanai iri Xosee.

²⁵ Xosee iri Matatxia.

Matatxia iri Amosi.

Amosi iri Naoõ.

Naoõ iri Esirii.

Esirii iri Nakai.

²⁶ Nakai iri Maatxi.

Maatxi iri Matatxia.

Matatxia iri Semei.

Semei iri Xosee.

Xosee iri Xota.

²⁷ Xota iri Xoanaã.

Xoanaã iri Hesa.

Hesa iri Soropapeo.

Soropapeo iri Saratxieo.

Saratxieo iri Nerii.

²⁸ Nerii iri Meokii.

Meokii iri Atxii.

Atxii iri Kosaã.

Kosaã iri Eomataã.

Eomataã iri Eri.

²⁹ Eri iri Xosoe.

Xosoe iri Eriesa.

Eriesa iri Xoriĩ.

Xoriĩ iri Matatxi.

Matatxi iri Arevii.

³⁰ Arevii iri Simião.

Simião iri Xotaa.

Xotaa iri Xosee.

Xosee iri Xonaã.

Xonaã iri Eriakiĩ.

³¹ Eriakiĩ iri Mereaa.

Mereaa iri Mena.

Mena iri Matata.

Matata iri Nataã.

Nataã iri Tavii.

³² Tavii iri Xesee.

Xesee iri Opetxi.

Opetxi iri Póasi.

Póasi iri Sáomõ.

Sáomõ iri Nasoõ.

³³ Nasoõ iri Aminatapi.

Aminatapi iri Átximĩ.

Átximĩ iri Anii.

Anii iri Ésirõ.

Ésirõ iri Péresi.

Péresi iri Xotaa.

³⁴ Xotaa iri Xakoo.

Xakoo iri Isaki.

Isaki iri Apraão.

Apraão iri Tera.

Tera iri Nakoo.

³⁵ Nakoo iri Seroki.
 Seroki iri Hakaoo.
 Hakaoo iri Pareki.
 Pareki iri Epi.
 Epi iri Sara.
³⁶ Sara iri Kainaã.
 Kainaã iri Apaxatxi.
 Apaxatxi iri Seĩ.
 Seĩ iri Noe.
 Noe iri Arameki.
³⁷ Arameki iri Metosareẽ.
 Metosareẽ iri Enoki.
 Enoki iri Xaretxi.
 Xaretxi iri Marereo.
 Marereo iri Kainaã.
³⁸ Kainaã iri Enosi.
 Enosi iri Setxi.
 Setxi iri Adão.
 Adão iri Teoso. Imapotókirepe.

4

Satanasi Nirekari Xesosi Kaminiri Maerekati
 (Mateo 4.1-11; Marko 1.12-13)

¹ Xesosi ipatxisatiko atoko, Erekarı Matamatakoti iteene sikaposotiiretari iua. Erekarı Matamatakoti txĩkitakari Xesosi uini Xotão itakanapini, ãparaã makipakaniãtaã isini İkapani.

² Iuaã koarẽta õti auakasaaki, Satanasi atamakaerekatari Xesosi. Koarẽta õti manipokotakinoka itxa Xesosi. Ininiã natxinoka itxa Xesosi.

³ Ininiã Satanasi txari:

–Pite Teoso ãkiri pitxaua, ininiã ia kai soro komiri pitxĩkitaka –itxari Xesosi.

⁴ Ininiã Xesosi apakapapiretari:

–Kona, kotxi Teoso sãkire iõkatsopatakori txari:

Kona komirinanini txĩkitakari kãkiti ãtipirika auini tĩkane. İkinika Teoso sãkirera txĩkitakari kãkiti ãtipirika auini tĩkane.

⁵ Ininiã iuasaaki Satanasi anikari Xesosi ixirata nopinixiti. Iuaã pakoteri oerekiniri İkinimane tixine. ⁶ Ininiã Satanasi:

–Nota posotari nisikini İkinimane auĩtetxiakori posotiire. İkinipoko ninoa txineirote apaka niposotari nisikini. Merepitipanika notamoni isikaãka ia posotiiretxi, ininiã nota sikari ninirekaãkitimoni. ⁷ İkara atoko ininiã, piteosonetiniãno, ia posotiiretxi nisikai pite –Satanasi txari Xesosi.

⁸ Ininiã Xesosi:

–Konapitini. Pisipeka Satanasi. Teoso sãkire iõkatsopatakori txari:

Apiananiri piTeosone. Iuanokara piteosoneta. Iua İkapaninokara piparĩkauatako.

⁹ Ereka Satanasi anikari Xesosi Xerosareẽmoni, aiko Teoso misãkiretiko nopinixiti. İtanoxiti paĩtanori. Pamonõkoniri. Iuaã itxari:

–Teoso ãkiri pininiãua, pokaua xiti. Ininiã İkinipoko kãkiti imarotariko Teoso ãkiri pininiãua, ¹⁰ kotxi Teoso sãkire iõkatsopatakori txari:

Teoso iokanatanako initiriakori iaxitikini pite inĩkatinina tĩkane.

¹¹ Ninoa maĩkai pimapinakani tĩkane, ininiã pikarouatini !auari. Kona kai soro karotari pikiti,

itxa Teoso sãkire –Satanasi txari Xesosi.

¹² Ininiã Xesosi:

–Teoso sãkire iõkatsopatakori apaka txari:

Kona patamakaerekatapiri Apiananiri piTeosone, –itxari.

¹³ Iuasaakipeka Satanasi atamakaerekatiniri Xesosi xipope. Ininiã itakanapari Xesosi ãti õti iuaĩkana İkanapiriini iuamoni İkapani.

Xesosi Mipotorikari İparĩka Karirẽia Tõpa
 (Mateo 4.12-17; Marko 1.14-15)

¹⁴ İkara inaãka atoko Xesosi kanapiriã Karirẽia tõpa auakanimoni. Paposotiireri, kotxi Erekarı Matamatakoti auari iuakata. Iua pirena iaripireta İkini Karirẽia tõpa auakanimoni.

¹⁵ Iua oerekarauata aiko ãki Xoteo apotiitiniãtaãua. Ininiã İkinimane txari:

—Peerekari iua, kotxi erekapitukari iua sãpiretakiti —itxana.

Nasaree Auakani Kona Auikari Xesosi Sãkire

(Mateo 13.53-58; Marko 6.1-6)

¹⁶ Eereka Xesosi sari Nasaree sitatxitimoni. Iuaã Xesosi aneë mitxi. Xoteo tomatini õtisaaki Xesosi itotapekari aiko Xoteo apotiitiniãtaãua isini. Ininiã iuasaaki, Xoteo tomatini õtisaaki isari iuaã. Iuaãtaã itima Teoso sãkire iõkatsopatakori atatsopatini ikapani. ¹⁷ Teoso sãkire sãpiretakari Isaia iõkatsopatakiti tsopa isikaãka. Ininiã imatakireëri aãtsopa. Ia Teoso sãkire inita, atatsopata itxa:

¹⁸ —Erekari Matamatakoti notakata aua, ininiã Apiananiri mereëno nota matxineirotenimonikari erekari pirenã nisãpiretini ikapani. Iokanatanõ kateia ãki auakani nisikakini ikapani. Iokanatanõ mõsiãrenimoni iuaãkana atamarauatinina ikapani. Iokanatanõ misiritakonimoni, ninoã misiritakani ñixipokini ikapani.

¹⁹ Ipaniãtano kãkiti nisãpiretini: “Ikorakanani Teoso apokapeka kãkiti maerekani imakatzakini ikapani, imapinakanina tãkane.”

Ikara atatsopata Xesosi.

²⁰ Aãtsopa iapirikaãka atoko, sika itxari sasetotxi nitirimoni. Ikara inaãka atoko Xesosi topãka. Imakinika kãkiti aiko Xoteo apotiitiniãtaãua ãki auakani, imakinikana atamatari Xesosi, isãpiretakiti kinirãõ kenakotaka inakani. ²¹ Ininiã Xesosi sãpiretana:

—Ikara Teoso sãkire hãkenakotakiti apokapeka uatxa —itxa ninoamoni.

²² Ikinimane kãkiti sãpirenauata Xesosi ereka inini. Itsorikaãnãtana isãkire erekari ikenakotakasaakina:

—Kiãtokopa ininiãpa imarotatari ikara atoko inakari isãpiretini? Kotxi Xosee ãkirira iua, minakati ãkirira iua —itxanãtana.

²³ Ininiã Xesosi txana ninoã:

—Atxiiti hite txanoko nota imatiretxi kitxakapirãka kiomãtxiakori sãkire. Ninoã txari: “Pinãtxi imarotakari pininiãua, piteka pipitaua.” Atxiiti hãxinikanãtari: Kapanaoõ sitatxiti nauakasaaki, nikamari posotiiretxi iuaãtaã. Kinirepa na nikamatari posotiiretxi uai nauiniãtaã? Ikara atoko atxiiti hãxinikanãta. ²⁴ Atãõ nisãpiretai, kãkiti Teoso sãkire sãpiretakari inirimane sauaki auakasaaki, inirimane !auikari isãkire. Ia xika kona nikamari posotiiretxi uai. ²⁵ Atãõpitika nisãpiretai hite. Kitxakapirãka Teoso sãkire sãpiretakari Eriasi inakori auakasaaki, ipi ãti pakini ano ipixini ano pakini ãparaã !kipa. Iuaã Isaeo tixini natxinoka aua. Iuasaaki kaiãopokoro sitoakoro tikinitakoro auari iuaãtaã. ²⁶ Iuaritika Teoso liokanitari Eriasi ninoã ikininapemoni. Iokanatarari ñixita sitomoni tikinitakoromoni, nipokori isikiniro ikapani. Oa sito aua Sarepita sitatxiti Sitoõ tãpa, Isaeo tixini takote. Xoteo lotxaua oa.

²⁷ —Ikara atokotxikana itxa Teoso sãkire sãpiretakari Eriseo inakori. Iua auakasaaki, kaiãopokori amianatakani maere matati Isaeo tixini auakani aua. Kona imakinikani erekapeka inaãkana. Kiki Naamaã inakori Siria tixini auakari, iuanokara erekapeka itxãkitakaãka. Iua Naamaã kona Xoteo litxaua iua —itxa Xesosi ninoamoni.

²⁸ Ikinimane aiko ãki apotiitakaniua, ikara ikenakotakasaakina, iteene inaiatauana. ²⁹ Ininiã ikosekaãtotarina Xesosi sitatxi mapotõkiremoni. Anikarina ixirata nopini sitatxi auiniãtaã. Iuaã inirekarina Xesosi okinina ixiratamoni ipinini ikapani. ³⁰ Txamari Xesosi napari ninoã sauaki, ikorape itxa.

Kiki Maerekati Matamatakoti Auaãtotakiti

(Marko 1.21-28)

³¹ Eereka Xesosi sari Kapanaoõ sitatxitimoni Karirãia tãpa. Iuaã tomatiko õtisaaki oerekana kãkiti Teoso sãkire. ³² Kãkiti iuaã auakani tsorikaãnãta oerekakiti ikenakotakasaakina, kotxi paimatireri iua. Isãpiretakiti atãonoka itxa isãkire. ³³ Iuasaaki aiko ãki kãkiti apotiitiniãtaãua, aua kiki maerekati matamatakoti auaãtotakiti.

³⁴ Iua kiki ãkixinire auakari akiripoakata:

—Xesosi Nasareekiri, kipa ãkai uai? Kiãtokopa pitxataua ate? Atxiiti papoka ate pixipokini ikapani? Nota imarotai pite. Pite maerekati mauakinini pite. Teoso nakiti pitxaua pite —itxa maerekati matamatakoti Xesosimoni.

³⁵ Ininiã Xesosi txitari iua. !Auiritari isãkirauatini:

—Maãtako. Posipikari ere kiki —itxari.

Ininiã maerekati matamatakoti iriãkatari iua kiki ikinimane okiãtaã. Ininiã itakanapari iua, makarotika itxa kiki. ³⁶ Kãkiti iuaãtaã tsorikaãnãta. Imisãkiretakauana:

—Ikora kiki paposotiireri isãkire. Itapararitika ipaniãtari maerekati matamatakoti sini, ininiã ñakorape itxapena maerekani matamatakoni.

³⁷ Ininiã Xesosi pirenã iua tãpa iaripireta.

Xesosi Makananitaro Simão Petro Imakiro
(Mateo 8.14-17; Marko 1.29-34)

³⁸ Eereka Xesosi pоторika aiko Xoteoakori apotiitiniãtaãua. Simão aapokomoni isa. Iuasaaki Simão imakiro iteene oãpoomata. Ininiã amanaãrina Xesosi oa erekape inikitakini.

³⁹ Ininiã ipapĩka oamoni:

—Nipaniãtari apoomari iotokini —itxa.

Ininiã apoomari iotoka. Iuasaakipeka oa õkitikaua, nipokori osikana ninoa.

Xesosi Makananitana Amianatakani
(Mateo 8.16-17; Marko 1.32-34)

⁴⁰ Atokatxi erekokaãpotapeka inakasaaki, kãkiti anikana amianatakani ikinipoko amianari auakini, Xesosimoni. Itakari iuako amianatakani nopini. Iuasaakipeka ninoa erekapeka itxana. ⁴¹ Omitikari maerekati matamatakoti kãkiti itoã auakari apaka. Osi-pikasaakina, akiripoakatana:

—Pite Teoso ãkiri pitxaua.

Ininiã Xesosi txitana ninoa. ! Auiritaikana akiritinina, kotxi ninoa imarotari Teoso mereẽkiti ininiãua Xesosi.

Xesosi Sãpiretari Erekarı Pirena
(Marko 1.35-39)

⁴² Katimatinĩkata Xesosi sari kãkiti mauakaniãtaã. Iuasaaki kãkiti nitanãtari iua. Apokasaakirina, amanaãrina Xesosi:

—Pikaikota atekata —itxarina.

⁴³ Txamari Xesosi txari:

—!Apakata uai nikaikotini, kotxi ãtiãtaã apaka nisãpiretariko erekarı pirena Teoso auĩtetxi ininiãua pirena. Ikinimanemoni ikara nisãpiretini ikapanira, Teoso iokanatano kãkitimoni.

⁴⁴ Ikara atoko ininiãra, isãpirenauata ikininape aiko ãki Xoteoakori apotiitiniãtaãua ikinipoko Xoteoakori tixine.

5

Merepitipanika Xesosi Moianariakori
(Mateo 4.18-22; Marko 1.16-20)

¹ Æti õti Xesosi auanãta Xenesaree inakori poa tinikata. Xenesareetxikana Karirėia poa. Ipi iuãka aua. Iuasaaki kãkitipokoni ãkitari iua Teoso sãkire ikenakotinina ikapani. Iuakatapeka xãpoka itxana. ² Iuasaaki Xesosi atamatari ipi kanaua ioporoko. Kokatsaãriti kanauate. Ninoa imiriĩ arokanãtari hetxi. ³ Xesosi iereẽtaua Simão kanauate ãki:

—Pikatika pikanauate amaãtiki apanĩkakiã —itxa Simãomoni.

Eereka iitopãka kanaua ãki. Iuaãtaã isãpiretari Teoso sãkire kãkitimoni imiriĩ apotiitakanimoni.

⁴ Isãpirenauataka atoko itxari:

—Apanĩkakiã pimekota. Iuaãtaã pitakari hetxi kãuaãriã —Xesosi txari Simão.

⁵ Ininiã Simão:

—Koerekareri, hetxi atakapikama ikanõka. Iteene aõkatsaãkatapiikama. Txamari na xatiki ximaki amaĩka. Kona ãtika amaĩka. Iuaritika pite paniãtiniãno, iuaritika nitakapitkariko hetxi —itxa Simão.

⁶ Hetxi ninoa takasaaki kãuaãriã, ximakipokoni imaĩkana, ininiã hetxi tsorakiarita. ⁷ Ikara xika akiritana imoianariakori ãti kanauate ãki auakani:

—Åpina. Himoianataua ate. Hetxi tsorakiãpotanapanoka.

Ininiã ninoa ina. Ikinimane kosekari hetxi. Ximakipokoni. Ipi kanaua xãpoãkata ximakinoka. Ximaki xika kanaua sakikaarita. ⁸ Simão Petro atamatakasaakiri ximakipokoni, ikapotreẽkua Xesosi apisatoõ:

—!Pikaikotape nota takote, kotxi erekai pite. Maerekati kamakarino nota —itxa.

⁹ Ikara atoko itxa Simão sãkire, kotxi iua, imoianariakori apaka tsorikaãta kaiãopokori ximaki ninoa maĩkakiti xika. ¹⁰ Simão moianariakori Txiaiko, Xoão pakini, ninoa apaka tsorikaãta. Txiaiko, Xoão pakini Sepeteo anaakori. Ininiã Xesosi txari Simão:

—! Pipĩkaruatape. ! Pimaĩkaikari ximaki. Åtião piparĩka auako. Nisãkire pisãpiretako kãkitimoni —itxa.

¹¹ Eereka ninoa apokitaãka atoko, ikinika itiina itakanapana, Xesosikata sa itxana imiparĩkatinirina ikapani.

Kiki Maere Matati
(Mateo 8.1-4; Marko 1.40-45)

¹² Āti ōti Xesosi auanāta āti sitatxitiā. Iuaā auakasaaki, aua kiki maere matati. Atamatakasaakiri Xesosi, ikapotoreēkaua, iāka Xesosi apisatoō. Iteene amanaāri Xesosi:

—Apiananiri, pinirekiniāri, piposotari nota ereka pitxikitakini —itxari.

¹³ Ininiā Xesosi maātakari iua:

—Ari ninirekapitikari. Erekapekai —itxari.

Iuasaakipeka erekapekai itxa. ¹⁴ Ininiā Xesosi paniātari:

—! Pisāpiretapiri apanakini ereka nitxikitakinii. Pisa sasetotximoni. Poerekari pīto iuamoni, ininiākara itxai: “Atāōpitika erekapekai pite.” Eereka pisikari Teosomoni Moisesi paniātakiti iaōka. Ikara atoko pikaminiā, ikinimane imarotari pite atāo ereka pininiāua — itxa Xesosi.

¹⁵ Xesosi paniātari iua apanakini imasāpiretakani, iuaritika Xesosi pirena apikomoni iaripireta. Ininiā kākitipokoni sari iuamoni isākire ikenakotinina ĩkapani, amianari imaktxakini ĩkapani. ¹⁶ Ininiākara Xesosi itotapekari iuanoka isini kākiti mauakaniātaā Teosokata isākirauatini ĩkapani.

Matīpokotakati Pirena

(Mateo 9.1-8; Marko 2.1-12)

¹⁷ Āti ōti Xesosi sāpirenauata. Iua takote pariseoakori, kaiōkatsoparerini apaka topākanāta. Ninoa Kariréia tōpakini, Xotéia tōpakini, Xerosareē sitatxitikini pakini. Iuasaaki Xesosi sāpirenauatakasaaki, Apiananiri sikaposotiiretari Xesosi amianatakani erekapekai itxikitakini ĩkapani.

¹⁸ Iuasaaki kikiakori apoka iuaā. Iminarina kiki matīpokotakinoka inakari. Isirimata nopini iminarina. Inirekarina aapokotxi āki ĩroinina, Xesosi apisatoō iua matīpokotakati itakinina ĩkapani. ¹⁹ Txamari ! apakata ninoa ĩroini, kotxi kākitipokoni xāpoka. Ininiā ikanikana kanikoatxiā aapokotxi nopini. Imaktxakarina itano auakari kipatxi kai kamakori, eereka isikakaāpotarina iua matīpokotakati isirimata nopini Xesosi manapi kākiti sauaki. Xesosi apisatoō apoka. ²⁰ Ininiā Xesosi imarotari ninoa auikini iua posotiire. Ininiā itxari matīpokotakati:

—Namarite, pimaerekani maktxakapeēkaika.

²¹ Iuasaaki pariseoakori, kaiōkatsoparerini pakini tsorīkaānāta. Ākixinireēna ninoa:

—Teosonokara posotari amaerekani imaktxakini. Maerekati Xesosi kama Teosomoni —itxana.

²² Xesosi imarotari ninoa xinikakiti ākixinireēna, ininiā Xesosi txana:

—! Erekarī hākixinireē ikara hīxinikakiti. ²³ Nitxari iua imaerekani nimaktxakini, txamari ! himarotari imaerekani atāo nimaktxakini. “Pōkitikaua. Pitīpokota,” nininiā, ininiā himarotari nisākire atāo ininiāua, kotxi hītikari. Niposotiire imaerekani nimaktxakini ĩkapani, niposotiire iua nōkitikini ĩkapanitxikana. ²⁴ Ininiā uatxaika noerekai hīte. Teoso iokanatanano nota hītari iaxitikirino ĩkorapokoritimoni kākiti maerekani nimaktxakini ĩkapani.

Ininiā ipaniātari matīpokotakati:

—Pōkitikaua. Pisirimata pikoseka, sipe pitxa paapokomoni —itxari.

²⁵ Iuasaakipeka ōkitikaua. Ikinimane kākiti okiātaā ōkitikaua. Ikosekari isirimata, sipe itxa aapokomoni. Isikasaaki ipoxokoniua.

—Peerekari Teoso —itxaāpota iua.

²⁶ Ikinimane kākiti tsorīkaāta. Ipīkarauatana.

—Peerekari Teoso. Mitxi !aītikari matīpokotakati erekapekai txīkitaākari. Peerekari uatxa aītikakiti —itxanātana ninoa.

Mateo Pirena

(Mateo 9.9-13; Marko 2.13-17)

²⁷ Eereka Xesosi tīpokoāponātakasaaki, atamatarī kiki Arevii inakori. Iitopākanāta iparīkauatiniātaā. Iuaā apakapari txineiro Homanoakori auīte paniātakiti kākiti ātiātaā tiitxi anikini ĩkapani. Xesosi akiritari Arevii:

—Āpina, uatxa nimoianari pitxaua —itxari.

²⁸ Iuasaakipeka Arevii ōkitikaua. Ikinika itii itakanapa, Xesosikata sa itxa, Xesosi imiparīkatini ĩkapani. ²⁹ Eereka Arevii kamari kiiniri aapokoā Xesosi ĩkapani. Kiinirisaaki aua ĩkamanere kaiāopokori. Txineiro apakapakani aua kiiniriā. Ninoa apanakinikata nipokota Xesosikata Arevii aapokoā. ³⁰ Pariseoakori, ninoakata parīkauatakani, kaiōkatsoparerini pakini txitana Xesosi moianariakori, Xesosi txineiro apakapakanikata nipokotini xika. Ininiā ninoa txari:

—Kinirepa hīte nipokota txineiro apakapakanikata, maerekati kamakanikata? —itxana.

³¹ Xesosi apakapapiretana:

—Kákiti mamianatakani ! inirekari pinítxi siákarimoni isinina. Amianatarinoka nirekari pinítxi siákarimoni isini. ³² Iua atokokana, nota ina Ikorapokoriti kona kákiti “Atão inakaranoka kamakarino” ikapanini, kotxi ninoa uákatari atão inakaranoka ikaminina, txamari !ikamarina atão. Kákiti maerekati kamakani ikapanira nina nota uai imaerekani itakanapini ikapani. Nota pinítxi siákari atoko inakarino nota —itxa Xesosi sákire iusaaki.

Nipokori Takanapiko Teoso Misákiretiko Íkapani
(Mateo 9.14-17; Marko 2.18-22)

³³ Kákiti txari Xesosi:

—Xoño kapatxisareri moianariakori itokata takanapari inikinina Teoso imisákiretinina Íkapani. Iua atokotxikana itxa pariseoakori moianariakori. Txamari pite moianariakori litakanapari nipokori, iáriá, Teoso imisákiretinina Íkapani. Kinirepa? —itxana kákiti.

³⁴ Ininiá Xesosi apakapapiretana:

—Kiki Ítaniriuatini pírenasaaki erekari atxiíti kemaítxitakoni manikakaniári nipokori? ! Erekari. Ninoa poxokoniuata imoianari Ítaniriuatini, ininiá inipokotapitíkana. ³⁵ Txamari áti óti ninoa moianari maíkaákako, oka inaákako. Iusaakiko ninoa takanapari inipokotini, kotxi imatinaniuatana. Iua atokotxikana nota. Nota auapanika nimoianariakorikata. Áti óti nokaákako. Iusaakiko ninoa takanapari inipokotini Teoso imisákiretinina Íkapani —itxa Xesosi.

³⁶ Eereka Xesosi sápiretari sápirenatxi, atão inakari oerekiko.

—!Pikitsorákitari mákatxi amaneri, kitxakari pitápanetini Íkapani. Ikara atoko pikaminiá, mákatxi amaneri pioanata. Mákatxi mata amaneri Ísapekata piotsainiá, mákatxi kitxakari tsorakita iuaíkana. ³⁷ Kákiti kitakari ovaá sako aamata kamakori áki. Ovaá amanero auiniá, !otakaáka aamata kitxakari áki. Pitakiniáro aamata kitxakari áki, aamata tsorakita. Ovaá xikepoatamako. Sako !otxaika. ³⁸ Ovaá amanero pikitakako aamata amanero áki. ³⁹ Ovaá kitxakaro auiniá, kákiti !inirekaro amanero, kotxi: “Ovaá kitxakaro apiaerekata,” itxa.

Ikara atoko Xesosi txari kákitimoni. Ikara sákiretxiti Xesosi sápireta, kotxi apanakini kákiti itotapekari Moisesini sákire, Teoso sákire kitxakapiríka isápiretakiti, ininiá !inirekari Xesosi sákire amaneri inakari. Ninoa mákatxi kitxakari atoko. Sako kitxakari atoko ninoa. Ovaá kitxakaro atoko ninoa. Xesosi sákire mákatxi amaneri atoko. Ovaá amanero atoko itxa Xesosi sákire.

6

Tomatiko Óti Pirena

(Mateo 12.1-8; Marko 2.23-28)

¹ Xoteoakori tomatini ótisaaki Xesosi imoianariakorikata motipetari kíkio takari triko auiniátaá. Ípiripetakasaakirina, imoianariakori makatxakaápotari triko oki. Iuakoá ikotxokarona, ixóka itxarona otáta katxakini Íkapani, okinoka nika itxana. ² Átikaka pariseoakori ítkana imakatzakinirona:

—Kinirepa triko híkotxoka tomatiko ótisaaki? !Auiritaáka tomatiko ótisaaki paríkauatiko —itxana.

³ Ininiá Xesosi apakapapiretana:

—Himarotari Taviini kamakiti kitxakapiríka, iua imoianariakorikata natxitakasaaki. ⁴ Iua Íroá Teoso misákiretikoátaá. Iusaaki imakatzakari komiri Teosomoni sikakori. Inikari, sika itxari imoianariakorimoni. Ninoa nikari apaka. Sasetotxinokara auiritaáka iua komiri inikinina. Apanakini !auiritaáka inikiniri. Iuaritika iua Taviini nikari. ⁵ Nota hítarí iaxitíkiri posotari íkinipoko ninireékiti nikamini tomatiko ótisaaki, kotxi Apiananiri nitxaua —Xesosi txana ninoa pariseoakori.

Motíkauakotakari Pirena

(Mateo 12.9-14; Marko 3.1-6)

⁶ Áti tomatiko ótisaaki Xesosi Íroá aiko áki Xoteoakori apotiitiniátaáua. Oerekarauata. Iusaaki iuaátaá aua kiki iuako íkikomoni motíkauakotakari. ⁷ Kaiókatsoareri, pariseoakori apaka aua iuaá. Atamatapikarina Xesosi, atauako erekapeka itxíkítakapaniri motíkauakotakari tomatiko ótisaaki. Inirekarina Xesosi kerokiniri. Tomatiko ótisaaki iparíkauatiniá, ninoa apoítari iua. ⁸ Xesosi imarotari ákixinireéna ixinikakitina, ininiá ipaniáitari kiki motíkauakotakari:

—Pókitikaua. Ápina íkinimane okiátaá.

Ininiá iua kiki ókitikaua, sa itxa Xesosimoni. ⁹ Ininiá Xesosi pimaána kaiókatsoareri, pariseoakori pakini:

—Natokopa itxa Moisesini paniátakiti iókatsoatakiti tomatiko ótisaaki atão akamini? Ipaniátataua maerekati akamini tomatiko ótisaaki? Ipaniátataua erekari akamini tomatiko

ōtisaaki? Inirekatari amoianatiniri āti imapinakani ikapani tomatiko ōtisaaki? Inirekatari aōkaniuatini tomatiko ōtisaaki? —itxa Xesosi ninoamoni.

¹⁰ !Kasākirena ninoa kaiōkatsoparerini, pariseoakori pakini. Xesosi atamatana ikinimane. —Piuako poerekata —itxari iua kiki.

Oerekatari iuako. Iuasaakipeka iuako erekapeka itxa. ¹¹ Pariseoakori, kaiōkatsoparerini pakini omanākarauata. Imisākiretakauana Xesosi okinina ikapani.

Xesosi Mereēna Tosi Imoianariakori

(Mateo 10.1-4; Marko 3.13-19)

¹² Āti ōti Xesosi kanīka oxiratarini nopini, Teoso imisākiretini ikapani. Īkanōka ikaikota iuaātaā Teosokata isākirauatini ikapani. ¹³ Katimatinīkata akiritana itomaneri imoianariakori iuamoni apokinina ikapani. Apokasaakina, imereēna kikiakori tosi pakini kākitimoni iokanatakini tīkane. ¹⁴ Imereēna

Simāoma, (Iuāka Petro apaka.)

Ātreema, (Simāo itari)

Txiakoma,

Xoāoma,

Piripima,

Patoromeoma,

¹⁵ Mateoma,

Tomeema,

Txiakoma, (Aoepo ākiri)

Simāoma, (Homano omanatakari)

¹⁶ Xotasima, (Txiako ākiri, āti Txiakoti)

Xotasi Isikariotxima (Xesosi mīkapiritakari tīkane) pakinima.

Ninoa kikiakori tosi pakini Xesosi mereēkini imoianariakori ikapani.

Xesosi Amianatakani Imakananitinini

(Mateo 4.23-25)

¹⁷ Eereka oxiratarini iokiriīāpotana. Ipitexitimoni apokana. Iuaā aua kaiāopokori imoianariakori. Apanakini kākiti iuaātaā aua apaka. Xotēia tōpa ikani, Xerosareē sitatxiti ikani pakini auari iuaā. Apaka auari Txiro sitatxiti ikani, Sitoō sitatxiti ikani apaka. Txiro, Sitoō pakini potxoari uinīti itinikata aua. ¹⁸ Ninoa kākitipokoni sari Xesosimoni isākire ikenakotimīna ikapani, amianarena imakatzakini ikapani. Ninoa maerekati matamatakoti auaitotakini sari Xesosimoni maerekati imakatzakini ikapani. ¹⁹ Ikinimane nirekari imaātakiniri Xesosi, kotxi imaātakinīarina, apakapari Xesosi tapara amianarena sini ikapani. Ininiā ikinimane amianatakani Xesosi maātakani iuaīkana erekape itxana.

Kirimonipa Teoso Sikatari Erekari?

(Mateo 5.1-12)

²⁰ Eereka Xesosi misākiretana imoianariakori:

—Hīte matxineiroteni Teoso sikai erekari. Teoso hīauīte itxaua. Iua nakitiakori hīttxaua.

²¹ —Hīte ikorapokoriti natxitakani Teoso sikai erekari. Himitouatapanikako.

—Hīte ikorapokoriti txiapatakani Teoso sikai erekari. Hāpiapoxokonitapanikako. Hīsiroatapanikako.

²² —Apanakini omanatinīai hīte, hītari iaxitikirī sākire hāuikini xika, Teoso sikai erekari. Atxīiti apanakini ! nirekai. Atxīiti apanakini misākirepiretai. Atxīiti ninoa akiritai “maerekati kamakari” nota hītari iaxitikirī sākire hāuikini xika. Ikara atoko hinaākako.

²³ —Ninoa misiriāpotakasaakii, hīpoxokoniuatoko. Himīteenekariko hīpoxokoniritika, kotxi erekari Teoso nīkatini iaxiti itixine. Inīkatakiti hīte ikapani peerekari. Apanakini misiritini atokokanera, ninoa atokiriakorini misiritari Teoso sākire sāpiretakani kitxakapirīka.

²⁴ —Hīte ikorapokoriti katxineiroterini misiritaākako. Mītxi papoxokonii hīte. Uatxa hīpoxokoni !auaīka.

²⁵ —Hīte ikorapokoriti ikiniōtika mitouanātakanii misiritaākako. Hinatxitapanikako.

—Hīte ikorapokoriti siroatakani misiritaākako. Himatinaniuatapanikako. Hītxiapapanikako.

²⁶ —Ikinimane: “Peerekai pite,” ininiā, himisiritaākako, kotxi ninoa nirimane kitxakapirīkarini sāpiretari ikara atoko inakari Teoso sākire atō masāpiretanimoni —itxa Xesosi.

Kākiti Mokaiakari Tiretiko

(Mateo 5.38-48)

²⁷ Iuaīkana Xesosi sāpirenauata:

—Nõtākikai hīte nisākire kenakotakanii. Hītiretanako himokaiakari. Erekeri hīkaminana hīte omanatakani. ²⁸ Himisākiretariko Teoso erekeri hīte misākirepiretakani isikini ikapani. Himisākiretariko Teoso hīte misiritakani ikapani. ²⁹ Kākiti aritiniāi pikakota, ipinimoni pikakota iuaikana pisikana. Kākiti anikiniāri pimāka ōtanominari, pauiritari iua pimāka kauanata apaka anikini. ³⁰ Pitii amanaākarimoni pisika inirekakiti. Kākiti anikiniāri pitii, !pamanaāpiri iuaikana imikanapiriiniri. ³¹ Āti tiritini pinirekini atokotxikana, pitiretari āti.

³² —Pite tirketakaninani pitiretiniā, kinirepa Teoso sikari erekeri pitemoni, pinirimanenokara pitiretakasaaki? Kotxi kākiti maerekati kamakani apaka tiritari ninoa tirketakani. ³³ Pimoianatiniāna pite moianatakaninani, !apakata, kotxi iua atokotxikana maerekati kamakari moianatana iua moianatakaninani. ³⁴ Pisikiniāro pitxineirote, pitxineirote mikanapiriākarimoninani, !apakata, kotxi iua atokotxikana maerekati kamakani sikaro itxineirotena apanakini maerekati kamakanimoni āti ōti iuaikana imikanapiriiniro ikapani. ³⁵ Iua atokokana na pitxape. Pitiretariko pimokaiakari. Erekeri pikaminariko. Inirekiniāri pitii iparīkauatini ikapani, pisika iuamoni. !Pimaākapeua, pitii iuaikana imasikakaniāi. Iua atokokana hīkaminiā, Teoso sikai hīte iteene erekeri. Iua atokokana hīkaminiā, Apiananiri iaxitikirī anaakori hītxauako, kotxi iua amonīkari kākiti maerekati kamakani. Ninoa !isāpiretari Teoso iua ereka inini, iuaritika Teoso amonīkana. ³⁶ Piamonīkariko āti, aīri Teoso amonīkaruatini atokokana —itxa Xesosi.

Apoĩretxi Pirena
(Mateo 7.1-5)

³⁷ —! Papoĩtapiri āti. Papoĩtiniāri āti, ininiā pite apaka apoĩtaākako. ! Pisāpiretapiri āti ikamakiti maerekati inini, ininiākara Teoso !isāpiretai pite pikamakiti maerekati inini. !Pixinīkapinīkari maerekati āti kamakiti pitemoni, ininiā Teoso !ixinīkaihari maerekati pite kamakiti. ³⁸ Pisikarauatako ātimoni, ininiā Teoso sikarauata ito pitemoni. Kaiāopokori papakapa. Atarokiri arata āki takakori atokokana papakapa. Atarokiri iōkokakori, kaiākakori kinapakopeka iuaikana atarokiri inopini takaāka. Xāpōākata, ininiā katxapoāpota. Iua atokotxikana Teoso sikai kaiāopokori, ātimoni pisikarauatiniā. Ātimoni pisikarauatini atokotxikana, Teoso sikarauata pitemoni —itxa Xesosi.

³⁹ Xesosi sāpiretari ia sāpirenatxi atāo inakari oerekiko:

—Apakata āti mōsīāreti anikiniri āti mōsīāreti? !Apakata. Ninoa ipi irikako aariko āki. Ininiā nota sākire himimarotakanisaaki, kona apakata hōerekiniiri āti. Hōerekiniāri āti, hīkerokari. Ninoa mōsīāreni aariko āki irikakani atoko hītxa. ⁴⁰ Apaiaōkarauatahari !imarotari koerekareri imarotakiti atoko. Poiāonoka imarota. Apaiaōkarauatini ixipokasaaki, iuaaaki koerekareri imarotakiti atoko imarotape.

⁴¹ —Pisāpiretari āti: “Aāsoro aua poki āki,” txamari kona pimaākatari aātxirata pite oki āki auakari. Kinirepa ikara atoko inakari pikama? ⁴² Kinirepa pitxari pitari? “Nitari, nota makatxakinii aāsoro pokiā auakari,” kotxi !piposotari patamatiniri aātxirata piteka pokiā auakari. Pisākire atxiiti erekeri, txamari pikamakiti kona erekeri. Merepitipanika pimakatxakari aātxirata piteka pokiā auakari. Eereka piposotari patamatiniri aāsoro pitari okiā auakari pimakatxakini. Maerekati pite kamakiti apiata atxiiti iua aātxirata atoko. Maerekati āti kamakiti poiāoka atxiiti iua aāsoro atoko. Iuaritika !pimaākatari maerekati piteka kamakiti. Pōtāikikari āti imaerekani itakanapini. Ikara atoko !apakata. Merepitipanika pite takanapariko pite maerekani, eereka pōtāikikari āti imaerekani itakanapini —itxa Xesosi sākire.

Amātiiri Pirena
(Mateo 7.15-20; 12.33-35)

⁴³ —Amātiiri erekeri kona iritari matximakoti. Amātiiri matximakoti kona iritari erekeri. ⁴⁴ Patamatinīari amātiiri, pimarotari imina. Txipokori piko inakoro pinirekiniā, kona pisa inakomoni. Ova pinirekiniā, kona pisa inakomoni. ⁴⁵ Kākiti erekeri amātiiri erekeri atokokana itxa. Iua erekeri, ininiā erekarinoka ikama, kotxi iua ākixinireē erekarinoka aua. Kākiti maerekati amātiiri matximakoti atoko itxa. Iua maerekati, ininiā ikamakiti maerekati apaka, kotxi maerekatinoka auari iua ākixinireē. Iua ākixinire ereka, ininiā isākire ereka apaka. Iua ākixinire maerekati, ininiā isākire maerekati apaka, kotxi isākire potorika ākixinireē —itxa Xesosi sākire.

Aapokotxi Kamakari
(Mateo 7.24-27)

⁴⁶ Xesosi sākirauatapanika:

—Kinirepa pakiritano nota “Apiananiri,” nipaniātakiti pimakamakanisaaki? ⁴⁷ Kākiti notamoni ikari, nisākire kenakotakari, nisākire Kīpitakari, aapokotxi kamakari atoko itxa.

⁴⁸ Iua kamari aapokotxi. Ikisakari kipatxi. Otsomori aapoko tsota ikama. Iua apokari kai, ininiã iopitĩkari aapoko tsota iua kai nopini. Ininiã aapokotxi ikamakiti paikori. Āparaã apoãtakasaaki, itorõkani inokasaakiri iua aapoko, !akeka, kotxi iua kiki atão ikamari aapoko. Iua kiki atoko kãkiti nisãkire kĩpitakari.

⁴⁹ –Āti kiki aapokotxi kamakari, iua iopitĩkari aapoko tsota motsomotika popaiape ininiãtaã. Āparaã apoãtakasaaki, itorõkani inokasaakiri iua aapoko pakitika. Xipoka itxa. Iua kiki atoko kãkiti nisãkire kenakotakari, nisãkire mauĩãkati –itxa Xesosi.

7

Xesosi Makananitiniri Sotato Auĩte Nitiri (Mateo 8.5-13)

¹ Ikara sãkiretxiti isãpiretaka atoko, Kapanaoõ sitatxitimoni isa Xesosi. Iuaãtaã apoka. ² Kapanaoõ auari kiki Āti uãka Homano inakori. Sotatoakori auĩte itxaua iua Homano. Ipaniãtana sotatoakori seĩ pakini inireẽkiti ikaminina. Xesosi apokasaaki Kapanaoõ, iua Homano nitiri iteene itiretakiti amianata. Ipinanapanoka.

³ Iua Homano kenakopiretari Xesosi. Ininiã ipaniãtari Xoteoakori kiomãtxiakori Xesosi-moni isinina.

–Hĩtxariko: “Homano nirekai iuamoni pisini, initiri pimakananitini ĩkapani.”

⁴ Ininiã ninoa sa itxana Xesosimoni, aõkita itxarina.

–Masa sotatoakori auĩtemoni. Initiri amianata. Masa, pimakananitiniri ĩkapani. Iua Homano erekari itxaua, ininiã erekapitĩkari pimoianatiniri iua. ⁵ Itiretari Xoteoakori. Aiko aãpotiitiniãtaãua ikaminaua ate, ininiã iua Homano erekari itxaua –itxana ninoa.

⁶ Ininiã Xesosi sari ninoakata. Iua Homano aapoko takote apokasaaki, iua Homano iokanatari imoianariakori Xesosimoni, isãpiretinirina ĩkapani:

–Apiananiri, apikomoni !pisipe, kotxi minakati nota. Pite Apiananiri txaua. Nota apakapiniãi naapoko Āki !apakata. ⁷ Nota pitemoni napokini !apakata, kotxi pite Apiananiri, nota poiãori. Ininiãkara ereẽ pitoka. Ereẽkarako pitxĩkitakariko ninitiri ereka inini.

⁸ Nota auĩte paniãtiniãno nota ipaniãtakiti nikamini ĩkapani, ininiã nikamapitĩkariko. Nota auĩtetxi nitxaua apaka. Nota paniãtakiti sotatoakori kamapitika. Āti nipaniãta: “Pisa,” ininiã iua sa. Āti nipaniãta: “Uai pina,” ininiã iua ina. Ninitiri nipaniãta: “Ia pikama,” ininiã iua kamari. Ininiã nimarotari ereẽ pite paniãtiniãri ninitiri ereka inini, ereẽkarako erekapeka pitxĩkitakari ninitiri –itxa Homano sãkire Xesosimoni.

⁹ Iua Homano sãkire ikenakotakasaaki, Xesosi tsorĩkaãta. Isapotorika, misãkireta itxana kãkiti iuakata sikani.

–Iua Homano iteene auikari nisãkire. Peerekari. Mitxi !naõkitari nisãkire auĩãkari iua Homano atoko inakari. Na naõkitapanikari Xoteo iua Homano atoko inakari –itxa.

¹⁰ Eereka ninoa Homano iokanatakini kanapiriã Homano aapokomoni. Iuaã apokasaakina, amatarina Homano nitiri. Erekapeka itxa.

Xesosi Txĩkitakari Ipĩkari Iuaĩkana Auãki Inini

¹¹ Mapaõti napaãka atoko Xesosi sari Naĩ sitatxitimoni. Imoianariakori, kãkitipokoni apaka sari iuakata. ¹² Imatokoãpotakasaakiri sitatxi pirikere tore kãkiti ĩronakikoãtaã, ipĩkari imipokĩkaãka sitatxi mapara. Sito imatonõkari oimi ipĩpe. Oa sito tikinitakoro. Kaiãopokori kãkiti sitatxi auakani pokĩka oakata sikani. ¹³ Apiananiri amatakasaakiro, iamoniãkaro oa, ininiã:

–!Pitxiapatape –itxaro.

¹⁴ Isa ipĩkarimoni. Imaãtakari ipĩkari auini kaixati, ininiã iua kaixa anikakani iotoka. Iuasaaki iua akiritari:

–Ātokori, nipaniãtai põkitikaua –itxa Xesosi.

¹⁵ Iuasaakipeka iua Ātokori topãka, sãkirauata itxa. Ininiã Xesosi sikari iua inoromoni.

¹⁶ ĩkinimane pĩkarauata.

–Peerekari Teoso. Teoso iokanatari isãkire sãpiretakari apiatakari atemoni. Teoso apokapeka ĩkorapokoriti ate inakitiakori imoianatinĩ ĩkapani –itxanãtana ninoa.

¹⁷ Ia Xesosi pirena iaripireta ikini tõpati Xotẽia tõpa. Apaka apikoxiti Xesosi pirena kenakopiretaãka.

Xoão Kapatxisareri Pimaãkiti Sãkiretxiti (Mateo 11.2-19)

¹⁸ Xoão kapatxisareri moianariakori minapiretari Xesosi pirena Xoãomoni. Eereka Xoão akiritari imoianariakori ipi:

¹⁹ –Hĩsa Xesosimoni. Hĩpimaãri: “Teoso mereẽkitikai pite? Kãkiti iãtapanãtakitikai pite? Kãkiti iãtapanãtakiti Ātikani atxĩiti?” Ikara atoko hĩtxako Xesosimoni –Xoão txana ninoa.

²⁰ Ininiã ninoa ipi sari Xesosimoni. Iuamoni apoka itxana.

—Xoã kapatxisarerer iokanataua ate pitemoni. Ipimaã: “Teoso mereëkitikai pite? Kãkiti iãtapanãtakitikai pite? Kãkiti iãtapanãtakiti ãtikani atxãiti?” itxai —itxana.

²¹ Iuasaaki ninoa Xesosimoni apokasaaki, amianatakani kaiãopoko erekapeka itxãkitaka Xesosi. Iua oमितकari maerekani matamatakoni kãkiti ãtotaã auakani. Mõsiãreni kõsiãrepeka itxãkitaka. ²² Ininiã Xesosi apakapiretana Xoã moianariakori:

—Hikanapiriã Xoãomoni. Hãsãpiretari mixikanani uai hãtikakiti, hãkenakotakiti pakini. Hãsãpiretari mitxi mõsiãreni uatxa kõsiãrepeka nitxãkitaka. Hãsãpiretari mitxi matãpokotakani ãpokotapeka uatxa. Mitxi maere matati erekapeka uatxa. Mitxi makenakokini uatxa kakenakokipeka. Mitxi ipãkani iuaãkana auãki itxapekana. Hãsãpiretari Xoã, nota sãpiretari Teoso iokanapirena erekari minakati mauakinimoni. ²³ Kãkiti iteene auikiniãri nota sãkire, Teoso takari erekari iuamoni. Ikara nisãkire hãsãpiretari Xoã —itxa Xesosi.

Xoã Kapatxisarerer Pirena

²⁴ Ininiã ninoa Xoã moianariakori sipe. Eereka Xesosi sãpiretari Xoã pirena kãkiti iuamoni apotiitakaniua.

—Kipa ãkai hãte Xoã kapatxisarererimoni hãsikasaaiki ãparaã makipakaniãtaã iua auakasaaki? Hãte sari iuamoni, kotxi isãkire ãtinoka, Teoso sãkirenoka. Kãkiti katsotati ãtima anikakiti atoko itxa. Isãkire kita ãti, isãkire uatxa ãtiã, isãkire katana iuaãkana ãtiã, itxaãpota isãkire. Ikara atoko !itxa Xoã. ²⁵ Kipa ãkai hãte Xoãomoni hãsikasaaiki? Hãte sari iuamoni, kotxi !inirekari tãtxi, txineiro pakini. !Kakaroneri imãka, kotxi !ikaikota auãtetxi aapoko. Auãtetxi auiniãtaã kãkiti mãka peereri. ²⁶ Kipa ãkai hãte iuamoni hãsikasaaiki? Hãte sari iuamoni, kotxi iua Teoso sãkire sãpiretakari itxaua. Atão inakari Teoso sãkire sãpiretakari itxaua. Apiata iua Xoã. ²⁷ Apiata iua, kotxi itxakapiriãka Teoso sãkire iõkatsopatakori sãpiretakekari Xoã pirena:

Ia kiki nisãkire sãpiretakari. Niokanataru iua kãkitimoni, pite nimereëkiti sini apisa, papokini isãpiretini ãkapani, kãkiti iposope inini ãkapani, itxa Teoso sãkire iõkatsopatakori.

²⁸ Iuaãkana Xesosi txana kãkiti:

—Atão nisãpiretai, ãti Xoã atoko inakari ! auari. Xoã apiata. Iuaritika kãkiti Teoso auãtetakari poiãori inakari apia imarotariko Teoso kamakiti tãkane —itxa Xesosi.

²⁹ Ikinimane kãkiti, txineiro apakapakani apaka kenakotakasaakiri Xesosi sãkire, imarotarina Teoso nireëkiti kãkiti kamini ãkapani atão inini, kotxi ninoa sari Xoãomoni ipatx-isatikona ãkapani. ³⁰ Txamari pariseoakori, Teoso paniãtakiti oerekakani pakini !inirekari Xoã patxisatinina ninoa, ininiãkara Teoso nireëkiti iaõka !inirekana ikaminina.

Kãkiti ãkoraasiki Auakani

³¹ Xesosi sãpirenauatapanika:

—Kiãtokopa itxana kãkiti ãkoraasiki auakani? ³² Amarini sarauatini atoko itxana ãkoraasiki auakani. Ninoa amarini topãkanãta tãtxi amotikoãtaã. Ipixini amarini tsoanãta. Itxana apanakinimoni: “Ate xikarauata hãte serenini ãkapani, txamari ! hãserena. Kãkiti ipãkasaaki xikariti axikareta, txamari ! hãtxiapata.” Ninoa amarini sarauatini atoko itxana ãkoraasiki auakani, ³³ kotxi Xoã kapatxisarerer apoka ãkorapokoriti. Itakanapari inikini Teoso imisãkiretini ãkapani. !Iãtari ovaã. Iuaritika hãte txari: “Maerekati matamatakoti auaãtotari Xoã,” hãtxari. ³⁴ Nota hãtari iaixitiki apoka ãkorapokoriti. !Nitakanapari ninikini. Ikinioãtika ninipokota. Niãtari ovaã. Ininiã hãte txari: “Iua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisãkirepiretano. ³⁵ Paimatireri Teoso. Iua nakitiakori imarotari isãkire atão ininiua —itxa Xesosi.

Sito Arokari Xesosi Kiti Oãtsaã

³⁶ ãti õti pariseo Simão inakori aiataru Xesosi inipokotini iuakata, ininiã Xesosi sari iua aapoko. Iuaã apoka atoko iãtopãka inipokotini ãkapani. ³⁷ Simão auini sitatxiti oãua sito kanokarero. Oa kenakopiretari Xesosi iua pariseo aapoko inipokotini, ininiã o anikaro kamariãro iuamoni. Kopitipaki kai arapãstiro kamakori ãki oãua kamariãro. Xãpoka. ³⁸ Oãtsaã Xesosi kiti takote. Oãtsaã oãrokari ikiti. Okaxipokari oiãkoã. Ikiti oãpitxoka. Eereka okitakari kamariãro ikiti nopini.

³⁹ Iua Simão atamatakasaakiro Xesosi kiti oãrokini, ãkixinireë ixinikari:

—Xesosi atão Teoso sãkire sãpiretakari inaãkamako, imarotamaroko oa sito iua maãtakakaro. Imarotamaroko maerekati kamakaro oa —itxa ãkixinireë.

⁴⁰ Ininiã Xesosi:

—Simão, ninirekari nimisãkiretini —itxa.

—Ei, koerekareri, pisãkiauata —itxa Simão.

⁴¹ Ininiã Xesosi:

—Ipi kiki apakapari txineiro sikakari txineirote. Imikanapiriãpanikaroko txineiro isikakito. Áti apakapari isikakito txineiro kaiãopokoro, kiëtosi txineirota. Átipekana apakapari isikakito poiãonoka, sikoëta txineirota. ⁴² Ninoa ipi ! iposotaikarina iuaikana txineiro isikininirina txineiro sikakarimoni, kotxi ! oãuaika. Iuarituka iua xipokari ninoa kôtane. ! Inirekaikaro itxineirote. Ininiãkara ïkiripa ninoa kiki ipi apia apokaerekatari iua txineiro sikakari? —Xesosi pimaãri Simão.

⁴³ Ininiã Simão:

—Niuãkatari kiëtosi txineirota apakapakari. Iua apia apokaerekatari txineiro sikakari, kotxi iua apakaparo kaiãopokoro txineiro —itxa.

—Iuapitikara —itxa Xesosi.

⁴⁴ Iuasaaki Xesosi sapotorika sitomoni. Itxari Simãomoni:

—Patamatataro oia sito? Niïroã pite aapoko, txamari kona pite sikano ãparaã nikiti narokini ïkapani. Oia arokapekari nikiti oãtsaã. Oiãkoã okaxipokari. ⁴⁵ Uai napokasaaki kona pite apitxokano. Oia ! iotoka nikiti oãpitxokini. ⁴⁶ Pite na takari iïtxi nikiiã. Oia kitakari kamariãro nikitiã. ⁴⁷ Oia iteene tiretano, ininiã aimarotari omaerekani kaiãopokori makatxakaãkapeka. Kãkiti poiãonoka tiretakasaakino, aimarotari imaerekani poião inakari makatxakaãkapeka —itxa Xesosi.

⁴⁸ Iuasaaki Xesosi sãpiretaro:

—Nimakatxakapekari pimaerekani —itxaro oa sito.

⁴⁹ Xesosikata nipokonãtakani ãkixinireëna ixinikanãtarina:

—Kiripitipa ia kiki atxiiti? Iua makatxakatarari kãkiti maerekani? —itxanãtana ninoa.

⁵⁰ Iuasaaki Xesosi txaro oa sito:

—Atão pauikari nisãkire, ininiãkara pimaerekani makatxakaãkapeka. Pisipiniikaua erekaxinirepeka pinini —itxaro oa.

8

Sitoãkini Xesosi Moianatakani

¹ Mapaõti napaãka atoko Xesosi sari ãti sitatxitimoni, ininiã eereka ãti sitatxitimoni isa, itxaãpota. Isãpiretari erekari pirena Teoso auïtetxi ininiãua. Imoianariakori tosi pakini sari iuakata. ² Sitoakoro apaka sari iuakata. Mitxipe Xesosi erekapeka txïkitakana ninoa sito. Mitxipe ãtikaka amianata. Mitxipe maerekati matamatakoti auãitotana ãtikaka. Maria Matarena inakoro sari iuakata. Mitxipe Xesosi omitikana maerekani matamatakoni setxi pakini oiãoã auakani. ³ Xoana inakoro, Kosa inakori tanoro, oa apaka sari Xesosikata. Kosa parïkauata auïtetxi Erotxi inakorikata. Erotxi paniãtakiti ikama. Sosana inakoro apaka sari Xesosikata. Apanakini sitoakoro apaka sari iuakata. Ninoa sikari itxineirotena Xesosimoni, imoianariakori pakinimoni nipokori iamotinina ïkapani.

Katarereri Pirena

(Mateo 13.1-9; Marko 4.1-9)

⁴ Kãkitipokoni apokaãpota Xesosimoni, ãti sitatxitikini, iuaikana ãti sitatxitikini, iuaikana ãti sitatxitikini txaãpota apokinina Xesosimoni. Kãkitipokoni apotiitakasaakiua Xesosikata, Xesosi sãpiretana ninoa sãpirenatxi atão inakari oerekiko.

⁵ —Kiki sari ikikiote itakarautini ïkapani. Triko oki itaka. Okaãpotari. Okaãpotakasaakiro, kimaporiã apaka oãpoka oki okakiti. Eereka oki katxarataãka. Apanakini kotipiriki nika. ⁶ Oki apoka kai nopini. Kai auiniãtaã kipatxi poiãonoka auari. Eereka ipitxaka, txamari pitxakakaro kotsa imiti masikaniã, ãparaã mauakaniã, opina. ⁷ Triko oki apoka inako sauaki apaka. Eereka inako aneë takarikata, txamari inako matxorotakaro takari, ininiã opina. ⁸ Oki apoka kipatxi erekari nopini apaka. Eereka takari pitxaka, aneë otxa. Eereka ominaua kaiãopokori. Triko katiã sei oki aua.

Xesosi sãkirauata iuaikana:

—Kakenakoki, ininiã hïkenakotariko nisãkire —itxa Xesosi.

Kãkiti Mimarotakinini Xesosi Sãpiretini Pirena

(Mateo 13.10-23; Marko 4.10-20)

⁹ Xesosi moianariakori pimaãri iua:

—Poerekaua ikara sãpirenatxi atão inakari oerekiko pisãpiretakiti. ! Aimarotari mixikanani pisãpiretakiti.

¹⁰ Ininiã Xesosi:

—Nisãpiretapitikaiko hïte Teoso auïtetxi ininiãua, ininiã hïte imarotari. Apanakini !imarotari hïte imarotakiti Teoso auïtetxi ininiãua. Ninoa apanakinimoni nisãpiretari sãpirenatxi

atão inakari oerekiko. Ninoa kenakotari, txamari ! imarotarina nisãpiretakiti sãkiretxiti, kotxi kitxakapirika Teoso sãkire sãpiretakani sãpiretari: Kokiri kãkiti, txamari ! atamatari Teoso kamakiti. Karokokenakokiri kãkiti, txamari ! ikenakotari Teoso sãkire.

¹¹ —Noerekai hïte ikara sãpirenatxi atão inakari oerekiko, kiki takarauatini pirena. Triko oki atoko itxa Teoso sãkire.

¹² Apanakini kãkiti kimapori atoko itxa. Ninoa kenakotari Teoso sãkire, kimapori nopini oki apokini atoko itxa. Txamari Satanasi apoka kotipiriki apokini atoko. Imaktxakari Teoso sãkire ãkixinireña apokakari, ininiã ninoa ! auikaikari Teoso sãkire, ininiã Teoso ! imaktxakari ninoa maerekani.

¹³ —Apanakini kãkiti kai auiniãtaã atoko itxa. Ninoa kenakotari Teoso sãkire, ininiã ipotxitarina. Txamari oki kipatxi poião nopini apokini atoko, Teoso sãkire ! ñroã ninoa ãkixinireñ. Mapa kasiriti ninoa aukari Teoso sãkire atxiiti. Eereka imisiritaãkana Teoso sãkire auikinina xika, ininiã itakanaparina Teoso sãkire.

¹⁴ —Apanakini kãkiti inako auiniãtaã atoko itxa. Ninoa kenakotari Teoso sãkire. Eereka ninoa maerekaxinirenoka itxana. Inirekarina txineiro, tiitxi pakini. Inirekarina isarauatinina. Inako atoko itxa txineiro, tiitxi, isarauatinina, maerekaxinirenoka ininina pakini. Ininiã ! ixinikaikarina Teoso. Oki inako sauaki pitxakakaro ! ominaua. Iua atokokana, ninoa kãkiti likamari erekari Teoso ñkapani.

¹⁵ —Apanakini kãkiti kipatxi erekari atoko itxa. Ninoa kenakotari Teoso sãkire. Teoso sãkire ñroã ninoa ãkixinireñ ikaikotini ñkapani. Erekari ninoa ãkixinire. Ninoa nirekari Teoso paniãtakiti ikaminina ikiniõtika. Eereka ninoa kamapitikari erekari Teoso ñkapani.

Tirikapi Pirena
(Marko 4.21-25)

¹⁶ —Tirikapi iopotokaãkari iomaãtatari tirikapi kopiti ãki atxiiti? Isikatatxi patapi itakatari atxiiti? Konapitini. Itano itakari tirikapi, ininiã iopinikari aapokotxi ãki ñroãkani atamarauatini ñkapani. ¹⁷ Ikinika iomaãtakari atamataãkako. Ikinika ipatakori apokaãkako, iopinikaremoni anikaãkako.

¹⁸ —Erepaniko. Iteene pikenakotariko Teoso sãkire, kotxi isãkire auakiti, Teoso sãkire kïpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makïpitakati, imarore xapiti iuamoni auakari makatxakaãkako —itxa Xesosi.

Xesosi Inoro, Itariakori Pakini
(Mateo 12.46; Marko 3.31-35)

¹⁹ Xesosi sãpirenauanãtakasaaki, inoro, itariakori pakini apoka iuaãtaã. Inirekamarina Xesosimoni apokinina, txamari kãkitipokoni ãkitari iua. ²⁰ Iuasaaki kãkiti txari Xesosi:

—Pinoro, pitariakori porikiti auanãta. Inirekarina imisãkiretinii —itxana.

²¹ Ininiã Xesosi sãpiretari ikinimane:

—Teoso sãkire kenakotakani, isãkire kïpitakani, ninoro atoko itxauana. Nitariakori atoko itxauana —itxa Xesosi.

Xesosi Iotokakiniri Ñtima
(Mateo 8.23-27; Marko 4.35-41)

²² Æti õti Xesosi iereëtaua kanaua ãki imoianariakorikata. Aiatana:

—Masa ipoa ipiniã —itxana imoianariakori.

Ininiã ñpiriãtana. ²³ ñpiriãtakasaakina, Xesosi imaka. Mokatanitika ñtima inataparata. Kataparari ñtima apokasaaki, tsakati kataparari apaka, ininiã ierepeëpokataua. Iuasaaki kanaua ãki ãparaã xãpokaãpokata. Pamonõkoniri. ²⁴ Xesosi moianariakori õpirikari.

—Apiananiri, Aplananiri, pimereka. Apinanapanoka.

Ininiã Xesosi õkitikaua. Ipaniãtari ñtima, tsakati pakini iotokini:

—Hiotokako —itxa.

Iuasaakipeka ñtima, tsakati pakini iotoka. Itsoriãkaãta. ²⁵ Iuasaaki Xesosi txari imoianariakori:

—Kinirepa hïte !auikano nota?

Itsoriãkaãkatana, ipikarauakatana. Ninoakakarika isãkirauatana:

—Kinakaripa ia kiki? Iua paniãtari ñtima, tsakati pakini iotokini, ininiã ninoa kïpitari isãkire —itxakakana.

Kiki Maerekani Matamatakoni Auãtotakiti
(Mateo 8.28-34; Marko 5.1-20)

²⁶ Eereka ipoa ipiniã apokana Xesosi imoianariakorikata. Ninoa poterikiniãtaã Karirëia tãpa. Ninoa apokiniãtaã Xerasa tãpa. ²⁷ Xesosi kanikãitakasaaki, kiki apoka iuamoni. Xerasa sitatxitikiri iua. Maerekani matamatakoni auãtotari iua. Okananipe !itakaikari

imäka. !Inirekari aapoko äki ikaikotini. Akauariä auanäta. ²⁸ Atamatakasaakiri Xesosi, akiripoakata. Iriäkata Xesosi apisatoö. Maerekati matamatakoti akiritari Xesosi:

—Xesosi, Teoso äkiri, Apiananiri äkiri, kiatokopa pitxanoko? Namanaäi !pimisiritapeno —itxa.

²⁹ Ikara atoko itxa isäkire, kotxi Xesosi paniätana maerekani matamatakoni takanapiniri iua kiki. Mitxi inirimane iitxikapiimari iito imasikani ikapani. Iitxikarina iuako, ikiti kohëtxiä. Txamari maerekati matamatakoti itotapekari imaikniri, ininiä iua kiki kapatakari kohëtxi. Maerekati matamatakoti txikitakari iua kiki mitekini käkiti mauakaniätaä.

³⁰ Xesosi aõkitakasaakiri iua kiki, ipimaäri:

—Kipa piuäka?

Ininiä maerekati matamatakoti txari:

—Nota uäka “Itori,” ninaäka —itxa.

Ikara atoko iuäka, kotxi itori maerekani matamatakoni auaitotari iua kiki. ³¹ Maerekati matamatakoti amanaäri Xesosi:

—Aariko mamapotökire irikotimoni !piokanatapeua ate —itxa.

³² Iuaätaä auari kaiäopokori irariakori piratakoni. Inipokonätana oxiratarari nopini. Maerekati matamatakoni amanaäri Xesosi:

—Pauiritaua irariakori äki äiroini —itxana.

Ininiä Xesosi auiritana. ³³ Ininiä ninoo takanapari iua kiki. Irariakori iito äki iroäna. Iuasaakipeka ikinika irari miteäkata. Iokiriikatana oxiratarari. Käuäriämoni ikomoäkata, ipiäpe itxana irariakori.

³⁴ Kikiakori irari piratakani itikari irari mitekini, ininiä imitekana sitatximoni. Anikapiretarina itikakitina sitatxi auakanimoni, sitatxi mapara auakanimoni apaka.

³⁵ Ininiäkara käkiti sari Xesosimoni ikamakiti imarotinina ikapani. Ninoa apoka iuamoni. Atamarina iua kiki mitxi maerekani matamatakoni auaitotakiti. Iitopäkanäta Xesosi apisatoö. Kamäkapekari. Kikitepekari apaka. Ininiä iuasaaki ninoo käkiti pikari Xesosi posotiire. ³⁶ Xesosi kamakiti itikakani säpiretari ninoo käkiti, Xesosi erekapeka itxikitakiniri iua kiki. ³⁷ Eereka ikinimane käkiti Xerasa töpa auakani paniätari Xesosi ätiätaä isini ipikarena xika. Ininiä Xesosi iereëtaua kanaua äki ipoa iuaäkana ipiriätini ikapani. ³⁸ Iua kiki mitxi maerekani matamatakoni auaitotakiti amanaäri Xesosi:

—Pauiritano pitekata nisini.

Txamari Xesosi iokanatarari aapokomoni.

³⁹ —Pikanapiriä paapokomoni. Pisäpiretari käkiti Teoso kamakiti pitemoni —itxa Xesosi.

Ininiä iua sari ikinä aapokotxitimoni. Isäpiretari ikinimane käkiti Xesosi kaminiri iua erekapeka inini.

Xäiro Amanäkiti Pirena

(Mateo 9.18-19; Marko 5.25-34)

⁴⁰ Xesosi kanapiripe, ipoa ipiriätini. Apokitakasaaki, käkitypokoni apakapari Xesosi ipoxokoniritikana. Ninoa iätapanätari iua, ipiniä iua auakasaaki. ⁴¹ Iuasaaki kiki Xäiro inakori apoka iuaä. Iua auütexi itxaua aiko Xoteo apotiitiätaäua. Apoka Xesosimoni. Ikapotoreëkaua Xesosi apisatoö.

—Masa naapoko. ⁴² Nota äkeri imatonökaro, tosi ano auakaro, opinanapanoka —itxari Xesosi.

Iuakata Xesosi sikasaaki, käkitypokoni äkitari iua, ininiä ikaiarikaäpotana käkiti.

Xesosi Mäka Maätakakaro

(Mateo 9.20-22; Marko 5.25-34)

⁴³ Käkiti sauaki oäua sito amianatakaro. Tosi ano oamianata oärëka ! iotokinaro. Otxineirote ! auaiäka, kotxi okinika otxineiroteë oikxitapekari pinüxi siäkani, txamari erekapeka otxikitakakiri !auari. ⁴⁴ Käkiti sauaki oäpoka Xesosi porikimoni. Omaätakari imäka mapotomatare. Omaätakasaakipeka, oärëka iotoka. ⁴⁵ Ininiä Xesosi pimaäri käkiti:

—Kipa maätakano?

Ikinimane käkiti:

—!Ateni —itxana.

Ininiä Petro:

—Apiananiri, käkitypokoni äkitai. Ikinimane käkiti tikakai.

⁴⁶ Txamari Xesosi:

—Käkiti maätakapitikano, kotxi iuasaaki nitapara sari iuamoni.

⁴⁷ Iuasaaki oa sito imarotari Xesosi imarotiniro oa maätakiniri. Ininiä osa Xesosimoni otitinanakiniritika. Okapotoreëkaua iua apisatoö. Ikinimane okiätaä osäpiretari Xesosi:

—Notara maätakai namianatiniä. Nimaätakasaakii, iuasaakipeka erekapekano —otxari.

⁴⁸ Ininiä Xesosi:

—Namarite, pauikari niposotiire, ininiākara erekapekai. Pisipiniūkuaa erekaxinirepeka pinini —itxaro.

Xáiro Ákero Ókitikiko
(*Mateo 9.23-26; Marko 5.35-43*)

⁴⁹ Xesosi sákirauanátakasaaki, Xáiro aapoko potoriākari apoka Xáironi.

—Pamarite !oúauika. Pauiritari Xesosi kanapiriini —itxa.

⁵⁰ Xesosi kenakotari iminapiretakiti, ininiā Xesosi txari:

—!Pipíkaruatape. Pauikari nisákire, ininiā iuaíkana oáupanikako pamarite —Xesosi txari Xáiro.

⁵¹ Xesosi apokasaaki Xáiro aapoko, auritana Petro, Xoão, Txiako, Xáiro, Xáiro Ítanoro pakini Íroni iuakata.

⁵² Iuaátaā ikinimane kákiti txiapanáta. Imatinaniuatana amarini ipinini xika. Ininiā Xesosi:

—!Hítxiapatape. !Opina. Oimakanáta —itxa.

⁵³ Ininiā ninoa napetari Xesosi, kotxi imarotarina amarini ipinini. ⁵⁴ Ininiā Xesosi paniátana ninoa porikiti ipokíkinina. Eereka Xesosi maíkaro oa átokoro uako, akirita itxaro:

—Átokoro, pókítikaua.

⁵⁵ Iuasaakipeka iuaíkana oa auákipeka otxa. Oókitikaua. Xesosi paniátana oíri, onoro pakini nipokori isikinirona. ⁵⁶ Oíri, onoro pakini tsoríkaáta. Xesosi sápiretana apanakini imasápiretakanina Íkapani.

9

Xesosi Iokanataka Imoianariakori Kákitimoni
(*Mateo 10.5-15; Marko 6.6-13*)

¹ Xesosi akiritana imoianariakori tosi apotiitiniuana Íkapani. Iuasaaki isikataparataka. Isikaposotiiretana maerekani matamatakoni iokanatinina Íkapani, amianari imakatzakinina Íkapani. ² Eereka iokanataka imoianariakori kákitimoni Teoso auítetxi ininiáua isápiretinina Íkapani, amianatakani erekapeka itxíkitakinina Íkapani. ³ Xesosi txana ninoa:

—Hísikasaaki, !hanikapiri hítii. Na hítsonere !hanikape. Na sakora, na nipokori, na txineiro, na áti himáka, !hanikape. ⁴ Kákiti apakapakasaakii, iuaá ninoa aapoko híkaikota iua sitatxiti háuakasaaki. ⁵ Kákiti mapakapaniá, hítakanapari iua sitatxiti. Hósipikasaakiri, híkaxipokariko kipatxi híkitiákiri. Ikara oerekana iua sitatxiti auakani Teoso misiritanako ninoa, kotxi !inirekarina ikenakotinirina Teoso sákire —itxa Xesosi imoianariakorimoni.

⁶ Eereka imoianariakori poterika. Ninoa sari ikinipoko aapokotxiti. Isápiretarina Teoso iokanapirena erekari aapokotxiá auakanimoni. Erekapeka itxíkitakana amianatakani ikini aapokotxiti auakani.

Erotxi Nirekari Xesosi Aókitini
(*Mateo 14.1-12; Marko 6.14-29*)

⁷ Erotxi Kariréia tópa auakani auíte kenakopiretari Xesosi pirena. Maerekaxiniretinoka itxa, kotxi kákiti sápiretari:

—Xoão kapatxisareri iuaíkana auáki itxapekava. Iuara Xesosi txaua —itxana.

⁸ Apanakini sápiretari:

—Eríasi iuaíkana uatxa auáki itxapekava. Iuara Xesosi txaua —itxana.

Apanakinipekana:

—Teoso sákire sápiretakari kitxakapiríka auakari iuaíkana uatxa auáki itxapekava. Iuara Xesosi txaua —itxana.

⁹ Erotxi txari:

—Notara paniátari Xoão nopi tsotakiko, ininiā Xesosi kona Xoáoni. Kiripitipa Xesosi? Átipirika nikenakopiretari iposotiire —itxa Erotxi.

Kiniráo aókitaka itxari Xesosi.

Síko Mio Kákiti Xesosi Sikakienatini
(*Mateo 14.13-21; Marko 6.30-44; Xoão 6.1-14*)

¹⁰ Ninoa Xesosi iokanatakini kanapiripeka iuamoni. Ikinika ikamakitina isápiretarina Xesosi. Eereka Xesosi anikana ninoa kákiti mauakaniátaā, Petsáita sitatxiti takote. Ninoanoka sari iuaá. ¹¹ Txamari apanakini kenakopiretari Xesosi sinimoni, ininiā kákitipokoni sari iua tikini. Ninoa apokasaaki Xesosimoni, Xesosi apakapana ipoxokoniritika. Isápiretana Teoso auítetxi ininiáua. Erekapeka itxíkitakana amianatakani.

¹² Tinítikita imoianariakori tosi pakini apoka iuamoni:

—Piokanataka kákiti aapokotxi imatokotinimoni inipokotinina Íkapani, imakinina Íkapani, kotxi uai aapokotxi mauakaniátaā —itxarina Xesosi.

¹³ Txamari Xesosi txana:

–Hítekarako sikakienatana ninoa.

Ininiã ninoa:

–Poiãonoka nipokori aua atemoni, sikonoka komiri, ipinoka ximaki pakininokara aua. ! Apakata aiamotoñiniri nipokori kaiãopokori kãkiti asikakienatini ïkapani –itxarina Xesosi.

¹⁴ Iuaãtaã kikiakorinoka sïko mio auakata. Xesosi paniãtara imoianariakori:

–Hïpaniãtari kãkiti topãkini, uai sïkoëta, apikomoni iuaïkana sïkoëta, apikomoni iuaïkana sïkoëta, txaãpokata kãkiti –itxa. ¹⁵ Ininiã imoianariakori paniãtari kãkiti ikara atoko iitopãkinina. Ininiã ninoa topãka. ¹⁶ Iuasaaki Xesosi kosekari komiri sïko, ximaki ipi pakini. Iaxiti ionakaãta, misãkireta itxari Teoso:

–Peerekari ia nipokori pisikakiti –itxa.

Iuasaaki ixanakari komiri, ximaki pakini, sika itxari imoianariakorimoni, ininiã ninoa sikari kãkitimoni. ¹⁷ Ikinimane nikari, kamitopeka itxana. Eereka Xesosi moianariakori amari nipokori itetakori. Ixãpokakarina kotari tosi pakini.

Petro Auikari Xesosi Teoso Mereëkiti Ininiãua

(Mateo 16.13-20; Marko 8.27-30)

¹⁸ Æti õti Xesosi iuanani misãkiretari Teoso. Eereka imoianariakori apoka iuamoni. Iprimaãna:

–Kiripa kãkiti uãkatano nota? –itxa.

¹⁹ Ininiã ninoa:

–Apanakini xinikakiti pite Xoão kapatxisarereri pitxaua. Apanakinipekana xinikakiti pite Erïasi pitxaua. Apanakinipekana xinikakiti pite Teoso sãkire sãpiretakari kitxakapirïka auakari iuaïkana auãki inakari pitxaua –itxarina Xesosi.

²⁰ Ininiã Xesosi:

–Hítepekana, kipa hïte uãkatano nota? –itxa.

Petro apakapapiretari:

–Pite Teoso mereëkiti kãkiti iãtapanãtakiti pitxaua –itxa.

²¹ Ininiã Xesosi iteene pinitari ikara apanakinimoni imasãpiretakani.

Xesosi Sãpiretari Ipinini

(Mateo 16.21-28; Marko 8.31-9.1)

²² Ininiã Xesosi:

–Nota hïtari iaxitikiri iteene natatsitariko nimisiritiko. Kiomãtxiakori, sasetotxi auñteakori, kaiõkatsoparerini pakini !nirekano nota, ininiã nokaãkako. Ipi Æti õtisaaki Teoso õkitikanoko nota iuaïkana auãki ninini ïkapani –itxari imoianariakori.

Xesosi Moianari Atão Inakari

(Mateo 16.24-28; Marko 8.34-38)

²³ Eereka isãpiretari ikinimane:

–Notakata kinirão sika pinakasaaki, piteka pinireëkiti kona pixinikape. Notakata kinirão sika pinakasaaki, nota misiritiko atokokana pimisiritãkako. Ia atoko pinirekiniã ikiniõtika, notakata pisapitikako. ²⁴ Pite Ætipirika kaminiãri piteka nireëkitinoka, ininiã pinireëkiti xipokapitikako pitekata. Pite nireëkiti xipokiniã, nota sãkire pauikini xika, Teoso iokanapirena erekari pisãpiretini xika, pite auapininiika txako Teosokata. ²⁵ Atxïiti papakapari ikinipoko tïtxi, ikini itixiti auakani tïi, pinakiti ïkapani. Atxïiti iua tïtxi xika kona pikïpitari Teoso sãkire, ininiã kona pikaikota Ætipirika Teosokata. Ikara atoko ininiã, erekari atxïiti ikinipoko tïtxi auini? Konapitini. Apiaerekata Teosokata Ætipirika pikaikotini. ²⁶ Pipëtatiniãno nota, pipëtatiniãri nisãkire, nota kãkiti itari iaxitikiri pëtaitaiko pite uai nikanapiriãkasaaki. Peerekari iuasaaki uai nikanapirini õti. Iuasaaki kãkiti imarotariko niposotiire, niri posotiire, iniritiakori iaxitikini posotiire apaka. Teoso nitiriakori erekarini itxauana. ²⁷ Atão nisãpiretai, apanakini hïte uatxa uai auakani, hïpinini apisapanika himarotari Teoso auñttxi ininiãua –itxa Xesosi.

Moisesi, Erïasi Pakini Xesosi Aõkitini

(Mateo 17.1-3; Marko 9.2-13)

²⁸ Æti semanati napaka atoko, Xesosi anikana Petro, Xoão, Txiako pakini. Ikanïkana oxiratarini nopini Teoso imisãkiretini ïkapani. ²⁹ Teosokata isãkirauanãtakasaaki, itoõ ipinipo itxa, imãka ponika, kasarori. ³⁰ Iuasaaki ipi kiki tokiã iuaã, Moisesi, Erïasi pakini. Isãkirauatana Xesosikata. ³¹ Ninoa iotximere aua, kotxi ipotorikana Teoso tixine. Isãkirauatana Xesosikata, Xesosi ipinini pirena, mapa semanati napaka atoko Xerosareë ipinini Teoso paniãtakiti ikamini ïkapani. ³² Iuasaaki Petro, Xoão, Txiako pakini imakanãta. Eereka imerekana. Atamatarina Xesosi iotximere. Atamatarina ninoa ipi kiki iuakata itiminina. ³³ Moisesi, Erïasi, takapiretakasaakiri Xesosi, Petro akiritari Xesosi:

—Koerekareri, erekari uai akaikotini. Makamari papiri ipi āti pakini, pite ikapani, Moisesi ikapani, Eríasi ikapani —itxa.

Txamari maxikatitka isākirauata. Iimarotari amanaākiti.

³⁴ Petro sākiraauanātakasaaki, katxiāri apoka. Xesosi moianariakori pīkarauata katxiāri āki auakasaakina. Katxiāri ākitana. ³⁵ Katxiāri āki ikenakotaāka sākiretxi:

—Ere namarite, nitiretakiti. Hīkenakotariko iua sākire —itxa.

³⁶ Isākirauataka atoko Xesosi moianariakori atamatari Xesosinani. Eereka isāpīretarina itikakitina apanakinimoni. Masākirenika itxana.

Amarini Maerekati Matamatakoti Auāitotakiti

(Mateo 17.14-20; Marko 9.14-29)

³⁷ Katimatinikata iokiriitana. Iuasaaki kākītipokoni apoka Xesosimoni. ³⁸ Ninoa sauaki kiki akiritari Xesosi:

—Koerekareri, patamatari nota ākiri imatonōkari namarite. ³⁹ Ātipirika maerekati matamatakoti māikari iua. Iuasaaki akiripoakata, okarakataua. Isorīkipekata inamamoni. Maerekati matamatakoti kamatsiitari namarite. Poiāonoka itakanapari. ⁴⁰ Iteene namanaāpekari pimoianariakori omitikiniri, txamari liposotarina —itxa Xesosimoni.

⁴¹ Ininiā Xesosi txari kākītimoni:

—!Kauikarei hīte. Maerekati kamakanii hīte. Kīpakinikananipa Teoso nirekatari hītekata nauini? Kīpakinikananipa Teoso nirekatari hīte nimīteenekini? —itxa.

Eereka ipaniātari iua kiki:

—Pamarite pīmīna uai.

⁴² Iua amarini apokaāpotakasaaki, maerekati matamatakoti irikari ixiti. Amarini okarakataua. Xesosi paniātari maerekati takanapiniri amarini. Erekapeka itxīkitakari amarini, ininiā isika iua iuaikana irimoni. ⁴³ Ikinimane tsorīkaāta Teoso posotiire itikasaakina.

Xesosi Iuaikana Sāpīretari Ipinini

(Mateo 17.22-23; Marko 9.30-32)

Ikinimane tsorīkaātakasaaki, Xesosi misākiretari imoianariakori.

⁴⁴ —! Himaxinīkaretapiri uatxa nisāpīretakiti. Nota hītari iaxitiki mīkapiritaākako. Nisikaākako kākītimoni ninoaka nirekakiti ikaminina ikapani —Xesosi txana ninoa.

⁴⁵ Imoianariakori kenakotari Xesosi sākire, txamari !imarotarina isāpīretakiti. Teoso !nirekari ninoa imarotiniri Xesosi sāpīretakiti iuasaaki. Ninoa pīkari Xesosi ipimainina isākire oerekinina ikapani.

Kirīpa Kākīti Apiatakari Txataua?

(Mateo 18.1-5; Marko 9.33-37)

⁴⁶ Āti ōti Xesosi moianariakori !aukakauana isākirena, kotxi inirekarina imarotinirina apiatakari ninoa sauaki auakari. ⁴⁷ Xesosi imarotari ninoa xinīkakiti, ininiā iminari amarini ninoamoni. Xesosikata tima itxa amarini. ⁴⁸ Iuasaaki Xesosi txana:

—Papakapiniāri amarini ia atoko inakari, papakapano nota apaka. Papakapiniāno nota, papakapari niokanatakiri apaka. Iuaka poiāotakari iua hīte sauaki, iuarako apiatakari txauako —itxa Xesosi.

Kiki Maerekani Matamatakoni Omitiākari

(Marko 9.38-41)

⁴⁹ Xoāo sāpīretari Xesosi:

—Koerekareri, ate kenakotari kiki omitikinina maerekani matamatakoni pite uākaā. Ate sāpīretari iua kiki ikara atoko inakari imakamakani, kotxi kona pimoianarini iua —itxa.

⁵⁰ Ininiā Xesosi:

—! Hītokakapiri ikara atoko inakari ikamini, kotxi iua kiki !omanataua ate. Iua apa-monīkaua ate —itxa.

Samaria Auakani !Apakapari Xesosi

⁵¹ Teoso tixine iuaikana Xesosi kanapiriini ōti apokaāpota, ininiā Xesosi ākixinireē txari:

—Nisapitīkako Xerosareēmoni.

⁵² Iokanatarī kākīti iua apisa, imakiniātaā initinina ikapani. Ipixinipokoriti ninoa kākīti nitari imakiniātaā aapokotxi Samaria auakani auiniātaā. ⁵³ Txamari kākīti iuaātaā ! inirekarina Xesosi apakapinina, kotxi iua nirekari Xerosareēmoni isini. Samaria auakani omanatana Xerosareē auakani. ⁵⁴ Txiako, Xoāo pakini kenakopīretari ikara ene. Iuasaaki ipimaārina Xesosi:

—Apiananiri, pinirekatari aamanainiri Teoso xamina iaxitiki iokanatinī ninoamoni ixipokinirina ikapani?

⁵⁵ Txamari Xesosi pinitana, isākirena maerekani xika.

⁵⁶ —Nota, h̄tari iaxitikiri kona k̄akiti nixipokini ĩkapanini napoka uai. K̄akiti maerekani nimakatzakini ĩkapanira uaimoni nina —Xesosi txari Txiako, Xōo pakini.

Eereka ninoa sari apikoxiti apanakini k̄akiti auinītāamoni.

K̄akiti Xesosi Imoianatinina Nirēkani

(Mateo 8.18-22)

⁵⁷ Xesosi imoianariakorikata sāpotakasaaki kimaporīa, kiki txari Xesosi:

—Apiananiri, pite sinimoni nota apaka sako.

⁵⁸ Ininīa Xesosi:

—Karikori aripa auini. Kakoari kotipiriki auini, txamari nota h̄tari iaxitikiri nimakinītāa !auari. Pimoianatinīano, ikara atoko pimisiritiko pinireka atxīiti? —itxa Xesosi.

⁵⁹ Xesosi txari āti kiki:

—Notakata pisako.

Txamari iua kiki:

—Koerekareri, merepanika ninirekari nīatapiniri niri ipinini —itxa.

⁶⁰ Ininīa Xesosi:

—Ikara piparīka paunitari āti kamini. Piparīka apiari uatxa aua. Pite sari k̄akitimoni. Pis̄apiretanako Teoso aūtetxi ininīa —itxa Xesosi iuamoni.

⁶¹ Āti kikipekana txari Xesosi:

—Koerekareri, nota pimoianari nitxamauako. Mitxi paunitano nikanapiriini nauinimoni. Nitakapiretanapana ninirimane —itxari.

⁶² Ininīa Xesosi:

—Teoso kimaporēe potorīakari nirekinīari mitxi ikamakiti iuākana ikamini, !apakata iparīkauatini āaūte Teoso ĩkapani —itxa Xesosi.

10

Xesosi Iokanatana Set̄eta Pakini K̄akiti

¹ Ikara ināka atoko Apiananiri merēna set̄eta pakini k̄akiti. Iokanatana ipi, iuākana ipi, iuākana ipi, itxāapotana iokanatinina. Iokanatana iua sini apisapanika ikini aapokotxiti-moni. Ninoa ĩkiika. Apokana Xesosi apisa. ² Xesosi txana ninoa:

—Kaīori k̄akiti iposope auikiniri nis̄akire, txamari !imarotarina nis̄akire, kotxi !ikenakotapanirina. Ninoa kiki erekari atoko itxana. Imakinika iposope iuāa. Txamari, poīoka parīkauatakani aua nis̄akire is̄apiretinina ĩkapani. Ininīakara himis̄akiretariko Apiananiri kakikioteri iokanatinina parīkauatakani iua s̄akire aūīakani apotītinina ĩkapani. ³ H̄isa. Soti aūte anaakori ākitimoni iokanatok atoko, niokanatai h̄ite k̄akitimoni, kotxi pamon̄õkonina ninoa. ⁴ Txineiro !hanikape. Tiītxi !hanikape. Āti h̄ikiti mata !hanikape. Kimaporīapōa k̄akiti akiritakasaakii, !h̄īotokāapotaape k̄akitikata h̄is̄akirauatini ĩkapani. H̄isapitiporiko niokanatinimoni. ⁵ K̄akiti aapoko h̄apokasaaki, merepitipanika h̄itxariko: “Namanāari Teoso, ikamaerekaxiniretinina k̄akiti uai auakani,” h̄itxako. ⁶ Kaapokori nirekinīari Teoso ikara atoko inakari ikaminana ninoa, Teoso kamapitikari hamanāakiti. Kaapokori manirekakanīari, h̄is̄apiretana Teoso kona kamaerekaxiniretana ninoa. ⁷ Kaapokori apakapinīi h̄ite, h̄ikaikotako iua aapokonoka. Āti aapoko, eereka āti aapoko kona h̄itxāapotapeko iua sitatxiti h̄auakasaaki. Iuāa ninoa sikakiti hinikini ĩkapani, hīatini ĩkapani h̄apakapariko. !H̄ip̄etautatepe h̄apakapiniri, kotxi h̄ite nota ĩkapani parīkauatakani h̄itxaua. Apakatapitika h̄apakapiniri hiparīka ĩki.

⁸ —Aapokotxītāa h̄apokasaaki h̄apakapikōa, iuāa h̄isikiko hinikako, hīata h̄itxāapotako. ! H̄ixinikapiri ninoa sikakiti mapitxiri ininiua. Hinikariko. ⁹ Erekaapeka h̄itx̄ikitakanako amianatakani iuāa auakani. H̄is̄apiretana ninoa, kaiamapekari Teoso ninoa aūte ininiua t̄kane. ¹⁰ Aapokotxītāa himapakapakonīa, h̄isa k̄akiti napāaporetxīa. H̄is̄apiretana k̄akiti iuāa auakani: ¹¹ “H̄auinīakiri pani akitīakiri akaxipoka, kotxi !erekari uai, kotxi maerekati h̄ikama ate himapakapakanīa. H̄ixinikariko, ate apoka uai Teoso aūtetxi ininīa as̄apiretinii ĩkapani, txamari !hinirekari.” Ikara atoko h̄itxa s̄akiretako ninoamoni. ¹² K̄akiti misiritiko ōtisaaki Teoso misiritanako k̄akiti Sotoma sitatxiti auakani ninoa maerekani xika, txamari Teoso apia misiritanako iua aapokotxiti auakani h̄ite mapapakapani, kotxi h̄ite s̄apiretana Teoso s̄akire, iuaritika !auikarina. Kitxakapirīka Teoso s̄akire s̄apiretani !isana Sotoma sitatxitimoni —itxa Xesosi.

K̄akiti Sitatxi Auakani Maerekati Matakanapakani

(Mateo 11.20-24)

¹³ —H̄ite Korasīi sitatxiti auakani inipitika atatsiitariko misirikaretxi. H̄itepekana Pets̄aita sitatxiti auakani apaka atatsiitariko misirikaretxi, kotxi nota kamapekari posotiiretxi h̄ite sauaki, txamari !h̄itakanapari himaerekani. Ikara posotiiretxi Sitōo sitatxiti, Txiro

sitatxiti pakini auaãkamako, kãkiti iuaã auakani uatxakapokoikamani itakanapamarinako maerekati ikamakitinina. Ninoa sako mata ieretakamanako, atapani iitoãna itakamanako, imaerekanina itakanapininina oerekinina. ¹⁴ Kãkiti misiritiko õti apokasaaki, Teoso misiritariko Txiro sitatxiti auakani, Sitoõ sitatxiti auakani pakini, txamari iua apia misiritaitiko hïte Petsãita sitatxiti auakani, hïte Korasiï sitatxiti auakani apaka. ¹⁵ Hïtepekana Kapanaoõ sitatxiti auakani apiarini hinireka hininiãua, txamari maerekani misiritikoãtaã iuamoni-rako hõkapeẽkako –itxa Xesosi.

¹⁶ Xesosi misãkiretana imoianariakori:

–Hïte sãkire kenakotakani kenakotari nota sãkire apaka. Hïte mapakapakani !apakapano nota apaka. Nota mapakapakani !apakapari nota uaimoni iokanatakari apaka –itxana imoianariakori.

Setëta Pakini Kãkiti Kanapiriini

¹⁷ Ninoa setëta pakini kãkiti kanapiriã. Poxokonoka itxakatana.

–Apiananiri, maerekani matamatakoni apaka kïpitari asãkire, pite uãkaã iokanatakasaakina –itxarina Xesosi.

¹⁸ Ininiã Xesosi:

–Ari, nitikapekari Teoso patimari iokanatiniri Satanasi, okaratxirari patimari imëkokini atoko itxa. ¹⁹ Hïkenakota. Nota sikaposotiiretai hïte imini, kaxipiro pakini hïkatxaratini. Kona ioãkai hïte. Amokaiakari Satanasi pataparari, iuaritika hïposota hïokanatiniri iua, kotxi nota sikataparatai hïte. !Auari hïte karotakani. ²⁰ Hïpoxokoniũata, kotxi maerekani matamatakoni kamari hïpaniãtakiti. Apia hïpoxokoniũatako, kotxi hïũaka Teoso tixine aãtsopateẽ iõkatsopatapeẽkaika iuaã hïsinĩ ìkapani –Xesosi txana ninoa.

Xesosi Iri

(Mateo 11.25-27; 13.16-17)

²¹ Iuasaaki Erekarĩ Matamatakoti kamapoxokonitari Xesosi, ininiã Xesosi misãkiretari Teoso:

–Niri, pitixine auakani auïte pitxaua. Uai ikini itixiti auakani auïte apaka pitxaua. Peerekai pite, kotxi kimarorerini, iuikakaniua kona poereka pimarore. Poiãorini, miuikakaniua poereka pimarore. Ari niri, ikara atoko pinireka. Ikara atoko papokaerekata –itxari iri.

²² Eereka imisãkiretari kãkiti:

–Niri sikapekano ikinika. Kãkiti ìmarotano nota Teoso ãkiri nininiua. Nirinokara atão ìmarotano nota. Apaka kãkiti na atão ìmarotari niri. Notanokara ìmarotari niri, kotxi iua ãkiri nitxaua. Kãkiti nirekiniãri ìmarotini niri, nota oerekari niri iuamoni –itxa Xesosi.

²³ Eereka Xesosi aua imoianariakorikata. Ninoanani aua iuakata. Imisãkiretana:

–Teoso sikari erekari hïtemoni, kotxi hïte atamatari nota kamakiti, hïte kenakotari nota sãpiretakiti. ²⁴ Nota sãpiretai hïte. Kitxakapiriãka Teoso sãkire sãpiretakani, auïtetxiakori pakini kinirão atamataka txari hïte atamatakiti, txamari ninoa !atamatari. Ninoa nirekari hïte kenakotakiti ìkenakotinina, txamari ìkenakotarina –Xesosi txari imoianariakori.

Kiki Karotakori Tïretakari

²⁵ Kiki Moisesi sãkire oerekakari apoka Xesosimoni. Inirekamari Xesosi kerokiniri isãkire.

–Koerekareri, kiripa nikama Teosokata ãtipirika nauini ìkapani? –itxa.

²⁶ Ininiã Xesosi:

–Kiripa patatsopata Teoso aãtsopateẽ? Pisãpiretano Teoso paniãtakiti –itxari.

²⁷ Ininiã iua kiki apakapapireta:

–Teoso paniãtaua: “Pitiretariko Apiananiri piTeosone, ikinipoko pinireẽkitiã, ikini pãkixinireẽ, ikini pitaparaxinireẽ, ikinipoko pixinikakitiã pakini.” Apaka Teoso paniãtaua: “Piteka pitiretiniãua atokotxikana, pitiretariko ãti,” itxa.

²⁸ –Atãopitikara papakapapiretano. Ikara pikaminĩ, pauapika ãtipirika Teosokata –itxa Xesosi.

²⁹ Txamari iua kiki !inirekari ikara atoko inakari ikamini, ininiã iua pimaãri Xesosi:

–Kiripa ãti nitiretini ìkapani?

³⁰ Xesosi apakapapiretari, ia sãpirenatxi atão inakari oerekiko isãpiretini:

–Kiki potorika Xerosareẽ. Inirekari Xerikoo sitatxitimoni isini. Ipinipokoriti kiitiririni maïkari iua. Itirĩkarina imãka, itii pakini, noropata, karota, itxarina. Mauãkixiniretinoka itakanaparina iua kiki. ³¹ Iuasaaki sasetotxi iãpota iua kimaporiti. Iua atamatari iua kiki karotakori, txamari !imaãkatari. Iopiriãri, napa, ìkorape itxa. ³² Eereka kiki Arevii apika mekaniri, sasetotxiakori moianatakari apoka. Iua apaka atamatari iua kiki karotakori, txamari iua sasetotxi atokokana !imaãkatari. Iopiriãri, napa, ìkorape itxa. ³³ Eereka kiki

Samaria tōpakiri iāpota iua kimaporiti. Iua apoka iuaā. Atamatari iua kiki maīkapekori, ininiā iua amonikari. ³⁴Iuamoni isa. Arokari ikaro ipiniā. Ipitari ikaro iitxiā. Mākatxi mataā iapirika itxari ikaro. Eereka ōkitika itxari, ipira poho nopini taka itxari. Anikari kākiti imakiniātaā aikotimoni. Iuaā imoiaāri. ³⁵Katimatinikata isikari txineiro kaapokorimoni. Ipi ota pirata kamakori isika. “Nisipekako. Pite moiaāriko ia kiki. Apikomoniapanika txineiro pinirekiniā ikiena ikapani, nikanapiriāksaaki niūkitxitai,” itxa Samariakiri, —itxa Xesosi Moisesi sākire oerekakarimoni.

³⁶Xesosi pimaāri iua:

—Ipi āti kikiakori iāpota iua kimaporiti. Īkiripa iua kiki kiūtiririni maīkakiti turetakari? —itxa.

³⁷Ininiā iua Moisesi sākire oerekakari:

—Ari, Samariakirinokara turetari iua —itxa.

Ininiā Xesosi:

—Pisipe. Samariakiri kamakiti atoko inakari pikamako, kotxi iua turetari āti.

Xesosi Motikaētarō Mata, Maria Pakini

³⁸Xesosi imoianariakorikata sipeka. Apokana aapokotxiātaā. Iuaā sito Mata inakoro apakapana oaāpoko. ³⁹Oitaro Maria inakoro topāka Apiananiri takote isākire okenakotini ikapani. ⁴⁰Mata maerekaxiniretonoka otxa oparika ito inini xika. Ininiā osari Xesosimoni.

—Apiananiri, nitaro topākanāta ereē. Notanani parikauanāta. Pitemoni erekari atxiiti? Pipaniātaro notakata nipokori okamini —otxa.

⁴¹Ininiā Xesosi:

—Mata, Mata, maerekaxiniretonokai pitxa, kotxi piparika ito inini xika. ⁴²Ātinoka pikamini tikanē ninireka. Maria mereēri ikara. Omereēri nota sākire okenakotini. Oa mereēkiti apiaerekata, ininiā !notokakaro oa nisākire okenakotini —itxa Xesosi.

11

Teoso Misākiretiko Pirena

(Mateo 6.5-15; 7.7-11)

¹Āti ōti Xesosi misākiretari Teoso. Ixipoka atoko ātika imoianari txari:

—Apiananiri, Xoāo oerekari imoianariakori Teoso imisākiretinina. Iua atokokana p-oerekaua ate Teoso amisākiretini. Natokopa itxa Teoso amisākiretini?

²Xesosi apakapapireta:

—Teoso himisākiretakasaaki, ia atoko hītxako:

“Aīri, iaxiti auakari, ate nirekari piuāka paxitiko. Anirekari ikini itixiti auakani auītetini pite. Pite tixine pinireēkiti kamiko atokokana, anirekari pinireēkiti kamiko ĩkorapokoriti.

³Nipokori ikiniōtika pisikauako.

⁴Pimaxinikaretariko maerekati akamakiti. Maerekati atemoni kamakori amaxinikaretini atokokana, pimaxinikaretariko. Kona panikapeua aātaerekatikomoni. Pisikakauako ate, maerekati sauaki aāuakasaaki.”

Ikara atoko hītxako Teoso himisākiretini —itxa Xesosi.

⁵Eereka Xesosi oerekana imoianariakori:

—Atxiiti apanīkanōka pisa pimoianari aapokomoni nipokori pamanaini ikapani. Ininiā pakiritari iua: “Nimoianari, ipi āti pakini komiri pisikano. ⁶Naōkimanere iāpotakari uatxarika apoka naapoko. Natxinoka itxape. Nipokori !auari nisikiniri,” atxiiti pitxari iua.

⁷—Atxiiti pimoianari iroko āki apakapapiretai: “!Pakirinātapeno. Naapoko tore katoreri. Nota, namariteni apaka imakanātape. !Niposota nōkitikiniua, nipokori nisikinii.”

⁸—Pimoianari itxaua iua, iuaritika atxiiti !inirekari ōkitikiniua. Iuaīkana, iuaīkana pakiritiniāri pimoianari, iua ōkitikapitika. Ikini nipokoriti pinirekakiti isikaiko, iuaīkana imakini ikapani. Iua pimoianari na atoko itxa Teoso. ⁹Ininiākara pamanaāriko pinirekakiti, ininiā Teoso sikapitūka. Pinitariko pinirekakiti, ininiā papokapitikari. Pakiritariko Teoso, ininiā iua apakapapiretai. ¹⁰Amanarauatakari apakapapitikari amanaākiti. Nitara-atakari apokapitikari initakiti. Teoso akiritakari apakapapiretaākapitika.

¹¹—Hīte irītxiakori, hamariteni amanainiāi komiri, kaikani hīsikatana hamariteni? Ximaki amanainiāna, iminikani hīsikatana hamariteni? ¹²Patari naki amanainiāna, kaxipirokani hīsikatana hamariteni? Konapitini. ¹³Hīte maerekati kamakani hītxaua, iuaritika himarotari erekari hamaritenimoni hīsikini, ininiā hīri iaxiti auakari, erekarinani kamakari, iua sikapitikariko Erekar Matamatakoti hītemoni hamanainiāri iua —itxa Xesosi.

Maerekani Matamatakoni Omitikiko

(Mateo 12.22-32; Marko 3.20-30)

¹⁴ Āti ōti Xesosi omitikari maerekati matamatakoti masākireti. Iua maerekati matamatakoti sipeka atoko, iua kiki mitxi maerekati matamatakoti auaitotakiti posotari iuaikana isākirauatini. Kākiti Xesosi kamakiti itikakani tsorīkaānāta. ¹⁵ Ātikaka ninoa txari:

—Satanasi, maerekani matamatakoni auite, iuakara sikataparatarari Xesosi maerekani matamatakoni omitikini.

¹⁶ Apanakinipekana nirekari Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aāmatatiniri ikapani, Teoso iokanatinii ikorapokoriti aimarotini ikapani —itxarina.

¹⁷ Xesosi imarotari ninoa xinikanātakiti, ininiā iua txana:

—Kākiti tixine auakani, ninoakakarika inaiatakakiniūana, !apakata. Ixipokakakauana. Iua atokokana kākiti aapokoā auakani inaiatakakiniūana, ninoakakarika ixipokakakauana. ¹⁸ Iua atokokana Satanasi nitiriakori, ninoakakarika inaiatakakiniūana, Satanasi tapara xipokako. Ikara atoko ininiā, kona atāo hite sākire, nota iokanatinina Satanasi nitiriakori, maerekani matamatakoni, Satanasi taparaā.

Ikara hīsākire kona atāoni. ¹⁹ Hite sāpiretano, maerekani matamatakoni Satanasi taparaā nomitika, ininiākara kitaparaāpa hite moianariakori omitikana maerekani matamatakoni? Ninoa omitikana maerekani matamatakoni Teoso taparaā, ininiā ninoakara oerekari ! atāo hīsākire nota pirena. ²⁰ Teoso posotiireē nomitikari maerekani matamatakoni. Ikara atoko ininiā, Teoso oerekai iua apokaepa hitemoni hīauite inini ikapani.

²¹ —Kiki pataparari ikeeko iposope inakari moiainiāri aapoko, kona kiitirikikori itii.

²² Txamari āti kiki apiataparata inaiatinīari, iriākata, ininiā anikapitikari kaapokori ikeeko. Mitxi iua kaapokori sākire: “Nikeeko auiniā, kona kamakaxakikori nitii,” itxama, iuaritika kiki apiataparatarari itirikari itii. Eereka imoianariakorimoni ixanakari tiitxi.

²³ —Notakata maparīkaauatakani omanatano nota. Imamoianatakaniāno, inirekari nipaīka ixipokini —itxa Xesosi.

Maerekati Matamatakoti Kanapiriini Pirena

(Mateo 12.43-45)

²⁴ Iuaikana Xesosi sāpirenauata:

—Maerekati matamatakoti omitikosaaki, kākiti itakanapakasaaki, isaāpota āparaā makipakaniātaā auiniātaā initini ikapani. Imapokakaniāri, “Iuaikana nikanapiriāko mitxi nauinimoni,” itxa. ²⁵ Iuaā apoka. Iua aapoko mitxi inakari iusaaki peereri. Oere-tapeēkaika. ²⁶ Ininiā apana apikomoni setxi pakini maerekani matamatakoni, apia maerekanitakani. Ninoa ikinikana iroaitotari iua kiki. Iua iōā aua itxana. Iusaaki oitope maerekani matamatakoni misiritari iua kiki, ininiā apiata itsii inikoriā. Mitxipe ātinoka maerekati matamatakoti paniātari iua maerekati ikamini. Eereka oito paniātari iua —itxa Xesosi.

²⁷ Xesosi sākirauataka atoko, sito iuaā kākiti sauaki auakaro txari Xesosi:

—Pite auākitakakaro, pite axitakakaro, poxokoniuata, kotxi Teoso sikari erekari oamoni —otxa.

²⁸ Xesosi apakapapiretaro oa:

—Ari, inipitkara. Iuaritika Teoso sākire kenakotakani, isākire auīākani, apia poxokoniuata, kotxi Teoso sikari apikomoni erekari ninoamoni —itxa Xesosi.

Xonasi Pirena

(Mateo 12.38-42; 16.1-4; Marko 8.11-13)

²⁹ Kaiāopokori kākiti apokaāpota Xesosi takote. Iusaaki Xesosi txari:

—Kākiti uatxarini ! erekana. Hite nirekari noerekini Teoso takaōtxikare, iposotiire. Konapitini. Kona noerekai hite. Kitxakapiriāka Teoso sākire sāpiretakari Xonasini inakori auakasaaki, Teoso kamari posotiiretxi. Ikara atoko inakari posotiiretxi Xonasini auakasaaki, iuaikana ikamapanikariko. Iua posotiiretxi Teoso takaōtxikare itxapanikaua hite ikapani. Iua takaōtxikarinoka Teoso takaōtxikare hite ikapani. ³⁰ Kitxakapiriāka Nīnivi sitatxiti auakani imarotari Teoso iokanatiniri Xonasi ninoamoni. Iua atokokana kākiti uatxa auakani imarotari Teoso iokanatinino nota kākiti itari iaxitikiiri ninoamoni.

³¹ —Kitxakapiriāka sito Sapaa auakani auite sari ōtakoxiti auitexi Saromāo inakorimoni imarore okenakotini ikapani. Kākiti misiritiko ōti apokasaaki, oa sito txitanako kākiti uatxa auakani, kotxi uatxa uai aua Apiatakari. Iua Saromāo auitexi itxaua, iuaritika uatxa uai aua auitexiakori auite. Txamari kākiti uatxa auakani linirekari ikenakotinirina nota sākire.

³² —Kākiti misiritiko ōti apokasaaki, kākiti Nīnivi sitatxiti auakani txitaiko hite ikorasaaki auakani, kotxi ninoa kenakotari Xonasi sākire. Iusaaki itakanaparina maerekati ikamakitina. Uatxa uai aua Apiatakari. Xonasi poiāoka. Hite kenakotapekari nota sākire, txamari himaerekani !hitakanapa —itxa Xesosi.

Tirikapi Ítotxiākiri Pirena
(Mateo 6.22-23)

³³ Iuaíkana Xesosi sãpírenauata:

—Kãkiti iopotokakasaakiri tirikapi, itano itaka ikinimane Íroãkani atamarauatini Íkapani. !Ikpatari tirikapi. !Iomaãtari tirikapi kopiti åki. ³⁴ Poki tirikapi atoko itxa pũto Íkapani. Poki ereka inakasaaki ipinikare aua pãkixinireẽ. Poki maerekanisaaki, pãkixinireẽ mapiãriko. ³⁵ Erepaniko. Atxĩiti puãkataru ipinikare pãkixinireẽ auini, poku atxĩiti ipiãnoka auari pãkixinireẽ. ³⁶ Ipinikarenoka pãkixinireẽ auiniã, ipiã na xatiki auinii, tirikapi iopinikini atoko itxa —itxa Xesosi.

Pariseoakori Maerekani
(Mateo 23.1-36; Marko 12.37-40)

³⁷ Xesosi sãkirauata atoko pariseo aiataru Xesosi:

—Manipokota naapoko —itxari.

Ininiã Xesosi sari iuakata. Apokaãka atoko, iitopãka inipokotini Íkapani. ³⁸ Iua pariseo tsorÍkaãnãta Xesosi marokauakotakaniãua inipokotini apisa, kotxi iuasaaki Xesosi !Ikamari Xoteo kiomanekorini oerekakiti iaõka. ³⁹ Ininiã Xesosi:

—Hĩte pariseoakori arokari hũto, txamari hãkixinire patxikopiĩri, kotxi maerekatinoka hĩkama. Kapotxinaniri hĩtxaua. Iãkoanatxi inopininoka arokiko atoko hĩtxa. Pirato inopininoka arokiko atoko hĩtxa. ⁴⁰ !Kĩkĩteĩ hĩte. Teoso hũto kamakari kamari hãkixinire apaka. ⁴¹ Iãkoanatxi åki auakari iãriã hĩsikako matxineirotenimoni. Hĩpratone åki auakari nipokori hĩsikako matxineirotenimoni. Hĩtíretariko apanakini. Ikara atoko hĩkaminiã, Teoso atamataru hãkixinire ereka inini.

⁴² —Hĩte pariseoakori misiritaãkako. Hĩte sikari ipixini hĩtakare kikio auakari Teosomoni Moisesi paniãtakiti iaõka. Apikomoni hĩkama, kotxi ipixini takari kanaua åki hĩtakakiti apaka hĩsika Teosomoni, oteraã, seporĩa hĩsika. Erekapitikamari hĩte sikakiti Teosomoni, txamari himisirienetari kãkiti. Teoso !hĩtíreta. Erekaru ipixini hĩti hĩsikiniri Teoso. Iuakatikana erekaru atão hĩkaminiã kãkiti. Erekaru atão hĩtíretiniri Teoso.

⁴³ —Hĩte pariseoakori misiritaãkako. Hĩte potxitari hĩtãpãkini kãkiti apisatoõ, aiko åki Xoteo apotiĩniãtaãua kãkiti atamatinii Íkapaninoka. Nipokori sikaretikoãtaã hãuakasaaki, hĩte apokaerekataru kãkitipokoni paxitinii hĩte koerekareri hininiãua.

⁴⁴ —Hĩte pariseoakori misiritaãkako. Akauari matakãõtxiãkoti atoko hĩtxa. Iua nopini kãkiti napa imimarotakoniã, kotxi hũto peerekari, txamari hãkixinire !erekari. Akauari åki arakakari atoko itxa hãkixinire —itxa Xesosi.

Moisesi Paniãtakiti Oereãkani Maerekani

⁴⁵ Ikara sãkíretxiti kiki Moisesi paniãtakiti oereãkari kenakotakasaaki, omanãkarauata. Itxari Xesosi:

—Koerekareri, ikara atoko pisãkirauatiniã, ate apaka “maerekati kamakani” pitxataua ate —itxari.

⁴⁶ Ininiã Xesosi:

—Hĩte Moisesi paniãtakiti oereãkani hĩtekanerako misiritaãkako. Hĩte paniãtari kãkiti hĩteka paniãtakiti ikaminina. Ninoã !iposotari ikinika hĩpaniãtakiti ikaminina. Iminani ninoã porikiã hĩtakini atoko hĩkamanãta hĩte. !Iposotarina anikinirina. Hĩte apaka !hĩkamari hĩteka paniãtakiti. ⁴⁷ Hĩte misiritaãkako. Hĩte kamari takaõtxikari peereri Teoso sãkire sãpíretakanini ikatikoãtaã hĩtakini. Txamari hĩte atokiriakorinikara okapena ninoã Teoso sãkire sãpíretakanini. ⁴⁸ Iuaritika hĩte sãpíretari ikinimane hãpokaerekatiniri hĩte atokiriakorini kamakiti. Txamari ninoã okana Teoso sãkire sãpíretakanini. Hĩtera takari takaõtxikari peereri ninoã Teoso sãkire sãpíretakanini akauariãtaã, ininiã kãkiti uãkataru hĩpaxitinina ninoãni, txamari !hĩkamari ninoãni paniãtakiti.

⁴⁹ —Paimatireri Teoso, kotxi mitxipe imarotari ninoã kamakiti tũkane. Mitxipe iua txari: “Nota iokanatanako nisãkire sãpíretakani, niokanapirena aniãkani pakini ninoãmoni, txamari ninoã okapanikana apanakini. Imisiritapanikana apanakini,” itxa Teoso. ⁵⁰ Kãkiti uatxa auakani misiritaãkako, Teoso sãkire sãpíretakanini okiko xika. Teoso itixi ikamakasaakipeka ipotorika Teoso sãkire sãpíretakani okiko. ⁵¹ Merepitipanika Apeo inakori okapeãka. Ereka apanakini okaãpotapeãka. Imapotõkire okakori Sakaria inakori. Teosomoni sikakori takikoãtaã takote, Teoso Auini Pakitaãtaã takote apaka, iuaã okapeãka Sakaria. Inipitikara nota sãpíretai hĩte, uatxa auakani misiritaãkako ninoã Teoso sãkire sãpíretakani okiko xika.

⁵² —Hĩte Moisesi paniãtakiti oereãkani misiritaãkako. Hĩte kipataru atão inakari Teoso iokanapirena. Hĩte apaka !auikari ikara. !Hãuiritari apanakini auikiniri —itxa Xesosi.

⁵³ Ikara Xesosi sākire xika, Moisesi paniātakiti oereēkani, pariseoakori pakini tsoata, Xesosi omanatinina. Ātipirika ipimaānātapikarina Xesosi. ⁵⁴ Inirekarina Xesosi kerokiniri isākire, imaikiko Īkapani.

12

Kipatakori !Auari (Mateo 10.26-27)

¹ Kākitipokoni apotiitaua kinapokopeka, ininiā ikatxarakititakakauana. Iuasaaki Xesosi merepanika ōtākikana imoianariakori:

—Erepaniko pariseoakori sākire. Pamonōkoniri isākirena, kotxi ! ikamarina isākirena iaōka. Ikara imaerekanina kipataua pāo tireēkari pani koketakori atoko itxaua. Eereka imarotaāka imaerekani. ² Ikinika seretakori oerekaākako. Ikinika kipatakori imarotaākako. ³ Ininiā ipiāpokoā pisāpiretakiti, pokamara imarotaākako. Aapokotxi katoreri āki pimaasakapiretakiti aapokotxi nopini akiritaākako ikinimane imarotiniri Īkapani.

Kipa Apīka? (Mateo 10.28-31)

⁴ —Nimoianariakori nōtākikapanikai hīte. !Hīpīkapiri hīte okakani tīkane. Hītonanira iposotana okinina. Hīxinire !iposotana okinina. ⁵ Nisāpiretai hīpīkakiti tīkane. Teosora hīpīkako. Iuara posotari hīto okini, eereka iposotari iokanatinii maerekani misiritikoātaā. Ari, iuara hīpīkako.

⁶ —Kiripa ipi ipi āti pakini kotipiriki karone? Poiāonoka txineiro, ota ipinoka. Iuaritika Teoso !imaxinīkaretari ātika kotipiriki. ⁷ Kipakinipa piāko pikiiā auakari aua? !Pimarotari. Teoso imarotapitikari, kotxi iteene inīkatai, ininiākara !hīpīkarauatape. Kotipiriki ĩki poiāo, iuaritika Teoso tiretari kotipiriki. Kaiāopokori kotipiriki auiniā, iuaritika hīte ĩki apiata, ininiā Teoso tiretapitakai hīte —itxa Xesosi.

Xesosi Nakitiakori (Mateo 10.32-33; 12.31-32; 10.19-20)

⁸ Xesosi sāpirenauatapanika:

—Apikomoni nisāpiretai. Kākiti ikinimanemoni: “Xesosi nakiti nitxaua nota,” inakari, iua atokokana nota hītari iaxitikiri txako Teoso nitiriakorimoni: “Nota nakitipitikara iua,” nitxako. ⁹ Kākiti ikinimanemoni: “Xesosi nakiti !nitxaua nota,” inakari, iua atokokana nota hītari iaxitikiri txako Teoso nitiriakorimoni: “Kona nota nakitini iua,” nitxako.

¹⁰ —Kākiti misākirepiretiniāno nota hītari iaxitikiri, eereka amanainiāri Teoso ikara imaerekani imaktaxakini, ininiā Teoso maktaxakapitikari. Kākiti misākirepiretiniāri Erekar Matamatakoti, !kimaktxakikori ikara maerekati ikamakiti.

¹¹ —Hanikikosaaki aiko Xoteo apotiitiniātaāua hāpoitikoā, hanikikosaaki auītetxiakorimoni hāpoitikoā, mitxi !hīxinikapiri hīte apoitakani hāpakapapiretini. Maerekaxiniretinoka !hītixape. ¹² Iuasaaki ninoā apoitakasaakii, Erekar Matamatakoti sāpiretaiko hīte hāpakapapiretini Īkapani —itxa Xesosi sākire.

Kiki Katxineiroteri Mīkiteti

¹³ Kiki kākkitipokoni sauaki misākiretari Xesosi:

—Koerekareri, pipaniātari nitari sikinino nota ipixini aīrini tii ipīkasaaki itakanapakiti —itxa.

¹⁴ Ininiā Xesosi:

—Naōkimanere, kona nota parīkani pirini tii nixanakini —itxa Xesosi.

¹⁵ Ininiā Xesosi misākiretana ikinimane:

—Erepaniko. !Erekari tiitxi iteene pinirekini. Kapotxinani !hītixape. Itomaneri tiitxi !itxīkitakai okanani pauini —itxa Xesosi.

¹⁶ Ininiā Xesosi sāpiretari ia sāpirenatxi atāo inakari oerekiko:

—Kiki katxineiroteri aua kiki mitari. Itakare peerekari, kaiāopokori. ¹⁷ Ixinikaxitita ākixinireē: “Nāpa ninīkatarini nikiena? Nikiena nīkatikoātaā xapitikiri. !Apakata itomaneri nikiena Īkapani. Kipa nikama? ¹⁸ Ari, nīmarotari nīkamakiti tīkane. Nōtikariko nikiena nīkatikoātaā. Iuaikana nīkamari āti mitari. Iuaā ikinika nikiena, nitii apaka ninīkata. ¹⁹ Eereka notaka nitxauako: ‘Peerekano nota. Kaiāopokori nikiena. Kaiāopokori nitii. Apakatapitikako kaiāopokori anokanani Īkapani. Ininiā !nīparīkauataika. Ninipokotako, niātako, nīpoxokoniuatako nitxako,’ ” itxa iua kiki. ²⁰ Txamari Teoso misākiretari iua: “Kīikitei pite. Uatxa ia ĩkanōkati pipinako, ininiā kipa apakapatarini ikinipoko pikiena, pitii apaka?” itxa Teoso.

²¹ —Ikara atoko itxa kākiti tiitxinoka xinīkakari, Teoso maxinikati —itxa Xesosi ikara sākiretixi ixipokini.

Teoso Nīkatiniua Ate
(Mateo 6.25-34)

²² Ininiā Xesosi misākiretari imoianariakori:

—Ininiākara nota sāpiretai hīte, maerekaxiniretinoka ! hītxape, hiniākiti nire, mākatxi hīretāākiti nire. ²³ Nīpokori, mākatxi pakininoka kona t̄xīkitakari pauini ereka inini. Nīpokori, mākatxi pakini poiāoka. ²⁴ Hātamatari kotipiriki. Ninoa ! itakarauata. ! Amarina ikiena. ! Ipotetarina ikiena. Iuaritika Teoso sikakienatana ninoa. Teoso nīkatiniāri kotipiriki, inīkatapitikai hīte apaka. Hīte īki apiata. ²⁵ Kinirepa maerekaxiniretinoka pitxa? Pimaerekaxinirene ! it̄xīkitakai apikomoni āti oara pauini. ²⁶ Pimaerekaxinirene kona t̄xīkitakai axapitiki apikomoni pauini, ininiā kinirepa maerekaxiniretika pitxa?

²⁷ —Aūui pīxinikako. Kona aūui par̄kauata. ! Ikamari imāka, iuaritika aūui peereri. Kitxakapirika aūt̄etxi Saromāo inakori, iteene katiiri itxaua. Kaiāori imāka ereri, iuaritika apia ereri ikinika aūui. ²⁸ Aūui ! okanani aua. Uatxa aua. Katana ikatikata iotikaāka. Iuaritika Teoso nīkatari aūui. Ininiā apiata inīkatari hīte. Ikamamākatapitikai. Poiāonoka hīte auikari Teoso sākire. Ikara xika maerekaxiniretinoka hītxa. ²⁹ Ininiākara maerekaxiniretinoka ! hītxape. ! Hīxinikanātapiri nīpokori mauakanisaaki, iariā mauakanisaaki. ³⁰ Kākiti Teoso sākire mauīākani ikinīōtika maerekaxiniretinoka itxana imākana ixinikinina xika, inīpokore ixinikinina xika. Hīri imarotari himāka hinirekini, hīkiena hinirekini. ³¹ Merepitipanika pinirekariko Teoso piaūte ininiāua. Iua nireēkiti pikamako, ininiā, himāka, hīkiena apaka Teoso sikaiko hīte —itxa Xesosi sākire.

Hīparīka Īki Nīkatiko
(Mateo 6.19-21)

³² —Ininiā hīte ninakitiakori ! hīpīkarauatape, kotxi hīri apokaerekatari isikinii ikinipoko erekari iua aūt̄etxi ininiātaūakiri. ³³ Ikinika hīti hīvēt̄xitako. Txineiro hīsikako matxineirotenimoni. Ikara atoko hīkaminiā, hīparīka īki auapitika Teoso tixine. Iuaā hīparīka īki ! ixipoka. Kītiriri ĩtirīkari. Kīiriki ĩnikari. Iuaā hinīkatari hīparīka īki. ³⁴ Erekarī hīparīka īki Teoso tixine auiniā, ininiākara iuaā pīxinikapika. Iuaā pinirekari pauini —itxa Xesosi.

Nitiritxi Erekarini

³⁵ Xesosi sāpirenauatapanika:

—Himerekako, kamāka hītxako. Tirikapi hīopotokakako. Iposope hītxako nīparīka hīkamini ikapani. ³⁶ Nitiritxi ipatrāotena iātapakani atoko hītxako. Ipatrāotena sari ĩtanorouatakari kiiniritemoni. Initiriakori iātapari ikanapiriini. Apokasaaki, akiritakasaaki, pakoteri initiriakori matakakari itore ipatrāotena ĩroini ikapani. Ninoa nitiritxi atoko hītxako. ³⁷ Patrāo apokasaaki initiriakori merekapanika inakasaaki, iātapanātakasaakiri iua, ininiākara erekapitikari. Himarotatari patrāo kamakiti? Iua ieretakari imāka iparīkauatini ikapani. Ipaniātana ninoa topākini. Eereka isikakienatana initiriakori. ³⁸ Erekapitikari ipatrāotena apokasaaki imirekiniāna. Atxiīti apanīkanōka apoka ipatrāotena. Atxiīti imaropirīkata apoka ipatrāotena, iuaritika iposope itxana, ininiā erekapitikari.

³⁹ —Hīxinikari ia. Kaapokori imarotaākamariko kītiriri apokini, !auritamariko iua aapoko ĩroini itīi ĩtirīkini ikapani. ⁴⁰ Hītepekana, hīte apaka iposope hītxako, kotxi nota hītari iaxitiki kanapiriāko. Iuasaaki, “!Apoka uatxa,” hinakasaaki, iua ōtipitika nota kanapiriā uai —itxa Xesosi.

Nitiritxi Erekarini, Nitiritxi Maerekati Pakini
(Mateo 24.45-51)

⁴¹ Petro misākiretari Xesosi:

—Apiananiri, ikara sāpirenatxi atāo inakari oerekiko pisāpiretakiti, atenani poerekini ikapanikani? Ikinimane poerekini ikapanikani ikara pisāpireta? —itxa Petro Xesosimoni.

⁴² Ininiā Xesosi:

—Nitiritxi kimaroreri ipatrāote paniātakiti kamakari ia atoko itxako. Iuara apanakini nitiritxi aūte itxaua. Iuara sikakienatana apanakini nitiritxi nipokotiko manapi. ⁴³ Nitiritxi ipatrāote paniātakiti iaōka kamakari poxokoniuata ipatrāote apokasaaki, kotxi ipatrāote paniātakiti iaōka ikama. ⁴⁴ Ipatrāote auiritariko iua ikinika itīi, aapoko, ikikiote pakini inīkatini.

⁴⁵ —Txamari atxiīti āti patrāo nitiri !nīrekarini ipatrāote paniātakiti iaōka ikamini, ipatrāote auapokotini xika. Atxiīti inoropatari apanakini ipatrāote nitiriakori, apanakini ipatrāote niteroakoro apaka. Atxiīti inīpokota, kapoāro iāta, ipoāta. ⁴⁶ Ipatrāote apoka inītiri mīmarotakanisaaki, ininiākara inītiri liposopanika ipatrāote apakapini. Ikara xika ipatrāote misiritari iua. Eereka iokanatarini iua Teoso sākire mauīākani misiritikoātaā.

⁴⁷ —Nitiritxi ipatrāote nireēkiti imarotakari makamakaniāri ipatrāote paniātakiti iposope inini ikapani, ixirokitataākako aāpitsāā. ⁴⁸ Nitiritxi ipatrāote nireēkiti mīmarotakati

kaminiári maerekati, ixirokitataākako, txamari poiāonoka. Teoso sikari parīkatxi, imaroretxi pakini kākitemoni. Kaiāopokori parīkatxi, kaiāopokori imaroretxi isikiniāi pitemoni, ininiā Teoso nirekari pite iteene parīkauatini iua ikapani. Apikomoni parīkatxi, apikomoni imaroretxi isikiniāi pitemoni, ininiā Teoso nirekari pite apiata piparīkauatini iua ikapani —itxa Xesosi sākire.

Neenamatz Xesosi Sākire Auikiko Xika
(Mateo 10.34-36)

⁴⁹ Xesosi sākirauatapanika:

—Teoso misiritariko kākiti imaerekani xika. Xamina tirinini atoko itxa kākiti misiritiko. Ia itixi napoka ikara xamina tirinini nitxikitakini ikapani. Ninirekari ikara nīparīka nixipokini. ⁵⁰ Nota atatsiirauatoko. !Erekaxinireno. Ninirekakari natatsiirauatini katima xipokaka inini. ⁵¹ Kona neenamatz niotokakini ikapanini napoka ikorapokoriti. Nota sākire auikiko xika neenamatz auapitakoko. ⁵² Aapokotxi āki auakani sīko. Atxiiti ipi āti pakini naiatari ipi, atxiiti ipi naiatari ipi āti pakini, nota sākire auikiko xika. ⁵³ Irītxiakori omanatana ninoā ākiri nota sākire auikiko xika. Ninoā ākiri omanatana iriakori. Inorotxiakoro omanatana ninoā ākero. Ninoā ākero omanatana inoroakoro. Imakirotxiakoro omanatana otiroakoro. Otiroakoro omanatana oimakiroakoro nota sākire auikiko xika —itxa Xesosi sākire.

Iaxiti Imarotiko
(Mateo 16.1-4)

⁵⁴ Xesosi iuaikana misākiretari kākiti:

—Atokatxi ereēkokinimoni ipiākaāpotakasaaki, “Āparaānapani,” hītxa. Ari, ikipapitakoko. ⁵⁵ Ītima ikiitāā ikari apokasaaki ikorapokoriti, hīte: “Kamoīpani,” hītxa. Ari, kapatakapitakariko. ⁵⁶ Kamisirienererini hītxaua. Hātamatari iaxiti, itixi pakini, ininiā himarotapitakari āparaā, kamoī pakini. Kinirepa kona hātamatano nota? Kinirepa kona hūkenakotari nisākire Teoso kamaenetakiti himarotini ikapani? —itxa Xesosi sākire.

Pimisiritiko Mereēkarimoni Pimasikani Īkapani
(Mateo 5.25-26)

⁵⁷ —Kinirepa hīteka na xinikari atāo inakari hīkamini tīkane? ⁵⁸ Maerekati pikamakasaaki, āti nirekari anikini pimisiritiko mereēkarimoni. Iua anikini apisapanika, pisākirauata iuakata atāo pikamini ikapani, ininiā iua !anikaikai pimisiritiko mereēkarimoni. Pimamisākiretakaniāri, iua anikaiko pimisiritiko mereēkarimoni. Eereka pimisiritiko mereēkari sikaiko sotatomoni. Eereka sotato takai kateia āki. ⁵⁹ Atāo nisāpiretai, kona posipikari kateia ikinika pimisiritiko mereēkari paniātakiti pimiitkitakanisaaki —itxa Xesosi.

13

Himatakanapananiāri Himaerekani, Hīpinako

¹ Xesosi sākirauatakasaaki, kākiti iuaā auakani sāpiretari iua Karirēia auakani okiko pirena. Ninoā Teoso misākiretiko aikotiā auakasaaki, ninoā okari ipirana imaerekana Teoso makatxakini ikapani. Ininiā iuaasaaki Pirato sotatone apoka iuaā. Iuaasaaki ninoā okana. ² Xesosi imarotari kākiti ākixinire xiniākiti. Ininiā ia atoko itxa:

—Hīte uākatari ninoā Karirēia auakani maerekani apiata. Ininiā, “Ikara atoko inapeēkana ninoani,” hītxa. ³ Konapitini. Nota sāpiretai hīte, himaerekani himatakanapananisaaki, hīpinako ninoā atokokana hinaākako —itxa Xesosi.

⁴ Ininiā Xesosi sāpiretari ninoā apanakini ipinini pirena:

—Xerosareē aua Siroe inakori aapokotxiti. Iua aapokotxi Ītanori irika. Irikasaaki, tesoitokikiakorini ipīpe. Hīte uākatana iuaā auakani apia maerekani itxauana? ⁵ Konapitini. Hītekanera himaerekani himatakanapananisaaki, ninoā atokokanera hīpina —itxa Xesosi.

Piko Mina Mariti Pirena

⁶ Ininiā Xesosi sāpiretari āti sāpirenatxi atāo inakari oerekiko:

—Aua kiki. Initirikata isari ikikiote atini ikapani. Iuaātaā aua amātiiri piko inakori mina. Iuaā apokasaaki, maritoka otxa itakare. ⁷ Ininiā itxari: “Ipikanani ātikanani pakini ninapiima. !Kariro. Ininiā erekari otokiko, kotxi kona oīriuata. Ininiā kona erekari uai okaikotini, kotxi oxipokari takari kiena kipatxi āki auakari,” itxari initiri. ⁸ Ininiā initiri: “Kona pitokapero. Nota oeretariko opatapi. Āti kipatxi erekari patari tīkakata nitakapataparoko. ⁹ Ātikanani inakasaakia karipeka omniā, ereē oāua. Erekarikaikaikotini. Omīriuatakanisaaki, iuaasaaki erekapekari otokiko,” itxa initiri —itxa Xesosi.

Tomatiko Ōtisaaki Xesosi Makananitiniro Sito

¹⁰ Tomatiko òtisaaki Xesosi auari aiko Xoteo apotiitiniãtaãua. ¹¹ Iuasaaki sito apoka. Tesoito anokananipeka ina amianaretakaro. Ia atoko otxa amianareta. Okomikããpota, kotxi maerekati matamatakoti amianari kamakari Ìroãftotaro. Kona oposota oòkitikaòtotiniãua. ¹² Xesosi atamatakasaakiro, itxaro:

–Sito, erekapitikaiko uatxa –itxaro.

¹³ Ininiã itakari iuako onopini. Iuasaakipeka oòkitikaòtota. Ininiã iuasaaki otxa:

–Peerekari Teoso. Erekarì imakinika ikamakiti –otxa.

¹⁴ Iuasaakipeka Xoteo apotiitiniãtaãua aikotiã auakani auíte naiataua, kotxi tomatiko òtisaaki Xesosi makananitaro amianatakaro. Ininiã iua txitari kãkiti:

–Auari seisi pakini òti kãkiti parìkauatini Ìkapani. Ininiã Ìkora seisi òti hina iua makananinini Ìkapani. Kona hinape tomatiko òti erekapeka hìtxìkitakiko Ìkapani –itxana.

¹⁵ Ininiã Xesosi txari iua:

–Hìsãkire atxìiti erekari, txamari kona hìkamari hìsãkire iaòka. Tomatiko òtisaaki hìte tiretari hìpirakori, kotxi hanikari hìpirakori, kema auíte iaãmoni àparaã iãtinina Ìkapani.

¹⁶ Oia sito Apraãoni apika mekaniro otxaua. Satanasi kamaamianaretaro oa tesoito anokananipeka. Iaòpe. Apakatapitika tomatiko òtisaaki nitiretiniro oa, nimakananitiniro oa –itxa Xesosi.

¹⁷ Xesosi apakapapiretakasaakina, imokaiakariakori pètauata. Iuasaaki apanakini iuaã auakani poxokoniuata, kotxi imarotarina erekari Xesosi kamakiti.

Mostata Pirena

(Mateo 13.31-32; Marko 4.30-32)

¹⁸ Ininiã Xesosi pimaãna:

–Natokopa itxa Teoso auítetxi ininiãua? Kiãtokopa itxa axinikiniri? ¹⁹ Teoso auítetxi ininiãua mostata iki atoko itxa. Kiki takaro mostata ikikioteë. Oa aneë. Mitape onakasaaki kotipiriki kamari ikoa okatiã. Ikara atoko itxa Teoso auítetxi ininiua –itxa Xesosi.

Merepanika poião kãkiti auítetari Teoso. Eereka kaiãopokori kãkiti auítetari iua. Txamari iuasaaki Satanasi apoka ninoamoni kotipiriki apokini atokokana.

Pão Tirekakari Pirena

(Mateo 13.33)

²⁰ Iuaikana Xesosi pimaãna:

–Natokopa itxa Ìkorapokoriti Teoso auítetxi ininiãua? ²¹ Ia atokokana itxa: Sito kosekari pão tirekakari pani. Okoketari axapiti pão tirekakari pani kaiãopokori triko panikata, àparaãkata. Eereka ikinika ipe tirekaãpota otxa.

Axapitiri Ironakikoãtaã

(Mateo 7.13-14, 21-23)

²² Ikara inaka atoko Xesosi potorika Xerosareë sitatxiti isini Ìkapani. Isaãpotakasaaki, isãpiretari Teoso sãkire. Isãpiretari àti sitatxitiã, àti aapokotxitiã, àti sitatxitiã, itxaãpota isãpiretiniri Teoso sãkire kãkitimoni. ²³ Oerekarauanãtakasaaki, kiki pimaãri:

–Niauíte, poiãokani satako Teoso auiniãtaã?

²⁴ Ininiã Xesosi apakapapiretari:

–Teoso tixine Ironakikoãtaã axapitiri. Hinirekariko iuaã hìiroini. Kaiãopokori kãkiti nirekari Ìroinina. Txamari, I iposotarina. ²⁵ Kaapokori totiniri aapoko tore atoko itxa. Itotakasaakiri, kãkiti iporikiti aritari itore: “Pimataakariko itore ate Ìkapani.” Iuasaaki iua kaapokori txako: “Kona nimarotai hìte,” itxanako ninoamoni. ²⁶ Ininiã ninoa: “Ate nipokota pitekata. Sitatxi ate auiniãtaã pauakasaaki, pitekara oerekaua,” itxanako ninoa. ²⁷ Ininiã iuaikana itxako ninoamoni: “!Nimarotai hìte. Namonipa hãua hìte? Hìsipiniikaua. Imakinika hìkamakiti !erekari.”

²⁸ –Hãtamatakasaakina Apraão, Isaki, Xakoo, ikinimane Teoso sãkire sãpiretakani pakini Teoso auítetxi ininiãtaãua, iuasaaki hìtxiapatapitikako. Apanakini Ìroãpeka. Txama hìtenoka kaikotape iporikiti himaerekani xika. ²⁹ Teoso auítetxi ininiãtaãua apokako kaiãopokori kãkiti, ikini itixiti Ìkani. Atokatxi pokìkinimoni Ìkani, atokatxi ereëkokinimoni Ìkani, atokatxi pokìkini sanaremoni Ìkani, atokatxi pokìkini kikomoni Ìkani pakini apokako Teoso kiiniritimoni. ³⁰ Merepitipanika Xoteoakori kenakotari Teoso sãkire, txamari !imaãkatari. Eereka Xoteo minakanuia kenakotari Teoso sãkire, ininiã auikarina. Ininiã Xoteo minakanuia apokako Teoso auítetxi ininiãtaãua Xoteoakori apokini apisa –itxa Xesosi sãkire.

Xesosi Tiretari Xerosareë Auakani

(Mateo 23.37-39)

³¹ Ikarasaakipeka àtikaka pariseoakori apoka. Itxarina Xesosi:

–Pisipiniikaua, kotxi Erotxi okaenetai –itxarina.

³² Ininiã Xesosi apakapapiretana:

—Hísa iuamoni. Hítxariko iua aripa kamisirienereri: “Nota omitikari maerekati mata-matakoti, apaka amianatakani erekepeka nitxíkitaka. Uatxa, katana pakini niparíkauatako. Ipi áti ótisaaki nixipokariko niparíkaka íkorapokoriti.” Ikara atoko hítxariko iua. ³³ Ininiã uatxa niparíkauatako. Katana niparíkauatako. Ininiã katana eereka nisa Xerosareëmoni, kotxi átiãtaã Teoso sãkire sãpiretakani okikoãtaã !uuari. Xerosareënanira ninoa ipina. Ininiã nota sako iuaã.

³⁴ —Xerosareë auakanii, Xerosareë auakanii, híte okapekana Teoso sãkire sãpiretakani. Kai soroã hikiporonakana ninoa hitemoni Teoso iokanatakini. Kaiãokalani ninirekamari niníkatini, patari oimiakori omíkita patapi otakini atokokana nitxanakamaiko híte. Txamari !hãuiritano nota níkatini. ³⁵ Ikara atoko inakari xika haãpoko asikaãkako. Teoso !auaika hítekata. Nisãpiretai. Ia óti hãtamatano, eereka !hãtamataikano. “Teoso takari erekari uaimoni íkarimoni, Apiananiri posotiireë íkarimoni,” hinakasaaki, uasaakinanirako hãtamatanoko nota —itxa Xesosi.

14

Xesosi Erekepeka Txíkitakari Amianatakari

¹ Tomatiko ótisaaki Xesosi sari pariseoakori auitemoni, iukata inipokotini íkapani. Iuaã auakani mixinitari iua apoítinirina íkapani. ² Iuasaakepeka apoka kiki amianatakari. Ikanoke, itapike, imakinika ananaítota. Iua apoka Xesosimoni. ³ Ininiã Xesosi pimaãna Moisesini sãkire oerekakani, pariseoakori pakini. Ipimaãna:

—Erekari atxíiti tomatiko ótisaaki amianatakari erekepeka nitxíkitakini? —itxa Xesosi.

⁴ Ininiã ninoa tsoríkaãnãta. !Apakapapiretarina. Ininiã iuasaaki Xesosi erekepeka txíkitakari iua amianatakari.

—Pisipeka paapokomoni —itxa Xesosi.

⁵ Eereka ipimaãna pariseoakori:

—Hípira kema auíte, hípira poho apaka aariko áki irikiniã tomatiko ótisaaki, iuasaaki himaktxakatarari? Ari, himaktxakapitikari hípira tomatiko ótisaaki. Ininiã kinirepa kona hinirekatari erekari níkamini tomatiko ótisaaki? —itxa Xesosi.

⁶ Txamari kona ninoa apakapapiretari, kotxi atão Xesosi sãkire.

Kiiniri Kamakari Pirena

⁷ Iuasaaki Xesosi itikana kãkiti. Apanakini mereëri kãkiti apiatakari takote iitopãkini. Ininiã isãpiretari ia sãpirenatxi atão inakari oerekiko.

⁸ Kãkiti ítaniriuatini kiiniriti pirena isãpireta:

—Kiiniriã hísikasaaki, kona himereëpiri kãkiti apiatakari topãkiniãtaã hiitopãkini, kotxi atxíiti eereka kemaítxitarari apiatakari apoka. ⁹ Ininiã iua apiatakari apokasaaki, kakiniriteri txaiko pite: “Ikaraã piitopãka. Ia kiki topãka nota takote.” Iuasaaki pipëtauata. Ininiã pitakanapari iuaã. Maparapeka apanakinikata topãka pitxa. ¹⁰ Kiiniriã hísikasaaki, apanakinikata híitopãka. Ikara atoko ininiã, kakiniriteri akiritai: “Nitari uaimoni pina. Piitopãka uai. Uaira erekari.” Ikara atoko pininiã, apanakini iuaã auakani imarotariko pite apiatakari pininiãua. ¹¹ Átikaka kãkiti txari: “Nota apiari nitxaua.” Txamari Teoso txariko: “Poiãori itxaua.” Átipekana txari: “Nota poiãori nitxaua.” Txamari Teoso txariko: “Iua apiari itxaua.”

¹² Xesosi txari ikemaítxitarikari:

—Kiiniri pikamakasaaki, kona pikemaítxitapiri pinirimane, pitariakori, paõkimaneri, paapoko takote auakani, kaxineiroteni pakini, ninoa iuaíkana kemaítxitini pite íkapani. Ininiã ikara atoko ninoa íkitxitai. ¹³ Apiaerekata kiiniri pikamakasaaki, pikemaítxitari kãkiti minakati mauakiniti, mokirini, matípokotakati pakini. ¹⁴ Ikara atoko pininiã, Teoso sikari erekari pitemoni, kotxi ninoa liposotari kiiniri íkaminina, iuaritika kãkiti erekarini iuaíkana õkitikasaakiaua, iuasaaki Teoso íkitxitaiko pite —itxa Xesosi sãkire.

Kiiniri Mitari Pirena

(Mateo 22.1-14)

¹⁵ Ininiã áti Xesosikata nipokotakari kenakotari ikara Xesosi sãkire. Ininiã iua txari:

—Teoso auítetxi ininiãtaãua sikani nipokotako iuaã. Ininiã iuasaaki Teoso sipapoxokoni-tana —itxari.

¹⁶ Ininiã Xesosi apakapapireta. Ia atoko itxa:

—Kiki kiiniri kamakari kemaítxitari itomaneri kãkiti. ¹⁷ Nipokori iposopeka inakasaaki, iokanatarari initari ikemaítxitakinimoni: “Masa kiinirimoni. Iposopekari imakinika nipokori,” itxa.

¹⁸ —Txamari ikemaítxitakini kamari áti sãkiretxi kiinirimoni imasikanina íkapani. Ininiã kemaítxitakori txari: “Nota amotari itixi. Iua ninireka natini. Ininiã !niposotari nisini kiiniriã,” itxa.

¹⁹ —Ininiã áti: “Nota amotari tesi kema auíte parĩkauatakani. Ininiã nota sari ninoamoni. Ninireka nimarotiniri ninoa parĩka. Pauiritano nisini ninoamoni,” itxa.

²⁰ —Átipekana: “Nota Ítanorouatape. Nitanoro auano nota. Ininiã kona niposota nisini pikiiniritemoni,” itxa.

²¹ —Ininiã inítiri kanapiriã iauítemoni. Ikinipoko ikemaĩxitakini sãkire isãpireta iuamoni. Ininiã iuasaaki iua auítetxi naiautaua. Ininiã ipaniãtari inítiri: “Sitatxi auakari kimaporitiã pisa. Katima pitxako. Piminana kãkiti minakati mauakini, matipokotakani, mokirini pakini pimina,” itxari. ²² Ininiã katimaritika ikamari ikinika auítetxi paniãtakiti. “Nikamapekari ikinika pipaniãtakiti, txamari auapanika nipokori. Apakatapanika kãkiti nikini íkapani,” itxa.

²³ —Ininiã iuaĩkana, iua auítetxi paniãtari sitatxi mapara òtako isini. “Tuaã pakiritana kãkiti inini, naapoko kãkiti xãpokini íkapani. ²⁴ Atãopitikara nitxai: ‘Mítxi nikemaĩxitakini ! inikapani nikiena,’” itxa.

Xesosi Moianari Pininiua

(Mateo 10.37-39)

²⁵ Áti òti itomaneri kãkiti moianatari Xesosi. Ininiã ikirioka sãpireta itxana ia sãkiretxiti:

²⁶ —Nota kinirão moianataka hinakasaaki, apiata hítiretanoko nota. Merepanika hítiretanoko nota, eereka hítiretanako hĩri, hinoro, hĩtaniri, hĩtanoro, hĩtari, hĩtaro, hamarite pakini. Híteka apaka poião hítiretauako. ²⁷ Nota kinirão moianataka hinakasaaki, notakata hĩsa. Himamũteenekakanisaakiri himisiritiko nota íkapani, ininiã !apakata himoianatinino.

²⁸ —Hinirekiniãri aapokotxi mitari sitatxi auakari atoko hĩkamini, merepanika hĩxinikaroko txineiro aapokotxi kamiko karone. Atxiĩti ! apakata hĩtxineirote. Atxiĩti apakata. Ikara atoko hĩxinika merepanika. ²⁹ Ikara maxinikati merepanika !ixinikari, ininiã atxiĩti itakari itsota, ininiã eereka txineiro !auaika, ininiã kona apakata imakinika ikamini. Ininiã apanakini napetari iua. ³⁰ Ininiã ninoa txari: “Hãtamariko ikamakiti. Iua kiki potarikamari íkora aapoko, txamari !iposotari imakinika ikamini.” Ikara atoko itxanako. Ininiã pikamakiti apisapanika iteene hĩxinikariko.

³¹ Ininiã eereka Xesosi sãpiretari áti sãkiretxi:

—Auítetxi auari tesi mio sotato. Iua nirekari neenamatzxi ikamini áti auítetxikata. Txamari áti auítetxi auari vĩtxi mio sotato. Iua tesi mio sotato auakiti merepanika xinikari, atxiĩti iposota ineenamauatini vĩtxi mio sotatokata? Atxiĩti auítetxi vĩtxi mio sotato auakiti xipokari iua? Ininiã apisapanika ixinikari. ³² Imaposotakaniãri, vĩtxi mio sotato òtakapanika auakasaaki, iua auítetxi tesi mio auakiti iokanapireta áti auítetximoni isãkirauatinina íkapani, neenamatzxi xipokini íkapani.

³³ —Erekari iua auítetxi neenamatzxi takanapakari atoko hinini. Ininiã merepanika hãkixinireẽ hĩxinikariko: “Nota nirekatari nimoianatiniri Xesosi, kotxi pasãpaniri?” hĩtxa. Atão hinirekiniãri himoianatinino, ininiã imakinika hũtakanapako notakata hĩsini íkapani. Himanirekakaniãri hũtakanapiniri imakinika, ininiã ! apakata himoianatinino. Ininiã hĩxinikariko merepanika —itxa Xesosi.

Iõkira Matxoato Pirena

(Mateo 5.13; Marko 9.50)

³⁴ —Iõkira peerekaro. Omatxoaniã, !otxaika. Aua kãkiti iõkira potxoaro atoko inakani, ininiã erekapitkana ninoa. Apanakini kãkiti iõkira matxoato atoko itxana. !Kakamarena ninoa. ³⁵ Iõkira matxoato ininiã, !apakata takari sikakienatiko íkapani. !Apakata hĩkoketiniri kipatxikata, pirãtxi tikakata takari sikakienatiko íkapani. Kona erekaro. Maparamoni oõkapeõkaika. Ikara atoko itxa apanakini, kotxi ninoa !kakamarena.

—Kakenakokii hĩte, ininiã hĩkenakotariko ia nisãkire.

15

Soti Auíte Ereẽkokakari

(Mateo 18.10-14)

¹ Áti òti auítetxiakori txineirote apakapakani, apanakini maerekati kamakani apaka apotiitaua Xesosi sãkire ikenakotinina íkapani. Ninoa kaiãopoko. ² Iuasaaki pariseoakori, kaiõkatsopareriakori pakini misãkireporetari Xesosi. Itxana:

—Iua apakapari maerekani. Maerekanikata inipokota —itxana.

³ Ikara isãkirena xilka Xesosi sãpiretari ipi, áti pakini sãpirenatxi atão inakari oerekiko. ⁴ Ia atoko itxa Xesosi:

—Atxiĩti pite aua seĩ soti auíte. Áti pĩpanakiniã, kipa pikama? Pitakanapari apanakini mapara inipokotiniãtã apanakini nĩkatini íkapani. Ininiã eereka pisari pĩpanakakari pinitini íkapani. ⁵ Papokasaakiri iua pĩpanakakari, pipoxokoniua. Piporikiãpotari pipira

paapokomoni. ⁶ Papokaãka atoko pakiritana paðkimaneriakori, apanakini kãkiti pakini. Pitxana ninoa: “Hípoxokoniuatoko notakata, kotxi napokapekari nipira pîpinanakakari,” itxa soti auíte pitikiri.

⁷ —Nisãpiretai híte, ãtika maerekati kamakari takanapakasaakiri imaerekani, iaxiti Teoso auniãtaã auakani poxokoniuatapitikako. Atxiiti novêta novi kãkiti iuikakanuia txari: “Peerekaua ate. !Akamari maerekati,” itxana. Txama kona atão isãkirena. Ninoa sãkire kona kamari iaxitikini poxokoniuatini —itxa Xesosi.

Ota Pirata Kamakoro Ereëkokakaro

⁸ Apikomoni Xesosi txari:

—Sito aua tesi ota pirata kamakoro. Pakaronero. ãto ereëkokiniã, ininiã onitakasaakiro oiopotokakari tirikapi. Oiatikaãpotari oaãpoko ota onitaãpotini Ìkapani. ⁹ Oa apokasaakiro, apanakini oãkirita: “Hípoxokonauatoko notakata. Napokapekaro ota ereëkokakaro,” otxa.

¹⁰ —Kãkiti poxokoniuatoko ota pirata kamakoro apokikosaaki. Nisãpiretai, iaxiti Teoso nitiriakori apiapoxokoniuatoko, ãti maerekati kamakari imaerekani itakanapakasaaki —itxa Xesosi.

Imi Ereëkokakari Pirena

¹¹ Apikomoni Xesosi txari:

—Aua kiki. Ipi imiakori. ¹² Maneri takari amanaãri iri. Itxari: “Ninirekari pitakana-pakito pipíkasaaki pisikineri notamoni uatxa,” itxa. Ininiã iri xanakari inakiti imiakorimoni. ¹³ Eereka mapaõti inaka atoko, iua ãtokori apotiitari iri sikakiti. Ininiã eereka isipeka. Õtakoxiti ãti tixini isa. Iuaã maerekati ikama. Iuaã xipoka itxari iri sikiniri.

¹⁴ —Ìkinika ixipoka iuaã. Iuasaaki ãparaã !ikipa. Natxipokoni auari. Nipokori !auari. Ininiã iuasaaki iua minakati !auari. Imakinika xipope. ¹⁵ Ininiã iuaxiti auakarimoni isa, parikatxi amanaini Ìkapani. Ininiã ipatrãote paniãtari iriariakori isikakienatini. ¹⁶ Irariakori isikakienatakasaaki, natxinoka itxa. Iuasaaki iua nirekari irariakori kiena inikini, kotxi iua sikakienatakari !auari.

¹⁷ —Iuasaakiika ixinikari iri aapoko: “Niri nitiriakori aua nipokori. Nipokori itetakori auapitika. Uai natxinoka txapeno nota. ¹⁸ Nikanapiriãko niri aapokomoni. Nitxariko niri: ‘Maerekati nikamapeka Teosomoni, pitemoni apaka. ¹⁹ Kona pamarite na pitxaikanoko, kotxi !erekano. Pitxikitakano pinitiri nininiu.’ Ikara atoko nitxariko niri,” itxa. ²⁰ Ininiã iua aiamata, kanapiriã itxa iri aapokomoni. Iuasaaki iri iãtapanãtari iua ikiniõtika.

—Ininiã iua apokaãpotakasaaki, õtakopanika, iri atapari iua. Ininiã iri miteëkata iuamoni. Ininiã iteene ipoxokoniuatoko. ²¹ Iuasaaki imi txari iri: “Niri, maerekati nikamapeka Teosomoni, pitemoni apaka. Kona pamarite na pitxaikanoko, kotxi !erekano.”

²² —Iuasaakipeka iri akiritari initiriakori: “Katima hõtako, mãkatxi ereri himinini. Aneo ereri hõtako iuakokimoni. Ikiti mata hõtako ikitiã. ²³ Kema auíte kiiri hõkako. Kiiniri makamako. Manipokota. Mapoxokoniuatoko, ²⁴ kotxi ia namarite ipíkari atokopeka, uatxa iuaikana ikanapiripeka. Mitxi pîpinanakakari atoko itxa, uatxa apokapeëkaika,” itxa.

—Ininiã iuasaaki ninoamoni ipoxokoniuatini apopeka.

²⁵ Ninoa kiiniritauatakasaaki, imi aneëkari tokoriã iparíkauanãta. Ikanapiriãkasaaki aapokomoni, ikenakotari xikari, serëkatxi ene pakini. ²⁶ Ininiã akiritari iri nitiri: “Kiripa ikara?” itxari. ²⁷ Iri nitiri apakapireta: “Pitari apoka. Ininiã piri paniãtari kema auíte okiko, kotxi erekapanikari pitari. Kona monõkari apoka iuamoni. Erekarini ikanapiriini,” itxari.

²⁸ —Ininiã ikara ikenakotakasaaki, inaiataua. Kona inirekari ìroini kiiniriã. Ininiã iri iuamoni sa itxa. Akiritari: “Pîiroã,” itxari. ²⁹ Ininiã iua apakapiretari: “Itori mitãiti niparíkautinapekai. Txama kona nota sipikapiretari pisãkire. Iuaritika kona pisikano potxi ãkiri nimoianariakorikata kiiniri nikamini Ìkapani. ³⁰ Iua pamarite xipokari pitxineirote. Sitokata isrÿka. Txama ikanapiriãkasaaki, pokari kema auíte. Kiiniri pikama iua Ìkapani.” Ikara atoko itxitari iri.

³¹ —Iri apakapireta: “Namarite, ãtipirika pauapika notakata. Ikinika nota nakiti pite nakiti txaua. ³² Erekapitikari kiiniri nikamini apoxokoniuatini Ìkapani, kotxi pitari ipíkari atokopeka itxa. Uatxa auapanika. Pîpinanakakari uatxa apokapeka,” itxari.

16

Nitiritxi Kamisirienereri

¹ Xesosi sãpiretana imoianariakori:

—Kiki ito tütxi aua. Iua nitiri nikatari ikinika ipatrãote nakiti. Apanakini sãpiretari iua kiki, initiri iouanatuniri itxineirote. ² Ikara atoko ininiã, iua akiritari initiri: “Nikenakopiretari

pite misirinetinino nota. Ininiã piminari tiītxi piamotiitini tsopa. Ikara pisikasaakino, niokanatai pisinì. Kona apikomoni piparĩkauataika nota ìkapani,” itxa.

³—Ininiã iniriti ãkixinireē: “Kipa nìkama uatxa, kotxi nìpatrãote paĩtiki iokanatanò. ! Kataparano nota, ininiã ! nìposotari atokatxi patapi nìparĩkauatini. Nìpẽtauata txineiro maxikatũka namanainiri kãkiti. ⁴ Uatxaika nìmarotari nìkamakiti tũkane. Ininiã nìparĩka xìpokasaaki uai, kãkiti apakapanikano nota nìnoa aapokoã,” itxa.

⁵—Ininiã akiritana kãkiti ipatrãote maĩkitxitakani. Ininiã ipimaãri ãti: “Kìpakìnìpa ! pũkitxitapanika nìpatrãotemoni?”

⁶—“Seĩ kopiti ìtxi auakiti kona nũkitxitapanika,” itxari.

—Ininiã iua nìrititxi txari: “Pìkosekari pìmaĩkitxitakiniti tsopa. Pìtakari sũkoẽta kopitìnoka,” itxari.

⁷—Ininiã ãti ipatrãote maĩkitxitakari ipimaã: “Kìpakìnìpa kona pũkitxitapanika nìpatrãote?”

—Iua apakapapiretari: “Seĩ atarokiri kotarina,” itxa.

—Itxari iua: “Pìmaĩkitxitakiniti tsopa pìkoseka. Oitẽta kotarinoka pìtaka,” itxa. Ikara atoko ikama nìnoa ìkapani, ininiã iparĩka itakanapaka atoko, nìnoa apakapari iua nìnoa aapokoã.

⁸—Ininiã iua patrãote ikara imarotakasaaki, itsoĩkaãta: “Ari, nìnitiri paimatireri. Maerekati ikama, iuaritika ikamakasaakiri, paimatireri iua,” itxa.

—Teoso sãkire mauĩãkani imarotapitìkari ixinikìnirina parĩkatxi katana ikamakitina. Atxiĩti Teoso sãkire auĩãkani ! imarotari ixinikìnirina parĩkatxi katana ikamakitina. ⁹ Nisãpiretai hũte, ìkorapokoriti hãuakasaaki, hũxinikari ikara nìtiritxi. Hìsikari hũtũ, hũtxineirote pakini Teoso parĩka ìkapani, Teoso mìmarotakani atão inakari imarotiniina ìkapani. Eereka atxiĩti Teoso mìmarotakani moianatai. Eereka nìnoa apaka imarotari aĩri iaxitìkiri. Eereka ãti õti haõkitana nìnoa iaxiti.

¹⁰—Axapitiki parĩkatxi atão pìkaminiã, ininiã kãkiti auikariko pìposotini parĩkatxi apiatakari pìkamini apaka. Axapitiki pũtìriuata mĩtxi, ininiã eereka kaiãori pũtìriuata. ¹¹ Txineiro uaimonìpokoriti auakari himìmarotakaniãri hìnĩkatini, ininiã kona hìposotari hìnĩkatini erekari Teoso sikakiti. ¹² Apanakini tii pìmanĩkatakaniã, ininiã kona kãkiti sikai tiītxi pinakiti inini ìkapani.

¹³—! Apakata kãkiti parĩkauatini ipi iauĩtena ìkapani, kotxi atxiĩti ãti omanata, ãti itireta. Atxiĩti ãti apokaerekata, ãti inorita. Iua atokokana kãkiti kona posotari iparĩkauatini tiītxi ìkìnipoko iamotini ìkapani, Teoso ìkapani iparĩkauatakasaaki. ! Apakata pìauĩtetini Teoso, txineiro pìauĩtetakasaaki —itxa Xesosi.

Teoso Sãkire Maxìpokakani

(Mateo 11.12-13; 5.31-32; Marko 10.11-12)

¹⁴ Pariseokori ikara ìkenakotakasaakina, inapetarina Xesosi, kotxi nìnoa iteene potxi-taro txineiro. ¹⁵ Ininiã Xesosi sãkirauata nìnoamoni:

—Hũte txa apanakiniomoni: “Ate !ikeroka. Peerekaua ate,” hũtxa hũsãkire. Txama Teoso imarotari hãkixinire. Kãkiti uãkatarì erekari hũkamini, txama Teoso omanatari hũkamakiti.

¹⁶—Kìtxakapirĩka kãkiti auikari Teoso sãkire Moisesimoni sikakori, Teoso sãkire sãpiretakani sãkire pakini. Xoão kapatxisareri apoka. Iuasaaki Teoso iokanapirena erekari auĩtetxi ininiãua sãpiretaãka. Itomaneri iteene nìrekari isini Teoso auĩtetxi ininiãtaãua ìroini.

¹⁷—Teoso sãkire ìxìpoka. !Ixìpoka axapiti. Auapika imakinika isãkire. Itixi, iaxiti pakini xìpokapitìkako, iuaritika Teoso sãkire ìxìpoka.

¹⁸—Teoso sãkire ìõkatakori kìtxakapirĩkari auapanika uatxa. Ininiã ìtanorotxi asìkakari atõ itakini ìkapani inakari, maerekati ikama. Apaka sito takanapakoro takakari maerekatikanera ikama. Ikara Teoso sãkire auapanika. Kona ixìpoka ikara —itxa Xesosi.

Katiiri, Arásaro Pakini

¹⁹ Xesosi sãkirauatapanika. Ia atoko itxa:

—Aua kiki katiiri. Peereri imãka. Põkamarari imãka. Apiaerekata imãka. Ikiniõtika peerekari ikiena. Imakinika iua auakiti peerekari. Iua aapoko ikiniõtika kiinirisaaki auakari atoko itxapika ikiena.

²⁰—Ãti kiki Arásaro inakori. Pamatinaniri. Minakati ! auinari iua. Iua sirĩka katiiri aapoko patapi koa. Amianari aua iuamoni. Ininiã ìto imakinika kakaro. ²¹ Kìnirão nika inakasaaki, ìxiti okakorinoka inika. Iuaã anãpa amerokari ikaro.

²²—Ikara atoko ininiã, eereka ipĩpe. Ininiã eereka Teoso nitiriakori iaxitìkini anikari iua Teoso auinimoni. Kìtxakapirĩka Aprãõ sari iuaã. Iuaã iua Arásaro aõkitari Aprãõ.

—Eereka iua katiiri apaka ipĩpe. Ikataãka. Isari maerekani misiritikoãtaã. ²³ Iuaã maerekani misiritikoãtaã auakasaaki, õtakoxiti atamatari Aprãõ, Arásaro pakini. ²⁴ Ininiã akiritari Aprãõ: “Toti Aprãõ, pìamonĩkano. Pìpaniãtariko Arásaro iãkìniri iuakoki iaã, tapikaka itxa ninamamoni. Ia xamina sikatsiitapitipono,” itxa.

²⁵—Apraão apakapapireta: “Pixinikariko kákitikata pauakasaaki, kaiãori pitii aua pitemoni. Arásaro auakasaaki, kona minakati auari iua. Arásaro auakasaaki, amianarinani, natxinani pakini auari. Uatxa iua poxokoniuanaatakasaaki, pite atatsiitari pimisiritiko. ²⁶Patamata ereë sauna auíte. Kona ate posotari hitemoni asini. Híte apaka kona posota uaimoni hãpokini,” itxa Apraão.

²⁷—Iuaíkana katiiri: “Toti, pikenakotano. Pipaniatariko Arásaro niri aapokomoni isini. ²⁸Iuaã aua siko nitariakori maneripanika inakanuia. Isãpiretanako: ‘Kona erekari uai. Erekari ia misirikaretxi auiniãta imíkanina. Ininiã uatxa ikamarinako Teoso sãkire paniãtakiti,’ itxa katiiri.

²⁹—Ininiã Apraão: “Ninoamoni auape Teoso sãkire, Moisesini sãpiretakiti, apanakini Teoso sãkire sãpiretakani sãpiretakiti apaka. Ininiã pitariakori posotari ikenakotinirina ninoa sãkire,” itxa Apraão.

³⁰—Ininiã katiiri txari: “Toti Apraão, ikara atokonani ! apakata. Ipikari kanapiriiniã ninoamoni, iuasaakiikarako itakanaparina imaerekanina.”

³¹—Ininiã Apraão: “Pitariakori ! auikari Moisesini sãkire, apanakini Teoso sãkire sãpiretakani sãkire pakini. Ipikari kanapiriiniã ninoamoni, iuaritika ninoa ! auikari Teoso sãkire. Ikara atoko ininiã, kona nipaniãtari Arásaro isini ninoamoni,” itxa Apraão.

Ikara atoko itxa Xesosi sãpiretakiti.

17

Maerekati Oerekakari

(Mateo 18.6-7, 21-35; Marko 9.42)

¹Xesosi txari imoianariakorimoni:

—Aua maerekati oerekakani. Ninoa kãkiti kamari maerekati. Ikara atoko inakani apokapitikako. Ninoa xika kãkiti kamari maerekati. Maerekati oerekakari misiritãkapitikako. ²Teoso omanatari kãkiti maerekati oerekakani. Kãkiti txãkitakiniãri amarini nota sãkire auãkari maerekati ikamini ! apakata. Erekamariko iua kãkiti maerekati oerekakari kai mitariã iaxirikanokitaãkamako, ipoa apanãkakiã okaãkamako ipinini ikapani. ³Erepaniko. !Pikamapiriko maerekati. Pitari Xesosi sãkire auãkari kaminiãri maerekati pitemoni, põtãkikariko, imaerekanani itakanapini ikapani. Itakanapiniãri, !pixinikapinikari ikara maerekati ikamakiti. ⁴Atxiiti ãti òti iua kamari maerekati pitemoni. Eereka iua pitemoni apoka. “!Erekari nikamakiti pitemoni. Pimaxinãkaretariko maerekati nikamakiti. !Nikamaikari,” itxa. Ininiã ikora òti iuaíkana maerekati ikama pitemoni. Iuaíkana amanaãi imaerekanani pimaxinãkaretini tãkane. Atxiiti ikora òti setxikata ikara atoko ikama pitemoni, ininiã pimaxinãkaretariko ikinika maerekati ikamakiti—itxa Xesosi.

Xesosi Sãkire Auikiko

⁵Xesosi iokanatakani txari Xesosi:

—Pitxãkitakaua ate apikomoni aãuikiniri Teoso sãkire—itxana.

⁶Ininiã Xesosi txana:

—Mostata iki axapitiki. Mostata iki atokokana nisãkire poião hãuikiniã, iuaritika hãposotapitikari hãpaniãtiniri ia uasini aamina: “Pikotsakatika pimaporokauako. Ipoamoni pitakauako.” Ininiã ikamapitikariko pisãkire iaõka—itxa Xesosi.

Nitiritxi Paríka Pirena

⁷Xesosi txari:

—Pinitiri tokoriã paríkauatakari, pipiraakori iníkatarkari, apokasaaki paapoko, kona pitxa: “Pinipokota, pitomata.” Kona ikaraatoko pitxa. ⁸Pitxari: “Auapanika paríkatxi. Nipokori pikaminano. Xipoka atoko pisikakienatano. Piãtapari nota nipokotini, ininiã eereka pite nipokota.” Ikara atoko pitxa pinitiriakorimoni. ⁹Pipaniãtakitinanira ikama, ininiã kona pitxa: “Erekapitikari piparíka,” kotxi pipaniãtakitinani ikama.

¹⁰—Ininiã iua atokokanera itxa ikinipoko Teoso paniãtakiti pikamakasaaki. Kona apakata: “Erekapitikano nota,” pinini. Ia atoko atão pinini: “Nitiritxinani nitxaua. Poiãori nitxaua, kotxi niauíte paniãtakitinani nikama.”

Xesosi Makananitinina Paiaka Matatakani

¹¹Xerosareëmoni Xesosi sikasaaki, inapari Samaria tãpa. Ipinimoni auari Kariréia tãpa. ¹²Ãti aapokotxi apokaãpotakasaaki, aõkitana tesi kikiakori amianatakani paiaka matatakani.

¹³Ikira atoko akiritarina:

—Xesosi, koerekareri, piamonãkaua ate—itxana.

¹⁴Xesosi atamatakasaakina, ipaniãtana ninoa Moisesini paniãtakiti iaõka ikaminina, sasetotximoni isinina, iitona oerekinina ikapani.

—Sasetotximoni hãsako. Hõerekariko hãito iuamoni—itxa Xesosi.

Iuamoni isaāpotakasaakina, ikinipoko ninoa erekapeka itxana. ¹⁵ Ninoa amianatakani erekapeka, txamari ātinani kanapiriā Xesosimoni. Itapararitika akirita:

—Peerekari Teoso —itxa iua paiaka matatakari.

¹⁶ Ininiā ikapotoreēkaua Xesosi apisatoō.

—Notamoni pikamakiti peerekari —itxa.

Samaria tōpakiri iua kiki. ¹⁷ Ininiā Xesosi txari:

—Nota makananitana tesi kikiakori. Itapari apanakini? Auapanika novi kikiakori nimakananitakini. ¹⁸ Ia kiki Samariakiri. Ianokara kanapiriā, “Peerekari Teoso,” inini ikapani. Ninoa Xoteo iua atoko !itxana —itxa Xesosi sākire.

¹⁹ Ininiā itxari iua Samariakiri:

—Pōkitikauako. Pisako. Pite auikari nisākire, ininiākara erekapekai —itxa Xesosi.

Kanatokopa Itxa Teoso Auītetxi Ininiātaāua?

(Mateo 24.23-28, 35-44)

²⁰ Āti ōti pariseokori pimaāri Xesosi:

—Kirisaaakipa Teoso ikinimane auīte inini ōti apokataka? —itxana.

Ininiā Xesosi apakapapiretana:

—Teoso auītetxi inakasaakia, kākiti ! atamataru iua apokini. Teoso kākiti auīte inakasaaki, iua kākiti ākixinireē apoka. ²¹ Iuasaaki kākiti !akiritari: “Uaikaarari Teoso auītetxi ininiātaāua. Ikiraārari Teoso auītetxi ininiātaāua.” Ikara atoko !itxana, kotxi hīxinire ākirari Teoso auītetxi ininiātaāua —itxa Xesosi.

²² Ininiā itxa imoianariakorimoni:

—Apokako āti ōti nota hītari iaxitikiri iteene kinirāo hātamatini. Txamari ! hātamatano.

²³ Apanakini sāpiretaiko hīte: “Ikiraārari iua.” Āti sāpiretari: “Uaikaarari iua.” Iuasaaki kona himaakatapiri ikara atoko inakari sākiretxiti. !Hāuikapiri ikara atoko inakari. ²⁴ Hītari iaxitikiri kanapiriākasaaki, mēkokari ātiātaā potorikini, ātiātaā apokini, iua atokokana nikanapiriini. Katimariitika napokako. Mēkokari atoko nitxako napokini. Iuasaakiika ikinimane kākiti atamatanano. ²⁵ Nikanapiriini apisapanika, nota hītari iaxitikiri iteene ninikoriariko nimisiritiko, kotxi kākiti uatxa auakani kona nirekano. ²⁶ —Nota hītari iaxitikiri kanapiriākasaaki, Noe auakasaaki atokokana itxapaniko. ²⁷ Noe auakasaaki, ikinimane nipokota. Iāta. Itanorouata. Ikara atoko itxapikana. Āti ōti Noe, inirimanekata maporo āki iiroāna. Eereka imaiātapakinitipanika āparaā kipakata. Xāpōākata. Ininiā xirataāxti xipopena ikinimane. Ikara atokotxikana itxako nota kanapiriākasaaki.

²⁸ —Aroo inakori auakasaaki atokokana itxako nota kanapiriākasaaki. Iuasaaki ikini-mane nipokota. Iātana. Iamotiitana. Isikatiitana. Itakarauatana. Aapokona ikamana.

²⁹ Sotoma sitatxiti Aroo potorikini ōti, iuasaakipeka xamina āparaā kipini atoko itxa ikatxakini. Xamina miniki katxaka. Ininiā ikinipoko iuaātaā ariākata.

³⁰ —Iuasaaki kākiti !imarotari xamina katxakini ōti. Iua atokokana kākiti !imarotari nota hītari iaxitikiri apokini ōti. ³¹ Napokini ōti haāpoko mapara hāuiniā, kona hīkanapiripe haāpokomoni hīti hāpini ikapani. Tokoriā hāuiniā, kona !hikanapiripe haāpokomoni. !Apakata hīkanapiriini iuaā. ³² Hīxinikaroko Aroo Itanoro. Kona oa atoko hīttxape, kotxi oa ipina, kotxi ! onirekari otakanapiniri sitatxi maerekani auiniātaā.

³³ —Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata.

³⁴ —Nikanapiriākasaaki, ia atoko itxako. Nikanapiriini ikanōkati atxiīti ipi kākiti imakanāta imakiniātaāna. Iuasaaki Teoso sākire auīākari sari notakata. Teoso sākire mauīākati kaikota.

³⁵ —Iuasaakiko atxiīti ipi sito kamanāteri atarokiri. Teoso sākire auīākaro sari notakata. Teoso sākire mauīākato kaikota.

³⁶ —Iuasaakiko atxiīti ipi kiki kiki parīkauata. Āti sa notakata, āti kaikota —itxa Xesosi.

³⁷ Ininiā imoianariakori pimaāri:

—Namoniparako? —itxana.

Ininiā iua apakapapiretana:

—Aātamatakasaakiri maiori apotiitiniātaāua, ikinimane imarotari ipīkari iuaātaā auini. Iua atokokana ikinimane atamatariko kākiti apotiitiniua notakata nikanapiriākasaaki —itxa Xesosi.

18

Sito, Kākiti Misiritiko Mereēkari Pakini

¹ Xesosi misākiretari imoianariakori āti sāpirenatxi atāo inakari oerekiko, Teoso misākiretiko pirena. Ikara inakari oerekari kākiti ātipirika imisākiretiniri Teoso, Teoso misākiretiko imatapanakani ikapani. ² Xesosi sāpiretari ia sākiretxiti:

—Sitatxi auari kákiti misiritiko mereékari. Iua kona paxitari Teoso. Kona ipaxitari kákiti apaka. ³ Iuaã sito apaka aua. Ótaniri ipípe. Tikinitakoro otxaua. Oa nirekari iua atão ikamini oa misiritakarimoni. Txamari iua kákiti misiritiko mereékari !ipotxítari omokaiakari pirena ikenakotini. Osápiretapikari iuamoni: “Pikenakotariko nisákire. Pikamariko atão nota misiritakarimoni. !Nimíteeneakaikari nota misiritakari apikomoni misiritinino,” otxa.

⁴—Isápakapekari átipirika osákire ikenakotini. Ininiã eereka ixinikari: “Atáopitikara, kona nota paxitari Teoso, kákiti pakini. Iuaritika nikamariko onirekakiti, kotxi ⁵ átipirika oa tikinitakoro amanaánátano, ininiã nikamaákaretxitaro. Ininiã nikamariko onirekakiti, kotxi nisápakapekaro osákire. Átipirika ikara atoko otxanátapikano. !Nimíteeneakaikari,” itxa kákiti misiritiko mereékari.

⁶ Ininiã Xesosi txana imoianariakori:

—Ikara kákiti misiritiko mereékari kona erekari, iuaritika ikamari osákire iaõka. ⁷ Teoso apiaerekata. Ininiã ikenakotapitikari imereékini sákire pokamara, íkanõka. Ninoa amanaári Teoso imoianatinina. Ininiã apiata Teoso kenakotari isákirena. Patimari Teoso kenakotiniri imereékini amanaákiti. ⁸ Nisápiretai, patimari Teoso misiritinina ninoa misiritakani. Ia nipimaái. Nota hitari iaxitikiri iuaíkana nikanapiriákasaaki, atxiiti napokari nisákire auíákani íkorapokoriti? —itxa Xesosi.

Pariseo, Txineiro Apotítakari Pakini

⁹ Iuikakaníua !apokaerekatari apanakini. Ninoamoni, ninoanokara kamari atão. Áti óti Xesosi sápiretari ia sápirenatxi atão inakari oerekiko, kákiti ikara atoko inakanimoni atão imarotinina íkapani:

¹⁰—Ípi kiki sari Teoso misákiretiko aikotimoni. Áti kiki pariseo itxaua. Áti kiki auítetxiakori txineirota apakapakari itxaua. Iteene iua misiritari kákiti, kotxi kákitimoni imaktxakaro apikomoni txineiro. Kona atão imaktxaka. Imisiritari kákiti. ¹¹ Iuaã pariseo tíma Teoso imisákiretini íkapani. Txama iuaka imisákiretaua. Ia atoko itxa isákire: “Teoso, nota poxokopitikano, kotxi nota apanakini atoko kona nitxa. Kíitiriri !nitxaua. Kákiti misiritakari kona nitxaua. Kona nota siríka áti ítanorokata. Kona nota ia txineiro apakapakari atoko na nitxa. Konapitini. ¹² Ikini semanati, ipi óti nitakanapari ninikini pite nímisákiretini íkapani. Txineiro nisikai. Tesi txineirota auiniãno, átoka nisikai, ininiã pipaniátakiti iaõka nikama,” itxa iua pariseo.

¹³—Iuasaaki txineiro apakapakari ikira atoko itima. Kona ionakaáta iaxiti. Iaritari itorota imaerekani oerekini íkapani, kotxi maerekati ikamapeka. Itxari Teosomoni: “Teoso, piamoníkano. Kona erekano nota, kotxi maerekati kamakarino nota,” itxa txineiro apakapakari.

¹⁴ Ininiã Xesosi txari:

—Atáopitikara nisákire. Ikara inakari kiki Teoso kamaerekata. Isikasaaki iua aapokomoni, erekari itxapekaua. Iua pariseopekana, Teoso likamaerekatari iua.

—Iuikakaríua, poiãori itxauako. Poiãoripekana, apiatakari itxauako —itxa Xesosi.

Amarini Apokini Xesosimoni

(Mateo 19.13-15; Marko 10.13-16)

¹⁵ Áti óti kákiti minari amarini Xesosimoni erekari ninoamoni itakini íkapani. Txamari Xesosi moianariakori atapakasaakiri kákiti imiakori míkani, isipikapana.

—Híkanapiripeka. Hísipeka —itxana.

¹⁶ Txamari Xesosi txari imoianariakori:

—Háuiritanako amarini notamoni apokini. !Hísipikapapena amarini, kotxi nitretapitikana ninoa. Nisákire auíákani auamari nisákire amarini auíkini atoko. Kákiti nisákire amarini auíkini atoko inakaninokara apoka Teoso auítetxi ininiátaãua. ¹⁷ Amarini auikari iri sákire. Ininiã híxinikariko ia: Amarini atoko himinakaniã, Teoso sákire iteene himauikakaniã, ininiã Teoso auítetxi ininiátaãua !híroã —itxa Xesosi.

Kiki Katiiri Pirena

(Mateo 19.16-30; Marko 10.17-31)

¹⁸ Xoteo auíte pimaári Xesosi:

—Koerekareri erekari, kiripa nikama Teosokata átipirika nauini íkapani? —itxa.

¹⁹ Xesosi txari iua:

—Kininiãpa “erekari,” pitxano? Kákiti erekari ! auari. Teosonanira erekari. ²⁰ Pite imarotapitikari Teoso paniátakiti: “!Pisíríkape áti ítanorokata. !Pokaniuatape. !Píitiriuatape. Apanakini !pimisirienetape. Piri, pinoro pakini pipaxitako.” Ikara atoko pimarotapeka —itxa Xesosi sákire.

²¹ Ininiã iua kiki apakapapiretari:

–Nota axapitipanika ninakasaaki, nikīpitari ikara atoko inakari sākiretxiti Teoso paniātakiti –itxa.

²² Xesosi kenakotakasaakiri iua kiki sākire, itxari:

–Auapanika ātinoka pikamini tīkane. Ikinika pitii pivētxitako, eereka oa txineiro pisikanako minakati mauakinimoni. Eereka pisa notakata. Ikara atoko inakari pikaminiā, Teoso txine papokasaaki ikinipoko erekari auiniiko pite –itxa Xesosi sākire.

²³ Iua kiki ikara ikenakotakasaaki, imatinaniuata, kotxi iua iteene katiiri itxaua. ²⁴ Xesosi atamatakasaakiri iua matinaniuatini, itxari:

–Pamimari katxineiroteri auītetiniri Teoso. ²⁵ Atauako kamero napatari ākorike sonakiā? Apia mimari kākiti katxineiroteri auītetiniri Teoso –itxa Xesosi.

²⁶ Ikara inakari kenakotakani txari:

–Pamimari pisākire. Ininiā kiripa apoka Teoso auiniātaā? –itxana.

²⁷ Ininiā Xesosi txana:

–Kākiti maposotakiniti Teoso posota ikamini –itxa Xesosi.

²⁸ Ininiā Petro txari:

–Ate takanapapekari ikinipoko pitekata asini īkapani –itxa.

²⁹ Ininiā Xesosi txari:

–Atāopitikara, ininiā ia atoko nitxai hīte. Pauini pitakanapiniā, pītanoro, pitariakori, piri, pinoro, pamariteakori pakini pitakanapiniā, Teoso auītetxi ininiāua pirena pisāpiretini īkapani, ³⁰ ininiā īkoraasaaki apiata erekari papakapa. Ininiā āti ōti pipīkasaaki iaxiti papokasaaki, pauapininiika pitxako –itxa Xesosi.

Iuaīkana Xesosi Sāpiretari Ipini

(Mateo 20.17-19; Marko 10.32-34)

³¹ Āti ōti Xesosi anikari imoianariakori ikira atoko, misākireta itxana:

–Uatxa Xerosareēmoni asa. Kitxakapirīka Teoso sākire sāpiretakani sāpiretapekari nota hītari iaxitikiri pirena. Ninoa sākire iōkatsopatakitina paītiki apokapitkako, ³² kotxi nisikaākako Xoteo minakonimoni. Ninapetaākako. Nimsākirepiretaākako. Nikiūsokaākako. ³³ Niaritaākako. Eereka nokaākako. Ipi, āti pakini ōtisaaki iuaīkana nōkitikaua –itxa Xesosi.

³⁴ Xesosi moianariakori !imarotari isākire. Ikara sākiretxi kipatakori atoko itxa. Ininiā kona ninoa imarotari isākire.

Mōsiāreti Xesosi Makananiti

(Mateo 20.29-34; Marko 10.46-52)

³⁵ Xesosi apokaāpota Xerikoo sitatxiti takote. Mōsiāreti kimapori tiniāpo iitopākanāta. Amanaānātarō txineiro. ³⁶ Ikenakotari kākiti kimaporiā napakani, ininiā:

–Kiripa ikara? –itxa.

³⁷ –Xesosi Nasaree sitatxitikiri, iuara napaāpota –itxana apanakini.

³⁸ Ininiā iua mōsiāreti akirikata:

–Xesosi, Taviini apika mekanirii, piamonīkanoko –itxa.

³⁹ Ninoa īkiikakani txitari iua:

–!Pakiripoatape –itxana.

Txama iteene iua akirikata iuaīkana:

–Taviini apika mekaniri, piamonīkano –itxari.

⁴⁰ Ininiā Xesosi iotoka. Amanaāna kākiti:

–Ere kiki himina notamoni –itxa Xesosi.

⁴¹ Xesosi takote apokasaaki, Xesosi pimaāri:

–Kīpa pinireka nikaminii pitemoni?

–Kōsiārepeka ninini ninireka –itxari.

⁴² Ininiā Xesosi txari:

–Kōsiārepekai uatxa, kotxi pauikari nisākire –itxa.

⁴³ Iuasaakipeka iua kiki kōsiārepeka itxa. Ininiā iua saāpota Xesosi tikini. Teoso ereka inini pirena isāpireāpota. Ikinimane kākiti itikasaakiri Xesosi kamakiti iuamoni.

–Peerekari Teoso –itxana.

19

Sakeo Pirena

¹ Xesosi Xerosareēmoni isikasaaki, Xerikoo sitatxiti apanīkaki inapaāpota. ² Iuaā iua kiki, Sakeo inakori. Iua katiiri. Iua kākiti txineirote apotiitakari auītetxiakori īkapani. Apanakini txineiro apotiitakani auīte itxaua. Iua misirienetari kākiti. Imakatzakari txineiro auītetxiakori īkapani. Txamari apikomoni imakatzaka. Kona atāo ikamakiti. ! Erekari iua.

³ Xesosi apokasaaki Xerikoo, iua Sakeo nirekari Xesosi atamatini. !Apakata atamatiniiri, kotxi pañtiri iua. Itomaneri kãkiti Xesosi İtinikata auanãta. İniniã !apakata môtãnoti atamatiniiri iua. ⁴ İniniã imiteka Xesosi apisa, aaminaã kanıka itxa. Xesosi iuaã napakasaaki, iposotari itikiniri. ⁵ Xesosi apoka iua aamina patapi. İonakaãta itxa. İtxari:

—Sakeo pikatxaka, katima pitxa. Uatxa, paapokomoni nisako, nianapokotini İkapani — itxa Xesosi.

⁶ İniniã katxaka katimapeka itxa. İpoxokoniritika iua apakapari Xesosi. ⁷ İkinimane iuaã auakani misãkirepiretari Xesosi. İtxana:

—Xesosi sari maerekati kamakari aapokomoni. Kininiãpa iua sa iua aapokomoni? — itxana.

⁸ İniniã iua aapoko apoãka atoko, Sakeo tima isãkirauatini İkapani. İniniã itxari Xesosi: —İpixini ninakiti nisika matiinimoni. Nıñtirikakiti iuaİkana nisikanako kãkiti. Txineiro nıñtirikiniã, ininiã iuaİkana ipi ipi pakinikata nisikariko nimisiritakinimoni —itxa Sakeo.

⁹ İniniã Xesosi: —İa kiki Apraõo apika mekaniri apaka. Uatxa imaerekani makatxakaãka, kotxi itakanapari maerekati ikamakiti. ¹⁰ Kãkiti itari iaxitikiri apoka İkorapokoriti kãkiti pİpinanaãkani initini, imaerekani imakatxakini İkapani —itxa Xesosi.

Nitiritxi Erekarı, Nitiritxi Maerekati Pakini

(Mateo 25.14-30)

¹¹ Eereka Xesosi sãpiretari ia sãpirenatxi atão inakari oerekiko. Oerekari ia sãpirenatxi, kotxi Xerosareẽ ninoo apokaãpota. Kãkiti uãkatari pañtiki Teoso İkinimane auñte ininiua. ¹² İa atoko itxa:

—Kiki aiamatapeka õtakoxiti isini, auñtetxi ininiua İkapani. İua nirekari isini, ininiã eereka inirekari İkanapiriini. ¹³ İniniã isini apisapanika akiritari tesi initiriakori. İsikanapana txineiro tesi ota oro kamakoro. Åtoka isikaãpotana initiriakori. İtxa: “Nota ãtiãtaã nauakasaaki, hiamotari tıtxi. Eereka pivẽtxitari apikomoni txineiro hãpakapini İkapani. İkara atoko hıtxako,” itxa.

¹⁴ —İsipeka atoko kãkiti iuaã auakani İnirekari iua auñtetxi ininiua, kotxi omanatarina. İniniã ninoo İokanapireta iuamoni: “Ate İnirekai pite aãuñte pininiua,” itxana ninoo.

¹⁵ —İuasaaki iua ãtiãtaã auñtetxipeka itxaua. İkanapiriãkasaaki akiritana initiriakori, txineiro isikanapakini. İniniã iua txana ninoo: “Hõerekano txineiro apikomoni hãpakapakito,” itxa. ¹⁶ Åti initiri apoka iuamoni. “Nipatrãote, pite sikanapano åtoka ota. Uatxa tesipeka ota aua notamoni,” itxa.

¹⁷ —İuasaaki auñtetxi txari iua: “Pite kamakiti peerekari. Pite ninitiri erekari. Åtonoka ota nisikapekai, iuaritika piparİka peerekari. Uatxa tesi pakini sitatxiti auakani auñte pitxauako,” itxa.

¹⁸ —Åtıpekana apoka auñtetximoni: “Åti ota pisikanapano nota. Uatxa sİkopeka ota aua notamoni,” itxa initiri.

¹⁹ —İniniã auñtetxi txari: “Erekapitikari. İniniã sİko pakini sitatxiti auakani auñte pitxauako,” itxari.

²⁰ —Åtıpekana apoka auñtetximoni: “Oniã pinakito txineiro. Mãkatxi mataã niapirikaro, poteta nitxaro pitxineirote. ²¹ Nota pİkai pite. Pataparaxinirei. Nimarotari pite amotari ãti kamakiti. Piamotari pikiena ãti kãkiti kiena,” itxa.

²² —İniniã iua auñtetxi apakapapiretari: “Pite ninitiri maerekati pitxaua. Pite txano nota kiki kataparaxinireri nitxaua. Pimarotari niamotiniri ãti kamakiti. Pimarotari niamotiniri ãti kãkiti kiena. ²³ İkara atoko ininiã, pimanirekakaniãri piparİkauatini, kinirepa kona pisikataro nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa auñtetxi.

²⁴ —İniniã iua paniãtana iuaã auakani: “Himakatxakaroko nitxineirote iuamoni nisikakito. Hisikaro tesi ota auakitimoni,” itxa.

²⁵ —“Auapeka tesi ota iuamoni,” itxarina.

²⁶ —İniniã auñtetxi apakapapiretana: “Piparİkauatiniã, ininiã pinakiti itori aua, ininiã apikomoni papakapa. Pite İarinouatiniã, ininiã İkara xika pinakito poião. Åti õti piarini xika İkara poiãori makatxakaãkako apaka. ²⁷ Uatxa himinana notamoni nimokaikarikakori, kotxi ninoo !inirekano nota iauñtena nininiua. Hõkana ninoo nota apisatoõ,” itxa auñtetxi.

Xesosi Xerosareẽ Apokaãpotini

(Mateo 21.1-11; Marko 11.1-11; Xoão 12.12-19)

²⁸ İkara inaãka atoko, Xesosi sari imoianariakori apisa Xerosareẽmoni. ²⁹ Xerosareẽmoni isikasaakina, apokaãpotana Petxipaxee, Petãnia pakini aapokotxiti. Ninoo ipi aapokotxi

Oriva inakori xirata takote. Iuaã auakasaaki, Xesosi iokanatanana ipi imoianariakori aapokotximoni.

³⁰ –Ikira aapokotximoni h̄sa. Iuaã h̄pokariko xomēta ākiri, iaxiriākori. Iua xomēta ākiri kākiti maitopākakotipanika inakori. H̄koxiripatariko iua. Himinari notamoni. ³¹ Ipitikiri akiritiniāi: “Kinirepa h̄te koxiripatariko n̄pira?” inakasaakii, ia atoko h̄txariko: “Api-ananiri n̄rekaru iua,” h̄txako –itxana.

³² Iuaã apokasaakina, ikinika Xesosi s̄kire iaōka auapeka. ³³ Ninoa koxiripatakasaakiri xomēta ākiri, ipitikiri apoka.

–Kinirepa n̄pira h̄koxirika? –itxa.

³⁴ Ininiã ninoa:

–Apiananiri n̄rekaru iua –itxana.

³⁵ Ininiã anikarina xomēta ākiri Xesosimoni. Imoianariakori takari imākana xomēta nopini. Imoianatarina Xesosi xomēta nopini iitopākini ĩkapani.

³⁶ Xesosi saãpotakasaaki Xerosareẽmoni, apanakini kākiti matameẽkaru imākana kima-poriãpo Xesosi napini ĩkapani. ³⁷ Ōtanoxirataru Oriva inakori iokiriũtakasaaki, ninoa imakinika ipoxokoniritikana akiripoakatana, kotxi itikapekari itori Teoso posotiire.

³⁸ –Peerekari auĩtetxi, Apiananiri iokanatakiti kākitimoni. Teoso takari erekari iuamoni. Ininiã Teoso !omanataikari kākiti. Peerekari Teoso, iaxiti apiko nopinixiti auakari. Apiananiri itxaua –itxanãtana ninoa iuasaaki.

³⁹ Iuaã kākiti itomaneri sauaki aua pariseoakori apaka. Ninoa txari Xesosi:

–Koerekareri, piotokakana pimoianariakori ikara is̄kirena.

⁴⁰ Ininiã Xesosi:

–Atão ninoa akiritakiti. Ininiã !n̄pinitana iotokakiniri. Nimauiritakaniãna is̄kirena nota Apiananiri nininiãua, ininiã Teoso tx̄ikitakari kai soro s̄kiriuatini ikara s̄kire is̄ãpiretini –itxa Xesosi.

Xesosi Tx̄iapata Xerosareẽkini It̄iretini

⁴¹ Ninoa apokaãpotakasaaki Xerosareẽ, Xesosi Xerosareẽ atamatakasaaki, iua tx̄iapata, kotxi iuaã aua mirikiniti kākiti is̄kire maukakani. ⁴² Ixinikasaakina Xerosareẽ auakani itxa:

–!Himarotari h̄kamakiti t̄kane h̄uini ereka inini ĩkapani, neenamatz̄i mauakani ĩkapani. Ninirekaru himarotini, txamari uatxa ikara himarotini kipataãka himimarotakaniri ĩkapani. ⁴³ Āti ōti himokaiakarini ākitai h̄te. Ininiã kona kākiti pok̄ika sitatz̄i, kona ĩroã. Iuasaaki himitekini !auari. H̄akitapeẽkaikako. ⁴⁴ Himokaiakarini xipokariko ia sitatz̄i. Ikinimaneko okaãkako. Kai āti kai nopini auakari !ikaikotaika. Imakinika xipope. Iua atoko inakari auako, kotxi h̄te !apakapari Teoso h̄temoni apokasaaki.

Pir̄ãtxi Vẽtxitakani Omitikiko

(Mateo 21.12-17; Marko 11.15-19; Xoão 2.13-22)

⁴⁵ Xesosi apokasaaki Xerosareẽ, isari Teoso mis̄ãkiretiko aikotiã. Iuaã auari kākiti tiitxi vẽtxitakani, ininiã Xesosi omitikana. ⁴⁶ Xesosi txana ninoa:

–Teoso s̄kire iõkatsopataru txari:

Ia naapoko, “Teoso mis̄ãkiretiko aikoti” akiritaãkako,

itxa. Txamari h̄te tx̄ikitakari ia aiko k̄itiririni iomaãtiniãtaã ininiua –itxa Xesosi.

⁴⁷ Teoso mis̄ãkiretiko aikoti āki ikiniõtika oerekaruata. Iuasaaki sasetotxi auĩteakori, kaiõkatsopareriakori, kākiti auĩteakori pakini kinirão okaka txari Xesosi. ⁴⁸ Txamari itomaneri kākiti potxitari Xesosi oerekakit̄i s̄kiretixiti. Ininiã ninoa kaikotapika Xesosikata ikinika is̄kire ĩmarotiniãna ĩkapani. Ikara xika !iposotarina okiniri iua iuasaaki.

20

Xesosi Paniãtakari Moerekakoni

(Mateo 21.23-27; Marko 11.27-33)

¹ Xesosi Teoso iokanapirena erekari is̄ãpiretakasaaki Teoso mis̄ãkiretiko aikoti āki, iuasaaki sasetotxi auĩteakori, kaiõkatsopareriakori, kākiti auĩteakori pakini apoka. ² Ninoa pimaãri Xesosi:

–Pite omitikana tiitxi sikakani Teoso mis̄ãkiretiko aikotiã auakani. Kipaniãpa pikamari ĩkora pikamakiti? Kipa paniãtai? –itxana.

³ Ininiã Xesosi txana:

–Nota apaka pimarauatako h̄temoni. Ātinoka n̄pimaãiko h̄te. Ininiã h̄pakapapiretano.

⁴ “Kipa paniãtari Xoãoni ipatxisarauatini? Teosokani paniãtari Xoão? Kãkitikani paniãtari Xoão?” –itxa Xesosi.

⁵ Eereka ninoakakarini is̄ãkirauatana:

—Kanatokopa atxa? “Teosora,” aniniã, ininiã ipaniãtamaua eereka: “Kinirepa kona hãuikatari Xoão sãkire?” itxamaua ate. ⁶ “Kãkitira paniãtari Xoão,” aniniã, ininiã kãkiti kiporonakauako ate kai soroã, kotxi ninoamoni Xoão Teoso sãkire sãpiretakari itxaua. Ininiã kanatokopa atxa? —itxakakauana.

⁷ Ininiã eereka ninoa apakapapiretari Xesosi:

—Kona ate imarotari —itxana.

⁸ Eereka Xesosi txana:

—Ininiã nota apaka kona nisãpiretai nipaniãtakiri uãka —itxa Xesosi.

Parĩkauatakani Maerekani

(Mateo 21.33-46; Marko 12.1-12)

⁹ Eereka Xesosi sãpiretari kãkiti ia sãpirenatxi atão inakari oerekiko. Ia atoko itxa:

—Aua kiki. Itakari amãtiiri ova inakoro. Ovanoka itaka ikikioteẽ. Eereka iĩkitxitana kãkiti itakare nĩkatakani. Eereka isari ãti tixini. Iuaã mapakanani ikaikota. ¹⁰ Oamiko manapi iokanatarari inĩtiri apakapiniri ipixini amãtiiri. Txamari amãtiiri nĩkatakani noropatari iua nitiri. Ininiã eereka iokanatarina iua. Kona axapiti amãtiiri anika ipatrãotemoni. ¹¹ Ininiã iuaĩkana ãti inĩtiri iokanata. Iuaĩkana ninoa noropatari iua inĩtiri. Imisiritarina. Eereka iokanatarari iua. Kona axapiti amãtiiri anika ipatrãotemoni. ¹² Iuaĩkana ãti inĩtiri iokanata ikikiotemoni. Iuaĩkana ikarotarina, iokanata itxarina. Kona anikari axapiti amãtiiri iuamoni. ¹³ Iua katakareri txari: “Kipa nikamaã? Ari, uatxa nimarotapekari. Namarite nitiretakiti niokanatako ninoamoni. Ninoa paxitapitikariko iua,” itxama.

¹⁴ —Amãtiiri nĩkatakani atapari amãtiiri takakari ãkiri apokaãpotini. Ininiã itxana: “Katakareri ãkiri ina. Katakareri ipikasaaki, iua ãkiri apakapari ikinika. Ininiã maõkari iua. Ininiã ikinika itakare aua atemoni,” itxana.

¹⁵ —Ininiã ninoa kosekaõtota katakareri ãkiri, mapara okaĩtota itxarina. Ininiã okapirina.

Ininiã Xesosi pimaãri kãkiti iuaã auakani:

—Kiripa iua katakareri kamaã? ¹⁶ Iua okanako ikinipoko ninoa. Itakare apanakinimoni sika itxako —itxa Xesosi.

Kãkiti kenakotakasaakiri ikara pirena itxana:

—Ikara atoko inakari !anireka —itxana ninoa.

¹⁷ Ininiã Xesosi iteene atamatana.

—Ininiãkara natokopa itxa Teoso sãkire iõkatsopatakori oerekiniua?

Aapokotxi kamakani kona nirekari ãtika kai soro. Iua kai imanirekakiniti kai apiari itxapekua. Apanakini kai soro maĩkakarari itxaua.

Itxa Teoso sãkire iõkatsopatakori. ¹⁸ Kãkiti mãkititiniã ãkora kai xika, ikarotaãka. ãkora kai irikiniã kãkiti nopini, pomoĩpeka itxana. Ininiã eereka aãpani itxaua —itxa Xesosi.

Homano Auĩte Ìkitxitiko

(Mateo 22.15-22; Marko 12.13-17)

¹⁹ Iuasaaki Xesosi sãkirauatakasaaki, sasetotxi auĩteakori, kaiõkatsopareriakori pakini, nirekari maĩkiniri Xesosi, okinirina ãkapani, kotxi ninoamoni ikara Xesosi sãpiretakiti oerekari kãkiti ninoa nirekiniri okiniri Xesosi. Txamari ! imaĩkarina, kotxi ipĩkarina apanakini kãkiti. ²⁰ Ikinĩõtika ninoa itikapikarina Xesosi sinimoni imarotinina ãkapani. Ininiã ninoa iĩkitxitari kamĩkapirirerini Xesosi imisãkiretinina ãkapani. Ninoa nirekari Xesosi kerokiniri isãkire. Ikerokiniãri, iposotarina anikiniri auĩtetxiakorimoni okinirina ãkapani. ²¹ Ininiã ninoa kamĩkapirirerini apoka Xesosimoni.

—Koerekareri, ate imarotari atãopitikara pisãkire. Pite oerekari ikinipoko kãkiti atão Teoso nireẽkiti kamiko. Poerekakiti sãkiretxiti kãkiti apiarinimoni, iuatxikana poerekari kãkiti poiãorini. ²² Atãokani txineiro asikini Homanoakori auĩtemoni, Sesa inakorimoni? Apakata amasikakaniro iuamoni? —itxana ninoa.

²³ Xesosi imarotari ninoa nirekari ikerokiniri isãkire, ininiã iua txana:

—Kinirepa hãtamakaerekatano nota? ²⁴ Poerekano txineiro ota. Kisanõkapa ia? Kiuãkapa aua uai? —itxa.

Ininiã ninoa:

—Sesa sanõka, iuãka apaka aua —itxana.

²⁵ Ininiã Xesosi:

—Hĩsakariko Sesamoni iua nakiti. Hĩsakariko Teosomoni iua nakiti —itxa Xesosi.

²⁶ Ninoa nirekari Xesosi kerokiniri isãkire kãkiti apisatoõ, txamari !ikerokari. Ininiã ninoa tsoĩkaãta Xesosi apakapapiretakiti ikenakotakasaakina. Apikomoni !isãkirauataikana.

Ipĩkari Õkitikiniua Mauĩkakani

(Mateo 22.23-33; Marko 12.18-27)

²⁷ Ikara inaãka atoko, apoka satoseoakori inakoni. Satoseo kona auikari ipíkari iuaíkana òkitikiniua. Ninoa misàkiretari Xesosi. ²⁸ Itxana:

—Koerekareri, kitxakapiríka Moisesini iòkatsopatarì ia atoko inakari: “Kiki meenetipánika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipípekarini uãka,” itxa Moisesini. ²⁹ Setxi itaritxiakori aua mitxi íkorapokoriti. Apia kiomanetakari ítaniriua. Meenetipánika ipina. ³⁰ Itari takaro iuani tikinitakito. Iua apaka ipina meenetipánika. ³¹ Iuaíkana ãti itari takaro oa. Iuaíkana ipina meenetipánika. Iua atokotxíkana itxana imakinikana itariakori. ³² Eereka oanipekana opípe apaka. ³³ Ipíkani òkitikasaakia, kiripa oítaniri? Kotxi íkinikana takapekaro oa —itxana.

³⁴ Ininiã Xesosi:

—Uatxa íkorasaaki kãkiti ítaniriua. ³⁵ Teoso nakitiakori iuaíkana òkitikasaakia, ! ítaniriuaaikana. ³⁶ Ninoa ! ipinaika, kotxi Teoso nitiriakori iaxitíkini atoko itxauana. Iuasaaki Teoso anaakori atoko itxauana, kotxi Teoso òkitikapekana ninoa. ³⁷ Hite kerokari hisãkire. Hite sãkire txari: “Ipíkani ! òkitikaikaua.” Moisesini oerekaua ipíkani iuaíkana òkitikapanikaua. Iua iòkatsopatakasaakiri aamina tirinakari pirena, isãpiretari Teoso sãpiretakiti. Ia atoko itxa Teoso iuasaaki: “Nota Apraão Teosone, Isaki Teosone, Xakoo Teosone pakini nitxaua,” itxa Teoso. ³⁸ Ininiã ninoa Apraão, Isaki, Xakoo auapanika, kotxi Teoso ! ipíkani Teosoneni. Auãki inakani Teosonera iua, kotxi iuamoni íkinimane auãkipánika —itxa Xesosi.

³⁹ Eereka ãtikaka kaiòkatsopareriakori txari:

—Koerekareri, atãopitikara pisãkire —itxana.

⁴⁰ Ikara inaãka atoko kãkiti píkarauata apikomoni ipimarauatini.

Teoso Mereëkiti Tavii Apika Mekaniri Itxaua

(Mateo 22.41-46; Marko 12.35-37)

⁴¹ Ininiã Xesosi pimaãna:

—Kinirepa isãpiretaãka Teoso mereëkiti Taviini apika mekaniri ininiua? ⁴² Kotxi Taviini iòkatsopata Xikari aãtsoateë. Itxari:

Apiananiri txari niauítemoni: “Nota kikomoni piitopãka.

⁴³ Piitopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua.”

Itxa Taviini xikare. ⁴⁴ Taviini akiritari Teoso Mereëkiti “Niauíte.” Ininiãkara kanatokopa iua Tavii apika mekaniri? —itxa Xesosi.

Kaiòkatsoparerini Maerekani

(Mateo 23.1-36; Marko 12.38-40)

⁴⁵ Eereka kãkiti apisatoò Xesosi òtãkikana imoianariakori. ⁴⁶ Ia atoko itxa:

—Erepaniko, kaiòkatsoparerini misirienetini. Ninoa ieretakari mãkatxi ítanori, peereri, apanakini atamatinina íkapani. Tiitxi amotikoãtaã ninoa potxitari kãkiti ninoakata sãkirauatini apanakini atamatinina íkapani. Ninoa potxitari iitopãkinina auítetxi topãkiniãtaã aiko ãki Xoteo apotiitiniãtaãua. Kiinirisaaki ninoa nirekari apiari topãkiniãtaã iitopãkinina. ⁴⁷ Kiki ipíkasaaki, ninoa misiritaro tikinitakoro. Ninoa mixirikari oaãpoko, iuaritika imisãkiretarina Teoso. Teoso imisãkiretakasaakina, kaiãori sãkiretxi isãkiretana. Ininiã apanakini kenakotakasaakiri, ninoa xinikari: “Atão iua imarotari Teosokata isãkirauatini,” itxana. Txamari Teoso kamaãkaretxitana, ininiã apiata imisiritããkanako.

21

Tikinitakoro Matxineiroteto Sikakito

(Marko 12.41-44)

¹ Xesosi sãkirauatakasaaki Teoso misãkiretiko aikoti ãki, itikari katiirini takiniro itxineirotena kaixa ãki Teoso íkapani. ² Iuasaaki oãua tikinitakoro matiito. Oítaniri !auaika. Oa sikaro ipi txineiro ota okinika oamoni auakaro. ³ Ininiã Xesosi txa:

—Atãopitikara, okira sito sikari apiata. ⁴ Kotxi apanakini sikaro itxineirotena itetakito. Okira sikari okinika onakito —itxa Xesosi.

Teoso Misãkiretiko Aikoti Iríki

(Mateo 24.1-2; Marko 13.1-2)

⁵ ãti òti Teoso misãkiretiko aikoti ãki aua Xesosi imoianariakorikata. Aiko ereri pirena isãkirenãtana.

—Uai peereri. Ere kai sorokiniri paretxiã auakari pakaronepokori. Patamatari kãkiti sikakiti Teosomoni —itxana.

⁶ Ininiã Xesosi txana:

—Ari atãopitkara peerekari. Txamari apokapitkako äti öti ia aiko irikiko ikapani. Iuasaaki kai äti kai nopini auakari !auaika. Ikinipoko irikaäkako —itxa Xesosi.

Misirikaretxi Apokaenetini
(Mateo 24.3-14; Marko 13.3-13)

⁷ Ininiã ninoa pimaãri:

—Koerekareri, kirisaakipa ikara atoko inakari auapani? Kiätokopa itxa ia aiko Teoso misãkiretiko irikini öti manapi aimarotini ikapani —itxana.

⁸ Ininiã Xesosi apakapapiretana:

—Erepaniko, xipokatxi öti apokaãpotakasaaki, kãkiti nirekari imisirienetini hïte. Ito aãpirena auako. Kaiãopokori kiki sãkire: “Teoso mereëkitikarano nota. Nota apokaþeka uai,” itxamana. Paxirari ninoa sãkire. !Himaãkatapena ninoa. !Himoianatapena ninoa. ⁹ Neenamatziene hïkenakoenetakasaaki, !hïþkarauatape. Iua atoko inakari merepanika auako. Iuasaaki xipokatxi öti !apokapanika —itxa Xesosi.

¹⁰ —Äti uãka kamari neenamatzï äti uãkakata. Äti auïtetxi sotatoneakori neenamauata äti auïtetxi sotatoneakorikata. ¹¹ Iuasaaki xipokatxi öti apisa, nota apokini apisa, itixi iakeëkatakako. Itori amianari auako. Apaka kãkiti atamatakiti iaxiti kamapikaretana.

¹² —Ikara inakari apisa, apanakini maïkaiko hïte. Himisiritaäkako. Xoteoakori anikaiko aiko Xoteo apotiitiiniãtaãua Xoteoakori auïte apisatoö apoïtiniina ikapani. Hïtakaãka kateia äki. Ninoa anikaiko hïte itixi auakani auïteakorimoni hïte apoïtiniina ikapani. Iua atokokanerako hinaãkako nisãkire hãuikini xika. ¹³ Iuasaaki auïtetxiakori apisatoö hãuakasaaki, hisãpiretariko Teoso iokanapirena erekari. ¹⁴ Ninoa himisãkiretini apisa, maerekaxiniretika !hïtxape. Kona hïþkarauatape, ¹⁵ kotxi ninoa apisatoö hãuakasaaki, nota sikaimaroretai hïte, ininiã himokaiakariakori !iposotari apakapapiretiniina hïte. !Iposotarina isãpiretiniina: “Kona atão pisãkire,” !itxana. ¹⁶ Hinoroma, hïrima, hïtariakorima, apanakini hinirimanema, haökimanerema pakini sikaiko hïte himokaiakariakorimoni. Ätikaka hïte okaãkako iuasaaki. ¹⁷ Ikinimane omanataiko hïte nisãkire hãuikini xika. ¹⁸ Iuaritika Teoso !auritari ätika hiãko maporokiko, kotxi Teoso iteene ñikatapitikaiko hïte. ¹⁹ Himiteenekiniãri ikinika himisiritiko, ininiã Teoso txïkitakaiko ätipirika iuakata hãuapininiika hinini ikapani —itxa Xesosi.

Xerosareë Xipokiko Pirena
(Mateo 24.15-28; Marko 13.14-23)

²⁰ Apikomoni Xesosi txari:

—Hãtamatakasaakiri sotatoakori äkitiniri Xerosareë, iuasaaki himarotariko pakotapaniri sitatxi xïpokini. ²¹ Iuasaaki hïte Xotëia tãpa auakani himitekako oxiratarimoni. Sitatxi hãuiniã, ininiã himitekako. Mapara hãuiniã, kona hïkanapiripe sitatximoni, ²² kotxi iuasaaki kãkiti misiritiko öti apoka. Teoso sãkire iökatsopatakori sãpiretapekari ikara öti apokini. ²³ Iuasaaki !erekapaniri sito kamixiro ikapani, kaxitakarero ikapani, kotxi omitekini !apakata. Xoteo auiniãtaã auapitkako iteene imisiritikona tïkane, kotxi iuasaaki Teoso oerekari iua omanãkare Xoteoakorimoni. ²⁴ Itomaneri kãkiti okaãkako saasara atoko inakaroã. Apanakini anikaãkako ikini uãka tixinemoni. Xoteo minakanuia xipokariko sitatxi Xerosareë. Teoso auiritana ninoa kaikotini iuaã. Eereka Teoso xipokariko ninoa tapara. Eereka !lauaikana —itxa Xesosi.

Kãkiti Itari Iaxitikiri Kanapiriini
(Mateo 24.29-31; Marko 13.24-27)

²⁵ Apikomoni Xesosi txari:

—Nota uai apokini apisa, atokatxi, kasiri, iöriki pakini oerekariko kãkiti nota iposope uai napokini. Apaka potxoari uiniti auari tsakati mitari. Iua tsakati miramaneri iene. Ikara xika itixi auakani kamaxirexinirepeka itxanako. ²⁶ Kãkiti äkipa iotokako ipikare xika. Itixi misiritiko xika ipikarauata, kotxi iöriki, ikinika iaxiti auakani iakeëkatakako. ²⁷ Iuasaaki nota, hïtari iaxitikiri katxakaãpota katxiãrikata. Iuasaaki ikinimane atapanoko nota. Iuasaaki kaposotiireno nota. Niotximerekata napoka uai. ²⁸ Ikara itixi misiritiko apokaãpotakasaaki, haïamatakako. Hionakaãtako, kotxi païtiki nota kanapiriã hïte napini ikapani. Iuasaaki nimakatzakai hïte ikinika maerekati auiniãtaã —itxa Xesosi.

Piko Mina Pirena
(Mateo 24.32-35; Marko 13.28-31)

²⁹ Xesosi sãpiretari äti sãpirenatxi atão inakari oerekiko. Itxari:

—Hïxinikari aamina piko inakori. Apanakini ätião aamina apaka hïxinika. ³⁰ Pooïoporiþeka onakasaaki, otomorekasaaki, “Kamoï apokanapanoka,” hïtxa. ³¹ Iua atokokana ikara misirikaretxi mixikanani nisãpiretakiti hïtikasaaki, iuasaaki himarotariko païtiki Teoso ikinimane auïte itxauako.

³² —Ia nisäkire atão. Itixi auakani !ixipoka ikinipoko nisäpiretakiti mapokakani apisa.
³³ Iaxiti xipokapitikako. İkoraxiti apaka xipokapitikako. Iuaritika nota säkire !ixipoka.

Iätapariki Öti Pirena

³⁴ —Erepaniko, maerekaxiniretika kona hıtxape. !Hısarauatape. !Hıpoätape. Hıparıkanoka ! hıxinikapeko, kotxi hısarauatiniã, hıpoätiniã, hıparıkanoka hıxinikiniã, !hıxinikari nikanapiriini öti, kotxi İkora öti himimarotakani ötisaaki, napokako. Erepaniko, kotxi txikatoro atoko itxa napokini. Käkiti !imarotapaniri napokini öti. ³⁵ Imakinika käkiti itixi auakani imarotariko napokini iusaaki. ³⁶ Hiätapariko nikanapiriini. Ätipirika himisäkiretariko Teoso. Hamanaãriko Teoso İkara inakari mamisiritakanıi hıte. Hamanaãriko Teoso himapëtauatakani İkapani hıtari iaxitıkiri apokasaaki iua apisatoö hıtimakasaaki —itxa Xesosi. ³⁷ İkiniötika Xesosi sari Teoso misäkiretiko aikotimoni Teoso säkire oerekini İkapani. İkiniötika mapiänikata Xesosi sari ötanoxiratarimoni, Oriva inakorimoni. ³⁸ İkanökanika käkiti apoka Teoso misäkiretiko aikotiã Xesosi säkire ikenakotinina İkapani.

22

Satanasi İroã Xotasi Xinireë

(Mateo 26.1-5, 14-16; Marko 14.1-2, 10-11; Xoão 11.45-54)

¹ Kaiamapeka Páskoa inakori kiiniriti apokini. Iua kiiniriti Xoteoakori nikari pão matireëkati. ² Iusaaki sasetotxi auíteakori, kaiökatsopareriakori pakini nirekari Xesosi okinina, txamari, ninoa pikari apanakini käkiti, kotxi ninoa apokaerekatari Xesosi.

³ Iusaaki Satanasi İroãtotari Xotasi Isikariotxi inakori. Iua Xotasi Xesosi moianarika-mara, apanakinikata. ⁴ Iusaaki iua sari sasetotxi auíteakorimoni, Teoso misäkiretiko aikoti nıkatakani auíteakorimoni. Iusaaki isäkirauata ninoakata Xesosi imıkapiritini İkapani. Iusaaki ninoa xinikaxitita:

—Kiätokopa itxatari Xesosi isikini atemoni?

⁵ Sasetotxi auíteakori eneniãa. Ninoa txari Xotasimoni:

—Pisikasaakiri Xesosi atemoni, aikitxitaiko pite —itxana Xotasimoni.

⁶ —Ateeneka —itxa Xotasi.

İkara atoko inaãka atoko Xotasi iätapari isikiniri öti manapi. İnirekari käkiti mauakanisaaki, Xesosi imıkapiritini.

Páskoa Kiiniriti Kamiko

(Mateo 26.17-25; Marko 14.12-21)

⁷ Iusaaki käkiti parıkauata Páskoa kiiniriti ikaminina İkapani. Iua kiiniriti auakasaaki, itotarina pão matireëkati inikinina. Iusaaki okarina soti auíte äkiri kiinirisaaki iniãkitina İkapani. ⁸ Xesosi paniãtana Xoão, Petro pakini:

—Hısako. Hãpotiitariko nipokori Páskoa kiiniriti İkapani —itxa.

⁹ İniniã ninoa:

—Namonıpa akamatari kiiniri? —itxana.

¹⁰ İniniã Xesosi:

—Xerosareëmoni hısa. Iuaã hıtikari kiki kaminiri sito parıka. Iua apaãnãtari äparaã. Kopiti ikiiã anikanãta. Iua aökitaiko hıte. Iuakata sa hıtxako. Hiıroã aapokotxi iua İroiniãtaã.

¹¹ Himisäkiretari kauriniri. Hıtxariko iua: “Koerekareri nirekari imarotiniri: ‘Namonıpa ianapokotakani kaikotiniãtaã iriko? Iuaã inirekari inapiniri Páskoa öti imoianariakorikata,’ hıtxariko iua.” ¹² Iusaaki kauriniri oerekai itanokiri koa mitari iuaã kiiniri İkapani. Imakinika tiıtxi iposope. Iuaãrako hãpotiitari imakinika Páskoa kiiniriti İkapani —itxa Xesosi.

¹³ İniniã sa itxana. Apoka itxarina İkinika Xesosi säkire iaöka. İniniã iuaã ninoa maıamatari kiiniri.

Xesosi İto, İarëka Pakini

(Mateo 26.26-30; Marko 14.22-26; 1 Korıto 11.23-25)

¹⁴ İniniã Páskoa kiiniriti potorikasaaki, Xesosi imoianariakorikata topãka. ¹⁵ İniniã Xesosi txana:

—İteene ninirekari hıtekata ninikiniri ia nipokori Páskoa kiiniritisaaki, natatsiıruatini apisa. ¹⁶ İa atoko inakari nipokori !ninikaıkariko hıtekata. Teoso İkinimane auíte inakasaakıua, iusaakiıkarako ninikapitikariko iuaıkana.

¹⁷ Eereka iua kosekari iätatxi koana ovaã İariãti. İniniã itxa:

—Niri, erekapitikari ia pisikakiti —ıtxari Teoso.

Eereka itxana imoianariakori:

—İa İariã hãpakapako. Hıkinika hiätariko. ¹⁸ Atão nisäpiretai. !Niãtaıkaroko ovaã, Teoso İkinimane auíte iminakanisaakıua. Teoso İkinimane auíte inakasaakıua, iusaakiıkarako iuaıkana niãtariko ovaã —itxa Xesosi.

¹⁹ Eereka ikosekari komiri:

—Erekapitikari ia komiri pisikakiti atemoni —itxari Teoso.

Eereka imapixinikaãpotari, sikaãpota itxana imoianariakori:

—Ia niïto okaãka hïte ïkapani. Ia komiri hinikasaaki, hïxinikanoko nota. Hïxinikari nipinini hïte ïkapani.

²⁰ Inikaãkarina atoko, ikosekaro ovaã. Isikana imoianariakori. Ininiã itxa:

—Ia niarëka xiketakarï makatzakariko hïte maerekani. Teoso säpiretapekari kãkiti ikamaenetakiti amaneri kãkiti ïkapani. Ia niarëka oerekari kãkiti, Teoso kamapekari ikamaenetakiti. ²¹ Iua nimïkapiritakiri uatxa uai topãka notakata. ²² Nota hïtari iaxitikiri okaãkako. Teoso säkire iökatsopatakori säpiretapekari nipinini ïkane. Nota hïtari iaxitikiri mikapiritakari iteene misiritaãkako —itxa Xesosi.

²³ Xesosi moianariakori ninoakakarika isãkirauatana:

—Kipa sikatari Xesosi imokaiakariakorimoni? —itxanãtana.

Kiripa Apiatakari?

²⁴ Ikara atoko inaãka atoko Xesosi moianariakori misãkiretakakaua.

—Kiripa apiatakari txatapaniuko ate sauaki? —itxana.

²⁵ Ininiã Xesosi:

—Xoteo minakanïua auïteakori itaparasãkireritika ipaniãtana Xoteo minakanïua iauïtena nireëkiti ikaminina ïkapani, iuaritika ninoa säkire, “Peerekaua ate. Ate moianatari kãkiti,” itxana. ²⁶ Hïte kona ninoa atoko kona hïtxape. Atxiïti apiari pitxaua hïte sauaki, ininiã amarini atoko pitxauako. Auïtetxi pininiãua, nitiritxi atoko pitxauako. ²⁷ Kiripa apiatakari txataua? Auïtetxi nipokori nikakarikani, apiatakari txataua? Initiri nipokori kamakarikani apiatakari txataua? Ikinimane kãkiti imarotari nipokori nikakari apiatakari itxaua. Txamari nota auakasaaki kãkiti sauaki, nitiritxi atoko nitxaua, kotxi kãkiti nimoianata.

²⁸ —Xoteoakori misiritakasaakino nota, kona hïte takanapano. Atão nimoianariakori hïtxaua. ²⁹ Niri, auïtetxi txïkitakapekano nota. Ininiã iua atokokana nota txïkitakai hïte auïtetxi hininiua. ³⁰ Nota auïtetxi ninakasaaki, hinipokota, hiãta hïtxako notakata. Auako auïtetxi topãkini hïte ïkapani. Ininiã iuasaaki hïpaniãtana tosi nirimanetxi Isaeo auakani ikamakitina ïkane —itxa Xesosi.

Xesosi Säpiretari Petro Kipatiniri Iua

(*Mateo 26.31-35; Marko 14.27-31; Xoão 13.36-38*)

³¹ Xesosi säkirauata Simão Petromoni:

—Simão, Simão, Satanasi amanaãpekari Teoso pite, apanakini apaka atamakaerekatini ïkapani. Ahoisi misiritiko atoko inirekari imisiritini pite. ³² Iuaritika, nota misãkiretapekari Teoso isikataparatiniri pixinire Simão, nisãkire atão pauikini ïkapani. Pikerokariko pikamakiti, iuaritika pikanapiriãpitika nota säkire iteene iuaïkana pauikini ïkapani. Eereka pisikataparaxiniretanako pitariakori nota säkire auïãkani —itxa Xesosi säkire.

³³ Petro txari Xesosi:

—Niauíte, nota iposope nitxa kateiamoni nisini pitekata. Pitekata iposope nitxa nipinini —itxa.

³⁴ Xesosi txari:

—Atão nisãpiretai. Ia ïkanõkati patari säkirauatini apisapanikako, ipi ãti pakinikata, “!Nimarotari iua,” pitxanoko —itxa Xesosi.

Xesosi Ôtãkikana Imoianariakori

³⁵ Eereka iuaïkana Xesosi säkirauata imoianariakorikata:

—Mïtxi nota iokanatai kãkitimoni. Iuasaaki kona nisikai txineiro. Kona nisikai sako mata. Kona nisikai sapato, iuaritika minakati auiniã atxiïti? Erekarï hïsini ikinika hinirekakiti mauakanisaaki? —itxa Xesosi

—Minakati !auinua ate —itxana.

³⁶ Ininiã Xesosi txana:

—Txamari uatxa pitxineirote, sakora pakini auiniã, panika. Iouata mitaro mauakanisaakii, pimãka inopinikiri pivëtxitako iouata piamotini ïkapani. ³⁷ Teoso säkire iökatsopatakori kitxakapirïka txari:

Imaïkaãka, kokaniri maïkiko atoko inaãkako.

Ininiã ikara nimaïkiko apokapitikako. Ikara nota pirena kitxakapirïka atãopitika —itxa.

³⁸ Imoianariakori txari:

—Apiananiri, patamata. Uai aua ipi iouata aneenamauatini ïkapani.

Xesosi txari:

—!Apakata ikara atoko inakari hïsäkire —itxa Xesosi.

Xesosi Misäkiretiniri Teoso Xetsémani Inakoriätaä
(Mateo 26.36-46; Marko 14.32-42)

³⁹ Eereka ixirata auite Oriva inakorimoni isa, kotxi itotapekari iuaä isini. Imoianariakori sari iuakata. ⁴⁰ Iuaä apokasaakina, Xesosi txana:

—Satanasi nirekari maerekati hïkamini. Ininiä himisäkiretariko Teoso, iua sikataparatinii, Satanasi nirekakiti himakamakani ikapani —itxa Xesosi.

⁴¹ Ininiä iuaä itakanapana imoianariakori. Apikoxäki axapiti sa itxa. Iuaä ikapoto-reëkaua, misäkireta itxari Teoso. ⁴² Itxari:

—Niri, !pauiritapeno païtiki natatsiirauatini, iuaritika kona pikamapiri nota nirekaäkiti. Pite nirekaäkiti ninireka nikamini —itxa Xesosi.

⁴³ Iuasaaki Teoso nitiri iaxitikiri apoka iuamoni isikataparaxiniretiniri ikapani.

⁴⁴ Iuasaaki Xesosi xinire kamaxirepeka. Äkixinireë apokapeka itsii. Ininiä iteene imisäkiretari Teoso. Ininiä iinikakare arëkatxikata tapika ixitimoni.

⁴⁵ Teoso imisäkiretaka atoko, ökitikaua, imoianariakorimoni isa. Iua apoka ninoamoni. Imakapoañätana, kotxi isäpakapekana imatinaniuatinina xika. ⁴⁶ Ininiä akiritana:

—Kinirepa himakanäta? Hökitikaua. Himisäkiretari Teoso, Satanasi nireëkiti himakamakani tïkane —itxa Xesosi.

Xesosi Maïtiko Pirena

(Mateo 26.47-56; Marko 14.43-52; Xoäo 18.1-11)

⁴⁷ Xesosi säkirauatakasaaki imoianariakorikata, itomaneri käkiti Xotasikata apoka. Xotasi mïkiikana ninoa Xesosi oerekini ikapani. Iua Xotasi Xesosi moianarikamara, apanakinikata. Xotasi apokasaaki apitxokari Xesosi. ⁴⁸ Ininiä Xesosi txari iua:

—Xotasi, pimïkapiritatari pitari iaxitikiri papitxokasaaki? —itxa Xesosi.

⁴⁹ Xesosi moianariakori imarotakasaakiri käkiti nirekiniri Xesosi imaïkini, itxana:

—Apiananiri, erekari atxiïti uatxa aneenamauatini, aiouataneë —itxana.

⁵⁰ Ininiä äti Xesosi moianari sauakari sasetotxi auite apiatakari nitiri kïpita ikikomoni. ⁵¹ Ininiä Xesosi:

—Hïitoka ikara. Iaöpe.

Eereka Xesosi takapiotaua ikïpitaä. Iuasaaki kakïpitapeka itxa iuaïkana. ⁵² Sasetotxi auiteakori, kiomätxiakori pakini ina Xesosi imaïkinina ikapani. Xesosi txari ninoamoni:

—Kinirepa himinari iouata, piriri pakini himaïkinino ikapani? ⁵³ Ikiniötika hïtekata naua aiko Teoso misäkiretikoä. Iuasaaki kona hïte maïkano. İkanöka hina, kotxi ipiaä hïkamari maerekati —itxa Xesosi.

Petro Kipatari Xesosi İmarotini

(Mateo 26.69-75; Marko 14.54, 66-72; Xoäo 18.15-18, 25-27)

⁵⁴ Ininiä ninoa maïkari Xesosi, anika itxarina sasetotxi auite apiatakari aapokomoni. İroäna aapoko äki. Ininiä Petro sari ninoa tikini. ⁵⁵ Sasetotxi aapoko takote apoka. Iuasaaki mapara xamina pokitakori aua. Käkiti topäkanäta xamina takote. İrokanätana. Ininiä Petro topäka ninoa takote. ⁵⁶ Iuasaaki ätokoro atamatari iua xamina kamaraä. Ininiä itakote oäpoka. Omixinitari iua:

—Ia kiki Xesosikata auakari —otxa.

⁵⁷ Txamari Petro txari:

—Ätokoro, kona nimarotari iua —itxa.

⁵⁸ Eereka äti atamatari iua. Itxari iua:

—Pite Xesosi moianarikarai? —itxari.

Txamari Petro:

—Konapitini —itxa.

⁵⁹ Äti oara napa atoko äti txari:

—Atäopitikara, ikira kiki Xesosi moianaripitikara, kotxi Kariréakiri itxaua iua —itxa.

⁶⁰ Petro txari:

—Kona nimarotari ikara pisäpiretakiti.

Iuasaaki, isäkirauatakasaaki, patari säkirauata. ⁶¹ Iuasaaki Xesosi sapotorika, atamata itxari Petro. Iuasaaki, Petro xinikari mitxi Xesosi säpiretakiti: “Patari säkirauatini apisapanikako, ipi äti pakinikata, ‘!Nimarotari iua,’ pitxanoko” ininiri iaöka tua. ⁶² Ininiä eereka Petro sipe. İteene txiapata itxa.

Sotatoakori Napetiniri Xesosi

(Mateo 26.67-68; Marko 14.65)

⁶³ Xesosi nïkatakani napetari, noropata itxarina Xesosi. ⁶⁴ Iuasaaki iaxirikaokitarina iua, ninoa imatamatakani ikapani. Iuasaaki noropata itxarina.

—Kimarorei pite. Kiripa noropatai? —itxana.

⁶⁵ Itomaneri maerekati sākiretxitiã itxtarina Xesosi. Inapetiniri liotoka.

Xesosi Xoteo Auñteakori Apisatoõ

(Mateo 26.57-68; Marko 14.53-65; Xoão 18.19-24)

⁶⁶ Ikanõkapanika kiomãtxiakori, sasetotxi auñteakori, kaiõkatsopareriakori pakini apotiitaua. Iuasaaki Xesosi minaãka ninoamoni.

⁶⁷ —Pisãpiretaua ate, Teoso mereëkitikai pite? —itxtarina.

Ininiã Xesosi apakapapiretana:

—Nisãpiretiniã, !hãuikari nisãkire. ⁶⁸ Nipimarauatiniã, hite !apakapapiretano. Apaka ! hãuiritari nisakakiko. ⁶⁹ Pañtiki hñtari iaxitikiri topãkako Teoso kaposotiñreri kikomoni —itxa Xesosi.

⁷⁰ Ininiã iuañkana ninoa pimaãri:

—Teoso ãkirikai pite? —itxtarina.

Ininiã Xesosi apakapapireta:

—Atãopitkara hñsãkire. Iuapitikarano nota —itxa.

⁷¹ —Iaõpekara. Akenakotapekari isãkire. Ininiã apikomoni isãkire kenakotakani ! anirekaika, kotxi ateka kenakotapekari iua sãkire maerekati —itxana.

23

Xesosi Pirato Apisatoõ

(Mateo 27.1-2, 11-14; Marko 15.1-5; Xoão 18.28-38)

¹ Ininiã imakinika ninoa anikari Xesosi Piratomoni. ² Ininiã iuaã ikamarina aãpirena. Apoñtarina Xesosi:

—Ate kenakopiretari oerekiniri kãkiti maerekati ikamini, kotxi iua õtãkikari kãkiti, kãkiti mñkitxitakaniri Sesa, Homano auñte apiari. Apaka itxa: “Teoso mereëkitino nota. Auñtetxi apiatakari nitxaua,” itxa iua sãkire.

Txamari na atãoni ikara atoko itxana ninoa. Ikara atoko ninoa apoñtari Xesosi. Kona atão ninoa sãpiretakiti. ³ Ininiã Pirato pimaãri Xesosi:

—Pitekani Xoteoakori auñte txataua? —itxari Xesosi.

—Iuapitikarano nota —itxa Xesosi.

⁴ Ininiã Pirato txana sasetotxi auñteakori, kãkiti pakini:

—!Napokari maerekati ikamakiti —itxa.

⁵ Iuañkana apoñtarina:

—Iua oerekana kãkiti maerekati ikamini auñtetxiakorimoni. Kariréia tõpamonira ipotorika. Uatxa uaipekarari iua —itxana.

Xesosi Erotxi Apisatoõ

⁶ Pirato kenakotakasaakiri isãkirena, ipimaãna:

—Ia kiki Kariréiakirikani?

⁷ —Ari iuapitikara —itxana.

Ikara Pirato imarotakasaaki, iokanatarari Xesosi Erotximoni, kotxi Kariréia tõpa auakani auñte itxaua Erotxi. Iuasaaki iua ianapokota Xerosareë. Ininiã Pirato iokanatarari Xesosi Erotximoni, kotxi Xesosi Kariréiakiri.

⁸ Erotxi kenakopiretapekari Xesosi pirena. Ininiã iua aõkitakasaakiri Xesosi, poxokope itxakata, kotxi inirekari Xesosi oerekiniri iposotiire. ⁹ Ininiã iteene ipimaãri Xesosi, ikamakiti imarotini ikapani. Txamari Xesosi !apakapapiretari iua. ¹⁰ Iuasaaki sasetotxi auñteakori, kaiõkatsopareri pakini iteene apoñtari Xesosi. Ikinika ninoa sãkire aãpirenanoka. ¹¹ Eereka Erotxi, isotatoneakori pakini napetari Xesosi. Ieretakarina auñtetxi mãka maparakiri aplata inapetinirina ikapani.

—Hãtamatarari ere. Auñtetxi itxaua —itxana.

Eereka iuañkana iokanatarina Piratomoni. ¹² Mitxi Erotxi, Piratokata omanatakakaua. Ikara õti ninoa apokaerekatakakaua.

Xesosi Okiko Nirekiko

(Mateo 27.15-26, 11-14; Marko 15.6-15; Xoão 18.39-19.16)

¹³ Ininiã eereka Pirato apotiñtari sasetotxi auñteakori, Xoteo auñteakori, apanakini kãkiti pakini. ¹⁴ Ininiã itxa:

—Hite minari ia kiki notamoni. Hite apoñtari iua imisrienetiniri kãkiti. Hite apisatoõ nipimaãpekari ikamakiti pirena. Notamoni kona maerekati ! ikama. ¹⁵ Erotxipekana ! apokari maerekati ikamakiti, ininiã iokanatarari iua notamoni iuañkana. Inipitkara iua erekari, txamari hite nirekari okiko maxikatñka. ¹⁶ Ininiã nota paniãtari inoropatiko aãpitsa amata kamakoriã. Eereka niokanatarari isini.

¹⁷ Iuasaaki Pãskoa kiiniritisaaki, auñtetxiakori itotari isikakiniri ãtika kateia ãki auakari.

¹⁸ Ikara Pirato sáikire ikenakotakasaakina, ninoa akirikata:

—Hókariko ere kiki. Hísikakariko Pahapasi —itxana.

¹⁹ Pahapasi kateia áki aua, kotxi iua apanakinikata naiatari auítetxiakori. Kokaniri apaka itxaua.

²⁰ Pirato nirekari Xesosi isikakini, ininiá iuaíkana isákirauata kákitimoni. ²¹ Txamari ninoa akiripoakata:

—Aamina ípiriámitakari nopini hítokakitariko. Hókariko aamina ípiriámitakari nopini —itxakatana.

²² Pirato mitxi isákirauata ipikata. Iuaíkana isákirauata:

—Kixikapa? Maerekati !ikama. Ixika !auari ipinini íkapani. Nipaniátariko inoropatiko, eereka nisikakariko —itxari.

²³ Txamari iuaíkana akiripoakatana:

—Hókariko aamina ípiriámitakari nopini.

Ninoa akiripoakatini xika Pirato kamari ninoa nirekakiti. ²⁴ Ininiá Pirato:

—Xesosi ipinako hinirekakiti iaóka —itxa Pirato.

²⁵ Iuasaaki isikakari Pahapasi kateia áki auakari. Neenamtxi kamakari, kokaniri apaka itxaua Pahapasi. Eereka isikari Xesosi sotatoakorimoni aamina ípiriámitakari nopini okiko íkapani.

Xesosi Tokakitaáka Aamina Ípiriámitakari Nopini

(Mateo 27.32-44, 11-14; Marko 15.21-32; Xoáo 19.17-27)

²⁶ Ininiá sotatoakori anikari Xesosi okiko íkapanimoni. Iuasaaki kimaporíápo aókitarina Simão, Sireni sitatxitikiri. Iuasaaki iua apoka sitatximoni. Sotatoakori maíkari iua. Aamina ípiriámitakari itakana Simão tsotere nopini:

—Panika ia aamina ípiriámitakari —itxarina.

Xesosi tikini sa itxa Simão. ²⁷ Xesosi tikini isa mirikiniti kákiti. Átokaka sitoakoro sari apaka. Imatinaniuatana, itxiapatana, kotxi imarotarina Xesosi paítiki ípinini. ²⁸ Xesosi kírioka ninoa sitoakoromoni. Itxana:

—Sitoáikini Xerosareé auakani anaakoro. Kona notani !himariaka. Hitekara himariakaua. Hamariteni íkapani hítxiapata, ²⁹ kotxi áti óti apokasaaki, kákiti sáikire: “Api-aerekata sito meenet oniniua,” kotxi iuasaaki misirikaretxi apokasaaki, pamonókoniri. ³⁰ Iuasaakiikarako kákiti akiripoakatako ixirata auítimoni: “Ate nopini pirika. Pipataua,” itxanako, kotxi iuasaaki ninoa mokaiakariakori apokaápota ninoa xipokini íkapani. ³¹ Nota aamina amaneri atoko nitxa. Híte aamina ísasaka atoko hítxa. Nota !ikamari maerekati, iuaritika ia atoko nota ípina. Erepaniko aamina ísasaka atoko hítxa, ininiá áti ótirako apiata himisiritiko —itxa Xesosi sáikire.

³² Ninoa anikari ípi maerekati kamakani Xesosikata ípininina íkapani. ³³ Apokasaakina “Kiítatxati” inakoriátaá, itokakitarina Xesosi aamina ípiriámitakari nopini. Iua atokokanera itxana maerekati kamakani. Áti maerekati kamakari itakana Xesosi kikomoni, áti isanaremoni.

³⁴ Iuasaaki Xesosi txari:

—Niri !pimisiritapena ninoa, maerekati ikamakitina xika, kotxi !imarotarina ikamakitina —itxa Xesosi.

Iuasaaki sotatoakori kamari sarauatxi. Eereka imakatzakarina Xesosi máka. Sarauatxi káiatakari apakapari imáka. ³⁵ Kákiti iuaá auakani itikari Xesosi. Sasetotxi auíteakori napetari iua. Itxana:

—Iua makatzakapekari apanakini imapinakanina íkapani. Teoso mereékiti ininiáua, kinirepa iuaa !imakatzakaua? —itxana.

³⁶ Iuasaaki sotatoakori apaka napetari iua. Katxioári isikarina Xesosi iátini íkapani, txamari líatari. ³⁷ Itxana:

—Píte Xoteo auíte pininiáua, ininiá aamina ípiriámitakariá pimakatzakaua. Piteka pimakatzakauako —itxarina.

³⁸ Iuasaaki iókatakori takaáka ikii tanomoni:

—Xoteoakori Auíte —itxa iua iókatakori. Homano sáikireé aua. Kreko sáikireé aua. Xoteo sáikireé pakini aua iuaá iókatakori.

³⁹ Maerekati kamakari Xesosi takote tokakitakori akiritari iua. Itxitari. Inapetari:

—Píte Teoso mereékiti pininiáua, íteroa piposotiire? Piteka pimakatzakaua. Ate apaka pimakatzakaua —itxa.

⁴⁰ Áti maerekati kamakari iuaá tokakitakori ótáikikari iua:

—Kona pite píkatari Teoso? Ate apaka apinako. ⁴¹ Atáópitikara ate misiritiko, kotxi maerekati akamapeka. Ere kiki !ikamari maerekati —itxa.

⁴² Eereka itxari Xesosi:

—Xesosi, auñteti pininiãtaãua papokasaaki, pixinikano nota, kotxi ninirekari nisini pitekata iuaxiti —itxari.

⁴³ Xesosi apakapapiretari:

—Atãopitikara nitxai, uatxa ia ðti, pite sariko notakata iaxiti Erekariãtaã.

Xesosi Ipinini Pirena

(Mateo 27.45-56; Marko 15.33-41; Xoão 19.28-30)

⁴⁴ Ininiã apaniãxiti takote atokatxi piãkapeka. Ipi ãti pakini oara ipiãka. ⁴⁵ Atokatxi ! iponikaika. Iuasaaki mãkatxi mata mitari Teoso misãkiretiko aikotiã arõkakari matsoraki-taãka. Ipi matapeka itxa. ⁴⁶ Iuasaaki Xesosi akirikata:

—Niri, nisikai nixinire pinikatini Ìkapani.

Ikara atoko inaãka atoko, ipina. ⁴⁷ Sotato auñte itikasaakiri, ikenakotakasaakiri, itxa:

—Atãopitikara ikira kiki atão inakarinnoka kamakari iua. Maerekati !ikama —itxa sotato auñte.

⁴⁸ Kãkiti iuaã apotiitakaniua ikara atamatakasaakina, itorotana iaritana ipikarauatini xika. Ininiã isipekana. ⁴⁹ Ikinika Xesosi aõkimanere, sitoakoro Karirãiakini, iua tikini sikani pakini aua iuaã. Ikira atoko itikanãtarina Xesosi okiko.

Xesosi Katiko Pirena

(Mateo 27.57-61; Marko 15.42-47; Xoão 19.38-42)

⁵⁰ Iuasaaki iuaã aua Xosee inakori. Xoteo auñteakori ðtãkikakari iua. Erekari iua. Erekarinoka ikama. ⁵¹ Arimateia sitatxitikiri iua. Arimateia sitatxiti, Xotãia tãpa aua. Iãtapapikari Teoso ikinimane auñte ininiua. Mitxipe apanakini Xoteo auñteakori ðtãkikakani nirekasaakiri Xesosi okinina, iuasaaki iua Xosee txari:

—Konapitini. !Apakata ikara atoko akamini —itxa.

⁵² Xesosi ipinaka atoko, Xosee sari Piratomoni. Amanãari Xesosi ðto akauarimoni itakini Ìkapani. Ininiã Pirato sikari Xesosi ðto iuamoni. ⁵³ Ininiã iua makatxakari Xesosi ðto itokakitikoãtaã. Iapirikari mãkatxi mataã, kai iriko ãki taka itxari. Mitxi ipikari lauapanika iua iriko ãki. ⁵⁴ Ikara ðti sesta veira. Ikinika sesta veira, Xoteoakori tomatini ðti apisa, Xoteoakori aiamata tomatiko ðti Ìkapani.

⁵⁵ Sitoakoro Karirãiakini Xesosikata Ìkani sari Xosee tikini kai irikomoni. Ninoa nirekari imarotini Xesosi ðto takikoãtaã. ⁵⁶ Eereka ninoa kanapiriã aapokomonina. Kamariãro, aãtsopa ãtião pakini apotiitana Xesosi ðtoã itakinina Ìkapani. Ininiã tomatiko ðti tomana itxana, kotxi Teoso paniãtakiti iaõka ikamana.

24

Xesosi Iuaikana Auãki Inini

(Mateo 28.1-10; Marko 16.1-10; Xoão 20.1-10)

¹ Tomikosaaki Ìkanõkapanika, sitoakoro sari kai irikomoni, kamariãro Xesosi ðtoã itakinina Ìkapani. ² Ninoa apokasaaki iuaã, atamatarina. !Katoreikari kai iriko. Kai tore makatxakapeãkaika. ³ Ininiã ninoa ðroã, txama kona apokarina Xesosi ðto. ⁴ Ininiã sitoakoro:

—Ìtapari Xesosi ðto? Kanatokõpa itxa? —itxanãtana.

Iuasaakipeka ipi kiki tokiã. Itimana sitoakoro apisatoõ. Pomëkõri mãkarini ninoa. Mëkõkari iotximere atoko itxa ninoa mãka. ⁵ Sitoakoro pikarauata, ininiã iãkana. Ixitiupeka auakiitana. Ininiã ninoa kiki txana:

—Kinirepa hinitanãtari auãki inakari ipikani sauaki? ⁶ !Uaiikari iua. Õkitikapekaua. Hixinikari isãkire Karirãia hitekata auakasaaki. ⁷ Ia atoko itxa isãkire: “Hitari iaxitikiri sikaãkako maerekanimoni. Eereka nipinako aamina ipiriãmitakari nopini. Eereka ipi ãti ðtsaaki iuaikana nõkitikauako,” itxa Xesosi. Hixinikariko isãkire —itxana.

⁸ Ininiã ninoa sitoakoro:

—Ari ikara atokopitikara itxapeka isãkire —itxana.

⁹ Eereka ninoa sipeka. Õsi Xesosi moianariakorimoni isana. Apanakini kãkiti iuaã aua apaka. Iuaã ninoa sãpiretana ikinipoko itakakitina. ¹⁰ Maria Matarenama, Xoanama, Maria Txiaiko inoroma, apanakini pakini sãpiretari Xesosi moianariakori itakakitina. ¹¹ Txamari Xesosi moianariakori kona auikari ninoa sãkire.

—Paxirari hããkire —itxana.

¹² Petronoka auikari ninoa sãkire, ininiã imiteekata kai irikomoni. Iãka, iriko ãki atamatini Ìkapani. Mãkatxi matanoka, Xesosi ðtoã Xosee iapirikakitinnoka atamata. Eereka aapokomoni Ìkanapiriã. Isikasaaki, itsorikaãnãta, Atamatakiti ixinikanãta.

Emaoso Kimaporiti Sikani

(Marko 16.12-13)

¹³ Ikara òti ipi Xesosi sàkire auiàkani iàpota Emaoso inakori aapokotxitimoni. Xerosareë pipotorikasaaki, ipi oara napa atoko papoka Emaoso. ¹⁴ Ninoa ipi sàkiruanàta isaãpotakasaakina. Isàkiretarina, ixinikarina Xesosi ipinini pirena. ¹⁵ Isàkiruanàtakasaakina, iuasaaki Xesosi ina ninoa tikini, ininiã iua sa ninoakata. ¹⁶ Txamari ninoa kona imarotari iua Xesosi ininiua. ¹⁷ Ininiã Xesosi:

–Kipa hïte sàkirenàta? –itxa Xesosi.

Ininiã ninoa iotoka. Iuasaaki ninoa toõ oerekari imatinaniuatinina. ¹⁸ Kiropasi inakori apakapapiretari:

–Ikinimane Xerosareë auakani imarotari Xesosi okiko pirena. Atxiiti pite àtiãtãã ìkarikai? –itxari.

¹⁹ Ininiã Xesosi txari:

–Natokopa itxa iua? –itxa.

Ininiã ninoa:

–Xesosi Nasaree sitatxitikiri iua. Teoso sàkire sàpiretakari itxaua. Teoso, kàkiti apaka apokaerekatari isàkire, ikamakiti pakini, kotxi paposotiireri isàkire, ikamakiti pakini. ²⁰ Sasetotxi auñteakori, aãuñteakori apaka sikari iua okiko ìkapani, aamina ìpiriãmítakari nopini ipinini ìkapani. ²¹ Ate uàkatari iua kàkiti Isaeo auakani maerekani makatxaãkari ininiua. Kita mitxi iua ipina. ²² Mixikanani sitoakoro iua sàkire auiàkani sàkiruauata atekata. Ininiã atsorìkaãta. Isàpiretauana ìkanòkapanika akauarimoni isinina. ²³ Txamari ninoa kona apokaikari Xesosi ìto. Ninoa sàkire, aòkitana Teoso nitiriakori iaxititini iuaã. Ninoa sàpiretana sitoakoro Xesosi iuaìkana òkitikapekaua. ²⁴ Eereka àtikaka imoianariakori sari iuaã atamatinirina ìkapani. Sitoãkini sàkire atãopitikara. Txamari !aòkitari Xesosi iuasaaki –itxa Kiropasi.

²⁵ Ininiã Xesosi txana ninoa:

–Mìkiteni hìtxaua. !Hinirekari hàuikiniri Teoso sàkire sàpiretakani sàpiretakiti imakinika Teoso sàkire, ²⁶ kotxi ninoa txari: “Teoso nirekari imereëkiti atatsiirauatini, Teoso tixine ikanapiriini apisapanika,” itxa Teoso sàkire –itxa Xesosi.

²⁷ Iãpotakasaakina, Xesosi sàpiretana ninoa Teoso sàkire iuaka pirena. Merepanika iuaka oerekaua Moisesi iòkatsopatakitiã, eereka Teoso sàkire sàpiretakani iòkatsopatakitiã. Iuaka oerekaua imakinika Teoso sàkire iòkatsopatakoriã auakariã.

²⁸ Iuasaaki ninoa apokaãpota Emaoso takote. Ninoamoni Xesosi nirekari apikomoni isini. ²⁹ Ininiã itxana:

–Kona pisipe apikomoni. Mapiãnikata, ininiã atekata pikaikota –itxarina.

Ininiã Xesosi ìroã aapokotxiã ninoakata ikaikotini ìkapani. ³⁰ Iitopãka ninoakata inipokotini ìkapani. Iuasaaki Xesosi kosekari komiri.

–Teoso, erekapitikari pisikakiti atemoni –itxa.

Iuasaaki imapixinikari komiri, sika itxana ninoamoni. ³¹ Iuasaakipeka ninoa imarotari Xesosi ininiua. Iuasaakipeka, ereëkoka itxa. ³² Ininiã ninoa misàkiretakakaua:

–Atãopitikara, kimaporìã isàkiruauãpotakasaaki, Teoso sàkire oerekarauaãpotakasaaki, axinire poxokoniua iuasaaki –itxana.

³³ Iuasaakipeka ninoa aiamaata. Ikanapiriãna Xerosareëmoni. Iuaã apokana òsi Xesosi moianariakori, apanakinikata. ³⁴ Isàpiretana:

–Xesosi auãki inini pirena atãopitikara. Apiananiri òkitikapekaua. Petromoni oerekepekaua –itxana ninoa.

³⁵ Ininiã eereka Kiropasi imoianarikata sàpiretana kimapori isinina pirena. Isàpiretana komiri Xesosi mapixinikini pirena, kotxi iuasaakiika ninoa imarotari iua Xesosi ininiua.

Xesosi Oerekaua Imoianariakorimoni

(Mateo 28.6-20; Marko 16.14-18; Xoão 20.19-23; Átosi 1.6-8)

³⁶ Isàkiruauatapanikana inakasaakina, Xesosi tokiã ninoa sauaki.

–Erekaxinire hìtxako –itxa.

³⁷ Itikoãkatana. Ipiãkaruatana. Kamiri iuãkatarina.

³⁸ –Kinirepa hìtikoka? Kinirepa kamaxirepeka hìtxa iìkiteta? ³⁹ Hãtamatariko niuako, nikitì pakini. Iuapitìkarano nota. Himaãtakano. Kamiri !kaxiniri. Kamiri kona kapiri. Hãtamatanano. Nìutokara. Kamiri !nitxaua –itxa Xesosi.

⁴⁰ Ininiã oerekari iuako, ikitì pakini ninoamoni. ⁴¹ Ninoa iteene poxokoniua, txamari liteene !auikapanikarina atão Xesosi ininiua. Ininiã iuasaaki Xesosi pimaãna:

–Nìpokori aua hìtemoni? –itxa.

⁴² Ininiã ninoa sikari ipixini ximaki kimitakori. Mapaã apaka isikarina. ⁴³ Ininiã iua nikari ninoa apisatoõ. Iuasaaki ninoa imarotari atão Xesosi ininiua, kotxi kamiri !inikari nìpokori. ⁴⁴ Eereka iua misàkiretana ninoa:

—Mítxi h̄tekata nauakasaaki, nis̄piretai ikinipoko nota p̄rena Teoso s̄kire iókatsopatakoriā. Noerekapekai h̄te Moisesini iókatsopatakiti, Teoso s̄kire s̄piretakani iókatsopatakiti. Xikari iókatsopatakori apaka noerekapekai. Imakinika ninoa s̄piretakiti nota p̄rena apokapeka.

⁴⁵ Iuasaaki isikaimaroretana ninoa Teoso s̄kire iókatsopatakori imarotinina ĩkapani, ininiā iuasaaki ninoa imarotari at̄o. ⁴⁶ Itxari:

—Kitxakapir̄ka iókatsopatapeēkaika:

Teoso mereēkiti atatsiirauatako. Okaākako. Ipi āti ōtisaaki ōkitikauako.

⁴⁷ K̄kiti nis̄kire auiākani iaripiretariko niokanapirena erekari ikini itixiti. Merepanika Xerosareē auakanimoni is̄piretaākako, eereka ikini itixiti auakanimoni is̄piretaākako. Ninoa oerekariko k̄kiti takanapiniri imaerekanina, ininiā iuasaakipeka Teoso makatzakariko maerekati ikamakitina. ⁴⁸ H̄ikinika h̄te itikapekari nipinini. H̄atamatano nota iuaĭkana auāki ninini. Ininiā iteene himarotari nota p̄rena apanakini h̄s̄piretini ĩkapani. ⁴⁹ Nota iokanatariko niri sikaenetakiti, Erekari Matamatakoti, h̄temoni. Uai sitatxi h̄kaikotako. H̄iātapariko iua apokini. Ininiā h̄apakapariko Teoso posotiire itano ĩkari —itxa Xesosi.

Xesosi Anikaāka Teoso Tixinemoni

(Marko 16.19-20; Ātosi 1.9-11)

⁵⁰ Xesosi anikari imoianariakori Pet̄ania sitatxitimoni. Iuaā apokasaakina, Xesosi ōkitikauakotaua. Itxari Teoso:

—Niri, naia pin̄kata. Pitakari erekari naiamoni —itxa.

⁵¹ Is̄akirauatakasaaki, anikaāka Teoso tixinemoni. ⁵² Iuasaaki ninoa:

—Peerekari Xesosi. Iuanoka Apiananiri —itxanātana.

Eereka Xerosareē ikanapiriāna ipoxokoniritikana. ⁵³ Ikiniōtika isana Teoso mis̄kiretiko aikotimoni. Iuaā ninoa mis̄kiretari Teoso:

—Peerekai. Erekapitikari pikamakiti ate ĩkapani —itxanātana ikiniōtika.

Ameē.

HOÃO

Xesosi, "Teoso Säkire" Inakori

¹ Itixi kamiko apisa iua "Teoso Säkire" inakori auapeka. Iua Teosokata aua. Iua Teoso txaua. ² Ikinipoko potorikikosaaki Teosokata auari iua "Teoso Säkire" inakori.

³ Teoso paniätari iua ikinipoko ikamini. !Auari iua makamakiniti. ⁴ Xesosi, "Teoso Säkire" inakori, kamari itanapokoka auäki inini. Iuanoka sikari ikinipoko auäki inini, kotxi iuanoka auapika. Iua tirikapi atoko itxa, kotxi iopinikari käkiti xiniremoni Teoso säkire imarotini ikapani, ätipirika auini ikapani. ⁵ Iopinikari ipiä. Ipiä kona xipokari iua tirikapi kamara.

⁶ Teoso iokanataru isäkire säpiretakari tükane kiki Xoão inakori. Iokanataru iua käkitimoni, käkiti xinire iopiniäkari isäpiretini ikapani. ⁷ Isäpirenauata, Teoso säkire ikinimane imarotini ikapani, auikapiretinirina ikapani. ⁸ Kona Xoãoni käkiti xinire iopiniäkari txaua. Xoão iokanataäka käkiti xinire iopiniäkari isäpiretini ikapani. ⁹ Iua atão iopinikari käkiti xinire. Apoka ikoraxiti, ikinipoko käkiti xinire iopinikini ikapani.

¹⁰ Iua "Teoso Säkire" inakori aua ikoraxiti. Iua kamari itixi, iuaritika ikoraxiti auakani kona auikapiretari iua säkire. ¹¹ Iua apoka itixi ikamakitimoni, txamari käkiti ikamakini kona nirekari iua. ¹² Iuaritika apanakini nirekari iua, ininiä auikarina isäkire. Ininiä iua sikaposotiiiretana ninoa Teoso anaakori ininiuana ikapani. ¹³ Aponaniäkasaaki, Teoso anaakori !atxaua. Ateka Teoso anaakori akaminuia !aposota. Kona käkiti txikitakaua Teoso anaakori aniniäua. Teosora kamari iua anaakori aniniuana.

¹⁴ Käkiti itxapekava iua "Teoso Säkire" inakori. Atekata aua. Ate itikari iua. Peerekari iua. Peerekari iposotiiire. Ikinipoko erekari aua iuamoni. Isäkire atãonoka itxa. Ikara atoko itxa, kotxi iri Teoso. Teoso äkiri imatonökari itxaua Xesosi.

¹⁵ Xoão säpiretari Xesosi käkitimoni. Ia atoko isäpirenauata:

—Iua, hitemoni nisäpiretakiti: "Nota tikinimoni apokakari, apiatako iua. Nota poiãoka, kotxi nota auini apisapanika auapeka iua."

¹⁶ Ikinipoko erekari aua iuamoni, ininiä amakinika ate apakapari ikinipoko erekari iuamonikiri. Isikaäpotari erekari atemoni. ¹⁷ Aimarotari Teoso paniätakiti säkiretxiti, kotxi Moisesini oerekepekava. Apiaerekata Xesosi Kristo oereëkiti, kotxi iua oerekaua Teoso iteene tiretiniuana. Ikinipoko erekari isika atemoni. Maerekati kamakani atxaua, iuaritika Teoso tiretaua. Oerekaua atão inakari aimarotini ikapani. ¹⁸ Teoso atamatakari !auari. Imatonökari Teoso äkiri, irikata auakari, iuara oerekaua Teoso aimarotini ikapani, kotxi Teosotxikana iua.

Xoão Kapatxisareri Säpiretakiti

(Mateo 3.1-12; Marko 1.1-8; Arókasi 3.1-18)

¹⁹ Xoteo auiteakori Xerosareë sitatxiti auakani iokanataru käkiti Xoãomoni. Iokanataru sasetotxiakori. Iokanataru sasetotxiakori moianatakani apaka Xoãomoni, ipimainirina ikapani: "Kinakariparai pite?" ²⁰ Kona Xoão kipataru isäpiretinina. Atão isäpiretinana:

—Teoso mereëkiti käkiti iätapakiti, kona nitxaua nota —itxa.

²¹ Ininiä ipimaärina:

—Ikara atoko ininiä kiriparai? Eríasikani? —itxana.

—Kona iuano —itxa.

—Teoso säkire säpiretakari aiätapakitikani atxiiti? —itxana.

—Kona iuano —itxa.

²² —Ikara atoko ininiä, natokopa inakariparai pite? Ninoa ate iokanatakani nirekari imarotiniina pite. Natokopa inakaripa pite? —itxana.

²³ Ininiä Xoão:

—Teoso säkire säpiretakari Isaia inakori iökatsopatakiti txari:

Auako kiki äparaä makipakaniätaä. Isäpirenauatako. Itxariko: "Höeretariko kimapori Apiananiri apokini apisapanika. Itikaäpo erekari hïkamako iua napini ikapani," itxa Isaia. Iua kiki äparaä makipakaniätaä kasäpirenari, iuakarano nota. Iua Isaia säpiretakitikarano nota —itxa Xoão.

²⁴ Pariseoakorira iokanataru ninoa kiki Xoãomoni. ²⁵ Ipimaärina Xoão:

—Iua Teoso mereëkiti aiätapakiti piminakanisaakiaua, Eríasi inakori piminakanisaakiaua, Teoso säkire säpiretakari aiätapakiti piminakanisaakiaua, kinirepa pite patxisataru käkiti? Kipaniäpa pite patxisarauata? —itxarina.

²⁶ —Äparaäänanira nota patxisarauata. Hïte sauaki aua kiki himimarotakiniti. ²⁷ Iuara, nota tikini apokakari, apiatakari iua. Minakati nitxaua nota, ininiä kona apakata napokini

iaa takote. Kona apakata ikiti mata tsapitsa nikoxirikini, kotxi minakati nitxaua –itxa Xoão.

²⁸ Ikara atoko Xoão sãpiretana ninoa Xotão ipiniã Petânia sitatxiti, ipatxisarauatiniãtaã.

Soti Auíte Ākiri, Teoso Nakiti

²⁹ Katimatiniãkata Xoão atapari Xesosi, iuamoni inini. Xoão sãpiretana apanakini itakote auakani:

–Hãtapari. Erenapani soti auíte ākiri Teoso nakiti, kotxi ikinimane maerekani makatxaākari itxaua. ³⁰ Mitxi nisãpiretakitikara ere. “Kiki apokako nota tikini. Apiananiri iua, kotxi nota mauakanisaakipnika iua aua.” ³¹ Mitxi nota apaka kona nimarotari maerekanitxi makatxaākari uāka. Nota patxisatari kãkiti āparaã, kotxi iuasaaki nisãpiretari iua pirena Isaeo tixini auakanimoni –Xoão txana ninoa.

³² Xoão sãpiretana apanakini itikakiti:

–Nota itikari iua Erekaru Matamatakoti Teoso tixinekiri katxakini. Kamoã katxakini atoko itxa iua. Isari Xesosimoni, kaikota itxa iuakata. ³³ Ikara apisa kona nota imarotari iuāka. Āparaã nipatxisarauatini paniãtakari sãpiretano: “Pitikariko Erekaru Matamatakoti katxakini. Kikimoni apokini pitikariko. Iua kiki patxisarauatini ātiã, kotxi isikari Erekaru Matamatakoti patxisatakonimoni,” itxano. ³⁴ Notakara itikari ikara. Nota sãpiretari nitikakiti, ininiã nimarotapitikari ia kiki Teoso ākiri ininiua –itxa Xoão.

Merepitipnika Xesosi Moianariakori

³⁵ Katimatiniãkata iuaãkana Xoão auanãta iuaã ipi imoianariakorikata. ³⁶ Iuasaaki itikari Xesosi inapaãpotini, ininiã akiritari imoianariakori:

–Hãtapari. Ere kiki, soti auíte ākiri Teoso nakiti itxaua –itxa.

³⁷ Ikara ikenakotakana atoko ninoa ipi imoianariakori sari Xesosi tikini. ³⁸ Ininiã Xesosi sapotorika, atapana iua tikini ikani.

–Kipa hinireka atxĩti? –itxana ninoa.

–Koerekareri, namonipa paua pite? –itxarina.

³⁹ –Masa, hãtamata –itxa.

Ininiã isana iuakata, atamata itxarina iua auiniãtaã. Iuasaaki kikatapeka. Eereka iãanõkapeka iãanapiriãna.

⁴⁰ Ninoa Xoão moianariakori, Xesosikata sikani, Ātree, Ātree moianari pakini. Simão Petro itari itxaua iua Ātree. ⁴¹ Eereka Ātree sari katimariã itari Simãomoni.

–Ate aõkitari Teoso mereëkiti aiãtapakiti –itxa.

⁴² Ininiã Ātree anikari itari Simão Xesosimoni. Xesosi atamatari Simão.

–Pite Simão, Xoão inakori ākiri. Uatxa pite Petro pinaãkako –itxa.

Kai sorotxikana iuāka Petro.

Piripi, Natanaeo Pakini Xesosi Akiritini

⁴³ Katimatiniãkata Xesosi nirekari Kariréia tõpamoni isini. Iuaã aõkitari Piripi inakori.

–Notakata masa. Nimoianari pitxapekauako –itxari.

⁴⁴ Iua Piripi aapoko Petsãita sitatxiti. Iuaã apaka aua Ātree, Petro pakini aapoko.

⁴⁵ Iuasaaki Piripi nitari Natanaeo inakori. Apokasaakiri isãpiretari:

–Ate aõkitari kiki. Moisesini iõkatsopatakiti sãpiretakiti iua. Teoso sãkire sãpiretakani iõkatsopatakiti sãpiretakiti aaõkita. Iuakara Xesosi txaua. Nasaree sitatxitikiri iua. Xosee ākiri iua Xesosi –itxari.

⁴⁶ –Nasaree sitatxitiã !uari erekari –itxa Natanaeo.

–Auapitika. Masa, maãpiãkatari iua –itxa Piripi.

⁴⁷ Xesosi atapari Natanaeo iuamoni inaãpotini.

–Ere kiki atã Xoteopitikara. Atãonoka ikama –itxa Xesosi.

⁴⁸ Ininiã iuasaaki Natanaeo kenakotari Xesosi sãkire. Ipimaãri Xesosi:

–Kiãtokopa ininiãpa pimarotano nota? –itxari.

Xesosi txari iua:

–Piripi akiritiniã apisapanikara, nimarotari piko kati patapi piitopãkanãta.

⁴⁹ Ininiã Natanaeo apakapapiretari:

–Koerekareri, Teoso ākiri pitxaua pite. Kãkiti Isaeo tixini auakani auíte pitxaua –itxari Xesosi.

⁵⁰ Ininiã Xesosi:

–Pite aukari nisãkire, kotxi nimitikakinitika nimarotari piko kati patapi piitopãkanãtini. Pite imarotapanikariko apia posotiiiretxi. ⁵¹ Pite itikariko Teoso tixine osereëkiko. Pitikariko Teoso nitiriakori kanĩkini. Pitikariko ninoa katxakini, pitari iaxitikiri nopini apokinina. Atãopitikara ikara atoko nitxai pite –itxari Natanaeo.

2

Xesosi Inoåkari Āparaā, Iāriāpeka Itxīkitakini

¹Ipi ōti napaka atoko aua kiiniri tanirauatiko pirena kiiniriti Kanaa sitatxiti Kariréia tōpa. Xesosi inoro aua kiiniriātaā iuasaaki. ²Kakiiniriteri kemaïtxitari Xesosi, imoianariakori pakini. ³Iāriā xipoka atoko Xesosi inoro:

—!Auaika iāriā —otxari Xesosi.

⁴Ininiā Xesosi:

—Kinirepa ikara atoko pitxano? Niposotiire manapi !apokapanika —itxaro inoro.

⁵Ininiā Xesosi inoro txana kaapokori nitiriakori:

—Ipaniātakiti iaōka hīkamako —otxa.

⁶Iuaā kopiti aua, seisi pakini, mītari kopititi, kai kamakori. Naia kopiti āki aua āparaā Xoteoakori arokiniua ĩkapani. Iuaātaā ninoo arokaua. Kiomātxiakorini oerekinina atoko ninoo arokaua Teoso imisākiretinina apisa, ninoo Teoso apakapini ĩkapani. Ātika iua kopiti māikari āparaā sei aritro.

⁷Xesosi paniātana kaapokori nitiriakori:

—Hīxāpokakari naia kopiti āki āparaā —itxana ninoo.

Ininiā ninoo xāpokakari kopiti āki āparaā. Isonakatapeka apoka āparaā. ⁸Ininiā Xesosi:

—Hīsorokaātari āparaā, sika hītxari kakiiniriterimoni iātini ĩkapani.

Ininiā ninoo anikari āparaā kakiiniriterimoni. ⁹Iua kakiiniriteri iātari. Iuasaaki iāriāpeka itxapekaura āparaā.

—Amonipa ina ia iāriā? —itxa.

!Imarotari. Ninoo nitiritxi āparaā anikakani imarotari iua iāriā. Ininiā kakiiniriteri txari ĩtanorouatakari:

¹⁰—Kinirepa mixikanani ia iāriā apia erekari na pisikaua? Apanakini sikari iāriā apia erekari kiiniri potorikasaaki. Kākiti kamitope inakasaakiika apanakini sikari iāriā poiāo erekari. Txamari uatxaika pite sikari apia erekari —itxari.

¹¹Iuasaaki Xesosi mipotorikari iposotiire Kanaa sitatxiti Kariréia tōpa iua auakasaaki. Iposotiire oerekari Apiananiri ininiua. Ikara atoko ininiā, Xesosi moianariakori auikari Xesosi Teoso mereēkiti kākiti iātapakiti ininiua, kotxi ninoo itikari iposotiire.

¹²Ikara atoko inaāka atoko Xesosi, inoro, itariakori, imoianariakori pakini sari Kapanaoō sitatxitimoni. Iuaā ikaikotana mapaōtipeka.

Pirātxi Omitikiko Pirena

(Mateo 21.12-13; Marko 11.15-17; Arókasi 19.45-46)

¹³Xoteoakori kiinirite Páskoa inakori apisapanika, Xesosi sari Xerosareēmoni. ¹⁴Isa Teoso misākiretiko aikotimoni. Iuaā pirikeri āki itikari pirātxi vētxitakani, kema auīte, soti auīte, kamao pakini vētxitakani. Itikari txineirota sikakani apaka. Amesa takote ninoo topākanāta. Ivētxitarona txineirota. Apakaparona āti uāka txineirote, kotxi oa ātoiāo, ininiā Xoteo txineirote isikana. ¹⁵Ininiā Xesosi kosekari aāpitsa. Īpatari. Aāpitsaā omitikenatana ninoo pirātxi vētxitakani. Omitikenatana kema auīte, soti auīte Teoso misākiretiko aikoti takote auakani. Ikakanapiriāri amesa txineirota apakapikoātaā. Txineirota xikepoakatani.

¹⁶Ipaniātana kamao vētxitakani:

—Himakatxakariko kamao. Hanikariko mapara. Niri aapoko āki hīvētxirauatini !apakata. Kona uaini pirātxi vētxitiko —itxana ninoo.

¹⁷Iuasaakipeka imoianariakori xinikari Teoso sākire iōkatsopatakori:

Nota iteene tīretari paapoko pite misākiretiko aikoti. Iua xika nokaākkako, itxa Teoso sākire iōkatsopatakori.

¹⁸Eereka Xoteo auīteakori misākiretari Xesosi:

—Teoso paniātiniāi ninoo kākiti iua misākiretiko aikotiā auakani pomitikenatini, poerekaua posotiiretxi Teoso paniātiniāi aūikini ĩkapani —itxana ninoo.

¹⁹Xesosi apakapipiretari:

—Hīrikariko ia Teoso aapoko. Ipi āti pakini ōtisaaki iuaīkana nōkitikariko ia Teoso aapoko —itxa Xesosi.

²⁰Ininiā ninoo:

—Anekani. Koarēta seisi anokanani iua aiko kamiko. Kiātokopa pitxari ipi āti pakini ōtisaaki pōkitikiniri iuaīkana? Kona kiikitei pite pisākire ikara atoko pinini —itxarina Xesosi.

²¹Txamari Xesosi sākire “Teoso aapoko” ixinikari iīto. !Ixinikari Teoso misākiretiko aikoti. ²²Xesosi ipinaāka atoko, ōkitikaākkaua atoko, iuasaakipeka imoianariakori xinikari ikara Xesosi sākire. Iuasaaki ninoo auikari Xesosi sākire. Auikarina Teoso sākire iōkatsopatakori sāpiretiniri Xesosi atāo Teoso ākiri ininiua.

²³Xesosi Xerosareē auakasaaki, Páskoa kiiniriti auakasaaki, itomaneri kākiti auikari Xesosi Teoso mereēkiti ninoo iātapakiti ininiua. Ninoo itikari posotiiretxi ikamakiti, ininiā

auikarina Xesosi sâkire. ²⁴ Txamari Xesosi !auikari kâkiti sâkire, kotxi imarotari ikinimane âkixinire sâkire. ²⁵ Kâkiti âkixinire sâkire !ipimaâri xatiki, kotxi imarotapekari kâkiti âkixinire sâkire.

3

Nikotemo Pirena

¹ Âti !kanôkati Nikotemo inakori motika Xesosimoni. Iua Xoteoakori auite itxaua. Pariseo itxaua apaka. ² Iua misâkiretari Xesosi:

—Koerekareri, ate imarotari koerekareri, Teoso iokanatakiti pininiua. Teoso pitekata maukaniâ, kona piposotari posotiiretxi pikamini, ininiâ ate imarotari Teoso iokanatai pite kâkitimoni —itxa.

³ Ininiâ Xesosi:

—Iuaikana iponaniâkarira sari Teoso auitexi ininiâtaâua. Iuananira sari iuaxiti. Atâopitikara ikara atoko nitxai pite —itxa.

⁴ —Kiâtokopa pitxa auapekarikai iuaikana piponaniini? Kona piposotari pinoro âko âki iuaikana piïroini. Kona piposotari iuaikana piponaniini —itxa Nikotemo.

⁵⁻⁶ Ininiâ Xesosi:

—Atâopitikara ikara atoko nitxai. Piponaniâkasaaki, piri, pinorokata âkirinanira pitxaua. Iua Erekeri Matamatakoti iponaniâkitakiniâi, Teoso âkiri pitxaua. Kâkiti, iua Erekeri Matamatakoti iuaikana iponaniâkitaâkitinanira, sari Teoso auitexi ininiâtaâua. ⁷ Koniko pitsorkaâtapeko. Piponaniâko ipikata. Ipikata pimiponaniâkaniâ, kona pisari Teoso auitexi ininiâtaâua. ⁸ Îtima xôkarauata inirekiniâtaâ. Pikenakotari ixôkarauatini, iuaritika na pimarotari Îtima sinimoni. Na pimarotari Îtima ininimoni. Iua atokkana !imarotikori Erekeri Matamatakoti iuaikana iponaniâkitaâkiniri kâkiti —Xesosi txari Nikotemo.

⁹ Nikotemo apakapapiretari:

—Nota !imarotari ikara pisâkire —itxa.

¹⁰ Ininiâ Xesosi:

—Koerekareri apiari pitxaua. Kâkiti Isaeo tixini auakani poereka. Txamari pite ! imarotari ikara atoko ninini pite. ¹¹ Atâopitikara ikara atoko nitxanâtai pite. Ate sâpiretari aimarotakiti, aitiâkiti pakini. Txamari !hinirekari hâuikapiretiniri asâpiretakiti. ¹² !korapororiti pirena nisâpiretakasaakii, !pauikari nisâkire. Atauako pauikatarini nisâkire Teoso tixine pirena nisâpiretakasaakii? ¹³ Kona kâkiti sapanika Teoso tixine. Âtinoka sari iuaâ, Teoso tixine potorikakarinnoka, kâkiti itari iaxitikirinoka sari iuaâ.

¹⁴ —Kitxakapiriika âparaâ makipakaniâtaâ Moisesini ôkitikari imini metao kamakori aâke mapotôkireê. Itano itakari. Kâkiti Teoso sâkire auiakani imini akatsatakini atamatarini Moisesini ôkitikakiti, ininiâ kona ipinana. Iua atokkana kâkiti itari iaxitikiri ôkitikaâkako.

¹⁵ Ininiâkara iua sâkire auiakari kona ipinaika. Auapikako.

¹⁶ —Teoso iteene tîretari ikini itixiti auakani, ininiâ iokanatarini imatonôkari imi kâkitimoni. Ininiâ iua sâkire auiakaniirako kona ipinaikako. Âtipirika auapikako. ¹⁷ Teoso iokanatarini imi kâkitimoni ikini itixiti auakanimoni kona imisiritinina ikapanini. Iua iokanatarini imi kâkiti maerekani imaktxakini ikapani, ninoa imapinakani ikapani.

¹⁸ —Teoso âkiri sâkire auiakari kona iokanataâka kâkiti misiritikomoni. Iua Teoso âkiri sâkire mauiakati, iuarako sako kâkiti misiritikomoni. Teoso âkiri sâkire imauiakani xikara ikara atoko inaâkanako. ¹⁹ Teoso âkiri sâkire mauiakani misiritaâkako, kotxi atâo inakari oerekakari kâkiti xinire ipiniâkari apokapeka !koraxiti. Iua oerekari atâo aimarotini ikapani. Tirikapi atoko itxa, kotxi oerekaua atâo. Ninoa mauikareni kona nirekari tirikapi. Inirekarina ipiâ, kotxi maerekati ikamanâтана. ²⁰ Maerekati kamakari kona nirekari tirikapi. Kona tirikapi takote kona aua, kotxi ipîkari ikamara. Ipîkari kâkiti itikiniri maerekati ikamini. ²¹ Teoso sâkire iaôka kamakarira sari ikamaraâ, kotxi ikamara oerekari apanakini iua kamakiti atâo inini Teoso nireêkiti iaôka inini —Xesosi txari Nikotemo.

Xesosi Apiari, Xoão Poiâori Inini

²² Ikara atoko inaka atoko Xesosi imoianariakorikata sari Xotéia tôpamoni. Mapaôti ikaikota imoianariakorikata iuaâtaâ. Imoianariakori patxisatarini kâkiti iuaâ. ²³ Xoão apaka patxisatarini kâkiti Enô inakoriâtaâ, Sarî inakoriâtaâ takote. Ipatxisarauata iuaâtaâ, kotxi iuaâtaâ âparaâ kaiâopokori. Ikinîôtika kâkiti sari iuamoni iuaâtaâ, ininiâ Xoão patxisatana. ²⁴ Iuaaaki Xoão kona takaâkapanika kateia âki.

²⁵ Iuaaaki Xoão moianariakori sâkirauata apanakinikata kâkiti arokinuiua pirena, Teoso misâkiretiko aikoti âki iïroinina apisa pirena. ²⁶ Apokana Xoômoni.

—Koerekareri, Xotâo ipiniâ iua kiki pite patxisatakiti, atemoni pisâpiretakiti, uatxa iua patxisarauatapeka. Ikinipoko kâkiti sari iuamoni. Atemoni !erekari ipatxisarauatini —itxana.

²⁷ Xoão apakapapiretana ninoa:

—Erekapitikari ipatxisarauatini, kotxi Teoso paniätari iua. Teoso masakaniäri posotiretxi kâkitimoni, kona xatiki iposotari iparîkauatini Teoso îkapani. ²⁸ Nota kona Teoso mereëkitino. Kâkiti îatapakiti kona nitxaua nota. Teoso iokanatanano nota Teoso mereëkiti apokini apisa. Ikara hîte imarotapeka. Ikara atoko nitxapekai hîte. Hîsâpiretari ikara apanakinimoni.

²⁹ —Maxinikari kiki îtanorouatakasaaki. Sito amanaâkito iua nakiti otxaua. Imoianari topâka iua takote. Ipoxononiuaata îtanorouatakari sâkire ikenakotakasaaki. Iua atokokana nota poxononiuaata. Nota iua moianari atoko nitxaua. Xesosi iua îtanorouatakari atoko itxaua. Kâkiti iua nakiti itxaua. ³⁰ Xesosi apiaâpotako. Nota poiãoâpotako.

³¹ —Iaxiti îkari Apiananiri. Itixi auakani imarore poiãoonoka, kotxi itixinoka imarotana. Teoso tixine îkari Apiananiri itxaua. ³² Iua sâpiretari itiâkiti. Ikenakotakiti isâpireta. Txamari kâkiti !auikari isâpirena. ³³ Kâkiti Apiananiri sâpirena auîäkani, imarotari Teoso sâkire atâo inini, ininiâ apanakini apaka imarotari Teoso sâkire atâo inini. ³⁴ Iua Teoso iokanatakiti sâpiretari Teoso sâkire, kotxi Teoso sikari Erekari Matamatakoti iuamoni, ininiâ ikinipoko Erekari Matamatakoti posotiire aua iua Teoso iokanatakitimoni. ³⁵ Aîri Teoso tîretari imi. Isikari imi ikinipoko imoiaini îkapani. ³⁶ Teoso âkiri sâkire auîäkani auapikako Teosokata. Teoso âkiri sâkire mauîäkani kona auapanina Teosokata. Teoso omanatapikanako ninoa âtipirika —itxa Xoão ninoamoni.

4

Xesosi Misâkiretaro Samariakero

¹ Kâkiti sâpiretari pariseoakori:

—Xesosi sâkire auîäkani, iua patxisatakini, itomaneri. Xoão patxisatakini poiâoka —itxana.

² (Ari, kona Xesosini patxisarauata. Imoianariakorira patxisatari kâkiti.) ³ Xesosi imarotakasaakiri pariseoakori kenakopiretiniri iua, iusaaki iua osipikari Xotéia tôpa. Kinirâo kanapirikari Karirêia tôpamoni. ⁴ Inirekari Samaria tôpa İpirixititini Karirêia tôpa apokini îkapani.

⁵ Samaria tôpa İpirixititakasaaki, apoka Sikaa sitatxiti takote. Iuaâ aua itixi Xoseeni nakiti, iri Xakooni sikakiti kitxakapirîka. ⁶ Iuaâ aua aariko Xakooni kisakakiti âparaâ apaâtiko. Iuaâ Xesosi apokasaaki, iotoka, kotxi isâpakapeka ôtakori İpirixititini xika. Ininiâ îitopâka aariko takote. Iusaaki apaniâxitiipeka.

⁷ Iusaaki sito Samaria auakaro apoka iuaâ, âparaâ apaâtakaro. Oâpokasaaki, Xesosi amanaâro âparaâ:

—Âparaâ pisikano —itxaro.

⁸ Oa apokini apisapanika Xesosi moianariakori sari sitatximoni nipokori iamotinina îkapani.

⁹ Oa sito apakapapiretari:

—Xoteo pitxaua pite. Samaria auakaro nitxaua nota. Kinirepa nâparaâte pamanaâno? —otxa.

Ikara atoko otxa, kotxi Xoteoakori kona sâkirauata Samaria auakanikata.

¹⁰ Ininiâ Xesosi:

—Teoso sikakiti pimarotaâkamako, pitemoni âparaâ amanaâkari pimarotaâkamako, notamonimarako pamanaâri âparaâ, kotxi piâtiniâri âparaâ nota sikakiti, pauapika âtipirika —itxaro.

¹¹ —Kona katiïui pite. Kiriâpa papaâtari âparaâ, kotxi paîtanoirikori. Namonipa papokatari âparaâ kâkiti âtipirika auini inîkitaâkari? ¹² Kitxakapirîka aâtokirini Xakoo sikaua ate ia aariko. Iua, imiakori, ipiraakori pakini îtari ia âparaâ ia aarikoâkiri. Pite apiata atxiîti? —otxa.

¹³ Ininiâ Xesosi:

—Kâkiti ia irikoâkiri âparaâ îatakari iuaîkana iposonatapanika. ¹⁴ Kâkiti nota siâkiti âparaâ îatakari apikomoni liposonataika. Âkixinire amomo atoko itxa âparaâ nota siâkiti. Iua âparaâ txîkitakari iua âtipirika auini Teosokata —itxaro.

¹⁵ —Iua âparaâ pisikano nimaposonatakani fikane, ininiâ uai kona ninaika âparaâ napaâtini —otxa.

¹⁶ —Pakiritari pîtaniri. Uai piminari —itxa.

¹⁷ —Kona kîtanirino —otxa.

—Atâopitikara, “Kona kîtanirino,” pinini. ¹⁸ Sîko pakinipekara pîtaniri. Kiki uatxa pitekata auakari na atâo pîtanirini. İnîpitikara pisâkire —itxaro.

¹⁹ Ininiâ oa:

—Teoso sãkire sãpiretakari pitxaua pite, kotxi pimarotari ikinipoko nikamakiti.
 20 Kitxakapirika ate kiomaneakorini apotiitaua Teoso imisãkiretinina ikapani ia oxiratari nopini. Txamari hite Xoteoakori txari: “Xerosareñanira aãpotiitauako Teosokata” —otxa.

21 Ininiã Xesosi:

—Pauikariko nisãkire. Æti òti apokako. Iuasaaki kona uai oxiratariãni, kona Xerosareñi kãkiti apotiitaua ari Teoso imisãkiretinina ikapani. 22 Hite Samaria tãpa auakani apotiitaua Teoso himisãkiretini ikapani. Txamari, kona atão himarotari iua. Ate Xoteoakori aimarotapitikari Teoso, kotxi Teoso sikakiti kãkiti maerekani makatxakakari Xoteo itxaua. 23 Teoso keto apokapanika, ari apopeka, ininiã airi Teoso misãkiretakani atão inakani misãkiretari iua ãkixinireña. Ninoa sãpiretari atão inakarinoka iuamoni. Airi nirekari kãkiti ikara atoko inakani misãkiretiniri iua. 24 Teoso nirekari amisãkiretiniri iua aãkixinireñe, kotxi Teoso ìto lauari. Inirekari kãkiti sãpiretiniri atão inakarinoka iuamoni —itxa Xesosi.

25 Ininiã oa:

—Nimarotapitikari iua Teoso mereëkiti aiãtapakiti, Kristo inakori, apokapitikako ìkorapokoriti. Iua apokasaaki ikini sereti isãpiretauako —otxari.

26 —Nota pimisãkiretakiti Teoso mereëkiti hiãtapakitikarano nota —itxaro.

Æti Takarauata, Æti Amarauata Inini Pirena

27 Iuasaakipeka Xesosi moianariakori kanapiriã. Ækixinireña ninoa tsorikaãnãta:

—Kinirepa Xesosi sãkirauata oa sitokata?

Kotxi oa Samaria auakaro. Iuaritika !ipimaãrona: “Kiripa ikai?” kona itxarona. Kona ipimaãrina Xesosi: “Kinirepa pimisãkiretataro oa?” kona itxarina.

28 Iuasaaki oa sito takanapari oti, sitatximoni kanapiriã otxa. Oãkiritari kãkiti iuaã auakani,

29 —Masa. Maãpiãkatari kiki ikinipoko nikamakiti imarotakari. Iua Teoso mereëkiti aiãtapakiti atxiiti? —oa txana ninoa.

30 Ininiã iua sitatxi auakani sari Xesosimoni. 31 Ninoa apokini apisapanika imoianariakori akiritari Xesosi:

—Koerekareri, pinipokota —itxarina Xesosi.

32 —Nipokori auape nota niãkiti tãkane hite mimarotakinini —itxa Xesosi.

33 Ininiã imoianariakori imisãkiretakana:

—Kiripa sikatari nipokori Xesosi nikakiti? —itxana.

34 Ininiã Xesosi:

—Nota kamari iua niokanatakiri nirekaãkiti. Ninirekari nikaminiri ikinipoko iua paniãtakiti. Ia niparika. Niparika nikiena atoko itxa, kotxi niokanatakiri paniãtakiti nikamini sikataparatanano, nipokori sikataparatinino atokotxikana. 35 Kãkiti txari: “Ipi ipi pakini kasiriti auapanika takari iposope inini tãkane, ininiã uatxa kona niparikaũata.” Ia atoko kona hitxape hãskire. Himereka. Hãtamatariko takari. Nisãpiretai hite hitakare iposope haãpoko hanikini tãkane. 36 Iua atokotxikana Teoso sãkire takaãka kãkiti ãkixinireñe. Katakarereri miparikaũata apakapari iparika ìki. Iua anikari kãkiti Teoso aapokomoni, ãtipirika Teosokata auini ikapani. Ininiãkara katakareri, iua miparikaũata apaka poxokoniũatako. 37 Aãtokirini txari: “Æti takarauata, ãtipekana apotiitari takari.” 38 Ia sãkirexititi atão, kotxi nota paniãtai hite mitxi himaparikaũataãtaã hamarauatini. Apanakini parikaũatapeka iuaã. Ninoa takapekari Teoso sãkire kãkiti ãkixinireñe. Pasãpaniri ninoa parika. Ninoa parikaũata mitxi, ininiã uatxa hite parika poião kãkiti Teosomoni hanikini —itxa Xesosi.

Samaria Auakani Auikiniri Xesosi Sãkire

39 Kaiãopokori Samariakini iua sitatxiti auakani aukari Xesosi sãkire, kotxi oa sito mitxi sãpiretana:

—Nikamakiti ikinika isãpiretano —otxana.

40 Ininiã ninoa Samaria auakani apoka Xesosimoni.

—Atekata paua —itxarina Xesosi.

Ininiã Xesosi kaikota ipi òti ninoakata. 41 Xesosi sãkire ikenakotakasaakina, apikomoni ninoa aukapiretari.

42 Ninoa misãkiretaro oa sito:

—Uatxa ate aukapiretari Xesosi sãkire, kona pite sãpirenaãnani, ate aukapiretari. Ateka kenakotapekari iua sãkire, ininiãkara ate aukapiretari iua sãkire. Uatxa ate imarotari atão inini Teoso mereëkiti ininiua Xesosi. Kãkiti itixi auakani maerekani makatxaãkari itxaua iua —itxarona.

Auãttxi Ækiri Xesosi Makananitini

⁴³ Iuaã ipi õti inapaka atoko Xesosi sipeka. Kariréia tõpa isa. ⁴⁴ Mitxi Xesosi sãkire: “Teoso sãkire sãpiretakari paxitaãka, txamari Teoso sãkire sãpiretakari itixineë auakasaaki, kãkiti iuaãtaã kona auikari iua sãkire,” itxapeka Xesosi. ⁴⁵ Iuaritika Kariréia tõpa apokasaaki, kãkiti iuaã auakani ipoxokoniritika apakapari Xesosi, kotxi ninoa apaka sari iua Pãskoia ki-iniriti Xerosareë sitatxitiã. Iuaãtaã itikarina Xesosi posotiire. Ininiãkara ipoxokoniritikana apakaparina Xesosi.

⁴⁶ Xesosi iuaãkana sari Kanaa sitatxitimoni, Kariréia tõpa. Mitxi Xesosi inoãkapekari ãparaã iãriã ininiua iuaã. Xesosi apokasaaki Kanaa, auütetxi ãkiri amianata Kapanaoõ sitatxitikiri. ⁴⁷ Iua auütetxi kenakopiretari Xesosi Kariréia tõpa apokini, Xotéia tõpa osipikini. Inakasaaki Xesosimoni isa, aõkita itxari Xesosi. Aiatar:

—Masa Kapanaoõmoni, naapokomoni. Namarite amianata. Pimakananitari iua. Ipinanapanoka —itxari Xesosi.

⁴⁸ Ininiã Xesosi:

—Nimakamakaniãri posotiiretxi, kona hite nirekari auikiniri nisãkire. Posotiiretxi hitikasaakinani, hite nirekari nisãkire hãuikini. Teoso takaõtxikare hitikasaakinani, hinirekari nisãkire hãuikini —itxa Xesosi iuamoni.

⁴⁹ —Masapoka naapoko. Pimasikanisaaki, namarite ipinapitikako —itxari.

⁵⁰ —Pisa paapokomoni. Pamarite kona ipina —Xesosi txari iua.

Iua kiki auikari Xesosi sãkire, ininiã isipeka. ⁵¹ Ipxinipokoriti aõkitana initiriakori.

—Pamarite auapitikako —itxarina.

⁵² —Namonikitapa akananita? —itxana.

—Kita apaniãxiti apoomari iotoka —itxana.

⁵³ Iuasaaki iua kiki imarotari kita Xesosi sãkire manapikara: “Pamarite kona ipina,” ininiri manapikara iotoka apoomari. Ikara atoko ininiã, ikinimane iua aapoko auakani, iua pakini auikari Xesosi sãkire.

⁵⁴ Ininiã ipikatapeka Xesosi kamari posotiiretxi Kariréia tõpa auakasaaki, Xotéia tõpa osipikasaaki.

5

Matipokotakati Xesosi Erekapeka Inikitakini

¹ Ikara atoko inaãka atoko Xesosi sari Xerosareë sitatxitimoni, kotxi Xoteo kiinirite Teoso ikapani aua iuasaaki. ² Xerosareë sitatxiti apanikaki, soti auite vëtxitikoãtaã takote aua ipoa xapitikiri. Siko Ironakiko aua iuaãtaã. Xoteo sãkire Epiráiko. Epiráiko sãkireë iua ipoa uãka “Petésita.” ³ Ironakikoãtaã amianatananipokoni siríkanãta. Mõsiãreni, motũkakani, matipokotakani pakini iuaã auanãta. Iãtapanãtarina ãparaã tokĩkaãtini. ⁴ Teoso nitiri apokanaka iuaãtaã. Iua apokasaaki itokĩkaãtakari ãparaã. ãparaã tokĩkaãtakasaaki, ãtika amianatakari iikiika komokaãtakari erekapeka itxa. ⁵ Matipokotakati iuaã auanãtakari amianãtakari trita oito pakini anokanani amianata. ⁶ Xesosi atamatari iua iuaã isiríkanãtini. Imarotari iua uatxakapokoni amiananãta. Ininiã Xesosi pimaãri:

—Ereka pinini pinireka? —itxari.

⁷ Amianatakari apakapapiretari:

—Ari, ninirekapitikamari, txamari kona kanikikono kãuaãriã ãparaã tokĩkaãtakasaaki. Nikomokaaritakasaaki, ãti komokape napisapanika —itxari Xesosi.

⁸ —Põkitikaua. Pisirimata pikoseka, sipeka pitxa —Xesosi txari.

⁹ Iuasaakipeka erekapeka itxa iua amianatakari. Isirimata ikoseka, tĩpokota itxapeka. Iua õti kãkiti tomatini õti. ¹⁰ Ininiãkara Xoteo auiteakori txitari amianatakari erekapeka inakari:

—Uatxa kãkiti tomatini õtisaaki pite anikanãtari pisirimata. Ìkora atoko ininiã, kãkiti ! auiritaãka —itxarina, kotxi ninoamoni iparĩkauata isirimata anikasaaki.

¹¹ Ininiã iua kiki:

—Erekape ninikitaãkirira paniãtano: “Pisirimata pikoseka, sipeka pitxa,” itxano.

¹² Ininiã ninoa:

—Kiripa kiki paniãtai pisirimata pikosekini pisini ikapani?

¹³ —!Nimarotari iuaãka —itxa.

Iuaãtaã ipoa xapitikiri takote kaiãopokori kãkiti auanãta, ininiã patimari Xesosi sipeka ninoa sauaki.

¹⁴ Ereka Xesosi aõkitari iua kiki Teoso misãkiretiko aikotiã.

—Uatxa pitĩpokotapeka, ininiã maerekati pitakanapako. Iuaãkana maerekati pika-makasaaki, atxitiã amianari apiatakari inokai —Xesosi txari iua.

¹⁵ Ereka iua kiki sari Xoteo auiteakorimoni.

—Xesosira erekapeka txĩkitakano nota —itxari.

Xoteo Omanatiniri Xesosi

¹⁶ Tomatiko ôtsaaki Xesosi makananitari iua amianatakari. Ikara xika Xoteo auñteakori kinirão okaka txari Xesosi. ¹⁷ Xesosi imarotari Xoteo auñteakori sãkire, ininiã itxana:

–Niri Teoso kamari erekari ikiniõtika. Iua atokotxikana nota. Kona niotoka erekari nikamini tomatiko ôtsaaki –itxa Xesosi.

¹⁸ Ikara Xesosi sãkire xika Xoteo auñteakori apiata omanatari Xesosi. Ninoamoni Xesosi kamari maerekati tomatiko ôtsaaki amianatakari imakananitini. Xesosi sãkire: “Niri Teoso,” inini xika, apiata omanatarina iua, kotxi iua: “Teosotxikana nota” itxanãta iua Xesosi.

Xesosi Irikata

¹⁹ Ininiãkara Xesosi misãkiretana Xoteo auñteakori:

–Atãopitikara nitxai hñte. Nota Teoso ãkiri nitxaua. Notanani !kakamareno. Nitikari niri kamanãtakiti, ininiã niri kamakiti iaõka nikama. Iuanokara nikama nota. Niri kamakitiitxikana nota kama apaka. ²⁰ Niri turetano nota, ininiã ikini sereti ikamanãtakiti oerekano. Oerekapanikariko posotitiretxi apiatapanikako nota kamini ñkapani, ininiãkara hñte tsorikaãtako hñtikasaakiri. ²¹ Niri õkitikari ipikani, iuaikana aua inini ñkane. Iua atokotxikana nota txñkitakana kãkiti ninirekaãkini, iuaikana auini ñkapani. ²² Teoso kona txari kãkitimoni: “Kona erekai pite, ininiã kãkiti misiritikomoni pisa,” kona itxa Teoso. Apanakinimoni kona Teoso txari: “Erekai pite, ininiã uai pina notakata pauini ñkapani,” kona itxa Teoso. Notakara iua ãkirikara txari ikara atoko inakari kãkitimoni, kotxi Teoso sikaposotitiretano nota ikara atoko inakari nisãpiretini kãkitimoni. ²³ Ikara atoko ininiãkara, kãkiti paxitano nota. Niri nirekari nota paxitiko, iua paxitiko atokotxikana. Nota mapaxitakani kona paxitari niri nota iokanatakari.

²⁴ –Atãoenepitikara nitxai hñte. Nisãkire kñpitakari, nota iokanatakari sãkire auñkari, auapika Teosokata. Kona Teoso misiritapaniriko iua. Kona ipinaika. Auapika Teosokata. ²⁵ Atãoene nitxai hñte. Kãkiti xinire ipñkari atoko itxa maerekati ikamakiti xika. Teoso ãkiri sãkire kãkiti kñpitini õti apokapanikako. Ari iketo apokapeka. Nota sãkire kñpitakani auapikako. ²⁶ Añri Teosonoka posotari itxñkitakiniri ikinipoko auãki inini, kotxi iuanoka auapika. Isikaposotitiretano nota apaka ikinipoko nitxñkitakini auãki inini.

²⁷ –Añri Teoso txano nota: “Kãkiti itari iaxitikiri pitxaua, ininiãkara pitxariko nisãkire mauñkani: ‘Kona hñte kñpitari Teoso sãkire, ininiã kãkiti misiritikomoni hñsa,’ pitxako. Pitxariko nisãkire auñkani: ‘Hñte kñpitari Teoso sãkire ininiã uai hina Teosokata hãuini ñkapani.’ Ikara atoko pitxariko kãkitimoni,” Teoso txano nota.

²⁸ –Kona hñtsorikaãtapeko, ikara sãkiretxiti hñkenakotakasaaki. Añti õti ipñkani, katakoni, kenakotariko Teoso ãkiri akiritinina. ²⁹ Iuasaaki õkitikaunanako. Ninoa erekari kamakani auapikako Teosokata. Ninoa maerekati kamakani misiritaãkako.

³⁰ –Notanani kona nitxari kãkiti: “Pite sari kãkiti misiritikomoni. Pitepekana inari uai Teosokata pauini ñkapani.” Notanani kona ikara atoko nitxari kãkiti. Teoso sãpiretakinokara nitxa kãkitimoni, ininiãkara nisãkire kãkitimoni atãonoka, kotxi kona nota nirekaãkitini nikama. Niri nipaniãtakiri nirekaãkitinanira nikama –itxa Xesosi.

Xesosi Sãkire Atãoene Sãpiretakani

³¹ Apikomoni Xesosi sãpirenauata:

–Notaka sãpiretiniãua hñtemoni, atxñiti kona kauikikono. ³² Añtepekana nota sãpiretakari aua. Nimarotari atão inini iua sãpiretakiti. ³³ Hñte iokanatapekari himoianariakori Xoãomoni nota himarotini ñkapani. Iua sãpiretapekana ninoa atãoene nota sãkire. ³⁴ Kona ninitanãtari kãkiti nisãkire atão inini sãpiretakani. Nota sãpiretai hñte Xoão sãpiretakiti sãkiretxiti, himaerekani Teoso makanãkani ñkapani, himapinakani ñkane.

³⁵ –Xoão tirikapi tirinakari poniãkari atoko itxa. Tirikapi iopinikari ikinipoko, tirikapi takote auakari aãtamatin ñkapani. Iua atokokana Xoão oerekari kãkiti atão inakari. Mapaõtinokara hñte poxokiniuata iua sãkire hñkenakotakasaaki.

³⁶ –Aua ãti nota sãpiretakari. Iua Xoão poiãoka. Añtepekana apiata. Nota kamakitikara apiata. Nikamakiti sãpiretari nota sãkire atão inini. Nikamakiti, niri paniãtakiti kãkiti itũkasaaki, imarotari niri uaimoni iokanatinino nota.

³⁷ –Niri, nota iokanatakari kãkitimoni, iua apaka nota sãpiretakari. Kona hñte kenakotari Teoso sãkirauatini. Kona hñte atamatari itoõ. ³⁸ Isãkire !auari hãkixinireẽ, kotxi kona hãuikari nota sãkire iua iokanatakiti sãkire.

³⁹ –Hñte atatsopatapikari Teoso sãkire iõkatsopatakori, hãuini ãtipirika Teosokata himarotini ñkapani. Ia Teoso sãkire iõkatsopatakori nota sãpiretakari apaka itxaua. ⁴⁰ Txamari kona hinirekari nisãkire hãuikini. Kona hinirekari notamoni hinini, ãtipirika Teosokata hãuini ñkapani.

⁴¹ —!Ninitari niuikiko. ⁴² Iteene nimarotai hïte. Kona xapiti hïtaretari Teoso hãkixinireë. ⁴³ Niri iokanatanano nota uaimoni. Txamari kona hïte apakapano nota Teoso iokanatakittino. Teoso maiokanatakinitira hïte apakapa. ⁴⁴ Hïte potxitari äti iuikinii. Txamari kona hïkamari erekari Teosonoka iuikinii ikapani, ininiã kona hãuikari iua säkire.

⁴⁵ —Kona notani säpiretapaniri niri hïte maerekani. Moisesira säpiretariko himaerekani Teosomoni. Hïte uãkatari iua säpiretari hïte ereka hinini, txamari iua säpiretariko niri himaerekani. ⁴⁶ Moisesini säkire iõkatsopatakiti hãuikaãkamako, nota säkire apaka hãuikamako, kotxi Moisesini nota säpiretakari apaka. Iua iõkatsopatapekari nota säkire. ⁴⁷ Hïte kona auikapiretari Moisesini iõkatsopatakiti. Isãkire iõkatsopatakiti himauikakaniã, kiãtokopa hïtxa nota säkire hãuikini? —itxa Xesosi.

6

Sïko Mio Kãkiti Xesosi Sikakienatini

(Mateo 14.13-21; Marko 6.30-44; Arókasi 9.10-17)

¹ Eereka äti õti Xesosi ïpiriãtari Kariréia poa. Ia ipoa uãka apaka Txiperiatxi poa inaãka. ² Kaiãopokori kãkiti sari iua tikini, kotxi ninoo itikapekari Xesosi makananirauatini. ³ Xesosi kanïka mitaxiratarimoni. Iuaã iitopãka imoianariakorikata. ⁴ Xoteoakori kiinirite, Pãskoã inakori kiiniriti apisapanika Xesosi sari iuaãtaã. ⁵ Iitopãkasaaki, Xesosi atapari itomaneri kãkiti apokaãpotini iuamoni. Ininiã ipimaãri Piripi:

—Amonipa aiamotatariko komiri nakira kãkiti asikakienatini ikapani?

⁶ Xesosi ikara atoko txari Piripi, kotxi inirekari imarotiniri: “Atauako atxiiti Piripi auikari niposotiire?” Xesosi imarotapekari iuaãka ikamakiti tïkane. ⁷ Ininiã Piripi apakapapireta:

—Txineiropokoni, tosëtosi txineiro ota, kona apakata komiri aamotini, nakira kãkiti asikakienatini ikapani. !Apakata —itxari.

⁸ Iuasaaki äti Xesosi moianari Simão Petro itari, Ætree inakori, txari Xesosi:

⁹ —Uai aua amarini. Auari ikiena. Sïko komiri sevata inakori kamakori auari iua. Ipi ximaki axapitiri apaka auari iuamoni. Txamari kãkiti itomaneri sikakienatiko !apakata. Ia nipokori poiãoka —itxari.

¹⁰ Xesosi paniãtari imoianariakori:

—Nakira hïpaniãta iitopãkinina —itxana.

Sotonaiakiperi auari iuaãtaã. Iua nopini iitopãkana. Sïko mio apikomoni kikiakori aua.

¹¹ Xesosi kosekari komiri amarini nakiti. Iuasaakipeka imisãkiretari Teoso:

—Erekapitikari ia komiri auiniua ate.

Iua sikari imoianariakori. Eereka ninoo xanakari kãkiti topãkakanimoni. Iua atokokanera itxarina ximaki. Ikinikana inirekaka iaõka auana ninoo.

¹² Ikinimane kamitopeka inakasaaki, ipaniãtari imoianariakori:

—Itetakori komiri, ximaki pakini hãpotiita. Kona hiomatapiriko —itxa.

¹³ Ininiã apotiitarina komiri itetakori. Tosi kotarina ixãpokakana komiri itetakori.

¹⁴ Xesosi posotiire ninoo kãkiti itikasaaki, ninoakakarika isãkirauatana:

—Atãopitikara Xesosi aiãtapanãtakitikara, Teoso säkire säpiretakari inakorikara ere Xesosi —itxana.

¹⁵ Xesosi imarotapekari ninoo nirekiniri iauïtetinirina iua. Iua kona nirekari ninoo auïtetiniri iua. Ninoo mamaïkakaniri apisapanika, Xesosi sipeka iuanoka. Apikoxiti oxiratarimoni ikanïka.

Xesosi Ipoã Nopini Inaãpotini

(Mateo 14.22-23; Marko 6.45-52)

¹⁶ Kïkatapeka imoianariakori iokiriãta ipoa tiniã. ¹⁷ Iereëtauana kanaua äki. Ïpiriãpotarina ipoa Kapanaoõ sitatxiti manapi. Iãanõkapeka inakasaaki kona Xesosi apokapanika ninoamoni. ¹⁸ Kataparari itimati apoka, ininiã tsakatipokoni. ¹⁹ Iuasaaki imekoãpotana. Ipixiniãpeka apokasaakina, ataparina Xesosi ipoa nopini iitpokotini. Kanauamoni isaãpota. Ninoo pïkarauata, kotxi ninoo uãkatari kamiri.

²⁰ Xesosi akiritana:

—Notakara. Kona hïpïkarauatape —itxana.

²¹ Ininiã apakaparina Xesosi ipoxokoniritikana. Iua morõkokaua kanauaã. Iereëtakasaakia, iuasaakipeka kanaua apoka imiriïpe Kapanaoõ manapi.

Kãkiti Nitiniri Xesosi

²² Katimatinïkata ipiniãmoni kaikotakani nitamari Xesosi. Ninoo imarotari ätoka kanaua mitxi iuaã auini. Oa kanaua Xesosi moianariakori anikapeka. Ninoo imarotari Xesosi kona sari imoianariakorikata. Imarotarina ninoanani sini. ²³ Iuasaaki kanauaniri Txiperiatxi sitatxitikini apokita Xesosi merepani Teoso misãkiretiniãtaã takote merepani

komiri nikikoãtaã. ²⁴ Iuasaaki kona ninoa apokari Xesosi, imoianariakori apaka. Ininiã ninoa iereëtaua kanaua åki. Iuaikana ikanapiriãna. Ipoa ipiriãtana Kapanaoõ sitatxititomi, Xesosi initinina ikapani.

Komiri Kåkiti Auapininiika Inini Tikane

²⁵ Ninoa apokari Xesosi ipoa ipiniã.

—Koerekareri, namonikitapa papoka uai? —itxarina.

²⁶ Ininiã Xesosi:

—Atåo nisåpiretai hite. Hite nikari komiri nisikakiti. Kamitopeka hõtxa, ininiã nipokori ikapaninokara hinitanãtano nota. Kona håuikari Teoso posotiireë nikaminiri iua posotiiretxi.

²⁷ Xesosi pinitana:

—Nipokorinoka !hixinikape, kotxi nipokori okanani mauakati itxaua. Hixinikariko åtião nipokori, nota hõtari iaxitikiri siåkiti, kotxi nota sikari kåkiti, kåkiti auapininiika inini tikane. Teoso sikari ikinika iposotiire notamoni ninirekaåkiti nikamini ikapani —Xesosi txana ninoa.

²⁸ —Kiåtokopa atxatari Teoso nireëkiti akamini? —itxana ninoa.

²⁹ —Ianoka Teoso nirekari hikamini. Iua nirekari håuikiniri iua iokanatakiti såkire —Xesosi txana ninoa.

³⁰ —Iuaikana posotiiretxi apiari pikaminiã, ininiãra aåuikari Teoso iokanatakiti pininiãua. Kinakaripa posotiiretxi pikamapanika? ³¹ Anirimaneni kitxakapirikarini åparaå makipakaniãtaå auakasaakina, inikarina komiri iaxiti katxakakari. Teoso såkire iåkatsopatakori txari:

Isikari komiri Teoso tixinekiri ninoamoni, —itxarina Xesosi.

³² Ininiã Xesosi:

—Atåo nisåpiretaiko hite. Kona Moisesini sikari komiri Teoso tixinekiri. Nirikara sikaåtari atåo komiri iua tixinekiri kåkitimoni. ³³ Teoso tixine ikari, iua åkiri, komiri atoko itxa, ikini itixiti auakani ikapani, kotxi iua såkire auikani auapininiika Teosokata —itxana.

³⁴ —Ikinioitika pisikaua ia komiri —itxarina.

³⁵ —Notakara iua komiri Teoso iokanatakiti nitxaua. Notakara sikari kåkiti auini ikapani. Iua nisåkire auikari linatxitaika. !Iposonataika.

³⁶ —Hite ååkitapekano nota, txamari kona hite auikapanikari nisåkire. Ikara atoko nitxapekai hite. ³⁷ Imakinika kåkiti notamoni Teoso siåkini inapitåkako notamoni. “Hisipeka,” kona nitxana notamoni apoåkani. ³⁸ Nitakanapari Teoso tixine. İkorapokoriti napoka, nipaniåtakiri nirekaåkitinoka nikamini ikapani. Notaka nirekaåkiti na nikama. ³⁹ Niri nipaniåtakiri linirekari åtika kåkiti notamoni isiåkini ereëkokini. Itixi xipokini õtisaaki, inirekari nota åkitikinina ninoa auapininiika inini tikane. ⁴⁰ Iua nipaniåtakiri nirekari nota imarotakani, nisåkire auikani, auapininiika inini. Itixi xipokini õtisaaki nõkitikana ninoa iuaikana auåki inini —itxa Xesosi.

⁴¹ Ninoa Xoteoakori kona apokaerekatari Xesosi såkire, kotxi iua txari: “Nota iua komiri Teoso tixine ikari komiriti nitxaua,” ininiã ninoa tsoata. ⁴² Ininiã ninoa:

—Iua kiki Xesosi Xosee åkiri. Aååkitapekari iri, inoro pakini. Kinirepa “Teoso tixine İkarirano” itxape iua? —itxana, itsoatinina.

⁴³ Ininiã Xesosi txana:

—Kona himaxiruatape. Kona hitsoatape. ⁴⁴ Niri nipaniåtakiri akiritakitinanira posotari inini notamoni. Niri makiritakiniti kona posota inini notamoni. Itixi xipokini õtisaaki nõkitikana notamoni apoåkani iuaikana auinina ikapani. ⁴⁵ Kitxakapirika Teoso såkire såpiretakani iåkatsopatari ia Teoso såkire: Teosorako oerekariko ikinipoko kåkiti.

Niri såkire kikapitakani, niri oereëkini, apoka notamoni. ⁴⁶ Kona aua kåkiti niri atamatakari. Nota Teoso tixine ikari, notanokara atamatapekari niri.

⁴⁷ —Nota såkire auikari, iuaa auapininiika Teosokata. Ia nisåkire atåo. ⁴⁸ Nota iua komiri nitxaua kåkiti auapininiika inikitakakarino. ⁴⁹ Hinirimane kitxakapirikarini nikari komiri iaxiti katxaåkari åparaå makipakaniãtaå. Iaxiti katxaåkari inikanimana, txanima ipipena.

⁵⁰ Kåkiti nikiniãri atåo komiri Teoso tixine ikari kona ipina. ⁵¹ Iua komiri, Teoso tixine ikari nitxaua nota. Kåkiti auapininiika inikitakakarino nota. Ia komiri niåkari auapininiika itxako. Ia komiri nisikakiti ia niitokara. Niito nisika kåkiti ikini itixiti auakani auapininiika inini tikane —itxa Xesosi.

⁵² Ikara atoko ininiã ninoa Xoteoakori taparakienatakakaua:

—Natokopa itxa ia kiki iito isikiniua ate, anikiniri ikapani? —itxana.

⁵³ Ininiã Xesosi:

—Atãoenepitkara ikara atoko nitxai hîte. Hîtari iaxitikirî ïto himanikakanisaaki, iarêka himiâtakanisaaki, kona hîxinire auapani âtipirika. ⁵⁴ Iua niïto niâkari, niarêka iâtakari, auapikako Teosokata. Xipokatxi ôtisaaki nôkitikariko iua iuaïkana auini ikapani. ⁵⁵ Niïto atão komiri itxaua. Niarêka atão iariê itxaua. ⁵⁶ Niïto niâkari, niarêka iâtakari, aua nâkixinireê. Nota aua iua âkixinireê. ⁵⁷ Niri, âtipirika auapika inakari, iokanatano nota ïkorapokoriti. Iuara sikano nota âtipirika nauini ikapani. Iua atokotxikana nota sikari nota niâkari âtipirika auini ikapani. ⁵⁸ Nota iua komiri Teoso tixine ïkari nitxaua. Komiri hîkiomaneakorini nikakiti âtião. Iua komiri nikakari ipïpe. Nota siâkiti komiriti niâkani, nisâkire auiâkani auapininiika Teosokata itxanako.

⁵⁹ Ikara atoko itxa Xesosi sâkire aiko âki Xoteo apotiitiniâtaâua Kapanaoô sitatxiti oereka-rauatakasaaki.

Apanakini Takanapiniri Xesosi

⁶⁰ Xesosikata sikani isâkire potxitakani, ikara isâkire ikenakotakasaakina, ipimarau-atatakana:

—Pamimari ikara isâkire. Kipa imarotari ikara atoko inakari sâkiretxiti? —itxana.

⁶¹ Masâpiretakotika Xesosi imarotari ikara atoko itsoatinina. Ininiâ iua:

—Hinirekatari hîtakanapinino nota ia nisâkire xika? ⁶² Kiâtokopa hîxinikakiti hîtikiniãno nota hîtari iaxitikirino kanîkini mitxi nauiniâtaâ? Atxiiti iuasaaki hâuikatarî nisâkire? ⁶³ Iua Erekarî Matamatakotinokara sikari kâkiti auini tîkane. Kâkiti ïto tapara ! auari. Ikara sâkiretxi hîtemoni nisâpiretakiti, iua Erekarî Matamatakoti sâkiretxikana. Nisâkire auikiko auâkitakari kâkiti, âtipirika Teosokata auini ikapani. ⁶⁴ Txamari auapitika hîte sauaki nisâkire mauîâkani —itxa Xesosi.

Merepitipanika Xesosi imarotapekari iua sâkire mauîâkani tîkane. Xesosi imarotari apaka imîkapiritakiri tîkane.

⁶⁵ —Niri Teoso masikaposotiiretakiniti kona iposota apokini notamoni —itxa Xesosi.

⁶⁶ Ikara isâkire xika itori Xesosikata sikani takanapari iua. Kona inirekaikarina iuakata isinina. ⁶⁷ Ininiâ Xesosi pimaâna imoianariakori tosi:

—Hîtepekana, hîte apaka nirekatari hîtakanapinino? —itxa Xesosi.

⁶⁸ Ininiâ Simão Petro apakapipiretari:

—Apiananiri, kirimonipa asa atxiiti? Pitenanira sâpiretari kâkiti auapininiika inini. ⁶⁹ Ate imarotari Teoso mereêkiti pininiua. Teoso âkiri, auapika inakari âkiri pitxaua pite —Petro txari Xesosi.

⁷⁰ Ininiâ Xesosi:

—Nota mereêi hîte tosi kikiakori. Txamari hîte sauaki aua Satanasi nitiri —itxa Xesosi.

⁷¹ Iuasaaki Xesosi xinikari Xotasi Isikariotxi inakori, Simão inakori âkiri. Xesosi moia-narikamara iua, txamari imîkapiritariko Xesosi.

7

Xesosi Itariakori Mauikakaniri Isâkire

¹ Eereka Xesosi kaikotapanika Karirêia tōpa. Kona Xotêia tōpa !ikaikota iuasaaki, kotxi iuaâ Xoteo auîteakori nirekari okiniri. ² Iuasaaki Xoteo kiinirite Papiri inakori kaiama atokopekari. ³ Ininiâ Xesosi itariakori misâkiretari iua:

—Posipika uai. Pisâkire auiâkanimoni Xotêia auakanimoni pisa. Ninoa apaka nirekari itikiniri pikamakiti. ⁴ Kâkiti nirekiniâri iteene imarotaâka, !ikipatari ikamakiti. Pite kamanâri posotiiretxi uai Karirêia tōpa. Pisa Xotêiamoni. Iuaâ poerekari piposotiire ikinimane imarotiniî ikapani —itxana.

⁵ Ikara atoko itxarina Xesosi, kotxi itariakori apaka iuasaaki kona aukapanikari isâkire.

⁶ Ininiâ Xesosi apakapipiretana:

—Iuaâ nisini keto kona apokapanika. Apakata ikiniôtika Xotêia tōpamoni hîte sini, ⁷ kotxi kâkiti !omanatai hîte. Notananira omanataâka, kotxi nisâpiretari maerekati kâkiti kamakiti.

⁸ Erekarî hîte sini kiinirimoni. Kona nota sapani uatxa. Nisini manapi apokasaaki nisa —itxa Xesosi.

⁹ Itariakorimoni ikara inaka atoko, ikaikotapanika Karirêia tōpa.

Xesosi Sari Papiri Kiiniritimoni

¹⁰ Itariakori kiinirimoni ikiikepeka. Ninoa tikinimoni isa Xesosi. Iuasaaki !kasâpirenari kiinirimoni isini tîkane. Ininiâ kâkiti mimarotakinitika isa.

¹¹ Xoteo auîteakori nitapiimari Xesosi kiinirisaaki. Ipimaâri kâkiti:

—Îtapari Xesosi?

¹² Kâkiti iuaâ auakani sâkirauiata Xesosi pirena. Apanakini txari:

—Peerekari Xesosi.

Apanakinipekana:

—Kona erekari. Imisirienetari kâkiti —itxana.

¹³ Kona kâkiti sâkirauata Xesosi uâka Xoteo auîteakori takote, kotxi ipîkana.

¹⁴ Mapaõtinoka kiiniri xipokini apisapanika, Xesosi sari Xotéia tõpamoni. Isari Teoso misâkiretiko aikotimoni. Iuaâ oerekarauata. ¹⁵ Xoteoakori tsorîkaânata Xesosi sâkire ikenakotakasaakina:

—Kininiâpa ere kiki paimatireri. Kona apaiaõkarauata —itxanâtana.

¹⁶ Ininiâ Xesosi apakapapiretana:

—Na nota imaroreni noerekai hîte. Iua niokanatakiri imarorera noerekai hîte. ¹⁷ Kâkiti Teoso nirekaâkiti nirekaâkani imarotari noerekiniri Teoso imarorenoka. Ninoa imarotari nimoerekakaniri notaka nimarore. ¹⁸ Kâkiti iuaka isâkire sâpiretakari nirekari apanakini iuikiniri iua. Kâkiti Teoso sâkirenoka sâpiretakari nirekari iuikiniri Teoso ipaniâtakiri. Ikara atoko inakari kâkiti sâkire atâonoka. !Ikamari maerekati. ¹⁹ Moisesini oerekai hîte Teoso sâkire, ipaniâtakiti iõkatsopatakori. Txamari kona hîte kamari Teoso paniâtakiti. Kona âtika hîte kamari ipaniâtakiti, kotxi hinirekari hõkinino nota —itxana ninoa.

²⁰ Ininiâ ninoa apakapapiretari:

—Maerekati matamatakoti auaitotai pite. Kiripa kinirâo okaka txai pite? Iua maerekati matamatakoti xika ikara atoko pitxa pisâkire —itxarina.

²¹ Ininiâ Xesosi:

—Nota kamari posotiiretxi tomatikoõtxitisaaki, iua kiki matîpokotakati nimakananitakasaaki, ininiâkara hîte tsorîkaâta. Hîuâkatari nîparîkauatini. ²² Txamari hîte apaka parîkauata tomatiko õtisaaki, kotxi hîkamari Teoso takaõtxikare hamarite îtoâ tomatiko õtisaaki. Moisesini paniâtai Teoso takaõtxikare hîkamini hamarite îtoâ oito õti iua auakasaaki. Ari hinirimane kitxakapirîkarini, Moisesini apisapanika, oerekapekari ikara atoko inakari hîkamini. ²³ Ininiâ hîte kamari Moisesi paniâtakiti tomatikoõtxitisaaki. Ikara atoko ininiâ, kinirepa hîte omanatano nota, iua kiki erekapeka nitxîlitakini xika tomatikoõtxitisaaki? ²⁴ Iteene pimimarotakanisaakiri âti kamakiti, kona pakiritapiri: “Iua kamari maerekati,” kona pitxape. !Papoîtapiri âti. Atâo inakarinoka pinita, atâo pimarotini îkapani —itxa Xesosi.

Xesosikani Teoso Mereêkiti Txataua?

²⁵ Apanakini kâkiti Xerosareê auakani txanâtari:

—Ere kikikani ninoa kinirâo okaenetakitikani? ²⁶ Hâtamatari. Iua sâkirauanâta kâkiti apisatoõ. Kona kapîkareri iua. Auûtetxiakori !kasâkirena. Atauako aâuîteakori auikatari isâkire atxîiti? Atxîiti auikatarina Xesosi Teoso mereêkiti aiâtapanâtakiti ininiâua? ²⁷ Atâo Teoso mereêkiti aiâtapanâtakiti apokasaaki, kona kimarotikori iua ininimoni. Ate amakinika imarotapitikari iua Xesosi ininimoni. Kariréiakiri iua, ininiâ Xesosi Teoso mereêkiti aiâtapakiti !itxaua —itxanâtana.

²⁸ Teoso misâkiretiko aikotiâ Xesosi oerekarauanâtakasaaki, itaparasâkিরeritika ipimaâna kâkiti iuaâ auakani:

—Atauako hîte imarotatano nota? Atauako himarotatari nota ininimoni? Kona notaka iokanataua kâkitimoni. Niokanataâka. Nota paniâtakari atâonoka isâkire. Kona hîte imarotari iua. ²⁹ Nota imarotari iua, kotxi iua auiniâtaâkirkarano nota. Iuara iokanatano kâkitimoni —itxa Xesosi.

³⁰ Iuasaaki auûtetxiakori nirekamari imaîkinirina. Kona kamaîkikori, kotxi imaîkiko manapi kona apokapanika. ³¹ Ninoa auûtetxiakori kona auikari Xesosi sâkire, iuaritika itomaneri kâkiti auikari Xesosi Teoso mereêkiti kâkiti iâtapakiti ininiua.

—Iua kiki inipitikara Teoso mereêkiti aiâtapakiti itxaua, kotxi âti posotiiretxi apiari kamakari !auari —itxanâtana.

Sotatoakori Iokanatiko Xesosimoni

³² Pariseoakori kenakotakasaakiri kâkiti sâkire ikara atoko inakari, ninoa, sasetotxi auîteakori pakini iokanatarari sotatoakori Xesosi imaîkinina îkapani.

³³ Sotatoakori apokasaaki iuamoni, Xesosi txari kâkiti iuaâtaâ:

—Mapaõtinoka hîtekata nauako. Eereka nisa nipaniâtakirimoni. ³⁴ Hinitapiikamano, ! hâpokapanino. Nisinimoni kona hîte posotari hîsini —itxa Xesosi.

³⁵ Auûtetxiakori ninoakakarika isâkirauatana:

—Amonîpa isa atxîiti, ate mapokakanîari iua? Atauako õtakoxiti isatako Xoteoakori iarikakanimoni, âti uâka sauaki Xoteoakorimoni? Atauako oerekatari Xoteo minakanuia?

³⁶ Kotxi iua sâkire: “Hinitanoko. !Hâpokono nota. Kona hîte posotari nota sinimoni hîsini,” itxa sâkireta. Ate !imarotari isâkire —itxanâtakakana.

Ãparaâ Kâkiti Auâkitaâkari

³⁷ Kiiniri mapotõkire õti apiapoxokonita. Iua õti Xesosi tima kãkiti sauaki. Ita-parasãkireritika isãpirenauata ikinimane kenakotiniri ïkapani:

–Piposonatakasaaki, notamoni pinako piãtini ïkapani. ³⁸ Teoso sãkire iõkatsopatakori txari: Nota sãkire auĩãkari ãkixinireẽ aua amomo atoko inakari. Iua ãparaã txĩkitakari kãkiti auãki inini.

–itxa Xesosi.

³⁹ Iua Erekar Matamatakoti amomo atoko itxa. Xesosi sãkire auĩãkari apakapariko iua Erekar Matamatakoti. Iuasaaki Xesosi sãkirauatakasaaki, iua Erekar Matamatakoti kona siãkapanika kãkitimoni, kotxi Xesosi kona kanapiriãpanika Teoso tixinemoni.

⁴⁰ Ikara Xesosi sãkire ikenakotakasaaki itori kãkiti txari:

–Atãopitikara ikira kiki Teoso sãkire sãpiretakari aiãtapakiti itxaua.

⁴¹ Apanakini txari:

–Iua Teoso mereẽkiti aiãtapakiti itxaua.

Apanakinipekana:

–Teoso mereẽkiti aiãtapakiti, Karirẽiakiri !itxaua. ⁴² Teoso sãkire iõkatsopatakori sãpiretari Teoso mereẽkiti aiãtapakiti, Taviini apika mekaniri itxaua. Iua iponaniãko Pereẽ sitatxiti Taviini auiniãtaã –itxana.

Ikara atoko itxanãtana, kotxi kona imarotarina Xesosi iponaniãtaã Pereẽ sitatxiti.

⁴³ Iuasaaki apanakini auikari Xesosi sãkire. Apanakinipekana !auikari Xesosi sãkire.

⁴⁴ Apanakini nirekamari imaĩkiniri Xesosi iuasaaki, iuaritika iua maĩkari !auari.

Sotatoakori Kanapiriã Xoteo Auĩteakorimoni

⁴⁵ Ininiã sotatoakori kanapiriã sasetotxi auĩteakorimoni, pariseoakori pakinimoni. Ininiã ipimaãna:

–Kinirepa kona himinari Xesosi uaimoni?

⁴⁶ –Apia imatiresãkireta iua. !Auari kãkiti iua atoko ina sãkiretakari, ininiãkara !apakata amaĩkiniri iua –itxana sotatoakori.

⁴⁷ Ininiã pariseoakori omanãkaruata.

–Atauako iua misirienetai hite apaka? Iua txĩkitakai hite isãkire hãuikini. ⁴⁸ !Auari auĩtetxi iua sãkire auĩãkari. !Auari pariseo iua sãkire auĩãkari. ⁴⁹ Kãkiti miĩkitetinanira auikari Xesosi sãkire. Xesosi sãkire auĩãkari kona imarotari Moisesini paniãtakiti. Ininiãkara Teoso misiritanako ninoa –itxa pariseoakori sãkire.

⁵⁰ Iuasaaki Nikotemo inakori iuaãtaã aua. Pariseo itxaua. Iua õti apisapanika iuara sari Xesosimoni ïkanõka imisãkiretiniri ïkapani. Ninoa ikara atoko isãkirauatakasaaki, Nikotemo misãkiretana ninoa:

⁵¹ –Kãkiti kamakiti isãpiretini apisapanika, “maerekati ikamakiti,” kona hĩtxape. Ikara atoko itxa Moisesini oerekasaakia ate –itxana.

⁵² Ininiã ninoa pariseoakori:

–Atxiiti pite Karirẽiakirikai apaka, Xesosi atoko? Iteene patatsopatariko Teoso sãkire iõkatsopatakori. Iua iteene patatsopatakasaaki, iuasaakiarako pimarotariko !auari Teoso sãkire sãpiretakari, Karirẽia tõpakiri –itxarina iua.

⁵³ Eereka ikinimane sari aapokomonina.

8

Sito Õtaniri Minakotikatika Sirĩkakarõ

¹ Iuasaaki Xesosi sari Orivanape Xiratamoni. Oriva txipokori. ² Katimatinĩkata ikanapiriã Teoso misãkiretiko aikotimoni. Iuasaaki ikinipoko kãkiti apotiitaua iuamoni. Ininiã Xesosi topãka, Teoso sãkire isãpiretini ïkapani. ³ Iuasaaki kaiõkatsopareriakori, pariseoakori pakini minaro sito iuamoni. Ninoa apokaro oa sito õtaniri minakotikatika osirĩkini. Itakarona oa ikinimane apisatoõ.

⁴ –Koerekareri, aãpokaro oia sito õtaniri minakotikatika osirĩkini. ⁵ Moisesini sãkire iõkatsopatakori paniãtaua ikara atoko inakaro kai soroã oõkaãka. Pitepekana, kiãtokopa atxataro oa? –itxana Xesosimoni.

⁶ Ikara atoko ipimaãrina Xesosi, kotxi inirekarina Xesosi kerokiniri isãkire. Inirekarina Moisesini paniãtakiti iaõka imakamakaniã, ininiã maerekati ikamapeka. Txamari !kasãkireri Xesosi. Iokirita, iõkata itxari kipatxi iuakokiã. Imakenakotakiniti atoko itxa. ⁷ Ipimarauatapanikana, ininiã Xesosi õkaõkitaua.

–Maerekati makamakatariko iikiika kiporonakiniro aroa kai soroã –itxa Xesosi.

⁸ Eereka Xesosi iuaĩkana iokirita, iõkata itxari kipatxi. ⁹ Ninoa ikaraene ikenakotakasaakina, iua apiata kiomãtxi inakariua sipeka. Eereka iua tikini auakari apaka sipeka. Ikara atoko itxaãpotana ikinikana isinina. Eereka Xesosinoka kaikota oa sitokata. ¹⁰ Xesosi õkaõkitaua, atamata itxaro oa sito. Oanoka kaikota iuaã.

—Ïtapari pimaerekani sãpiretakani? —itxaro.

¹¹ —Apiananiri, isipekana nimaerekani sãpiretakani —otxari.

—Nota apaka kona sãpiretari pimaerekani. Pisipeka. Maerekati kona pikamapinikako —itxaro.

Kãkiti Xinire Iopiniãkari

¹² Eereka Xesosi iuaïkana oerekari kãkiti.

—Nota ikini itixiti auakani tirikapite atoko nitxaua, kotxi noerekari Teoso sãkire notakata sikani. Teoso mimarotakani ipiaã sikani itxauana. Notakata sikanipekana !itïpokota ipiaã. Nota sikana ninoa ãtipirika auinina ïkapani —itxa Xesosi.

¹³ Ininiã pariseoakori misãkiretari Xesosi:

—Kona ate auikapiretari pisãkire, kotxi pitenani sãpiretari pisãkire. Ikara atoko ininiã, kona aimarotari atãoene inini pisãkire. Æti sãpiretiniãri pite sãkire iaõka, aãuikari atxiiti —itxarina Xesosi.

¹⁴ Ininiã Xesosi:

—Nota sãkirekara ikara atoko nitxai hïte, uaritika atãoenekara ikara atoko nitxai hïte, kotxi nota imarotari nininimoni, nimarotari nisinimoni. Kona hïte imarotari nota ininimoni. Kona hïte imarotari nota sinimoni. ¹⁵ Kãkiti hïtxaua, ininiã hãpoïrauata, kotxi !himarotari atão. Kona nota txari kãkitimoni: “Pite, peerekai pite. Pitepekana, ! erekai pite.” ! Ikara atoko ! nitxari kãkiti. ¹⁶ Uaritika nisãpiretakasaakiri kãkiti kamakiti, atãonoka nitxa nisãkire, kotxi kona notananini sãpirenauata. Niri niokanatakiri sãpiretakitixikana nisãpireta. ¹⁷ Kitxakapirïka hïteka kiomanekorini sãkire iõkatsopatakori txari:

Kãkiti itikakitixikana ãti itikakiti. Ninoa ipi sãkire ãtinoka auiniã, ininiã ninoa sãkire atãonoka itxa,

itxa hïkiomane sãkire. ¹⁸ Nota sãpiretari nota pirena. Niri niokanatakiri apaka sãpiretari nota pirena nisãkiretxikana, ininiã ipi auape —itxa.

¹⁹ —Naniparari pirï? —itxarina.

—Kona himarotano nota. Niri apaka kona himarota. Nota himarotaãkamako, niri apaka himarotamako.

²⁰ Ikara atoko Xesosi sãkirauata. Txineiro Teoso ïkapani sikikoãtaã takote Xesosi oerekarauata Teoso misãkiretiko aikotiã. Xesosi ikara atoko isãpirenauata, uaritika kona kamaïkikori, kotxi imaïkiko manapi kona apokapanika.

Xesosi Sinimoni Kãkiti Masikani

²¹ Iuaïkana Xesosi misãkiretari kãkiti:

—Nisipiriko. Eereka hinitapiimano. Nota sinimoni ! hãuiritaãka hïsini. Hïpinakasaaki, himaerekanikatika hïpinako —itxa Xesosi.

²² Xoteo auïteakori napetari:

—Atauako iuaka okatauako? Kotxi iua txari: “Nota sinimoni kona hãuiritaãka hïsini” —itxana ninoa.

²³ Iuaïkana Xesosi sãkirauata ninoamoni:

—Ïkoraxitikinirai hïte. Nota itanokiri. Hïte ïkora itixikinirai hïte. !Ïkoraxitikirino nota.

²⁴ Ikara atoko ininiãkara, nota txai hïte: “Hïpinakasaaki himaerekanikatika hïpinako,” nitxai. Himauïkakanisaakiri nisãkire nota pirena, hïpinakasaaki himaerekanikatika hïpinako. Kona Teoso makatxakinii himaerekani —Xesosi txana ninoa.

²⁵ —Kiriparai pite? —itxarina Xesosi.

—Merepitipanika nisãpiretakitikara iuakarano nota. ²⁶ Nisãpiretakiti ãkane hïte maerekani nisãpiretini ãkane kaiãopokori. Nota iokanatakari atãoenekara isãkire. Iua sãpiretakitinokara nisãpiretari kãkiti itixi auakani —itxa Xesosi.

²⁷ Ninoa !imarotari Xesosi iokanatakari aïri Teoso. ²⁸ Ininiã Xesosi txana:

—Nota hïtari iaxitikiri hõkasaaki, niïto itano hõkitikasaaki, iusaakiïkarako himarotano kinakaripa nota. Iusaaki himarotariko notaka sãkire ! nisãpireta. Niri oereëkitinokara nisãpireta. ²⁹ Iua niokanatakiri notakata aua. Niri !itakanapano nota, kotxi inireëkitinokanokama —itxa Xesosi sãkire.

³⁰ Xesosi ikara atoko inia sãkiretakasaaki, itomaneri kãkiti auikari isãkire.

Õpoïkakoni Pirena

³¹ Ininiã Xesosi sãkirauata Xoteoakorimoni iua sãkire auiaïkanimoni.

—Nisãkire iaõka hïkamakasaaki, atão nimoianariakori hïtxauako. ³² Atão nimoianariakori hinakasaakiua, himarotari atãonoka inakari. Atãonoka inakari himarotakasaaki, õpoïkakoni atoko hïtxaua.

³³ Ninoa apakapipireta:

—Apraãoni apika mekanirireua ate, ininiã anirekinimoni asa. Nitiritxi iamotakoni ! atxaua. Kinirepa õpoĩkakoni atoko pitxĩkitakaua? —itxana.

³⁴ Ininiã Xesosi:

—Atãonoka nitxai hĩte. Maerekanitxi nitiri atoko itxa kãkiti maerekati kamakari. ³⁵ Nitiritxi iamotakori ãtipirika ! auari ipatrãote aapoko. Patrão ãkiri auapika ãtipirika iri aapoko. ³⁶ Nota Teoso ãkiri txĩkitakasaakiri kãkiti õpoĩkakori atoko ininiua, maerekanitxi nitiri litxaikauako. Iuasaaki iposotari erekari ikamini.

Apraãoni Apika Mekaniriakori

³⁷ —Nimarotari Apraãoni apika mekaniriakori hininiua, txamari hinirekari hõkinino. Nisãkire himauĩãkani xika hinirekari hõkinino. ³⁸ Nota sãpiretai hĩte nota iri oerekakiti. Hĩte kamari hĩte iri paniãtakiti —itxa Xesosi.

³⁹ —Apraãoni ate iri —itxana ninoa.

Ininiã Xesosi:

—Apraãoni apika mekaniriakori hininiãua, Apraãoni kamakiti atoko hĩkamamako. ⁴⁰ Atãonoka nisãpiretai hĩte. Teoso sãpiretakinokara nisãpiretai, iuaritika hinirekari hõkinino. Apraãoni hĩkamari ikara atoko inakari. ⁴¹ Hĩte kamari hĩte iri kamakiti atoko inakari —itxa Xesosi.

—Teosonanira ate iri. Ate atãopitika iua anaakori atxaua —itxana.

⁴² —Teoso atão hĩri ininiãua, nota hĩtoretamako, kotxi Teoso auiniãtaã nota ina uaimoni. Kona notaka iokanataua. Teosora iokanatano nota uaimoni. ⁴³ Kininiãpa ! hĩkitetatarĩ ikara atoko nininiĩ? ! Himarotari nisãkire, kotxi kona xatiki hinirekari nisãkire iaõka hĩkamini. ⁴⁴ Satanasira hĩri. Hĩte nirekari maerekati, Satanasĩ nireẽkiti iaõka hĩkamini. Kĩtxakapĩrĩka itixi kamiko atokopanika kokaniri itxaua Satanasĩ. Iua ! inirekari atãoene isãpiretini. !Iposotari atãoene isãpiretini. Aãpirenanokara iua imarota, kotxi aãpirenaãri itxaua iua. Aãpirenaãri iri itxaua iua Satanasĩ. ⁴⁵ Nisãkire atão, ininiãkara hĩte ! auikari nisãkire. ⁴⁶ Hĩte ãtika itikatarĩ maerekati nikamini? ãtika ! itikari maerekati nikamini, kotxi kona maerekati kona nikama. Ininiã kinirepa kona hĩte auikari nisãkire? ⁴⁷ Teoso anaakori kĩpitari iua sãkire. Hĩte kona kĩpitari iua sãkire, kotxi iua anaakori ! hĩtxaua hĩte —Xesosi txana ninoa.

Xesosi Apraãõ Apisapanika Auini

⁴⁸ Ininiã Xoteoakori txari Xesosi:

—Ate sãkire atão. Samariakiri pitxaua pite. Maerekati Matamatakoti auaĩtotai pite —itxana.

Ninoa akiriuãkatarĩ Xesosi “Samariakiri,” kotxi Xoteoakori omanatana Samariakini. ⁴⁹ Ininiã Xesosi:

—Maerekati Matamatakoti kona auaĩtotano nota. Nota paxitari niri, txamari hĩte kona paxitano nota. ⁵⁰ Kona notani nitari kãkiti nota iuikakani tĩkane. Nirira nirekari kãkiti iuikinino nota. Nirira imarotari nisãkire atãonoka inini. ⁵¹ Nota sãkire iaõka kamakari ! ipina. Ikara atãoene.

⁵² Xoteoakori apakapapiretari:

—Uatxa aimarotari maerekati matamatakoti auaĩtotai pite, kotxi Apraãoni ipĩpe. Teoso sãkire sãpiretakanini apaka ipĩpe. Kinirepa pite sãkire: “Nota sãkire iaõka kamakari ! ipina,” pitxa? ⁵³ Aĩrini Apraãoni ipĩpe. Pite apiãta atxĩĩti? Teoso sãkire sãpiretakanini apaka ipĩpe. Kiriparai pite? —itxarina Xesosi.

⁵⁴ Ininiã Xesosi:

—Notaka niuikiniua !apakata. Nirira iuikano nota. Hĩte sãkire: “Ateosone iua,” txamari nota irira iua. ⁵⁵ Kona himarotari Teoso. Notananira imarotari Teoso. Nota “kona Teoso nimarota,” nininiã, hĩte atokokamarako nitxamako. Aãpirenaãri nitxamauako. Nota imarotapitĩkari iua. Nota kĩpitari isãkire. ⁵⁶ Hĩri Apraãõ poxokoniua, nota uai apokini ikenakoenetakasaaki. Iua itikari nota uai apokini, ininiã iua poxokoniua.

⁵⁷ Ininiã ninoa Xoteoakori: —Pite sikoẽta anokanani ! apokapanika, iuaritika paõkitatarĩ Apraãõ? Paxirari pisãkire —itxarina.

⁵⁸ —Apraãõ apisapanikara nota aua. Ikara atãoene nitxai hĩte —itxa Xesosi.

⁵⁹ Ikara isãkire ikenakotakasaakina, ikosekarina kai soro Xesosi ikiporonakinina ĩkapani, okinina ĩkapani. Xesosi kipataua. Osipikari Teoso misãkiretiko aikoti. Inapaãpota ninoa sauaki.

9

Mõsiãreti Xesosi Erekapeka Inĩkitakini

¹ Xesosi tĩpokotakasaaki, itikari mõsiãreti. Iua ponaniãkasaaki, mõsiãreti itxapekua.

² Xesosi moianariakori pimaãri iua:

—Koerekareri, kiripa kamari maerekati iua mōsiāreti inini? Iuakani? Irikani? Inorokani?

³ Ininiā Xesosi:

—Kona iua maerekani xikani mōsiāreti itxaua. Kona iri maerekani xikani, kona inoro maerekani xikani mōsiāreti itxaua. Kona maerekanitxi xikani mōsiāreti itxaua. Iua mōsiāreti Teoso posotiire kākiti imarotini ikapanira. ⁴ Kākiti parīkauata pokamara. Mapiāpeka inakasaaki, kona kākiti posotaikari iparīkauatini. Iua atokokana akamariko niokanatakiri paniātakiti aāuapanika anakasaaki. Apinaka atoko kona akamaikari Teoso paniātakiti ikorapokoriti. ⁵ Ikorapokoriti nauakasaaki, niopinikana ikinimane ākixinire Teoso imarotini ikapani —itxa Xesosi.

⁶ Ikara inaāka atoko ienemaā ixiti oakaka Xesosi. Ikamari ākape, minapa itxari mōsiāreti oki nopini. ⁷ Iokanatarari:

—Parokari poki Siroee poamoni —itxari mōsiāreti.

Iuaā auari ipoa xapitūkiri kākiti kamakiti. Iua ipoa uāka “Siroee.” Iua uākatxikana “Iokanatakori” itxaua. Iua sari Siroeemoni. Arokatoōtaua. Iuasaakipeka kōsiārepeka itxa.

⁸ Aapoko takote auakani, kākiti mitxi mōsiāreti itikakani pakini, ninoa misākiretakakaua: —Ikira kiki mitxi iitopākanātapika inakarikani, kākiti txineirote amanaānātapika inakarikani, ikira kiki? —itxana.

⁹ Apanakini apakapapiretari:

—Ari, iuapitikara.

Apanakinipekana apakapapiretari:

—Kona. Kona iuani. Āti kiki iua mōsiāreti atoko inakarira.

Iua mitxi mōsiāreti apakapapiretari:

—Ari, iuapitikarano nota —itxa.

¹⁰ Ininiā ninoa:

—Kiātokopa pitxa uatxa kōsiārepeka pitxapeka? —itxarina.

¹¹ —Iua Xesosi inakori kamari ākape, nokiā minapa itxari. Ipaniātano: “Āparaā Siroee inakorimoni pisa. Iuaā parokatoōtaua,” itxano nota. Ininiā nisa. Narokatoōtaua. Iuasaakipeka nota kōsiārepekanō —itxa.

¹² —Namoniparari iua? —itxarina.

—A, meta —itxa iua mitxi mōsiāreti.

Pariseoakori Mitxi Mōsiāreti Inakarikata

¹³ Ninoa anikari iua mitxi mōsiāreti pariseoakorimoni. ¹⁴ Iua ōti Xesosi kamakasaakiri ākape mōsiāreti kōsiārepeka inīkitakini ikapani tomatiko ōtisaaki iuasaaki. ¹⁵ Ninoa anikasaakiri iua mitxi mōsiāreti inakari pariseoakorimoni, pariseoakori apaka pimaāri iua:

—Kininiāpa uatxa kōsiārepeka pitxa? —itxana.

—Ākapeēra noki nopini iminapa. Eereka narokatoōtaua. Uatxa kōsiārepeka nitxa —itxa.

¹⁶ Pariseoakori ātikaka txari:

—Iua kiki, ākape mōsiāreti oki nopini minapakari, kona iua kamari Teoso paniātakiti, kotxi iparīkauata tomatiko ōtisaaki. !Apakata ikamakiti.

Pariseoakori ātikakapekana sākirauata:

—Maerekati kamakari kona kamari ikara atoko inakari posotiiretxi, mōsiāreti kōsiārepeka inīkitakini.

Ininiā pariseoakori taparakienatakakaua ikara xika. ¹⁷ Iuaikana pariseoakori misākiretari iua kiki:

—Kiātokopa inakaripa iua kiki pite makananitakari? —itxarina iua.

—Teoso sākire sāpiretakari itxaua iua.

¹⁸ Xoteo auūteakori kona auikari isākire, mitxi mōsiāreti eereka kōsiārepeka inakari sākire. Ininiā ninoa akiritari iri, inoro pakini.

¹⁹ —Hīte sākire hamarite auakasaaki mōsiāreti itxapekaua. Hamaritekani ere? Kiātokopa uatxa kōsiārepeka itxa? —itxana.

²⁰ —Ari, ate ākiripitikara. Iponaniākasaaki, mōsiāretipeka itxaua. ²¹ Kona ate imarotari kiriāpareuako uatxa kōsiārepeka itxa. Kona ate imarotari kiriuako kamari kōsiārepeka inini. Hīpimaāri iua, kotxi mitapekari iua. Iuaka apakapapiretai hīte —iri, inoro pakini txana ninoa.

²² Iri, inoro pakini ikara atoko itxana Xoteo auūteakori ipīkinina xika. Xoteo auūteakori sāpiretapekari kākiti: “Kākiti Xesosi sākire auīākani, Teoso mereēkiti ininiua auīākani, kākiti iātapakiti ininiua auīākani, kona auiritaākaikana iroinina aiko Xoteo apotiitiniātaāua.”

²³ Ininiā pīkaretxi xika iri, inoro pakini txari: “Hīpimaāri iua. Mitapekari iua,” itxana ninoa.

²⁴ Ininiā iuaikana pariseoakori akiritari iua kiki mitxi mōsiāreti inakari.

—Atãonanira pisãpiretako Teoso apisatoõ. Ate imarotari maerekatinoaka ikamini Xesosi, kotxi imakananirauata tomatiko õtisaaki —itxarina.

²⁵ Ininiã iua:

—Kona nimarotari maerekati ikamini. Kona nimarotari erekari ikamini. Mitxipeka mõiãreti nitxaua. Uatxa kõiãrepeka nitxaua. Ikaranoka nimarota —itxana ninoa.

²⁶ —Kiãtokopa itxai kõiãrepeka inĩkitakiniã?

²⁷ Iua mitxi mõiãreti inakari apakapapiretari:

—Nisãpiretapekai hĩte mixikanani, txamari ! hãuikari nisãkire. Kinirepa hinirekatari iuaĩkana nisãpiretini? Atauako hĩte apaka nirekari iua sãkire hãuikini? —itxana.

²⁸ Ininiã itxitarina:

—Pitera auikari iua sãkire. Ate auikari Moisesini sãkire. ²⁹ Aimarotari Teoso misãkiretari Moisesini. Iua Xesosi kamari maerekati. !Aimarotari amonikiripa iua ina —itxana.

³⁰ Iua kiki apakapapiretari:

—Anekani. Kona hĩte imarotari amonikiriuaoko iua ina. Iuara kamaõiãretano nota. ³¹ Teoso kona maãkatari maerekati kamakari amanaãkiti. Teoso teosonetakani amanaãkiti imaãkatapitika. Iua nirekaãkiti kamakari amanaãkiti imaãkatapitika. ³² Mitxipeka mõiãreti kõiãrepeka inĩkitaãkari kona auari. Itixi kamikosaakipanika !auari kõiãrepeka inĩkitaãkari. Uatxaikara auape. ³³ Xesosi Teoso iokanatakiti iminakanimauako, !ikamamariko posoti-iretxi —itxa iua.

³⁴ Ininiã pariseoakori:

—Pite maerekatipeka auakarikai. Ātipirika pite kamari maerekati. Maerekatinoaka piĩkiteta. Iuaritika pinirekatari ate poerekini? Konapitini. Kona ate nirekari ikara pisãkire. Pisipiniikaua. Kona uai pikanapiripinika. Ate kona nirekari pite uai kãkiti apotiĩtiniãtaãua aikoti pinini —ninoa txari iua.

Ininiã aiko porikiti iokanatarina.

Mitxi Mõiãreti Inakari Auikiniri Xesosi Sãkire

³⁵ Xesosi kenakopiretari iporikiti iokanatikoko mitxi mõiãreti inakari, ininiã Xesosi nitari iua. Apokasaakiri, itxari:

—Atauako pauikatari Teoso ãkiri sãkire? —itxari.

³⁶ —Kĩpa iua? Nimarotiniãri, nauikapitakariko —itxa.

³⁷ —Pite aõkitapekari Teoso ãkiri. Iuapitikara misãkirenãtai pite uatxa —itxa.

³⁸ —Apiananiri, nota auikari pite Teoso ãkiri pininiua.

Ininiã iua kapotoreẽkaua Xesosi apisatoõ.

³⁹ —Ikorapokoriti napoka Teoso sãkire auĩãkani ipinimoni nitakinina ĩkapani. Isãkire mauĩãkani ipinimoni nitakinina ĩkapani napoka ĩkorapokoriti. Apanakini nisikaposotiireta, Teoso sãkire auĩkinina ĩkapani. Mitxi ninoa mõiãreti atoko itxauana, kotxi mitxi !imarotarina Teoso. Ninoa auikapiretakasaakiri Teoso sãkire, kõiãrereri atoko itxapekauana. Apanakinipekana atão minakati isãkirena: “Nimarotapitikari Teoso.” Ninoa uãkatari kõiãrereri atoko ininiuana. Txamari kona atão ninoa nirekari imarotini Teoso. !Nisikari posotiiretixi ninoamoni, Teoso sãkire auĩkinina ĩkapani. Kãkiti iua atoko inakari mõiãreti atoko itxaua —itxa Xesosi.

⁴⁰ Ātikaka pariseoakori Xesosi takote auakani kenakotari.

—Atauako atekani apaka mõiãreti atoko atxaua? —itxana.

⁴¹ —“Mõiãreneri atoko atxaua,” hininiã hĩsãkire, ininiã atão hĩsãkire. Txamari hĩte txari: “Kõiãreua ate,” hĩtxama. Iua atoko hininiã hĩkamapitikari maerekati, kotxi kona hãuikari Teoso sãkire —Xesosi txana ninoa.

10

Soti Auĩte Pitikiri

¹ Xesosi sãkirauatakasaaki, ia atoko itxa isãpirena:

—Atãopitikara ia atoko nitxapaniiko hĩte. Soti auĩte ĩroã pirikeri itoremoni. Itoremoni mĩroãkani kĩĩtiriri itxauana, kotxi atĩãtaã ĩkanĩka ĩroini ĩkapani. ² Pirikeri toremoni ĩroãkari soti auĩte pitikiri. ³ Initiri osereeri pirikeri tore iua ĩkapani. Soti auĩte kenakotari ipitikiri sãkire. Ipitikiri imarotari ĩkinipoko ĩpiraakori uãka akiritinina ĩkapani. Iuara anikana ĩnipokotinina ĩkapani. ⁴ Porikiti auakasaakina, iua saãpota ninoa apisa. Iua tikini isana ninoa. Ninoa imarotari iua sãkire ene. ⁵ Ninoa kona sari kãkiti imimarotakinĩtina tikini. Ipitikiri minakotika akiritakasaakina, imitekana. Kona imarotarina ĩmapitikiritakinĩtina sãkire.

⁶ ĩkara sãpirenatxi atão inakari oerekiko Xesosi sãpiretari pariseoakori. Txamari ninoa kona imarotari Xesosi ikara atoko inakari isãpirena.

Xesosi Soti Auĩte Pitikiri Erekarĩ Itxaua

⁷ Xesosi iuaĩkana sãkirauata.

—Inipitikara nota pirikeri tore nitxaua, soti auĩte İroiini İkapani. ⁸ Nota apisa apoãkani, atão minasãkiretakani kũitiririni itxauana. Soti auĩte kona maãkatari ninoa sãkire. ⁹ Nota itore nitxaua. Kãkiti İroiiniãtaã tore nitxaua. Nota makatxakari uai İroãkari maerekani, auapininiika inini İkapani. İiroã, ipokĩka itxapika. Kona kapĩkareri. Natxi !auari. ¹⁰ Kũitiriri apoka İitiriuatini İkapani, okaniuatini İkapani, imisirikarauatini İkapani. Notapekana apoka kãkiti auapininiika inini İkapani, kãkiti auini ereka inini İkapani.

¹¹ Pitikiritxi erekari nitxaua nota. Pitikiritxi erekari ipina ipiraakori mapinakani İkapani. ¹² Nitiritxi soti auĩteakori pitikiri İtxaua. Anãpa auĩte kaneenamari apokasaaki, iua miteka. Itakanapanako soti auĩteakori. Ininiã anãpa maĩkari soti auĩte, oxikepoata itxana. ¹³ Iua nitiritxi mitekako, kotxi txineiro İkapaninokara iparĩkauata. Kona atão İtiretari soti auĩte.

¹⁴ —Soti auĩte pitikiri erekari nitxaua nota. Atão nimarotari nipiraakori. Ninoa apaka atão imarotano nota. ¹⁵ Iua atokokana niri imarotano nota. Nota apaka imarotari niri. Nota ipinako soti auĩteakori nota nakiti mapinakani İkapani. ¹⁶ Nota aua apanakini soti auĩteakori apaka. Uatxa ia pirikeri ãki İauapanikana. Niminanako ninoa apaka ia pirikeri ãki auinina İkapani. Ninoa auikariko nisãkire. Ininiã ninoa imakinika aua ãtika pirikeri ãki. ãtikarako ninoa pitikiri.

¹⁷ —Niri turetano, kotxi nauiritari nipinini, iuaĩkana nãkitikiniua İkapani. ¹⁸ Kãkiti liposotari okinino nota nimanirekasaakiri nokiko. Nota sikariko nũto nokiko İkapani. Ninirekasaaki manapi nipina. Ninirekasaaki manapi nãkitikaua. İkara atoko niri paniãtano nota —İtxa Xesosi.

¹⁹ İkara Xesosi sãkire Xoteoakori kenakotakasaaki, itaparakienatakakauana. Apanakini potxitari Xesosi sãkire. Apanakini kona potxitari.

²⁰ Apanakini txari:

—Satanasi nitiri auãĩtotari iua.

ãtıpekana txari:

—İmapitxirita. Kinirepa hĩkenakotatari mapitxiritakari sãkire? —İtxana ninoa.

²¹ Apanakini txari:

—Satanasi nitiri auãĩtotakiti !ikara atoko itxa sãkireta. Satanasi nitiri kona kãsiãrepeka txĩkitakari mãsiãreti —İtxana.

Xoteoakori !Auikari Xesosi Sãkire

²² Mitaãsaaki Xoteoakori kamari kiiniri Xerosareẽ. İuasaaki ixinikarina Teoso misãkiretiko aikoti merepaniko kamiko. ²³ İuasaaki Xesosi tĩpokota aiko Teoso misãkiretikoãtaã, Saromãoni inakoriãtaã. ²⁴ İuaã Xoteoakori apotiitaua iuamoni. İuasaaki ninoa txari iua:

—Pite Teoso mereẽkiti pininiãua, pisãpiretaua. Akokaxiti anirekari aimarotiniri ikara —İtxarina.

²⁵ Xesosi apakapapiretana:

—Nisãpiretpekai hĩte. Kona hãuikari nota sãkire. Niposotiire nikamakiti niri uãkaã oerekapekai hĩte. ²⁶ Nisãpiretpekai hĩte, txamari kona hãuikari nota sãkire, kotxi nisoti auĩtene kona hĩtxaua. ²⁷ Nisoti auĩtene imarotari nisãkire. Nota imarotana ninoa. Ninoa kapokitano nota. ²⁸ Nitxĩkitakana ninoa ãtipirika auinina. Nota kamari ninoa imipikanina tĩkane. Kona kamakatzakikona nota nĩkatakini. ²⁹ Niri sikana ninoa notamoni. Apiatakari itxaua iua. Ininiã ãti kona posotari imakatzakinina niri nĩkatakini. ³⁰ Niri, nota pakini ãtika atxaua.

³¹ İkara atoko Xesosi inakasaaki, Xoteoakori morãkari kai soro ikiporonakinirina İkapani.

³² Xesosi sãkirauata ninoamoni:

—Kaiãopokori erekari niri nakiti noerekepekai hĩte. Kinakarixikapa hinireka hĩkiporonakinino nota? —İtxa Xesosi.

³³ Xoteoakori apakapapireta:

—Kona akiporonakai erekari pikaminiã. Akiporonakai, “Teosorano nota” pinini xikara. Pite kiki, iuaritika “Teosorano,” pitxa. Ininiã maerekati pikamapeka Teosomonikari.

³⁴ Xesosi apakapapiretana:

—Kitxakapirĩka Teoso sãkire iãkatsopatakori txari:

Nitxai: “Teosoakori hĩtxaua hĩte.”

³⁵ Aimarotari Teoso sãkire iãkatsopatakori ãtipirika atão inini. Teoso akiriuaãkatana nino a isãkire apakapakani “teosoakori.” ³⁶ Ininiã kinirepa hĩte kamaãkaretxitano. Niri mereẽno nota inireẽkiti nikamini İkapani. İokanatano İkorapokoritimoni. Ininiã kinirepa hãpoĩtano Teoso nimisãkirepiretini, “Teoso ãkirirano” ninakasaaki? ³⁷ Nimakamakaniãri niri nirekaãkiti, iuasaaki kona hãuikari nota sãkire. ³⁸ Nikaminiãri inirekaãkiti, iuaritika

himauikakaniári nisákire, hãuikariko niposotiire. Hítikakiti hãuika. Ininiã himarotariko, hãuikariko, niri, nota pakini átika aniniua –itxa Xesosi.

³⁹ Iuasaakipeka pariseoakori omanãkarauata. Iuaĩkana inirekarina imaĩkinirina Xesosi. Txamari iuasaakipe isipe.

⁴⁰ Iuaĩkana Xesosi kanapiriã Xotão ipiniãmoni. Iuaã ikaikota Xoão kapatxisarerini patxis-arauatiniãtaã. ⁴¹ Itomaneri kãkiti sari iuamoni. Ininiã ninoa txa:

–Xoão kona kamari posotiiretxi, iuaritika ikinika isãpiretakiti Xesosi pirena atão inakari-noka isãpireta.

⁴² Ininiã itori kãkiti iuaãtaã auikari Xesosi sãkire.

11

Arásaro Ipinini

¹ Kiki Arásaro inakori aua ipi itaro, Maria, Mata pakini. Ninoa aua Petânia aapokotxiti. Iuasaaki Arásaro amianata. ² Xesosi ipinini apisa, oa Maria arokari Xesosi kiti kamariãroã, oiãkoã kaxipota otxari. Oa Maria itari Arásaro amianata. ³ Iua amianatakasaaki, Maria, Mata pakini iokanapireta Xesosimoni:

–Apiananiri, pitiretakiti amianata –otxari.

⁴ Ninoa iokanapirena ikenakotakasaaki, iua txa:

–Amianari inokari Arásaro kona ipinini ãkapanini. Teoso posotiire oerekini ãkapanira iua amianari inokari iua. Kãkiti: “Teoso ãkiri peerekari” iniko ãkapanira iua amianata.

⁵ Xesosi tiretari Mata, oĩtaro Maria, Arásaro pakini. ⁶ Ikenakotakasaakiri Arásaro amianatini, iua napapanikari ipi õti iuaxiti. ⁷ Eereka itxana imoianariakori:

–Iuaĩkana Xotéia tõpa masa.

⁸ Ininiã imoianariakori:

–Koerekareri, kitapani iuaã Xoteoakori nirekari kai soroã ikiporonakinii pite. Iuaritika pisatapanikako iuaãtaã? –itxarina.

⁹ Ininiã Xesosi:

–Pokamara tosi oara aua kãkiti parĩkauatini ãkapani. Pokamara tĩpokotakari kona mãkitita, kotxi atokatxi iopinikari ikinipoko. ¹⁰ Txamari ãkanõka tĩpokotakari mãkitita, kotxi atokatxi kamara !auari.

¹¹ Ininiã Xesosi:

–Amoianari Arásaro imakanãta. Nota õpirĩkariko iua –itxa Xesosi.

¹² Ininiã Xesosi moianariakori txa:

–Imakanãtiniã, erekaãpopekari uatxa –itxana.

¹³ Xesosi imarotari Arásaro ipinini, txamari imoianariakori uãkatari Arásaro atão imakini.

¹⁴ Ininiã Xesosi txana ninoa atão imarotininina ãkapani:

–Arásaro ipĩpe. ¹⁵ Erekapitikari iuaã nimaauakani, kotxi eereka hĩte auikariko nota sãkire. Masa iuaxiti. Maõkitari iua –itxa Xesosi.

¹⁶ Tomee Txiximo inakori misãkiretana apanakini Xesosi moianariakori:

–Masa iuakata apinini tĩkane.

Ikara atoko itxa isãkire, kotxi iuaxiti Xoteoakori nirekari okiniri Xesosi.

Kãkiti Auãki Inĩkitaãkari

¹⁷ Xesosi apokasaaki iuaxiti ipi ipi pakini õti napapeka. Ininiã iuasaaki Arásaroni kat-apeẽkaika. ¹⁸ Petânia Xerosareẽ takote. ¹⁹ Apanakini kãkiti apoka Mata, Maria pakinimoni. Ninoa moianatana, kotxi itarina !auaika.

²⁰ Mata kenakopiretari Xesosi apokaãpotini. Ininiã oa sari oaõkitiniri ãkapani. Maria kaikota oaãpoko ãki.

²¹ Xesosimoni Mata apokasaaki, otxari iua:

–Apiananiri, pite uai auaãkamako, kona nitari ipinamako. ²² Iuaritika nimarotapitikari, pamanaãkiti Teoso sikapitikai –otxa.

²³ Ininiã Xesosi txaro:

–Pitari iuaĩkana auapanikako.

²⁴ Ininiã Mata:

–Nimarotari itixi xipokini õti nitari iuaĩkana auapanikako. Ipĩkani õkitikiniua õti, iua õkitikaua –otxa Mata.

²⁵ Ininiã Xesosi sãkirusata:

–Nota ipĩkari õkitikakarirano nota. Kãkiti auãki inĩkitaãkarirano nota. Nota sãkire auĩãkari ipininiã, iuaritika iuaĩkana auapanikako. Kona ipinaika. ²⁶ Nota sãkire auĩãkari auapanikako iuaĩkana. Iipinaikako. Pauikatari ikara atoko nininiã? –itxa Xesosi.

²⁷ Ininiã Mata:

—Apiananiri, nauikapitikari. Teoso mereëkiti pitxaua. Teoso äkiri pitxaua. Teoso iokanatakiti itiximoni İkari pitxaua. İkara nauikapitika —ota txari iua.

Xesosi Txiapatini

²⁸ Eereka Mata sari oitaromoni. Oäkiritaro oa, mapara omisäkiretini İkapani.

—Koerekareri apope. Iua akiritai —otxa Mata.

²⁹ Maria kenakotari İkara inakasaaki, katimariä ökitikaua, iuamoni sa otxa oa. ³⁰ İuasaaki Xesosi ! apokapanika aapokotxiätaä. İkaikotapanika mitxi Mata apokiniätaä. ³¹ Maria katimariitika ökitikasaakiua, Xesosimoni osini İkapani, Xoteoakori, oaäpoko äki auakani, oa mİkapiritakani, sari oa tikini. Ninoa uäkatari akauarimoni osini otxiapatini İkapani.

³² Maria apoka Xesosimoni. Oätamatakasaakiri iua, iua apisatoö okapotoreëkaua. Otxari:

—Uai pauaäkamako, kona nitari ipinamako —otxa.

³³ Xesosi atamataro otxiapatini. Xoteoakori oakata apokakani txiapata apaka, ininiä Xesosi iteene matinaniuata äkixinireë. ³⁴ İua pimaäna:

—Nanipa hİkatatari? —itxa.

İniniä ninoa:

—Apiananiri, masa. Patariko iuaä —itxana.

³⁵ İuasaaki Xesosi txiapata.

³⁶ —Hätamatari Xesosi. İua tiretapitikari Arásaroni —itxa Xoteoakori.

³⁷ Ätikaka Xoteoakori txa:

—Mösiäreti kösiärepeka itxİkitakapeka. Atxİiti iua uai apokaäkamako, kona Arásaro ipinamako —itxana.

Xesosi Ökitikiniri Arásaroni

³⁸ İniniä Xesosi iteene matinaniuata äkixinireë. İuasaaki isa akauarimoni. Ninoa takari ipİkari kai auite äki. Kai auite itotaäka.

³⁹ İniniä Xesosi txari:

—Himakatxakari akauari tore —itxa.

Mata, Arásaroni itaro txari Xesosi:

—Apiananiri, ipiakapeka. İpi ipi öti pakinipeka ikatiko, ininiä patapasakari —otxari Xesosi.

⁴⁰ İniniä Xesosi:

—Nota säpiretapekai: “Nota säkire pauikiniä, pitikariko Teoso posotiire” —itxaro.

⁴¹ İniniä imakatzakarina kai. İuasaakipeka Xesosi ionakaäta iaxiti.

—Niri. Ereka, kotxi pikenakotari nisäkire. ⁴² Nimarotari ätipirika pikenakotiniri nisäkire. İkara atoko nitxa säkireta käkiti uai auakani kenakotiniri İkapani, kotxi ninirekari ninoa auikiniri pite iokanatinino nota uaimoni —itxa.

⁴³ İkara atoko inaäka atoko akirikatari:

—Arásaro, pökitikaua. Pipokİka.

⁴⁴ İniniä iuasaakipeka Arásaro pokİka. İmakinika İito mäkatxi mataä iapirikaäka. İtoö apaka iapirikaäka mäkatxi mataä.

İniniä Xesosi:

—Himakatxakari iapirikiko.

Xesosi Okaenetiko Pirena

(Mateo 26.1-5; Marko 14.1-2; Arókasi 22.1-2)

⁴⁵ Xoteoakori Mariamoni İkani itikari İkara atoko inakari, ininiä auikarina Xesosi Teoso äkiri ininiua. ⁴⁶ Ätikaka Xesosi kamakiti itikakani kanapiriä pariseoakorimoni. İsäpiretana Xesosi ökitikiniri Arásaro. ⁴⁷ İniniä pariseoakori, sasetotxi auiteakori pakini apotiitaua. İmisäkiretakana:

—Kİripa ate kama? İa kiki kamari itori posotiiretxi. ⁴⁸ Aäuiritiniäri iua İkara atoko ikamini, İkinipoko käkiti auikari iua säkire. İniniä iua tikini isana. İkara atoko ininiä, Homanoakori xİpokari Teoso misäkiretiko aikoti ate nakiti, ate tixine apaka —itxana.

⁴⁹ İuasaaki Kaipasi inakori sasetotxiakori auite apiatakari inakari iua. İtxana:

—Hİte kona kimarorepanikai. ⁵⁰ Erekarı äti kiki ipinini İkinimane mapinakani İkapani. İkara atoko ininiä, kona İkinipoko anirimane ipinako —itxa Kaipasi.

⁵¹ İkorakanani sasetotxi auite apiatakari itxaua Kaipasi. İa atoko itxa: “Xesosi ipinako Xoteoakori mapinakani İkapani. ⁵² Kona ninoa İkapaninanini ipinako. Teoso anaakori İarikakani İkapani apaka ipinako. İniniä iuasaakirako İua apotiitari İkinipoko ninoa. İniniä Teoso anaakori itxauanako,” itxa Kaipasi säkire.

⁵³ İuasaaki eereka İmapapiretarina Xesosi okinina tİkane. ⁵⁴ İkara atoko ininiä, Xesosi kona saika Xotéia tōpamoni. İsari Eparaiİ sitatxitimoni, äparaä makipakaniätaä takote. İuaä İkaikota İmoianariakorikata.

⁵⁵ Iuasaaki imatokoãpotarina Páskoia kiiniriti. Iuasaaki itomaneri Xoteoakori Xerosareë tōpa auakani sari Xerosareë sitatxitimoni. Iua kiiniri apisapanika, isana iuaã oerex-iniretiniuana ikapani. Iuasaaki amanaãrina Teoso imakatzakiniri maerekati ikamakitina.
⁵⁶ Iuaã Xoteoakori nitari Xesosi. Ninoakakarika ipimaãkakana:
 –Atauako kiinirimoni inapani atxiiti?
⁵⁷ Sasetotxi auiteakori, pariseoakori pakini paniãtapekari kãkiti:
 –Himarotakasaakiri Xesosi auiniãtaã, hããpiretauako ate, ininiã amaãkariko iua.

12

Maria Takari Kamariãro Xesosi Kitiã
(Mateo 26.6-13; Marko 14.3-9)

¹ Seisi õti Páskoia kiiniriti apisa, Xesosi sari Petánia sitatxitimoni. Iuaã aua Arásaro, Xesosi õkitikakiti Arásaro ipíkasaaki. ² Iuaã ikamaãka nipokori Xesosi ikapani. Mata sikari nipokori kãkitimoni. Iuasaaki Arásaro apanakinikata topãka Xesosikata. ³ Iuasaaki Maria kosekaro kamariãro koana. Oia atão nato kamakoro. Ipixini kiro ominani aua. Kona koketakoroni. Natonokara. Pakaronero, iuaritika okitakaro Xesosi kitimoni. Oiãkoã okaxipokari. Iuasaaki aapokotxi åki omarinokara itxaua.

⁴ Txamari Xotasi Isikariotxi inakori !apokaerekatari kamariãro Xesosi kitiã okitakini. Iua Xotasi Simão åkiri. Xesosi moianari itxaua, txamari imãkapiritariko Xesosi.

⁵ Ininiã Xotasi txari:
 –Kãkiti parĩkauata tresẽtosu pakini õti oia atoko inakaro kamariãro iamotiko ikapani. Kinirepa kona ovẽtxitaãka? Kinirepa txineiro mauakinitimoni !osika? –itxa Xotasi.

⁶ Ikara atoko itxa, kotxi kũitiriri itxaua. Iua nĩkataro ninoo txineirote. Iua itotapekari txineiro iĩtirĩkini. Iua limaãkatana txineiro mauakiniti.

⁷ Xesosi apakapiretari:
 –Kona hũtxitapero Mariapani. Onĩkataro kamariãro ia õti notamoni otakini ikapani, kotxi oxinikari nĩkatiko õti ikapani. ⁸ Minakati mauinakini auapikako hũtekata. Txama nota ! auaikako hũtekata –itxa Xesosi.

Xoteo Auiteakori Nirekari Okiniri Arásaro

⁹ Itomaneri Xoteoakori kenakopiretakasaakiri Xesosi Petánia sitatxitiã auini, ininiã iuaã isana Xesosi aõkitinina ikapani. Kona iuananini ninoo nireka aõkitinina. Arásaro Xesosi õkitikakiti apaka ninoo nirekari atamatinina. ¹⁰ Ininiã sasetotxi auiteakori nirekari Arásaro apaka okinina, kotxi kaiãopokori kãkiti auikari Xesosi sãkire Arásaro sãpiretakiti ikenakotakasaakina. Itakanaparina sasetotxiakori sãkire auikinina. ¹¹ Arásaro iuaãkana auiniã, ininiã itomaneri Xoteoakori asikaãpotari iauũtena, Xesosi sãkire auikinina ikapani.

Xesosi Xerosareë Apokaãpotini
(Mateo 21.1-11; Marko 11.1-11; Arókasi 19.28-40)

¹² Katimatĩnikata, itomaneri kãkiti Páskoia kiiniritimoni sikani, kenakopiretari Xesosi apokaãpotini Xerosareëmoni. ¹³ Ininiã Xerosareëkini sari aõkitinirina iua. Kinari tape anikana, Xesosi apiãkatakasaakina. Akirikatana:

–Peerekari Teoso. Teoso takari erekari Isaeo auakani auũtemoni, Apiananiri uãkaã ikarimoni –itxana.

¹⁴ Mitxipe Xesosi iokanatari imoianariakori xomẽta åkiri initinina. Ninoo apokasaakiri, iminarina Xesosimoni. Ininiã Xesosi topãka iua nopini. Iua nopini Xesosi sari Xerosareëmonikari. Kitxakapirĩka Teoso sãkire iõkatsopatakori txari:

¹⁵ Kãkiti Xerosareëkini kona hĩpĩkarauatape. Erepani hĩauũte. Xomẽta nopini iitopãkako, itxa Teoso sãkire kitxakapirĩka. Ikara iaõka apokapeka, kotxi Xesosi apoka xomẽta nopini.

¹⁶ Iuasaaki imoianariakori kona xinikari Teoso sãpiretakiti kitxakapirĩka auakari. Xesosi ipinaka atoko, õkitikaãkaua atoko, iuasaakiika ninoo xinikari ikara Teoso sãkire. Ininiã iuasaakiika imarotarina Teoso sãpiretakiti.

¹⁷ Mitxi kãkiti akauari takote auakani, ninoo itikari Xesosi õkitikiniri Arásaro. Ninoo iaripiretari Xesosi kamakiti. ¹⁸ Ininiã kãkiti apiãkatari Xesosi, kotxi ninoo kenakoentapekari Arásaro õkitikini. ¹⁹ Ininiã pariseoakori misãkiretakakaua:

–Hãtamata. Kiripa aposota akamini? Ikinimane kãkiti nirekari iua.

Ininiã pariseoakori xikotari Xesosi.

Åtikaka Krekoakori Nitari Xesosi

²⁰ Åtikaka Krekoakori apoka Xerosareëmoni Páskoia kiiniriti ikapani, kotxi ninoo nirekari Teoso imisãkiretinina. ²¹ Apokasaakina iuaãtaã, isana Piripimoni. Iua Petsãita aapokotxitikiri, Kariréia tōpa auakari. Ininiã apokasaakina Piripimoni, ipimaãrina:

–Ate nirekari Xesosi aaõkitini.

²² Ininiã Piripi sari Ætreemoni, isãpiretiniri İkapani. Eereka isana Xesosimoni. ²³ Ininiã apokasaakina, Xesosi txana ninoa:

—Kaiamapekari nota hıtari iaxitikiri sini niri tixinemoni ikinipoko erekari napakapini İkapani. ²⁴ Atão nisãpiretai. Nota kimi oki atoko. Kãkiti matakakaniãro oa, ãtika okinoka auapika. Pitakiniãro, opitxaka. Ininiã kaiãori oki aua. İkara atoko nota. Nimapikaniã, ininiã notanokara auari. Nipininiã, ininiã itomaneri kãkiti sari niri tixinemoni. ²⁵ Pite ãtipirika kaminiãri piteka nireëkitinoka, ininiã pinireëkiti xipokapitikako pitekata. Pite nireëkiti xipokiniã, nota sãkire pauikini xika, pite auapininiika txako Teosokata. ²⁶ Kãkiti nirekiniãri iparıkauatini nota İkapani, imoianatanoko. İua atoko ininiã, nota auiniãtaã İua apaka auako. Kãkiti parıkauatiniã nota İkapani, ininiã niri paxitariko İua.

Xesosi Sãpiretari İpinini

²⁷ Xesosi misãkiretari Teoso:

—Uatxa kona erekaxinireno, ininiã kiãtokopa nitxa nisãkire pitemoni? Atxiiti nipaniãtai: “Niri, pimakatzakinanoko nimapinakani İkapani.” İkara atoko !nipaniãtai, kotxi nipinini İkanira napoka İkorapokoritimoni. ²⁸ Ininiã niri, poerekari kãkiti ikinimane auite pininiãua —itxa Xesosi.

İuaaakipeka iaxitikiri txari:

—Noerekapekari kãkiti ikinimane auite nininiãua. Eereka İuaıkana noerekapanikariko İkara —itxa Teoso.

²⁹ Kãkiti İuaãtaã auakani kenakotari iaxitikiri sãkire. Txamari itxana:

—İkarokirauata.

Apanakini txari:

—Teoso nitirira sãkirauata İuakata —itxana.

³⁰ Xesosi txana ninoa:

—İkara sãkirauata kona nota İkapanini. Hıte İkapanira isãkirauata. ³¹ İposope ikini itixiti auakani misiritiko imaerekanina xika. İposope ikini itixiti auakani auite Satanasi inakori xipokiko. ³² Nota aamina İpiriãmitakari nopini nãkitikikosaaki, İuaaaki nikosekanako kãkiti notamonikari.

³³ İkara atoko itxa, kãkiti imarotiniri aamina İpiriãmitakari nopini ipinini.

³⁴ Apanakini kãkiti apakapiretari:

—Teoso sãkire kitxakapirıka iãkatsopatakori oerekaua Teoso mereëkiti ãtipirika auini. ! İpina. Txamari pite sãpiretaua ipinini aamina İpiriãmitakari nopini? Kipa İua ãitari iaxitikiri pisãpiretakiti? —itxana ninoa.

³⁵ Ininiã Xesosi:

—Tirikapi kamara atoko nitxa. Hıtekata nauakasaaki, noerekai hıte atão inakari. Uatxa tirikapi kamara hıtekata auapanika. Paıtiki nota sipe. Tirikapi auakasaaki, pauapikako tirikapi kamaraã. Ininiã İpiã kona apoka hıtemoni. Kãkiti mauikakaniãri nota sãkire, İkanõka İpokotakani atoko itxana. ! İmarotarina isinimonina. ³⁶ Tirikapi hıtemoni auakasaaki, hãuikariko İua sãkire. İkara atoko ininiã, “pokamarari anaakori” hıtxaua —itxa Xesosi.

İkara atoko inaka atoko isipeka. !İsãpiretari isinimoni.

Xoteoakori Kona Auikari Xesosi Sãkire

³⁷ Xoteoakori itikari ikinipoko posotiiretxi Xesosi kamakiti. İuaritika kona ninoa auikari İua sãkire. ³⁸ İkara atoko ininiã, kitxakapirıka Teoso sãkire sãpiretakari İsaıa inakori iãkatsopatakiti, İuaaaki apopeka. İsaıa txari:

Apiananiri, kãkiti !auikapiretari asãkire ninoamoni asãpiretakiti. ! Auikari piposotiire poereëkiti ninoamoni,

itxa İsaıa. ³⁹ İua atoko ininiã, Xoteoakori kona posotari auikiniri Xesosi sãkire, kotxi İuaıkana İsaıa txari:

⁴⁰ Teoso mõiãretakana ninoa. Kaikokii itxıkitakana. İtikakitina kona İikitetana ninoa. İkiiãna kona !imarotarina. Ininiã ninoa kona apokapaniko notamoni erekapeka ininina nitxıkitakini İkapani,

itxa Teoso İsaıa iãkatsopatakitiã.

⁴¹ Kitxakapirıka Xesosi uai apokini apisa İsaıa iãkatsopatari İa sãkiretxiti. İuaaaki Teoso oerekari İsaıa Xesosi posotiire, apaka İkinika Xesosi kamakiti tıkane.

⁴² İuaritika itomaneri Xoteo auiteakori auikari Xesosi sãkire. Txamari !İsãpiretarina apanakini, kotxi ninoa pıkarı pariseoakori. Pariseoakori imarotakasaakiri Xesosi sãkire auiãkani ininiuana, !auirıtaıkana ninoa İroini aiko Xoteoakori apotiitiniãtaãua. ⁴³ İua atoko ininiã, ninoa apia nirekari kãkiti İuikinina. Poiãoka ninoa nirekari Teoso İuikinina.

Xesosi İuaıkana Sãkirauata Xoteoakorimoni

⁴⁴ Xesosi itaparasãkireritika txari:

—Käkiti auikiniäri nota sãkire, kona nota sãkirenanini ninoa auika. Niri sãkire apaka auikana, kotxi iua iokanatanano nota uaimoni. ⁴⁵ Natamatakiri apaka atamatarì niri. ⁴⁶ Tirikapi atoko nitxa nìkasaaki kãkitimoni. Nota sãkire auiaãkani kona kaikota ipiaã. ⁴⁷ Käkiti nisãkire kenakotakani mauikakaniãri nisãkire, kona nimisiritari iua imaerekani xika. Kona kãkiti nimisiritini ìkapanini nina uaimoni. Nina kãkiti maerekani nimakatzakini ìkapanira.

⁴⁸ —Nota manirekakati, nisãkire manirekakati apaka, auapeka imisiritiko mereëkari. Nisãpiretakiti, iuarako itixi xipokini òtsaaki sãpiretari imisiritiko.

⁴⁹ —Notaka sãkire ! nisãpiretai. Niri sãkirena nisãpiretai. Niri iokanatanano nota uaimoni. Iua paniãtakiti isãpiretakiti nisãpiretai hìte. ⁵⁰ Nimarotari kãkiti auikiniãri niri paniãtakiti auapininiika itxako. Nota sãpiretari niri sipapiretinino iaõka.

13

Xesosi Arokari Imoianariakori Kiti

¹ Pãskoa inakori kiiniriti apisapanika, Xesosi imarotari paõtiki itixi itakanapini irimoni isini ìkapani. Iua tiretapikana kãkiti iua nakiti. Ninoa itiretiniritika ipinako Xesosi.

² Xesosi imoianariakorikata inipokotini apisapanika Satanasi sikanireòtapekari Xotasi Isikariotxi Xesosi imìkapiiritini ìkapani. Iua Xotasi, Simão ãkiri. Eereka inirekari isikiniri Xesosi imokaiakarimoni. ³ Xesosi imarotapekari iri sakiniri ikinipoko posotiiretxi Xesosimoni. Imarotapekari Teosomoni ipotorikini. Imarotapekari uamoni ikanapiriini. ⁴ Iuaritika inipokotaka atoko, òkitikaua. Imakatzakari imãka inopini auakari. Eereka ipomakitari mãkatxi mata nitiritxi parìka atoko ikamini ìkapani. ⁵ Eereka itakari àparaã tiitxi ãki. Ininiã arokana imoianariakori kiti. Eereka mãkatxi mataã ikaxipokaãpotana.

⁶ Simão Petro takote apokasaaki, Petro txari:

—Konapitini, Apiananiri. Ninitiri !pitxaua. Ininiã kona parokapiri nikiti —itxari.

⁷ Ininiã Xesosi:

—Uatxa kona pimarotari nikamakiti. Pimarotariko ãti òti.

⁸ —Koniko pite arokananiri nota kiti —itxa Petro.

Ininiã Xesosi:

—Pimauiritakaniãno pikiti narokini, ininiã kona nimoianari pitxaikauako —itxa Xesosi.

⁹ —Ikara atoko ininiã, kona nikitinani paroka. Niuako, nikii, imakinika paroka —itxa Petro.

¹⁰ Ininiã Xesosi:

—Kãkiti kipaãtakanua poirepe itxana. Itìpokotakasaaki, uaiãkana itxiko apoka uamoni. Iuasaaki ikitinokara arokaãka. Hìte himakinika poirepeka, kotxi nimakatzakapekari himaerekani. Àtinokara kona poireri, kotxi imaerekani auapanika.

¹¹ Xesosi imarotapekari iua mìkapiiritakari, ininiã itxa: “Himakinika poirepeka. Àtinokara kona poireri,” itxana.

¹² Ninoa kiti arokaãka atoko, ieretakari imãka inopinikiri. Ikanapiriã amesamoni. Ipimaãna:

—Kinirepa narokatari hìkiti? ¹³ Hìte akiriuãkatano nota “koerekareri.” Apaka hãkiriuãkatano “Apiananiri.” Atãopitikara hìsãkire, kotxi ikara inakari nitxaua. ¹⁴ Hiauìte, hòereëkiri nitxaua. Iuaritika narokari hìkiti. Hinitiri atoko nìparìkauata. Ininiã hãrokakitakauako, kãkiti nitiri atoko hininiua. ¹⁵ Noerekapekai hìte erekari hìkamini. Uatxa hìkamariko nota kamakiti atokokana. ¹⁶ Atão inakari nitxai. Nitiritxi iamotakori poiãori. Iauìte apiari. Apaka kãkiti iokanatakari apiata. Iokanatakiti poiãori. ¹⁷ Uatxa hìte imarotari atão inakari hìkamini. Hìkaminiãri, hìpoxokoniuaata.

¹⁸ —Kona himakinikani ikara atoko nitxai. Nimarotari nimereëkini, txamari ia Teoso sãkire iòkatsopatakori iaõka apokapitìkako. Itxari:

Notakata komiri nikakari, iuakarako kamari maerekati notamoni. ¹⁹ Uatxa iua himarotini apisapanika nisãpiretai hìte. Ininiã nisãkire iaõka apokasaaki, himarotariko Teoso ãkiri nininiua nota. ²⁰ Atão inakari nisãpiretai. Kãkiti nota iokanatakiti hìtemoni hãpakapiniã, nota apaka hãpakapa. Hãpakapiniãno nota, hãpakapari apaka nota iokanatakari hìtemoni —itxa Xesosi.

Xotasi Mìkapiiritiniri Xesosi

(Mateo 26.20-25; Marko 14.17-21; Arókasi 22.21-23)

²¹ Xesosi ikara isãpiretaãka atoko, ãkixinireë imatinianiuata. Itxana:

—Ari, àtikara hìte sauaki mìkapiiritano nota.

²² Ininiã imoianariakori atamatakakaua.

—Kiripa ikara atoko txatako? —itxana.

²³ Iuasaaki Xesosi moianari itiretakiti papìkaõtota uamoni. ²⁴ Ininiã iuasaaki Simão Petro ieki itxa isona uamoni. Ininiã Petro:

—Pipimaãri iua: “Īkiripa ikara atoko txatariko iua?” —itxari.

²⁵ Ininiã Xesosi tiretakiti pimaãri Xesosi:

—Kiripa ikara atoko txatai? —itxari.

²⁶ Ininiã Xesosi:

—Komiri niãkakiti nisikakitikarako ikara atoko txanoko.

Ininiã iuasaaki iãkari komiri. Eereka isikari Xotasi Isikariotximoni. Iua Xotasi Simão ãkiri. ²⁷ Xotasi komiri inikasaaki, Satanasi İroã ixiniremoni. Ininiã Xesosi txari Xotasi:

—Kinirão kamaka pinakiti pikamapoka —itxari.

²⁸ Iuaã auakani ãkixinireẽ:

—Kinirepa ikara atoko itxatari Xotasi?

²⁹ Xotasi nıkataro ninoa txineirote. Ininiã ninoa ãkixinireẽ:

—Atxiiti iokanatarı iua komiri iamotini İkapani.

Ātıpekana:

—Atxiiti iokanatarı iua matiınimoni txineiro isikini İkapani —itxanãtana ãkixinireẽna.

³⁰ Komiri apakapaãka atoko, inikaãka atoko isipe Xotasi. Mapiãpe inakasaaki.

³¹ Xotasi sipeka inaãka atoko, Xesosi txana ninoa:

—Uatxa kãkiti itikariko kãkiti itari iaxitikiri posotiire. ³² Kãkiti atamatariko Teoso posotiire imimoni auakari. Ininiã Teoso txari: “Erekapitikari namarite.” Iuasaaki Teoso oerekari kãkiti iua apokaerekatiniri imi. Ikara atoko ininiã, oerekari imi ereka inini.

³³ —Nitiretakini, paıtikinoka nauini hıtekata. Eereka hinitapiimano nota, txamari nota sinimoni kona hıposotari hısinı. Ikara atoko nitxapekana Xoteoakori. Iuatxikana uatxa nisãpiretai hıte. ³⁴ Ininiã uatxa nisãpiretaiko hıte Teoso paniãtakiti amaneri: “Hıtiretakakaua, nota hıte nitiretini atokokana.” ³⁵ Ikara atoko hıkaminiã, ikinimane imarotariko nota moianariakori atão hininiãua.

Xesosi Sãpiretari Petro Kipatiniri Iua

(*Mateo 26.31-35; Marko 14.27-31; Arókasi 22.31-34*)

³⁶ Simão Petro pimaãri:

—Koerekareri, nanipa pisatako?

Xesosi apakapapiretari:

—Nota sinimoni kona uatxa apakata hısinı. Ātı õtirako hısa hıte.

³⁷ Iuaıkana Petro:

—Apiananiri, kinirepa kona pitekata nisa uatxa? Nipinapitikamako pitekata —itxa Petro.

³⁸ —Atãopıtikani notakata pipinini pinirekaka? —itxari.

—Atão nisãpiretai. Ia İkanõkati patari sãkiruatini apisapanikako, “! Nimarotari iua,” pitxanoko ipi ãti pakinikata —itxa Xesosi.

14

Xesosi Pinitari Imoianariakori

¹ —Kona himatinaniuatape. Kona himaãkapeua. Hãuıkariko Teoso sãkire. Apaka hãuıkariko nota sãkire. ² Niri auiniãtaã aua kaiõpokori apokotxi. Ikara atoko iminakanımako, nisãpiretapımaıko hıte. Iuaã nisa hãuiniãtaã nikamini İkapani. ³ Iuaã nisa hãapoko nikamini İkapani. Eereka nıkanapiriã. Nanikai hıte notakata hãuini İkapani. Ininiã hıte apaka aua nota auiniãtaã. ⁴ Hıte imarotari nota sini kimaporiti —itxa Xesosi.

Teoso Kimapore Itxaua Xesosi

⁵ —Kona aimarotari pisinimoni. Natokopa ininiãpa aimarotatari pite sini kimaporiti? —itxa Tomee.

⁶ Ininiã Xesosi txari:

—Teosomoni sikari kimaporiti nitxaua. Atãonoka nisãkire. Atãonoka nikamakiti. Nitxıkitakari kãkiti auapıniniıka inini. Notamoni apokakarınanira sari nirimoni.

⁷ Atão nota himarotiniã, ininiã himarotariko niri apaka. Uatxa himarotapekari iua. Hãtamatapekari iua —itxa Xesosi.

⁸ —Apiananiri, poerekari piri atemoni. İkaranoka anireka —itxa Piripi.

⁹ Ininiã Xesosi:

—Piripi, kona mixaikani hıtekata nauama nota, iuaritika kona himarotapanıcano nota? Nota aõkitakari, aõkitapekari niri. Kinirepa, “Piri poerekaua,” pitxa? ¹⁰ Kona pite auıkapanıkarı niri auini nota ãki? Nota apaka aua niri ãki.

—Hıtemoni nisãpiretakiti kona nota sãkirenanini. Niri paniãtakıtira. Niri nota ãki auakari iuara kamarı ikinipoko nikamakiti. ¹¹ Hãuıkariko nisãkire niri ãki nauini. Niri nota ãki auini apaka hãuıka. Hımauıkakaniãri nisãkire, ininiã hãuıkarı nikamakiti. ¹² Atão nisãpiretai. Nota sãkire auıãkani kamariko nota kamakiti atokokana. Apaka ninoa kamakiti apiata, kotxi

nirimoni nisako. ¹³ Nota uākaā hamanaākiti nota sikai hīte. Ikara atoko ininiā, oerekaāka niri ereka ininiua. ¹⁴ Ikinipoko nota uākaā hamanaākiti, nota sikapitikai hīte. ¹⁵ Nota hīretiniā, hīkamariko nīpaniātakiti —itxa Xesosi.

Erekari Matamatakoti Apokaenetini

¹⁶ —Namanaāriko niri āti kōtākikarerer iokanatinī hītemoni. Iuakara auapininiika txako hītekata. ¹⁷ Iua Erekari Matamatakoti atāonani ina sākiretakari. Kākiti Teoso sākire mauīākani kona apakapari iua, kotxi kona atamatarina iua. Apaka kona imarotarina iua. Hītepekana imarotari iua, kotxi hītekata aua. Iua aua hīte ākixinireē.

¹⁸ —Ininiā kona nitakanapai hīte. Nikanapiriāpanikako hītekata nauini ikapani. ¹⁹ Paītiki atoko kākiti ikoraxiti auakani kona atamataikanoko nota. Hīte atamatanoko. Hīte auapanikako, kotxi nota apaka auapanikako. ²⁰ Iuaīkana auapanika ninakasaaki, himarotariko niri āki nauini. Hīte apaka auako nota ākixinireē. Nota aua hīte ākixinireē apaka. Txapaniko.

²¹ —Iua nisākire auīākari nīpaniātakiti kamakarira tiretano nota. Nota tiretakari niri tireta. Nota apaka tiretari iua nitiretakiri. Ikara atoko ininiā, noerekariko apikomoni nisākire iuamoni.

²² Āti Xotasi, kona Xotasi Isikariotxi inakorini, txari Xesosi:

—Kinirepa atenani poerekari Teoso ākiri pininiua? Kinirepa kona poerekari ikara apanakinimoni? —itxa.

²³ Xesosi apakapapiretari:

—Kākiti tiretiniāno, ikamari nisākire iaōka. Niri tiretariko iua. Niri, nota pakini apokako iuamoni. Iuakata aāuako. ²⁴ Nota matiretakani kona nīkatari nisākire. Nisākire hīkenakotakiti kona nota sākireni. Niri niokanatakiri sākirera.

²⁵ —Hītekata nauakasaaki, ikara sākiretxi nisāpiretai. ²⁶ Niri iokanatariko kōtākikarerer, Erekari Matamatakoti inakori hītemoni. Erekari Matamatakoti oerekaiko hīte ikinipoko niuākaā. Himaxinikaretakiti iuaīkanako iua oerekaiko. Ikinipoko nisāpiretakiti oerekaiko.

²⁷ —Nisini apisapanika nikamaerekaxiniretai. Nota xinire ereka inini atokotxikana nikamaerekaxiniretai. Nisākire mauīākani kona posotari kamaerekaxiniretiniri āti nota kamaerekaxiniretini atoko. Kona himaākapeua. Kona hīpīkarauatape. ²⁸ Hīte kenakotapekari nisākire ia atoko ninini hīte: “Nisapitikako, iuaritika nikanapiriāpanikako hītekata nauini ikapani.” Hīretiniāno, hīpoxokoniuata nirimoni nisini ikapani, kotxi poiāori nitxaua nota. Apiatakari itxaua niri. ²⁹ Ikara nisāpiretakiti apokini apisa nisāpiretai hīte. Ikara nisāpiretakiti iaōka apokasaaki, hīte auikari nisākire. ³⁰ Apikomoni iteene nisāpiretinii ! apakata. Ikorapokoriti auakani auite Satanasi inakori paītiki apokako notamoni, iuaritika liposotari itxīkitakinino ipaniātakiti nikamini. ³¹ Iteene ninirekari imakinika kākiti imarotini nitiretiniri niri. Apaka nikamari ikinipoko niri paniātakiti —itxa Xesosi.

Eereka Xesosi txari:

—Maōkitikaua. Masipeka.

15

Xesosi Atāo Itīkaretsa Itxaua

¹ Ininiā eereka Xesosi txari:

—Atāo itīkaretsa nitxaua nota. Itīkaretsa nīkatakari itxaua niri. ² Isauakaro otsa marito, kotxi kona kariro oa. Otsa iriuatarokpekana iua kisauakaro omapotōkirenoka, iteene oriuatini ikapani. ³ Hīte poirepeka hītxa. Nisākirenanira oeretai hīte. ⁴ Okanotsa atokokana hītxaua. Nota itīkaretsa atoko nitxaua. Ininiā hīpitxaka notamoni. Ikara atoko hininiā, hīkaikota notakata. Ininiā nota kaikotapika hītekata. Ikara atoko hininiā, hīriuapitika. Ikara atoko hininiā, ekeraninira hīkama. Hīriuatinīā, ininiā erekari hīkama. Notamoni himapitxakaniā, kona hīposotari hīkaminiri erekari. Kona hīriuata, kotxi nota tapara ! apokari hītemoni. !Kari hīte. Okanotsanoka auiniā, kona kariro. Notakata hāuapininiika hininiā, amātiiri auapitika.

⁵ —Nota itīkaretsa nitxaua. Hīte nikanotsa hītxaua. Notamoni pitakakari ātipaniriko oripaniko. Notakata himauakaniā, kona xapitiki kona hīposota hīkamini. ⁶ Nota sākire mauīākati okanotsa ipinakari atoko itxa. Txiarokakari atoko itxa. Kākiti apotiitari okanotsa ipinakari. Eereka okari xaminaā arikinī ikapani. Iua atokokana aīri Teoso misiritari isākire mauīākani. ⁷ Notamoni hīpitxakiniā, hīkenakotinīāri nīpaniātakiti, hinirekaākiti hamainiāno, ininiā nīskapitikai hīte. ⁸ Ito hīriuatinīā, kākiti txariko niri: “Peerekai.” Hīte iriuatinīā, ininiā hīte atāo oerekariko apanakinimoni atāo nimoianariakori hininiua.

Hīretakakiniua Pirena

⁹—Niri tiretinino atokotxikana, nitiretai hite. Kona hitakanapapiri nitiraõki. ¹⁰Hikipitiniãri nisãkire, ininiã nitiraõki kaikotapika hitekata. Nota atokokanerako hitxako. Nota k̄ipitari niri sãkire, ininiã niri tiraõki kaikotapika notakata.

¹¹—Ikara atoko nitxai hite, nipoxokoni hitemoni kaikotini ikapani. Ikara atoko ininiã, poxokonitxi xãpokako h̄xiniremoni. ¹²Ia nipaniãtakiti: “Nota tiretinii atokotxikana, hitiretakauako.” ¹³Pipiniã pimoianariakori mapinakani ikapani, ininiãkara iteene pitiretana ninoa. Ikara tiraõkitxi apiatakari. ¹⁴Nipaniãtakiti h̄kaminiã, atão nimoianariakori hitxaua. ¹⁵Uatxa !nixinikaikari nitiritxi hininiua, kotxi nitiritxi kona imarotari iauite xinikakiti. Uatxa atão nimoianariakori hitxaua, kotxi iknipoko niri oerekakiti nisãpiretapekai hite. ¹⁶Kona h̄teni mereẽno nota. Notara mereẽi hite h̄riuatini ikapani. Ninirekari h̄riuatini. Ninirekari kãkiti nota sãkire h̄sãpiretakini txipokori maxipokakati atoko ininina. Ikara atoko ininiã, hamanaãriko niri hinirekakiti nota uãkaã, ininiã niri sikapitikai hite. ¹⁷Ia nipaniãtai hite hitiretakiniua.

Xesosi Moianariakori Omanatakani

¹⁸Iuaikana Xesosi pinitari imoianariakori:

—Apanakini omanataiko hite. Ininiã h̄xinikariko ia nisãkire. Merepitipanika ninoa omanatano nota. ¹⁹Teoso sãkire himauikakaniã, Teoso sãkire mauiaãkani tiretapitikai hite, kotxi ninoa atoko hitxa. Txamari ninoa nakiti ! hitxaua. Hite kona ikoraxiti auakani ! hitxaikaua. Nimereẽpekai hite. Nimakatzakapekai atão parikati h̄kamini ikapani. Iua xika Teoso sãkire mauiaãkani omanatai. ²⁰H̄xinikariko ia nisãpiretakiti. Nitiritxi poiãoka itxaua. Iauite apiatakari itxaua. Kãkiti misiritiniãno nota, nota atokokanerako imisiritai hite apaka. Nisãpiretapekai hite. Nota sãkire apamonikiniãna, ininiã hite sãkirekanera ninoa apamonika apaka. ²¹Imisiritaina, kotxi hite auikari nota sãkire. Himisiritãkako, kotxi kona imarotarina niokanatakiri. ²²Nota uai mapokakaniã, nimasãkirauatakaniã, kona imarotarina maerekati ikamakitina. ²³Nota omanatakani apaka omanatari niri. ²⁴Niposotiire nikamakiti apanakini kona posotari ikamini. Noerekari ninoa niposotiire, ininiã uatxa maerekati auari ninoamoni, kotxi !auikari nota sãkire. Ikinika itikapekari posotiiretxi nikamakiti, iuaritika ninoa omanatano nota, niri apaka.

²⁵—Uatxa apopeka Teoso sãkire iaõka. Teoso sãkire iõkatsopatakori txari:

Maxikatilka ninoa omanatano.

²⁶Kõtãkikarerri kona apokapanika. Niokanatariko nirikata auakari, Erekarri Matamatakoti. Iua potorika niri auiniãtaã. Atão ene sãkiretakari itxaua. Isãpiretariko nota sãpiretakiti, nikamakiti pakini. ²⁷Ininiã hite apaka sãpiretariko nota kamakiti, nisãpiretakiti pakini apanakinimoni, kotxi merepitipanika nipotorikasaaki hite auapika notakata. Ininiã himarotapitikano nota.

16

¹Xesosi sãkirauatapanika:

—Ikara atoko nitxai hite atão himarotini ikapani, ininiã kona hitakanapari nisãkire. ²Ãti õti Xoteo auiteakori omitikenataiko hite aiko Xoteo apotiitiniãtaãua. Ãti õti apokapanikako ia nisãpiretakiti. Iuasaaki ninoa xinikariko hite okiko ereka inini. Ninoamoni hite okiko Teoso paniãtakiti iaõka. Txamari kona Teoso paniãtari ikara atoko inakari. ³Ikara atoko inakari ikamanako, kotxi kona imarotano nota, niri pakini. ⁴Ikara atoko nitxai hite, kotxi ikara atoko inakari apokasaaki, h̄xinikariko nisãkire. Merepanika nimoianatakasaaki, kona ikara atokoni !nitxai hite, kotxi nota auapanika hitekata —itxa Xesosi.

Erekari Matamatakoti Parika

⁵Xesosi sãkirauatapanika:

—Paĩtiki nisipekako niokanatakirimoni. Kona h̄pimaãpeno: “Nanipa pisa?” Kona hitxapeno. ⁶Ikara atoko nisãpiretapekai, ininiã uatxa kona erekaxinirei hite. ⁷Iuaritika nitxai hite atão nisãkire. Apiaerekata nota sini. Nota masikaniã, iua Kõtãkikarerri kona apoka hitemoni. Nisiniã, niokanatariko iua hitemoni. ⁸Iua Kõtãkikarerri apokasaaki, oerekariko ikorapokoriti auakani maerekani. Oerekariko Teosonoka tx̄ikitakiniri kãkiti atão inakari ikamini. Oerekariko kãkiti misiritiko imaerekani xika. Iua Erekarri Matamatakoti oerekariko ikara atoko inakari. ⁹Iua oerekariko maerekati kãkiti kamakiti, kotxi ninoa ! auikarina nisãkire. ¹⁰Iua oerekariko Teosonoka tx̄ikitakiniri kãkiti atão inakaranoka ikamini, kotxi nota sipekako nirimoni. Nota !auaika uai noerekarauatini ikapani. Paĩtiki kona hite atamataikanoko nota. ¹¹Iua Erekarri Matamatakoti oerekariko maerekati kamakani misiritiko, kotxi ikorapokoriti auakani auite Satanasi inakori misiritiko mereẽkapeka.

¹²—Auapanika apikomoni nisãpiretakiti t̄kane hitemoni. Txamari !apakata apikomoni nisãpiretiniã, kotxi !himiteenekari apikomoni nisãpiretiniã. ¹³Iua Erekarri Matamatakoti,

atãoene sãpiretakari, iua Ikasaaki, iua oerekaiko ikinipoko atão sãkiretxiti. Kona iua sãkireni isãpiretaiko hïte. Iaxiti auakari sãkirera, niri sãkirera, isãpiretaiko. Isãpiretaiko hïte katana Teoso kamakiti tũkane apaka. ¹⁴ Erekaru Matamatakoti oerekaiko ereka ninini, kotxi iua apakapariko nisãkire, eereka isãpiretaiko hïtemoni. ¹⁵ Ikini sereti niri nakiti nota nakiti apaka. Ininiã nota txai hïte, “Erekaru Matamatakoti apakapariko nota nakiti. Ininiã eereka isikai hïtemoni himarotini ïkapani.”

Matinanitxi, Eereka Poxokonitxi Apoka Inini

¹⁶ –Paĩtiki kona hãtamataikanoko nota. Eereka iuaĩkana hãtamatanoko, kotxi nirimoni nisako –itxa Xesosi.

¹⁷ Imoianariakori txanãta:

–Kiripa itxanãta Xesosi? –Paĩtiki kona hãtamatanoko. Eereka iuaĩkana hãtamatanoko nota, kotxi nirimoni nisako.” Kiripitipa itxanãta Xesosi? –itxana imoianariakori.

¹⁸ –Kirisaakipa apokatako ikara inaãtakiti? Kiripa ikara isãkire: “Paĩtiki,” Xesosi sãkire atemoni? Ikara isãkire kona ate imarotari xatiki –itxanãtana.

¹⁹ Xesosi imarotari ninoo nirekari ipimainiri iua. Ininiã Xesosi txana:

–Hïte nirekari hïpimainino nota, kotxi nisãpiretai paĩtiki kona hãtamatinino, eereka iuaĩkana hãtamatanoko. ²⁰ Atãopitikara ia atoko nitxai hïte. Hïtxiapatako. Himatinaniuatako. Iuasaaki apanakini kãkiti ïkorapokoriti auakani poxokoniuatako. Himatinaniuatako, eereka hïpoxokoni apokapitikako.

²¹ –Hïte sito atoko hïtxauako. Sito oãuaenetanapanoka onakasaaki, oa omaãkapekuaa. Imi auaka atoko, kona oxinikaikari otsii. Poxokope otxa, kotxi auapeka amarini. ²² Ikara atoko itxako hïtemoni apaka. Uatxa kona erekaxinirei hïte. Iuaĩkana naõkitapanikaiko hïte. Iuasaakirako hïpoxokoniuatako. Iuasaaki kãkiti kona posotari ixipokiniri hïpoxokoni. ²³ ïkora õti apokasaaki, kona hïpimaãikano nota. Iuasaaki hamanaãri niri hinirekakiti nota uãkaã, ininiã iua sikai hamanaãkiti. ²⁴ Uatxapiima kona hamanaãpanikari hinirekakiti nota uãkaã. Hamanaãniãri, hãpakapapitikariko. Ininiã hïpoxokoni apokapitikako hïtemoni.

Imoianariakori Auikari Xesosi Sãkire

²⁵ –Mitxi niomaãtari ipixini nisãkire, kãkiti mimarotakaniri ïkapani. ãti õti kona niomaãtakari atão. Nisãpiretaiko niri iteene himarotini ïkapani. ²⁶ Iuasaaki hinirekakiti hamanaãno nota uãkaã. Kona nota amanaãri niri hinirekakiti isikinii. Hïte amanaãniãri, isikapitikai. ²⁷ Niri tiretai hïte, kotxi hïte tiretano nota. Hïte auikari iua iokanatinino nota uaimoni. Ininiã iua tiretapitikai hïte. ²⁸ Niri iokanatanoko ïkorapokoriti. Paĩtiki nitakanapari ïkorapokoriti nirimoni nisini ïkapani –itxa Xesosi.

²⁹ Imoianariakori txari:

–Uatxa pisãkire atãoenepitika. Sãkiretxi piomaãtakiti kona auaika, kotxi uatxa aimarotari pisãkire. ³⁰ Uatxa aimarotari pite imarotini imakinika. Kona apakata apikomoni apimarauatini, kotxi uatxa aũikari Teoso auinimoni ïkari pininiua pite –itxarina Xesosi.

³¹ Xesosi apakapapiretana:

–Uatxa hãuikari nisãkire –itxa Xesosi.

³² –Uatxa Teoso ketotini manapi apope hãrikini ïkapani. Imakinika hïte takanapanoko. Notanani kaikota. Iuaritika kona notanani kaikota, kotxi niri aua notakata. ³³ Ikara atoko nisãpiretai, kotxi ninirekari erekaxinirepeka hinini. ïkorapokoriti hãuakasaaki, kãkiti misiritapitikai hïte. Iuaritika hïpoxokoniuatako, kotxi nota tapara apiata. Maerekanitxi tapara poiãoka –itxa Xesosi.

17

Xesosi Misãkiretari Teoso Iuaka ïkapani

¹ Xesosi ionakaãta iaxiti. Iuasaaki isãpiretari ia isãkire Teosomoni:

–Niri, piketotini manapi apopeka. Pisarikiko piotximere iuaĩkana nota pamaritemoni, ininiãkara nota oerekaru kãkiti pite iotximere, ² kotxi pite sikano nota piposotiire ikinimane aũte nininiua ïkapani. Ininiã nikamari ikinimane kãkiti pite sikakini auapininiika ininina ïkapani. ³ Kãkiti imarotiniã pite, imarotiniãno nota Xesosi Kristo piokanatakiti, ninoo auapininiika, kotxi pite atão Teoso pitxaua. Pitenanira atão Teoso pitxaua. ⁴ Noerekari ïkorapokoriti auakani pite Apiananiri pininiua, kotxi nikamapekari parĩkatxi pipaniãtakiti. ⁵ Ininiã niri, uatxa piotximere pisikano, pitemoni napokasaaki. Itixi kamiko apisapanika pitekata nauakasaaki, niotximere aua. Iua niotximeretxikana pisikano iuaĩkana –itxa Xesosi.

Xesosi Misãkiretari Teoso Imoianariakori ïkapani

⁶ Xesosi sãkirauatapanika irimoni:

—Nota sãpiretari piuãka kãkitimoni, ninoa itixi auakani notamoni pisikakini. Mitxi pite nakitiakori itxauana. Pite sikana ninoa notamoni, ininiã ninoa kamari pisãkire iaõka. ⁷ Uatxa imarotarina ikinika napakapakiti pite sikinino. ⁸ Nisãpiretapekana ninoa pisãkire, ininiã auikarina pisãkire. Imarotapitikarina pitemoni nipotorikini. Ininiã auikarina pite iokanatinino nota kãkitimoni.

⁹ —Nimisãkiretai pite ninoa Ìkapani. Kona nimisãkiretai nota sãkire mauïãkani Ìkapani. Nimisãkiretai ninoa notamoni pisikakini Ìkapaninoka, kotxi pite nakitiakori itxauana. ¹⁰ Ikinika nota nakiti pite nakiti itxaua apaka. Ikinika pite nakiti nota nakiti itxaua. Ninoa pisikakini oerekari apanakini Apiananiri nininiua. Ininiã iuasaaki apanakini txari: “Peerekari Xesosi.” ¹¹ Uatxa !nikaikotaiakako Ìkorapokoriti. Txamari ninoa kaikotapanika uai. Nota sipekako pitemoni, ininiãkara pinãkatana ninoa notamoni pisikakini, kotxi pite niri pitxaua, erekarinoka kamakarii pite, kaposotiirei pite. Pite sikaposotiiretano nota. Ninirekari ninoa ãtika atoko ininiuana, nota pitekata ãtika atoko aniniua atokokana. ¹² Itixi ninoakata nauakasaaki, ninãkatana ninoa pite uãkaã, piposotiire. Ninoa notamoni pisikakini ninãkatapitika. Kona ãtika nomaiãta. Xotasinoka pipinanaka, kotxi pipinanakani ãkiri itxaua iua. Ipipinanaka, kotxi kitxakapirika Teoso sãkire iõkatsopatakori sãpiretapekari ikara apokini apisapanika.

¹³ —Uatxa nota sipeka pitemoni. Ikara atoko itxa nisãkire kãkitikata nauapanika ninakasaaki, nota poxokoni ninoa ãkixinire auini Ìkapani. ¹⁴ Nisikapekari pisãkire ninoamoni, ininiãkara nisãkire mauïãkani omanatana ninoa, kotxi nisãkire auïãkani Ìkorapokoriti auakani litxaukauan ninoa. Iua atokotxikana kona Ìkorapokoriti auakarino nota. ¹⁵ Nimisãkiretai pinãkatamina ninoa, Satanasi mamaïkakanina Ìkapani. Kona ninirekari mauikareni sauaki auakasaakina pimakatxakinina. ¹⁶ Ìkorapokoriti auakani litxauana. Nota iua atokotxikana. ¹⁷ Pimakatxakana ninoa pite nakitiakori Ìkapani. Pisãkireã pimakatxakana, kotxi pisãkire atão. ¹⁸ Nota pisãkire mauïãkanimoni piokanatini atokokana, niokanatana ninoa pisãkire mauïãkanimoni. ¹⁹ Ninoa Ìkapani notaka nisikaua pitemoni pinirekakiti nikamini Ìkapani. Ininiãkara ninoaka apaka sikaua pitemoni pinirekakiti ikaminina Ìkapani.

Xesosi Misãkiretari Teoso Isãkire Auïãkani Ìkapani.

²⁰ —Kona nimoianariakorinani Ìkapanini nimisãkiretai pite. Apaka nimisãkiretai imakinika nisãkire auïãkani Ìkapani, katana nimoianariakori sãkire auïãkani Ìkapani apaka. ²¹ Nota amanaãi ninoa xinire ãtika atoko ininina Ìkapani. Nota aua pite ãkixinire. Pitepekana aua nota ãkixinire. Iua atokotxikana ate aua ninoa ãkixinire. Ikara atoko ininiã, nota sãkire mauïãkani Ìkorapokoriti auikapanikariko pite iokanatinino nota. ²² Ininiã erekari notamoni pisikakiti, piotximere, nisikapekana ninoa. Ininiã ninoa xinire ãtika atoko itxauana, ate ãtika aniniua atokokana itxana ninoa. ²³ Nota aua ninoa ãkixinire. Pite aua nota ãkixinire. Ikara atoko ininiã peerekari, kotxi ãtika itxaua ixinirena. Ikara atoko ininiã nisãkire mauïãkani imarotariko pite iokanatinino nota. Apaka ninoa imarotari nota pitiretini atokotxikana, pitiretinina ninoa apaka.

²⁴ —Niri, ninirekari ninoa notamoni pisikakini notakata auini Ìkapani. Ninirekari ninoa atamatiniri ikinipoko erekari notamoni pisikakiti, niotximere pisikakiti, kotxi pite tiretano nota itixi kamiko apisa. ²⁵ Niri, atão inakarinoka kamakarii pite. Kãkiti Ìkorapokoriti auakani kona imarotai pite. Iuaritika nota imarotai pite. Ninoa imarotari pite iokanatinino nota kãkitimoni. ²⁶ Nisãpiretapekai pite kãkitimoni. Apikomoni nisãpiretapanikariko pisãkire. Ininiã pitiraõki notamoni auakari ninoamoni auako. Ininiãkara nota aua ninoa ãkixinire.

18

Xesosi Maïkiko Pirena

(Mateo 26.47-56; Marko 14.43-50; Arókasi 22.47-53)

¹ Teoso imisãkiretaka atoko, Xesosi Ìpiriãtari sãtoãri Setorõ inakori. Iuaã aua amãtiirinape. Ininiã Xesosi sari iuaã imoianariakorikata. ² Xotasi, Xesosi mikapiritakari, imarotari Xesosi imoianariakorikata itotiniri iuaãtaã isinina. ³ Ininiã Xotasi sari amãtiirinapemoni ãtikaka sotatoakorikata, Teoso misãkiretiko aikoti nãkatakankata. Sasetotxi auiteakori, pariseoakorikata sari iuaãtaã apaka. Ikeekotxi, tirikapi pakini anikana. ⁴ Xesosi imarotari ikinika iuamoni ikamakitinã ñkane. Imarotapekari ninoa nirekakari okinirina iua. Iuaritika isari ninoamoni. Ipimaãna:

—Kiripa hinitanãta?

⁵ Ininiã ninoa:

—Xesosi Nasareekirira anita —itxana.

Ininiã Xesosi:

—Iuakarano nota.

Iuasaaki Xotasi, Xesosi mīkapiritakari, aua ninoakata. ⁶ Xesosi “iuakarano nota” in-akasaaki, ospikana, ixitiye irika itxana.

⁷ Iuaīkana Xesosi pimaāna:

–Kipa hinitanāta?

–Xesosi Nasareekirira –itxana.

⁸ –Nixxapekai, iuakarano nota. Nota hinitiniā, hāuiritana nimoianariakori sini –itxa Xesosi.

⁹ Ikara atoko itxa, mitxi isākire apokini ikapani. Mitxi itxari Teosomoni: “Kona nomaiātana nimoianariakori notamoni pisikakini. Kona ātika Inomaiāta.”

¹⁰ Eereka Simão Petro inakori kosekari iouata auīte. Isauakari Maoko inakori ikikomoni ikīpita. Iua sasetotxi auīte apiatakari nitiri.

¹¹ Xesosi txari Petro:

–Pitakarouata auīte omata āki. Apakatapitika nota kaminiri niri paniātakiti. Niri nirekapititari natatsiitirini nipinini kākiti ikapani –itxa Xesosi.

Xesosi Anasi Apisatoō

¹² Eereka sotatoakori, apaka sotatoakori auīte, Teoso aikote nīkatakani pakini māikari Xesosi. Iaxirika itxarina. ¹³ Merepanika anikarina Xesosi Anasi inakorimoni. Iua Anasi Kaipasi imatikiri. Iuasaaki iua Kaipasi sasetotxi auīte apiatakari itxaua. ¹⁴ Iua Kaipasi ōtākikapekana Xoteo auīteakori. Ia atoko itxa isākire: “Apiaerekata āti kiki ipinini ikinimane maplkani ikapani,” itxa Kaipasi ōtākikare.

Petro Kipatari Xesosi Imarotini

(*Mateo 26.69-75; Marko 14.54, 66-72; Arókasi 22.54-62*)

¹⁵ Simão Petro, āti Xesosi moianari pakini asikatikinitari Xesosi Anasi aapokomoni anikikosaaki. Mitxipeka sasetotxiakori auīte apiatakari aōkitapekari iua āti Xesosi moianari. Ininiā iua iroā sasetotxiakori auīte apiatakari aapoko Xesosikata. ¹⁶ Petro kaikota iporikiti itore takote. Eereka imoianari sari iporikiti. Imisākiretarou Ironakikoāta tore nīkataro. Ininiā oāuiritari Petro iroini.

¹⁷ Oa txari Petro:

–Pite ikira Xesosi moianarikai? –otxari.

–Kona –itxaro.

¹⁸ Iuasaaki katxīkareri aua, ininiā nitiritxiakori, Teoso misākiretiko aikoti nīkatakani pakini kamari xamina. Xamina itinipoki irokanātauana. Petro ninoakata aua iuasaaki.

Xesosi Sasetotxiakori Auīte Apisatoō

(*Mateo 26.57-68; Marko 14.53-65; Arókasi 22.54, 66-71*)

¹⁹ Iroko āki Xesosi sasetotxi auīteakorikata aua. Ininiā sasetotxiakori auīte apiatakari misākiretari Xesosi:

–Pisāpiretano pimoianariakori, pisākire poerekakiti pakini –itxari.

²⁰ Xesosi apakapapiretari:

–Ātipirika nisāpiretapikai hīte. Nitotari noerekarauatini aiko Xoteo apotiitiniātaāua, Teoso misākiretiko aikotiā apaka. Kona nikipatari nisākire. Ikinipoko kenakotari noereēkiti.

²¹ Ininiā kinirepa hīpimaāno? Hīpimaāna nisākire kenakotakani. Ninoara imarotari noereēkiti –itxa Xesosi.

²² Xesosi ikara atoko isākirauatasaaki, Teoso misākiretiko aikoti nīkatakari aritoōtari Xesosi.

–Atokope. Kona ikara atoko pitxape sasetotxi auīte apiatakarimoni –itxari.

²³ Ininiā Xesosi:

–Nikerokiniāri nisākire, pisāpiretano nikerokakiti, txamari kona nikerokari. Atāo nisākire, ininiā kinirepa piaritano? –itxa Xesosi.

²⁴ Eereka Anasi iokanatarari Xesosi iaxirikiko. Eereka anikarina sasetotxi auīte apiatakarimoni, Kaipasi inakorimoni.

Iuaīkana Petro Kipatari Xesosi Imarotini

(*Mateo 26.71-75; Marko 14.69-72; Arókasi 22.58-62*)

²⁵ Petro iporikiti aua iuasaaki. Ininiā apanakini pimaāri:

–Ikira kiki moianarikai pite? –itxarina.

Ininiā iua:

–Kona –itxa.

²⁶ Āti sasetotxi auīte apiatakari nitiri, Petro kisauakakīpitatakiti nirimane iua. Iua pimaāri Petro:

–Pitekani amātiirinapeātaā nitika iuakata? –itxari.

Iuaīkana Petro txari:

—Kona notani.

²⁷ Iuasaakipeka patari sākirauata. Iuasaakipeka mitxi Xesosi sãpiretakiti iaõka auape.

Xesosi Pirato Apisatoõ

(*Mateo 27.1-2; Marko 15.1-5; Arókasi 23.1-5*)

²⁸ İkanõkapanika ninoa takanapari Kaipasi aapoko, Anikarina Xesosi Homano auĩte auinimoni, kãkiti misiritiko imarotiko pakitamoni. Xoteo auĩteakori kona nirekari aiko ãki İroinina. Kona inirekarina ãti uãka takote iitopãkinina. ãti uãka takote iitopãkiniãna, kona apakata nipokori inikinina Pãskoã kiiniritiã. ²⁹ İniniã Pirato pokıka porikiti Xoteo imisãkiretini İkapani. İniniã Pirato txana ninoa:

—Kixikapa himinatari ikira kiki notamoni? —İtxana.

³⁰ İniniã ninoa txari:

—Maerekati imakamaniã, kona ate minari iua pitemoni.

³¹ İniniã Pirato:

—Hĩteka xinikari maerekati ikamakiti, ininiã ixika auiniã hĩteka misiritari iua. Hĩkiomaneakorini sãkire iaõka himisiritari iua —İtxa Pirato.

Xoteoakori apakapapiretari:

—Kona apakata aõkiniri iua, kotxi hĩte Homanoakori lauritaau aõkiniri kãkiti. Pitenokara apakata okiniri iua —İtxana.

³² İkara atoko inaãka, mitxi Xesosi sãkire iaõka apokini İkapani, kotxi mitxi isãpiretapekari aamina İpiriãmitakari nopini ipinini.

³³ Pirato İroã kãkiti misiritiko imarotiko pakita ãki iuaĩkana. İpĩkapiretari Xesosi. İpimaãri:

—Pitekani Xoteoakori auĩte txataua? —İtxari.

³⁴ İniniã Xesosi txari: —Piteka sãkirekani ikara? Atxiĩti apanakini sãkire atokotxikana pipimaãno atxiĩti? —İtxa Xesosi.

³⁵ Pirato apakapapiretari:

—Xoteokani nitxataua? Konapitini. Piteka nirimane, pinirimane auĩteakori pakini sikai pite notamoni pimisiritiko tũkane. Kixikapa? Kıpa maerekati pikamakiti? —İtxa Pirato.

³⁶ İniniã Xesosi:

—Auĩtetxi nininiãtaãua kona İkorapokoritini. Nitixine İkorapokoriti inaãkamako, ninitiriakori neenamauatamako, ininiã Xoteoakori kona maĩkamanoko. Auĩtetxi nininiãtaãua ãtiãtaãra —İtxa Xesosi.

³⁷ Pirato txari Xesosi:

—İniniã auĩtetxikani pitxataua?

İniniã Xesosi: —Atãõpitikara pisãkire auĩtetxi nininiua. Niponaniã İkorapokoriti auĩtetxi nininiua İkapani. İtixi napoka atãõene nisãpiretini İkapani. Atãõene nirekakani auikari nisãkire —İtxa Xesosi.

³⁸ İniniã Pirato:

—Kırıpa atãõene txaua?

Xesosi Okiko Nirekiko

(*Mateo 27.15-31; Marko 15.6-20; Arókasi 23.13-25*)

Ereka Pirato iuaĩkana mapara isa Xoteoakori imisãkiretini İkapani. İtxari:

—Kona nota apokari maerekati ikamakiti. ³⁹ Hĩte itotari maerekati kamakari kateia ãki auakari nisikakini Pãskoã kiiniritisaaki. Hĩte nirekatari nisikakiniri ikira Xoteoakori auĩte? —İtxa Pirato.

⁴⁰ İkinimanekana akiripoakatana:

—Kona iuani. Pahapasira anireka.

Txamari iua Pahapasi kokaniri. Iua naiatapekari Homanoakori.

19

¹ İniniã Pirato paniãtari sotatoakori noropatiniri Xesosi. ² İniniã sotatoakori kamari saporıeta atoko inakari, kotıpiaro kamakori. İeretakari Xesosi kiĩã. Auĩtetxi mãka poporeri itakana Xesosi nopini. İkara atoko ininiã, inapetarina Xesosi. ³ İkara atoko İtxana inapetinirina:

—Aãũte —İtxarina Xesosi inapetinina.

—Xoteo auĩtekai pite —İtxarina.

İniniã iuasaaki İaritarina itoõ.

⁴ Iuaĩkana Pirato sari mapara iuaĩkana Xoteoakori imisãkiretini İkapani.

—Hĩtakaõtxikari. Hĩtemoni nimirari iua, kotxi ninirekari himarotiniri, ! napokari maerekati ikamakiti. ⁵ İniniã Xesosi apoka mapara. Saporıeta kotıpiaro kamakori ikiĩã, auĩtetxi mãka pakini aua iuamoni. İniniã Pirato txari:

—Hãtamatarı iua.

⁶ Sasetotxi auñteakori, Teoso misäkiretiko aikoti nĩkatakani pakini atamatakasaakiri, ninoa akiripoakata:

–Hõkariko iua. Hõkariko iua. Aamina ĩpiriãmitakari nopini hĩtokakitariko –itxana.

Ininiã Pirato:

–Hĩteka anikari. Hĩteka okari iua aamina ĩpiriãmitakari nopini, kotxi kona napokari maerekati ikamakiti.

⁷ Ininiã Xoteoakori:

–Akiomane sãkire paniãtari kãkiti iua atoko inakari okiko, kotxi iua sãkire: “Teoso ãkirirano nota,” itxa –itxana Xoteoakori Piratomoni.

⁸ Xoteoakori sãkire ikenakotakasaaki, apia pĩkareta Pirato. ⁹ Ininiã iuaĩkana ĩroã kãkiti misiritiko imarotiko pakita ãki. ĩpimaãri Xesosi:

–Nanipa pina?

Txamari !kasãkireri Xesosi.

¹⁰ Ininiã Pirato:

–Kona pinirekatari pimisãkiretinino? Pixinikariko ia nisãkire. Nota posotari nisikakinii. Apaka nota posotari nokinii aamina ĩpiriãmitakari nopini –itxa Pirato sãkire.

¹¹ Xesosi apakapapiretari:

–Kona pite auari posotĩretxi pokinino ĩkapani. Ikara inakari piposotiire auiniã, Teosonanira sikai ikara posotĩretxi. Nota sikanapakani pitemoni kamari apiata maerekati.

¹² Pirato ikara atoko inakari ene ikenakotakasaaki, iua ãkixinireẽ ixinikari:

–Kiatokopa atxiiti nisikakari Xesosi?

Inirekari Xesosi isikakinii. Txamari Xoteoakori akiripoakata:

–Pisikakiniiãri ikira kiki, kona Sesa moianari !pitxaikauako. Iua sãkire: “Auñteti apiananiri nitxaua.” Sesanoka auñteti apiananiri –itxana Xoteoakori.

¹³ Pirato ikara atoko inakariene ikenakotakasaaki, iminari Xesosi iporikitimoni. Ininiã Pirato topãka. Iuaã kãkiti misiritiko isãpiretiniãtaã. Kãkiti takauãkatari iuaã “Kimapori kai kamakori” inaãka. Xoteo sãkireẽ “Kapataa.” Iuaã auñteti iokanatarari maerekati kamakari imisiritikomoni. ¹⁴ Iuasaaki apaniãxiti takote. Iua õti Pãskoã kiiniriti potorikini õti apisa. Iuasaaki Pirato txari Xoteoakorimoni:

–Hãtamata, hãauñte.

¹⁵ Ininiã iuaĩkana ninoa akiripoakata:

–Piokanatariko ere. Piokanatariko ere. Hõkariko aamina ĩpiriãmitakari nopini –itxana sasetotxi auñteakori.

Ininiã Pirato:

–Hinirekatari nokiniri hãauñte aamina ĩpiriãmitakari nopini?

Ininiã ninoa:

–Ãtikara ate auñte. Sesanokara ate auñte –itxana ninoa.

¹⁶ Ininiã Pirato sikari Xesosi sotatoakorimoni aamina ĩpiriãmitakari nopini okiko tũkane.

Xesosi Tokakitaãka Aamina ĩpiriãmitakari Nopini

(Mateo 27.32-44; Marko 15.21-32; Arõkasi 23.26-43)

Ininiã anikarina Xesosi. ¹⁷ Xesosi anikari aamina ĩpiriãmitakari iuaka okiko ĩkapani. Isana ixirata “Kiitãtatxi” inakorimoni. Xoteo sãkireẽ, “Kõokota,” inakori.

¹⁸ Iuaã aamina ĩpiriãmitakari nopini itokakitaãka Xesosi. Apaka ipi kiki tokakitaãka iua takote. Ãti Xesosi kikomoni. Ãti isanaremoni. ¹⁹ Pirato paniãtari iõkatsopari aamina ĩpiriãmitakari nopini tokakitiko. Ia atoko itxa iõkatakiti: “Xesosi Nasareekiri, Xoteoakori Auñte.” ²⁰ Itomaneri Xoteoakori atatsopatari iua, kotxi Xesosi okikoãtaã sitatxi takote. Sitatxi sikani napaãpotakasaaki, atamatarina iua iõkatsopari. Ia iõkataãka Xoteo sãkireẽ, Kreko sãkireẽ, Homano sãkireẽ pakini ikinimane imarotiniri ĩkapani. ²¹ Ininiã sasetotxi auñteakori txari Pirato:

–Kona piõkatsopatapiri, “Xoteoakori auñte.” Piõkatsopatariko iuanoka uãkatari Xoteoakori auñte ininiua –itxana.

²² Ininiã Pirato:

–Auape niõkatsopatakiti. Kona iuaĩkana niõkatsopatari –itxa Pirato.

²³ Xesosi itokakitakana atoko, sotatoakori kosekari Xesosi mãka. Imatsorakitarina. Imãka mata imatsorakitana ninoa ipi ipi pakini apakapini ĩkapani. Ãti sotato apakapari ipixini, ãti sotato apakapari ipixini, itxaãpota. Xesosi mãka, ãti imãka patapi auakari, ! imatsorakitana, kotxi iotsare !auari. Peerekari. ²⁴ Sotatoakori itxakakana:

–Kona amatsorakitari ia. Sarauatxi atoko makama, imãka anikakari aimarotini ĩkapani.

Ininiã iuasaaki Teoso sãkire iõkatsopatakori kitxakapirĩka iaõka apoka. Iua txari:

Ninõa xanakari nimãka. Isarauatana nimãka anikakari imarotinina ĩkapani.

Teoso sãkire iaõka sotatoakori kama.

²⁵ Iuasaaki aamina İpiriãmitakari takote oãua Maria, Xesosi inoro oitarokata. Iuaã apaka oãua Maria Matarena inakoro. Iuaã apaka oãua äto Maria, Krópası inakori İtanoro. ²⁶ Xesosi atamatakasaakiro inoro iua takote, atamatakasaakiri imoianari itiretakiti apaka, itxaro inoro:

—Nitiretakito, ere Xoão, pamarite itxaua.

²⁷ İmoianaripekana itxa:

—Aroa pinoro otxaua.

İniniã eereka iua anikaro oa aapokomoni iuakata oãuini tıkane.

Xesosi İpinini Pirena

(*Mateo 27.45-56; Marko 15.33-41; Arókasi 23.44-49*)

²⁸ Eereka Xesosi imarotari iparıka xıpope. İkinika Teoso säkire iökatsopatakori iaöka apokini İkapani, itxari:

—Nıposonata.

²⁹ Iuaãtaã aua tiitxi. Iua tiitxi äki aua iãriã katxioãri. İniniã iuasaaki iokomokarina mapoa atoko inakari iãriãmoni. Aãkeë itakarina, Xesosi namaã taka itxarina. Iua aãke isopo inakorike. ³⁰ İãtaka atoko itxari:

—İkinika nıparıka uatxapeka ixıpopeka.

İnaãka atoko iokirikııta, iokanata itxari ixınire irimoni. Iuasaakıpeka ipina itxa.

Sotato İorotari Xesosi İomıtiã

³¹ Iua öti sesta veira, kãkiti tomatiko öti apisa. Xoteo auıteakori paniãtari Pirato aamina İpiriãmitakariã auakani tapike kapatakiko, katima ipıka ininina İkapani, İltona makatxakiko İkapani apaka. Tomatiko ötisaaki kona ninoa nırekari ipıkarı İto kaikotini iuaã. ³² İniniã sotatoakori sari iuaã. İkapatakarina Xesosi takote auakani tapike. ³³ Txamari sotato atamatakasaakiri Xesosi, !auaika. İpıpeka. İniniãkara kona ikapatakari itapike. ³⁴ Sotato İorotari Xesosi İtanapitaã İomıtiã. Iuasaaki iarëka, äparaã pakini xıketa.

³⁵ Notara itikari Xesosi İpinini, İniniã atãopıtıkara nisãpiretakiti. Nisãpiretari İkinika nitıkakiti. Nımarotari nisãkire atão İnini, İniniã nisãpiretari İa atatsopatakani, İhte apaka İukıniri İkapani. ³⁶ Teoso säkire iökatsopatakori İtxakapırıka txari:

Kona ätika iua api !kapatakaãka.

İniniãkara kona Xesosi api kapatakaãka, Teoso säkire iökatsopatakori iaöka apokini İkapani.

³⁷ Äti Teoso säkire iökatsopatakori txari:

Ninoa atamatariko İorotakitina.

Xesosi Katiko Pirena

(*Mateo 27.57-61; Marko 15.42-47; Arókasi 23.50-56*)

³⁸ Eereka Xosee, Arımatea İtatxıitıkiri, amanaãri Xesosi İto Piratomoni. Iua Xosee auikari Xesosi säkire, txamari İkipatari Xesosi säkire auikini, kotxi ipıkarı Xoteo auıteakori. Amanaãkasaakiri Xesosi İto, Pirato txari:

—Ari, panikari iua.

İniniã Xosee anikari Xesosi İto. ³⁹ Iuasaaki imoianari Nikotemo inakori. Iua Nikotemo İtxıpeka sari Xesosımoni İkanöka İmisãkiretiniri İkapani. Iua moianatari Xosee, Xesosi İto apakapakasaaki. Nikotemo anikari aãtsopa aroesi inakori, İmıa inakori pakini İkoke Xesosi İtoã taãkori tıkane. Trıta sıko kiro pakini iua İkoke anika. ⁴⁰ Ninoa İpi İapırıkari Xesosi İto mãkatxi mataã İkokekata. İkara atoko Xoteo kamari ipıkarı İtoã İkatiko apisa.

⁴¹ Xesosi aamina İpiriãmitakari nopini takikoãtaã, iuaã takote aua amãtiirinape. Amãtiirinapeãtaã aua akauari amanepanika inakari. Kona ipıkarı İto takaãkapanika iuaã.

⁴² Iua akauari kona ötakori, İniniã İtakarina Xesosi İto iuaã, kotxi Xoteo tomatini öti İpokanapanoka.

20

Akauariã Xesosi İto Mauakani

(*Mateo 28.1-8; Marko 16.1-8; Arókasi 24.1-12*)

¹ Tomıko İkanökapanika, Maria Matarena sari akauarimoni. Oãpokasaaki, oãtamatari akauari İtoe kai auıte kamakori makatxakapeëkaika. ² İniniã omiteka Simão Petromoni. Xesosi moianari itiretakitimoni apaka İsa. Oãkırıtana:

—Apıananiri İto makatxakaãka akauariã. Kona İmarotari namonıreuo İtakapırına —otxana.

³ İniniã Petro, äti Xesosi moianarıkata sari akauarimoni. ⁴ İmıtekana. Iua äti Xesosi moianari İmıteka katımarıtıka, İniniã İnapari Petro. İniniã iua apoka Petro apisa. ⁵ İãka aariko äki atamatini İkapani. Atamatari mãkatxi mata, ipıkarı İapırıkıko. Kona İıroã. ⁶ Iuasaaki Petro apoka iua tıkini. İıroã aariko äki. Atamatari mãkatxi mata. ⁷ Atamatari

mākatxi mata, mitxi Xesosi kiiā iapirikiko. Iporiimatataāka. Ikikomoni aua āti mākatxi mata. Isanaremoni aua āti mata. ⁸ Ininiā iua mitxi apoākari iroā, atamata itxari. Ininiā auikari Maria sākire. Iuasaakiika auikari Xesosi ōkitikiniua. ⁹ Iuasaaki ninoa kona iteene imarotapanikari Teoso sākire iōkatsopatakori kitxakapirikari, kotxi Teoso sākire sãpiretpekari Xesosi ipinini, eereka ōkitikiniua. ¹⁰ Eereka Petro āti Xesosi moianarikata kanapiriā aapokomonina.

Xesosi Oerekaua Maria Matarenamoni

(Mateo 28.9-10; Marko 16.9-11)

¹¹ Maria Matarena kaikota aariko iriko takote. Otxiapanātakasaaki, amaāti opapikakiita oiākakiita aariko iriko āki oātamatini ikapani. ¹² Oātamatana ipi Teoso nitiriakori iaxitkini. Imākana kasarori. Iitopākana mitxi Xesosi ito auiniātaā. Āti mitxi Xesosi kii auiniātaā, āti mitxi ikiti auiniātaā. ¹³ Itxarona:

–Kinirepa pitxiapanāta? –itxana.

Ininiā oa:

–Imaktxakaāka niauīte ito. Kona nimarotari ito takikoātaā –otxana.

¹⁴ Iuasaaki oporikimoni osapotorika. Oātamatari Xesosi, txamari !oimarotari.

¹⁵ Ininiā Xesosi:

–Kinirepa pitxiapanāta? Kiripa pinita? –itxaro.

Ouākatari Xesosi amātiirinape nīkatakari ininiua. Ininiā otxari:

–Pite maktxakiniāri iua ito, ininiā pisãpiretano ito pitakiniātaā. Ininiā nanikariko ātiātaā –otxari.

¹⁶ Ininiā Xesosi txaro:

–Maria.

Ininiā okirioka iuamoni. Otxari osākireē:

–Haponi.

Popikari sākireē, “Noereēkiri,” otxa.

¹⁷ Ininiā Xesosi txaro:

–Kona pimaātakapeno, kotxi nirimoni kona nisapanika. Pisa nitariakorimoni. Pitxanako: “Nota sariko nirimoni, hīte iritxikana apaka. Nisariko niTeosonemoni, hīTeosonetxikana apaka,” itxa.

¹⁸ Ininiā Maria Matarena sari Xesosi moianariakorimoni:

–Natamatapekari aauīte –otxana.

Ininiā osãpiretana ikinika Xesosi sākire.

Xesosi Oerekaua Imoianariakorimoni

(Mateo 28.16-20; Marko 16.14-18; Arókasi 24.36-49)

¹⁹ Iua Tomiko ikanōkati Xesosi moianariakori apotiitaua. Iuasaaki itotarina ikinika aapokotxi tore, kotxi ipikana Xoteo auīteakori. Iuasaaki Xesosi tokiā aapokotxi āki ninoa sauaki.

–Erekaxinire hītxako –itxana ninoa.

²⁰ Ikara inaka atoko oerekari iuako karo. Oerekari itanapita karo. Ininiā Xesosi atamatakasaakina, imoianariakori iteene poxokoniua. ²¹ Iuaikana Xesosi txana:

–Erekaxinire hītxako. Niri iokanatinino atokotxikana, niokanatai hīte niri nireēkiti hīkamini ikapani.

²² Iuasaaki ixōkana. Itxana:

–Hãpakapariko Erekari Matamatakoti. ²³ Apakata pisãpiretiniri nota sākire auīakari, imaerekani maktxakaāka. Apakata pisãpiretiniri nota sākire mauīakani, imaerekani !imaktxakaāka –itxa Xesosi.

Xesosi Oerekaua Tomeemoni

²⁴ Xesosi imoianariakorimoni oerekasaakia, Tomee Txitximo inakori kona aua ni-noakata. ²⁵ Ininiā apanakini sãpiretari Tomee:

–Ate aōkitari Xesosi –itxana.

Ininiā iua:

–Iuako karo nimatamatakaniā, iuako karo nimakaaiakakaniā niuakokiā, kona nauikari hīte sākire. Itanapita karo nimakaaiakakaniā, kona nauikari hīsākire –itxa Tomee.

²⁶ Āti semanati napaka atoko, Xesosi moianariakori apotiitaua iuaikana aapokotxi āki. Iuasaaki Tomee aua ninoakata. Aapokotxi tore itotaāka, iuaritika Xesosi tokiā ninoamoni:

–Erekaxinire hītxako –itxana ninoa.

²⁷ Iuasaaki itxari Tomee:

—Patamata niuako. Pikaaiakariko piuakokiã nitokakitiko karoã. Nitapanita iorotikomoni pitakari piuakoki. Kona mauikaretika !pitxape. Pauikariko nisãkire —itxari.

²⁸ Ininiã:

—Niaũite, niTeosone —itxa Tomee.

²⁹ Ininiã Xesosi:

—Uatxa pite aukari auãki ninini, kotxi patamatano. Kãkiti nota maõkitakani auikiniãri nisãkire, apakapariko apiata erekari Teoso sikakiti —itxa Xesosi.

³⁰ Xesosi kamari apikomoni iposotiire imoianariakori sauaki. Iposotiire ikamakiti imakinika kona iõkatsopataãka ia iõkatsopariã. ³¹ Ia niõkatsopata Xesosi Teoso mereẽkiti, Teoso ãkiri ininiua hãuikini ikapani. Ikara atoko hãuikiniã, hãuapininiika hitxako Xesosi posotiireẽ.

21

Xesosi Oerekaua Setxi Imoianariakorimoni

¹ Æti õti Xesosi oerekaua iuaikana imoianariakorimoni ipoa Txiperiatxi inakori tiniã. Ia atoko iua oerekaua:

² Iuaã aua Simão Petro. Iuakata aua Tomee Txiximo inakori. Natanaeo, Kanaa aapokotxitikiri, Karirẽia tõpa auakari apaka aua iuakata. Sepeteo anaakori apaka aua iuakata. Apikomoni ipi Xesosi moianariakori apaka aua iuaã. ³ Simão Petro txana:

—Nota okatsaãtako —itxa.

Ininiã apanakini:

—Ari, ate apaka okatsaãtako pitekata —itxana. Ininiã isana. Kanauaã iereẽtauana. Ìkanõka okatsaãtana, txamari !imaikarina ximaki. ⁴ Ìkanõkapanika Xesosi ikipatxitemoni tìpokonãta, txamari !imarotarina Xesosi iuaã auini.

⁵ Xesosi akiritana:

—Namariteakori, kaiomaãi ereẽ? —itxana.

—Kona kaiomaãua —itxarina.

⁶ Ininiã Xesosi paniãtana:

—Hitakariko hetxi hìkikomoni. Ereẽ hãpokariko ximaki —itxa Xesosi.

Ininiã ninoa okari hetxi ikikomoni. Eereka kona iposotaikarina ikosekinirina hetxi kanaua ãki, ximaki itori imaikinina xika. ⁷ Xesosi moianari itiretakiti txari Petromoni:

—Aãũitekara.

Ikara inakari sãkiretxiti ikenakotakasaaki, Petro ieretakari imãka, mitxi imakatax-akakiti, oka itxaua ipoamoni Xesosimoni isini ikapani. ⁸ Apanakini kanauaã ina. Ikosekaãpotarina hetxi. Iuasaaki ximaki xãpoka hetxiã. Itakoã !itakori, atxiiti seì metronoka.

⁹ Ikanikũitakasaakina, atamatarina xamina. Ximaki iropike nopini auape. Apaka auari komiri.

¹⁰ Xesosi txana:

—Himinari ximaki himaĩkakiti mapake.

¹¹ Ininiã Petro kosekari hetxi imiriũ. Xãpoãkata ximaki. Sẽtosikoõeta tres ximaki mitapoakari aua. Kaiãopokori ximaki, iuaritika hetxi kona tsorakita. ¹² Xesosi akiritana:

—Uai hina. Manipokota.

Kona ãtika imoianari kona kataparaxinire ipimainiri iua: “Kiriparai” ininiri iua, kotxi ninoa imarotari iua Apiananiri ininiua. ¹³ Ininiã Xesosi apoka ninoamoni. Ixanakari komiri, ximaki pakini, sika itxana ninoamoni.

¹⁴ Ikara õti apisapanika, Xesosi ipinaka atoko, õkitikaua atoko, oerekapekaua ipikata imoianariakorimoni.

Xesosi Misãkiretari Petro

¹⁵ Inipokotaka atoko Xesosi pimaãri Simão Petro:

—Simão, Xonasi ãkiri, kipa apiata tiretano nota, pitekani, nakirakani? —itxa Xesosi.

Ininiã Petro txari:

—Ari, Apiananiri, pimarotari nota apokaerekatini —itxa Petro.

Ininiã Xesosi:

—Poerekari nisãkire soti auite anaakorimoni, ninakitiakorimoni.

¹⁶ Iuaikana ipimaãri:

—Simão, Xonasi ãkiri, atão pitiretatano nota? —itxa Xesosi.

—Ari, Apiananiri, pimarotari napokaerekatini —itxa Petro.

Ininiã Xesosi:

—Piniãkatana soti auite, ninakitiakori —itxa Xesosi.

¹⁷ Iuaikana ipimaãri:

—Simão, Xonasi ãkiri, pitiretatano nota?

Ininiã Petro matinaniuata ixinireẽ, kotxi Xesosi pimaãri ipi ãti pakinikata “Pitiretatano nota.”

Ininiã Petro:

–Apiananiri, pite imarotari ikinipoko. Pimarotapitikari nitiretinii pite.

Ininiã Xesosi:

–Poerekari nisãkire soti auĩte ninakitiakorimoni. ¹⁸ Atão nitxai. ãtkoripanika pinakasaaki, piteka pieremãkataua. Pisari pinirekinimoni. Kiomãtxi pinakasaaki, pitamêkakanoketauako, ininiã ãti ieremãkatai. Eereka anikai pimanirekakanimoni –itxa Xesosi.

¹⁹ Ikara atoko Xesosi sãkire, kotxi ikara atoko itxako Petro ipinini. Petro ipinini iteene paxitariko Teoso, ininiã kãkiti txariko: “Peerekari Teoso.” Ininiã Xesosi:

–Pikapokitano nota. Ninireêkiti pikamako –itxa Xesosi Petromoni.

Xesosi Iteene Tiretakiti

²⁰ Petro kirioka. Atapari Xesosi moianari, itiretakiti ninoa tikini inini. Iuakara mitxi Xesosikata iitopãka Pãskoia kiiniritisaaki. Iuasaaki ipimaãri Xesosi: “Niauĩte, kiripa mĩkapiritai?” ²¹ Petro atapakasaakiri Xesosi tiretakiti ninoa tikini inini, ipimaãri Xesosi:

–Natokopa itxatako ere ipinini?

²² Ininiã Xesosi:

–Nota nirekiniãri iua auapanika inini nikanapiriãkasaaki, kona nisãpiretai pite. Kona pixinikapiri iua. Pixinikari piteka kaminiri nota nireêkiti –itxa Xesosi.

²³ Ininiã iaripireta Xesosi sãkire auĩãkanimoni, iua imoianari itiretakiti imapinakani Xesosi kanapiriini apisa. Txamari Xesosi ! isãpiretai imapinakani. Iua txari: “Nota nirekiniãri iua auapanika inini nikanapiriãkasaaki, kona nisãpiretai,” itxa Xesosi.

²⁴ Nota ikara Xesosi moianari itiretakiti nitxaua. Nota itikari imakinika Xesosi kamakiti. Ininiã nota iõkatsopataru ikamakiti, isãkire pakini. Ininiã aimarotari atão nisãpiretakiti.

²⁵ Auapanika itori Xesosi kamakiti. Ikinika ikamakiti ! kaiõkatikopaniari. Ikinika niõkatsopatinã, !apakata, kotxi itixi kona apakata kaiãopokori aãtsopa auini.

ÁTOSI Xesosi Iokanatakini Kamakiti Pirena

Xesosi Kanapiriini Iaxiti

¹ Ereë kai Teópiro, Teoso tiretakari. Merepitipanika niókatsopatakiti aátsopaã txari ikinipoko Xesosi kamakiti, isãpiretakiti pakini. ² Niókatsopatakiti mapotókire auari Xesosi iaxiti sini pirena. Isini apisa isãpiretana iokanatakini Erekar Matamatakoti paniãtakiti.

³ Ipinaãka atoko iuaãkana iuaka oerekaua ninoamoni, ininiã imarotarina atãopitika iua òkitikapekaua. Koarêta pakini òti iua auanãta ninoakata. Iuasaaki isãpiretana Teoso auítetxi ininiãua pirena. ⁴ Imakinika apotiitakasaakia itxana ninoa:

—Kona hítakanapiri Xerosareë sitatxti. Aïri iaxitikiri iokanaenetakiti hiãtapako. Iua mitxi hitemoni nisãpiretakiti. ⁵ Atãopitikara Xoãoni patxisatai hite ãparaã. Mapaõti napaka atoko, Erekar Matamatakoti apokako hitemoni. Iuasaaki hipatxisataãkako Erekar Matamatakotiã —itxa Xesosi sãkire.

⁶ Ininiã imolanariakori apotiitakasaakia Xesosikata, ipimaãrina iua:

—Aãuïte, uatxa iuaãkana pisikatari atixine atemoni, Isaeo apika mekaniriakorimoni? — itxarina.

⁷ Ininiã Xesosi txana ninoa:

—Kona hite imarotiniiri İkanani. Aïrinanira imarotapaniri hite tixine hitemoni isikini òti. ⁸ Erekar Matamatakoti apokasaakirako hitemoni, hãpakapariko posotiiretxi. Ininiã hite nota kamakiti atamatakani hítxauako. Hisãpiretariko hitiãkiti, himarotakiti pakini Xerosareë sitatxti auakanimoni, imakinika Xotéia tãpa auakanimoni, Samaria tãpa auakanimoni, ikini itixiti auakanimoni pakini hisãpireãpotariko —itxa Xesosi ninoamoni.

⁹ İkara atoko inaãka atoko, ninoa okiã atamatarı iua anikiko iaxiti. Katxiãri ãki isa, ininiã kona ninoa itikaikari. ¹⁰ Iaxiti ionakaãtakasaakina, apoka ipi kiki katsopiri mãkatakani ninoa takote. ¹¹ Ninoa txana:

—Kiki Kariréiakini, kinirepa hionakanãta iaxiti? İkora Xesosi iaxiti sikari, isini atoktxikana İkanapiriini —itxana ninoa.

İtanokiri Koaã Apotiitakanıua

¹² Ininiã Orıva xirataãtaã ipotorikana. İkanapiriãna. Xerosareëmoni isana. Orıva kona òtakori. Kãkiti Orıva xirata potoricakani sini Xerosareëmoni tako atokokanera Xoteo kiomaneakorini auiritari kãkiti sini tomatiko òtisaaki.

¹³ Xerosareë sitatxti apokasaakina, iïroãna aapokotxi ãki. Ininiã isana itanokiri koaã. Petroma, Xoãoma, Txiakoma, Aïreema, Piripima, Tomeema, Patoromeoma, Mateoma, Txiakoma (Aopeo ãkiri), Simãoma (Homano omanatakari), Xotasima (ãti Txiako itari) pakini aua iuaãtaã. ¹⁴ Aïtipirika ninoa apotiitaua Teoso imisãkiretinina İkanani. Apaka sitoakoro Xesosi sãkire auiãkani, Maria Xesosi inoro, Xesosi itariakori pakini apotiitaua ninoakata. Ninoa misãkiretakasaakiri Teoso, ãtika kãkiti xinirenoka atoko itxana. Ininiã erekarınoka auana ninoamoni. Kona omanatakauana.

Matxia Mereïko Pirena

¹⁵ Iuasaaki sëtovıtxi pakini Xesosi sãkire auiãkani aua. Petro òkitikaua ninoa sauaki. ¹⁶ Ininiã itxa:

—Nitariakori, hıtakaõtxikari Teoso sãkire kitxakapiriãka Taviimoni isãpiretakiti. Tavii iókatsopatari Xotasini pirena, Xesosi mãlkakani oerekakari pirena, kotxi Erekar Matamatakoti kamaimaroretari iua Tavii. Atão İkara Teoso sãkire kitxakapiriãkari apokapeka uatxa. ¹⁷ Iua Xotasini atekata auakari iua. Ate pariãka atoko ikama.

¹⁸ —Iuaritika isikari Xesosi imokaiakariakorimoni. Txineiro apakapakitoã iamotaãka itixi. Iuaã ipipe. Itano okaua. İxiti apokasaaki, iokirikiita. İxoreka itikako. Iuasaaki itikapitsa poãpekatani. ¹⁹ İmakinika Xerosareë auakani kenakopiretari Xotasini ipinini. Ininiã ninoa akiritari iuaãtaã itixi uãka “Aseotama.” Popiãkari akiritari “Arêkatxi Tixini.”

²⁰ —Xikari iókatsopatakoriã iókatsopatapeãkaika ia Xotasi pirena:

Iua aapoko takanapaãkako. Kona auiritaãka kãkiti auini iuaãtaã. İpariãka sikaãkako ãtimoni, itxa Teoso sãkire.

²¹ —Ininiã amereëriko ãti kiki atekata sikari tũkane. Amereëriko kiki mitxi Xesosikata sikari, mitxi amoianari ikiniõtika Xesosikata aãuakasaaki. ²² Amereëriko kiki Xoãoni patxisarauatini itiaãkari, imakinika Xesosi kamakiti itiaãkari, iaxiti isini itiaãkari, kotxi anirekari iua amereëkiti Xesosi òkitikiniua imarotakari ate atoko inakari —itxa Petro.

²³ Ininiã imereërina ipi kiki, Xosee Pasapasi inakori. Apanakini akiritari iua Xósito. Áti kiki uãka Matxia inakori. ²⁴ Iposo atoko imisãkiretarina Teoso:

—Pite imarotari ikinimane kãkiti ãkixinire. Poerekaua ìkiripa naia kiki pimereëkiti ²⁵ atekata parìkauatakarì ùkane, Xesosi iokanatakiti ùkane, kotxi Xotasini takanapari ikara parìkatxi imaerekani xika, maerekani misiritikoãtaã isini ìkapani —itxana Teosomoni.

²⁶ Iposo atoko ikamarina sarauatxi atoko inakari imoianarina imarotinina ìkapani. Ikara atoko ininiã, imereërina Matxia. Ininiã Xesosi iokanatakiti itxaua. Ikara òti atoko, iua moianatari apanakini òsi Xesosi iokanatakini.

2

Pëtekósitxi Kiiiniriti Ôti

¹ Pëtekósitxi kiiiniriti ôti (takari merepitipanika nikiko ôti) apokasaaki, Xesosi sãkire auiaãkani átika kãkiti xinire atoko itxauana. Imakinika apotiitauana. ² Katimaritika iaxiti ìkari kataparari ìtimati atoko inakari xãpoka aapokotxi ãki Xesosi moianariakori topãkiniãtaã. ³ Ininiã iuasaaki xamina tirika atoko inakari tokiã. Imakinikana ikiiãna apoka. ⁴ Erekarì Matamatakoti ìroã ikinika ãkixinireë. Iuasaakipeka ninoã sãkirauata áti uãka sãkireë, kotxi Erekarì Matamatakoti kamaimaroretana.

⁵ Iuasaaki Xerosareë sitatxitiã auanãta ikini uãkati kãkiti Xoteoakori. Ninoã Teoso sãkire kìpitakani. ⁶ Ikenakotakasaakirina iaxiti ìkari ìtima atoko inakari, apotiitauana mirikiniãti kãkiti. Ininiã itikokitatana, kotxi ikenakotarina apanakini sãkirauatini isãkireëna. ⁷ Itsorìkaãtana:

—Kiãtokopa ininiãpa imarotatarina ate sãkire. Hãtamatana, Karirëiaklinikara sãkirauanãta ateka sãkireë. ⁸ Kiãtokopa itxa akenakotiniri ateka sãkire? —itxana ninoã.

⁹ Iuaãtaã auari kãiãopokori kãkiti áti uãka. Auari Patxiakinima, Mëtxiakinima, Erãokinima, Mesopotãmiakinima, Xotëiakinja, Kapatósiakinima, Põtokinima, Ásiakinima, ¹⁰ Pirixiakinima, Pãpiriakinima, Exitokinima, Arípiakinima, Sireni takotekinima, Homakinima pakini aua. Apanakini Homakinini atão Xoteoakori. Apanakini mamakaua, ininiã Xoteo itxapekauana. ¹¹ Kretakinima, Arãpiakinima pakini aua iuaã.

Ininiã ninoã txa:

—Ate kenakotari Karirëiakini sãkirauatini ateka sãkireë. Isãpiretarina ikinipoko erekarì Teoso Apiananiri kamakiti —itxana.

¹² Ininiã ninoã tsorìkaãta. !Imarotarina.

—Natokopa itxana imarotinirina ate sãkire? —itxana.

¹³ Apanakini kãkiti napetana:

—Poãtakanira ninoã —itxana.

Petro Apakapapiretakiti Kãkitimoni

¹⁴ Iuasaaki Petro, òsi Xesosi iokanatakinkata misãkiretana iuaã apotiitakanuia. Itxari: —Xotëia auakanii, ikinika Xerosareë sitatxiti auakanii, hìtakaõtxikariko nisãkire himarotini ìkapani. ¹⁵ Hiiãkatana naia kikiakori poãtini. Kona ipoãtana, kotxi atokatxi inaãpotapanika. ¹⁶ Ia uatxa hãtamatakiti kixakapirìka Teoso sãpiretapekari Xoeomoni. Iua Xoeo Teoso sãkire sãpiretakari sãpiretapekaua. Iua txari:

¹⁷ Teoso txari: “Xipokatxi ôti iatokopeka inakasaaki, niokanatarì Erekarì Matamatakoti ikini kãkitimoni. Pamariteakori sãpiretariko nisãkire apanakinimoni. Átokoriakori atamatariko itapone atoko inakari Teoso sikakiti pokamarasaaki. Iuasaaki nisãkire nisãpiretana. Kiomãtxiakori taponetariko nota oerekakiti. Iuasaaki nisãpiretariko nisãkire ninoamoni.

¹⁸ Ìkora òtisaaki ninitiriakori, niniteroakoro pakinimoni niokanatarì Erekarì Matamatakoti. Ninoã sãpiretariko nisãkire.

¹⁹ Iaxiti noerekariko nìposotiire kãkiti mimarotakiniti. Ìkorapokoriti apaka noerekariko nìposotiire Apiananiri nininiua imarotinina ìkapani. Arëkatxi, xamina, katxiãri pakini apokako.

²⁰ Atokatxi piãkako. Kasiri arëkatxi atoko itxako. Apiananiri apokini apisapanikarako auako ikara atoko inakari. Peerekapaniri Apiananiri apokini ôti. Ìkora ôti apiatakarì, kotxi iuasaaki Apiananiri oerekauako kãkitimoni.

²¹ Ininiã Apiananiri akiritakani makatxakaãkako imapinakani ìkapani,”

itxa Apiananiri Xoeomoni.

²² Petro sãkirauatapanika:

—Kãkiti, Isaeokini, hìkenakotariko nisãkire. Hìte apisatoõ Teoso oerekapekari Xesosi, Nasa-ree sitatxitikiri. Teoso mereëkiti itxaua, kotxi ikamari Teoso posotiire kãkiti mimarotakiniti Teoso himarotini ìkapani. Himarotapekari ikara. ²³ Xesosi sikaãka imokaiakariakorimoni,

kotxi Teoso nirekari ikara atoko iniko. Teoso imarotapekari ikara atoko inakari apokini òti. Hìtekara, apanakini maerekati kamakanikata maìkari Xesosi. Aamina Ìpiriãmitakari nopini hìtokakitari, oka hìtxapiri iuani. ²⁴ Iuaritika ipinaka atoko, iuaìkana Teoso òkitikari iua. Teoso sikakari iua ipìkitxi mamisiritakaniri Ìkapani. Ipìkitxi Ìposotari ixipokiniri iua, kotxi Apiananiri itxaua.

²⁵ –Kìtxakapirìka Tavii sãpiretari Xesosi pirena. Itxari:

Nota itikapikari Apiananiri nota apisatoð. Iua aua nikikomoni. Ininiã Ìnimaktxaãka.

²⁶ Ininiã nixinire poxokoniuatapeka itxa. Nisãkire poxokoni apaka aua. Niìto auãki inakasaaki, iãtapani Teoso sikaenetakiti.

²⁷ Apiananiri kona takanapano nota ipìkani auiniãtaã. Apiananiri !auiritano Erekarì Kamakari paiakini.

²⁸ Apiananiri oerekapekano mapìkani kimaporite. Iua notakata aua, ininiã nipoxokoniuata,

itxa Xesosi Taviimoni kìtxakapirìka.

²⁹ Ininiã Petro sãkirauatapanika:

–Kìkiakori, hãuiritano nisãpiretiniri Tavii pirena. Tavii anirimane kìtxakapirìka auakari. Iuani ipìpe, ikatapeëka. Uatxa atemoni auapanika iua akauare. ³⁰ Iua Teoso sãkire sãpiretakari. Atão iua imarotari Teoso sãkire. Teoso sãpiretaperari iua apika mekaniko Teoso mereëkiti itxauako. Tavii imarotari Teoso mereëkiti òkitikaãkapanikako auìtetxi ininiua tìkane. Teoso sãpiretari imereëkiti topãka auìtetxi itopanere nopini. Ininiã atão auìtetxi itxaua.

³¹ –Tavii imarotari ikara atoko inakari Xesosi apokini apisapanika, kotxi iòkatsopatarì Xesosi ipinini pirena, iuaìkana òkitikiniua pirena apaka. Iua txari:

Ipìkani auiniãtaã Ìkaikota. Ito Ìpaiaka,

itxa Tavii kìtxakapirìka.

³² –Iua Xesosi ipinaka atoko, Teoso òkitikari iua. Ate amakinika Xesosi òkitikiniua itìkakani atxaua. ³³ Ininiã uatxaika Xesosi topãka Teoso kikomoni. Ikara atoko Xesosi Apiananiri itxaua. Apakapari Erekarì Matamatakoti, Teoso sikaenetakiti. Iposo atoko, iokanatarì Erekarì Matamatakoti atemoni. Iuakara uatxa hãtamata ikamakiti. Hìkenakotari iua sãkire uatxa.

³⁴ –Tavii Ìsari iaxiti auìtetxi ininiua Ìkapani, iuaritika iòkatsopatarì:

Apiananiri misãkiretari niauìte: “Nota kikomoni piitopãkiniritika ³⁵ nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauìte.

³⁶ –Ininiã Ìsao auakanii, himarotariko ia. Hìte okari Xesosi, iuaritika Teoso kamari iua auìtetxi ininiua. Teoso mereëkiti itxaua –itxa Petro.

³⁷ Iuasaaki Petro sãkire ikenakotakasaakina, ãkixinireëna tsiiìtxi apoka iouata iorotiniri tsii atoko itxa. Maerekaxiniretinoka itxana. Eereka itxana ninoa:

–Kìripa akama? –itxana.

³⁸ Petro apakapapiretana:

–Hìmaerekani hìtakanapa. Hìte imakinika hìpatxisataãkako Xesosi Kristo uãkaã, ininiã Teoso maktxakari hìmaerekani. Iuasaakiko hãpakapari Erekarì Matamatakoti Teoso sikakiti. ³⁹ Kotxi ikara Teoso sikaenetakiti hìte Ìkapani, hamarite Ìkapani, apanakini òtako auakani apaka Ìkapani. Ikara Teoso sikaenetakiti ikinimane kãkiti Teoso akiritakini Ìkapani –itxa Petro.

⁴⁰ Petro iteene òtãkikana ninoa, kotxi inirekari atão ikaminina, ininiã itokata òtãkikana ia atoko:

–Ìkorapokoritì auakani maerekati kamakani itxauana. Himaktxakaua. Hìtakanapariko hìmaerekani. Hãuikariko Xesosi sãkire –Petro txana ninoa.

⁴¹ Ìkora òti, tres mio kãkiti ipoxokoniritikana auikari Petro sãpiretakiti. Iuasaaki ipatxisataãkana.

Xesosi Sãkire Auiãkani Moianatakiniua

⁴² Eereka ikiniòtika apaiaòkarina Xesosi iokanatakini oerekakiti. Ìtipirika itìretakauana. Ìtipirika ikamarina kiiniri komiri imapixinikinina Xesosi ipinini ixinikinina Ìkapani. Ìtipirika imisãkiretarina Teoso. ⁴³ Ikinimane tsorìkaãnãta, kotxi Xesosi iokanatakini kamari ito posotiiretxi kãkiti mimarotakiniti, apanakini Teoso imarotini Ìkapani.

⁴⁴ Teoso sãkire auiãkani apotiitapikaua. Ninoa xanakari ikinika inakitina. ⁴⁵ Ivètxitarina itiina, ininiã tiitxi Ìki isikana matxineirotenimoni. ⁴⁶ Ikinìòtika aiko ãki Teoso misãkiretkoãtaã apotiitapikauana. Ninoa aapoko ãki ikamarina komiri mapixinikiko kiiniriti. Ìtipirika ninoa apotiitaua ipoxokoniritikana nipokori inikinina Ìkapani. Ìkixinirena

erekapitikari. ⁴⁷ Ixikarauatana Teoso íkapani. Imakinika kákiti apokaerekatana ninoa. Ininiã ikiniótika Teoso makatxakari kákiti maerekani. Ininiã Teoso sáikire auíãkani apiaãpota.

3

Petro, Matípokotakati Pakini

¹ Áti óti mapiãtiki Petro, Xoão pakini sari Teoso misákiretiko aikotimoni Teoso imisákiretinina íkapani. ² Iuasaaki ikiniótika kákiti anikari matípokotakati Teoso misákiretiko aikoti toremoni. Itore uãka “Peereri.” Iuaã matípokotakati amanaãri txineiro iuaã napakanimoni. Iponaniãkasaaki matípokotakati itxaua iua. ³ Ininiã Petro, Xoão pakini íroãkasaaki, iua amanaãri txineiro:

—Txineiro hísikano —itxa.

⁴ Ininiã Petro, Xoão apaka atamatari iua. Ininiã Petro txari:

—Patamataua.

⁵ Ininiã iua matíkati atamatana ninoa. Iuãkatarí txineiro isikinina iuamoni. ⁶ Ininiã Petro: —Kona auari txineiro atemoni. Kona pírata aua atemoni. Oro apaka !auari. Iuaritika nota auakiti nisikapitikai. Xesosi, Teoso mereékiti, Nasareekiri, iua uãkaã pókítikauako. Pítípokotako —Petro txari iuamoni.

⁷ Ininiã Petro maíkari iuako ikikomónikiri ókitikiníua íkapani. Iuasaakipeka ikiti, íkitinota pakini kataparapeka itxa. ⁸ Ininiã okakataua, títokota itxa. Íroã Petro, Xoão pakínikata Teoso misákiretiko aikoti áki. Íroãkasaaki, okaãpokataua. Ítípokoãpokata.

—Ari, peerekari Teoso —itxanãta.

⁹ Ikinimane itikari iua títokotini. Ikenakotari ixikarauatini Teosomoni. ¹⁰ Ikinimane imarotari iua kiki aiko Íronakikoãtaã “Peereri” inakoriãtaã topãkanãtakari, txineiro amanaãntakari iua. Ininiã ninoa:

—Anekani. Kirípa atxiíti? Mítixi matípokotakati. Uatxa itítokotape. Kanatokopa itxa? —itxana.

Petro Sãpíretakiti Kákitimoni

¹¹ Apanakini kenakopíretana ninoa, ininiã imitekana ninoamoni matípokotakati pírena imarotínina íkapani. Iuasaaki ninoa auiniãtaã akírítãka “Saromão pakita.” Iuaã Petro, Xoão pakini aua mítxi matípokotakatíkata. Iua maíkakanokeãpotana Petro, Xoão pakini. ¹² Iua Petro atapana kákiti ninoamoni íkani. Itxana:

—Isaeo auakaníi, kinirepa híte títoka ere kiki títokotini hátamatakasaaki? Kinirepa híte itikaua ate? Na ate posotíireñi kamarí iua títokotini. Ate ereka aníni kona kamarí iua títokotini. ¹³ Apraãoni, Isakini, Xakooni pakini Teosone, ariakorini kitxakapíríkarini Teosone, iuara oerekapekaua imi Xesosi ereka iníni. Teoso ákirípitikara itxaua. Iua posotíire auapítika. Iuakara hísiika okiko íkapani. Eereka Pírato inakori nírekasaakiri isikakiniri. Híte !hinírekari iua síkakiniri Xesosi. ¹⁴ Iuasaaki híte kona nírekari erekarínoka kamakari. !Hinírekari iua atão inakarinoka kamakari. Híte amanaãri Pírato isikakiniri kokaniri hítemoni. ¹⁵ Ininiãkara híte okapiri kákiti auãki iníni kamakari. Iuaritika ípíkani sauaí Teoso ókitikari iua. Ate itikari atãopítikara iua ókitikiniri.

¹⁶ —Ia kiki hítikakiti himarotakiti kataparapeka itxa, kotxi iua auikari Xesosi posotíire. Iua auikari Xesosi sáikire erekapeka iníni íkapani. Hátamatarí híte apisatoó iua ereka iníni.

¹⁷ —Ininiã uatxa nitariakori, nimarotari híte, híte auíteakori pakini okapiri Xesosi atão himimarotakani xika. ¹⁸ Kitxakapíríka Teoso sáikire sãpíretakani oerekapekaua Kristo misíritiko. Ikara imisíritiko auapeka. ¹⁹ Ikara atoko ininiã, hítakanapariko himaerekani. Erekarí kimaporítí hínítako, ininiã Teoso makatxakari himaerekani. ²⁰ Iuasaaki Apiananiri kamapoxokonítai. Isikataparatai. Iuasaaki iua iokanatarí Xesosi imereékiti hítemoni. ²¹ Merepanika iua Xesosi kaikota iaxítí. Teoso kamariko imakinika amanerí. Iuasaaki Xesosi apoka iuaíkana. Iua atokokana itxana Teoso sáikire sãpíretakani kitxakapíríka. ²² Kitxakapíríka Moisesi txari:

Apiananiri híTeosone iokanataríko isáikire sãpíretakari hítemoni nota iokanatiní atokokana.

Hínirimane itxaua iua. Híkenakotaríko íkinika isãpíretakiti hítemoni.

²³ Ikinimane iua sáikire makenakotakati xipokaãkako.

²⁴ —Teoso sáikire sãpíretakari Samoeo inakori, eereka íkiníkana Teoso sáikire sãpíretakani pakini sãpíretapekari Teoso iokanatiniri imereékiti kákitimoni íkorasaaki. ²⁵ Teoso sáikire sãpíretakani anaakorirai híte, ininiãkara isáikire ninoamoni, iuatxíkana isáikire hítemoni uatxa. Itxari Apraãoni:

Áti pímekaniri síkaríko erekari íkíni itixítí auakanimoni,

itxa Teoso. Ininiã ikara Teoso sikaenetakiti hikiomaneakorinimoni, hitemoni apaka isikaeneta. ²⁶ Ininiã Teoso iokanataru iua ãkiri Xesosi hitemoni merepitapanika. Iokanataru iua hitemoni erekaru hitemoni isikini ikapani, himaerekani hitakanapini ikapani —itxa Petro.

4

Petro, Xoão Pakini Xoteo Auíteakori Apisatoõ

¹ Petro, Xoão pakini sãkirauatapanika kãkitimoni inakasaaki, sasetotxiakori, Teoso misãkiretiko aikoti ñikatakari, satoseoakori pakini apoka ninoamoni. ² Ininiã ninoa naiataua, kotxi Petro, Xoão pakini sãpiretari kãkiti ipikani õkitikiniua pirena, kotxi ninoa txari:

—Xesosi ipinaka atoko, iuaikana iua õkitikaua, ininiã ipikani õkitikauako.

³ Ininiãkara ninoa maikana Xoão, Petro pakini. Iuasaaki mapiãnikata, ininiã itakana kateia ãki ñkanõka iuaã inapinina ikapani. ⁴ Iuaritika itomaneri Petro sãkire kenakotakani auikapiretari iua sãkire. Siko mio kikiakori auikari Teoso sãkire Petro sãpiretakiti.

⁵ Katimatinikata Xoteo auíteakori, kiomãtxiakori, kaiõkatsopareriakori pakini apotiimane-taua Xerosareẽ. ⁶ Sasetotxiakori auíte apiatakari Anasi inakori iuaã aua. Inirimane Kaipasi inakori, Xoão inakori, Areãtari inakori pakini aua iuaã apanakini sasetotxiakori auíte nirimanekata. ⁷ Xoão, Petro pakini minaãka ninoa apisatoõ. Ipimaãrina:

—Kiposotiireẽpa hõkitikari matipokotakati? —itxana.

⁸ Erekaru Matamatakoti moianataru Petro. Ininiã iua txana ninoa:

—Aãuíteakori, akiomaneakori, ⁹ hinirekaru asãpiretinii uatxa erekaru akamakiti matikatumoni. Hinirekaru himarotiniru erekapeka inini. ¹⁰ Ininiã ikinika hite, ikinika Isaeo tixini auakani apaka, himarotariko ia. Xesosi Nasareekiru posotiireẽra ia kiki hite apisatoõ timakari makananitaãka. Iuara hite oka aamina ipiriãmitakari nopini. Iuara Teoso õkitika iuaikana ipikani sauaki. ¹¹ Kitxakapirika Teoso sãkire iõkatsopatakori sãpiretari Xesosi hite manirekakani, kotxi itxari:

Kai aapokotxi kamakanii, ! hinirekaru ãti kai soro. Iua kai himanirekakiniti apiaru itxapekaua. Apanakini kai soro maikakaru itxaua.

¹² —Xesosinokaru makatxakaru kãkiti maerekani. Kona ãti maerekanitxi makatxakakaru lauru ikini itixiti. Teoso sikaru iuanokaru kãkitimoni imaerekani imakatxakini ikapani —itxa Petro.

¹³ Ninoa tsorikaãnãtana Petro sãkire ikenakotakasaakina, kotxi Petro, Xoão pakini sãkirauata itaparaxinireritika. Mitxi kona ninoa apaiaõkarauata, iuaritika ninoa imarotaru atão isãkirauatini. Ninoa xinikaru:

—Ixi. Ninoa minakani. Iuaritika kikiitena, kotxi Xesosi moianariakori itxauana —itxana.

¹⁴ Ininiã !kasãkirena, kotxi matikati tipokotapeka ninoa apisatoõ. ¹⁵ Ininiã ipaniãtana Petro, Xoão pakini mapara isinina, ninoa auitetxiakori ininimoniuana isãkirauatinina ikapani. ¹⁶ Ininiã auitetxiakori txari:

—Kanatokopa atxatana ninoa? Kotxi ikinimane Xerosareẽ auakaru imarotaru itxikitakinirina matikati erekape inini. Atãopitikaru ninoa kamaru posotiiretxi. !Aposotaru akipatiniru ia sãkiretxiti, kotxi ikinipoko imarotapekaru matikati tipokotini. ¹⁷ Kona anirekaru ikaru pirena apikomoni iripiretini kãkiti sauaki. Ininiã atxanako ninoa: “Na apikomoni Xesosi pirena hããpiretapinikariko.”

¹⁸ Ininiã iuaikana akiritana. Eereka itxana:

—Kona hããpiretapinikariko apikomoni Xesosi pirena. Kona hõerekapiriko iuaikana Xesosi pirena —itxana.

¹⁹ Ininiã Petro, Xoão pakini apakapapiretana:

—Kiripa atão akipitini? Hitekani? Teosokani? Kipa erekaru? Hite mereeri. ²⁰ Kona aposotaru atakanapiniru asãpiretiniru aitikakiti, akenakotakiti pakini —itxana.

²¹ Ininiã iuaikana auitetxiakori txitana. Iposo atoko auiritana isinina, kotxi maerekati ! ikamana. !misiritana, kotxi ipikarinna kãkiti. Ikinimane kãkiti txari:

—Peerekaru Teoso kamakiti matikati ikapani —itxana.

²² Ikora kiki makananitakori koarãta anope iuasaaki.

Xesosi Sãkire Auiãkani Misãkiretiniru Teoso

²³ Xoão, Petro pakini sikakikosaaki, ninoa kanapiriã moianariakorimoni. Ikinika sasetotxi auíteakori sãkire, kiomãtxiakori sãkire pakini ikinika isãpiretana. ²⁴ Ikara ikenakotakasaakina, ikinikana misãkiretari Teoso. Ininiã itxana:

—Apiananiru, ikinika posotiiretxi auaru pitemoni. Pitenanira Teoso pitxaua. Pite kamaru iaxiti, itixi, potxoaru uiniru pakini. Imakinika iaxiti auakani, itixi auakani, potxoaru uiniru auakani pakini pikama. ²⁵ Kitxakapirika Erekaru Matamatakoti kamaimaroretaru pinitiru aãtokiru Tavii. Ininiã itxari:

Kinirepa kákiti Teoso manirekaákani omanákarauata? Kinirepa kákiti maxikatíika xinikari maerekati ikamini átimoni?

²⁶ Auítetxiakori apotiitaua neenamtxi ikaminina íkapani. Ninoa apotiitaua Apiananiri inaiatinina íkapani, imereékiti apaka inaiatinina íkapani, itxa Tavii.

²⁷ —Atáopitikara Erotxi, Pósió Pirato pakini apotiitaua Xoteo minakonikata, Xoteoakori pakinikata. Ninoa apotiitaua uai ia sitatxitiá. Isákirauatana pamarite Xesosi okinina íkapani. Txamari pite mereéeri iua erekarinoka kamakari. ²⁸ Mitxi pite imarotari imakinika ninoa kamakiti úkane. Kákiti kamari pinirekakiti, kotxi kaposotiirei. ²⁹ Ininiá aáúite, pixinikariko ikara maerekapirenati. Pisikataparaxiniretaua ate pinitiriakoriua pisákiere asápiretini íkapani. ³⁰ Pamarite erekari kamakari Xesosi posotiireé pimakananítanako amianatakani. Kákiti maposotakiniti pikamako. Posotiiretxi pikamako pisákiere aóerekini íkapani. Ikara pikamako pamarite Xesosi posotiireé —itxana ninoa Teosomoni.

³¹ Teoso imisákiiretaákana atoko, ninoa apotiitiniátaúua íakeka. Erekarí Matamatakoti apoka ikinimanemoni. Ininiá itaparaxinireritikana isápiretarina Teoso sákiere kákitimoni.

Teoso Sákiere Auiákaní Moianatari Itariakori

³² Ikinika Teoso sákiere auiákaní átika kákiti xinire atoko itxauana. Kona itxana: “Nota nakitira ia,” kona itxana. Kapotxinaniri !auari. Ninoa xanakari ikinika itiina. ³³ Xesosi iokanatakini itaparaxinireritikana txari ikinimanemoni:

—Xesosi Apiananiri iuaákana ókitikaua ípinaka atoko. Ate imarotari, kotxi ate aókitari iua ípinaka atoko —itxana kákitimoni.

Ininiá kara Teoso sikari ikinika erekari ninoamoni. ³⁴ Ninoa sauaki tiitxi amonítakari !auari. Kikio ípi auniári, kakikioteri vétxitari átika. Aapokotxi ípi auniári, kaapokori vétxitari átika. Oa txineiro ninoa sika ³⁵ Xesosi iokanatakinimoni. Eereka ninoa xanakaro oa txineiro matiitininimoni.

³⁶ Iuasaaki aua Xosee. Sasetotxi, Arevii apika mekaniri itxaua. Xipri inakori pokomirítikiri iua. Xesosi iokanatakini takauákatari iua Panapee inaáka. Popíkari sákiereé iuáka: “Kasikapoxokoniri,” kotxi átipirika isikapoxokonitari kákiti. ³⁷ Iua vétxitari átika ikikiote. Iua kikio íki isika Xesosi iokanatakinimoni.

5

Ananíasi, Sapira Pakini

¹ Iuasaaki auari Ananíasi inakori, ítanoro Sapira inakoro pakini. Iua vétxitari kikio. ² Ikaikotakaro ípixini kikio íki. Ípixininoka isika Xesosi iokanatakinimoni. Sapira imarotari ótaniri kamakiti. Txamari iua sikasaakiro oa txineiro Xesosi iokanatakinimoni, itxari: —Ikinika kikio íki asika Teosomoni —itxa.

³ Iuasaaki Petro txari:

—Ananíasi, kinirepa paúiritari Satanasi misirienetinií maerekati pikamini íkapani? Erekarí Matamatakotira pimisirieneta, kotxi ípixini kikio íki kaikota pitekata. Kinirepa pisápiretari ikinika txineiro pisikini Teosomoni? ⁴ Kikio pivétxitini apisapanika, íkora kikio pite nakiti. Eereka pivétxitakasaakiri, ókora txineiro pite nakito. Ininiá kinirepa pitxari: “Ikinika nisika Teosomoni?” Kona kákitini pimisirieneta. Teosora pimisirieneta —Petro txari.

⁵ Iuasaakipeka Ananíasi iripe. Ipípe. Ininiá ikara kenakotakani píkarauakata. ⁶ Iuasaaki átokoriakori íapirikari Ananíasini íto mákatxi mataá ikatinirina íkapani. Eereka anikarina, kata itxarina iuani.

⁷ Ípi oara, áti oara pakini napaka atoko iua ítanoro apoka. Kona oimarotapanikari óitanirini ípinini. ⁸ Ininiá Petro txaro:

—Pisápiretano. Oia txineironokani híkikiote íki hápakapakito aua? Atáo pisápiretano? — itxaro.

Ininiá oa:

—Ari aroanokara ate apakapakito aua —otxari.

⁹ Ininiá Petro:

—Híte uákatatari Erekarí Matamatakoti aúiritai himisirienetiniri iua? Uatxaika íronakikoátaá pítanirini katakani apokapeka. Ininiá ninoa anikapitíkai pite apaka —itxaro.

¹⁰ Iuasaakipeka oírpe, pípe otxa. Iuaákana ninoa átokoriakori íroá. Apokarona oani, ininiá anikarona. Ikatarona ótanirini takote. ¹¹ Ininiá ikinipoko Xesosi sákiere auiákaní, apanakini ikara kenakoenetakani pakini píkarauata.

Amianatakani Makananítiko

¹² Iuasaaki Xesosi iokanatakini kamanátari posotiiretxi, kákiti mimarotakiniti pakini kákiti sauaki. Ikiniótika Xesosi sákiere auiákaní apotiitaua Teoso misákiereitikoátaá, “Saromão

pakita” akiritakori. ¹³ Xesosi sákire mauíákani apokaerekatana ninoa, txamari ipíkarena xika !inirekarina imoianatinina. ¹⁴ Iuaritika apikomoni kákiti apotiiápotaua ninoakata, kotxi kikiakori, sitoakoro pakini auikari Apiananiri sákire. ¹⁵ Iuasaaki Xesosi iokanatakini makananitana amianatakani, ininiákara kákiti anikana amianatakani kimaporimoni. Sirimatatxi nopini itakana ninoa kimaporiátaá. Ininiá kákiti xinikari: “Petro napakasaaki, isanóka amianatakanimoni apokiniá, imakananitaákana.” ¹⁶ Ininiá kaiáopokori kákiti Xerosareé takotekini apoka. Ninoa minana amianatakani, apaka kákiti maerekani mata-matakoni misiritakini pakini. Ininiá Xesosi iokanatakini makananitana imakinikana.

Xesosi Iokanatakini Misiritiko

¹⁷ Iuasaaki sasetotxi auíte apiatakari, imoianariakorikata, satoseoakorikata xikotana Xesosi iokanatakini. ¹⁸ Ininiá ninoa maíkana. Eereka kateia áki taka itxapena ninoa. ¹⁹ Iua íkanókati Teoso nitiri iaxitikiri matakakari kateia tore. Eereka anika itxana iporikití. Itxana:

²⁰ —Hísa Teoso misákiretiko aikotimoni. Iuaá híspiretariko Teoso sákire kákitimoni kákiti auini amaneri inini íkapani —itxa Teoso nitiri.

²¹ Ininiá íkanókapanika ninoa sari Teoso misákiretiko aikotimoni. Teoso nitiri sákire iaóka ikamana. Iuaá isápiretarina Teoso sákire kákitimoni.

Iuasaaki sasetotxi auíte apiatakari, imoianariakorikata píkapiretana Xoteoakori kótákikarerini, Xoteo kiomaneakori pakini, ininiá imakinika ninoa apakítakana Xesosi iokanatakini. ²² Ininiá apanakini sari kateiamoni apinina íkapani. Txamari apokasaakina iuaá, !auaikana Xesosi iokanatakini. Ininiá íkanapiriána auítetxiakorimoni isápiretinina íkapani. ²³ Ininiá itxana:

—Ate apokasaaki kateia tore, itotaákanika. Kateia níkatankani auanáta itore takote. Txamari itore amatakasaaki, kákiti !auaika iriko áki —itxana.

²⁴ Ininiá sasetotxi auíte apiatakari, Teoso aikote níkatankani auíte, sasetotxiakori pakini kenakoenetakasaakiri ikara sákiretxiti:

—Anekani? Nápa ninoa atxiíti? Kiripa apikomoni auatako? —itxana.

²⁵ Iuasaakipeka kiki apoka. Isápiretana:

—Híkenakotariko nisákire. Ninoa kikiakori kateia áki hítakakini Teoso misákiretiko aikoti áki aua. Oerekanátarina Teoso sákire kákitimoni —itxana.

²⁶ Ininiá Teoso misákiretiko aikoti níkatankani auíte, initiriakorikata sari iuaá. Ninoa minana Xesosi iokanatakini iuaíkana auítetxiakorimoni. Imaíkasaakina, kona iaritatana, kotxi ipíkarina kákiti kai soroá kiporonakinina. ²⁷ Ninoa apokasaaki, ipaniátana Xesosi iokanatakini Xoteoakori kótákikarerini apisatoó itiminina. Sasetotxi auíte apiatakari txana:

²⁸ —Mitxi ate paniátaí Xesosi sákire hímasápiretakani kákitimoni. Txamari hõerekapanikari iua sákire ikinimane Xerosareé auakanimoni. Ate xika Xesosi ípina, hítxanáta ikini-manemoni —itxa sasetotxi auíte.

²⁹ Ininiá Petro, apanakini Xesosi iokanatakinkata apakapiretari:

—Ate kípitari Teoso paniátakiti. Kona kákiti paniátakitiini akípita. ³⁰ Teoso, akiomaneakorini Teosone, ókitikari Xesosi iuaíkana auini íkapani. Hítara okari iua Xesosi aamina ípiriámitakari nopini. ³¹ Iuaritika Teoso takari Xesosi ikikomoni. Itxíkítakari iua auítetxi ininiua. Kákiti maerekani makatxaákari itxaua. Ininiá Isaeo auakani takanapiniári imaerekani, Xesosi makatxakari ninoa maerekani. ³² Ikara ate imarota. Apaka Erekari Matamatakoti imarotari ikara. Teoso sikari iua Erekari Matamatakoti isákire kípitakanimoni —itxa Petro ninoamoni.

³³ Ikara íkenakotakasaakina, iteene omanákarauatana. Ininiá ninoa:

—Máokana —itxana.

³⁴ Iuasaaki Kamarieo inakori ókitikaua kótákikarerini sauaki. Pariseo itxaua. Teoso paniátakiti oerekakari itxaua. Ikinimane paxitari iua. Ininiá iua txari:

—Hanikana naia mapara atenoka asákirauatini íkapani —itxa.

³⁵ Ininiá eereka itxana:

—Isaeo tixini auakanii, híkitetariko híkamakiti ninoa Xesosi moianariakorimoni.

³⁶ Akokaxiti auari Teota inakori. Iua txari: “Auítetxi apiatakari nitxaua nota,” itxa. Iuasaaki koatrosétosi kikiakori moianatari iua. Auikarina iua sákire. Txamari okapeéka iuani. Eereka iuakata sikani iarikape. Iua auítetxi ininiua xipope. Isákire !auikaákaika.

³⁷ —Teotani ipinaka atoko Xotasi Kariréiakiri apoka. Iuasaaki auítetxiakori iaótari ikini-mane kákiti. Kaiáopokori kákiti auikari iua Xotasi sákire, ininiá ninoa moianatari iua. Iua Xotasi imoianariakorikata nirekari ixipokinina auítetxiakori. Txamari iua apaka okapeéka, ininiá imoianariakori iarikape.

³⁸ —Ininiá uatxaikara nótákikai híte: “Hítakanapanako ninoa Xesosi iokanatakini. Hísikakanako ninoa, kotxi atxiíti ninoa !íkamari Teoso paniátakiti, ininiá paítiki ninoa sákire

apaka !auaika. ³⁹ Txamari, ninoa kaminiári Teoso paniátakiti, erepaniko, kotxi atxiiti hínaiatari Teoso” —itxa Kamarieo.

Iuasaaki ninoa Xoteo ôtâkikakani kîpitari Kamarieo sâkire. ⁴⁰ Akiritana Xesosi iokanatakini iuaikana iïroinina. Ipaniâtari ninoa xirokitatiko. Ininiâ ninoa:

—Xesosi sâkire kona hîsâpiretapinikako —itxana.

Eereka sikaka itxana isinina îkapani. ⁴¹ Isikasaakina, îpoxokoniuatana.

—Teoso apokaerekataua ate, kotxi auritari amisiritiko Xesosi sâkire aûuikini xika —itxana.

⁴² Ininiâ ikiniôtika oerekarauatana Teoso misâkiretiko aikoti âki, kâkiti aapoko âki apaka. Isâpiretarina erekari pîrena Xesosi Teoso mereêkiti ininiua pîrena.

6

Setxi Kikiakori Mereïko

¹ Xesosi sâkire auiâkani apiaâpota. Iuasaaki Xoteoakori Kreko sâkire imarotakani taparakienatana apanakini Xoteoakori. Itxana:

—Atekata auakani sitoakoro tikinitakoni kona apakapari nipokori ikiniôtika apanakini tikinitakoni apakapiniri atoko —itxana ninoa.

² Ininiâ Xesosi iokanatakini tosi pakini pîkapiretana ikinimane Xesosi sâkire auiâkani. Itxana:

—Kona erekari ate takanapiniri Teoso sâkire aôerekini asikakienarauatini îkapani. ³ Ininiâ setxi kikiakori himereêko, ikara parîkatxi ikaminina îkapani. Himereêna Erekari Matamatakoti paniâtakitinoka kamakani. Himereêna kimarorerini. Ininiâ asikana ia parîkatxi ikaminina, sitoakoro tikinitakoni isikakienatinina îkapani. ⁴ Ininiâ atepekana, Teoso amisâkireta. Isâkire aôereka. Ikaranoka akamako ikiniôtika —itxana.

⁵ Ikinimane Xesosi sâkire auiâkani apokaerekatari Xesosi iokanatakini sâkire, ininiâ ninoa mereêri Estevão. Iua iteene auikari Teoso sâkire. Erekari Matamatakoti paniâtakitinokara ikama. Apaka imereêna Pîripima, Porôkoroma, Nikanooma, Tximoma, Pamenama, Nikoraoma pakini. Iua Nikorao Âtxiokiakiri itxaua. Mitxi Xoteo minakatiua iua, eereka imamakaua. Xoteopeka itxapekaua. ⁶ Xesosi sâkire auiâkani minana ninoa Xesosi iokanatakinimoni. Ininiâ Xesosi iokanatakini misâkiretari Teoso. Iuakona itakana ninoa nopini, ikara Teoso parîka ikaminina tîkane.

⁷ Ikara atoko ininiâ, Teoso sâkire iaripireta apikoxiti. Ininiâ mokatanitika kaiâori Xerosareê auakani auikari Xesosi sâkire. Ito sasetotxiakori apaka kîpitari Xesosi sâkire.

Estevão Maïkiko

⁸ Estevão iteene auikari Xesosi sâkire. Teoso posotiire aua iuamoni. Kaposotiireri iua, ininiâ ikamari kâkiti mimarotakiniti. Ikamari posotiiretxi, Teoso posotiire oerekini îkapani. ⁹ Txamari âtikaka kikiakori !inirekari iua. Ninoa âti Xoteo apotiitiniâtaâua aikoti sikani. Ninoa “Ninoaka nireêkiti kamakani” akiritaâkana. Ninoa Sireni sitatxitikini, Arexâtria sitatxitikini, Sirisia tixinikini, Ásia tixinikini pakini. Ninoa iteene misâkiretakakaua Estevãoakota, kotxi !auikarina iua sâkire. ¹⁰ Txamari Estevão sâkiranauatata atoko, !kasâkireikana, kotxi Erekari Matamatakoti sikaimaroretari iua Estevão. ¹¹ Ininiâ ninoa sikari txineiro apanakini kikiakorimoni Estevão apoîtinina îkapani. Ininiâ ninoa txineiro apakapakani txari:

—Ate kenakotari iua, Moisesini imisâkirepiretini, Teoso apaka imisâkirepiretini —itxana.

Txamari na atâoni isâkirena. ¹² Ikara isâkirena xika, kiomâtxiakori, kaiôkatsopareriakori, apanakini kâkiti pakini naiataua, ininiâkara imaïkarina Estevão, kôtâkikarerinimoni anika itxarina iua.

¹³ Eereka iminana apanakini, Estevão imisâkirepiretinina îkapani. Ninoa txari:

—Ia kiki misâkirepiretapikari Teoso misâkiretiko aikoti. Apaka kona inirekari Moisesi paniâtakiti. ¹⁴ Ate kenakotari iua sâkire: “Xesosi Nasareekiri xipokariko Teoso misâkiretiko aikoti. Ixipokariko akiomaneakorini sâkire Moisesini paniâtakiti.”

Ikara atoko aâpîrena ikamana ninoa. ¹⁵ Ikinimane ninoa kâkiti ôtâkikakani atamatari Estevão toô. Teoso nitiri iaxitikiri toô atokokana itxa Estevão toô.

7

Estevão Sâkiranauata Kôtâkikarerimoni

¹ Ininiâ sasetotxiakori aulte apiatakari txari Estevão:

—Atâokani ninoa sâkire?

² Estevão txari:

—Nikiomaneakori, nitariakori pakini, hîkenakotanoko. Teoso iaxitikiri oerekaua aâtokirini Apraônimoni. Mesopotâmia tixini auakasaaki, Araâ tixini auini apisapanika, Teoso motika

iuamoni. ³ Iuasaaki Teoso txari iua: “Pítakanapariko pitixine, pinirimane pakini. Áti tixinimoni pisako. Noerekinimoni pisako,” itxa Teoso. ⁴ Ininiã sipe itxa Apraão. Itakanapari Kaotéia inakori tixini. Araã tixinimoni iua sipe. Araã auakasaaki irini ipípe. Irini ipinaka atoko. Teoso mipiri iua uaimoni uatxa aãuiniãtaã. ⁵ Apraão auakasaaki, Teoso ! isikari uai tãpa iuamoni iua nakiti inini íkapani. Kona ipixini metro isika iuamoni inakiti inini íkapani. Isikaenetari uai tãpa iua, imekaniriakori pakinimoni. Txamari !keeneri iua iuasaaki. ⁶ Teoso txari Apraãomoni: “Pamariteni, pimekaniriakori, papika mekaniriakori auako áti kãkiti tixine. Iuaãrako imisiritapeẽkanako koatrosẽtosi anokanani. Iparíkauatana apanakini íkapani maxikatíika. Ininiã iteene imisiritiko aua.”

⁷ —“Ininiãkara nimisiritariko ninoa misiritakani. Eereka Apraão apika mekaniriakori takanapariko iuaã, uaimoni kanapiriã itxanako. Ininiã íkorapokoriti ninoa paríkauatoko nota íkapani,” itxa Teoso. ⁸ Ininiã Teoso txari: “Híte kitsotakariko ikini hamariteni tsiki mata. Ikara nitakaõtxikare hãtamatakasaaki, hĩxinikariko nisikaenetakiti,” itxa Teoso. Eereka Apraão ákiri aua, Isaki inakori. Oito õtipeka auini õti inakasaaki, Apraão kitsotakari itsiki mata. Isaki aneẽkasaaki, imi Xakoo inakori aua. Eereka Xakoo anaakori auapeka tosi pakini. Ikara tosi imiakori aãtokiriakorini iriakori itxauana.

Xosee Pirena

⁹ —Xakoo anaakori xikotari itarina Xosee inakori. Ininiã itariakori vẽtxitari iua Exito sikanimoni. Iuaritika Teoso auapika iuakata. ¹⁰ Imisiritiko auakasaaki, Teoso moianatari iua imapinakani íkapani. Iuasaaki Exito auakani auite Paraoo inakori. Teoso sikaimaroretari Xosee, ininiã Paraoo potxitari iua, ininiã Paraoo txari iua: “Exito auakani auite pitxauako. Naapoko auakani pinikata apaka,” itxa Paraoo Xoseemoni.

¹¹ —Eereka makienanitxi aua Exito tixiniã, Kanaã tixiniã apaka, ininiã ikinimane natxita. Aãtokiriakorini apaka ! auari nipokori. ! Apokari nipokori. ¹² Ininiã Xakoo kenakoenetari triko auini Exito tixini. Ininiã ipaniãtana tesa imiakori Exito tixinimoni isinina. Mitxi isana Exitomoni.

¹³ —Ininiã iuaíkana áti õti isana Exitomoni, kienatxi iamotinina íkapani. Iuasaaki Xosee oerekaua ninoamoni. Iuasaaki Paraoo imarotari Xosee nirimane. ¹⁴ Ininiã Xosee píkapiretari iri Xakoo, itariakorikata, inirimanekata. Setẽta síko pakini kãkiti sari Exito tixinimoni, kotxi aua íkinipoko nipokori iuaã.

¹⁵ —Ininiã Xakoo apanakinikata sari Exitomoni. Iuaã mapakanani atoko Xakooni ipípe. Eereka aãtokiriakorini ipina iuaãtaã apaka. ¹⁶ Ninoa ipíkasaakina, íltona anikapeẽka Síkeẽ tixinimoni. Iuaãkiri akauaritiã ikata inapeẽkana. Apraãoni auapanika inakasaaki, iamotari iua akauari Emoo ákiriakorimoni.

Moisesi Pirena

¹⁷ —Itixi Teoso sikaenetakiti Apraãomoni kaiamapeka Xoteoakorimoni inakasaaki, kãkiti Isaeokini kaiãopokoikana Exito tixiniã. ¹⁸ Itokanani napaka atoko, áti Exito auakani auite Xoseeni mimarotakati aua. ¹⁹ Iua auítetxi misiritari anirimaneakorini. Ininiã sotatoakori mixirika itxapena amarini xapitiri. Eereka oka itxapena.

²⁰ —Iuasaakiikara Moisesi iponaniã. Moisesi amarinipanika inakasaakia peerepatikiri. Ipi, áti pakini kasiriti iri, inoro pakini níkatari iua ninoa aapoko. ²¹ Eereka ninoa takanapari iua Paraoo ákero kipaãtiniãtaãu takote. Ininiã oa apokari iua amarini. Oanikari oaãpokomoni. ²² Exito auakani imarore íkinipoko oerekaãka iuamoni. Kasãkireri iua. Kakamareri iua.

²³ —Koarẽta anokanani inakasaaki, inirekari inirimane Isaeokini aõkitini. ²⁴ Inirimanemoni isikasaaki, itikari Exito auakari xirokitatiniri kiki Isaeokiri, ininiã ixikatxitari. Iua aritapiri Exito auakari, oka itxapiri iuani. ²⁵ Iuasaaki Moisesi uãkatari inirimane Isaeokini imarotiniri Teoso nirekari Moisesi makatxakinina ninoa, Exito auakani mamisiritakanina íkapani. Txamari ninoa ! imarotari ikara. ²⁶ Apikomoni áti õti, iua sari inirimanemoni. Iuaã iua apokana ninoa neenamauanãtini, inaiapoatakauana. Ininiã Moisesi õtãkikana ninoa. Ítxana: “Kikiakori hĩaritakakaua. Kinirepa himisiritakakaua?”

²⁷ —Inirimane misiritakari katika txari Moisesi: “Kipa txai pite ate auite pininiua? Kipa txai pite ate õtãkikakari pininiua?” ²⁸ Kita Exitokirini pokini atokokana pokatanoko nota?” itxa. ²⁹ Ikara sãkiretixiti ikenakotakasaaki, Moisesi takanapari Exito tixini. Mitxiaã tixinimoni isa. Iuaã ítanorouata. Ipi imiakori aua iuamoni.

³⁰ —Koarẽta anokanani áparã makipakanianãtaã iua aua iuasaaki. Teoso nitiri iax-itikiri motika Moisesimoni ixirata Sinai inakoriãtaã. Iuasaaki iua atamatari aanaia tirinini, txama ! arika. ! Ixipoka. ³¹ Ikara itikasaaki, Moisesi tsoríkaãta, ininiã aanaia takote isa iteene atamatini íkapani. Iuasaakipeka ikenakotari Apiananiri sãkirauatini: ³² “Pikiomaneakori Teosonekarano nota. Apraão, Isaki, Xakoo pakini Teosonekarano

nota,” itxa Teoso. Iuasaaki Moisesi kikinanaka ipikare xika. Ipikari Teoso sákirauatini manapi atamatini.

³³ —Ininiã Apiananiri txari iua: “Pikitimata pimakatzaka, kotxi uai pitiminiãtaã nota auanãta. ³⁴ Nitikana ninakitiakori Exito tixiniã. Exito auakani misiritapena ninoani. Nikenakotari oõkinina. Nota inari nisikakinina ikapani. Ininiãkarako Exito tixinimoni niokanatai pite,” Apiananiri txari Moisesi.

³⁵ —Iua Moisesi Isaeokini manirekakiniti, kotxi ninoa txari: “Kipa txai pite ate auite pininiua? Kipa txai pite ate õtãkikakari pininiua?” itxarina. Iuakara Teoso iokanatakiti ninoamoni ninoa auite ininiua ikapani, ninoa imakatzakini ikapani, kotxi Teoso nitiri aanaiaã tirinakariã auakari iokanitari iua ninoamoni.

³⁶ —Eereka iua makatzakana ninoa Exito tixini. Oerekari Teoso posotiire kãkiti maposotakiniti Exito tixiniã. Oerekari Teoso posotiire potxoari uiniti, Põkamarari inakoriã. Áparaã makipakaniãtaã apaka oerekari Teoso posotiire koarëta anokanani iuaãtaã.

³⁷ —Ia Moisesikara säporetana Isaeokini: “Teoso iokanatariko isãkire säporetakari hitemoni nota iokanatini atokokana. Hite nirimaneakara iua. Hikenakotariko iua säkire,” itxa Moisesi. ³⁸ Moisesi aua Teoso nakitiakorikata áparaã makipakaniãtaã. Aãtokiriakorini aua iuakata. Apaka Teoso nitiri iaxitikiri aua iuakata. Iua Teoso nitiri misãkiretari Moisesi ixirata Sinai inakoriãtaã auakasaaki. Iua apakapari Teoso säkire, atemoni isikini ikapani. Iua Teoso säkire txikitakari iua säkire auãkani átipirika auini Teosokata.

³⁹ —Aãtokiriakorini kona nirekari inãkaenetinirina Moisesi säkire. Inirekarina iua. Inirekarina Exitomoni ikanapiriinina. ⁴⁰ Iuasaaki ninoa paniãtari Arão: “Teosoakori kamakoni pikaminaua, ate mikiikakani tãkane. Íkora Moisesi Exito tixini amakatzakakiri, itapari iua? !Aimarotari iua auiniãtaã,” itxarina Arãomoni. ⁴¹ Ininiã ninoa kamari kema auite ãkiri atoko inakari oro kamakori iteosonetinina ikapani. Eereka okarina soti auite teoso ikamakitina isikinina ikapani. Kiiniri ikamana. Ipoxononuatana, kotxi ninoaaka kamari iteosonena. ⁴² Txamari Teoso atão inakari takanapana ninoa. Ininiã iteosonetarina iaxiti auakani iõriki, kasiri, atokatxi pakini. Teoso säkire säporetakani kitxakapirika iõkatsopatari ia säkiretxiti:

Hite Isaeokini, koarëta anokanani áparaã makipakaniãtaã hãuakasaaki, !hõkari pirãtxi nota ikapani.

⁴³ Iuasaaki hite anikari papiri aamata kamakori hiteosone Moroki inakori ikapani. Apaka iõriki atoko inakari hiteosone Hëpaã inakori hikamakiti hanika hitekata iuasaaki. Hite kamari Moroki, Hëpaã pakini hiteosonetini ikapani. Ikara xika nota iokanataiko hite ãti kãkiti tixinemoni. Papirõnia sitatxiti apikoxiti niokanatai hite.

Teoso Papire Pirena

⁴⁴ —Aãtokiriakorini auari papiri aamata kamakori Teoso misãkiretiko papire áparaã makipakaniãtaã auakasaakina. Moisesi kamari iua papiri Teoso paniãtakiti iaõka, kotxi Teoso oerekari Moisesi iua papiri kamiko. ⁴⁵ Moisesi ipinaka atoko apanakini aãtokiriakorini apakapari iua papiri irina sikakiti. Ininiã iuasaaki ninoa anikari iua papiri, Xosoeekata isikasaakina, ãti uãka tixine imixirikasaakina, kotxi Teoso omitikana ninoa ãti uãka, aãtokiriakorini apokasaaki iuaã. Iua papiri kaikota iuaã. Auapanika iuaã Tavii aãtokiriakorini auite inakasaakia. ⁴⁶ Teoso apokaerekatari Tavii, ininiã Tavii nirekari Xakoo Teosone misãkiretiko aikoti ikamini. ⁴⁷ Txama Teoso !auiritari Tavii kaminiri. Ininiã Saromão, iua ãkiri kamari Teoso misãkiretiko aikoti.

⁴⁸ —Teoso Apiananiri kona uua aapokotxi kãkiti kamakiti ãki, kotxi Teoso säkire säporetakari kitxakapirika txari:

⁴⁹ Apiananiri txari: “Niitopãkiniãtaã iaxiti itxa. Itixi nikiti nitakiniãtaã. Ininiã kanatokopa itxa aapokotxi hikamini nota ikapani? Namonipa nauiniãtaã?”

⁵⁰ Kotxi notakara kamari ikinipoko,” itxa.

Erekari Matamatakoti Manirekakani

⁵¹ Estevão säkirauatapanika:

—Hite kona kinirão kenakotaka txari Teoso säkire. Hitsiki mata kisauakaãkapitika, txamari kona hikenakotari Teoso säkire hãkixinireë. Átipirika kona hinirekari Erekari Matamatakoti paniãtakiti hikamini. Hãtokiriakorini kitxakapirika atokotxikana hite. ⁵² Hãtokiriakorini misiritana ikinimane Teoso säkire säporetakani. Ninoa okana iua säkire säporetakani, Erekarinoka Kamakari säporetakani. Ninoa Teoso säkire säporetakani säporetari Erekarinoka Kamakari ãti õti uai apokini. Íkorasaaki hitera mikapiritari iua. Hitera okari iua Erekarinoka Kamakari. ⁵³ Hitekara apakapapereki Teoso säkire Teoso nitiriakorini mikiti. Iuaritika !hikamari ipaniãtakiti —itxa Estevão.

Estevão Kipronakiko

⁵⁴ Xoteoakori kenakotakasaakiri Estevão sãkire, omanãkarauatana. Akatsakatsiriñitauana omanãkarena xika. ⁵⁵ Iuaritika Erekar Matamatakoti iteene sikataparaxiniretari Estevão. Iuasaaki iua ionakaãta iaxiti. Atamatari Teoso iotximere. Atamatari Xesosi timini Teoso kikomoni. ⁵⁶ Ininiã itxa:

—Hätamata. Natamatari iaxiti xorekini. Aĩtari iaxitikiri tima Teoso kikomoni —itxa Estevão.

⁵⁷ Iuasaaki Xoteoakori totari ikenakokina iuakoãna. Iteene ninoa akiripoakata. Eereka ninoa ikinika miteka iuamoni. ⁵⁸ Imaĩkarina. Ikosekaãpotarina sitatxi mapotõkire. Iuaãtaã ipotorikana ikiporonakinirina iua kai soroã. Iuasaaki itikaruatakani takari imãkana Saoro inakori kiti takote inikatinĩ ikapani. ⁵⁹ Ikiporonakasaakirina, Estevão akiritari Teoso. Itxari:

—Apiananiri Xesosi, papakapariko nixinire.

⁶⁰ Iuasaaki ikapotoreẽkaua. Itapasãkireritika akiritari Teoso:

—Apiananiri, pimaxinĩkaretariko ia maerekati ninoa kamakiti —itxa. Iuasaakipeka ipĩpe.

8

Xesosi Sãkire Auiãkani Misiritiko

¹ Estevão ipĩkasaaki Saoro aua iuaã.

—Ari erekapitikari ipinini —itxa Saoro.

Estevãoni ipinini õtisaakipeka ipotorika Xesosi sãkire auiãkani misiritiko Xerosareẽ. Ninoa iteene misiritaãka, ininiã ikinimane Xesosi sãkire auiãkani Xerosareẽ auakani iarika itxapena. Xotĩa tõpamoni, Samaria tõpamoni pakini iarikana. Xesosi iokanatakininoka kaikota Xerosareẽ. ² Estevão ipinaka atoko kikiakori Teoso sãkire auiãkani katari iuani. Iteene itxiapatana. ³ Iuasaaki Saoro potorika ixipokinina Xesosi sãkire auiãkani. Ninoa aapokomoni isaãpota. Kikiãkini, sitoakoro apaka ikosekaĩtota, taka itxana kateia ãki.

Piripi Samariamoni Sini

⁴ Teoso sãkire auiãkani iarikasaaki, isãpiretarina Teoso sãkire ikini aapokotxitiã. ⁵ Piripi sari Samaria sitatxitimoni. Iuaã iua sãpiretari kãkiti Xesosi Teoso mereẽkiti ininiua. ⁶ Isãkire ikenakotakasaakina, posotiiretxi ikamakiti itikasaakina, iteene ikenakotarina isãkire. Imixinikarina isãpiretakiti. ⁷ Maerekani matamatakoni kãkiti auãtotakini takanapari kãkiti. Akiripoakatana ipokĩkasaakina. Kaiõpokori matĩpokotakani apaka makananitaãka. ⁸ Ininiã Samaria auakani iteene poxokoniuata.

Mĩiti Simão Inakori

⁹ Iuasaaki Samaria sitatxitiaã aua kiki Simão inakori. Mĩiti itxaua iua. Imisirienetana kãkiti Samaria auakani. Ininiã ikinimane tsorĩkaãta, ikamakiti atamatakasaaki. Iua iuikaua.

—Kimaroreno nota —itxa.

¹⁰ Ininiã ikinimane kĩpitari iua sãkire. Auĩtetxiakori, poiãorini pakini kĩpitari isãkire. Ininiã itxana:

—Iua Simão auari Teoso posotiire. Kaposotiireri iua —itxana.

¹¹ Ininiã ikĩpitarina isãkire, kotxi itokatapeka itikarina ikamakiti kãkiti mimarotakiniti. ¹² Ninoa auikasaakiri Piripi sãpiretakiti erekari pirena, Teoso auĩtetxi ininiãua pirena, Xesosi Kristo posotiire pirena pakini, kikiakori, sitoakoro apaka patxisataãka. ¹³ Iuasaaki Simão apaka auikari. Ipatxisataãka. Ininiã isari Piripi sinimoni, kotxi itsorĩkaãta, posotiiretxi kãkiti mimarotakiniti itikasaaki.

¹⁴ Xesosi iokanatakini Xerosareẽ auakani kenakopiretari Samaria auakani auikiniri Teoso sãkire. Ininiã ninoa iokanataro Petro, Xoão pakini Samariamoni. ¹⁵ Iuaã apokasaakina, imisãkiretarina Teoso, Erekar Matamatakoti isãkire auiãkani apakapini ikapani. ¹⁶ Erekar Matamatakoti kona apokapanika ninoamoni iuasaaki. Apiananiri Xesosi uãkaãnanira ipatxisataãkana. ¹⁷ Ininiã Petro, Xoão pakini takari iuakona ninoa nopini. Iuasaakipeka apakaparina Erekar Matamatakoti.

¹⁸ Simão itikasaakiri Erekar Matamatakoti apokini kãkitimoni, kinirão sikaka itxaro txineiro Petro, Xoão pakinimoni. ¹⁹ Ininiã itxa:

—Ĩkora hĩposotiire hĩsikano, niuako kãkiti nopini nitakasaaki, Erekar Matamatakoti ninoamoni apokini ikapani —itxa.

²⁰ Txamari Petro txari:

—Pite, pitxineirotekata samakauako, kotxi pite uãkatari pitxineirote iamotiniri Teoso posotiire. ²¹ Kona xapiti pitemoni auapani ia parĩkatxi, kotxi pãkixinire na atão Teoso apisatoõ. ²² Ininiã pitakanapariko ikara pimaerekani. Pamanaãri Apiananiri pimaerekani

imaktxakini ikapani. Atxiiti iua maxinikaretari pixinikakiti pākixinireē. ²³ Nota imarotai pite. Pākixinireē xāpoākata maerekatinoka. Pimaerekani maikai. !Auritai pisini pinirekinimoni —itxa Petro.

²⁴ Ininiã Simão apakapapiretari:

—Pimisākiretariko Teoso nota ikapani. Ikara atoko pisāpiretakiti na ninireka —itxa Simão.

²⁵ Petro, Xoão pakini sāpiretari Xesosi kamakiti ninoa ikapani. Isāpiretarina Apiananiri sākire. Eereka ikanapiriãna Xerosareēmoni. Ikanapiriãpotakasaakina, isāpiretarina Teoso iokanapirena erekari kaiāopokori aapokotxi auakanimoni Samaria tōpa.

Piripi Etxiōpiakirikata

²⁶ Eereka Apiananiri nitiri iaxitikiri misākiretari Piripi:

—Paamatako. Atokatxi pokikinimoni pikikomoni pisako. Pisa kimaporimoni, āparaã makipakaniãtaã. Iua kimapori Xerosareē Kasa tixinimoni sikari.

²⁷ Ininiã aiamata, sipe itxari. Ipixinipokoriti aōkitari Etxiōpia tixinikiri. Etxiōpia auakani auite òtakikakari itxaua. Paimatireri iua. Ikinimane kamari iua paniãtakiti. Etxiōpia auakani auite sito Kãtasi inakoro. Kaiāopokoro otxineirote, otii pakini. Iua kiki parika ikinipoko oa nakiti inĩkata oa ikapani. Mĩtxi iua sari Xerosareēmoni Teoso imisākiretini ikapani. ²⁸ Ikanapiriãkasaaki, mitekaĩ āki iitopākasaaki, atatsopatarisaia iōkatsopatakiti. Isaia Teoso sākire sāpiretakari kitxakapiriãka. ²⁹ Iuasaaki Erekari Matamatakoti txari Piripi:

—Pisa okira mitekaĩmoni. Pikaikota oa takote.

³⁰ Ininiã Piripi miteka iuamoni. Ikenakotakasaakiri Isaia iōkatsopatakiti atatsopatini, Piripi pimaãri:

—Pimarotatareri ere patatsopatakiti? —itxari.

³¹ Ininiã iua:

—Natokopa ininiãpa nimarotari? Kipa oerekano? —itxari.

Ininiã aiatarisaia Piripi mitekaĩ āki iuakata iitopākini ikapani. ³² Iua iōkatsopatarisaia Teoso sākire:

Soti auite okikomoni anikiko atoko itxa iua. Soti auite ākiri piti kisauakikosaaki, !kasākireri iua. Iua soti auite ākiri atoko itxa iua, kotxi iua apaka !kasākireri.

³³ Inapetaãka iua. !Atãoni kãkiti kama iuamoni. Okaãkape. !Auari iua ākiri.

Ikara atoko itxa Teoso sākire, Isaia iōkatsopatakiti.

³⁴ Ininiã iua Etxiōpiakiri pimaãri Piripi:

—Pisāpiretano, natokopa itxa Teoso sākire sāpiretakari sākire? Kipa soti auite atoko inakari? Kipa okaãka? Iuakani? Ātikani?

³⁵ Ininiã Piripi oerekari ikara Teoso sākire iōkatsopatakori.

—Xesosira ikara atoko inaãka —itxa.

Ininiã apikomoni isāpiretari Teoso iokanapirena erekari, Xesosi pirenã.

³⁶ Isaãpotakasaakina, apokana āparaã auiniãtaã. Ininiã iua kiki txari:

—Uai aua āparaã. Apakata nipatxisatiko?

³⁷ Ininiã Piripi txari iua:

—Apakatapitika pipatxisatiko iteene pauikiniãri Xesosi sākire pākixinireē.

Ininiã iua apakapapireta:

—Nota aukapitikari Xesosi Teoso merekiti, Teoso ākiri ininiãua.

³⁸ Ininiã iua Etxiōpiakiri paniãtari mitekaĩ anikakari iotokini. Iuasaaki Piripi, iua Etxiōpiakiri apaka katxaka, imaãta itxana. Ininiã Piripi patxisatarisaia iua kiki.

³⁹ Ikanĩkĩtakasaakina, Erekari Matamatakoti anikari Piripi. Ininiã iua kiki kona atamataikari Piripi. Ininiã iãpotapitipo. Ipoxononoka itxa. ⁴⁰ Iuasaaki Asoto sitatxitpeka itokiã Piripi. Isaãpotakasaaki, ikinika aapokotxitã isāpiretari Teoso sākire. Teoso sākire isāpiretiniritika Sesarẽia sitatxitimoni apokako.

9

Saoro Auikiniri Xesosi Sākire

(Átosi 22.6-16; 26.12-18)

¹ Iuasaaki Saoro okaenetapikana Apiananiri sākire auĩakani. Ininiã iua sari sasetotxi auite apiatakarimoni. ² Amanaãri aãtsopa Saoro parika sāpiretiko aãtsopati. Iua nirekari sasetotxi auite iōkatsopatiniãri ikara, Saoro anikini ikapani. Inirekari isikiniri iua aãtsopa ikinika aiko Xoteo apotiitiniãtaãua nĩkatakanimoni Tamásiko sitatxiti, kotxi Saoro nirekari imaĩkinina Xesosi sākire auĩakani, kikiakori, sitoakoro pakini, Tamásiko sitatxitã apokakini. Inirekari anikinina Xerosareēmoni.

³ Iua apokaãpotakasaaki Tamásiko sitatxitimoni, katimaritika iotximeretxi iaxitikiri ākitari. ⁴ Irika xitipe. Ininiã ikenakotari sākiretxi:

—Saoro, Saoro, kinirepa pimisiritano? —itxa ikenakotakiti.

⁵ Ininiã iua:

—Kiriparai Apiananiri?

Ininiã:

—Xesosira nota. Pimisiritakitikarano —itxa Xesosi.

⁶ Ikikinanaka, iteene ipikarauatiniã.

—Apiananiri, kipa pinireka nikaminii? —itxa.

Ininiã Apiananiri:

—Põkitikaua, sitatxi pisa. Iuaã äti säpiretai pikamakiti tükane —itxa Xesosi.

⁷ Imoianariakori iotoka. Ipikarauatana. Masäkireninoka itxana. Ninoa kenakotari iaxitikiri säkire, txamari !atamatarina.

⁸ Eereka Saoro õkitikaua, xorekaãta itxa, txamari imosiãretapeka iua. Ininiã imoianariakori anikari iua. Ikanõpiãpotarina Tamásikomoni. ⁹ Ipi, äti pakini õti mõsiãretika itxa. Iuasaaki !inipokota. !!ãta.

Ananíasi Makananitiniri Saoro

¹⁰ Tamásiko sitatxiti aua kiki Xesosi säkire auiaãkari, Ananíasi inakori. Iuasaaki Teoso säkirauata Ananíasikata itaponemoni. Itaponeã Apiananiri akiritari iua:

—Ereëkai Ananíasi —itxa.

Ininiã:

—Uaïkarano nota, Apiananiri —itxari Teoso.

¹¹ Apiananiri txari:

—Païamatako. Kimapori Eretika äpori kimaporitimoni pisako. Xotasi aapokomoni pisa. Iuaã pinitari Taaso sitatxitikiri Saoro inakori. Uatxiikara isäkirauanãta notakata. ¹² Saoro taponetai pite. Iua atamatai pite apokini iuamoni, piuako inopini pitakini ikapani iuaãkana kõsiãrepeka inini ikapani —itxa Teoso.

¹³ Ininiã Ananíasi:

—Apiananiri, kãkitipokoni säpiretano ikara kiki pirena. Pamonoãkoniri iua. Imisiritapekana pite nakitiakori Xerosareë sitatxiti auakani. ¹⁴ Sasetotxiakori auite paniãtari iua imaãkinina piuaãka akiritakani uai Tamásiko sitatxiti auakani —itxa Ananíasi.

¹⁵ Ininiã Apiananiri txari:

—Pisako iuamoni. Nota mereëpekaru iua kiki, nota parïka ikamini ikapani. Iua säpiretariko nota säkire Xoteo minakonimoni, auitetxiakorimoni, Isaeo tixini auakanimoni pakini. ¹⁶ Noerekariko Saoro iteene atatsiirauatini nota säkire auikini xika —itxa Teoso.

¹⁷ Ininiã Ananíasi sari Xotasi aapokomoni. Iiroã. Eereka iuako itaka Saoro nopini.

—Nitari Saoro, Apiananiri Xesosi, paõkitakitira kimaporiã, iuara iokanatanu nota pitemoni kõsiãrepeka iuaãkana pinini ikapani. Iokanatanu nota pitemoni Eerekari Matamatakoti papakapini ikapani —itxa.

¹⁸ Iuasaakipeka oki nopini auakari katxaka. Ximaki tãta atoko itxa. Kõsiãrepeka itxa. Eereka õkitikaua. Iuasaaki ipatxisataãka. ¹⁹ Inipokotaka atoko, itapara auapeka.

Saoro Tamásiko Sitatxiti Auakasaaki

Saoro kaikota Tamásiko mapaõti Xesosi säkire auiaãkanikata. ²⁰ Iua sari aiko Xoteo apotitiniãtaãua. Iuaã oerekarauata. Oerekari Xesosi Teoso äkiri ininiãua. ²¹ Isäkire kenakotakani tsorïkaãta.

—Iua Saoro okana Xesosi uãka akiritakani Xerosareë auakani. Iua ina uaimoni Xesosi uãka akiritakani imaãkini ikapani, sasetotxi auiteakorimoni anikinina ikapani —itxana.

²² Saoro oerekarauatakasaaki, imaroãpotari Teoso imarore. Teoso sikaposotiiãreãpotari iua. Ininiã iteene imarotari Teoso säkire, apanakini oerekini ikapani. Iua atoko ininiã, itaparaxinireritika oerekari Xoteoakori Tamásiko sitatxiti auakani Xesosi Teoso Mereëkiti ininiãua. Ininiã ninoa !imarotari apakapipiretinirina iua.

²³ Mapaõti atoko Xoteoakori säkirauatakaka Saoro okinina ikapani. ²⁴ Saoro säpiretaãka Xoteo aïamatapeka okinirina iua. Ninoa iãtapapikari sitatxi !ronakikoãtaã okinirina tükane. !kanõka, pokamara iãtaparina iua.

²⁵ Iuasaaki !kanõka Xesosi säkire auiaãkani anikari iua sitatxi pirikeremoni. Iuaã Saoro ieretakaua kotari äki. Pirikeri sonaã iokatxakarina Saoro kotari äki sitatxi mapara. Iposo atoko imiteka Xerosareëmoni.

Saoro Xerosareë Apokini

²⁶ Saoro apokasaaki Xerosareë, inirekari Xesosi moianariakori imoianatini. Txama ikinikana pikari iua. Kona !auiritarina iua moianatinina ninoa, kotxi !auïkarina iua atão auïkiniri Xesosi säkire. ²⁷ Iuaritika Panapee anikari iua Xesosi iokanatakinimoni. Isäpiretana ninoa:

–Kimaporíá isikasaaki, Saoro aókitari Apiananiri. Apiananiri misáki-retari iua. Tamásiko sitatxiti auakasaaki, itaparaxinireritika isápiretari Xesosi sáki-re kákitimoni –itxa Panapee.

²⁸ Panapee sáki-re ikenakotakasaakina, auikarina Saoro sápiretakiti. Ininiá Saoro kaikota Xerosareé Xesosi sáki-re auiaákanikata. Inirekinimoni isa Xerosareé. Isinimoni itaparaxinireritika isápiretari Apiananiri Xesosi sáki-re. ²⁹ Isákirauata Xoteoakorikata, Kreko sáki-re imarotakanikata. Inirekarina ninoa imarotini-niri Xesosi sáki-re. Txamari inirekarina okinirina iua. ³⁰ Iuasaaki Xesosi sáki-re auiaákani imaropiretari ninoa okaenetiniri Saoro, ininiá anikarina sitatxi Sesaréia inakorimoni. Eereka iokanatarina iua Taaso inakori sitatxitimoni.

³¹ Iuasaaki Xesosi sáki-re auiaákani ! imisiritaákaika. Xotéia tópa, Kariréia tópa, Samaria tópa pakini ! auai-ka Xesosi sáki-re auiaákani misiritiko iuasaaki. Erekari Matamatakoti sikataparaxiniretana ninoa. Kákiti itoápotari auikiniri Xesosi sáki-re. !Ikamarina maerekati, kotxi iteene ipikarina Apiananiri.

Enéias, Tókasi Pakini

³² Petro ianaxititakasaaki, iua sari Teoso sáki-re auiaákanimoni Arita sitatxiti auakanimoni. ³³ Iuaá aókitari kiki Enéias inakori. Iua matípokotakati itxaua. Oito anokananipeka ! ókitikaua. ³⁴ Petro txari iua:

–Enéias, Xesosi Kristo makananitai. Pókitikaua. Piapirikari pisirimata –itxari matípokotakati.

Iuasaakipeka ókitikaua. ³⁵ Ikinipoko Arita sitatxiti auakani, Saró sitatxiti auakani pakini atamatarí iua Enéias, ininiá itakanaparina imaerekanina. Iníkapiretarina Apiananiri sáki-re.

³⁶ Áti sitatxiti Xopi inakoriá oáua sito Teoso sáki-re auiaákaró, Tapita inakoro. Kreko sáki-reé ouáka Tókasi otxaua. Oa kamapikari erekari. Omoianatana matxineiroteni.

³⁷ Arita auakani auikasaakiri Apiananiri sáki-re, oa Tókasi amianata. Eereka oani opípe. Opípeka atoko, arokaítotaroná, taka itxarina oíto itanokiri kooá. ³⁸ Xopi sitatxiti Arita sitatxiti takote, ininiá Xesosi sáki-re auiaákani Xopi sitatxiti auakani kenakoenetari Petro Arita sitatxiti auiniá, iokanatana ipi kiki Petromoni, apinirina íkapani. Iokanapiretana:

–Pinapokako uai. Katima pitxako –itxana.

³⁹ Ininiá Petro aiamata. Ninoakata isa. Iua apokasaaki, anikarina itanokiri kooá. Ikinipoko tikinitakoni txiapanáta Petro takote. Ninoa oerekari Petro mákatxi Tókasini kamakiti ninoa íkapani oáuakasaaki. ⁴⁰ Ininiá Petro iokanatana ninoa mapara. Eereka ikapotoreéka. Isákirauata Teosokata. Eereka oamoni ikirioka. Itxaro:

–Tapita pókitikaua.

Iuasaakipeka xorekaáta otxa. Oátamatakasaakiri Petro, oitopáka. ⁴¹ Ininiá imaíkaró ouako ókitikiníua íkapani. Eereka iua akiritana Xesosi sáki-re auiaákani, tikinitakoni pakini, oa auáki onini oerekini íkapani.

⁴² Íkini Xopi auakani imaropiretari Tókasi iuaákana auáki onini, ininiára itomaneri kákiti auikari Apiananiri sáki-re. ⁴³ Petro kaikota iuaá Xopi sitatxiti mapaóti. Iua kaikota Simão inakorikata. Iua Simão aamata kamakari.

10

Konério Tapone Pirena

¹ Iuasaaki Sesaréia sitatxiti aua kiki Konério inakori. Áti uáka iua. Homano itxaua. Seí pakini sotato auíte iua. Kákiti akiritana ninoa sotatoakori Itáriakini. ² Iua Konério kamari Teoso sáki-re iaóka. Iua, íkinipoko aapoko auakanikata paxitari Teoso. Imisáki-retapikari Teoso. Isikana matiitimoni inirekakitina. ³ Áti óti kikatapeka inakasaaki itaponeuata. Itaponeé itikari Teoso nitiri apokini iuamoni. Itxari:

–Konério –itxa.

⁴ Teoso nitiri atamatakasaaki, ipíkarauata.

–Apiananiri, kipa pinireka? –itxa Konério.

Ininiá Teoso nitiri txari:

–Teoso kenakotapekari pisáki-re iuamoni. Itikapekari pisikarauatini matiinimoni. Teoso xinikapitikai. ⁵ Ininiá-kara átikaka kikiakori piokanata Xopimoni Simão Petro uaimoni iminínina íkapani. ⁶ Iua kaikota áti Simão-kata, aamata kamakarikata. Iua aapoko potxoari uiníti takote aua. Iua Simão Petro sápiretaiko pikamakiti tíkane –itxa Teoso nitiri.

⁷ Eereka iua Teoso nitiri sipe. Iposo atoko Konério akiritana ipi iníti-riakori, átika isotatone pakini. Iua sotato kamari Teoso sáki-re iaóka. Iua auapika Konériokata, inireékiti ikamini tíkane. ⁸ Ininiá Konério sápiretana ninoa íkinipoko Teoso nitiri sápiretakiti. Iposo atoko iokanatana Xopimoni.

Petro Tapone Pirena

⁹ Katimatiníkata Konério iokanatakini potorika. Apaniãxiti inakasaaki ninoa apokaãpota sitatxi Petro auiniãtaã. Iuasaaki Petro kanikauata aapokotxi nopini Teoso imisäkiretini ìkapani.

¹⁰ Iuasaaki Petro natxita. Inirekari inipokotini. Nipokori kamikosaaki, itaponeuata.

¹¹ Itaponeë atamari iaxiti xorekini. Aamata mitamatarì katxakaãpota iuamoni. Imapotomatare ipi ipi pakini iaxirikaãka. Iua aamata katxaka xitimoni. ¹² Iua aamata ãki aua ikini sereti kaxipirini. Aua pirãtxi. Aua ìtopa auakani. Aua imini. Aua araãkani. ¹³ Ininiã Petro kenakotari itanokiri sãkirauatini:

—Petro, pökitekaua. Pokari ia, pinikini ìkapani —itxari Petro.

¹⁴ Petro Xoteo itxaua, ininiã kona ìkinika ìnika. Ininiã Petro txari:

—Konapitini Apiananiri. Kona ninikari ìkinipoko naia kaxipirini. Manaiatini. Pamininiri —itxa.

¹⁵ Iuaikana itanokiri sãkirauata:

—Nota oeretakiti kona kamininiri kona pitxape —itxa.

¹⁶ Ipi, ãti pakinikata iua aamata katxaka ikara atoko. Iposo atoko ikanikaxitita Teoso tixinemoni.

¹⁷ Ininiã Petro ãkixinireë ìxinikaxitita:

—Kanatokopa itxa ikara nitapone?

Iuasaakipeka Konério iokanatakini apokapekari Simão aapoko. Apokana Simão aapoko toremoni. ¹⁸ Akiritana:

—Ereëkai. Simão Petro uai aua atxiiti? —itxana.

¹⁹ Iuasaaki Petro xinikapanikari itapone. Erekarì Matamatakoti txari:

—Ìkiraãkarana ipi, ãti pakini kãkiti nitanãtai. ²⁰ Pökitekaua. Pikatxaka xitimoni. Pisa ninoakata, kotxi niokanatanana ninoa uaimoni —itxa Erekarì Matamatakoti.

²¹ Ininiã Petro sari Konério iokanatakinimoni:

—Notakara hìte nitanãta. Kipa ìkai hìte?

²² Ninoa apakapapiretari iua:

—Konério, aãuìte iokanataua ate. Erekarì iua. Ikamari Teoso sãkire iaõka. ìkinipoko Xoteo apokaerekatari iua. Teoso nitiri iaxitiki paniãtari iua pite akiritini, pisãkire ìkenakotini ìkapani —itxana.

²³ Ininiã Petro:

—Hìroã. Uai himaka —itxa.

Konério Aapoko Auakasaakina

Katimatiníkata Petro sari ninoakata. Apanakini Xesosi sãkire auiaãkani Xopikini sari apaka. ²⁴ Katimatiníkata apokana Sesaréia sitatxiti, Konério auiniãtaã. Iua Konério apotiitapekana inirimane, aõkimanere pakini Petro iãtapinina ìkapani. ²⁵ Petro ìroãkasaaki Konério aapoko, iua aõkitari Konério. Iuasaaki Konério kapotoreëkaua Petro apisatoõ. ²⁶ Txamari Petro txari iua:

—Pökitekaua. Kiki pite atoko inakarikarano nota.

²⁷ Isãkirauatakasaakina, Petro ìroã. Aõkitari ito kãkiti apotiitakanuia. ²⁸ Ininiã itxana:

—Hìte ìmarotari ate kiomanekorini !auiritari Xoteo moianatiniri ãti uãka. !Auiritãka ate ìroini hìte atoko inakari aapoko. Iuaritika Teoso txano nota: “Na pakiritapiri ãti uãka kanaiarì,” itxano. ²⁹ Ininiã hìte pìkapiretakasaakino nota, ìmarotari atão nisini hìtemoni. Ininiã, kinirepa hìte apakítakano nota? —Petro txari Konériomoni.

³⁰ Konério apakapapiretari:

—Ipi, ipi pakini õti apisapanika nauanãta naapoko. Iuasaaki kona ninikari nipokori, Teoso nimisäkiretini ìkapani. Kikatapeka inakasaaki, nimisäkiretakasaakiri Teoso, katimaritika kiki tokiã nota apisatoõ. Pomëkoriri imãka. ³¹ Itxano: “Konério, Teoso kenakotapekari pamanaãkiti. Ixinikari pisikarauatini matinimoni. ³² Ìtikaka kiki piokanata Xopi sitatxitimoni Simão Petro inakori uaimoni imininina ìkapani. Iua aua ãti Simãokata, aamata kamakarikata. Simão aapoko potxoari uiniti takote.” ³³ Iuasaaki nota apakítakai pite. Peerekari papokini atemoni. Uatxa ate uai aua Teoso apisatoõ Teoso paniãtakiti pitemonikiri akenakotini ìkapani. Ininiã pisãpiretauako —itxa Petromoni.

³⁴ Ininiã Petro txari:

—Uatxa ìmarotari atão inakari. Teoso sikari erekarì ìkininapemoni. Inirekarì ikini uãka apokini iuamoni, inakitiakori ininiuana ìkapani. ³⁵ Teoso apakapari ikini itixiti auakani, iua paxitakani, atão inakari kamakani. Apakapari Xoteoakori. Apakapari Xoteo minakanuia apaka. ³⁶ Himarotari Teoso iokanapirena Isaeo auakanimoni. Ikara erekarì pirena sãpiretaua Xesosi Kristo xipokari Teoso omanatiniri kãkiti imaerekani xika, kãkiti erekaxinire inini ìkapani. ìkinimane auite itxaua Xesosi. ³⁷ Ikara Teoso iokanapirena himarota, kotxi iaripireta ikini Xotéia tãpa. Merepitipanika iaripireta Kariréia tãpa, Xoão

patxisarauataka atoko. ³⁸ Himarotari Xesosi Nasareekiri pirena. Himarotari Teoso sikari Erekar Matamatakoti iuamoni. Iteene isikaposotiiiretari iua. Ikini tōpati isa erekari ikamini ikapani. Imakananitana Satanasi misiritakini, kotxi Teoso aua iuakata. ³⁹ Ateka itikari ikinipoko ikamakiti Xoteoakori tixine iua auakasaaki, Xerosareē sitatxiti auakasaaki apaka. Eereka aamina ipiriāmitakari nopini ninoa okari iuani.

⁴⁰ —Iuaritika ipi āti pakini ōtisaaki Teoso ōkitikari iua. Iuaka oerekaua kākitemoni ipīpekariika iuaikana aua inini. ⁴¹ Kona ikinipokoni atamatar iua. Teoso mereēkininanira atamatar iua. Iuaritika kaiāori iua atamatakani. Ininiā ate atamatar iua. Iua ōkitikaua atoko ate nipokota, iāriā aāta iuakata. ⁴² Iokanataua ate Teoso sākire asāpiretini ikini kākitemoni. Teoso mereēri iua, kākiti misiritiko mereēkari ininiua ikapani. Auākipanika inakani, ipikani pakini misiritiko mereēkari itxaua. ⁴³ Ikinipoko Teoso sākire sāpiretakani sāpiretari iua pirena. Ninoa txari: “Iua sākire auāikani maerekani makatxakaāka” —itxa Petro.

Xoteo Minakanuia Patxisatiko

⁴⁴ Petro sākirauatapanika inakasaaki, Erekar Matamatakoti apoka ikinika Petro sākire kenakotakanimoni. ⁴⁵ Ininiā Petro moianariakori Xesosi sākire auāikani kisauakatsikimatatakoni tsorīkaāta, kotxi Teoso sikari Erekar Matamatakoti Xoteo minakonimoni apaka. Ninoa tsiki mata likisauakaāka, iuaritika Erekar Matamatakoti apoka ninoamoni. ⁴⁶ Ikenakotarina Xoteo minakanuia sākiraauāta āti uāka sākireē.

—Peerekari Teoso. Apiananiri itxaua —itxanātana Xoteo minakanuia.

⁴⁷ Ininiā Petro txari:

—Ninoa Xoteo minakanuia apakapapekari Erekar Matamatakoti ate apakapiniri atokokana. Ininiā apakatapitika ninoa patxisatiko āparaaā. Kona kākitemoni iotokakana ipatxisatikona.

⁴⁸ Ininiā iua paniātana ninoa patxisatiko Xesosi Kristo uākaā. Iuasaaki ninoa aiatar Petro:

—Ateka mapaōti pikaikota —itxarina.

Ininiā Petro kaikota ninoakata.

11

Petro Sāpiretakiti

¹ Xesosi iokanatakini, Teoso sākire auāikani Xotéia tōpa auakani apaka kenakotari Xoteo minakanuia auikinirina Teoso sākire. ² Ininiā Petro kanapiriākasaaki Xerosareēmoni, kisauakatsikimatatakoni apoītari iua.

³ —Pite imaka itsiki mata makisauakakoni aapoko āki. Ninoakata pinipokota pitxa. ! Apakata pikamakiti —itxarina.

⁴ Ininiā Petro sāpiretari ikinipoko itiākiti, ikenakotakiti pakini.

⁵ —Xopi sitatxiti nauakasaaki, Teoso nimisākiretakasaaki, nitaponemoni natapari mākatxi mata atoko inakari iaxiti katxakaāpotini. Ipi, ipi pakini imapotomatare iaxirikaāka. Iua apoka nota takote. ⁶ Iteene nimixinitari mākatxi mata āki auakani. Natamatar ikini sereti kaxipirini. Aua pirātxi. Aua itōpa auakani. Aua imini, araākani pakini. ⁷ Iuasaaki nikenakotari sākiretxi iaxitikiri: “Pōkitikaua. Oka, nika pitxako,” itxa. ⁸ Txamari nitxari iua: “Apiananiri, konapitini. ! Ninikari nipokori mauiritakoti ia atoko inakari, kotxi pamininiri,” nitxari.

⁹ —Iuaikana iaxitikiri sākiraauata: “Teoso oeretakiti kona kamininiri kona pitxape.” ¹⁰ Ipi āti pakinikata iua aamata katxaka ikara atoko. Eereka ikinika kosekaāka iaxiti.

¹¹ —Iuasaakipeka ipi, āti pakini kikiakori Sesaréikini apoka aapokotxi nikaikotiniātaā. Iokanataākana notamoni. ¹² Ininiā Erekar Matamatakoti paniātano: “Pisa ninoakata. Kona pipīkarauatape,” itxa. Naia seisi aītariakori Xopikini moianatano nota iuasaaki. Ininiā ate itōā Konério aapoko. ¹³ Ininiā iua sāpiretaua ate, Teoso nitiri iaxitikiri apoka iuamoni aapoko āki. Iua Teoso nitiri txari iua: “Piokanatar kikiakori Xopimoni Simão Petro inakari apinina ikapani. ¹⁴ Iua sāpiretaiko pite maerekani makatxakiko, paapoko auakani maerekani makatxakiko apaka.”

¹⁵ —Nipotorikasaaki nisākirauatini, Erekar Matamatakoti apoka ninoamoni merepanika atemoni apokini atokotxikana. ¹⁶ Iuasaaki nixinikari Apiananiri sākire. Iua txari: “Xoō patxisarauata āparaaā. Hite patxisataākako Erekar Matamatakotiā.” ¹⁷ Ininiā Teoso sikari Erekar Matamatakoti ninoamoni, atemoni isikini atokotxikana Xesosi Kristo Apiananiri sākire aūikaasaaki. Ikara atoko ininiā, lapakata Teoso ninaiatini —itxa Petro.

¹⁸ Petro sākire ikenakotakana atoko, litsoataikana.

—Peerekari Teoso —itxana.

—Ininiã Teoso auiritari Xoteo minakanuia apaka imaerekanina itakanapinina, Teosokata átipirika auinina íkapani —itxana.

Teoso Auiãkani Átxiokia Sitatxiti Auakani

¹⁹ Estevão ipinaãka atoko, Xesosi sãkire auiãkani misiritaãka, ininiã ninoa iarika. Iariãkani sari maioakari. Penisia tixinima, Xipri pokomirítima, Átxiokia sitatxitima pakinimoni isana. Ninoa oerekari Teoso sãkire Xoteomoninani. ²⁰ Ninoa átikaka Xiprikiní, Sirenikiní pakini sari Átxiokia sitatxitimoni. Iuaã isãpiretarina Teoso iokanapirena erekari, Xesosi Apiananiri pirena, Xoteo minakonimoni ninoa apaka imarotini íkapani. ²¹ Apiananiri sikaposotiiretana ninoa. Ininiãkara itomaneri kãkiti aukari Apiananiri sãkire. Maerekati itakanapana. Ikamarina Apiananiri nireëkiti.

²² Ikara apopireta Xesosi sãkire auiãkanimoni Xerosareë sitatxitiã. Ininiã ninoa iokanatarí Panapee Átxiokia sitatxitimoni. ²³ Iuaã iua apokasaaki, imarotakasaakiri ninoa apakapiniri erekari Teoso sikakiti, ipoxokoniua. Isikataparaxiniretana. Ôtãkikana Apiananiri paniãtakitinoka ikaminina ikini itaparaxinireritikana. ²⁴ Erekarí Panapee. Ikinika Erekarí Matamatakoti paniãtakiti ikama. Aukari Xesosi sãkire ikini ixinireritika. Ikara atoko ininiã, itomaneri kãkiti aukari Apiananiri sãkire.

²⁵ Eereka Panapee sari Taaso sitatxitimoni, Saoro initini íkapani. ²⁶ Itaõkitakasaakiri, iminari iua Átxiokia sitatxitimoni. Áti anokanani ikaikotana iuaã Xesosi sãkire auiãkanikata. Oerekarina Teoso sãkire itomaneri kãkitimoni. Xesosi sãkire auiãkani Átxiokia sitatxiti auakani merepitipanika takauãkataãka, “Kristopiki.”

²⁷ Iuasaaki átikaka Teoso sãkire sãpiretakani Xerosareëkini sari Átxiokia sitatxitimoni.

²⁸ Ninoa átika Ákapo inakori õkitikaua. Erekarí Matamatakoti sãkire isãpireta:

—Natxinoka auako ikini itixiti —itxa.

Ikara isãkire apokapeka Kráotxio Homano auíte inakasaaki.

²⁹ Ininiã ikinika Xesosi sãkire auiãkani nirekari txineiro iokanatiní itariakorimoni Xotéia tõpa auakanimoni. Ito auinina, ito iokanatanana. Poiãonoka auinina, poiãonoka iokanatanana. ³⁰ Panapee, Saoro pakini anikari isikakitina. Isikaro oa txineiro Xotéia tõpa auakani õtãkikanimoni.

12

Xesosi Sãkire Auiãkani Misiritiko Iuaãkana Apokini

¹ Iuasaaki auítexi, Erotxi inakori, misiritana Xesosi sãkire auiãkani. Átikaka itaka kateia áki. ² Iua okapiri Txiako iouata mitaroõ. Iua Txiako Xoõo itari. ³ Erotxi imarotakasaakiri Xoteoakori apokaerekatiniri Txiakoni okiko, ipaniãtari Petro maãkiko. Imaãkari Petro Xoteoakori kiiniritesaaki, pão miãtiãkati kiiniritisaaki. ⁴ Petro imaãka atoko itakari iua kateia áki. Ipaniãtari tesiseisi sotoakori nãkatiniri iua. Kiiniri xipoka atoko Erotxi nirekari imereiniri imisiritiko ikinimane apisatoõ. ⁵ Ininiã Petro kateia áki kaikota. Iuasaaki Xesosi sãkire auiãkani átipirika misãkiretari Teoso Petro íkapani.

Petro Sikakaãka

⁶ Íkanõka, imisiritiko imarotini õti apisapanika, kateia áki Petro imkanãta ipi sotato apanãkaki. Iaxirikiko tsapi metao kamakori ipi. Aua apaka apikomoni sotoakori kateia toreaãtaã, Petro mamitekakani íkapani. ⁷ Patimari Teoso nitiri tokiini. Tirikapi ponika kateia áki. Iuasaakipeka Teoso nitiri õpirĩkari Petro.

—Põkitikaua. Katima pitxako —itxari.

Iuasaakipeka itsapi iaxirikiko iuakoãkiri katxaka. ⁸ Teoso nitiri paniãtari:

—Pimãka pieretaka. Pikiti mata pitaka, ininiã Petro takari. Pimãka pinopinikiri apaka pitaka, eereka pisa notakata —itxa.

⁹ Ininiã Petro sari iua tikini. Kateia ipokĩkana. Iuasaaki Petro uãkatari itaponeuatini. ! Imarotari atão Teoso nitiri mipokĩkiniri iua. ¹⁰ Eereka inapari ipi sotoakori auiniãtaã, apoka itxana itore maparakiri metao kamakori. Iuaãtaã napakari sari sitatximoni. Ikara itore iuaka matakakaua. Ininiã ninoa pokĩka. Iua ahoa mapotõkire apokasaakina, katimaritika Teoso nitiri takanapari iua. ¹¹ Iuasaaki Petro imarotapekari:

—Na nitaponeni itxa. Atãopitikara Apiananiri iokanatarí initiri itixinekiri nota imaktxakini íkapani. Pataparari Erotxi, iuaritika Apiananiri makatxakano. Xoteoakori nirekari okinino, iuaritika Apiananiri makatxakano —itxa.

¹² Ikara ixinika atoko, isari Maria aapokomoni. Xoõo Marko inakori inoro oa Maria. Iuaã itomaneri kãkiti apotitapekaua, Teoso imisãkiretinina íkapani. ¹³ Maria aapoko apokasaaki, akirita. Átokoro Hotxi inakoro sari itoremoni. Okenakotari Petro sãkire. ¹⁴ Oimarotakasaakiri Petro mapara apokini, omiteka iriko áki aapokotxi áki auakanimoni.

Opoxokoniuaata, txamari omaxinĩkaretari itore omatakakini Petro ĩkapani. Ininiã otxari apanakinimoni:

—Aapokotxi toreaãaãpekari Petro —otxa.

¹⁵ Ininiã ninoo:

—Pimapitxirita.

—Atãopitikara nisãkire —otxa oa.

Ininiã ninoo:

—Petro kamiritekara.

¹⁶ Ninoo ikara atoko inaãtakasaaki, Petro mapara akirinãtapanikana ninoo. Eereka ninoo matakakari itore, atamata itxarina.

—Kanatokopa pitakanapari kateia? —itxarina.

¹⁷ Ininiã iuakoã ipinitana:

—Hikenakotari nisãkire —itxana.

Eereka isãpiretana:

—Apiananiri makatxakano nota kateia åki. Ikinika ikara hĩsãpiretariko Txiako, apanakini aĩtariakori pakini —itxa.

Iuasaaki isipe. Åtiãtaã isa.

¹⁸ Katimatinĩkata sotatoakori kateia nĩkatakani tsoriãkaãta:

—Īteri iua Petro? Kanatokopa itxa Petro pokĩkini? —itxana.

Initapiimarina Petro. ¹⁹ Ininiã Erotxi paniãtana initiko, txamari !apokarina. Erotxi pimaãna sotatoakori Petro nĩkatakani, Petro sinimoni imarotnina ĩkapani, txamari ninoo limarotari Petro sinimoni. Ininiã eereka ipaniãtari ninoo sotatoakori okiko Petro mitekini xika.

Ikara atoko inaãka atoko Erotxi sipeka. Xotéia tõpa ipotorika. Sesaréia sitatxitimoni isa.

Erotxi Ipinini Pirena

²⁰ Erotxi omanatana Txiro sitatxiti auakani, Sitoõ sitatxiti auakani pakini. Ninoo nirekari iua omanatinina xipokini, kotxi ninoo apakapari nipokori Erotxi tixinekiri. Ininiã ninoo sãkirauata Parásito inakorikata. Iua Parásito nĩkataro Erotxi aapoko, itii pakini. Paimatireri iua. Ninoo sãkirauatakasaaki iuakata, iua auikari ninoo sãkire. Eereka Erotximoni isana neenamataxi xipokini ĩkapani. ²¹ Erotxi ketotari ikinimane kãkiti imisãkiretini ĩkapani. Iketo õti apokasaaki ieretakari imãka ereri inakari, auĩtetxi mãka. Eereka iitopãka auĩtetxi itopanere nopini. Iuaã iua misãkiretana kãkiti. ²² Ininiã kãkiti txari:

—Teosora sãkirauanãta. Na kãkitini —itxana.

²³ Iuasaakipeka Teoso nitiri iaxitikiro okari Erotxi, kotxi iua auiritari kãkiti iteosonetiniri iua. Ininiã tsoni sotakiperi nika txari ĩto. Ikara atoko inikoã ipĩpe.

²⁴ Iuasaaki Teoso sãkire iaripireta. Ininiã itomaneri kãkiti auikari Teoso sãkire.

²⁵ Panapee, Paoro pakini parĩka Xerosareẽ sitatxitiã xipokaãka atoko, Åtxiokia sitatxitimoni kanapiriã itxana. Anikarina Xoõo Marko ninoakata.

13

Panapee, Saoro Pakini Mereĩko

¹ Xesosi sãkire auĩãkani sauaki Åtxiokia sitatxitiã aua Teoso sãkire sãpiretakani, Teoso sãkire oerekakani pakini. Aua Panapee. Aua Simão “Pomamari.” Aua Arósio Sirenikiri. Aua Manaẽ. Auĩtetxi Erotxi inakori xapitipanika inakasaaki, iua Manaẽ xapitipanika inakasaaki, imakananitaãka Erotxikata. Apaka Saoro aua Åtxiokia sitatxitiã. ² Åti õti Xesosi sãkire auĩãkani iuaãtaã takanapari inipokotinina Apiananiri imisãkiretinina ĩkapani. Iuasaaki Erekaro Matamatakoti txana ninoo:

—Himakatxakana Panapee, Saoro pakini parĩkatxi ikaminina nota ĩkapani —itxa Erekaro Matamatakoti.

³ Ininiã ninoo takanapari inikini Teoso imisãkiretini ĩkapani. Iposo atoko itakarina iuakona Panapee, Saoro pakini nopini. Iokanatana ninoo Erekaro Matamatakoti paniãtakiti ikaminina ĩkapani.

Xipri Pokomiriĩti Pirena

⁴ Erekaro Matamatakoti iokanatana Panapee, Saoro pakini, ininiã ninoo sari Sereósia sitatxitimoni. Iuaã ninoo iereãtaua maporo åki. Isana Xipri pokomiriĩtimoni. ⁵ Saramina sitatxitiã apokasaakina, isãpiretarina Teoso sãkire aiko åki Xoteo apotiĩniãtaãua. Xoõo Marko inakori moianatana ninoo iuasaaki.

⁶ Xipri pokomiriĩti ĩpirixititana. Paposi sitatxitimoni isana. Iuaã itaõkitarina kiki Xoteo. Miĩti itxaua. Iuãka Paxesosi. Åti iuãka Erimasí.

—Teoso sãkire sãpiretakarĩkarano nota —itxa iua.

Txamari na atão isäkire. ⁷ Iua moianatari Xipri auakani auíte Séxio Paoro inakori. Paimatireri iua Séxio Paoro. Iua akiritana Panapee, Saoro pakini iuamoni Teoso säkire ikenakotini ikapani. ⁸ Txamari Erimasi !inirekana ninoa. !Inirekari Séxio Paoro auikiniri atão Teoso säkire.

⁹ Iuasaaki Erekeri Matamatakoti iteene sikaimaroretari Saoro (äti iuäka Paoro,) ininiä iteene atamatari iua müti. ¹⁰ Itxari iua:

—Pite Satanasi äkiri pitxaua. Pite atão kamakari mokaiaakari pitxaua. Pite kamari ikini sereti maerekati. Ikara atoko ininiä, pimisirienetari käkiti. Atão inakari Apiananiri säkire pite nirekari pimamakini. ¹¹ Ikara pimaerekani xika Teoso misiritaiko pite uatxa. Mõsiäreti pitxauako. Kona patamatapaniri atokatxi mapaöti.

Iuasaakipeka katxiäri atoko inakari, ipiä apaka apoka Erimasimoni. Ininiä iua nitari äti anikakiri ikapani. ¹² Séxio Paoro atamatakasaakiri Erimasi misiritiko, iua aukari Teoso säkire. Itsoriäkäta:

—Peerekari Paoro oerekakiti säkiretxiti Apiananiri pirena isäpiretakiti —itxa.

Ätxiokia Sitatxiti Pisítxia Tixini

¹³ Iposo atoko Paoro imoianariakorikata iereëtaua maporo äki. Paposi itakanapana. Pexi sitatxitimoni, Päpíria tixini isana. Pexi sitatxiti auakasaakina, Xoão Marko takanapana ninoa, Xerosareëmoni ikanapiriini ikapani. ¹⁴ Eereka iuaikana maporo äki iereëtauaana. Isana Ätxiokia sitatxitimoni, Pisítxia tixinimoni. Ätxiokia sitatxiti auakasaakina tomatiko õtisaaki ñoána aiko Xoteo apotiitiniätaäua. Iuaä iitopäkana. ¹⁵ Teoso paniätakiti aätsopateë, Teoso säkire säpiretakani iökatsopatakiti aätsopateë pakini atatsopataäka atoko auítetxiakori iuaätaä auakani txana ninoa:

—Äitariakori, ate nirekari hīsäkirauatini, hīsäkire auiniä, naia käkiti hīsikataparaxiniretini ikapani —itxana.

¹⁶ Ininiä Paoro õkitikaua. Ökatari iuako ninoa säkirauatini iotokakinina ikapani. Ininiä itxa:

—Nitariakori Isaeo auakani, apaka hīte Xoteo minakanuia Teoso paniätakiti kamakanii, hīkenakotariko nisäkire. ¹⁷ Isaeo auakani Teosone mereëna aätokiriakorini Exito tixini auakasaakina, äti uäkakata auakasaakina. Itxīkitakana ninoa itomane ininina. Iuasaaki Exito auakani misiritana. Ininiä eereka Teoso makatxakana iposotiireë, ininiä itakanaparina Exito tixini.

¹⁸ —Eereka, koarëta ano Teoso mīteenekana ninoa äparaä makipakaniätaä, kotxi ikamapikarina maerekati iuaä. ¹⁹ Eereka ixipokana setxi pakini äti uäka Kanaää tixini auakani. Eereka isikari iua itixi ninoamoni ätipirika iuaä auinina ikapani. ²⁰ Eereka Teoso sikana kötākikarerini Isaeo auakani auíteakori tūkane. Äti kötākikarerini aua. Eereka iua ipina. Eereka ätipekana kötākikarerini aua. Eereka iua ipina. Itxaäpotana koatrosëtosi sīkoëta anokanani. Imapotökire, Samoeo inakori Teoso säkire säpiretakari ninoa õtākikakari itxaua.

²¹ —Eereka ninoa nirekari auítetxi apiatakari ninoa auíte ininiua ikapani. Ininiä Teoso sikana ninoa Saoo inakori, Kixi äkiri. Iua atokiri kitxakapirīka Pëxamī inakori. Iua Saoo ninoa auíte apiatakari koarëta anokanani. ²² Eereka Teoso makatxakari Saoo. Itxīkitakari Tavii ninoa auíte apiatakari ininiua. Teoso säpiretari Tavii pirena: “Käkiti Tavii Xesee äkiri atoko inakari ninireka, kotxi iua kamari ikinika ninireëkiti,” itxa Teoso.

²³ —Teoso sikaenetari äti, Tavii apika mekani Isaeo auakanimoni. Isaeo auakani maerekani makatxaäkari itxauako. Iua Xesosikara. Iua käkiti maerekani makatxaäkari txaua. ²⁴ Xesosi parīka ipotorikini apisapanika, Xoão säpiretari ikinimane Isaeokini imaerekanina itakanapinina, eereka ipatxisataäkana. ²⁵ Xoão parīka ixipokasaaki, ipimaäna ninoa: “Kīpa hīuäkatanano nota? Nota kona iua hiätapakitini. Iuaritika iua ina nota tikiñi. Nota poiäori, ininiä !apakata iua takote napokini ikiti mata nimakatxakini ikapani, kotxi iua Apiananiri,” itxa Xoão.

²⁶ Paoro sākirauatapanika:

—Nitariakori, Apraão apika mekaniriakorii, apaka hīte Xoteo minakanuia Teoso paniätakiti kamakanii, hīkenakota. Hītemonikari Teoso iokanatari iokanapirena käkiti maerekani makatxakiko pirena. ²⁷ Xerosareë auakani, ninoa auíteakori pakini kona imarotari Xesosi Teoso äkiri ininiua. Ninoa atatsopatari Teoso säkire säpiretakani säkire ikini tomatiko õti, iuaritika limarotarina ninoa säkire. ²⁸ Ninoa kona apokari ixika Xesosi okiko ikapani, iuaritika ipaniätari Pirato okiniri. ²⁹ Ninoa kamari Xesosimoni ikinipoko mitxi Teoso säkire iökatsopatakori iaöka. Iposo atoko imakatxakarina iua aamina İpiriämitakariä. Ikata itxarina kai iriko äki. ³⁰ Iuaritika Teoso õkitikari iua ipikiximonipeka auakaripeka.

³¹ Ökitikaäka atoko, ito õti käkiti atamatari iua. Karirëiakini, iuakata Xerosareëmoni sikani aökitari iua. Ininiä Xesosi iuaikana auini pirena säpiretakani itxauana ninoa Xesosi aökಿತakani. Isäpiretarina apanakini Isaeo auakani.

³² —Ininiã uatxa ate sãpiretari Teoso iokanapirena erekari hitemoni. Ikara sãkiretxiti Teoso kamaenetakiti aãtokiriakorinimoni kitxakapirĩka. ³³ Íkorasaaki Teoso kamapekari ikara ikamaenetakiti ate íkapani, ninoani apika mekaniriakori íkapani, kotxi iua òkitikari Xesosi ipĩkasaaki, iuaĩkana auãki inini íkapani. Kitxakapirĩka Teoso sãkire iòkatsopatakori Xikari ipiãtaã sãpiretari Xesosi òkitikinua òti, kotxi itxari:
Pite namarite. Ia òti noerekari kãkiti pite iri nininua nota.

³⁴ —Kitxakapirĩka Teoso sãpiretapekari iua òkitikiniri Xesosi ipĩkasaaki, iuaĩkana imap-inakani tũkane, kotxi isãkire iòkatsopatakori txari:
Nikamaenetakiti Taviimoni pitemonikara nikama. Ikara erekari nikamapitikako pitemoni.

³⁵ Teoso sãkire iòkatsopatakori Xikari tesiseisiãtaã txari:
Teoso kona auiritari Erekari Kamakari ìto paiakini.

³⁶ —Kitxakapirĩka Taviu auakasaaki, ikamari Teoso nireẽkiti, kotxi inirimane auĩte itxaua. Eereka ipĩpe. Ikatapeẽka. Inirimanekata ikatapeẽka, ininiã iĩto paiaka. ³⁷ Xesosipekana, Teoso òkitikari iua. Iua ìto kona paiaka. ³⁸ Ininiãkara nitariakori himarotariko ia. ³⁹ Xesosi sãkire auĩãkani maerekani makatxakaãka. Erekarini ninoa. Moisesi paniãtakiti kamiko kona makatxakari kãkiti maerekani. ⁴⁰ Erepaniko. Kitxakapirĩka Teoso sãkire sãpiretakani sãkire iaõka atxiĩti apoka hitemoni, kotxi ⁴¹ ia atoko itxana:

Hikenakota, hĩte Teoso sãkire napetakanii. Hãtamatariko nipositiire, iuaritika hĩpinako, kotxi
!hãuikari niparĩka hĩte sauaki. Æti sãpiretiniãri niparĩka, iuaritika !hãuikari.

Ikara atoko itxa Paoro sãkire ninoamoni.

⁴² Xoteoakori pokĩkasaaki Xoteo apotiitiniua aapokotxiti, iuasaaki Xoteo minakanua aiatana Paoro, Panapee pakini iuaĩkana tomatiko òti íkari Teoso sãkire isãpiretinina íkapani. ⁴³ Kãkiti apotiitakanua potorika atoko, itomaneri Xoteo, Xoteo minakanua Teoso sãkire auĩãkani pakini sari Paoro, Panapee pakinikata. Paoro, Panapee pakini misãkiretana ninoa. Òtãkikana ninoa, ikiniõtika atão ikaminina, kotxi Teoso iteene turetana ninoa.

⁴⁴ Ininiã ãti tomatiko òtisaaki ikinimane iua sitatxiti auakani apoka Apiananiri sãkire ikenakotinina íkapani. ⁴⁵ Xoteoakori atapari itomaneri kãkiti apokaãpotini Paoro, Panapee pakini sãpiretakiti ikenakotinina íkapani. Ininiãkara ninoa xikotana Paoro, Panapee pakini. Imisãkirepiretana ninoa:

—Na atão Paoro sãkire. !Apakata isãkire —itxanãtana.

⁴⁶ Iuasaaki Paoro, Panapee pakini itaparaxinireritikana isãkirauatana.

—Ate sãpiretari Teoso sãkire hĩte Xoteoakorimoni merepitipanika. Ikara atão. Txamari hĩte !inirekari. Hĩte atxiĩti !inirekari ãtipirika auãki hinini? Ikara atoko ininiã, ate sariko Xoteo minakonimoni, ⁴⁷ kotxi Apiananiri paniãtaua ate ia atoko:

Tirikapi atoko inakari hĩtxauako Xoteo minakanua íkapani nisãkire atão ninoa imarotini íkapani, ninoa maerekani nimakatxakini íkapani, ikini itixiti auakani ikara imarotini íkapani,

—itxa Paoro.

⁴⁸ Xoteo minakanua kenakotakasaakiri ikara Paoro sãkire, ipoxokoniuatana. Ininiã ninoa:

—Peerekari Apiananiri sãkire —itxanãtana.

Teoso mereẽri kãkiti ãtipirika iuakata auini íkapani, ininiã iuasaaki kãkiti kenakotakasaakiri Paoro sãkire, ninoa Teoso mereẽkini auikari iua sãkire.

⁴⁹ Iuasaaki Teoso sãkire iaripireta ikinipoko iua tixini. ⁵⁰ Txamari Xoteoakori ! apokaerekatari Xoteo minakanua auikiniri Xesosi sãkire. Ininiã isãpiretarina aãpirena sãtoakoro apiatakani Teoso paxitakanimoni, sitatxi auakani auĩteakorimoni pakini. Ininiã ikara xika ninoa omanatana Paoro, Panapee pakini. Ininiã iokanatana ãtiãtaã isinina.

⁵¹ Ininiã Paoro, Panapee pakini takanapari iuaã. Itakanaparina kipatxi ikiti mataã auakari apaka, kotxi kona ninoa nirekaikari Teoso sãkire. Ininiã isana Ikõnio sitatxitimoni.

⁵² Ætxiokia sitatxiti auakani Xesosi sãkire auĩãkani poxokoniuata. Iteene ikamarina Erekari Matamatakoti nireẽkiti.

14

Ikõnio Pirena

¹ Paoro, Panapee pakini auakasaaki Ikõnio sitatxitiã, isana aiko Xoteo apotiitiniãtaãua. Isãpiretarina Teoso sãkire kãkitimoni, ininiã kaiãopokori Xoteoakori, Xoteo minakanua pakini auikapiretari Teoso sãkire. ² Txamari apanakini Xoteoakori Teoso sãkire mauĩãkani kamaomanãkaretana Xoteo minakanua. Ininiã ninoa omanatana Teoso sãkire auĩãkani. ³ Xesosi iokanatakini Paoro, Panapee pakini okanani auana Ikõnio sitatxiti. Ninoa sãpiretari Apiananiri pirena itaparaxinireritikana. Isãpiretarina Apiananiri sakiniri

ikinipoko erekari maerekanimoni. Apiananiri oerekari isäkirena atão inini, kotxi isika-posotiiretana ninoa, posotiiretxi, kãkiti mimarotakiniti pakini ikaminina. ⁴ Kãkiti sitatxi auakani omanatakakana. Apanakini auikari Xoteoakori sãkire. Apanakini auikari Xesosi iokanatakini sãkire.

⁵ Ininiã Xoteo minakanuia, Xoteoakori pakini, ninoa auiteakorikata imisãkiretakakaua Xesosi iokanatakini imisiritinina ikapani, kai soroã ikiporonakinina ikapani. ⁶ Paoro, Panapee pakini kenakotakasaakiri ikiporonakikona pirenã, imitekana. Arisitara sitatxitimoni, Tepi sitatxitimoni, Arikaônia tixini isana. ⁷ Iuaã isãpiretarina Teoso iokanapirena erekari kãkitimoni.

Arisitara Pirena

⁸ Arisitara sitatxiti aua kiki petokakititakari iuasaaki. Matipokotakati. Iponaniãkasaaki, ipetokakititapeka. ⁹ Ikenakotakasaakiri Paoro sãkire, Paoro atamatari iua. Iuasaaki Paoro imarotari iua kiki auikapiretiniri Xesosi sãkire erekape inini ikapani. Ininiã iteene atamatari iua. ¹⁰ Itapasãkireritika Paoro txari iua:

—Põkitikaua. Pitima —itxari.

Ininiã iuasaakipeka õkitikaua, ttipokota itxa. ¹¹ Iuasaaki kãkiti itikari Paoro kamakiti. Ininiã ninoa akirikata isãkireña, Arikaônia tixini auakani sãkireñ:

—Teosoakori apoka atemoni. Kikiakori atoko itxana ninoa.

¹² Ninoa takauãkatarì Panapee, Xõpiti ininiua. Itakauãkatarì Paoro Mekõrio ininiua, kotxi apiata isãkirauata. Panapee poiãoka isãkirauata. Xõpiti, Mekõrio pakini teosoakori kamakoni uãka. ¹³ Sitatxi ñronakikoãtaã takote aua Xõpiti misãkiretiko aikoti. Xõpiti misãkiretakani auite iuasaaki minari kema auiteakori, aãui kaiãori pakini sitatxi ñronakikoãtaãmoni. Iuaã iua apanakini kãkitikata nirekari kema auite okinina Paoro, Panapee pakini ikapani, iteosone ikapani okinirina atokotxikana. ¹⁴ Panapee, Paoro pakini imarotakasaakiri ikamakitina tükane, imatsorakitarina ninoaka mãka, kotxi Teoso litxauana.

Ninoa kãkiti itomanerimoni imitekana. Itapasãkireritikana itxana:

¹⁵ —Kãkiti, kinirepa ñkora atoko hĩtxa? Hĩte kikiãkini atokokanera atxa ate. Ate uai apoka teoso kãkiti kamakiti hĩtakanapini ikapani, atão Teoso himarotini ikapani, kotxi atão Teoso auapininiika inakari itxaua. Iua kamarì iaxiti, iaxiti auakani, itixi, itixi auakani, potxoari uinìti, potxoari uinìti ãki auakani pakini. ¹⁶ Kitxakapirika Teoso auiritana ikinipoko kãkiti inirekaãkitina ikaminina. ¹⁷ Iua Teoso ininiua sãpiretakari kaiãopokori auapika, kotxi erekari Teoso sikakiti kãkitimoni oerekari iua Teoso ininiua. Teoso sikari ãparaã iaxitiki kãkitimoni. Iua ãparaã oerekari iua Teoso ininiua. Takari kikiõ auakari iua sikakiti erekari apaka oerekari kãkiti iua Teoso ininiua. Teoso sikari nipokori ikini sereti kãkitimoni. Ikara oerekari iua Teoso ininiua. Iua sikapoxokonitari aãkixinire. Ikara apaka oerekari iua Teoso ininiua.

¹⁸ Ikara atoko itxana Paoro, Panapee pakini, iuaritika kãkiti nirekapanikari okiniri kema auite Paoro, Panapee pakini ikapani. Itapararitika Paoro, Panapee pinitana ninoa, ininiã ñikamarina. ¹⁹ Eereka Xoteoakori Ætxiokia sitatxitikini, Ikõnio sitatxitikini pakini apoka Arisitara sitatxitimoni. Ninoa kãkiti misãkiretana Arisitara auakani. Imisãkirepiretana Paoro, Panapee pakini, ininiã Arisitara auakani auikari ninoa sãkire. Ininiã ikiporonakarina Paoro kai soroã. Eereka ikosekañtotarina iua sitatxi mapotõkire. Ninoa uãkatarì iua ipipe. ²⁰ Iuaritika Xesosi sãkire auiaãkani apotiitakasaakia iuakata, Paoro õkitikaua. Sitatximoni kanapiriã itxa. Katimatiniãkata Paoro, Panapeekata sari Tepi sitatxitimoni.

Ikanapiriãna Ætxiokiamoni, Sírìa Tixiniã

²¹ Paoro, Panapee pakini sãpiretari Teoso iokanapirena erekari Tepi sitatxiti auakanimoni. Ninoa oerekari kaiãopokori kãkiti. Eereka Arisitara, Ikõnio, Ætxiokia pakini sitatxitimoni ikanapiriãna. ²² Iuaã oerekana kãkiti Teoso sãkire iteene imarotininina ikapani. Õtãkikana ninoa Teoso sãkire iaõka ãtipirika ikaminina. Ia atoko Paoro, Panapee pakini oerekana ninoa: “Teoso aãuñtetakasaaki, amisiritiko kaiãopokori amñteenekako.”

²³ Ikinipoko Xesosi sãkire auiaãkani apotiitiniãtaãua Paoro, Panapee pakini mereña ninoa õtãkikakani. Ninoa õtãkikarerini iteene auikari Apiananiri sãkire. Paoro, Panapee pakini misãkiretari Teoso ninoa ikapani. Nipokori itakanapa Teosokata isãkirauatini ikapani iuasaaki.

²⁴ Eereka isipekana. Ñpirixitarina Pisĩtxia tixini. Eereka Pãpiria tixinimoni isana.

²⁵ Isãpiretarina Teoso iokanapirena erekari Pexi sitatxiti auakanimoni. Eereka isana Atãria tixinimoni. ²⁶ Iuaã iereñtaua maporo ãki Ætxiokia sitatxitimoni isinina ikapani. Iuaã Ætxiokia sitatxitiã mitxipeka ninoa iokanataãka Teoso parika ikaminina ikapani. Iuaãtaã Xesosi sãkire auiaãkani misãkiretari Teoso ninoa ikapani, Teoso iteene ñikatinina ikapani. Ikara parĩkatxi iposope ninoa kamini.

²⁷ Átxiokia sitatxiti apokasaakina, Xesosi sákire auíákani imakinika apotiitaua ninoakata. Ininiã Paoro, Panapee pakini sãpiretari ikinika Teoso kamakiti. Isãpiretarina Teoso auiritinina Xoteo minakanuia apaka auikiniri Xesosi sákire. ²⁸ Paoro, Panapee pakini auapokota iuaã Átxiokia sitatxitiã Xesosi sákire auíákanikata.

15

Teoso Takaõtxikare Pirena

¹ Átikaka kikiakori Xotéia tãpakini apoka Átxiokia sitatxitimoni. Ninoa oerekana Xesosi sákire auíákani:

–Moisesini paniãtaua Teoso takaõtxikare aitoã atakini. Txamari híte !hítakari, ininiã Teoso !imakatxakari himaerekani –itxana ninoa.

² Paoro, Panapee pakini txana ninoa:

–Na atão híte sákire. Teoso takaõtxikare ninoa itõã ! auari, iuaritika Teoso makatxakapekari ninoa maerekani –itxana.

Ininiã itaparakienatakauana ikara sákiretxiti xika, ininiã ninoa mereëna Paoro, Panapee, átikaka Xesosi sákire auíákani Átxiokia auakani apaka Xerosareëmoni isinina íkapani.

–Iuaã hísãpiretariko ikara sákiretxiti Xesosi iokanatakinimoni, kiomãtxiakori pakinimoni. Ninoa sãpiretaua atão –itxana.

³ Iuasaaki Xesosi sákire auíákani takapiretanapana ninoa, ininiã Paoro, Panapee, apanakini pakini potorika. Ninoa ípirixititakasaakiri Penisia tixini, Samaria tãpa pakini, Paoro sãpiretana ikinimanemoni:

–Xoteo minakanuia takanapapekari imaerekani. Inirekarina Teoso paniãtakitinoka ikaminina.

Ininiã Xesosi sákire auíákani poxokoniuata ikara pirena ikenakotakasaakina.

⁴ Eereka Paoro apanakinikata apoka Xerosareëmoni. Xesosi iokanatakinini, kiomãtxiakori, apanakini Xesosi sákire auíákani pakini apakapana ninoa. Paoro, Panapee pakini sãpiretari Teoso kamakiti Xoteo minakonimoni. ⁵ Iuasaakipeka átikaka pariseoakori, Xesosi sákire auíákani, apakapapiretana:

–Ninoa Xoteo minakanuia apakapapitkariko Teoso takaõtxikare. Ninoa kamapitkariko Moisesini paniãtakiti. Hísãpiretanako –itxana.

Xesosi Iokanatakinini Kiomãtxiakorikata

⁶ Ininiã ninoa Xesosi iokanatakinini, kiomãtxiakorikata apotiitaua, Xoteo minakanuia itõã Teoso takaõtxikare takiko pirena isãkiretinina íkapani. ⁷ Ninoa iteene sãkirauataka atoko, iua Petro ókitikaua, misákireta itxana ninoa:

–Nitariakori híte imarotari Teoso mereëno nota. Híte sauaki uatxakapokoikani iua mereëno nota, iua iokanapirena erekari nisãpiretini íkapani Xoteo minakonimoni, ikenakotinina íkapani, auikinirina íkapani. ⁸ Teoso imarotari kãkiti ákixinire sákire. Iua sikari Erekarí Matamatakoti Xoteo minakonimoni. Ininiãkara aimarotari Teoso apakapari Xoteo minakanuia, kotxi isikari Erekarí Matamatakoti ninoamoni, atemoni isikini atokotxikana. ⁹ Amaerekani ate ákixinireë Teoso makatxakini atokokanera, Teoso makatxakari imaerekanina ákixinireëna, kotxi ninoa auikari Xesosi sákire. ¹⁰ Híte txíkitakari Teoso omanãkarauatini. !Erekarí híkamakiti. Híte nirekari Xesosi sákire auíákani kaminiri ikinika Moisesi paniãtakiti, txamari aksiomaneakorini kixakapiríka liposotari ikaminirina Moisesi paniãtakiti. Ate apaka !aposotari. ¹¹ Moisesini paniãtakiti kamiko !imakatxakari kãkiti maerekani. Amaerekani makatxakaãka, kotxi Xesosi Apiananiri iteene tiretaua ate, ininiã aãuikari isákire. Ikara atokokana Xoteo minakanuia maerekani makatxakaãka apaka –itxa Petro.

¹² Panapee, Paoro pakini sãpiretana ninoa Teoso kamakiti Xoteo minakonikata auakasaakina, Teoso kamakiti kãkiti maposotakinini, posotiiretxi. Ikara isãpiretakasaakina, ikinimane iuaã apotiitakanuia tsoríkaãnãta. Masákireninoka itxana. ¹³ Panapee, Paoro pakini sãkirauataka atoko, Txiaoko txari:

–Nitariakori híkenakotari nota sákire. ¹⁴ Simão Petro uatxananira isãpiretaua Teoso tiretinina Xoteo minakanuia, kotxi ninoa sauaki imereëna kãkiti inakitiakori íkapani. ¹⁵ Teoso sákire sãpiretakani kixakapiríkarini iókatsopatapekari ikara atoko inakari sákiretxiti. Ninoa iókatsopatapekari:

¹⁶ Apiananiri txari: “Eereka nikanapiriã. Noerekai nisãpirena amaneri, notamoni hãpokini íkapani. Híauíte Taviini auakasaaki, pamimari hãpokini notamoni. Ikara atoko inakari uatxa xipope, aapokotxi irikakari xipokakari atoko itxa. Aapokotxi amaneri atoko nikamako, ininiã apakatapitika kãkiti apokini notamoni.

17 Ininiã ikini uãkati nitanoko nota. Xoteo minakanuia nota akiritakini ninakitiakori nitanoko nota.”

18 Ikara atoko itxa Apiananiri kitxakapiríka kãkiti imarotini íkapani, itxa Teoso sãkire iõkatsopatakori.

19 –Ininiã notamoni, !erekari apaniãtinina ninoa Xoteo minakanuia, Teoso sãkire auíãkani, ate kiomanekorini paniãtakiti ikaminina. Ikara atoko inakori pamimari. 20 Maõtäkikana ninoa. Maiõkatsopata ninoamoni: “! Hinikapiri nipokori teoso kamakorimoni siãkori. Hítanoro minakotokatika ! hísiríkape. Hítaniri minakotikatika hísiríkape. ! Hinikapiri nipokori manotsaãtakori xini. Arëkatxi ! hiãtape, ! hinikape.” Ikaranokara maiõkatsopata ninoamoni. 21 Ikaranoka aiõkatsopata, kotxi apikomoni Moisesini paniãtakiti atatsopataãka aiko åki Xoteoakori apotiitiniãtaãua ikini õti tomatiko õtisaaki. Moisesini sãkire sãpiretaãka åtipirika ikininape sitatxiti, ninoa iteene imarotini íkapani –itxa Txiaiko ninoamoni.

Iokanatsopatakitina Xoteo Minakonimoni

22 Ninoa Xesosi iokanatakini, kiomãtxiakori apaka, ikinimane Xesosi sãkire auíãkani apaka, ninoa apokaerekatari åtikaka kiki imereinina Åtxiokia sitatxitimoni Paoro, Panapee pakinikata isinina íkapani. Ninoa mereëri Xotasi inakori, Sírsasi inakori pakini. Iua Xotasi uãka Pasapasi inaãka. Xesosi sãkire auíãkani iteene paxitana ninoa ipi. 23 Xesosi iokanatakini, apanakini pakini iokanatarari aãtsopa iõkatsopatakitina Xotasi, Sírsasi pakini anikiniri. Ia atoko itxa iua iõkatsopari:

Ate hítariakori, Xesosi iokanatakini, kiomãtxiakori apaka, aiokanatsopata híte åtariakorimoni Xoteo minakonimoni, Åtxiokia sitatxiti auakanimoni, Sírsasi tixini auakanimoni, Sírsasi tixini auakanimoni aiokanatsopata. Ereëkai híte.

24 Ate kenakoenetari Xesosi sãkire auíãkani uai auakanini sari hitemoni. Ninoa txai híte: “Hítakariko Teoso takaõtxikare hítóã. Híkamariko Moisesini paniãtakiti. Ikara himakamakaniisaaki, Teoso ! imakatsakapaniri himaerekani.” Ikara atokora itxaina híte. Ininiã híte kamaxirexinirenoka hítxa. Uatxa kona híte imarotari atão hókamini. Kona ateni paniãtana ninoa ikara atoko inakari isãpiretiniina híte. 25 Ininiãkara ate apotiitaua. Akinika ate apokaerekatari kikiakori amereëkini hitemoni aiokanatinini Panapee, Paoro pakinikata. Panapee, Paoro pakini ate tiretakini. 26 Ninoa kikiakori amereëkini sipeka monõkoriaãtaã Apiananiri Xesosi Kristo paniãtakiti ikaminina íkapani.

27 Ate iokanatarari Xotasi, Sírsasi pakini ninoakata hitemoni. Hãpisoatõ ninoa sãpiretaiko ate iokanatsopatakititixikana. 28 Erekari Matamatakoti apokaerekatakiti sãkiretxiti, ate apokaerekatakiti sãkiretxiti apaka asãpiretai híte uatxa. Paniãtakori apia mimari ! apaniãtai híte. Ianokara apaniãtakiti sãkiretxiti hókamako: 29 “! Hinikapiri nipokori teoso kamakorimoni sikakori. Arëkatxi ! hiãtape, ! hinikape. ! Hinikapiri nipokori manotsaãtakori xini. ! Hísiríkape sitokata pítanoro minakotokatika. ! Hísiríkape kíkikata pítaniri minakotokatika.” Iuanokara himakamakaniã, peerekari. Ereëpiko, itxa ninoa iõkatsopatakiti.

30 Paoroma, Panapeema, Xotasima, Sírsasima pakini iokanataãka Åtxiokia sitatxitimoni. Ninoa iuaã apokana. Apotiitana ikinimane Xesosi sãkire auíãkani, ninoamoni sika itxarina iua iõkatsopari. 31 Atatsopatakana atoko ipoxokoniuatana, kotxi erekapirenari ninoa iokanapirena. 32 Xotasi, Sírsasi pakini Teoso sãkire sãpiretakani itxauana. Ninoa iteene sãkirauata ninoa Xoteo minakanuia isikataparaxiniretinina íkapani. Ininiã ninoa Xoteo minakanuia apikomoni auikarina Xesosi sãkire. 33 Xotasi, Sírsasi pakini kaikota iuaãtaã mapaõti. Eereka Xesosi sãkire auíãkani takanapapiretana, Xesosi iokanatakini ikapaniri-inina íkapani.

–Hísipiniikaua erekaxinire hinini –itxana.

34 Iuaritika Sírsasi apokaerekatari iuaã ikaikotini. 35 Paoro, Panapee pakini kaikotapanika Åtxiokia sitatxiti. Ninoa apanakinikata oerekari Apiananiri sãkire iua sãkire auíãkanimoni. Isãpiretarina iua sãkire isãkire mimarotakanimoni apaka.

Paoro, Panapee Pakini Iarikini

36 Eereka mapaõtiipeka inapaka atoko, Paoro misãkiretari Panapee:

–Makanapiriã ikininape aapokotxitimoni mitxi Apiananiri sãkire asãpiretinimoni. Mamotikaãtana åtariakori atauako erekana atxiiti –itxari Panapee.

37 Panapee nirekari Xoão Marko inakori anikini ninoakata. 38 Txamari Paoro !nirekari anikiniri iua.

–Pãpíría tixini aãuakasaaki, iua Xoão Marko asikaua. !Inirekaikari atekata iparíkautini –itxa.

³⁹ Ikara xika itaparakienatakauana. Eereka iarikana. Panapee anikari Xoão Marko. Maporo áki iereétauana Xipri inakori pokomiriítimoni isinina íkapani. ⁴⁰ Paoro mereëri Sírası, iuakata isini íkapani. Iuaátaã Xesosi sákiire auíákani misákiiretari Teoso, Paoro, Sírası pakini íkapani, Teoso iníkatini íkapani. Eereka Paoro potorika Sírasikata. ⁴¹ Ípirixititarina Síria tixini, Sírisia tixini pakini. Aapokotxi apokasaakina, isápiretari Xesosi sákiire iuaátaã auakanimoni. Isikataparaxiniretana Xesosi sákiire auíákani. Ininiã ninoa apia auikari Xesosi sákiire.

16

Tximótxio Moianatana Paoro, Sírası Pakini

¹ Paoro sari Tepi sitatxiti. Eereka Arisitara sitatxiti isa. Iuaã aua kiki, Xesosi sákiire auíákari, Tximótxio inakori. Inoro Xoteo otxaua. Oa apaka auikari Xesosi sákiire. Iri kona Xoteoni. Áti uáka Kreko itxaua. ² Xesosi sákiire auíákani, Arisitara auakani, Ikónio auakani apaka sákiire: “Peerekari Tximótxio.” ³ Paoro nirekari anikiniri Tximótxio iuakata imoianari íkapani. Ininiã iua takari Teoso takaótxikare Tximótxio ítoã, kotxi Xoteoakori iuaátaã auakani imarotari Tximótxio iri Kreko ininiua. ⁴ Paoro imoianariakorikata saãpota ikininape sitatximoni. Kákiti aapoko apokaápotakasaakina, isápiretarina ninoa Xesosi iokanatakini sákiire, kiomátxiakori sákiire pakini. Isápiretarina ikinimane kákitimoni. Ninoa sákiire aãtsopaã iókatsopatakori sákiiretixiti isápiretana ninoa. Paoro imoianariakorikata ótákkikana ninoa ikara isákiirena auikinina íkapani. ⁵ Ininiã ikiniótika kákiti apiaápotape auikiniri Xesosi sákiire. Itomanepaka auikari Xesosi sákiire.

Paoro Taponetari Masetónia Auakari

⁶ Paoro imoianariakorikata ípirixitiápotari Piríxia tixini, Karásia tixini pakini. Iuasaaki Erekari Matamatakoti ! auiritana ninoa Xesosi sákiire isápiretinina Ásia tixiniã. ⁷ Ninoa apokasaaki Mísia tixini takote, inirekamarina Pitxínia tixini isinina. Erekari Matamatakoti ! auiritana isinina Pitxínia tixinimoni. ⁸ Ininiã ninoa ípirixititari Mísia tixini. Apokana Tóatxi sitatxiti.

⁹ Iua íkanókatari Paoro taponeuata. Itaponetari kiki Masetónia tixini auakari. Itimanáta. Amanaanátari:

–Uaimoni pina Masetónia tixini. Pimoianataua ate –itxari.

¹⁰ Ininiã Paoro taponeuataka atoko, ate xinikari:

–Masapoka Masetónia tixinimoni, kotxi atáoka Apiananiri akiritaua ate Teoso iokanapirena erekari kákiti ikiraákinimoni asápiretini íkapani.

Ininiã aiamata Masetóniamoni asini íkapani.

Arítxia Auikari Xesosi Sákiire

¹¹ Tóatxi íporokote ate iereétaua maporo áki. Asapitipo Samotirásia ípokomiriíti. Pokati-mari óti ate sari Niápori sitatxiti. ¹² Iuaã apotorika. Asari Piriposi sitatximoni, Masetónia tixiniã. Masetónia tixiniã iua sitatxi mítari. Piriposi atoko inakari ! auari. Iuaã auana kaiáopokori kákiti Homa sitatxitilini. Ate napari mapaóti iuaã.

¹³ Tomatiko ótisaaki sitatxi ítinikata ate sari uini ítinikata. Ate uákatari uini ítinikata Xoteoakori apotiitiniãua Teoso imisákiiretinina íkapani. Ininiã ate apoka iuaã. Atáopitika ate uákatakiti. Aápokoro Xoteoakoro. Iuaã apotiitauana Teoso imisákiiretinina íkapani, ininiã aítópaka, ninoakata asákiirautini íkapani. ¹⁴ Sito Arítxia inakoro aua ninoa sitokata. Oa txíta poporeri véxtitakaro otxaua oa. Txiatxira sitatxitikero oa. Teoso misákiiretakoro oa. Iuaasaákipekara okenakotari asákiire. Iuasaaki Apiananiri iteene kamaimaroretaro oa Paoro sápiretakiti, ininiã oa auikari isápiretakiti. ¹⁵ Ininiákara oa, oaápkoro auakani apaka, patxisataáka. Eereka oa aiataua oaápkoro áki akaikotini:

–Masa naapoko, híkaikotini íkapani. Hítemoni atáo nauikiniári Apiananiri sákiire, ininiã notakata híkaikota –otxa.

Ikara atoko oa aiataua oakata akaikotini, ininiákara akaikota oaápkoro.

Paoro, Sírası Pakini Kateia Áki Auini

¹⁶ Áti óti Teoso misákiiretiko aikotimoni asikasaaki, ataókitaro átokoro iamotakoro. Maerekati matamatakoti auaítotaro oa. Iua maerekati matamatakoti imarotari kákiti kamakiti apisapanika. Oa amotakani apakaparo ito txineiro oimarore íki. ¹⁷ Oa átokoro osapika Paoro tikini, ate tikini apaka. Oákirítapika:

–Naia kikiakori Teoso nitiriakori. Apiananiri nitiriakori itxauana naia. Oerekauana amaerekani makatxakiko, Teosomoni asini íkapani –otxaápkota.

¹⁸ Itanaótika ikara atoko oákirináta. Ininiã Paoro maerekaxiniretinoka itxa oákirítakiti xika. Áti óti isapotorika, paniáta itxari maerekati matamatakoti:

–Xesosi Kristo uákaã nota paniátaí, pitakanapiniro aroa átokoro –itxa.

Iuasaakipeka maerekati matamatakoti takanaparo. ¹⁹ Oa amotakani ikara imarotakasaaki, otsopa imapakapapekaniika oimarore iki, ininiã imalkarina Paoro, Sírsasi pakini. Ikosekañtotana, anikana sitatxi apanikaki auñtetxiakorimoni. ²⁰ Iuaã apokana. Isãpiretarina Homanoakori:

—Naia kikiakori Xoteo itxauana. !Erekari ninoa oerekapiretakiti, ininiã sitatxi auakani omanãkarauata ninoa sãpiretakiti xika. ²¹ Ate amakinika Homano atxaua. Aimarotapekari aãuiãkiti aãuñte paniãtakiti. Txamari naia oerekaua ipinimonipo inakari akamini ikapani. Naia oerekaua ãti uãka auñkiti sãkiretxiti. !Auñritaãka aãuikiniãri naia oerekapiretakiti. ! Auñritaãka akaminiri —itxana.

²² Iuasaaki kãkitipokoni iuaã apotiitakanua nirekari Paoro, Sírsasi pakini iãsokinina. Ninoa auñtetxiakori matsorakitari Paoro mãka, Sírsasi mãka apaka, imakatzakinina ikapani. Ipaniãtarina apanakini aãpitsaã ixirokitatiko. ²³ Ixirokitatapekãkana atoko, kateia ãki okaãkana Paoroni, Sírsasini pakini. Auñtetxiakori paniãtari iua kateia ñkatakari, inapokopiretiniri imasikakakoni ñkane. ²⁴ Ininiãkara kateia ñkatakari okarañtotana Paoro, Sírsasi pakini kateia irikoãkixiti. Ieretakari ninoa kiti isikatatxi taopata kamapakotatakori ãki, imakatzakakanina ikapani.

²⁵ Ikanõka Paoro, Sírsasi pakini misãkirenãtari Teoso. Ixikarauanãtana Teoso ikapani. Apanakini kateia ãki auakani kenakonãtari. ²⁶ Iuasaaki katimaritika itixi iakekãkata iteene. Kateia patapi apaka iakekãkata. Iuasaakipeka kateia tore takaka. Iñtxikikona metao kamakori, pirikeri ãki auakani Iñtxikikona, karakitakata, katxaka itxa metao. ²⁷ Iuasaaki kateia ñkatakari mereka. Iua atamatari kateia tore takakapeka, ininiã iuãkatari ikinimane kãkiti inikatakini mitekapeka. Ninoa mitekaãkamako, iua auñte okamariko iua, iparñka imakamakani xika. Ininiã ikosekaro iouata mitaro iuaka iorotiniua ikapani. ²⁸ Okaaritakasaakiua, Paoro akirikata:

—Kona pokapeua. Uaikareua ate amakinika —itxa.

²⁹ Iua kateia ñkatakari amanaãri tirikapi. Katimaritika Iroã. Ipamaka Paoro, Sírsasi pakini apisatoõ. Ikininanaãkata. ³⁰ Eereka imipokikãkana ninoa. Iua:

—Kiatokopa nikama, nimaerekani Teoso makatzakini ikapani? —itxana ninoa.

³¹ Ninoa:

—Pauikariko Apiananiri Xesosi sãkire, ininiãkara Teoso makatzakari pimaerekani, paapoko auakani maerekani apaka —itxari.

³² Eereka Paoro, Sírsasi pakini sãpiretari Apiananiri sãkire iuamoni, iua aapoko ãki auakanimoni apaka. ³³ Iuasaaki imaropirikata kateia ñkatakari arokari ninoa karo. Eereka iua imiakorikata, ñtanorokata patxisataãka. ³⁴ Eereka anikana Paoro, Sírsasi pakini aapoko ãki. Isikakienatana. Iua imiakorikata, ñtanorokata poxokoniua, kotxi iuasaaki ninoa aukari Teoso sãkire.

³⁵ Katimatiniãkata auñtetxiakori iokanatana iniritiakori kateiamoni, Paoro, Sírsasi pakini isikakini ikapani. Ninoa apokasaaki, itxana kateia ñkatakariimoni:

—Pauritana Paoro, Sírsasi pakini isinina.

³⁶ Ininiã iua kateia ñkatakari sãpiretari Paoro:

—Niaũteakori iokanapireta notamoni hñte nisikakini ikapani. Ininiãkara hñsipiniãkau erekaxinirepeka hinini —itxana.

³⁷ Txamari Paoro txari auñtetxiakori nitiriakorimoni:

—Ari, Homanoakorikareua ate, iuaritika auñtetxiakori Homanoakori iaritataua ate ikinimane apisatoõ. Maxikatũka ninoa iaritataua ate. !Akamari maerekati. Eereka kateia ãki ninoa okaua ateni. Uatxa ninoa nirekari iokanatiniaua ate ikinimane mimarotakini-tipanika. Konapitini. Ninoapitkarako inari uai. Ninoa makatzakaua ate uai —itxa Paoro ninoamoni.

³⁸ Ninoa kikiakori kanapiriã iauñteakorimoni. Isãpiretarina Paoro iokanapirena. Ninoa auñteakori imaropiretakasaakiri Paoro, Sírsasi pakini Homano ininiuana, ninoa pñkarauata, kotxi ninoa maxikatũka misiritana Paoro, Sírsasi pakini. ³⁹ Ininiãkara ninoa sari Paoromoni, Sírsasi pakinimoni. Ninoa:

—Ate limarotari hñte Homano hininiua. Aimarotaãkamariko !amisiritamaiko —itxana.

Eereka ninoa auñtetxiakori mipokikãkana Paoro, Sírsasi pakini.

—Sitatxi hñtakanapako —itxana.

⁴⁰ Ininiã Paoro, Sírsasi pakini takanapari kateia. Aritxia inakoro aapokomoni isana. Iuaã aõkitana kãkiti Xesosi sãkire auñkani. Paoro, Sírsasi pakini sikataparaxiniretana ninoa. Eereka isipekana, iua sitatxiti itakanapina.

¹ Paoro, Sírası pakini napari Ápípori sitatxiti. Apikomoni inaparina Aporónia sitatxiti. Eereka apokana Tesarónika sitatxiti. Iuaã aua aiko Xoteo apotiitiniãtaãua. ² Paoro ito-tapekari Xoteo apotiitiniãtaãua aikotimoni isini. Ininiãkara iua sari iuaã. Ipi áti pakini ôti tomatiko ôti, isari iuamoni. Iuasaaki Teoso sãkire iõkatsopatakori isãpireta kãkitimoni iuaãtaã auakanimoni. Ninoa pimarauata, ininiã iua sãpirenauata. ³ Ininiã Paoro txari:

—Teoso sãkire iõkatsopatakori oereka ate: Teoso mereëkiti misiritaãkapitikako, okaãkapitikako. Eereka õkitikapitikauako, iuaãkana auãki inini ïkapani. Ia Xesosi hõtemoni uatxa nisãpirenãtakiti Teoso mereëkitipitikara iua —Paoro txana ninoa.

⁴ Átikaka Xoteoakori auikari Paoro sãkire, ininiã Paoro, Sírası pakini moianiakori itxapekauana. Kaiãopokori Akaia tixini auakani Teoso sãkire auiaãkani, auikari Paoro sãkire apaka. Kaiãopokoro sitoakoro, auõttxiakori ïtanoroakoro, auikari Paoro sãkire apaka.

⁵ Xoteoakori, Paoro sãkire mauiaãkani, xikotari Paoro. Ininiã ninoa apotiitana kãkiti kaneenamarini, mapariãkauatakani ahoaãtaã auakani. Apotiitana kãkitipokoni. Ininiã ninoa akiripoakata, imiteëkatana. Ikinimane sitaxi auakani kenakotari. Neenamatzixi atoko itxakatana. Imitekana Xasão inakori aapokomoni. Ìroãkatana itapararitikana, Paoro, Sírası pakini initinina. Inirekarina imipokãkinirina ninoa kãkiti apotiitakanimoni apisatoõ. ⁶ Txamari Paoro, Sírası pakini !auari iuaã. Ininiã ikosekaãtotarina Xasão. Apanakini Xesosi sãkire auiaãkani apaka ikosekaãtotana. Iauõteakorimoni anikana. Isãpiretarina iauõteakorimoni:

—Paoro, Sírası pakini kamari maerekati. Ikini itixiti ikamarina maerekati. Ininiã ninoa uai ate sitatxineëpekarana uatxa. ⁷ Ia Xasão apakapana ninoa. Iua aapoko ikaikotana ninoa. !Ikamarina aãuõte Sesa inakori paniãtakiti, kotxi ninoa oerekari kãkiti áti auõttxi ininiãua, Xesosi inakori —itxana iauõteakorimoni.

⁸ Ikara sãkiretxiti ikenakotakasaakina, kãkiti apotiitakanuia akiripoakata. Auõttxiakori !imarotari ikamakitinina tãkane. ⁹ Eereka auõttxiakori misãkiretana Xasão, apanakinikata:

—Hiiãkitxitana hõsikakiko ïkapani. Eereka auiritaina hõsini.

Ininiã eereka auiritana isinina.

Peréia Sitatxiti Pirena

¹⁰ Kikatapeka inakasaaki, Xesosi sãkire auiaãkani iokanatanana Paoro, Sírası pakini Peréia sitatxitimoni. Iuaã Peréia sitatxiti ninoa apoka atoko, Ìroãna aikoã Xoteo apotiitiniãtaãua. ¹¹ Kãkiti iuaã auakani iteene nirekari Paoro sãpirena ikenakotinina. Tesarónika auakani !atokoni itxana ninoa. Ikiniõtika ninoa atatsopatarari Teoso sãkire iõkatsopatakori, kotxi inirekarina imarotinirina:

—Paoro sãkire atão atxiiti? —itxana.

¹² Ininiã kaiãopokori Xoteoakori auikari Xesosi sãkire. Kaiãopokoro sitoakoro Akaia tixini auakani apaka auikari Xesosi sãkire. Naia sitoakoro auõttxiakori ïtanoroakorokara. Kaiãopokori kikiakori Akaia tixini auakani apaka auikari Xesosi sãkire. ¹³ Eereka Xoteoakori Tesarónika sitatxiti auakani kenakopiretari Paoro sãpiretiniri Xesosi sãkire Peréia sitatxitiã. Ininiã ninoa sari Peréia sitatxitimoni. Apokaãkana atoko, itxãkitarina kãkiti ahoaãtaã apotiitakanuia Paoro omanatinina ïkapani. ¹⁴ Ikara atoko ininiã, Xesosi sãkire auiaãkani iokanatarari Paoro potxoari uinitimoni. Sírası, Tximótxio pakini kaikotapanika Peréia sitatxiti. ¹⁵ Paoro moianatakani anikari iua Atena sitatxitimoni. Eereka ninoa kanapiriã Peréia sitatxitimoni. Paoro iokanapireta Sírası, Tximótxio pakinimoni:

—Katimariã hinako —itxa.

Atena Sitatxiti Pirena

¹⁶ Ininiã Atena sitatxitiã Paoro iãtapari Sírası, Tximótxio pakini apokini. Iuasaaki Paoro itikari kaiãopokori teoso kãkiti kamakiti. Sitaxi xãpoka kãkiti teosonenoka. Ia xika Paoro matinaniuata. ¹⁷ Ininiãkara Paoro oerekari Teoso sãkire Xoteoakorimoni aiko ãki Xoteo apotiitiniãtaãua. Xoteo minakanuia, Teoso sãkire auiaãkani apaka, Paoro oerekari Teoso sãkire iuaãtaã. Ninoa pimarauata, ininiã imisãkiretakana Teoso sãkire ixinikinina ïkapani. Ikiniõtika Paoro oerekari Teoso sãkire kãkitimoni, nipokori iamotikoãtaã sikanimoni. ¹⁸ Kãkiti kaxinikaxitirerini, Epikoreo inakoni, Esitóiko inakoni apaka sãkirusauata Paorokata. Paoro sãpiretana ninoa Xesosi pirena. Isãpiretana Xesosi ipinini, eereka õkitikiniua, iuaãkana auãki inini pirena. Ininiã átikaka:

—Natokopa itxa ikara inakari sãkiretxiti? Uuato sãkire atoko itxa. !Kiãkiteri iua —itxana.

Apanakinipekana txari:

—Isãpiretari áti itixiti auakani teosone pirena.

Paoro Sãpirenauata Ariópako Inakoriãtaã

¹⁹ Eereka ninoa kaxinikaxitirerini anikari Paoro aiko kãkiti apotiitiniãtaãua, imiriã nopini Ariópako inakoriãtaã. Iuaã ninoa txari:

—Ate nirekari aimarotiniri poerekakiti sākiretxiti. Mítxi kona ate kenakotari ikara atoko inakari sākiretxiti. ²⁰ Ipxini poerekakiti sākiretxiti !aimarotapanika. Ipinimonipo itxa poerekakiti. Ininiã pisãpiretaua. Poerekaua, aimarotini ikapani —itxarina Paoro.

²¹ Ikara atoko itxana, kotxi ikiniõtika Atena sitatxiti auakani, apaka äti itixiti ikani Atena kaikotakani nirekari ätiãtaãkiri sãpiretakiti imarotinata ikapani, ininiã ikiniõtika amaneri sākiretxiti ikenakonãtana.

²² Paoro ikinimane apisatoõ itima, imirií Ariópako inakoriãtaã. Iua txana ninoa:

—Kikiakori, Atena sitatxiti auakanii, nitikapekari hiteosone kaiãopokori, ininiã nimarotari iteene hïpaxitiniri hiteosone. ²³ Ahoaãtaã ninapaãpotakasaaki, natamatari kaiãopokori hiteosone misãkiretikoãtaã. Iuasaaki natamatari äti hiteosonemoni sikakori takikoãtaã. Iuaã natatsopatari iõkatakori: “Uai Teoso mimarotakoti misãkiretikoãtaã.” Iua hiteosonetakiti, himimarotakiniti, iuapitikara uatxa nota sãpiretai hïte.

²⁴—Iua Teoso kamari itixi. Ikinipoko itixi nopini auakari apaka ikama. Iua Apiananiri. Iua itixi auakani auite itxaua iua. Iaxiti auakani auite apaka itxaua iua. !Ikaikota kãkiti kamakiti aikotiã. ²⁵ Ikinipokokara auapeka Teosomoni, ininiã !nirekari kãkiti kamakiti iua auini ikapani. Teosopitikara txïkitakari kãkiti auãki inini. Iuakara sikaxiniretari kãkiti. Teosokara sikari ikinipoko kãkiti auakiti. ²⁶ Merepitipanika kãkiti !auari, eereka Teoso kamari kiki Atão inakori. Ikini uãkati kãkiti atokiri itxaua iua Atão. Teoso iokanatana ninoa ikini itixitiã auinina. Kãkiti mauakani apisapanikara, imereëri kãkiti iponaniini õti tãkane. Iaõtari kãkiti auiniãtaã tãkane. ²⁷ Ikara atokora itxa Teoso kamakiti. Teoso txïkitakari kãkiti nitiniri Teoso. Initaãpotakasaakirina, atxiiti ninoa apokari Teoso, kotxi kona õtakoni aua Teoso. ²⁸ Äti txapekari: “Teoso txïkitakaua auãki anini, atïpokotini ikapani. Iua matxïkitakaniãua auãki anini, !aãuari.” Xaxikarerini hïte sauaki auakani txapekari: “Teoso anaakori ate apaka txaua.” ²⁹ Teoso anaakori aniniãua, ininiãkara aimarotari kona kãkiti kamakiti atoko inakarini !itxaua Teoso. Kona oro kamakorini !itxaua. Kona pirata kamakorini !itxaua. Kona kai kamakorini !itxaua Teoso. Konapitini. ³⁰ Mítxipe kãkiti !imarotari atão inakari. Iuasaaki Teoso !imisiritana kãkiti imimarotakanisaakina. Txamari uatxaika ipaniãtari ikininape kãkiti ikini itixiti auakani imaerekanina itakanapinina ikapani. ³¹ Ikara atoko Teoso txari ikinimane kãkiti, kotxi iua ketotapekari äti õti kãkiti misiritiko õti. Xesosi Teoso mereëkiti iuakarako sãpiretariko kãkiti misiritiko ikara õti apokasaaki, kotxi iua imarotari atão inakari. Aimarotari Xesosi Teoso mereëkiti ininiãua, kotxi Teoso õkitikari iua, iuaãkana auãki inini ikapani —Paoro txana ninoa.

³² Xesosi iuaãkana auãki inini pirena ikenakotakasaakina, ätikaka napetari Paoro. Apanakini:

—Ate nirekari pisãpirena iuaãkana akenakotini —itxarina Paoro.

³³ Ininiã Paoro sipe. ³⁴ Apanakinipekana auikapitikari Paoro sãkire. Txionisio inakori, Atena sitatxiti auakani auite, aukari isãkire. Apaka sito Tamari inakoro aukari isãkire.

18

Korïto Sitatxiti Pirena

¹ Eereka Paoro takanapari Atena sitatxiti. Korïto sitatxitimoni isa. Iuamoni apoka. ² Iuaã aõkitari kiki Ákira inakori. Iua Xoteo. Põto inakoriãtaã iua iponaniã. Itãria tixini ikari. ! Okanani apoka Korïto sitatxiti. Apoka itanorokata, Pirisira inakorokata. Ninoa takanapari Itãria tixini, kotxi Itãria auakani auite Krãotxio inakori paniãtana ikinimane Xoteoakori, Homa sitatxiti itakanapinina. Paoro ianapokota Ákira, Pirisira pakinimoni. ³ Eereka ikaikota ninoakata, kotxi ninoa parïka iua Paoro parïkatxikana. Papiri aamata kamakori kamakani ninoa. Ininiã Paoro kaikota Ákirakata, iuakata iparïkauatini ikapani. ⁴ Ikiniõtika tomatiko õti, Paoro sari aiko Xoteo apotiitiniãtaãua. Iuaã Xoteoakori, Kreoakori pakini apotiitaua. Paoro oerepirtana ninoa Xesosi sãkire, isãkire aukinina ikapani.

⁵ Síراس, Tximótxio pakini takanapari Masetónia tixini. Korïto sitatxiti apoãkana atoko, Paoro takanapari iparïka papiri aamata kamakori ikamini, Teoso sãkire kãkitimoni ikiniõtika isãpiretini ikapani. Iua oerekana Xoteoakori Teoso mereëkitipitikara iua Xesosi.

⁶ Txamari ninoa Xoteoakori omanatari Paoro. Ninoa misãkirepirtari Xesosi, ininiã Paoro kamaãkaretxitana ninoa Xesosi imisãkirepirtinina xika. Iõkokari imãka ninoa apisatoõ aãpani katxakini ikapani, omanãkare oerekini ikapani. Ininiã Paoro txana:

—Teoso ! apakapai hïte Xesosi sãkire himauikakani xika. Kona nota xikani, kotxi nisãpiretipekamai hïte. Ininiã uatxaika nisãpiretariko Xesosi sãkire Xoteo minakonimoni. Xoteoakorimoni Inisãpiretaikariko —itxa Paoro.

⁷ Ininiãkara Paoro takanapana ninoa. Isari Txísio Xósite inakorimoni iua aapoko ikaikotini ikapani. Xoteo minakatuiua iua. Teoso misãkiretakari iua. Iua aapoko aiko Xoteo apotiitiniãtaãua takote aua. ⁸ Aiko Xoteo apotiitiniãtaãua sikani auite Krispo inakori aukari

Apiananiri Xesosi sãkire. Ítanoro, imiakori apaka, auikari Xesosi sãkire. Kaiãopokori kãkiti Korĩto auakani kenakotari Paoro sãpirena, ininiã eereka ninoa auikapiretari. Ipatxisa-taãkana.

⁹ Áti Íkanõkati Teoso txĩkitakari Paoro itaponeuatini. Itaponemoni Apiananiri misãkiretari iua:

—!Pipĩkaruatape. Nisãkire pisãpiretapitipo kãkitimoni. !Piotokape. ¹⁰ Kotxi nota auapika pitekata. Píkarotakiri !auari, kotxi kaiãopokori kãkiti nota nakitiakori Íkorapokoriti auari — itxa Paoromoni.

¹¹ Ininiã Paoro kaikota iuaã áti ano, ipixini ano pakinikanani Teoso sãkire oerekini Íkapani.

Xoteoakori Anikari Paoro Káriomoni

¹² Eereka iuaã Akaia tixini auakani auĩte áti Íroã, Káριο inakori. Iua Homano itxaua. Homanoakori auĩtetari iua. Iuasaaki Xoteoakori apotiitaua. Ninoa maĩkari Paoro. Anikarina aiko kãkiti misiritiko sãpiretikoãtaã. ¹³ Iuaã ninoa txari Káriomoni:

—Ia kiki na atão oerekari kãkiti Teoso paniãtakiti kamiko. Ipinimonipo itxa iua oerekakiti. Na aãtokiriakorini oerekakiti atokoni itxa. !Auiritaãka Paoro oerekapiretakiti —itxana.

¹⁴ Paoro sãkirauatini apisapanika, Káριο txana Xoteoakori:

—Nisãpiretai hĩte Xoteoakori. Paoro kamaãkamariko maerekati, nota kenakotamariko apikomoni hĩsãkiremako. ¹⁵ Txamari !ikamari maerekati. Hĩte taparakienatakakaua hãuikapiretakiti xika, hãtokiriakorini oerekapiretakiti xika. Hĩte Xoteoakori. Nota áti uãka nitxaua, ininiã hĩtekara xinikari atão inakori. Kona notani sãpiretai hĩte auĩãkiti —itxa Káριο.

¹⁶ Ininiã omitikana ninoa, aiko kãkiti misiritiko sãpiretikoãtaã õpõkikinina Íkapani. ¹⁷ Iuasaaki Krekoakori maĩkari Sóseni inakori. Iuani Xoteoakori apotiitiniãtaãua sikani auĩte. Krekoakori xirokitatari aãkeẽ aiko kãkiti misiritiko sãpiretikoãtaã apisatoõ. Txamari Káριο !imaãkatari.

Paoro Kanapiriã Átxiokia Sitatxitimoni

¹⁸ Eereka Paoro kaikotapanika mapaõti iuaã Korĩto sitatxiti Xesosi sãkire auĩãkanikata. Eereka iua takapiretanapana ninoa. Isipe Pirisira, Ákira pakinikata. Iereẽtauana maporo áki, Síria tixinimoni isinina Íkapani. Sẽkireia sitatxiti apokana. Iuaã Paoro sãpiretari Teoso ikamaenetakiti Teoso Íkapani. Eereka ikixatari ikii ikamaenetakiti ixinikini Íkapani.

¹⁹ Ninoa apoka Épeso sitatxiti. Iuaã Paoro takanapana Pirisira, Ákira pakini. Paoro Íroã aiko áki Xoteo apotiitiniãtaãua. Iuaã apakapapiretakakaua Xoteoakorikata Teoso sãkire isãpiretinina. ²⁰ Ninoa misãkiretari Paoro ninoakata apikomoni ikaikotini Íkapani. Txamari Paoro linirekari ikaikotini.

²¹ —Nisariko kiiniri Teoso misãkiretiko aikotiã Xerosareẽ. Eereka Teoso nirekiniãri, uai nikanapiriã hĩtemoni —itxa Paoro.

Eereka isipe. Iereẽtaua maporo áki. Épeso sitatxiti itakanapa. ²² Sesaréia sitatxiti apoka Paoro. Eereka isa Xerosareẽmomi. Iuaã apokasaaki, ianapokota Xesosi sãkire auĩãkanimomi. Eereka isa Átxiokia sitatxitimoni. ²³ Iuaã ikaikota mapaõti. Eereka isipe. Karásia tixini, Pirixia tixini apaka Ípirixitiãpota. Aapokotxi apokaãpotakasaaki, isikapoxokonitana ikini-mane Xesosi sãkire auĩãkani.

Aporo Pirena

²⁴ Iuasaaki Xoteo Aporo inakori sari Épeso sitatxitimoni. Iua iponaniã Arexãtria sitatxitiã. Paimatireri iua. Imarotari Teoso sãkire iõkatsopatakori imakinika. ²⁵ Iua oerekapeẽkaika Xesosi sãkire, ininiã atão Xesosi sãkire isãpireta kãkitimoni. Ipoxoniritika isãpirenauata. Txamari kãkiti patxisatiko pirena liteene imarotapanika. Xoão kapatxisareri oerekapiretakitinanira imarota. ²⁶ Iua Aporo sãpirenauata itaparaxinireritika aiko áki Xoteo apotiitiniãtaãua. Iuasaaki Pirisira, Ákira pakini kenakotari isãkire. Eereka anikarina aapokomonina. Oerekarina apikomoni Teoso sãkire imarotini Íkapani. ²⁷ Eereka Aporo:

—Ninirekari Akaia tixinimomi nisini —itxa.

Ininiã Xesosi sãkire auĩãkani:

—Ari, erekapitikari pisinu.

Ininiã Xesosi sãkire auĩãkani, Épeso auakani, iokanatsopatari itariakorimomi Akaia tixini auakanimomi. Itxana iõkatsopariã: “Hãpakapariko aĩtari Aporo inakori.” Aporo apokasaaki Akaia tixini, iteene imoianatana Xesosi sãkire auĩãkani. Ninoa auikari Xesosi sãkire, kotxi Teoso iteene tirtana ninoa. ²⁸ Íkinimane apisatoõ Aporo oerekana Xoteoakori, Xesosi sãkire mauĩãkani, Xesosi atãopitika Teoso mereẽkiti ininiãua. Teoso sãkire iõkatsopatakoriã iua oerekana Xesosi Teoso mereẽkiti ininiãua. Ininiã Xoteoakori !kasãkirena.

19

Paoro Épeso Sitatxiti Auakasaaki

¹ Aporo Korĩto sitatxiti auakasaaki, Paoro İpirixititari Épeso tōpa Épeso sitatxiti apokini İkapani. Iuaā aōkitana kākiti Xesosi sākire auīākani. ² Paoro pimaāna ninoa:

—Xesosi sākire hāuikasaaki, hāpakapatarı Erekarı Matamatakoti? —Paoro txana ninoa. İniniā ninoa:

—Kiripitipa iua Erekarı Matamatakoti? !Aimarotari —ıtxana.

³ İniniā Paoro:

—Kanatokopa inakariāpa hıte patxisataāka, Erekarı Matamatakoti himimarotakani? İniniā ninoa:

—Ari, Xoāo patxisarauatini atoko inakarikanera ate patxisataāka —ıtxarina Paoro.

⁴ İniniā Paoro:

—Xoāo patxisatana kākiti maerekati takanapakani. İtxana ninoa: “Hıteko iteene auikapiretariko nitikini apokakari, Kristo Xesosi inakori,” Xoāo txari kākiti —ıtxa Paoro.

⁵ İkara ikenakotaākana atoko, ninoa patxisataāka Xesosi Apiananiri uākaā. ⁶ İuasaaki Paoro takari imakinika iuako ninoa nopini. İuasaakipeka ninoa apakapari Erekarı Matamatakoti. İuasaaki ninoa sākirauata kākiti āti uāka sākireē. İsapiretarina Teoso sākire kākitimoni. ⁷ Ninoa kikiakori atxiiti tosi pakini.

⁸ İpi āti pakini kasiriti ikiniōtika aiko Xoteo apotiitiniātaāua Paoro sāpirenauata itaparax-inireritika. Apanakinikata imisākirenātakakauana. Paoro nirekana ninoa auikınirina Teoso sākire, Teoso auıtetxi ininiāua pirenā. ⁹ Txamari ātikaka ninoa !nirekarı auikapiretinirina, kotxi !nirekarina ikara atoko inakari sākiretxiti. Ninoa misākirepiretari Xesosi sākire ikınimane kākiti apisatoō. İniniākara Paoro takanapana ninoa. Anikana Xesosi sākire auīākani iuakata. İkiniōtika Txirano inakori oerekarauatiniātaā Paoro oerekari Teoso sākire kākitimoni. Ninoa pımaaāpotakakaua Teoso sākire imarotinina İkapani. Apakapapireāpotakakauana. ¹⁰ İuaā Paoro oerekarauata ipikanani, ininiā ikınimane kākiti Ásia tixini auakani kenakotari Xesosi Apiananiri sākire. Xoteoakori, Krekoakori pakini kenakotari.

Sepa Anaakori Pirena

¹¹ Teoso sikaposotiiretari Paoro posotiiretxi ipinimonipo inakari ikamini. ¹² İkara atoko ininiā ikii mata, imāka iparıkauatini İkapani apaka anikaāka amianatakanimoni, ininiā Teoso txıkitakana amianatakanı erekape ininina. Maerekani matamatakoni auaitotiniāri kākiti, Paoro māka ninoa kākiti apakapakasaaki, maerekani matamatakoni sipe.

¹³ İuasaaki apanakini Xoteoakori, mıltiakori, maerekani matamatakoni omıtiākani, sari kākitimoni maerekani matamatakoni omıtikinina İkapani. Xesosi pirenā ikenakotana. İniniā eereka ninoa txari maerekani matamatakonimoni:

—Apaniātai hıspiniikaua Xesosi uākaā, Paoro sāpiretakiti Xesosi uākaā —ıtxana ninoa.

¹⁴ İuasaaki aua kiki Xoteo, Sepa inakori. Sasetotxiakori auıte itxaua. İua anaakori kiki setxi pakini. Sepa anaakori paniātana maerekani matamatakoni sini Xesosi uākaā.

¹⁵ Txamari āti ōti maerekati matamatakoti apakapapiretana ninoa:

—Nota imarotari Xesosi. Nimarotari Paoro. Hıte !nimarota. Kıniparai hıte? —ıtxa maerekati matamatakoti.

¹⁶ İuasaakipeka kiki maerekati auaitotakiti okakataua ninoa nopini. Apataparata iua maerekati. İuasaaki iua āsokitakatapena ninoani. İniniā ninoa mıteēkata, kasarapekana, kakaropekana itxapena.

¹⁷ İkinimane kākiti Épeso sitatxiti auakani kenakopiretari ikara ene. Xoteoakori, Krekoakori apaka kenakopiretari ikara ene, ininiākara ipıkarauatana. İkara atoko ininiākara Xesosi uāka apiata ipaxitaāka. ¹⁸ Kaiāopokori Xesosi sākire auīākani apotiitaua. İkinimane apisatoō isāpiretarina maerekati mitxi ikamakıtina. ¹⁹ Apanakini kasikapōererini apaka apoka iuaā. İminarina sikapōeretxi apaiaōkiko tsopa. İkinimane apisatoō iotıkarina. ! İnirekaıkarina maerekati ikaminina. İaōtarina ikara aātsopa İki. İiki sıkoēta mio txineiro ota pirata kamakoro. Kaiāopokoro txineiro. ²⁰ İkara atoko ininiāpanirako Apiananiri sākire iarıpiretako ikini itixiti. Kaiāopokori kākiti apiata auıkaāpotari Apiananiri sākire.

²¹ Eereka Paoro ākixinire txari:

—Nıpirixititariko Masetónia tixini, Akaia tixini pakini. İposo atoko Xerosareēmoni nisako. İposo atoko Homa sitatxitimoni nisako —ıtxa ākixinireē.

²² İokanatana imoianariakori, Tximótxio, Erásito inakori pakini Masetónia tixinimoni. Paoro kaikotapanika Ásia tixiniā.

Neenamatxi Épeso Sitatxiti Auini

²³ Iuasaaki Paoro Épeso sitatxiti auakasaaki, kãkiti Xesosi oerekapiretakiti manirekakani misãkirepiãepotari Paoro, kotxi ! inirekarina Xesosi oerekapiretakiti. ²⁴ Iuasaaki kiki Temétxio inakori aua iuaã. Ikamari aiko axapitipikiri inakari. Krekoakori teosone Txiana inakoro misãkiretiko aikoti atoko inakari ikama. Kaiãopokori ikama pirata kamakori ivétxitini ikapani. Iua, initiriakori apaka apakaparo txineiropokoni iparíkana íki. ²⁵ Iua Temétxio píkapiretana ikinimane initiriakori, ninoa kamakitikana kamakani apaka. Temétxio txana:

–Kikiakori, híte imarotari kaiãopokori txineiro aãpakapa aparíka íki. ²⁶ Híte kenakotapekari Paoro sãpirenãtakiti. Paoro txanãta: “Kãkiti kamakiti kona teoso !itxaua.” Kona ia tãpananini, kona Épesonanini, ikara atoko itxa. Ikini itixiti Ásia tixini auakanimoni ikara atoko itxa. Kaiãopokori kãkiti Paoro sãkire auiãkani auapeka. Kaiãopokori kãkiti !inirekaikari teoso ate kamakiti. ²⁷ Atxiíti kãkiti misãkirepiãepotari ate kamakiti. Atxiíti ! inirekaikari aparíka. !Ikarananini. Atxiíti kãkiti !ipaxitaikari ateosone Txiana misãkiretiko aikoti. Ininiã atxiíti kãkiti misãkirepiãepotari oa Txiana. Ikinimane Ásia tixini auakani teosonetaro oa. Ikini itixiti auakani teosonetaro oa –itxa Temétxio ninoamoni.

²⁸ Ninoa kenakotakasaakiri ikara sãkiretxiti, omanãkarauatana. Ninoa akirikata:

–Txiana, Épeso auakani teosone. Apiananiri oa –itxanãtana ninoa.

²⁹ Ikinimane kãkiti sitatxi auakani miteékata, akiriãpokatana. Imaíkarina Paoro moianariakori, Kaiõ inakori, Arisitako inakori pakini. Ninoa Masetónia tixinikini. Ikoekaitokatana. Imimiteékata. Kãkiti apotiitiniãtaãua aikotimoni anikaãkana, müroã txana. ³⁰ Ikara Paoro imarotakasaaki, inirekari íroini kãkitikata isãkirauatini ikapani, txamari Xesosi sãkire auiãkani lauritari iua íroini. ³¹ Átikaka Ásia tixini auakani auíteakori, Paoro tiretakani, iokanapireta Paoromoni:

–Kona píroãpeko kãkiti apotiitiniãtaãua aikoti áki –itxarina iokanapirena.

³² Aiko áki ikinimane akiripoanankata. Apanakini akirikatakiti ipinimonipo. Apanakinpekana akirikatakiti ipinimonipo itxanãtana, kotxi kaiãopokori kãkiti txari:

–Kixikapa aãpotiitaua?

!Imarotarina ixika. ³³ Xoteoakori iuaã apotiitakanuia katikari Arexãtri inakori ikinimane apisatoõ, isãkirauatini ikapani. Iuasaaki õkitikari iuako kãkiti iotokinini ikapani, isãkire ikenakotinina ikapani. ³⁴ Txamari ninoa imarotakasaakiri Arexãtri Xoteo ininiãua, akiripoakatana ipi oara:

–Txiana, Épeso auakani teosone, Apiananiri –itxanãtapikana.

³⁵ Eereka auítetxi inakariua apoka ninoa apisatoõ. Iua posotari ninoa iotokakini. Itxarina:

–Ikini itixiti auakani imarotari atenokara Épeso auakaninokara nãkatiniri ateosone Txiana misãkiretiko aikoti. Apiananiri oa. Ninoa imarotari atenokara nãkatiniri kai oa íto atoko inakari iaxiti katxakakaro. ³⁶ Ikinimane imarotapekari ikara inakari, ininiãkara hítokako. Iteene híxinikariko híkamakiti tãkane. Maxikatíika !hãkirinãtape. ³⁷ Kotxi híte minana naia kikiakori uaimoni, txamari !íitiríkarina tiitxi ateosone misãkiretiko aikoti áki auakari. ! Imisãkirepiãepotari ateosone. ³⁸ Temétxio, iuakata paríkauatakani pakini, nirekiniãri naia kateiamoni isinina, auapitika aiko kãkiti misiritiko sãpiretikoãtaã. Auapitika aãuíteakori. Iuaã erekari isãpiretinirina maerekati naia kamakiti. ³⁹ Iuaíkana hítsoatiníã, sitatxi auakani auíteakori apotiitakasaakia, híspiretana ninoa himapokaerekatakiniti ninoa õtãkikinini ikapani. ⁴⁰ !Apakata mixikanani himitekini, hãkiripoakatini atoko híkamini. Maxikatíika hãkiripoanãta. Ixika !auari. Atxiíti Homanoakori auíte txitaua maerekati akamakiti xika –itxana ninoamoni.

⁴¹ Eereka ipaniãtana ninoa sini.

20

Masetónia Tixini, Akaia Tixini Pakini

¹ Ninoa kãkiti apotiitakanuia aapokomonina ikanapiriãka atoko, Paoro píkapiretana Xesosi sãkire auiãkani. Imisãkiretana. Ikamapoxokonitana. Iposo atoko itakanapiretana. Isipe Masetónia tixinimoni. ² Ípirixititari Masetónia tixini. Aapokotxi apokaãpotakasaaki, isãpiãepotari Xesosi sãkire kãkitimoni. Isikataparaxiniretana. Eereka Akaia tixinimoni apoka. ³ Iuaã ikalkota ipi áti pakini kasiriti. Eereka Paoro kaiaampeka maporo áki iereétniua Síria tixinimoni isini ikapani. Iuasaaki, ikenakopiretari Xoteoakori okaenetiniri iua. Ininiãkara Paoro:

–Masetónia tixinimonikanerako nikanapiriãka –itxa Paoro.

⁴ Sópato inakori Peréia sitatxitikiri sari iuakata. Piho inakori ákiri itxaua. Arisitako inakori, Sekõto inakori, Tesarónika sitatxitikini, ninoa apaka sari Paorokata. Kaiõ inakori

Tepi sitatxitikiri apaka sari Paorokata. Txíkiko inakori, Tópimo inakori Ásia tixinikini, Tximótxio inakori pakini moianatari Paoro.

⁵ Iuasaaki nota Arókasi inakori iuakata naua. Paoro imoianariakorikata íkiika isinina. Nota, nimoianariakorikata sari Paoro tikini. Tóatxi sitatxiti Paoro iátapaua ate. ⁶ Páo miátiákati níkiko óti napaka atoko, Piriposi sitatxiti aiereétaua maporo áki Tóatxi sitatxiti asini íkapani. Siko pakini óti napaka atoko Tóatxi aápoka. Iuaá aaókitana Paoro imoianariakorikata. Iuaá anapari áti semanati.

Paoro Txíkitakari Ipíkari Iuaíkana Auáki Inini

⁷ Tomatiko ótisaaki Xesosi sákire auíákani apotiítua komiri ixanakinina íkapani, Xesosi ipinini ixinikinina íkapani. Iuasaaki Paoro oerekanátari Teoso sákire. Apaíkanókapaka isápírenauatapanika, kotxi katimatiníkata isipe. ⁸ Ate apotiitiniátaua aiko inopinita auakari iriko áki. Iuaá auari kaiáopokori tirikapi poniákari, ininiákara papatakari. ⁹ Iuasaaki átokori Etxiko inakori topákanáta inopinita auakari sonaá. Paoro sápirenauanátapika, ininiákara itapo inokaápotari iua Etxiko. Eereka imaka. Iuasaaki ixipotorika. Xitípeka apoákata. Ninoa miteékata iuamoni isinina, txamari !auaika. ¹⁰ Ininiá Paoro katxaka, sa itxa iuamoni. Isiríka iua ipíkari nopini, imaarata itxari.

—!Hípíkaruatape. Auákipanikari —itxana ninoa.

Ininiá iuaíkana iua átokori auákipeka itxa. ¹¹ Iposo atoko Paoro kaníka iuaíkana inopinita irikomoni. Komiri inika. Iposo atoko iuaíkana ninoakata isákíruanátiniritika katimata itxa. Ikatimataáka atoko isipe Paoro. ¹² Eereka anikarina iua átokori aapokomoni. Ninoa iteene poxokoniuaa iua auákipanika inini.

Miretomoni Sikiko Pirena

¹³ Iuasaaki Paoro paniátaua ate:

—Híte sari maporoá Asosi sitatxitimoni. Imiriíraکو nota sari. Iuaá nota iereétaua hítekata —itxaua ate.

Ininiá ate sari iua apisa. ¹⁴ Asosi sitatxiti Paoro aókitaua ate. Iereétaua maporo áki. Iposo atoko asa Mítxireni sitatxitimoni. ¹⁵ Iuaátaua aápokasaaki, iuaíkana apotorika. Áti óti napaka atoko, anapari Kio inakori takote pokomirí. Áti óti napaka atoko, Samosi inakori pokomirí aápoka. Iuaíkana áti óti napaka atoko, aápoka Mireto sitatxiti. ¹⁶ Iuasaaki Paoro !inirekari Épeso iporokoti apokitini, kotxi !inirekari auapokotini Ásia tixiniá. Ikatimaritaua, kotxi iposotiniári, inirekari Xerosareé apokini. Pétékósitxi kiiniriti apisapanika apokini inireka.

Xesosi Sákire Auiákani Auíteakori Ótáikikiko

¹⁷ Ininiá Paoro Mireto sitatxiti auakasaaki, iokanapireta Épeso sitatxitimoni. Ipíkapiretana Xesosi sákire auíákani auíteakori. ¹⁸ Ninoa apokasaaki, Paoro misákiretana ninoa:

—Himarotari merepitipanika Ásia tixini napokasaaki, eereka hítekata nauakasaaki, himarotari ikiniótika nauini hítekata. ¹⁹ Iuasaaki níparíkauata Apiananiri nirekakiti nikamini. Na niuikaua. Iteene nitxiapata. Xoteoakori nirekari okinino, ininiá nimaxirexinire auapitika iuasaaki, iuaritika nikamari Apiananiri paniátaskiti. ²⁰ Himarotari na níkapitari ipixini Teoso sákire. Nisápiretapekai híte imakinika Teoso sákire híte ereka hinini íkapani. Kákiti apotiitiniátaua noerekai Teoso sákire. Apaka nisari áti haápokomoni, eereka áti haápokomoni, eereka áti haápokomoni, nitxaápota Teoso sákire noerekini. ²¹ Xoteoakori, Xoteo minakaníua apaka nisápiretari nimarotakiti Teoso oerekakiti maerekanitxi itakanapina íkapani, Teoso paniátaskiti ikaminina íkapani. Nisápiretari nimarotakiti Teoso oerekakiti, Xesosi Apiananiri sákire auíkinina íkapani.

²² —Ininiá nota sariko Xerosareé, kotxi Erekarí Matamatakoti paniátano nota iuaá nisini. !Nimarotari kiatokouako ninaákaniko iuaá. ²³ Ikini sitatxiti nauakasaaki, Erekarí Matamatakoti pinitano: “Piteniko takapeékako kateia áki iuaá. Iuaá pimisiritiko auapitíakako,” itxano. Iuananira nimarota Xerosareé napokasaaki. ²⁴ Ikara nímisiritiko sákiretxiti kona mamakari níxinikakiti, kotxi kona nitiretari nauini íkorapokoriti. Xesosi Apiananiri paniátaskiti paríkatxiti ninireka níkamini. Nipoxokoniritika nauini mapotókirepe nitxako. Xesosi paniátano Teoso iokanapirena erekarí Teoso tiraóki nisápiretini kákiti.

²⁵ —Nisápiretapekari Teoso auítetxi ininiáua pírena híte sauaki nauakasaaki. Uatxa nimarotari híte híkinika kona hátamataikanoko nota. ²⁶ Ininiá híxinikapikariko nisákire iaóka uatxa nisápiretakiti. Kákiti híte sauaki auakari pípinanakiníá, Teoso kimapore imimarotakaníá, kona nota xikani. ²⁷ Kotxi nisápiretapekai híteomoni imakinika Teoso iokanapirena. ²⁸ Erepaniko, katokinani hítxako maerekati apokini hítemoni. Erekarí Matamatakoti sikapekari kákiti hítemoni Xesosi sákire hóerekini íkapani, ininiákara hiníkatana ninoa. Soti auíte níkatakani atokokana hítxauako. Ninoa hípiraaokori atoko. Ininiá hítiretanako ninoa kákiti, kotxi Teoso nakitiakori itxauana. Teoso ákiri ipina ninoa íkapani, iua nakitiakori

ininiuana ikapani. ²⁹ Nimarotari kákiti apokapitikako hitemoni nota sini tikini. Ninoa nirekari ixipokinirina hīparika Teoso ikapani. Xapakori patari imaikini monōkoni atoko itxako ninoa hīte sauaki imonōkoni apokini. Ininiā erepaniko. Katokinani hītxako. ³⁰ Áti ōti kákiti hīte oereēkini sápiretakiti na atāoni. Koketakori sákiiretxiti isápiretana apanakini Xesosi sákiere auíākani. Ikara xika apanakini auikari ninoa sákiere, ininiākara isanako ninoakata. ! Auikaikarina hīte sákiere. ³¹ Ininiākara erepaniko. Hīxinikariko ipi anokanani áti anokanani pakini nota ōtákiikanātai hīte. Noerekanātai hīte Teoso sákiere Ikanōka, pokamara pakini. Ikiniōtika noerekai hīte. Nitxiapata nōtákiikasaakii, kotxi nitiretai.

³² —Uatxa nisikai hīte Teosomoni, iua níkatini ikapani. Nitakanapari Teoso sápirena hītekata, kotxi iua sápiretari isikini ikinipoko erekari. Iuara sikaposotiiretai hīte. Iuara sikai hīte erekari iníkatakiti, inakitiakorimoni isikini ikapani. ³³ !Nixikotari apanakini. !Nimaākatari itxineirote, imākana pakini. ³⁴ Hīte imarotapitikari notaka paríkauata imakinika ninireēkiti, nimoianariakori nireēkiti apaka niamotini ikapani. ³⁵ Ikara atoko aparíkauatiniā, atiretana kákiti maposotakanuia. Nota paríka oerekepekai hīte ikara atoko hīkamini. Maxinikari Xesosi Apiananiri sákiere. Iua txari: “Teoso takari erekari kákitimoni iua amonitakiti apakapakasaakí. Teoso takari apia erekari sikarauatakarimoni,” —Paoro txana ninoa Épesokinimoni, Teoso sákiere auíākani auíteakorimoni.

³⁶ Iuasaakí Paoro kapotoreēkaua ninoakata. Imisákiiretarina Teoso. ³⁷ Ninoa ikinimane txiapakata. Imaarākarina Paoro, apitxoka itxarina. Itakapiretanaparina. ³⁸ Apiata imatinanina, kotxi Paoro sápiretana ninoa, !aōkitaikarina iua. Isana iuakata maporomoni.

21

Paoro Sari Xerosareēmoni

¹ Maporo aāpokasaakí, ate takapiretanapana ninoa Épesokini. Eereka asipeka. Kosi pokomiríitimoni asakatapitipo. Iuaā aāpoka. Katimatiniákata asa Hotxi iporokotemoni. Eereka Pátara sitatxitimoni asa. ² Iuaā aāpokaro áto maporo Penísia tixinimoni sikaro, ininiā aiereētaua atoko ate potorika asini. ³ Apaniāxiti apokasaakí, aātamatarí Xipri pokomiríiti. Anapari Xipri pokomiríiti asanaremoni. Asari Síria tixinimoni. Aāpokita Txiro sitatxiti, kotxi iuaā tíitxi maporo áki auakari kaikota. ⁴ Iuaā ate aōkitari kákiti Xesosi sákiere auíākani, ininiā akaikota ninoakata áti semanati. Ninoa txari Paoro:

—Xerosareēmoni !pisipe, kotxi Erekari Matamatakoti sápiretapekaua ate pimisiritiko tīkane aua iuaātaā —itxarina.

⁵ Apotorikini ōti apokasaakí, ate sipe iuaíkana maporomoni. Ninoa ikinika, itanoroakorokata, imiakorikata, isana atekata sitatxi itiniā iporokomoni. Akinika akapotoreēkaua ikipatxiteē, misákiireta atxari Teoso. ⁶ Atakapiretanapana iposo atoko, ate iereētaua maporo áki. Ninoa kanapiriā aapokomonina.

⁷ Ininiā Txiro sitatxiti atakanapa. Iuaíkana apotorika. Eereka aāpoka Pitoremaita sitatxiti. Iuaā ate misákiiretana kákiti Xesosi sákiere auíākani. Akaikota áti ōti ninoakata. ⁸ Katimatiniákata iuaíkana apotorika asini. Eereka aāpoka Sesaréia sitatxiti. Iuaā Piripi inakori aapokomoni asa. Teoso sákiere sápiretakari itxaua Piripi. Xesosi moianariakori Xerosareē auakasaakina, ninoa mereēri iua Piripi, apikomoni kikiakori seisi pakini, ninoa imoianatinina ikapani. Ate kaikota Piripi aapoko. ⁹ Piripi auari ipi ipi pakini imiakoro átokoropanika. Ninoa apaka sápiretari Teoso iokanapirena kákitimoni. ¹⁰ Ate auanapa iuaā mapaōti. Iuasaakí Teoso sákiere sápiretakari Ákapo inakori Xotéia tōpa potorikakari apoka Piripi aapoko. ¹¹ Ikosekari Paoro makiomatare. Iitxikari iuako ikítikata. Itxari:

—Erekari Matamatakoti txari: “Xoteoakori Xerosareē auakani iaxirikapiriko ia makiomataretxi nakititakari ia atokokanerako iaxirikiko. Eereka isikarina Xoteo minakonimoni” —Ákapo txaua ate.

¹² Ikara akenakotakasaakí, ate apanakini iuaā auakanikata txari Paoro:

—Paoro koniko !pisipe Xerosareēmoni —atxari.

¹³ Txamari Paoro:

—Kinirepa hītxiapanāta? Hīte kamamatinanitano nota. !Nimaākatari niaxirikiko Xerosareē. !Nimaākatari nokiko apaka Apiananiri Xesosi nauikini xika —itxaua ate.

¹⁴ Ikípitari asákiere. Ininiā ate:

—Iaōpe. Ikara atoko ininiā, ate nirekari Teoso nireēkiti kamiko —atxa.

¹⁵ Mapaōti inapaka atoko, aāiamata Xerosareēmoni asini ikapani. Eereka apotorika asini. ¹⁶ Apanakini Xesosi sákiere auíākani Sesaréiakini sari atekata apaka. Menasō inakori aapoko ninoa anikaua ate, kotxi iuaā anirekari akaikotini. Menasō Xipri pokomiríitikiri. Okananipeka iua auikari Xesosi sákiere.

Paoro Apoka Xerosareē

¹⁷ Xerosareë aãpokasaaki, Xesosi sãkire auiaãkani apakapaua ate ipoxokoniritikana. ¹⁸ Katimatiniãkata Paoro sari atekata Txiaikomoni aianapokotini ikapani. Ikinimane Xesosi sãkire auiaãkani auiteakori aua iuaãtaã. ¹⁹ Paoro misãkiretana. Isãpiretana imakinika Teoso kamakiti Paoro parikaã Xoteo minakanuia sauaki iparikaauatakasaaki. ²⁰ Ikara ikenakotakana atoko, ninoa txari:

—Peerekari Apiananiri —itxana.

Eereka itxarina Paoro:

—Aitari, pimarotari kaiãopokori Xoteoakori auikiniri Xesosi sãkire. Ninoa auikari Moisesini oerekakiti sãkiretxiti apaka. ²¹ Apanakini sãpiretpekana ninoa: “Paoro oerekanãtana Xoteoakori, Xoteo minakanuia sauaki auakani, Moisesini oerekakiti itakanapinina ikapani. Oerekanãtana ninoa Teoso takaõtxikare imiakori itoã imatakakani ikapani. Oerekanãtana ninoa aãtokiriakorini oerekakiti itakanapinina ikapani.” Ikara atoko itxanãtana ninoa. ²² Ninoa imarotapanikari pite uai apokini, ininiãkara natokopa atxatari akaminiri, kotxi anirekari ninoa imarotini apanakini sãpiretakiti poxiene inini. Anirekari ninoa imarotini pite aukapititari Moisesini oerekakiti. ²³ Ininiãkara ia pikama. Naia ipi ipi pakini kikiakori misãkiretari Teoso. Isãpiretarina Teosomonikari ikamaenetakitina tikane. ²⁴ Ininiã pisa naiakata Moisesini oerekakiti iaõka hãkamini ikapani, ininiãkara hãkipaãtaua Teoso ikapani. Pite iikixitari naia kii kixatiko ikapani. Ikara atoko ininiã, ikinimane imarotariko poxienetapa apanakini sãpiretakiti. ²⁵ Ninoapekana, Xoteo minakanuia Xesosi sãkire auiaãkanipekana, ate iokanatsopatapeka ninoamoni. Asãpiretana ate xinikakiti: —!Hinikapiriko nipokori teoso kãkiti kamakitimoni sikakori. !Hinikapiri arẽkatxi. Manotsaãtakori xini !hinikape. !Hãsirikape pãtanoro minakotokatika. !Hãsirikape pãtaniri minakotokatika. Ikara atoko atxa ate ninoamoni aiokanatsopatini —itxarina Paoro.

²⁶ Ininiã Paoro anikana ninoa kikiakori. Katimatiniãkata ninoa kipaãtaua Teoso ikapani Moisesini oerekakiti iaõka ikaminina ikapani. Eereka Paoro iroã Teoso misãkiretiko aikotiã. Isãpiretari sasetotxi ninoa keto itõna arokiko xipokini õti, kotxi iusaakiko sasetotxi apakapari ninoa sikakiti Teosomoni.

Paoro Maikiko

²⁷ Iua semanati kaimapeka ixipokini inakasaaki, ãtikaka Xoteoakori Ásia tixinikini atamatarari Paoro Teoso misãkiretiko aikoti ãki. Ninoa misãkireporetari Paoro ikinimane kãkiti iuaã apotiitakanimoni, ininiã ninoa sãkire xika ikinimane omanatarari Paoro. Eereka imaikarina Paoroni. ²⁸ Ásia tixinikini akiripoata:

—Hite Xoteoakori himoianataua ate. Ia kikirã oerekari ikini itixitikini omanatinina Xoteoakori. Iara oerekari kãkiti Moisesi paniãtakiti imakamakani. Oerekari kãkiti mapaxitakiniri ia Teoso misãkiretiko aikoti. Ìkoraasaaki !ipaxitari ia aiko, kotxi imiãroãna Xoteo minakanuia aiko ãki, ininiãkara itxikotari ia aiko Teoso nakiti —itxanãtana ninoa.

²⁹ Ikara itxana, kotxi mitxi itikarina kiki Xoteo minakatua Tõpimo inakori Épeso sitatxitikiri Paorokata tãpokotini sitatxi apanikaki. Txamari Paoro !anikari iua aiko ãki. Ininiã iuaãkatarina Paoro anikapekari iua aiko ãki. ³⁰ Ininiã iua Paoro maikiko pirenã iaripireta. Ikininape sitatxi auakani kenakoenetakasaakiri ikara, imitekana aikomoni. Imaikarina Paoro. Ikosekaãtotarina. Teoso misãkiretiko aikotiã imipokiãkatarina Paoro. Iusaakipeka aiko tore totaãkapeka. ³¹ Kãkiti iuaã apotiitakanuia nirekari okiniri Paoro. Sotatoakori Homano inakanuia ninoa auite kenakoenetari ikinimane Xerosareë auakani neenamauatini. ³² Iusaakipeka sotatoakori auite anikana sotatoakori. Imitekana Paoromoni. Kãkiti atapakasaakina sotatoakori auite sotatoakorikata, iusaakiika iotoka Paoro iaritatinina.

³³ Ininiã sotatoakori auite maikari Paoro. Ipaniãtana sotatoakori Paoro iaxirikini ipi kohẽtxiã. Iposo atoko ipimaãna kãkiti itakote auakani:

—Kiripa ia kiki? Kixikapa ia atoko inaãka? —itxana ninoa.

³⁴ Ininiã ãtikaka iuaã auakani, ia xikara. Apanakinipekana ãti xikara, itxaãponãtana isãkirena. Sãkiretxi kaiãopokori ininiã, iua !imarotari atão ixika. Ikara atoko ininiã, sotatoakori auite paniãtana sotatoakori, ninoa aapokomoni anikinirina Paoro. ³⁵ Sotato aapokokiri kanikoatxiã apokasaakina, sotatoakori õtanõkari Paoro ito, kãkiti mamaikakaniri ikapani. ³⁶ Kotxi kaiãopokori kãkiti itikini ikani akiripoakata:

—Hõkariko. Hõkariko —itxanãtana.

³⁷ Paoro sotatoakori aapoko ãki iãroãnapanoka inakasaaki, Paoro txari sotatoakori auite:

—Apakata pite nimisãkiretini?

Ininiã sotato auite tikoka.

—Pite imarotari Krekoakori sãkire —itxari Paoro.

³⁸ —Kona piteni Exito tixinikiri pitxataua? Kona piteni kitatiki kamanātari neenamatzixi auítetxiakori pomanatini? Kona piteni anikatana ipi ipi pakini mio kokanirini ixaminakitekatanana āparaā makipakaniātaā? —ipimaāri Paoro.

³⁹ Ininiā Paoro:

—Kona notani. Xoteo nitxaua. Nota Taaso sitatxitikirirano nota. Taaso sitatxiti, sitatxiti apiri inakari, Sirísia tixinikiri. Pauiritano nakira kākiti nimisākiretini —itxari iua.

⁴⁰ Ininiā sotatoakori auíte:

—Ari, pimisākiretana.

Inakasaakiri Paoro tima kanikoatxiā. Iuasaaki ōkitikari iuako kākiti akiritini iotokini ikapani, isākire ikenakotinina ikapani. Ikinipoko iotokasaaki, iua sākirauata ninoakata Xoteo sākireē, Epiráiko sākireē.

22

Paoro Misākiretari Xerosareē Auakani

¹ Ininiā Paoro:

—Nitariakori, niriakori, hīkenakotariko nisākire. Na maerekati na nikama. Erekarinokara nikama —itxa.

² Ninoa kenakotakasaakiri ninoaka sākireē, Epiráiko sākireē isākirauatini, !akiritaikana. Itsoríkaātana.

³ Ininiā Paoro:

—Xoteopitkarano nota. Niponaniā Taaso sitatxiti, Sirísia tixiniā. Eereka uai Xerosareē sitatxiti napoka. Uaikara naneē. Iuasaaki koerekareri kimatireri Kamarieo inakori oerekano imakinika. Iua oerekano akiomaneakorini kitxakapiríkarini paniātakiti imakinika. Nota paríkauata Teoso ikapaninokara, híte paríkauatini atokotxikana. ⁴ Mitxipeka nota kapokotana kākiti Xesosi sākire auíākani, Xesosi kimaporeē sikani. Nimaíkana, kateia āki oka nitxana. Kiki, sito pakini nimaíka. Nota xika ninoani ipipe. ⁵ Sasetotxiakori auíte apiatakari, Xoteo auíteakori pakini imarotari atāopitika nisākire. Ninoakara sikano aātsopa iōkatsopatakinita auítetxiakorimoni Tamásiko sitatxiti auakanimoni nanikini ikapani. Iua aātsopa auiritano Xesosi sākire auíākani nimaíkani. Ininiā nota sari iuaā Xesosi sākire auíākani nimaíkani ikapani, Xerosareēmoni nimikanapiriinina ikapani imisiritikona tíkane.

⁶ —Apaniāxiti Tamásiko sitatxiti takote napokaāpotakasaaki, patimari iotximere iaxitikiri apoka notamoni. ⁷ Xiti nirika. Nikenakotari nakiriuākatiko: “Saoro, Saoro, kinirepa pite misiritano nota?” itxano.

⁸ —Ininiā nota: “Apiananiri, kiriparai pite?” nitxari.

—Ininiā iua: “Nota Xesosi Nasaree sitatxitikirikarano nota. Pimisiritakitikarano nota,” itxano.

⁹ —Nimoianariakori atamatari iua iotximere, ininiā ipíkarauatana. Na ikenakotarina nota misākiretakari. ¹⁰ Ininiā nota: “Apiananiri, kipa pinireka pitemoni nikamini?” nitxari.

—Ininiā Apiananiri: “Ereē pitima. Tamásikomoni pisa. Iuaātaā pisāpiretaākako imakinika Teoso nireēkiti pikamini ikapani,” itxa Apiananiri notamoni.

¹¹ —Iua iotximere xika mōsiāreti nitxaua. Ininiā nimoianariakori kanōpiāpotano. Anikanona Tamásikomoni. ¹² Iuaātaā aua kiki Ananíasi inakori. Iua kamapikari akiomaneakorini kitxakapiríkarini paniātakiti. Ikinimane Xoteoakori Tamásiko auakani iteene paxitari iua. ¹³ Iua ina notamoni. Nota takote apoka itxa. Itxano: “Nitari Saoro, kōsiāre pitxako,” itxano nota.

—Iuasaakipeka nota kōsiārepeka nitxa. Natamatari iua. ¹⁴ Iua: “Akiomaneakorini Teosone mereēi pite inirekakiti pimarotini ikapani. Teoso mereēi pite Erekarinoka Kamakari patamatini ikapani. Teoso mereēi pite Erekarinoka Kamakari sākire pikenakotini ikapani. ¹⁵ Pitekarako sāpiretariko itanapoko kākitimoni atāo Xesosi pirena, patamatakiti, pikenakotakiti pakini. ¹⁶ Ininiā kona okanani pitxape. Pōkitikaua. Pipatxisataākako. Pakiritariko Apiananiri uāka, ininiā iua makatxakari pimaerekani,” Ananíasi txano nota.

¹⁷ Eereka nikanapiriā Xerosareēmoni. Teoso misākiretiko aikotimoni nisa. Iuaā Teoso nimisākirenātakasaaki, nitaponetari Apiananiri. ¹⁸ Natamatari iua. Itxano nota: “Kataima pitxako. Xerosareē posipika uatxapeka. Uai auakani !auikapaniri nota pirena pisāpiretakiti,” itxa.

¹⁹ Ininiā nota: “Apiananiri, nota nitapekana kākiti pisākire auíākani ikini aikoti Xoteo apotiitiniātaāua. Niāsokapekana. Katela āki nitakapekana. Ninoa imarotapitikari ikara nikamakiti. ²⁰ Pite sākire sāpiretakari Estevāo inakori okikosaaki, nota aua iuaā. Iuasaaki ninikatariko kokanirini māka inopinikiri. Nota apokaerekatariko okinirina iuani.”

²¹ —Ininiā Apiananiri: “Pisipeka. Ōtakoxiti niokanatai Xoteo minakonimoni,” itxano — itxa Paoro kākitimoni.

Paoro Homano Itxaua

²² Iuusaakipeka Xoteo minakonimoni isini xika, kákiti iuaã apotiitakanuia !inirekaikarina Paoro sákire ikenakotinina. Omanãkarauata. Akiripoakatana:

—Hókariko. !Erekari auapanika inini —itxana.

²³ Akiripoakatana. Iókokarina imákana inopinikiri. Kipatxi okarapekatana apaka, kotxi omanãkarauata. ²⁴ Ininiã sotatoakori auíte paniátana sotatoakori anikiniri Paoro aiko kaikori áki, sotatoakori aapoko áki. Ipaniátana Paoro ixirokitatiko tíkane, kotxi inirekari imarotiniri Paoro omanatiko xika. ²⁵ Paoroni iitxikasaakina ixirokitatiko íkapani, Paoro pimaári sotato itakote timakari:

—Erekari atxiíti híte xirokitatiniri kiki Homano inakori maxikatíika? Homano nitxaua. Kixikapa híte nirekari híxirokitatinino? —Paoro txari iua.

²⁶ Ininiãkara sotato sari iauítemoni.

—Iua kiki amaíakiti Homano itxaua iua, ininiãkara erepaniko iuamoni pikamakiti tíkane —itxari.

²⁷ Ininiã sotatoakori auíte sari Paoromoni.

—Pisápiretano. Homanokani pitxataua? —itxari Paoro.

Ininiã Paoro:

—Iuapitkarano nota.

²⁸ Sotatoakori auíte txari:

—Nota Homano nitxaua, kotxi núkitxitari aátsopa íki Homano nininiua íkapani. Pakaroneri.

Ininiã Paoro:

—Niponaniãkasaaki Homano nitxapekaua —itxa.

²⁹ Iuusaaki Paoro xirokaaritakani patimari isinina. Sotatoakori auíte píkarauata, Paoro Homano ininiua imarotakasaaki, kotxi iua paniátana sotatoakori iitxikiniri Paoro.

Paoro Xoteo Auíteakori Apisatoõ

³⁰ Katimatiniãkata sotatoakori auíte koxirikari Paoro. Inirekari imarotiniri Xoteo apoítiniri, ininiã ipíkaretana sasetotxi auíteakori, Xoteo auíteakorikata. Ipaniátari Paoro itimini ninoa apisatoõ.

23

¹ Ininiã Paoro iteene mixinitoótana Xoteo auíteakori.

—Nitariakori, erekari nikaminiritika, uatxa uai naua. Teoso nireékitinoka ninireka nikamini. Teoso imarotari ikara, kotxi imarotari nixinikakíti náixixinireë —itxa.

² Sasetotxiakori auíte apiatakari Ananiási inakori ! ipotxitari Paoro sákire, ininiã ipaniátari Paoro takote auakani aritiniri Paoro sona. ³ Ininiã Paoro:

—Teosokarako aritaiko pite. Aapokotxi tare txítatakori atoko pitxa pite, kotxi mapara peerekai, txamari páixixinireë maerekatinoka. Pite topákanáta ereë nota pikenakotini íkapani akiomaneakorini paniátakiti iaóka pikamini íkapani, txamari pípaniátari niaritiko. Akiomaneakorini na paniátari ikara atoko inakari. Pite kona kamari ninoa paniátakiti —Paoro txari iua auítetxi.

⁴ Paoro takote auakani txitari Paoro:

—!Erekari pimisákirepiretiniri sasetotxi auíte apiatakari Teoso nakiti —itxana.

⁵ Ininiã Paoro:

—Nitariakori, ! nimarotari iua sasetotxi auíte apiatakari ininiua, kotxi Teoso sákire iókatsoptakori txari: “Kona pimisákirepiretapiri híauíte.”

⁶ Paoro atamatana kákiti iuaã apotiitakanuia. Apanakini satoseoakori itxauana. Apanakini pariseoakori itxauana. Ininiã itapararitika isápiretana:

—Nitariakori, pariseokarano nota. Pariseo ákirikarano nota. Uai nota minaáka híte apisatoõ, kotxi nota aukari ipíkanipeka ókitikiniua, iuaíkana auáki ininina íkapani —itxana ninoa.

⁷ Iuusaakipeka pariseoakori, satoseoakori pakini taparakienatakakaua, kotxi pariseoakori aukari Paoro sákire. Satoseakori ! aukari Paoro sákire. ⁸ Kotxi satoseoakori ! aukari ipíkari ókitikiniua, iuaíkana auáki inini íkapani. Kona aukarina Teoso nitiriakori iaxitikini auini. Kona aukarina matamatakoni auini. Pariseoakori aukari ipíkari ókitikiniua, iuaíkana auáki inini íkapani. Aukarina Teoso nitiriakori auini. Aukarina matamatakoni auini apaka. ⁹ Iuusaaki ikinimane apia akiripoakata. Itaparakenatakakauana. Pariseoakori, kaiókatsoptererini inakoni, ókitikaua. Itapararitika itxana:

—Atemoni ia kiki !ikamari maerekati. Atxiíti matamatakoti, atxiíti Teoso nitiri iaxitikiri sákirauata iuakata. Ininiãkara !apakata anaiatiniri Teoso —itxana.

¹⁰ Ninoa iteene taparakienatakakauana, ininiã ineenamauaaritana. Sotatoakori auíte pikari ninoa okiniri Paoro, ininiã ipaniãtana sotatoakori:

–Hísako kãkiti sauaki apanĩkaki. Iuaã himakatzakariko Paoro. Hanikariko sotatoakori aapokomoni –itxana.

Ininiã anikarina iuaã.

¹¹ Áti Íkanõkati Apiananiri apoka Paoromoni. Paoro takote itima. Itxari:

–Kataparaxinire pitxako. Pisãpiretapekari nota pirena uai Xerosareẽ. Apaka pisãpiretariko nota pirena Homa sitatxiti –itxari.

Xoteoakori Nirekari Okinirina Paoro

¹² Katimatinĩkata apanakini Xoteoakori apotiitaua. Ixinikarina Paoro okini Íkapani. Ninoa txari:

–!Anipokotapani, !aãtapani, Paoro aõkini apisa –itxana.

¹³ Ninoa Xoteoakori koarẽta apikomoni. ¹⁴ Eereka ninoa sari sasetotxi auíteakorimoni, kiomãtxiakori pakinimoni. Ninoa txana:

–Ate okaenetari Paoro. !Anipokotapani iua aõkini apisa. ¹⁵ Ininiã hĩte aãuíteakori amanaãriko sotatoakori auíte, imininiri Paoro uai. Hísãpiretariko sotato auíte, hinirekari apikomoni hĩpimainiri Paoro. Iuasaaki ate iãtatariko kimaporiã aõkiniri Íkapani –itxana ninoa.

¹⁶ Paoro itaro ãkiri kenakoenetari Paoro okaenetiko, ininiãkara Íroã sotatoakori aapoko, sãpireta itxari iritanirimoni. ¹⁷ Ininiã Paoro misãkiretari sotato auíte poiãori.

–Panikari ia ãtokori hãuĩtemoni. Iminapiretakiti inireka isãpiretiniri iua –itxa.

¹⁸ Ininiã sotato auíte poiãori anikari iua auĩtemoni.

–Ate maĩkakiti Paoro misãkiretano nota, ia ãtokori pitemoni niminini, kotxi inirekari isãkirauatini pitekata –itxari.

¹⁹ Ininiã apiari anikari iuaokã ninoanani auiniãtaã. Ininiã iua:

–Kĩpa pinireka pisãpiretinino? –itxari.

²⁰ Ininiã iua ãtokori apakapapiretari:

–Xoteo auíteakori nirekari amanainii katana pokamara Paoro panikini ninoamoni. Isãpiretainako pite, inirekapanikarina apikomoni Paoro sãkire ikenakotinina. Txamari paxirari ninoa sãkire. ²¹ ! Pauikapena, kotxi koarẽta apikomoni kikiakori kipatauako kimaporiã Paoro iãtapinina, okinirina Íkapani. Ninoa kikiakori txapeka !inipokotaikana, ! iãtaikana, Paoro imokakinina apisa. Ninoa iposopeka kimaporiã iãtapinirina Paoro. Ninoa iãtapani ninoa nirekakiti pikamini –itxari sotato auíte.

²² Ininiã sotato auíte:

–!Pisãpiretapiri notamoni pisãpiretakiti apanakinimoni.

Ininiã iokanatarari ãtokori íkanapiriini aapokomoni.

Paoro Iokanataãka Pãrisi Inakorimoni

²³ Iposo atoko sotato auíte pikapiretana ipi sotatoakori auĩtetxi poiãoni inakanua. Imisãkiretana:

–Hãpotiitana tosẽtosi sotatoakori ikitiã sikani, setẽta sotatoakori kavaro nopini sikani, tosẽtosi sotatoakori meretaua anikakani pakini. Iposope hĩtxako ia Íkanõkati novi oara hĩpotorikini Sesarẽia sitatxitimoni hĩsini Íkapani. ²⁴ Kavaroakoro hĩsikari Paoro, oa nopini isini Íkapani. ! Hãuiritapiri Paoro okiko. Hanikari Paoro Homanoakori auĩtemoni Pãrisi inakorimoni –itxana ninoa.

²⁵ Iposo atoko sotato auíte iõkatsopata:

²⁶ Nota Krãotxio Arisia inakorino iõkatsopata apiarimoni, pite Pãrisi aãuĩtemoni. Ereẽkai.

²⁷ Ia kiki Paoro inakori Xoteoakori maĩkakiti. Ninoa nirekari okiniri. Nota, niso-tatoneakorikata makatzakari iua, kotxi Homano itxaua. ²⁸ Ninirekari nimarotiniri kixikapa ninoa nirekari okiniri Paoro, ininiãkara nanikari iua Xoteoakori auíteakori apotiitiiniãtaãua. ²⁹ Iuaã nimarotari ixika !auari kateia ãki ikaikotini Íkapani. Ixika !auari ipinini Íkapani. Ninoa apoĩtari iua ninoa atokiriakorini paniãtakiti imakamakani xika. ³⁰ Nikenakopiretari Xoteoakori okaenetiniri Paoro, ininiã niokanatarari iua pitemoni. Nipaniãtana Paoro apoĩtakani isãpiretinina Paoro kamakiti. Iananirako niõkatsopata.

Ereẽpiko,

itxa sotato auíte sãkire Pãrisimoni.

³¹ Sotatoakori auíte paniãtiniri atokokana sotatoakori anikari Paoro. Íkanõka anikarina Átxipatiritxi sitatxitimoni. ³² Katimatinĩkata sotatoakori ikitiãna sikaninanira kanapiriã sotato aapokomoni. Kavaro nopini sikani anikari Paoro apikomoni. ³³ Anikarina Sesarẽia sitatxitimoni. Isikarina Paoro iõkatsoparikata auĩtetximoni, Pãrisi inakorimoni. ³⁴ Ininiã iua atatsopatarari iua iõkatsopari. Iposo atoko ipimaãri Paoro:

–Kitixinepa paua? –itxari iua.

Ininiã Paoro:

—Sirísia tixinikirirano —itxa.

³⁵ Ininiã Périsi txari:

—Pikamapiretakini apokasaaki, nikemariko pisäkire —itxa.

Ininiã ipaniätana sotatoakori:

—Erotxini kamakiti aikoti äki hinñkatariko Paoro.

24

Paoro Apoütiko Pirena

¹ Sïko öti auakasaaki, sasetotxiakori auíte apiatakari Ananíasi inakori sari Sesaréa sitatxitimoni. Apoka iuaã kiomãtxiakorikata, kiki Tétoro inakorikata apaka. Iua Tétoro kãkiti ïkapani kasãkireri kãkiti misiritiko mereëkari apisatoö. Ninoa apoka Périsi apisatoö Paoro apoütinina ïkapani. ² Ninoa apokasaaki, sotato minari Paoro Périsi apisatoö. Iposo atoko Tétoro akiritaãka isãkirauatini ïkapani. Ininiã Tétoro apoütari Paoro:

—Périsi, apiari pitxaua. Auítexi kimatireri pitxaua, kotxi mapakanani atixine neenamtxi ! auari. Mitxi kaiöopokori maerekati kamakori. Uatxa maerekati poiãoöpota, kotxi pite kamari erekari kãkiti ïkapani. ³ Erekapitikari pikamakiti ate ïkapani. Ate apokaerekatari. ⁴ Kona ninirekari niomakotetini pite, ininiãkara nisäkire poiãoka apikomoni nisãpiretai, ininiã pikenakotari nisäkire.

⁵ —Ia kiki ! erekari. Pamonökoniri. Itxñkitakari Xoteoakori neenamauatini ikini itixiti. Kiki Nasaree sitatxitikiri sãkire auíãkani auíte itxaua iua Paoro. ⁶ Teoso misãkiretiko aikoti imapaxitakansaaki, ate maïkari iua. Akiomaneakorini oerekini atoko atxamariko Paoro. ⁷ Txamari iuaaakipeka sotatoakori auíte Arísia inakori apoka iuaã. Imakatzakari Paoro itapararitika ate sauaki. ⁸ Eereka Arísia paniãtaua pitemoni ainini. Pite pimaãriko Paoro, ininiã pimarotari asãpiretakiti inipitika inini —Tétoro txari Périsi.

⁹ Iuasaaki Xoteoakori iuaã auakani:

—Ari, inipitikara isãkire —itxarina Périsi.

Paoro Sãkire Périsi Apisatoö

¹⁰ Iposo atoko Périsi paniãtari Paoro isãpirenauatini. Ininiã Paoro: —Nimarotapitikari kona uatzakani ate tixine auakani misiritiko mereëkari pitxaua. Ininiãkara nota apokaerekatari pitemoni nisãpiretiniri nikamakiti. ¹¹ Tosi öti pakini napakari nisa Xerosareëmoni Teoso nimisãkiretini ïkapani. Pipimaãri apanakini atãokani nisäkire. ¹² Nanera !ikenakotari nota txitiniri äti Teoso misãkiretiko aikoti äki. Ikininape Xoteo apotiütiniãtaãua aikoti äki ! atamatarina neenamtxi nikamãkitakini. Ätiãtaã apaka !atamatarina nitxñkitakiniri kãkiti neenamtxi ikaminina. ¹³ Nanera maxikatitka kamapiretano nota. ! Itikanona nota maerekati nikamini. ¹⁴ Nota auikari Xesosi sãkire. Ia atão. Naneramoni Xesosi sãkire na atão. Nota parikauata ate atokiriakorini Teosone ïkapani Xesosi sãkire nikñpitakasaaki. Moisesini paniãtakiti apaka nauika. Teoso sãkire säpiretakani iökatsopatakiti apaka nauika. ¹⁵ Nanera auikari Teoso ökitikinina ikininape kãkiti ipikani. Erekarini, maerekani apaka ökitikauako iuaïkana auãki ininina ïkapani. Nota apaka auikari ikara. ¹⁶ Ikinioitika ninirekari atãonoka nikamini Teoso ïkapani, kãkiti ïkapani apaka.

¹⁷ —Ninapapekari mapakanani ätiãtaã, eereka nikanapiriã Xerosareëmoni. Iuaã nisa txineiro ninirimanemoni matxineirotenimoni nanikini ïkapani. Apaka iuaã ninirekari nisikaenetakiti Teosomoni nisikini. ¹⁸ Nisikaenetakiti Teosomoni nisikasaaki Teoso misãkiretiko aikoti äki, nikipãtaua Moisesini oerekakiti iaöka. Iuasaaki Xoteoakori Asia tixinikini itikano nota. Kãkiti apotiütakanuia !auari notakata iuasaaki. Neenamtxi !auari iuasaaki. ¹⁹ Ninoa itikano. Maerekati nikamaãkamako, kinirepa kona ninoa apoka uai uatxa pite isãpiretinina ïkapani? ²⁰ Ninoa uai mapokakanisaaki, pipimaãna nanera ikenakotakitina, itikakitina nota Xoteo auíteakori apisatoö nauakasaaki. Kipa atxñiti nimaerekani iuasaaki? Iuasaaki kona nikamari maerekati. ²¹ Atxñiti iuasaaki nanera !apokaerekatari nisäkire, kotxi nitxana: “Nota auikari ipikani ökitikinina, iuaïkana auãki inini ïkapani. Ikara nauikakiti sãkirexiti xika hite maïkano nota.” Atxñiti nanera !apokaerekatari ikara nisäkire —itxa Paoro sãkire Pérिसimoni.

²² Périsi iteene imarotapekari Xesosi oerekakiti sãkirexiti. Iua misãkiretana ninoa:

—Sotatoakori auíte Arísia inakori apokapanikako uai. Iuasaakiko nisãpiretari kiãtokopa nitxtari Paoro. Uatxa xipope asãkire —itxa Périsi.

²³ Ipaniãtari sotato auíte poiãori inakori Paoro nñkatakari tñkane:

—Pinñkatariko Paoro. Pauiritariko inirekiniãtaã isini. Pauiritariko inirimane apokini iuamoni. Pauiritariko inirekakiti isikinirina —itxa Périsi.

Paoro Sãkirauata Périsi, Tosira Pakinikata

²⁴ Mapaõti napa atoko Périsi Ítanorokata Tosira inakorokata apoka Paoro auiniãtaã. Xoteo oa. Périsi píkapi-retari Paoro. Iua apokasaaki, Paoro sãpiretana ninoa Kristo Xesosì sãkire auikiko, ininiã ninoa kenakotari. ²⁵ Paoro sãpiretari Teoso sãkire atão inakari kamiko pirena. Isãpiretari Teoso sãkire Ítotxi nireëkiti amakamakani. Isãpiretari kãkiti misiritiko itixi xipokini õti apokasaaki. Ininiãkara Périsi píkara-uaa.

—Iaõpe. Pisipe. Áti õti nipa-rika mauakanisaaki, iuaikana nipíkapi-retai —itxari.

²⁶ Périsi nirekari Paoro sikiniri txineiro iuamoni, isikakiniri íkapani. Ininiãkara itokata ipíkapi-retari Paoro iuakata isãkirauatini.

²⁷ Ipikanani napa atoko Põsio Pésito inakori auítetxi txapekaua, ininiã Périsi sipe. Périsi nirekari Xoteoakori apokaerekatini iua, ininiã isini apisa !isikakari Paoro, ininiã Paoro kaikotapanika kateia áki.

25

Paoro Amanãri Sesakata Isãkirauatini

¹ Pésito aua Sesaréia sitatxiti ipi áti pakini õti, eereka isari Xerosareëmoni. ² Iuaã sasetotxi auíteakori, Xoteo auíteakori pakini kamapi-retari Paoro Pésitomoni. ³ Ninoa iteene amanaãri Pésito:

—Pikamariko ate nireëkiti. Piminariko Paoro uai Xerosareëmoni —itxana.

Ikara ninoa nireka, kotxi okaenatarina Paoro ipixinipokoriti. ⁴ Txamari Pésito apakapapi-retana:

—Kona, Sesaréia sitatxitikarako aua Paoro. Mapaõti napa atoko nota kanapiriã iuamoni. ⁵ Hinirekiniãri, átikaka híte sari iuamoni notakata. Iuaã hísãpiretari Paoro kamakiti maerekati —Pésito txana ninoa.

⁶ Pésito napari ipi semanati Xerosareë. Eereka ikanapiriã Sesaréiamoni. Katimatiníkata Íroã aiko kãkiti misiritiko sãpiretikoãtaã. Iuaã ipíkapi-retari Paoro. ⁷ Paoro apokasaaki, Xoteo Xerosareëkini ákitari iua. Apoítarina iua maerekati kaiãopokori íkamakiti, txamari imaerekani itikakari !auari, kotxi likamari maerekati. ⁸ Eereka Paoro:

—Maerekati na nikama. Xoteoakori aãtokiriakorini paniãtakiti nikamapitika. Teoso misãkiretiko aikoti nipaxitapitika. Homano auíte paniãtakiti, Sesa inakori paniãtakiti nikamapitika —itxa.

⁹ Pésito nirekari Xoteoakori apokaerekatini iuaka, ininiã ipimaãri Paoro:

—Pinirekatari Xerosareë pisini? Iuaãrako nota kenakotariko nanera sãkire, pite sãkire apaka —itxa.

¹⁰ Txamari Paoro:

—Konapitini. Homano nitxaua. ! Apakata Xerosareë Xoteoakori apisatoõ nisãkire kenakotiko. Uaikara Homanoakori auíte Sesa nirekari Homano sãkirauatini kãkiti misiritiko sãpiretakani apisatoõ. Erekarì uai pikenakotiniri nisãkire. Pite iteene imarotari kona xatiki maerekati nikama Xoteoakorimoni. ¹¹ Ixika auiniã nipinini íkapani, maerekati nikaminiã, ininiã apakata nipinini. Txamari nanera na atão apoítano nota, ininiã naneramoni nisikanapakiri !auari. Ninirekari Sesamoni nisini —itxa Paoro sãkire.

¹² Ininiã Pésito sãkirauata iua õtãkikakanikata Paoro Sesamoni isini íkapani. Eereka apakapapi-retari Paoro:

—Pite nirekari Sesamoni pisini, ininiãrako iuamonirako pisa —itxari Paoro.

Pésito Sãkirauata Akiripakata

¹³ Mapaõti napa atoko auítetxi Akiripa inakori apoka Sesaréia itaro Perenisi inakorokata. Ninoa íanapokota Pésitomoni. ¹⁴ Mapaõti napa atoko Pésito sãpiretari Paoro Akiripamoni:

—Uai aua kiki kateia áki Périsi takakiti Paoro inakori. ¹⁵ Xerosareë napokasaaki, sasetotxi auíteakori, Xoteo auíteakori apaka apoítari iua. Inirekarina nota paniãtiniri iua okiko. ¹⁶ Txamari nisãpiretana: “Homanoakori kona okari kãkiti áti apoítakiti, iua apoítakiti sãkire imakenakotakani apisa. Merepanika erekari iua apokini iua apoítakanikata kãkiti misiritiko mereëkari apisatoõ, ninoa sãkire kãkiti misiritiko mereëkari kenakotini íkapani,” nitxana.

¹⁷ —Paoro omanatakani uai apokasaaki, katimatiníkata niíroã kãkiti misiritiko sãpiretikoãtaã. Iuaã nipíkapi-retari Paoro, ininiã iua apoka iua omanatakani apisatoõ.

¹⁸ Ninoa sãkirauata. Apoítarina Paoro. Niuãkatari ninoa sãpiretiniri maerekati Paoro kamakiti. ¹⁹ Txamari ninoa auíãkiti sãkiretxiti xika ninoa omanatari Paoro. Kiki ipíkari Xesosì inakori xikara apoítarina. Paoro auikari Xesosì iuaikana auãki inini. Ninoa !auikari Xesosì õkitikiniua.

²⁰ —Iuaasaaki na nimarotari nikamakiti tãkane. Ininiã nipimaãri Paoro: “Na pinirekatari Xerosareë pisini? Iuaã pite apoítakani, pite pakini kenakotaãkako,” nitxari Paoro.

²¹ Txamari iua apakapapiretano: “Kona. Sesamonira ninireka nisini,” itxano nota. Ininiã notara paniãtari iua kateia åki ikalkotiniritika niokanatariko Sesamoni –itxa Pésito.

²² Ininiã Akiripa:

–Nota nirekari nikenakotiniri iua kiki sãkire –itxa.

Ininiã Pésito:

–Katanarako pikenakotari iua sãkire –itxa.

Akiripa, Perenisi Pakini Apoka Pésitomoni

²³ Katimatinikata Akiripa, Perenisi pakini apoka, itomaneri iniritiakorikata. Peeremãkapokona. Iiroãna kãkiti apotiitiniãtaãua. Sotato auñteakori, sitatxi auakani auñteakori pakini iroã. Eereka Pésito pïkapiretari Paoro, ininiã Paoro minaãka. ²⁴ Ininiã Pésito:

–Pite, Akiripa, hñte atekata apotiitakaniuua apaka, hãtamataria ia kiki. Ikinimane Xoteoakori uai auakani, Xerosareẽ auakani apaka ! apokaerekataria ia. Isãpiretanona ia maerekati ininiua. Ninoa amanaãno ia okiko. ²⁵ Notamoni maerekati ! ikama ia. Notamoni ixika ! auari ipinini ãkapani. Eereka ia amanaãno apiari Sesamoni isini, ininiã nota auiritari isini. ²⁶ Txamari ! nimarotari ixika niõkatsopatini Sesamoni. Ininiãkara niminari Paoro hñte apisatoõ isãkire hñkenakotini ãkapani. Akiripa, apiari pitxaua pite, ininiã ninirekari pite sãpiretinino nota niõkatsopatakiti ãkane. Ia hñkenakotaka atoko hñsãpiretano Sesamoni niõkatsopatini ãkapani. ²⁷ ! Apakata kateia åkikiri Sesamoni niokanatinini ixika nimasãpiretakaniã, kotxi Sesa nirekari imarotiniri ikamakiti xika.

26

Paoro Sãkirauatini Akiripa Apisatoõ

¹ Eereka Akiripa paniãtari Paoro:

–Nauiritai pisãpiretiniaua pimañkiko xika.

Ininiã Paoro õkataria iuako isãkire isãpiretini ãkapani. Iposo atoko Paoro sãkirauata, maerekati imakamakani ninoa imarotini ãkapani.

² –Aãñte Akiripa, notamoni erekari pite apisatoõ nisãpiretiniri Xoteoakori apoñtinino.

³ Kotxi pite iteene imarotari ate atokiriakorini oereẽkiti, Xoteoakori paniãtakiti. Ininiã namanaãni pikenakotiniri nisãkire imakinika.

⁴ –Xoteoakori imarotano nota åtokoripanika ninakasaakiaua, nitixine nauakasaaki. Eereka Xerosareẽ nauakasaaki ninoa imarotano. Imarotarina ikiniõtika nauini. ⁵ Mixakapokoni ninoa imarotano nota. Imarotarina pariseo nininiãua. Ikara isãpiretaina, inirekiniãna. Kãkiti pariseo inakari iteene aukari ate atokiriakorini oereẽkiti sãkiretxiti.

⁶ –Xoteoakori uatxa omanatano nota, kotxi nauikari Teoso sikaenetakiti ate atokiriakorimoni apokaþeka uatxa. ⁷ Ate nirimane, tosi pakini nirimantxi, iãtpari ikara Teoso sikaenetakiti apokini õti. Ninoa parïkauata Teoso ãkapani ãkanõka, pokamara pakini. Niauñte Akiripa, ikara Teoso sikaenetakiti xika Xoteoakori maãkano nota. ⁸ Kinirepa hñte ! aukari Teoso posotiniri ipikari õkitikini, iuañkana auãki inini ãkapani?

⁹ –Mitxiþeka nota omanataria Xesosi Nasareekiri, hñte omanatiniri atokokana, ininiã nikapokotari isãkire auñãkani. ¹⁰ Xerosareẽ nauakasaaki, nikapokotari isãkire auñãkani. Sasetotxi auñteakori auiritano kãkiti Teoso nakitiakorini kateia åki nitakini. Kaiõpokore nitaka kateia åki. Xoteo auñteakori nirekasaakiri okinina, nota apaka nirekari. ¹¹ Nisari Xoteo apotiitiniua aikotimoni ikininape Xesosi sãkire auñãkani nimisiritini ãkapani. Ninirekari Xesosi sãkire aukiko xipokini. Itene nomanatana, ininiãkara nisari apanakini sitatxitimoni ninoa nikapokotini ãkapani.

¹² –Ikara xika nisari Tamásiko sitatxitimoni. Sasetotxi auñteakori auiritano nisini. Ipaniãtanona Xesosi sãkire auñãkani nimañkini. ¹³ Ipxinipokoriti, apaniãxiti iotximere iaxitiki apoka notamoni. Atokatxi iotximere poiãoka. Ikara iotximere apiata. Iua iotximere åki nota nimoianariakorikata aua. ¹⁴ Ate iriãkata xitipe. Iuaaakipeka nikenakotari nakiritiko: “Saoro, Saoro,” itxano Epirãiko inakori sãkiretxitiã. “Kixikapa pimisiritano nota? Piteka pimisiritaua, nota pimisiritakasaaki. Atxiiti kema auñteka karotaua ipitiki aãketeẽ. Iua kema auñte atoko pitxa,” itxano.

¹⁵ –Ininiã nota: “Aþiananiri, kiriparai pite?” nitxari.

–Ininiã iua: “Xesosira nota, pimisiritakitikarano nota. ¹⁶ Pitima. Nota oerekaua pitemoni, pite nimereini ãkapani, ninitiri pininiua ãkapani. Uatxa pitakiti pisãpiretako apanakinimoni. Pisãpiretapanikariko ikinimane kãkiti apikomoni noerekakiti ãkane. ¹⁷ Ninikataiko pite Xoteo sauaki pauakasaaki, Xoteo minakaniuua sauaki pauakasaaki apaka. Xoteo minakonimoni niokanatai pisini. ¹⁸ Kãkiti ipiaã sikani atoko itxana, kotxi ! imarotarina Teoso sãkire. Mõsiãreni atoko ninoa, kotxi ! atamatarina Teoso kimapore. Ininiãkara piteþeka oerekanako Teoso sãkire ikimapore imarotinina ãkapani, ipiã itapaninina, ikamaramoni isininina ãkapani. Ininiãkara likamaikari Satanasi paniãtakiti. Teoso paniãtakinoka

ikamana eereka. Ininiã ninoa auikariko nisãkire, ininiãkara nota makatxakariko ninoa maerekani. Ininiã Teoso nakitiakori ninoa apaka txauana,” Xesosi txano nota.

¹⁹ —Niauíte Akiripa, ikara atoko ininiãra, nikamapekari imakinika Xesosi paniãtakiti, iaxiti iotximere apokasaaki nikenakotakiti. ²⁰ Nisãpiretari Xesosi sãkire merepitipanika kãkiti Tamãsiko sitatxiti auakanimoni, eereka nisãpiretari Xerosareẽ auakanimoni. Eereka nisãpiretari ikinimane Xotẽia tãpa auakanimoni. Eereka nisãpiretari kãkiti Xoteo minakonimoni. Nisinimoni nisãpireãpotana ninoa: “Himaerekani hãtakanapako. Hãuikariko Teoso sãkire. Erekarinoka hãkamako, ininiãkara aimarotapitikari maerekati hãtakanapini,” nitxana. ²¹ Ikara atoko nitxana ikinimane nisãpiretini. Ikara nisãkire xika Xoteoakori mãkano nota Teoso misãkiretko aikoti ãki nauakasaaki. Kinirão okaka itxanona. ²² Uatxa nauapanika, kotxi Teoso nãkatano nota. Ininiã ia õti Xesosi sãkire nisãpireta hãte apiarinimoni, hãte poiãorinimoni apaka. Moisesini sãpiretakiti iaõka nisãpireta. Teoso sãkire sãpiretakani sãpiretakiti iaõka nisãpireta. Ninoa sãpiretari Teoso mereẽkiti apokini. ²³ Ninoa txari: “Teoso Mereẽkiti apokako. Iua misiritaãkako. Iuakarako õkitikaua ipinaka atoko. Iuaãkana auãki itxako. Mitxi ipinakarã ðokitikaua. Merepanika iua õkitikaua. Iuara sãpiretariko Xoteoakori maerekani makatxakiko, Xoteo minakanãua maerekani makatxakiko apaka,” itxana Teoso sãkire sãpiretakani. Ninoa sãpiretakiti iaõka nota sãpiretai apaka —itxa Paoro.

²⁴ Paoro ikara atoko inakasaaki, Pẽsito akiritari:

—Paoro, !kãkitei. Pimapitxiriãpota iteene papaiaõkaruatini xika —itxa.

²⁵ Ininiã Paoro:

—Niauíte Pẽsito, kona nimapitxirita nota. Atãõpitikara nisãkire nikama. Erekarã nisãkire. ²⁶ Niauíte Akiripa, pimarotapekari nota sãpiretakiti, ininiã kataparaxinireno nimisãkiretini. Pimarotari Xesosi pirena, kotxi Xesosi ipãkasaaki, kona kipatakoriãtaãni ipina. ²⁷ Niauíte Akiripa, pite auikatari Teoso sãkire sãpiretakani sãkire? Nota imarotari pite auikiniri.

²⁸ Ininiã Akiripa:

—Pite sãkire txãkitakaaritano nota Xesosi sãkire nauikini —itxari.

²⁹ Ininiã Paoro:

—Teoso imarotari. Ninirekari pite, hãte hãkinika uatxa nisãkire kenakotakani pakini iteene hãuikiniri Xesosi sãkire nota auikiniri atokotxikana. Txamari kona nota nirekai hãte kateia ãki hãuini nota atoko —itxa Paoro sãkire.

³⁰ Paoro sãkirauataka atoko auãtetxi Akiripa, itaro Perenisi, Pẽsito, ikinimane ninoakata ãkani pakini, itimana. ³¹ Iporikiti ipokãkasaakina, imisãkiretakana:

—!Auari ikira kiki okiko xika. !Auari kateia ãki itakiko xika.

³² Ininiã Akiripa txari Pẽsito:

—Ikira kiki mamanaãkaniãri Sesamoni isini, isikakaãkapiimako.

27

Paoro Potorika Homamoni Isini

¹ Eereka Pẽsito sãpiretaua ate iketo apope Itãria tixinimoni aãpiriãtini. Paoro apanakini maãlakoni apaka sikaãka Xõrio inakorimoni. Iua Xõrio seã pakini sotato auãte itxaua. Sesa sotatone itxaua. ² Ate iereẽtaua maporo ãki, Ataramãtxio sitatxitikero ãki. Ásia tixinimoni sikaro oa maporo. Kiki, Arisitako inakori sari atekata. Iua Tesarõnika sitatxitikiri, Masetõnia tixinikiri iua Arisitako. Ininiã ate sipe. ³ Katimatãnikata ate apoka Sitoõ ioporokoti. Xõrio tiretari Paoro, ininiã auiritari iua aõkimaneremoni isini iuaã, inirekakiti apakapini ãkapani. ⁴ Eereka ate potorika iuaã. Iuasaaki ãtima inataparata aãpisamoni, ininiã maporo iopiriãri Xipri pokomiriãti ãtima manapakaniãtaã. ⁵ Ate ãpiriãtari potxoari uãiti. Sirisia tixini takote anapa. Pãpãria tixini takote anapa. Ate apoka Miha sitatxiti, Arisia tixiniã. ⁶ Iuaã sotato auãte apokaro maporo Arexãtria sitatxitikero, Itãria tixinimoni sikaro. Iua iereẽtakaua ate oa maporo ãki.

⁷ Iuaãkana apotorika. Iuasaaki ãtima inataparata aãpisatoõ, ininiã inanaritika asaãpota mapaõtipeka, ininiã eereka aãpoka Sinito sitatxiti apisatoõ. ãtima tapara xika !aposotaika apikomoni asini anirekinimoni, ininiã aiopiriãri Kreta pokomiriãti ãtima manapakaniãtaã. Iuaã anapari Saomona pokomiriãti. ⁸ Inanaritika asaãpota imiriã takote. Aãpoka ioporoko “Ioporoko Erekarã” akiritikoãtaã, Arasãa sitatxiti takote.

⁹ Iuaã aãuapokota. Pamõõkoniri apikomoni asini. Kiiniri Teoso ãkapani kãkiti manipokotakani inapakea, ininiã imarotaãka ãtima kataparari kaïamapeka apokini. Ininiã Paoro õtãkikana ninoa:

¹⁰ —Apikomoni asiniã, pamõõkoniri. ãtima kataparari kasaikamaro maporo atiikata. Kãkiti ipinako —itxa Paoro.

¹¹ Txamari sotatoakori auãte !auikari Paoro sãkire. Iua auikapiretari kamaporoteri sãkire, maporo nikatakari pakini sãkire. ¹² Kaiãopokori maporo ãki parãkauatakani txari:

—Ia ioporoko kona erekari mitaã anapini. Esa apikomoni. Atxiiti aposota Penisi sitatxitimoni aãpokini. Iuaã manapakakari mitaã —itxana.

Penisi sitatxiti Kreta inakori pokomiriiti ioporokoti. Atokatxi ereëkokini manapi aua Penisi sitatxiti.

Ítima Kataparari Pirena

¹³ Iuasaaki Ítima poiãoka apokaãpota ate tikinimoni, ininiã ninoa uãkatari:

—Uatxaika erekapekari Penisi sitatxitimoni asini —itxana.

Ininiã òtanòkarina kai, maporo maikiko, ininiã potorika atxa. Kreta miriiti takote anapaãpota. ! Anirekari potxoari uiniti apanikakiã asini, kotxi pamonòkoniri iuaã.

¹⁴ Txamari patimari Ítima iteene inataparata Kreta pokomiriitiki. Ítima uãka “Atokatxi Pokikininimokiri.” ¹⁵ Ininiã Ítima apoka maporomoni. Pataparari. ! Aposotarí Ítima ininimoni asini, ininiãkara aãuiritari Ítima anikiniro maporo Ítima sinimoni. ¹⁶ Aiopiriãri Kaota inakori pokomiriiti. Iua pokomirií xapitiri. Iua pokomiriiti Ítima kimaporeë aua,

ininiã iuasaaki pokomirií anapakasaaki Ítima poião taparata, ininiãkara aòtanòkaro kanaua maporo kapokiãmonikiri. ¹⁷ Akosekaãpotari kanaua maporo ãki aeretakini Íkapani. Ininiã ninoa iapiripoatara maporo aãpitsaã Ítima katakakitapetiniri monòkoni. Ninoa pikari Ítima anikiniro maporo ikipatxite apanikakiãkirimoni. Iua ikipatxite Arípia tixini takote. Ininiã ikaxitkarina mãkatxi mata maporo aniãkari. Mãkatxi mata kaikotiniã maporo nopini,

patimaua Ítima anikiniua. Ikara atoko ininiã, auitararina Ítima anikiniua. ¹⁸ Ítima inataparatanika, ininiã katimatiníkata ninoa okaãpotari tiitxi maporo ãki auakari potxoari uinitimoni maporo sakikini monòkoni. ¹⁹ Katimatiníkata okarina maporo tii potxoari uinitimoni.

²⁰ Mapaòti ! aãtamataikari atokatxi. ! Aãtamataikari iòriki. Ítima inataparatanika, ininiã auãkatari apinini.

²¹ Mapaòtipeka maporo ãki paríkauatakani kona inikaikana. Ininiã Paoro misãkiretana:

—Kinirepa híte kona kípitari nisãkire? Kinirepa híte takanapari Kreta pokomiriiti? Hikípitaãkamariko nõãkikinii, tiitxi kona hòkamako. ²² Iuaritika kataparaxinire hitxako. Nisãpiretai, kona kãkiti ! ipina. Maporonanira sakika. ²³ Nota Teoso nakiti nitxaua. Iua Íkapani niparíkauata. Minipani iua nitiri iaxitiki erekava notamoni. ²⁴ Teoso nitiri akiritano: “Paoro, ! pipíkarauatape. Pite apokapitikako Sesa apisatoò. Peerekari Teoso. Itiretai pite, ininiãkara ninoa pitekata sikani ! pinapani,” itxano. ²⁵ Ininiã kataparaxinire hitxako, kotxi nota auikari Teoso sãkire. Ikamapitikariko nisãpiretinii iaòka. ²⁶ Ítima okaroko maporo ipokomirií —itxa Paoro sãkire ninoamoni.

²⁷ Ipi semanati Ítima inataparata. Anikaro maporo potxoari uiniti Metxiteháneo inakori ipiriãtini. Eereka apanikanòka maporo ãki paríkauatakani uãkatari imirií takotepeka aãpokini.

²⁸ Ininiã ninoa okari kai iokaritsaã ípanaã imarotinina Íkapani. Tríta seisi metro ípanaã. Eereka apikomoni iaòtarina ípanaã, vítxi setxi metronoka. ²⁹ Ininiã ipíkarauatana maporo kai mitarimoni oãpokini monòkoni. Ininiã maporo kapokiãmoni ikaxitkarina ipi ipi pakini kai iokaritsaã maporo maikiko. Eereka imisãkiretarina Teoso paítiki ikatimatini Íkapani.

³⁰ Maporo ãki paríkauatakani nirekari maporo itakanapinina. Iokatzakarina kanaua potxoari uinitimoni. Ninoa txaua:

—Iuaikana kai aiokatzaka uai maporo íkiinaã.

Txamari na atão isãkirena. Inirekarina maporo itakanapinina kanaua ãki. ³¹ Iuasaaki Paoro txana sotato auíte, sotatoakori pakini:

—Nakira kikiakori maporo ãki makaikotakaniã, híte ipinako —itxa.

³² Ininiã sotatoakori sotakari aãpitsa kanaua maikakari, ininiã Ítima anikari iua kanaua.

³³ Iuasaaki imaropiriãkata. Paoro òtãkikana ikinimane inipokotini Íkapani:

—Ipi semanati hãtapanãtari Ítima napini. Ipi semanati hãteni kona xatiki hinipokota.

³⁴ Ininiã hinipokotako uatxa, hãtpara apokini Íkapani himapinakani Íkapani. Hikarotiko ! auapani. Hiãko ãtika kona katxakapani —itxa.

³⁵ Eereka Paoro kosekari komiri. Ikinimane apisatoò isãkirauata Teosokata. Iposo atoko imapixinikari komiri porii, nika itxari. ³⁶ Ininiã ikinimane kataparaxinirepe itxana, ininiã inipokotana. ³⁷ Tosëtosi setëta seisi pakini kãkiti maporo ãki auakani iuasaaki. ³⁸ Iteene inipokotakana atoko, okarina triko potxoari uinitimoni maporo poana onini Íkapani.

Maporo Sakikini Pirena

³⁹ Katimatiníkata maporo ãki paríkauatakani atamatari imirií, txamari ! imarotarina itixi uãka. Atamatarina ikipatxite, ininiã ninoa:

—Iuaã kipatxi nopini maanikaro maporo, aposotiniã —itxana.

⁴⁰ Ininiã itsotakarina aãpitsa maporo tsapi. Kai kaikota ipatapiã. Ikoxirikarona aãpitsa mekotxi maikiko, maporo erekaãtiko. Iposo atoko òkitikarina mãkatxi mata maporo

íkiiätinimoni auakari, ikipatxitemoni maporo ítima anikini íkapani. Ininiã ikipatxitemoni asaãpota. ⁴¹ Txamari ipixinipokoriti maporo atxapaã ikipatxite nopini. Maporo íkiiätinimoni atxapaã. ! Osaika. Tsakati kataparari xika maporo kapokiätinimoni txirakiãpota.

⁴² Sotatoakori kinirão okaka txana ikinimane maïkakoni. ! Inirekarina ninoa mittekini imiriïmoni anokinina. ⁴³ Sotatoakori auíte ! inirekari Paoro okiko, ininiã ! auiritana. Ipaniãtana ikinimane:

–Himarotiniãri hanokini, ininiã híte merepanika hïkomokako. Hanoka ikipatxitemoni.

⁴⁴ Eereka, híte mimataanoreni hïkomokako. Himãkariko maporo txirata, ininiã hanoka ikipatxitemoni –itxana.

Ikara atoko aniniã, amakinika aãpoka ikipatxitemoni.

28

Máota Pokomiriïti Pirena

¹ Imiriïpekaua amakinika, eereka aimarotari Máota inakori pokomiriïti aãpokini. ² Iuaã auakani apakapaua ipoxokoniritikana. Iuasaaki ãparaã potorika ikipini. ãparaã kipini xika patxikareri, ininiã iuaã auakani kamari xamina, ate irokini íkapani. ³ Iuasaaki Paoro apaka apotiitari xamina. Xamina pokiã itakasaakiri, xamina pataka õpõkikari imini xamina iriko ãki auakari. Akatsatari Paoro uako. ⁴ Ninoa ipokomiriï auakani atamatari imini Paoro uakoã iarõkini. Ininiã imisãkiretakakana:

–Ikira kiki kokaniri atxiiti. ! Ipinã potxoari uiniti, uaritika inapakakiniri ! auari. Uatxaika ipinapitikako –itxakakana.

⁵ Paoro íkokari imini xamina pokimoni arikini íkapani. ! Katsiiri iuamoni. ⁶ Ninoa iãtapanãtari iuako ananapoatini. Iãtaparina iua mokatanitika ipinini. Mapa oara napa atoko lipina, ininiã ninoa:

–Kona kokaniri ikira. Teoso itxaua –itxanãtana.

⁷ Iuaãtaã takote aua kikiõ Põpirio inakori nakiti. Máota pokomiriïti auakani auíte itxaua. Iua apakapaua ate ipoxokoniritika. Akaikota iua aapoko ipi ãti pakini õti. ⁸ Iuasaaki iri siríkanãta. Apoomata. Itikanãta. Ininiã Paoro sari iuamoni. Akiritari Teoso iua ereka inini íkapani. Itakari iuako inopini. Iuasaakipeka erekapeka itxa iua. ⁹ Eereka amianatakani iua pokomiriïti auakani sari Paoromoni, ininiã iua makananitana ninoa. ¹⁰ Ninoa sikaua tiitxipokoni. Apotorikasaaki ãto maporo ãki, isikauana imakinika anireëkiti.

Paoro Homa Sitatxiti Isini

¹¹ Ate napari ipi ãti pakini kasiriti iuaã. Eereka aiereëtaua maporo ãki, Arexãtria sitatxitikero ãki. “Itaritxi Ipi” akiritaãka maporo uãka. Mitaãsaaki oa maporo kaikota Máota pokomiriïti. ¹² Apotorika iuaã. Eereka aãpoka Sirakosa inakori sitatxiti. Iuaã akaikota ipi ãti pakini õti.

¹³ Eereka iuaïkana maporo potorika. Aãpoka Héxio sitatxiti. Katimatiníkata ítima atikini-monikari ina, ininiã patimari asini. Katimatiníkata aãpoka Posoori sitatxiti. ¹⁴ Iuaã aõkitana kãkiti, Xesosi sãkire auiaãkani. Ninoa amanaãua ãti semanati anapini ninoakata. Eereka iuaïkana aiereëtaua maporo ãki. Iuaïkana apotorika. Homa sitatxiti aãpoka.

¹⁵ Xesosi sãkire auiaãkani, Homa auakani, kenakoenetari aãpokaenetini, ininiã inana ate aõkitinina íkapani. Apanakini aõkitaua ate kienatxi amotikoãtaã takote, Ápio inakoriãtaã takote. Apanakini aõkitaua ate kãkiti imakiniãtaã, “Ipi Áti Aapokotxiti” inakoriãtaã. Paoro aõkitakasaakina ninoa, ipoxokoniuata.

–Peerekari Teoso, kotxi naia inari notamoni –itxa Paoro.

Homa Sitatxiti Paoro Apokini

¹⁶ Homa sitatxiti aãpoka atoko, Paoro auiritaãka inirekiniãtaã auini. Átika sotato kaikotapika iuakata isinimoni imarotini íkapani.

¹⁷ Ipi ãti pakini õti napaka atoko, Paoro pïkapiretana Xoteoakori auíteakori. Ninoa apotiitakasaakiaua, Paoro misãkiretana ninoa.

–Nitariakori, ! nikamari maerekati Xoteoakorimoni. Nauikapitikari akiomaneakorini oerekakiti sãkiretxiti. Uaritika nimaïkaãka Xerosareë. Nisikanapaãka Homanoakorimoni. ¹⁸ Homanoakori pimaãno nimaïkiko xika. Eereka inirekarina isikakinino, kotxi ninoa imarotari ixika ! auari nipinini íkapani. ¹⁹ Txamari Xoteoakori ! inirekari Homano sikakinino, ininiãkara nakiritari Sesa nisãkire ikenakotini íkapani. ! Ninirekari nimisãkirepiretiniri ninirimane Xoteoakori. ²⁰ Ikara atoko ininiã, nipïkapiretai híte nimisãkiretini íkapani. Teoso mereëkiti sãkire, Xoteoakori iãtapakiti sãkire nauïkini xika, nota maïkaãka.

²¹ Ininiã ninoa:

—Ate !apakapari iōkatsopari Xotéia tōpakiri pite maerekani pirena. Añtariakori iuañ ìkani !iminapiretari maerekati pikamakiti pirena. ²² Ate nirekari akenakotiniri pite auiañkiti sākiretxiti, kotxi akenakoenetapekari apanakini sākire: “Xesosi sākire na atāo” —itxana ninoa.

²³ Ininiã ninoa ketotari ãti òti Paorokata aōkitakakiniuana. Iketotiniri manapi itomaneri kākiti sari Paoro auinimoni. Paoro ìkanōkapanika sākirauatapitipo. Ìkanōkapeka auakapanika isāpirenauatini. Isāpiretana Teoso auñttxi ininiãua.

—Atāo Teoso ākiripitikara Xesosi —itxa Paoro sākire.

Isāpiretana ninoa Moisesi iōkatsopatakiti, Teoso sākire sāpiretakani iōkatsopatakiti apaka, atāo Teoso ākiripitikara Xesosi ininiua ninoa imarotini ìkapani. ²⁴ Apanakini auikari Paoro sākire. Apanakini !inirekari auikinirina Paoro sākire. ²⁵ Ininiã ninoa taparakienatakakaua Xesosi sākire auikakani mauikarenikata. Ipotorikinina apisa, iuañkana Paoro misākiretana ninoa:

—Erekari Matamatakoti sākirauata atāo hinirimanekata kitxakapirīka. Ipaniãtari Teoso sākire sāpiretakari Isaia inakori isāpiretiniri Teoso sākire hinirimanemoni. ²⁶ Itxari:

Hisa kākitemoni. Hisāpiretanako ninoa: “Hikenakotari nisākire ãtipirika, txamari !hinirekari himarotiniri nisākire. ãtipirika hñtikari nikamakiti, txamari !hinirekari hñuikiniri nota kaminiri ia atoko inakari.”

²⁷ Kotxi kākiti ākixinireñ !inirekarina imarotinirina nisākire. !Inirekarina ikenakotinirina nisākire. !Inirekarina itikinirina nikamakiti. Inirekiniãrina, itikapitkarina nota kamakiti. Inirekiniãrina, atāo ikenakotarina nisākire. Ākixinireñna imarotaãkamariko nota sākire, inamanako notamoni, ininiã nota txikitakamanako ninoa ereka ininina, itxa Teoso sākire.

²⁸ Paoro sākirauata iuañkana ninoakata:

—Ninirekari himarotiniri Teoso iokanapirena erekari kākiti maerekani makatxakiko pirena iokanapiretaãkapeka Xoteo minakonimoni. Ninoakara auikapitkariko Teoso sākire.

²⁹ Ikara Paoro sāpiretaãka atoko, ninoa Xoteoakori sipeka. Isikasaakina, iteene itaparakienatakakauana Paoro sākire ikenakotinina xika.

³⁰ Paoro kaikota iuañ ipi anokanani. Ikitxitari kaapokori iua aapoko Paoronoka auini ìkapani. Paoro ipoxokoniritika apakapana ikinimane iuamoni sikani. ³¹ Isāpiretana ninoa Teoso auñttxi ininiãua. Oerekana ninoa Xesosi, Teoso mereēkiti ininiãua, Apiananiri ininiãua. Isākirauata itaparaxinireritika kākitemoni. Auiritaãka ikinipoko imarotakiti isāpiretini.

HOMANO Paoro Iokanatsopatakiti Homa Auakanimoni

¹ Nota Paoro iokanatsopata hitemoni. Xesosi Kristo nitirikarano nota. Teoso mereño nota iua iokanatakiti kăkitimoni nininiua ĩkapani. Iua akiritano nota, Teoso iokanapirena erekari kăkitimoni nisăpiretini ĩkapani. Ikara parĭkatxinoka inireka nikamini. ² Kitxakapirĭka Teoso săkire săpiretakani săpiretaua Teoso sikaenetakiti, iua iokanapirena erekari. Teoso săkire iŏkatsopatakoriă ikara atatsopataăka.

³ Ia Teoso iokanapirena erekari săpiretaua aăuĭte Xesosi Kristo Teoso âkiri ininiua. Kăkiti itxapekăua. Iuasaaki Tavii apika mekaniri itxăua. ⁴ Iuaritika Teoso âkiri itxăua. Erekari Matamatakoti oerekari kăkiti Teoso âkiri ininiua Xesosi, kotxi ŏkitikari Xesosi ipĭkaripeka. Iuaĭkana aua itxa. Ikara posotiiretxi apiari oerekari kăkiti Xesosi Teoso âkiri ininiua. ⁵ Xesosi Kristo sikăua ikinipoko erekari. Ininiă iokanataua ikini itixitimoni, kăkiti isăkire asăpiretini ĩkapani, isăkire auikinina ĩkapani, isăkire iaŏka ikaminina ĩkapani. Ikara atoko aparĭkauata Kristo ĩkapani.

⁶ Hĭtepekana, Teoso akiritai hĭte apaka Xesosi Kristo nakitiakori hininiua ĩkapani. ⁷ Ininiă nota iokanatsopata hĭtemoni Teoso tĭretakinimoni, Homa sitatxiti auakanimoni. Teoso akiritai hĭte iua nakitiakori hininiua ĩkapani. Aĭri Teoso, Apiananiri Xesosi Kristo apaka sikari ikinipoko erekari hĭtemoni. Ikamaerekaxiniretai hĭte.

Paoro Nĭrekari Isini Homa Auakanimoni

⁸ Merepanika nitxari niTeosone: “Erekapitikai, kotxi Homa auakani iteene aukari pisăkire. ĩkĭni tŏpati auakani kenakopiretari ninoau auikiniri pisăkire,” nitxari Teoso Xesosi Kristo uăkă. ⁹ Nisăkirauatakasaaki Teosokata, nimisăkiretari Teoso hĭte ĩkapani. Ătipirika nimisăkiretari Teoso hĭte ĩkapani. Teoso imarotari ikara nisăkire atăo inini. Nota parĭkauata Teoso ĩkapani. Iuanoka ninireka nikamini. Nisăpiretari iua iokanapirena erekari imi pĭrena kăkitimoni. ¹⁰ Nĭmisăkiretakasaakiri Teoso, nitxari: “Pauiritiniăno, ninirekari paĭtiki Homa auakanimoni nisini. Mitxi ! apakata ninoamoni nisini. Pinirekiniări iuaă nisini, pimoianatano ninoamoni napokini ĩkapani,” nitxari. ¹¹ Iteene ninirekari naŏkitinii hĭte, kotxi ninirekari Teoso kamataparatiniri hăkixinire nisăkire. ¹² Ininiă nota kamataparaxiniretaiko hĭte, kotxi himarotari nota iteene auikiniri Xesosi săkire. Apaka hĭte kamataparaxiniretano nota, kotxi hĭte apaka iteene aukari Xesosi săkire.

¹³ Nitariakori, ninirekari himarotiniiri itokatapiima naiamatama hĭtemoni nisini ĩkapani, txamari iuasaaki ! apakata nisini. Itomaneri kăkiti Xoteo minakanuia âtiătaă auakani aukari Xesosi săkire. Ininiă iua atokotxikana ninirekari kaiăopokori kăkiti hĭte sauaki auakani apaka auikiniri Xesosi săkire. ¹⁴ Nisăpiretari Teoso săkire ikininapemoni. Nisăpiretari sitatxi auakanimoni. Nisăpiretari ĭtopa auakanimoni apaka. Nisăpiretari iŏkatsopari imarotakanimoni. Nisăpiretari iŏkatsopari mimarotakanimoni apaka. Ikara nĭparĭka. ¹⁵ Ininiă iposope nitxa nisăpiretiniri Teoso iokanapirena erekari hĭte Homa sitatxiti auakanimoni apaka. Ikinika nitaparaă nisăpiretai.

¹⁶ Na nĭpĕtauaata Kristo iokanapirena erekari nisăpiretinii, kotxi iua iokanapirena oerekăua Teoso posotiire iua săkire auĭăkani maerekani imaktxakini ĩkapani. Kaposoti-reri iua, ininiă imaktxakari ikinimane maerekani, iua săkire auĭăkani maerekani. Ikara ikaminana Xoteoakori merepanika. Eereka ikaminana Xoteo minakanuia apaka. ¹⁷ Teoso iokanapirena erekari săpiretaua Teoso txĭkitakiniri kăkiti atăo inakarĭnoka ikamini. Teoso săkire auĭkĭŏnokara, kăkiti txĭkitakăka atăo inakarĭnoka ikamini. Teoso săkire iŏkatsopatakori txari:

Kăkiti atăo inakarĭnoka kamakani auini erekari, kotxi ninoau aukari Teoso săkire.

Kăkiti Kamakiti Maerekati

¹⁸ Teoso iaxiti auakari oerekăua iua omanăkarauatini kăkiti maerekani xika, ininiăkara iua misiritariko kăkiti, kotxi kăkiti ! inirekari Teoso paniătakiti ikamini. Ikamarina maerekatinoka. Maerekati ikamakasaakina, ikipatarina atăo inakari. ¹⁹ Kăkiti ikara atoko inakani Teoso misiritanako ninoau, kotxi apakata ninoau atamatiniiri iua kamakiti. Teosora oerekepekari ikamakiti kăkitimoni iua imarotinina ĩkapani. ²⁰ Teoso kamari itixi, ininiă kăkiti atamatakasaakiri Teoso kamakiti, imarotari kiătokopa itxa Teoso. Matamatakoti itxăua Teoso, iuaritika kăkiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kăkiti imarotari ikara atoko inakari itxăua Teoso, iua kamakiti atamatakasaakina. Ininiăkara kăkiti imarotapitikari Teoso auini. Ininiăkara na atăo kăkiti săkire: “Na nĭmarotari Teoso auini inini.”

²¹ Kākiti imarotari Teoso auini, iuaritika ! isāpiretarina Teoso: “Atāo Teoso pitxaua,” ! itxarina. !Isāpiretarina Teoso: “Erekapitkari pikamakiti ate ikapani,” !itxarina. !Kīikitenā. !Imarotaikarina atāo inakari, kotxi ākixinireēna maerekatinoka aua. ²² Ninoa sākire: “Kimaroreua ate,” txamari !kīikitenā. ²³ Teoso mapinakatimoni !itxana: “Pitenokara Teoso txaua,” !itxarina. Kākiti ipinapitika, iuaritika kamakori kākiti atoko inakari imisākiretana: “Pite ateosone,” itxana. Kamakori kotipiriki atoko inakari, kamakori pirātxi atoko inakari, kamakori imini atoko inakari pakini ninoa misākireta: “Hīte ateosone,” itxana.

²⁴ Ininiākara Teoso takanapana ninoa. Auiritana maerekatikaminina ākixinirena nirekaākiti. Itxiko atoko itxa imaerekanina iitona nirekēiti. Ninoaka na paxitauana iitona, kotxi āti sirīka ātikata. ²⁵ !Inirekarina auikinirina atāo inakari Teoso sākire. Inirekarina auikinirina atāo minakati. Teoso kamakitimoni itxana: “Pite ateosone. Aparīkauata pite ikapani,” itxana. Ikinipoko kamakarimoni !itxana: “Pite aTeosone. Aparīkauata pite ikapani,” !itxana. Atāo inakari kamakani ātipirika txari ikinipoko kamakari: “Peerekai pite.” Ameē.

²⁶ Ikara kākiti maerekani xika, Teoso takanapana ninoa. Auiritana maerekatikākiti kapēta txīkitaākari, iitona nirekēiti ikaminina. Ininiā sito na nirekaikari kikikata osirīkini. Sito nirekari āto sitokata osirīkini. !Apakata. Ikara maerekatitxaua. ²⁷ Iua atokokana kiki !inirekaikari sitokata isirīkini. Kiki nirekari āti kikikata isirīkini. !Apakata. Ikara maerekatitxaua. Ininiākara iitona misiritaākako imaerekanina xika.

²⁸ Ninoa imaroreē !inirekarina imarotinirina Teoso, ininiā Teoso takanapana. Auiritana ixinikinirina atāo minakati. Maerekatinoka ixinikakitina, ininiā ikamarina atāo minakati. ²⁹ Ākixinireēna aua ikini sereti maerekatikaminina nirekēitinoka ikamana. Ātipirika ikamapikarina maerekatikaminina. Apanakini nakiti tiitxi atamatakasaakina, inirekarina. Ikamarina maerekatikamininimoni. Ākixinireēna ixikotarina āti. Kokaniri itxauana. Ineenamau-atapikana. Apanakini imisirienetana. Ixinikarina apanakini kamakiti maerekatinoka. Aāpirena ikamana. ³⁰ Imisākirepiretarina āti. Omanatarina Teoso. !Ipaxitarina apanakini imisākiretakasaakina. Iuikauana. Ātipirika: “Paimatireua ate,” itxanātana. Ixinikapikarina: “Natokopa itxa apikomoni maerekatikaminini.” !Ikīitarina iri paniātakiti, inoro paniātakiti pakini. ³¹ !Kīikitenā. !Ikamarina ikamaenetakitina. !Itiretarina inirimane. !Inirekarina neenamati ixipokinina. !Iamonikana apanakini. ³² Teoso sākire txari: “Kākiti ikara atoko inakani ipinapitkako. Ninoa ipinini atāo.” Ikara Teoso sākire imarotapiikamana, iuaritika ikamapanikarina ikara maerekatikaminini. Apaka apokaerekatarina apanakini, maerekatikamakasaaki.

2

Teoso Misiritari Maerekatikamakani

¹ Atxiiti hīte txari: “!Erekana ninoa, kotxi ninoa kamari maerekatikaminini,” hītxa. !Apakata ikara atoko hinini, kotxi hīte apaka kamari maerekatikaminini ninoa kamakiti atokotxikana. Ininiā !apakata kākiti akiritiniri āti kākiti maerekatikaminini kamakari ininiua. ² Apakatatipika Teoso akiritiniri kākiti maerekatikaminini kamakari ininiua, kotxi iua imarotari atāo. Ininiā maerekatikaminini kamakari apakapari atāo imisiritiko imaerekani iaōka. ³ “Ninoa maerekatikaminini misiritaākako,” hinakasaaki, hīxinikari hīte apaka kamari maerekatikaminini ninoa kamakiti atokotxikana. Ininiā hīte apaka !hinapakakapaniri Teoso misiritinini hīte. ⁴ Atxiiti na hīte maākatari Teoso, kotxi hīte txari: “Teoso katiraōkiri itxaua,” hītxa. Atxiiti na himaākatari Teoso, kotxi iuasaaki !imisiritapanikai hīte. Atxiiti na himaākatari Teoso, kotxi Teoso ātipirika mīteenekai hīte. Teoso nirekari hītakanapiniri maerekatikaminini hīkamakiti, erekarinoka hīkamini ikapani. Ininiā iua tīretai hīte. Ikara hīte imarotamako.

⁵ Txamari hīte paikoxinirei. Na hinirekari himaerekani hītakanapini. Ininiā himisiritiko apiaāpotako. Kākiti misiritiko ōti apokasaaki, Teoso misiritapitikaiko hīte. Iuasaaki kākiti imarotariko Teoso omanākare imaerekani xika, kotxi Teoso atāo imarotari kākiti kamakiti. ⁶ Ikamakiti erekari ininiāua, Teoso sikari erekari iuamoni. Txamari ikamakiti maerekatikamininiāua, Teoso misiritariko iua. ⁷ Aua kākiti ātipirika erekari kamakani. !Isāpaka erekari ikaminini. Inirekarina Teoso: “Erekapitkai,” ininina. Inirekarina Teoso paxitinina. Inirekarina auinina ātipirika. Kākiti ikara atoko inakani Teoso txīkitakana ātipirika auinina ikapani. ⁸ Apanakinipekana kamari inirekēitinoka. !Inirekarina atāo imarotinina. Maerekatinoka inirekana ikaminina. Teoso omanatana kākiti ikara atoko inakani. Teoso misiritanako ninoa. ⁹ Ikinipoko kākiti maerekatikaminini kamakani maxikaākako. Atatsiirauatoko. Merepanika Xoteo misiritaākako, eereka Xoteo minakanuia apaka misiritaākako. ¹⁰ Teoso txanako kākiti erekari kamakani: “Erekapitkai hīte.” Ikara atoko itxanako merepanika Xoteoakori, eereka Xoteo minakanuia apaka. Teoso paxitanako ninoa. Ikamaerekaxiniretanako.

¹¹ Teoso misiritana ikini kākiti maerekati kamakani. !Auiritari apanakini maerekati kamakani imisiritini atokokana, imisiritari ikinipoko maerekati kamakani.

¹² Xoteo minakanuia !auari Moisesi sākire Teoso paniātakiti iōkatsopatakori. Ninoa kamari maerekati, ininiā Teoso paniātakiti imimarotakanisaaki ipinana. Xoteoakori aua Teoso paniātakiti iōkatsopatakori. Ninoa apaka kamari maerekati. Ininiā Teoso misiritana ninoa, isākire iōkatsopatakori iaōka imakamakani xika. ¹³ Teoso kamaerekatari isākire iaōka kamakani. Pikenakotakasaakiri Teoso sākire, txamari !pikamari isākire iaōka, iuasaaki Teoso ! ikamaerekatai pite. ¹⁴ Xoteo minakanuia ! auari Teoso sākire iōkatsopatakori. Iuaritika atxiiti ikamarina Teoso paniātakiti iōkatsopatakori iaōka, kotxi ikamarina ākixinirena sākire iaōka. !Auari Teoso sākire iōkatsopatakori ninoamoni, iuaritika Teoso paniātakiti auape ākixinireēna. ¹⁵ Teoso paniātakiti iaōka ikamakasaakina, oerekarina imarotininirina atāo inakari ākixinireēna. Ākixinirena sākire sāpiretana atāo. Ātikata itxana: “Pite kamari maerekati. !Apakata.” Ātikata erekari ikamakasaakina, “Pite kamari erekari. Erekapitikari.” Itxa ākixinirena sākire. ¹⁶ Kākiti kamakiti imarotiko ōti apokako. Iuasaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakinini apaka isāpireta. Iuasaaki isāpiretari kākiti misiritiko imaerekani xika. Teoso iokanapirena erekari nisāpiretakiti oerekapekari ikara atoko inakari.

Xoteoakori Auari Teoso Paniātakiti Iōkatsopatakori

¹⁷ Hītepekana, hīte txari: “Ate Xoteo atxaua. Teoso apakapapitika aua, kotxi isikari ipaniātakiti iōkatsopatakori atemoni. Atenoka Teoso anaakori atxaua,” hītxa. Ininiā hīteka iuikaua. ¹⁸ Hīte imarotari Teoso nireēkiti hīkamini. Himarotari Teoso paniātakiti iōkatsopatakori, ininiā himarotari erekari apiari hīkamini. ¹⁹ Hītxari: “Atera oerekari Teoso kimapore, ikimapore mimarotakanimoni. Mōsiāreni atoko itxana ninoa,” hītxa. “Ate imarotari Teoso sākire, ininiā ate imarotari apanakini aōerekini. Ininiā ate tirikapī atoko atxaua. Apanakini ipiā sikani atoko itxana ninoa.” Ikara atoko hītxa hīte. ²⁰ Hītxari: “Koerekarerini atxaua. Kākiti mīikiteni oereēkani atxaua. Ate oerekari kākiti poiāo imarotakani. Ate imarotari ikinipoko. Aimarotari atāo, kotxi Teoso sākire iōkatsopatakori aua atemoni.” Ikara atoko hītxa hīte. ²¹ Hīte Xoteo inakanuia oerekari apanakini. Kinirepa kona hīteka oerekaua apaka? Hīte ōtākikari apanakini: “!Pīitriuatape”. Kinirepa hīte na takanapari hīitriuatini? ²² Hīte ōtākikari apanakini: “!Pisiriākape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakori, ininiā kinirepa hīitriākari ninoa teosone aikoti tii? ²³ Hīte iuikaua, kotxi Teoso sākire iōkatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. ²⁴ Teoso sākire iōkatsopatakori txari: Hīte Xoteo xika, Xoteo minakanuia misākirepiretari Teoso, itxa Teoso sākire iōkatsopatakori.

²⁵ Teoso takaōtxikare aua hītoā. Teoso paniātakiti hīkaminiā, erekapitikari Teoso takaōtxikare hītoā auini. Teoso paniātakiti iōkatsopatakori himakamakaniā, Teoso takaōtxikare mauakinini atoko hītxaua. ²⁶ Xoteo minakatiua, Teoso takaōtxikare iitoā mauakini, Teoso sākire iaōka ikaminiā, Teoso txariko: “Iua Xoteo atokotxikana itxa. Nitakaōtxikare iitoā auakiti atokotxikana itxaua.” ²⁷ Hīte Xoteoakorimoni aua Teoso paniātakiti iōkatsopatakori, iuaritika !hīkīpitari Teoso sākire. Teoso takaōtxikare auapitikama hītoā, iuaritika !hīkīpitari Teoso sākire. Xoteo minakanuia !auari Teoso takaōtxikare iitoāna, iuaritika ninoa kamari Teoso paniātakiti iōkatsopatakori. Ikara atoko ininiā, ninoa oereka himaerekani.

²⁸ Kiripa atāo Xoteo? Kiripa Teoso nakiti txataua? Kirimonipari aua Teoso takaōtxikare atāo inakari? Teoso takaōtxikare iitoā auakini, na ikinikani atāo Xoteo itxauana. ²⁹ Teoso paniātakiti iōkatsopatakori ! oerekaua Teoso nakiti aninua. Xoteo atāo inakariua, Teoso nakiti itxaua ākixinireē. Teoso takaōtxikare aua iua ākixinireē. Erekarini Matamatakoti takari Teoso takaōtxikare iua ākixinireē. !Inirekari kākiti iuikiniri. Inirekari Teoso iuikiniri.

3

Teoso Kamari Ikamaenetakiti

¹ Atxiiti hīte txano nota: “Teoso apakapari Xoteo. Teoso apakapari Xoteo minakanuia apaka, ininiā !apiaerekata Xoteo aninua. !Apiaerekata Teoso takaōtxikare iitoā auini.” Atxiiti ikara atoko hītxa. Txamari na atāo. ² Apiaerekatapitika Xoteo aninua, kotxi Teoso merepitipanika sāpiretari iuaka sākire Xoteomoni, ninoa iōkatsopatiniri ikapani, inīkatininirina ikapani. ³ Iuaritika apanakini Xoteo !auikari Teoso sākire. Ikara xika atxiiti Teoso !ikamari ikamaenetakiti? ⁴ Ikamapitikari. Atxiiti paxirari ikinimane sākire. Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atāo ininiua. Isāpiretakasaakiri kākiti imisiritiko imaerekani xika, iuasaaki imarotaākako Teoso kamakiti atāo inini.

⁵ Atxiiti kākiti txano nota: “Atāo minakati akamakasaaki, apanakini apia imarotari Teosonoka kaminiri atāo inakari. Ininiā erekari akaminiri atāo minakati apanakini imarotari Teosonoka kaminiri atāo inakari. Ininiā !apakata Teoso misiritiniua ate, maerekati akamini xika.” Atxiiti aua kākiti ikara atoko ina sākiretakani. ⁶ Apakatapitika Teoso misiritiniri maerekati kamakari. Iua kamari atāonoka, ininiā apakatapitika imisiritiniri ikinimane maerekati kamakani.

⁷ Atxiiti kākiti txaua: “Atāo minakati asāpiretakasaaki, apanakini imarotari Teoso sākirenoka atāo ininiua. Atāo aminasākiretakaniā, apanakini kākiti txari: ‘Teosonoka ereka,’ itxana. Ininiā !apakata Teoso misiritiniua amaerekani xika.” Atxiiti aua kākiti ikara atoko ina sākiretakani. ⁸ Ikara atāo ininiā, maerekati makama erekari apokini ikapani. Txamari ikara sākiretxiti na atāo. Iuaritika apanakini apoitapekaua ate ikara atoko asāpiretini. Ininiā atāopitika ninoa misiritiko, isākirena xika.

!Auari Kākiti Erekeri

⁹ Hixinikariko ikinika ikara nisāpiretakiti. Atauako Xoteo apiaerekata? Atauako Xoteo minakanuia poiāo ereka? Kona ikara atokoni itxa. Noerekepekai hite, Xoteo minakanuia atokokana itxa Xoteo, kotxi ikinimane kamari maerekati. Akinika !aposotari atakanapiniri maerekati akamini. ¹⁰ Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nireēkiti imarotakari !auari. Teoso nirekakari !auari.

¹² Ikinimane kaporīkikari Teoso. Ikinimane kerokari ikamakiti. Erekeri kamakari !auari. Ātika !auari.

¹³ Kākiti sākire maerekati, itotxi arakakari saka atoko itxa. Itotarina imisirinetinirina apanakini. Kākiti sākire imini tsiā atoko itxa.

¹⁴ Ātipirika imisākirepiretarina āti, kotxi inīkatarina omanākaretxi ākixinireēna.

¹⁵ Maxikatīka inirekarina okinirina āti.

¹⁶ Isinimonina imaxikana apanakini. Maerekaxinireninoka itxīkitakana apanakini.

¹⁷ !Imarotarina neenamtxi itakanapinina.

¹⁸ !Ipaxitarina Teoso. !Ipīkarina iua.

Itxa Teoso sākire iōkatsopatakori.

¹⁹ Aimarotari Teoso sikari ikinika ipaniātakiti iōkatsopatakori atemoni Xoteoakorimoni, inireēkiti aimarotini ikapani. Ininiā !apakata ate, Xoteo minakanuia pakini: “! Nimarotari Teoso nireēkiti,” anini, kotxi isāpiretapekari inireēkiti akamini tīkane. Ininiā atāopitikara Teoso misiritinina ikinimane maerekati kamakani. ²⁰ Ikinika Teoso paniātakiti iōkatsopatakori !aposota akamini, ininiā Teoso kona kamaerekataua. Teoso paniātakiti iōkatsopatakori oerekaua maerekati kamakani aniniua.

Natokopa Itxa Teoso Kamaerekatiniri Kākiti?

²¹ Uatxa Teoso oerekepekaua itxīkitakiniri kākiti atāo inakari kamakani ininiua. Teoso paniātakiti ikinika tīkama kākiti, iuaritika itxīkitakaākana atāo inakari kamakani ininiuana. Kītxakapirīka Moisesi, Teoso sākire sāpiretakani apaka sāpiretari ikara. ²² Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakanuia pakini atāo inakari kamakani ininiuana, Xesosi sākire auikasaakina. Xoteo minakatiua Teosomoni, Xoteotxikana itxaua. ²³ Kotxi ikinimane kamari maerekati, ininiā !aposota aāpokini Teoso iotximeremoni. ²⁴ Maerekati kamakanuia ate, iuaritika Teoso sikari ikinipoko erekari maxikatīka atemoni, ininiā Teoso kamaerekataua ate, kotxi Kristo Xesosi iikitxirauata ate ikapani ipīkasaaki. Ininiā Teoso ! imisiritauka amaerekani xika. ²⁵ Teoso sikari Xesosi ipinini kākiti ikapani. Xesosi ipīkasaaki, Teoso makatxakari maerekati akamakiti. ! Imisiritauka ate, kotxi aūikari Xesosi ipinini itixitari Teoso, maerekati akamakiti. Teoso sikari Xesosi ipinini ate ikapani. Ikara oerekaua atāo inakarinoka ikamini. Mitxipitipanika Teoso ! imisiritana kākiti imaerekana xika. Iātapari iketo manapi apokini, kotxi iamonīkari kākiti. ²⁶ Teoso sikari Xesosi, ininiā ipīpe kākiti ikapani, ininiā uatxa Teoso misiritari kākiti maerekati ikamini xika, ininiā aimarotari Teoso atāo inakarinoka kamakari itxaua iua, kotxi ! auiritari maerekati kamakari inapakakini. Erekeri Teoso, ininiā iua posotari ikamaerekatiniri kākiti Xesosi sākire aūīkani.

²⁷ Ininiā ! apakata aūikiniua, kotxi ! auari aparīka akamaerekatakiri, ininiā ! apakata aūikiniua Teoso paniātakiti iōkatsopatakori akamakasaaki. Teosora kamaerekataua, Xesosi sākire aūikasaaki. ²⁸ Teoso paniātakiti iōkatsopatakori kamakari atxiiti ! ikamaerekataāka, kotxi ! auikari Xesosi sākire. Xesosi sākire auikakarinnoka ikamaerekataāka. ²⁹ Atauako Teoso Xoteo Teosonnanini itxataua? Konapitini. Xoteo minakanuia Teosonekanera

apaka itxaua Teoso. ³⁰ Teoso ätinoka aua. Iua kamaerekatana Xoteo, Xesosi säkire auiaäkani. Iua kamaerekatana Xoteo minakanuia apaka, Xesosi säkire auikasaakina. ³¹ Ikara atoko ininiä, atxiiti käkiti txari: “Teoso kamaerekataua ate, kotxi aauikari Xesosi säkire, ininiä Teoso paniätakiti iökatsopatakori ! itxaika. Ininiä ! akamaikari,” itxa käkiti säkire atxiiti. Konapitini. Xesosi säkire aauikasaaki, anirekari iteene akaminiri Teoso säkire paniätakiti iökatsopatakori.

4

Atão Inakari Kamakari Apraão

¹ Maxinikari Apraão airi kitxakapirikari. Natokopa itxa iua imarotakiti, Teoso kamaerekatiniri käkiti? ² Apraão kamakiti erekari kamaerekataäkamariko iua, ininiä iua iuikamaauako. Txamari iua iuikiniua ! auari Teoso apisatoö. ³ Teoso säkire iökatsopatakori txari:

Apraão auikari Teoso säkire, ininiäkara Teoso txikitakari iua atão inakari kamakari ininiua. ⁴ Parikauatakari ipaträote sikari iparika iki iuamoni. Maxikatiika ! iikitxitari iua. Isikari, kotxi iparika. ⁵ Käkiti auikiniäri Teoso kamaerekatiniri maerekati kamakari, iua käkiti ! iuikari iuaka parika. Imarotari iparika ! ikamaerekatari iua. Teoso txikitakari ikara atoko inakari käkiti atão inakari kamakari ininiua, kotxi iua auikari Teoso säkire. ⁶ Kitxakapirika Tavii txari ikara atoko. Iua säpiretari käkiti Teoso sikakiti erekari apakapakani. Teoso txikitakari iua atão inakari kamakari ininiua. Na iparikani txikitakari iua atão inakari kamakari ininiua. ⁷ Tavii txari:

Teoso makatxakasaakiri käkiti maerekani, ! atamataikari maerekati ikamakiti. Teoso takari ikinipoko erekari käkiti ikara atoko inakarimoni.

⁸ Teoso !iaötari iua kamakiti maerekati. Teoso takari ikinipoko erekari iuamoni. Itxa Tavii kitxakapirika.

⁹ Atxiiti pite txari: “Atauako ia erekari Teoso sikakiti, Tavii säpiretakiti, käkiti Teoso takaötxikare auaitotakiti ikapaninanini?” Konapitini. Ia erekari Teoso sikakiti Teoso takaötxikare mauaitotakini ikapani apaka. Nisäpiretapekai ia Teoso säkire iökatsopatakori:

Apraão auikari Teoso säkire, ininiäkara Teoso txikitakari iua atão inakari kamakari ininiua, itxa Teoso säkire iökatsopatakori. ¹⁰ Kirisaakipa Teoso txikitakari Apraão atão inakari kamakari ininiua? Atauako Teoso takaötxikare Apraão itoä auakasaakiikani? Konapitini. Takaötxikari Apraão itoä takiko apisapanikara, itxikitakari Apraão atão inakari kamakari ininiua. ¹¹ Merepanika Teoso txikitakari Apraão atão inakari kamakari ininiua, eerekaikara itakari itakaötxikare iitoä. Ikara Teoso takaötxikare oerekari, mitxipeka Teoso txikitakari Apraão atão inakari kamakari ininiua, kotxi iua auikari Teoso säkire. Apraão auikari Teoso säkire, Teoso takaötxikare iitoä auini apisapanika. Ininiä Apraão ikini Teoso säkire auiaäkani iri atoko itxaua. Atxiiti Teoso takaötxikare iitoäna ! auari. Iuaritika ninoa iri atoko itxaua Apraão. Teoso txikitakari ikinimane iua säkire auiaäkani atão inakari kamakani ininiua. ¹² Apraão Teoso takaötxikare auaitotakini iri atoko itxaua, ninoa auikiniäri Apraão säkire Apraão auikiniäri atokotxikana, kotxi Teoso auikari Teoso säkire Teoso takaötxikare iitoä auini apisapanika.

¹³ Teoso sikaenetari itixi Apraõomoni, imekaniriakori pakinimoni. Ikara atoko Teoso säkire, kotxi Apraão auikari Teoso säkire. Iua auikari Teoso säkire, ininiä Teoso txikitakari iua atão inakari kamakari ininiua. Apraão kamakiti erekari ! itxikitakari Teoso sikaenetiniri itixi Apraõomoni. ¹⁴ Käkiti erekari kamakari Teoso säkire mauiakati ! apakapari Teoso sikaenetakiti, kotxi ! auikari Teoso säkire. Teoso sikari isikaenetakiti iua säkire auiaëkanimoninani. ¹⁵ Teoso paniätakiti iökatsopatakori makamakati misiritaakako. Teoso paniätakiti iökatsopatakori mauakaniä, maerekati ! auari. Txamari auapitika Teoso paniätakiti iökatsopatakori.

¹⁶ Ininiä käkiti auikasaakiri Xesosi säkire, apakapari Teoso sikaenetakiti. Maerekati kamakani käkiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini käkitimoni. Ininiä ikinimane Apraão apika mekaniriakori apakapapitikari Teoso sikaenetakiti. Xoteoakori Teoso paniätakiti iökatsopatakori auakini apakapari. Xoteo minakanuia Teoso säkire Apraão auikini atoko inakani apaka apakapari. Ate amakinika iri atoko itxaua Apraão. ¹⁷ Teoso säkire iökatsopatakori txari:

Teoso txari Apraão: “Nota txikitakaiko pite itori äti uäka iri pininiua.”

Ininiä Teosomoni iua airi atoko itxaua, kotxi Apraão auikari Teoso säkire. Teoso txikitakana ipikani iuaikana auäki inini. Iua kamari mitxi mauakati auini.

¹⁸ Apraão kiomätxipeka inakasaaki, kona keeneri. Iuaritika auikari Teoso säkire. Iätapari Teoso sikaenetakiti apokini. Ininiä apakanini äti uäka iri atoko itxapekua Teoso säkire iaöka. Teoso säkire iökatsopatakori txari:

Papika mekaniriakori kaiãopokopaniriko.

¹⁹ Apraõ seĩ anokanani inakasaaki, imarotari iĩto ipinanapanoka inini. Imarotari Sara ! oposotaikari keene onini. Iuaritika iteene auikari Teoso sãkire. ²⁰ ! Iotoka auikiniri Teoso sikiniri isikaenetakiti uamoni. Iua auikari Teoso sãkire itaparaxinireritika. "Teoso posotari ikinipoko ikamini," itxa. ²¹ Iua iteene imarotari Teoso posotiniri isikiniri isikaenetakiti. ²² Apraõ auikari Teoso sãkire, ininiãkara Teoso txĩkitakari iua atão inakari kamakari ininiua. ²³ Na Apraõonani Teoso txĩkitaka atão inakari kamakari ininiua. ²⁴ Iua txĩkitakaua ate apaka atão inakari kamakani aniniua, aũuikiniãri Teoso sãkire. Aũũte Xesosi ipĩkasaaki, Teoso õkitikari iua iuaĩkana auini ĩkapani. ²⁵ Teoso sikari Xesosi kãkitimoni ipinini ĩkapani maerekati akamakiti xika. Teoso õkitikari iua iuaĩkana auãki inini ĩkapani, ate ikamaerekatini ĩkapani.

5

Teoso !Omanataikaua Ate

¹ Ininiã Teoso kamaerekataua, kotxi aũuikari isãkire, ininiãkara aũũte Xesosi Kristo iotokakari Teoso omanatinua ate. Teoso ! omanataikaua ate. Uatxa apakapaua ate. ² Aũuikasaakiri Xesosi sãkire, iuasaaki aimarotari ikinipoko erekari Teoso sikakiti atemoni ikiniõtika. Itene apoxokoniua, kotxi aiãtapari Teoso aãõkitini, iua iotximere aãtamatinini ĩkapani. ³ Apanakini misiritakasaakia, apoxokoniua apaka, kotxi Teoso oerekaua amũteenekiniri amisiritiko. ⁴ Amisiritiko amũteenekiniã, aimarore apiaãpota. Aimarore apiaãpotakasaaki, aiãtapariko erekari apokini atemoni. ⁵ Erekarĩ apokini aiãtapiniã, aãpakapapitikariko erekari, kotxi aãkixinireẽ aimarotari Teoso iteene tiretinua. Erekarĩ Matamatakoti Teoso sikakiti atemoni, oerekaua Teoso tiraõki aãkixinireẽ.

⁶ Erekarĩ akamini amaposotakanisaaki, Teoso amanirekakanisaaki, Kristo ipina ate ĩkapani. Iua ipina iketo õti manapi. ⁷ Atxiĩti kãkiti ipina atão inakari kamakari ĩkapani iua mapinakani ĩkapani? Atxiĩti ! ipina iua ĩkapani. Atxiĩti kãkiti ipina ati erekari kamakari ĩkapani, iua mapinakani ĩkapani? Atxiĩti ipina iua ĩkapani. ⁸ Teoso oerekaua ate, iua iteene tiretinua ate, kotxi Kristo ipina ate ĩkapani maerekati akamanpanika anakasaaki.

⁹ Kristo ipinini kamaerekataua ate, ininiã uatxa Teoso apakapaua ate. Apikomoni Kristo kaminua, kotxi Teoso ! omanataikaua. !Imisiritakaua. ¹⁰ Ate Teoso omanatakani anakasaakia, Teoso ãkiri ipina ate ĩkapani. Ininiã Teoso mokaikari ! atxaikaua. Iua apakapaua. Iua apakapaua, ininiã amaerekani imakatzaka, ininiã aũuapininiã, kotxi iua õkitikaua auapininiã anini ĩkapani Teosokata, kotxi Kristo auini auapika. ¹¹ Teoso kamari ikara ate ĩkapani. Apikomoni iua kaminapanikauako ate, kotxi iua kamapoxokonitua, kotxi aũũte Xesosi Kristo mikanapiriãua ate Teosomoni.

Adão, Kristo Pakini

¹² Maerekanitxi apoka itixi kiki ãtika xika, Adão inakori xika. Maerekati ikamakiti xika ipina. Ininiã ikinimane kãkiti ipina, kotxi ikinimane kãkiti kamari maerekati. ¹³ Teoso paniãtakiti iõkatsopatakorĩ apokini apisapanika, kãkiti kamari maerekati, iuaritika Teoso ! imisiritana ninoa maerekati ikamakitinua xika, kotxi iuasaaki ! isãpiretapanikari ipaniãtakiti. ¹⁴ Adão auakasaaki atoko, Moisesi auakasaaki manapi, iuasaaki Teoso paniãtakiti iõkatsopatakorĩ ! apokapanika, iuaritika ikinimane ipina. Atxiĩti kãkiti ! ikamari maerekati Adão maerekani atoko, kotxi iua ! ikamari Teoso paniãtakiti, iuaritika ikinimane ipina. Kiki Adão inakori axinikasaaki, aimarotari iua Xesosi atoko ininiua.

¹⁵ Txamari aimarotari iua na Xesosi ! atokoni itxaua, kotxi ãtika kiki maerekani xika, itori kãkiti ipina. Iua sikari ipĩkitxi kãkitimoni. Kiki ãtipekana, Xesosi Kristopekana, iua sikari erekari Teoso siãkiti itori kãkitimoni imapinakanina ĩkapani. Teoso siãkiti iiki ! auari. ! Erekarĩ Adão sikakiti. Peerekari Xesosi Kristo siãkiti. ¹⁶ Kiki ãtika Adão inakori kamari maerekati. ãtinoka maerekati ikama, ininiã eereka Teoso sãpiretari imaerekani. Eereka Teoso misiritari iua. Teoso siãkiti ! ikara atokoni itxa. Kãkiti maerekati itori ikamakasaaki, kiki ãtipekana Xesosi sikari Teoso siãkiti kãkitimoni, ininiã ikamaerekatana kãkiti. Iuasaaki imakatzakari ninoa maerekani. ¹⁷ Kiki ãtika, Adão inakori maerekani xika, Teoso txĩkitakari ikinimane ipinini. ! Erekarĩ iua kiki kamakiti. ãti kiki, Xesosi Kristo inakori kamakiti peerekari. Iua txĩkitakari kãkiti ãkixinire katapara inini maerekati imakamakani ĩkapani. Kãkiti ikara atoko inakari Teoso sikari ikinipoko erekari. Itori isika. Itxiĩkitakari iua atão inakari kamakari ininiua. Ia iparĩka iiki ! auari.

¹⁸ Adão kamari ãtinoka maerekati, iuaritika iua maerekati txĩkitakari Teoso misiritinina ikinika kãkiti. Iua atokokana Xesosi kamakiti ãtika txĩkitakari Teoso kamaerekatinina kãkiti ninoa ãtipirika auini ĩkapani. Iuasaaki atãonoka ikamakiti. ¹⁹ Kiki ãtika Adão inakori na kamari Teoso sãkire iaõka, ininiã itxiĩkitakari kãkiti itomaneri maerekati ikaminina. Kiki

ãtipékana Xesosi inakori kamari Teoso sãkire iaõka, ininiã itxãkitakari kãkiti itomaneri atão inakari kamakani ininiuana.

²⁰ Teoso sikari ipaniãtakiti iõkatsopatakori Moisesimoni. Iuasaaki kãkiti imarotari maerekati itori ikamakitiina, ininiã maerekanitxi apiaãpota, kotxi Teoso paniãtakiti iõkatsopatakori auape. Maerekanitxi apiaãpota, iuaritika erekari Teoso sikakiti kãkitimoni apiata. ²¹ Maerekanitxi txãkitakari kãkiti ipinini. Erekari Teoso sikakiti kãkitimoni txãkitakari kãkiti auini ãtipirika imaxipokakani tãkane, kotxi aãũte Xesosi Kristo txãkitakari kãkiti atão inakari kamakari ininiua. Ininiãkara kãkiti auapininiika, kotxi Xesosi Kristo kamaerekatana.

6

!Anirekaikari Maerekati Akamini

¹ Ininiã erekari atxãiti apikomoni maerekati akamini, ikinipoko erekari Teoso sikakiti apiata auini ikapani? ² Konapitini. Teoso makatxakapekari amaerekani, kotxi iuasaaki ! anirekaikari apikomoni maerekati akamini. Anireëkiti maerekati akamini xipope, kãkiti ipinini atoko itxa ixipokini. Ininiã !apakata apikomoni maerekati akamini. ³ Apatxisatiko oerekari Kristo Xesosi nakitiakori aniniua. Iuakata apinini atoko itxa apatxisatiko. Himarotapekari ikara. ⁴ Apatxisatiko oerekari Kristokata ikatakoni atoko aniniua, ininiã ! anirekari apikomoni maerekati akamini. Kristo iri Teoso posotiire õkitikari imi, iuaikana auãki inini ikapani. Peerekari iposotiire. Ininiã apatxisatiko oerekari Xesosi õkitikiko atokokana Teoso õkitikaua ate aãuini amaneri inini ikapani.

⁵ Aãuapika Kristokata, ininiã ãtika atoko atxaua iuakata aãuini, ininiã Kristo ipinini atokokana mitxi aãuini xipope. Kristo iuaikana auini atokokana, aãuini amaneri. Peerekari, kotxi aãuapika Kristokata, ãtika atoko aniniua iuakata. ⁶ Mitxi anireëkiti xipope, kotxi Kristo makatxakari amaerekani aamina Ipiriãmitakari nopini ipikasaaki ate ikapani. Ininiã mitxi anireëkiti posotiire !auaika. Ixipokaãkapeka, kotxi mitxi anireëkiti maerekatinoka. Ininiã maerekanitxi nitiriakori atoko !atxaikaua. Aimarotari ikara. ⁷ Maerekanitxi na paniãtaikari kãkiti ipãkari.

⁸ Kristokata ipãkani atoko aniniã, aimarotari iuakata aãuini apaka. ⁹ Ipikasaaki õkitikaãka, ininiã !ipinaika. Aimarotari ikara. Ipãkitxi na kaposotiireikari iuaikana Kristo ipinini ikapani. ¹⁰ Iua ipina maerekanitxi posotiire ixipokini ikapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireëkitinoka ikamini ikapani. ¹¹ Iua atokotxikana anireëkiti maerekati xipope. Uatxa !anirekaikari maerekati akamini. Uatxa aãuapininiika Teosokata, iua nireëkitinoka akamini ikapani, kotxi Kristo Xesosikata aãuapika.

¹² Ininiã na hãuiritapiri hiõto paniãtinii maerekati hãkamini. Na hãkamapiri maerekati hiõto nireëkiti. ¹³ Na hãuiritapiri hiõto kaminiri maerekati. Na hãuiritapiri hõki kaminiri maerekati. Na hãuiritapiri hinama kaminiri maerekati. Na hãuiritapiri hãuako kaminiri maerekati. Na hãkamapiri maerekati hiõto nireëkiti. Hiteka hãsikauako Teosomoni, kotxi mitxi ipãkani atoko hãtxaua, eereka Teoso txãkitakai auãki iuaikana hinini, ininiã hãsikari hiõto ikinika Teosomoni. Atão inakarinnoka hãkamako hõkiã, hinamaã, hãuakoã, imakinika hiõtoã. ¹⁴ Uatxa maerekanitxi apatrãote atoko !itxaikauako. Uatxa amisiritiko !auaika, Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, iuasaaki imaktxakari amisiritiko.

Atão Inakari Nitiriakori

¹⁵ Ininiã atxãiti hãtxano nota: "Maerekati makama, kotxi amisiritiko !auaika Teoso paniãtakiti iõkatsopatakori amakamakaniã, kotxi ikinipoko erekari Teoso sikakiti aãpakapakasaaki, imaktxakari amisiritiko. Ininiã makamari maerekati," atxa atxãiti. Konapitini. ¹⁶ Himarotari, hãuiritiniãri kãkiti paniãtinii iua nireëkiti hãkamini, ininiã iua hãpatrãote atoko itxaua. Iua nitiriakori atoko hãtxaua, kotxi hãkamari iua paniãtakiti. Maerekanitxi hãpatrãote ininiãua, hãkamari maerekati, ininiã hãpina. Ininiã kona hãua Teosokata ãtipirika. Teoso hãpatrãote ininiãua, iua paniãtakiti hãkama, ininiã atão inakarinnoka hãkama. ¹⁷ Nitxari Teoso: "Erekapitikari atemoni pikamakiti." Ikara atoko nitxari Teoso, kotxi mitxi maerekanitxi nitiriakori atoko hãtxaua. Uatxa maerekanitxi nitiriakori ! hãtxaikaua, kotxi iteene hãkãpitari hõerekiko. ¹⁸ Teoso makatxakapekai hãte, ininiã uatxa maerekanitxi nitiriakori ! hãtxaikaua. Uatxa Teoso nitiriakori hãtxaua, ininiã atão inakarinnoka hãkama. ¹⁹ Ikara atoko nitxa sãkireta hãtemoni, kotxi himarotari nitiritxi, patrão pakini pirena. Himarotakiti poiãoka. Mitxi hãuiritari hiõto kaminiri maerekati inireëkiti. Hãuiritari hiõto apikomoni maerekati ikamaãpotini. Apiaãpota maerekati hãkamakiti. Iuasaaki hiõto maerekanitxi nitiri atoko itxaua. Uatxa hãsikari hiõto Teosomoni atão inakari nitiri ininiua ikapani, ininiã hãkamari atão inakarinnoka. Ininiã Teoso nakitiakorinnoka hãtxaua.

²⁰Maerekanitxi nitiriakori hinakasaakiua, atão inakari nitiriakori na hũtxaua, ininiã atão inakari na paniãtai hũte atão inakarinoka hĩkamini. ²¹İkiripa erekari hãpakapa, maerekati mitxi hĩkamakasaaki? Kona kapakaparei. Uatxa hĩpẽtauaa maerekati mitxi hĩkamakiti xika. Maerekati kamiko xika kãkiti ipina, ininiã kona aua Teosokata atĩpirika. ²²Uatxa maerekanitxi na paniãtaikai hũte. Uatxa Teoso nitiriakori hũtxapekãua, ininiã hĩkamari ikinipoko Teoso İkapani. Ininiã hãuapininiika hũtxako Teosokata atĩpirika. ²³Maerekanitxi kãkiti patrãote atoko itxa. İikitxitari kãkiti parĩkatxi İki, txamari ipĩkitxi itxaua parĩkatxi İki. Teoso sikakiti atemoni atĩão. !Aparĩkauata Teoso sikakiti aãpakapini İkapani, Iuaritika isikaua aãuini atĩpirika inini İkapani, kotxi aãũite Xesosi Kristo ipina ate İkapani.

7

Tanirauatakaro Atoko Atxa

¹Nitariakori, hũte hĩkinika imarotari paniãtakori iõkatsopatakori, ininiã himarotari nisãkire. Kãkiti auapanika inakasaaki, ikĩpitariko paniãtakori iõkatsopatakori. ²Noerekaiko hũte. Paniãtakori iõkatsopatakori paniãtaro sito okaikotini oĩtanirikata iua auapanika inakasaaki. Iua ipininiã, iua paniãtakori na paniãtaikaro oa. ³Oĩtaniri auapanika inakasaaki, atikata oãuiniã, kanokarero otxaua. Oĩtaniri ipininiã, paniãtakori iõkatsopatakori na paniãtaikaro oa, ininiã apakata atikata oĩtaniriuatini. İkara atoko oniniã, kanokarero !otxaua.

⁴Nitariakori, oa sito atokotxikana ate amakinika. Kristo ipina ate İkapani, ininiã Moisesi paniãtakiti iõkatsopatakori kona paniãtaikaua, kotxi uatxa Kristo nakitiakori atxaua. Uatxa Teoso õkitikakiti Kristo nakitiakori atxaua. Iua nakitiakori atxaua, ininiã erekari akama Teoso İkapani. ⁵Mitxi anireẽkiti maerekati paniãtaua maerekati akamini. Aĩto nirekari maerekatinoka ikamini, kotxi paniãtakori iõkatsopatakori txari: "Kona hĩkamapiri maerekati." Ininiã iusaaki apiata anirekari maerekati akamini, kotxi maerekatinoka kamakani atxaua. Ininiã apina, ininiã kona aãuapika Teosokata. ⁶Mitxi paniãtakori iõkatsopatakori nirekari ipaniãtinua. Uatxa paniãtakori iõkatsopatakori na paniãtaikaua. İkara kitxakari. Uatxa amaneri, kotxi uatxa aparĩkauata Teoso İkapani. Erekari Matamatakoti oerekaua aparĩkauatini Teoso İkapani.

Teoso Paniãtakiti Iõkatsopatakori

⁷Ininiã natokopa itxa uatxa axinikakiti? Teoso paniãtakiti iõkatsopatakori maerekati itxaua atxĩiti? Konapitini. Maerekati !itxaua. Teoso paniãtakiti iõkatsopatakori mauakanimako, nota limarotamariko maerekati nikamini. Teoso paniãtakiti iõkatsopatakori txari: Kona pinirekapiri atĩ nakiti, ininiã atĩ nakiti ninirekiniã, nimarotari nikaminiri maerekati. ⁸Maerekati xika na nota nirekari ikara Teoso paniãtakiti nikamini. Ininiã iteene ninirekari apanakini nakiti. Ninirekari apanakini nakiti, kotxi Teoso paniãtakiti iõkatsopatakori txari: Kona pinirekapiri atĩ nakiti.

Teoso paniãtakiti iõkatsopatakori mauakanĩã, iusaaki maerekati !auari. ⁹Teoso paniãtakiti iõkatsopatakori nimimarotakanisaaki, na nimarotari maerekati nikamini. Niuãkatarĩ nãkixinire auãki inini. Teoso paniãtakiti iõkatsopatakori nimarotakasaaki, nimarotari maerekati nikamini. Iusaaki nimarotari nipinini nimaerekani xika. ¹⁰Iusaakipeka nimarotari nãkixinire ipĩkari atoko inini. Teoso paniãtakiti iõkatsopatakori oerekari kãkiti erekari ikamini, iua auini İkapani. Txamari Teoso paniãtakiti iõkatsopatakori oerekano nota nipinini nimaerekani xika. ¹¹Maerekati ninireẽkiti misirienetano. İmisirienetano, ininiã na nikamari Teoso paniãtakiti iõkatsopatakori iaõka. Ininiã nikamari maerekati. Ininiã maerekati xika nipina.

¹²Teoso paniãtakiti iõkatsopatakori !auari maerekati, kotxi Teoso kamari. Atãonoka itxa Teoso paniãtakiti. Erekari. ¹³Atxĩiti erekari txĩkitakano nipinini? Konapitini. Maerekanitxi txĩkitakano nipinini. Maerekanitxi txĩkitakano Teoso paniãtakiti iõkatsopatakori erekari nimakamakarĩ, ininiã nikamari maerekati, ininiã iua maerekanitxi txĩkitakano nipinini. Ininiã aimarotari maerekanitxi kona xatiki apakata. Maerekatinoka, kotxi maerekanitxi txĩkitakano nipinini. Teoso paniãtakiti iõkatsopatakori oerekaua ikara atoko inakari.

¹⁴Aimarotari Teoso paniãtakiti iõkatsopatakori iaxiti İkari ininiua. Txamari nota uaikirino. Maerekanitximonĩ vẽtxitakori atoko nitxaua, maerekanitxi nitiri atoko nininiua İkapani. ¹⁵Na nimarotari nikamakiti, kotxi na nikamari notaka nireẽkiti. Nikamari nimanirekakini, nomanatakiti. ¹⁶Ininiã maerekati nimanirekakini nikamakasaaki, iusaaki nimarotari Teoso paniãtakiti iõkatsopatakori ereka inini. ¹⁷Ininiã na notani kamari maerekati. Maerekati nãkixinireẽ auakarira txĩkitakari nikaminiri iua maerekati. ¹⁸Nimarotari erekari !auari nãkixinireẽ. Maerekatinoka aua nãkixinireẽ, kotxi ninirekari erekari nikamini, txamari !niposotari. ¹⁹Na nikamari erekari ninireẽkiti. Nikamapikari

maerekati nimanirekakiniti. ²⁰ Ininiã nimanirekakiniti nikaminiã, kona notani kamari. Maerekati nãkixinireẽ auakarira txĩkitakano iua maerekati nikamini.

²¹ Ininiã ia sãkiretxiti atão: Ninirekasaakiri erekari nikamini, maerekatinoka niposota nikamini. ²² Nãkixinireẽ iteene ninirekari Teoso paniãtakiti iõkatsopatakori iaõka nikamini. ²³ Txamari aua ãti ninireẽkiti niõto ãki. Iua niõto nireẽkiti nirekari ixipokiniri nãkixinire nireẽkiti. Iua niõto nireẽkiti xika nikamari maerekati nireẽkitinoka. !Niposotari erekari nikamini. Kateia ãki iaxirikakoni atoko nitxa. ²⁴ !Erekano nota. Maerekati kamakarino nota. Kipa makatxakano, maerekati niõto nireẽkiti nimakamakani ikapani? Niõto txĩkitakano nipinini. Kipa moianatano? ²⁵ Aãũite Xesosi Kristokara moianatano. Iuara makatxakano nimapinakani ikapani. Peerekari Teoso, kotxi iua kamari ikara atoko nota ikapani.

Ininiã uatxa ia atoko inakari nisãpiretai. Nãkixinireẽ ninirekari Teoso paniãtakiti iõkatsopatakori nikamini. Txamari niõtoã maerekanitxi nireẽkitinoka niposota nikamini.

8

Erekari Matamatakoti Txĩkitakari Aãkixinire Auãki Inini

¹ Ininiã uatxa Teoso ! itxaikaua ate: “Maerekati hĩkamakiti xika nimisiritaiko hĩte,” ! itxaikaua ate, kotxi Kristo Xesosi nakitiakori atxapekaua. ! Akamaikari aõto nireẽkiti. Erekari Matamatakoti sikaposotiiretaua iua nireẽkiti akamini. ² Erekari Matamatakoti nireẽkiti akama, ininiã iua txĩkitakari aãkixinire auãki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireẽkiti nikamini, ininiã na nipina. ³ Aõto maerekani xika Teoso paniãtakiti iõkatsopatakori ! iposotari imakatxakiniri amaerekani, kotxi ! aposotari akaminiri iua paniãtakiti. Iuaritika Teoso makatxakari amaerekani, kotxi iua iokanatarari imi atemoni. Imi ãto ate ãto atoko, maerekati kamakari ãto atoko itxa. Teoso iokanatarari imi atemoni ipinini ikapani, amaerekani imakatxakiniri ikapani. Ininiã ixipokari maerekati posotiire aõtoã auakari. ⁴ Teoso kamari ikara, ininiã Xesosi kamari ikinika Teoso paniãtakiti iõkatsopatakori iaõka ate ikapani, kotxi ipaniãtakiti atão inakarinnoka. Ininiã !akamaikari maerekati aõto nireẽkiti. Akamari Erekari Matamatakoti nireẽkiti.

⁵ ãtotxi nireẽkiti kamakani xinikapikari ãtona nireẽkitinoka. Erekari Matamatakoti nireẽkiti kamakani xinikapikari Erekari Matamatakoti nireẽkitinoka. ⁶ Kãkiti xinikiniãri ãto nireẽkitinoka, ixinikakiti txĩkitakari iua ipinini, ininiãkara kona auapika Teosokata. Kãkiti auiritiniãri Erekari Matamatakoti txĩkitakiniri ixinikiniri Erekari Matamatakoti nireẽkitinoka, iua auapininiika Teosokata. Erekaxinireri iua. ⁷ Kãkiti xinikiniãri ãto nireẽkitinoka, Teoso mokaiakariakori itxauana, kotxi ! inirekarina Teoso paniãtakiti iaõka ikaminina. ! iposotarina Teoso paniãtakiti iaõka ikaminina. ⁸ ãtotxi nireẽkitinoka kamakani liposotari ikamapoxokonitininina Teoso.

⁹ Hĩtepekana, Erekari Matamatakoti hãkixinire auiniã, hĩkamari iua paniãtakiti. ! Hĩkamari maerekati hĩto paniãtakiti. Erekari Matamatakoti kãkiti aãkixinireẽ mauakanisaaki, na Kristo nakitiakori ! itxauana, kotxi Erekari Matamatakoti Kristo nakiti itxaua. ¹⁰ Hĩto ipinapitkako maerekati xika, iuaritika hĩxinire auãkiri itxaua Kristo hãkixinireẽ auiniã. Hĩxinire auãkiri itxaua, kotxi Kristo kamari atão inakarinnoka ate ikapani. ¹¹ Teoso õkitikari Xesosi, iua ipikasaaki. Erekari Matamatakoti Teoso nakiti hãkixinireẽ auiniã, Teoso Kristo õkitikakari, txĩkitakariko hĩto ipinakarari iuaãkana auãki inini, kotxi Erekari Matamatakoti Teoso nakiti aua hãkixinireẽ.

¹² Ininiã nitariakori, auapitika akamakiti tĩkane Teoso ikapani. ! Auari akamakiti tĩkane aõto nireẽkiti akamini ikapani. ¹³ Hĩto nireẽkiti hĩkaminiã, hĩxinire ipikari atoko itxa, ininiã ãtipirika kona hãua Teosokata. Hamananiãri Erekari Matamatakoti maerekati hĩto kamakiti ixipokini, iusaaki hãuapika ãtipirika Teosokata.

¹⁴ Erekari Matamatakoti nireẽkiti kamakani, Teoso anaakori itxauana, kotxi Erekari Matamatakoti Teoso nakiti. ¹⁵ Iua Erekari Matamatakoti Teoso sikakiti hĩtemoni. ! Itxĩkitakai nitiritxi kapikareri hininiua. Itxĩkitakai Teoso anaakori hininiua. Erekari Matamatakoti posotiireẽ aãkiritari aõri Teoso: “Papai, niri,” atxari. ¹⁶ Erekari Matamatakoti sãpiretaua aãkixinireẽ Teoso anaakori aniniua. ¹⁷ Teoso anaakori aniniãua, aãpakapariko erekari Teoso nĩkatakiti ate ikapani. Kristo apakapari erekari Teoso nĩkatakiti iua ikapani, ininiã ate apakapari iuakata. Kristo misiritaãkapeka. Ate misiritiko apaka auiniã Kristo sãkire aãuikini xika, Kristo ikinimane auite inakasaãkiua, ate apaka aua iuakata iusaaki. Aãtamatarari iua iotximere. Peerekari iusaaki iuakata aãuini.

Aãpakapariko Ikinipoko Erekari

¹⁸ Uai itixi aãuakasaaki, aãtatsiirauata. Eereka ! axinikaikari mitxi aãtatsiirauatini, kotxi Teoso oerekauako ikinipoko erekari. Iusaaki peerekari. ¹⁹ Ikinipoko Teoso kamakiti iãtapari ipoxokoniritika Teoso keto õti. Iusaaki aimarotari Teoso anaakori. ²⁰ Kotxi

ikinipoko Teoso kamakiti misiritaākapeka, ixipokaāpotini tūkane. Ikinipoko Teoso kamakiti ixinireka !ixipokaāpota. Teoso txikitakari ikinipoko xipokaāpotini. Iuaritika aimarotari, ipīkitxi xipokini ōti apokapitikako. ²¹ Ikinika Teoso kamakiti iātapari iua ōti. Iuasaakiko itixi amaneri itxauako. !Xipokaika. Iuasaaki ikinika amaneri. !Xipokaika. Teoso anaakori misiritiko !auaika. Peerekari iuasaakiko.

²² Aimarotari uatxapiikama ikinika Teoso kamakiti atatsiirauata, amarini tsii sito atatsiitini atokokana. ²³ Na itixi Teoso kamakitinanini atatsiirauata. Aākixinire apaka akiripireta, kotxi anirekari Teoso keto apokini. Iuasaaki iua apakapaua ate iua anaakori. Iuasaakiko aīto amaneri isikaua. Iuasaakiko aīto !kaxiporeikari. Merepanika Teoso sikakiti auapeka atemoni, kotxi iua sikapekari Erekarī Matamatakoti atemoni. ²⁴ Teoso makatzakapekari amaerekani, aāuikasaakiri isākire. Ininiā aiātapari apikomoni isikaenetakiti atemoni. !Aāmatapanikari isikaenetakiti, ininiā aiātapapanikari. Aāuikapitikari isikaenetakiti isikiniua, ininiā atāo aāuikiniri. ²⁵ Aiātapari aāpakapakiti tūkane. !Aāpakapanikari, iuaritika aiātapari apoxokoniritika, kotxi aimarotapitikari ikara apokini.

²⁶ Erekarī Matamatakoti moianataua, kotxi na kataparaxinireua. !Aimarotari aamanaākiti tūkane, Teoso amisākiretakasaaki. Iuaritika, Erekarī Matamatakoti misākiretari Teoso ate ikapani. Asākireē !aposotari asāpiretiniri Teoso ikinika anireēkiti, ininiā Erekarī Matamatakoti misākiretari Teoso ate ikapani. Ipinimoni itxa isāpiretiniri Teoso. Kākiti sākireē !isākirauata Teosokata. ²⁷ Teoso imarotari kākiti ākixinire, ininiā iua imarotari Erekarī Matamatakoti xinikakiti, kotxi Erekarī Matamatakoti misākiretari Teoso, Teoso nakitiakori ikapani. Erekarī Matamatakoti amanaāri Teoso, Teoso nireēkiti ikaminana inakitiakori.

Teoso Iteene Tiretiniua

²⁸ Aimarotari ikiniōtika erekari ikaminaua ate, kotxi iua tirketani, iua mereēkini atxaua ate. Iuaritika aātatsiirauatini auapitika. Iuaritika iuasaaki apaka erekari ikaminaua. Iua mereēua, kotxi nirekari imereiniua. ²⁹ Itixi kamiko apisapanika Teoso imarotapekua ate. Iua mereēpekua ate, iua anaakori kaiāopokori aniniua ikapani. Imereēpekua, imi Xesosi atoko aniniua ikapani. Ininiā Xesosi aītari apiari. ³⁰ Teoso akiritana imereēkini. Apaka ikamaerekatana iua mereēkini. Apaka itanapoko erekari isika ninoa ikamaerekatanimoni.

³¹ Teoso kamari ikinipoko ikara erekari ate ikapani, ininiā natokopa itxa axinikakiti? Teoso kataparari moianatapitikaua, ininiā ate omanatakani tapara poiāoka. ³² Teoso sikari ikinipoko atemoni. Imi apaka isika atemoni, kotxi ipina ate akinika ikapani. Isikari imi atemoni, ininiā aua atxiīti iua masakakiniti atemoni? !Auari. Ikinipoko erekari isikapitikaua atemoni. Ikarone !auari. ³³ Aua atxiīti Teoso mereēkini maerekani sāpiretakari? !Auari. Teosora sāpiretari ninoa maerekani mauakani, kotxi iua kamaerekatapekana ninoa. ³⁴ Aua atxiīti Teoso mereēkini misiritiko sāpiretakari? !Auari. Kotxi Kristora misākiretari Teoso ate ikapani, kotxi Teoso ikikomoni auakari itxaua. Iua ipina ate ikapani, ininiā eereka Teoso ōkitikari iua, auapika inini ikapani. Iuara misākiretari Teoso ate ikapani. ³⁵ Ininiā kipa atxiīti iotokakatarī Kristo tiretiniua? !Auari, kotxi amaxikikosaaki, Kristo tiretapanikaua. Amaurenisaaki, Kristo tiretapanikaua. Amisiritikosaaki, Kristo tiretapanikaua. Natxi auakasaaki, Kristo tiretapanikaua. Amamākanisaaki, Kristo tiretapanikaua. Monōkari auakasaaki, Kristo tiretapanikaua. Neenamatzī auakasaaki, Kristo tiretapanikaua. ³⁶ Teoso sākire iōkatsopatakori txari:

Pisākire aāuikini xika, pamonōkoniri ikiniōtika. Aōkiko monōkoni auapika. Soti auīte apanakini okini atoko, apanakini nirekari okiniua ate,

itxa Teoso sākire iōkatsopatakori. ³⁷ Maerekati ikara atoko aua, iuaritika iteene akāiata, kotxi atiretakiri sikataparataua. ³⁸ Ia nimarota. Kristo tiretiniua iotokakakari !auari. Apīkasaaki, itiretapanikaua. Aāuapanika inakasaaki, itiretapanikaua. Teoso nitiriakori iaxititini !iotokakari itiretiniua. Satanasi nitiriakori !iotokakari itiretiniua. Ikorasaaki auakani, katana auakani apaka !iotokakari Kristo tiretiniua. !Auari posotiiretxi, Kristo tiretiniua iotokakakari. ³⁹ Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniāri Teoso tiretiniua iotokakakari, !hāpokari. Hinitiniāri ikinika Teoso kamakiti auiniātaā, iuaritika kona hāpokari Teoso tiretiniua iotokakakari. !Auari. Aāuīte Kristo Xesosi oerekaua Teoso iteene tiretiniua.

9

Teoso Mereēna Xoteoakori Inakitiakori Ikapani

¹ Atāo nisākire. Kristo nakiti nitxaua, ininiā na nisāpiretari misirieneretxi. Nākixinireē nimarotari nisākire atāo inini, kotxi Erekarī Matamatakoti oerekari nisākire atāo inini.

² Ia nisākire atāo. Iteene nimatinaniuatapika. Nākixinireē maerekaxiniretinoka nitxa, ninirimane Kristo sākire mauikakani xika. ³ Ninirekamari Teoso misiritinina nota, ninoa

nitariakori imamisiritakani ĩkapani. Ninirekamari Kristo manirekakanino nota, ninirimane Kristo nakitiakori ininiuua ĩkapani. Niposotiniāri ikara atoko nikamini, nikamari ninirimane ĩkapani. Txamari !niposotari. ⁴ Ninirimane Isaeo apika mekaniriakori itxauana. Teoso nirekana ninoa iua anaakori ininiuana. Teoso oerekari iposotiire ninoamoni. Isāpiretana ninoa ikamaenetakiti ninoa ĩkapani. Isikari ipaniātakiti iōkatsopatakori ninoamoni. Oerekana ninoa kiiniri atāo ikaminina, iuakata isākiraatakasaakina. Teoso sāpiretana ninoa ikamakiti tũkane ikinimane kākiti ĩkapani. ⁵ Ninirimane apika atokiriakorini Apraōma, Isakima, Isaeoma pakini. Kristo uaimoni iponaniākasaaki, ninoa apiko mekaniri itxaua, iuaritika Teoso itxaua. Ikinimane auĩte itxaua. “Peerekai,” matxari iua ātipirika. Ameē.

⁶ Atxiĩti Teoso kona kamari ikamaenetakiti Isaeo apika mekaniriakori ĩkapani? Ikamapitikariko. Txamari kona ikinikani Isaeo apika mekaniriakori Teoso nakiti !itxauana. ⁷ Kona ikinikani Apraōo apika mekaniriakori atāo Teoso anaakori !itxauana, kotxi Teoso txari Apraōo:

Papika mekaniriakori atāo inakani Isaki mekaniriakori itxauana.

⁸ Teoso sāpiretari Isaki auini, iua auini apisapanika. !Isāpiretari āti Apraōo ākiri Isimaeo inakori auini, iua auini apisapanika. Isimaeo iponaniā, kotxi Apraōo sirĩka Isimaeo inorokata. Ininiā kākiti Isimaeo atoko, Teoso anaakori !itxauana. Teoso sāpiretari Apraōo iua keene inini, ininiā isikaenetakininoka atāo Apraōo apika mekaniriakori itxauana.

⁹ Teoso sikaenetari Apraōo keene inini. Itxari:

Niketo manapi nikanapiriāko. Iuasaaki Sara keeneroko. Kiki oenetako.

¹⁰ Apikomoni nisāpiretai. Hepeka anaakori iri ātika. Aāpika atokirini itxaua Isaki inakori. ¹¹⁻¹² Oa anaakori iponaniā ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sāpiretaro oa:

Merepanika iponaniākari eereka iponaniākari nitiri itxauako.

Ininiā Teoso mereēri iua eereka iponaniākari Xakoo inakori apiari inini ĩkapani, iua auini apisapanika. Ininiā na Xakoo kamakitinini tũĩkitakari Teoso mereiniri iua. Teoso mereēri iua, kotxi inirekari ikara atoko inini. ¹³ Teoso sākire iōkatsopatakori txari:

Xakoo nitireta. Isaoo nomanata.

¹⁴ Ikara atoko ininiā, kanatokopa itxa axinikakiti? Atauako Teoso na kamari erekari? Ikamapitikari erekari. Ātipirika Teoso kamari erekari. ¹⁵ Teoso txari Moisesi:

Ninirekiniāri āti niamonĩkini, niamonĩkari. Ninirekiniāri āti nimoianatini, nimoianatari.

¹⁶ Ikara atoko ininiā, anireēkiti !itxĩkitakari Teoso mereiniuua. Akamakiti !itxĩkitakari Teoso mereiniuua. Imereēua, kotxi iamonĩkaua. ¹⁷ Teoso txari Paraoo isākire iōkatsopatakoriā:

Nota tũĩkitakai auĩteti pininiuua, niposotiire noerekini ĩkapani, niuāka ikini itixiti auakani imarotini ĩkapani,

itxa Teoso sākire iōkatsopatakori. ¹⁸ Ininiā Teoso nirekiniāri iamoniĩniri āti, iua amoniĩkari iua. Apaka inirekiniāri, itxĩkitakari āti ākixinire kaikoxinire inini, Teoso nireēkiti imanirekakanini tũkane.

Teoso Omanākare, Iamonĩkare Pakini

¹⁹ Atxiĩti hĩte txano nota: “Teoso ikara atoko ininiā, na ate xikani kaikoxinireua ate. ! Aposotari akaminiri Teoso manirekakiniti,” atxiĩti hĩtxano. ²⁰ Txamari !apakata ia atoko hinini. Kiriparai hĩte ikara atoko ina sākiretakani Teosomoni? Kākiti hĩtxaua. Teoso kamakiti pitxaua. Atauako kamakori posotari ikamakirimoni: “Kinirepa pikamano nota ia atoko ninini?” !Apakata ikara atoko hinini hĩkamakirimoni. ²¹ Hixinikari kiki tũitxi kamakari. Ikamari inireēkiti. Atxiĩti āti porii katsariā, ikamari ipi kopiti. Atxiĩti ianaka ikamari āti kopiti, peereri inini, kiiniri ĩkapani. Atxiĩti ātipekana ikama patimari poiāo ereri, ikiniōtika iāriā iātiko ĩkapani.

²² Ikara atoko itxa Teoso kaminiri kākiti. Teoso kamari apanakini kākiti Teoso omanākare imarotinina ĩkapani imaerekanina xika. Iuasaaki oerekana iposotiire imarotinirina ĩkapani. Teoso omanatana ninoa, iuaritika imĩteenekana. Kona uatxa ixipokana ninoa. Txamari iketo manapi ixipokanako ninoa. Uatxa imĩteenekapanikari ninoa maerekani. ²³ Apaka ikamari apanakini iua amoniĩkani. Uatxa imĩteenekari iua omanatakini maerekani, kotxi inirekari iua amoniĩkani imarotiniri iua ereka inini, kotxi peerekari iua. Iteene itiretari iamoniĩkani. Ikamana ninoa erekari isakakiti apakapinina ĩkapani. ²⁴ Hĩte, ate pakini, iua amoniĩkani atxaua. Iua akiritakini atxaua. Na Xoteonanini akirita. Akiritana Xoteo minakanuua apaka. ²⁵ Teoso sākire iōkatsopatakori, Osēia iōkatsopatakitiā, Teoso sāpiretari ikara. Itxari:

Kākiti mitxi nota nakitiakori minakonimoni nitxako: “Uatxa nota nakitiakori hĩtxapekauako.” Ninoa mitxi nimatiretakinitimoni nitxako: “Uatxa nota tiretakini hĩtxapekauako,” nitxako.

²⁶ Mitxi Teoso txana ninoa: “Na nota nakitiakorini !h̄txaua.” Ikara Teoso s̄akiretinītaā, iuaātaātxikana: “Teoso ātipirika auāki inakari anaakori h̄txaua,” inaāka ninoamoni, itxa Teoso s̄akire iōkatsopatakori.

²⁷ Apaka Teoso s̄akire iōkatsopatakoriā, Isaía txari:

Isaeo apika mekaniriakori kaiāopokori, potxoari uiniti kipatxite atoko itxana, txamari poiōnoka makatxakaāka imapinakani ikapani.

²⁸ Patimari Teoso xipokiniri ipar̄ika imisiritiniri k̄akiti imaerekani xika,

itxa Isaía. ²⁹ Mitxipeka Isaía txari:

Apiananiri kaposotireri n̄katari apanakini aāpika mekaniriakori imapinakani ikapani.

Ininiā atenape auapanika. Teoso man̄katakanimauako, axipokapiimako k̄akiti Sotoma sitatxiti auakani xipokini atoko, k̄akiti Komoha sitatxiti auakani xipokini atoko atxapiimako,

itxa Isaía s̄akire.

Xoteo Mauikakaniri Teoso S̄akire

³⁰ Ininiākara aimarotari ia: Xoteo minakaniua manitakanisaakiri Teoso tx̄ikitakinina atāo inakari kamakani ininiuana, iusaaki Teoso tx̄ikitakana atāo inakari kamakani ininiuana, kotxi auikarina Teoso s̄akire. ³¹ Txamari Xoteoakori nitaāpotari paniātakori ninoa atāo inakari kamakani tx̄ikitakari, txamari !apokarina. ³² Kinirepa !apokarina ikara? Kinirepa Teoso na tx̄ikitakana ninoa atāo inakari kamakani ininiuana? Kotxi !auikarina is̄akire. Inirekarina ipar̄ikana tx̄ikitakinina atāo inakari kamakani ininiuana. !Nirekarina auikinirina Xesosi s̄akire. Ninoamoni Xesosi kai kimapori nopini auakari atoko itxa, kotxi kai xika k̄akiti m̄akitita. ³³ Teoso s̄akire iōkatsopatakori kitxakapir̄ikari s̄apiretari ia kai pirena. Itxari:

Pikenakotariko ia: Nota iokanatakiti k̄akitimoni kai atoko itxa. Nitakari iua kai Siāo sitatxitiā Xoteoakori kimaporeē. Iua kai xika k̄akiti m̄akitita. Iua kai xika k̄akiti irika. Iuaritika iua s̄akire auīākani !ip̄etauata nota apisatoō.

10

¹ Nitariakori, n̄kixinireē iteene ninirekari Teoso makatxakiniri ninirimane maerekani, Isaeo apika mekaniriakori maerekani. Nimis̄akiretari Teoso ninoa maerekani makatxakiko ikapani. ² Nimarotari ninirimane iteene nirekiniri ipar̄ikauatini Teoso ikapani. Txamari ninoa kerokari, kotxi !imarotarina atāo ipar̄ikauatini Teoso ikapani. ³ !Imarotarina Teoso tx̄ikitakiniri k̄akiti atāo inakari ikamini. Ninoaka nirekamari atāo inakari ikaminina, Teoso apakapinina ikapani. Ininiā !auritarina Teoso tx̄ikitakinina ninoa atāo inakari ikaminina. ⁴ Kristo kamari ikinipoko Teoso paniātakiti iōkatsopatakori iaōka, ininiā iuanoka tx̄ikitakari ikinimane k̄akiti iua s̄akire auīākani atāo inakari ikaminina.

Apiananiri Akiritakani

⁵ Kitxakapir̄ika Moisesi s̄apiretari atāo inakari akamini Teoso paniātakiti. Iusaaki itxari: Ikinika Teoso paniātakiti iōkatsopatakori ikiniōtika pikaminiā, pauapininiika pitxako, itxa Moisesi s̄akire. ⁶ Txamari !aposotari ikara atoko akamini. Aauikasaakiri Xesosi s̄akire, iua tx̄ikitakaua atāo inakari akamini. Ininiākara !apakata p̄kixinireē pixinikiniri: “Kipa atxiiti posotari laxiti apiko nopinixitimoni isini, Kristo notamoni iminini ikapani?” ⁷ !Apakata p̄kixinireē pixinikiniri: “Kipa atxiiti posotari ip̄ikani auiniātaā isini, Kristo notamoni iminini ikapani?” ⁸ Xesosi s̄akire auape h̄itemoni. Na h̄isa ātiātaā iua s̄akire himarotini ikapani. Hinamaāpekari. H̄kixinireēpekari. Xesosi s̄akire auikiko as̄apiretapikari k̄akiti. Ia atoko as̄apiretari k̄akiti: ⁹ Pinamaā, “Xesosi niauīte” pininiā, p̄kixinireē pauikiniāri Xesosi ipinini Teoso ōkitikiniri iua, iusaaki pimaerekani makatxakaāka. ¹⁰ Kotxi ākixinireē Xesosi s̄akire āuikiniā, ikamaerekataua. Anamaā “Maerekiti kamakarino nota,” aniniā, iua makatxakari amaerekani. ¹¹ Teoso s̄akire iōkatsopatakori txari:

Iua s̄akire auīākari p̄etauatini !auari.

¹² Iua Kristo s̄akire auīākari atxiiti Xoteo itxaua. Atxiiti Xoteo minakatua itxaua. Xoteo auīte itxaua Kristo. Xoteo minakaniua auīte apaka itxaua. Ikinimane auīte itxaua Kristo Apiananiri. Isikari itanapoko erekari ikinimane iua akiritakanimoni. ¹³ Teoso s̄akire iōkatsopatakori txari:

Ikinimane akiritiniāri Apiananiri uāka imaerekanina imaktxakini ikapani, iusaaki imaktxakaākako imaerekanina.

¹⁴ Kiātokopa itxa ninoa akiritiniri iua, is̄akire imauikakanisaaki? Kiātokopa itxa ninoa auikiniri is̄akire, imakenakotakanisaakirina? Kiātokopa itxa ninoa kenakotiniri is̄akire, imas̄apiretakonisaakina? ¹⁵ Kiātokopa itxa Teoso iokanapirena s̄apiretiko, ate maiokanatakaniāri iua s̄akire s̄apiretakani k̄akitimoni? Teoso s̄akire iōkatsopatakori txari:

Erekapitkari Teoso iokanapirena erekari sãpiretakani apokini kãkitimoni, kotxi isãpiretarina Teoso kamaerekaxiniretiniri kãkiti. Isãpiretarina erekari Teoso sikakiti kãkitimoni. Ikara iminapiretakitina kamapoxokonitari kãkiti.

¹⁶ Txamari na ikinimane kãkitini auikari Teoso iokanapirena erekari. Kotxi kitxakapirĩka Isaia txari:

Apiananiri, asãpiretamari piokanapirena kãkitimoni, txamari !auikarina, itxa Isaia. ¹⁷ Kãkiti kenakotakasaakiri Teoso iokanapirena, Teoso txĩkitakari kãkiti auikiniri isãkire. Kristo sãkire akenakotakasaaki, akenakotari Teoso iokanapirena.

¹⁸ Txamari nota pimaã: "Atauako Xoteo kona kenakotari Teoso iokanapirena?" Ikenakotapitikarina, kotxi Teoso sãkire iõkatsopatakori txari: Iaxiti apiko nopinixiti auakari oerekari Teoso ikini itixiti auakani. Teoso sãkire atoko itxa iaxiti apiko nopinixiti auakari oerekakiti.

¹⁹ Iuaĩkana nipimaã: "Atauako Xoteo !imarotari Teoso iokanapirena?" Imarotapitikarina. Moisesi sãpiretpekari Teoso sãkire. Itxari:

Nimakatxakari Xoteo minakanuia maerekani, ininiã nitxĩkitakaiko hĩte hĩxikotinina ninoa mitxi nota nakitiakori minakanuia. Nitxĩkitakai hĩte homanãkarauatini, ninoa mitxi mimaroreni xika.

²⁰ Isaiapekana sãpiretari Xoteo minakanuia pirena. Isãpiretari Teoso sãkire itaparaxinireritika:

Teoso txari: "Ninoa nota manitakani aõkitano nota. Nimotika nota makiritakanimoni."

²¹ Apikomoni isãpiretari Teoso sãkire Xoteo kamakiti:

Teoso txari: "Ikiniõtika namanaãri ninoa kanapiriini notamoni, txamari ! ikĩpitarina nisãkire. !Ikamarina nisãkire iaõka. Inireẽkitinoka ikamana."

11

Xoteo, Teoso Sãkire Auiãkani

¹ Ininiã nipimaã: "Atauako Teoso !inirekaikari Xoteoakori?" Inirekapitikana. Nota apaka Xoteo nitxaua. Apraõ apika mekaniri nitxaua. Pẽxamiĩ apika mekaniri nitxaua. ² Teoso !itakanapari Xoteoakori. Iua mereẽna ninoa itixi kamiko apisapanika. Himarotari Teoso sãkire iõkatsopatakori, Erĩasi tsoatakasaaki Teosomoni Xoteo maerekani isãpiretakasaaki. ³ Iuasaaki Erĩasi txari:

Apiananiri, ninoa okapekari kãkiti pisãkire sãpiretakani. Ikapirinikarina amesa pinakiti pitemoni sikakori takikoãtaã. Notanoka pisãkire sãpiretakarino auapanika. Ninoa asikatikinitano nota okinino ikapani,

itxa Erĩasi. ⁴ Kanatokopa Teoso apakapapiretari Erĩasi? Teoso txari:

Kona pitenanini auikari nisãkire. Nota nĩkatari setxi mio kikiakori nota nakitiakori. Ninoa kona teosonetari kãkiti kamakiti Pao inakori. Kona ikapotoreẽkauana iua apisatoõ, Teoso txari Erĩasi. ⁵ Ikara atokotxikana uatxa. Aua apanakini kãkiti Teoso mereẽkini. Imereẽna ninoa, kotxi iua nirekari ikinipoko erekari ikaminina ninoa. ⁶ Maerekati kamakani kãkiti, iuaritika Teoso mereẽua ate. Isikari ikinipoko erekari ate ikapani maxikatĩka. Aparĩka ! itxĩkitakari iua sikiniri ikinipoko erekari atemoni. Aparĩka txĩkitakiniãri ikinipoko erekari isikiniua, ininiã kona maxikatĩka isikaruata atemoni.

⁷ Ininiã kanatokopa atxa asãkire apikomoni? Xoteoakori kona apakapari inireẽkitina. Inirekarina Teoso apakapinina ninoa erekarini ininiuana. Teoso mereẽkininoka apakapari ikara inakari. Apanakinipekana Teoso !aurita atão imarotinina. Mõsiãreni atoko itxana.

⁸ Teoso sãkire iõkatsopatakori txari:

Teoso txĩkitakari ninoa ãkixinire imakakari atoko inini, iua sãkire imimarotakanina ikapani. Kokipitikamana, iuaritika !atamatarina Teoso kimapore. Kakenakokipitikamana, iuaritika inirekarina Teoso sãkire ikĩpitinina. Uatxapiima ikara atoko itxapanika, itxa Teoso sãkire iõkatsopatakori. ⁹ Kitxakapirĩka Tavii txari Teosomoni:

Ninoa kiena kaiãopokori. Inipokotakasaakina, iuãkatarina pite apokaerekatinina ninoa, kotxi kaiãopokori ikienana. Ikienana takapiri atoko itxa imaĩkinina ninoa. Itxĩkitakana ikerokinina. Ikara xika ninirekari pimisiritinina.

¹⁰ Ninirekari ninoa mõsiãreni atoko ininiuana, ininiã na atão atamatarina pikimapore. Kãkiti tiitxi minari porikitakani atoko pitxĩkitakanako ninoa ãtipirika, itxa Tavii sãkire.

Xoteo Minakanuia Maerekani Makatxakiko

¹¹ Iuaĩkana nipimarauata: "Atauako Xoteoakori maerekani xika Teoso xipokana ninoa?" Konapitini. Xoteoakori kamari maerekati, ininiãkara Teoso sãpiretari Xoteo minakanuia imaerekanina imaktxakini, Xoteo xikotinina ikapani, iuaĩkana Teosomoni ikanapiriinina ikapani. ¹² Xoteoakori kamari maerekati, ininiãkara Teoso sikari erekari kĩkiri apanakini

itixi auakanimoni. Xoteo mapakapakiniti Xoteo minakanuia apakapa erekari kiikiri. Ininiã Xoteo kanapiriãkasaaki Teosomoni, iusaaki apiaerekata Teoso sikakiti kãkitimoni.

¹³ Uatxa nota misãkiretai hïte Xoteo minakanuia, kotxi Teoso iokanatanano nota hïtemoni isãkire nisãpiretini ikapani. Niulikari hïtemoni niokanatiko. ¹⁴ Ikara atoko ininiã, atxiiti ninir- imane Xoteo xikotai hïte, ininiã atxiiti apanakini ninoa kanapiriã Teosomoni, imaerekan- ina Teoso makatzakini ikapani. ¹⁵ Teoso takanapakasaakiri Xoteo, iua apakapari Xoteo minakanuia, ininiã ninoa Xoteo minakanuia kanapiriã Teosomoni. Teoso iuaïkana apaka- pakasaakiri Xoteoakori, iusaakiko peerekari. Ipïkani iuaïkana auãki inini atoko itxako.

¹⁶ Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiua. Aamina kotsa Teoso nakiti ininiã, imina pori apaka iua nakiti.

¹⁷ Xoteoakori oriva mina takakori atoko itxa, takakori Teoso nakiti. Átikaka ipori kap- atakaãka. Oriva ïtopakiri pori apaãka. Iapitaka inaãka ikapatakikoãtaã. Aneã takari katiã. Takari sikakienatari ïtopakiri pori. Hïte Xoteo minakanuia iua oriva ïtopakiri pori atoko hïtxaua. Hãpakapari Teoso sikakiti, kotxi hïte apotiitaua Xoteoakorikata, Teoso nakitioko- rikata. ¹⁸ Hïte Xoteo minakanuia, kona hïuikapeua Teoso apakapini hïte. “Iua aãpori kapatakiko atoko, Teoso takanapana Xoteoakori, ate apakapini ikapani,” kona hïtxape, kotxi aãpori atoko hïtxaua. Na aãpori sikataparatarari aãkotsa. Aãkotsa sikataparatarari aãpori. Ininiã hïte apakapari Teoso sikakiti, kotxi hãpotiitaua Xoteokata.

¹⁹ Atxiiti hïte Xoteo minakanuia txano nota: “Iua aãpori kapatakaãkori atoko Teoso takanapari Xoteoakori. Áti aãpori iapitakiko atoko, Teoso apakapaua ate,” hïtxano atxiiti.

²⁰ Atãopitikara. Teoso takanapari Xoteoakori, kotxi ninoa !auikari isãkire. Iua apakapai hïte, kotxi hïte auikari iua sãkire. Iuaritika !hïuikapeua ikara atoko hinakasaaki. Erepaniko.

²¹ Teoso takanapari Xoteoakori, takari pori sauakakori atoko. Ininiã erepaniko, kotxi ïtopakiri aãpori atoko hïtxaua. Atxiiti áti òti okanapai hïte apaka.

²² Aimarotari katiraõkiri ininiua Teoso. Aimarotari apaka kataparaxinireri ininiua. Kat- aparaxinireri iua, kãkiti kamakasaakiri maerekati. Katiraõkiri iua, itiraõkiri hinirekasaaki. Itiraõkiri himanirekakaniã, hïte apaka mapara hõkaãka, iua aãpori sauakakori atokokana.

²³ Xoteo takanapiniãri imauikakaniri Xesosi sãkire, auikiniãri iuaïkana isãkire, Teoso iuaïkana mikanapiriãna, kotxi Teoso kaposotireri ikara atoko ikamini. ²⁴ Hïte ïtopakiri pori sauakakori takarimoni iapitaãkori atoko hïtxaua. Kona ixinireka aua ikara atoko. Pamimari ikara atoko. Xoteo atão oriva takakori atoko itxauana. Ininiã na kamimari mitxi auniãtaã iuaïkana Teoso takinina ninoa, iuaïkana imikanapiriinina ninoa iuamoni.

Xoteo Maerekani Makatzakaãkapanikako

²⁵ Nitariakori ninirekari himarotiniri apanakini mimarotakiniti, ininiã na hïuikaua. Xo- teo !nirekari auikini Teoso sãkire uatxa, iuaritika na ikara atoko !itxapani átipirika. Ikini itixiti auakani Teoso nireëkini Xoteo minakanuia kanapiriãkasaaki Teosomoni, iusaakiko Xoteo kanapiriãko Teosomoni. ²⁶ Ininiã iusaaki ikinimane Xoteo kanapiriãko Teosomoni. Iusaaki Teoso makatzakari ninoa maerekani. Teoso sãkire iõkatsopatakori kitxakapiriãka auakari ikara atoko itxa. Itxari:

Xoteo itxauako maerekanitxi makatzakakari. Imakatzakariko ikinika maerekati Xo- teoakori kamakiti, Teoso manirekakiniti. Iusaaki Teoso nireëkitinoka inirekanako.

²⁷ Nimakatzakariko maerekati ninoa kamakiti, kotxi kitxakapiriãka nikamaenetari ikara atoko inakari,

itxa Teoso sãkire iõkatsopatakori.

²⁸ Xoteoakori !nirekari Teoso iokanapirena erekari, ininiã Teoso takanapana ninoa. Ininiã Teoso iokanapirena erekari sãpiretaãka hïte Xoteo minakonimoni. Uatxa Teoso mokaïakariakori atoko itxauana Xoteoakori, iuaritika Teoso mereëna ninoa. Apraão, Isaki, Xakoo pakini apika mekaniriakori itxauana, ininiãkara Teoso turetapanikana ninoa.

²⁹ Teoso kona mamakari isãkire. Kãkiti iua mereëkini átipirika iua mereëkini itxauana. Isiãkiti erekari kãkitimoni !imakatzaka iuaïkana. ³⁰ Hïte Xoteo minakanuia kitxakapiriãka ! hïkipitari Teoso sãkire, iuaritika uatxa Teoso amonïkai hïte, kotxi Xoteo kona kïpitari Teoso sãkire uatxa. ³¹ Uatxa Xoteoakori kona kïpitari Teoso sãkire. Teoso amonïkapekai hïte Xoteo minakanuia, ininiã Teoso iuaïkana amonïkanako Xoteoakori apaka. ³² Ikinimane kãkiti na kïpitari Teoso sãkire. Kona aposotari akïpitiniri Teoso sãkire. Teoso txãkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonikaua.

Peerekari Teoso

³³ Peerekari Teoso. Atãonoka ikama. Paimatireri iua. Kãkiti !imarotari ikamakiti tïkane. Kãkiti !imarotari inireëkiti tïkane. ³⁴ !Kimarotikori Teoso xinikakiti. !Kõtãkikikori Teoso.

³⁵ Teosomoni ikinipoko aua, ininiã kipa asika atxiiti iuamoni? Asikiniri !auari. Ininiã !auari ate nakiti, iuaïkana Teoso sikiniua ikapani. ³⁶ Kotxi Teosokara kamari ikinipoko.

Ikinipoko aua Teoso posotiireë. Ikamari ikinipoko iua ikapani. Ātipirika matxariko Teoso: “Peerekai pite.” Ameë.

12

Teosomoni Sikakori Auākiri

¹ Ininiā nitariakori Teoso amonīkapitika. Ininiā nota iteene otākikai hīte. Hīteka hīsikaua Teosomoni. Teosomoni sikakori auākiri atoko hītchauko. Ininiā iua nakitinoka hītchaua. Ikara atoko hīkaminiā, Teoso apokaerekatari. Ikara atoko inakari akaminari Teoso, ikara atō. ² !Hīkamapinikariko Teoso sākire mauīākani kamakiti atoko. Hāuiritariko Teoso txīkitakiniri hīxiniākiti ereka inini, ininiākara ipinipo hītchako. Iuasaakiko himarotari Teoso nireēkiti. Himarotari Teoso nireēkiti ereka inini. Himarotari hīkamakiti tīkane iua apokaerekatini. Himarotari atō hīkamini.

³ Teoso sikari ikinipoko erekari notamoni, ininiā nisāpiretari iua sākire hītemoni. Ininiā nota otākikai hīte hīkinika. Na hīuikapeua. Hīteka atō himarotauako. Hīteka hātamakauako. Teoso txīkitakai hāuikiniri isākire. Itene hāuikiniāri iua sākire, itene hīteka himarotaua.

⁴ Kākiti ito ātika, iuaritika itotxiā auakari kaiāopokori. Aua ikanoke, itapike, oki, ikenakoki txaāpota. Ikinika iparīka aua. Ikanoke parīka ātiāo. Oki parīka ātiāo. Itxaāpota. ⁵ Iua atokokana atxa. Itotxi ātika atoko atxa, iuaritika itoua ate. Kanoketxi, tapiketxi, okītxi, kenakokitxi, itotxiā auakari atoko ate. Kristokata aāpotiitaua. Anakititakakaua. ⁶ Nota parīka Teoso ikapani ātiāo. Āti parīka Teoso ikapani ātiāo. Āti parīka Teoso ikapani ātiāo, itxaāpota. Teoso sikari erekari ikininapemoni, ikara iparīka ikamini ikapani. Atxiiti Teoso sikaimaroretari iua sākire apanakinimoni pisāpiretini ikapani, ininiākara Teoso sākire pauikini iaōka pisāpiretari Teoso sākire kākitimoni. ⁷ Teoso sikaimaroretiniāi apanakini pimiparīkatini, ininiā pimiparīkaritako apanakini. Teoso sikaimaroretiniāi isākire poerekini, ininiā poerekarauatoko. ⁸ Teoso sikaimaroretiniāi āti pisikataparaxiniretini, ininiā pisikataparaxiniretariko āti. Teoso nirekiniāri pisikiniri apanakini amonitakiti ninoamoni, ininiā ito pisikoko pipoxokoniritika. Teoso sikaimaroretiniāi auitexi pininiua, ininiā auitexi erekari pitxauako. Teoso nirekiniāi apanakini piamonīkini, ininiā pipoxokoniritika piamonīkanako.

Tiraōkitxi

⁹ Atō pitiretariko apanakini pākixinireë. Pomanatariko maerekanitxi. Na piotokakapiri erekari pikamini. ¹⁰ Itene hīretetakauako, kotxi Kristo txīkitakapekua aitaritakakinia. Piteka pipaxitiniua atokokana, apiata pipaxitariko āti. ¹¹ Pitaparaxiniretita piparīkauatoko. Na piarinouatape. Piparīkauatoko Teoso ikapani pipoxokoniritika pākixinireë. ¹² Pipoxokoniuatoko, kotxi pimarotari Teoso kaminiri ikamaenetakiti. Pimītekenariko pimisiritiko. Ātipirika pimisākiretariko Teoso. ¹³ Nipokori kaamatiniā pitariakorimoni, tiitxi kaamatiniā pitariakorimoni, auiniā pitemoni, pisikanako. Papakapanako pipoxokoniritika ikinimane Xesosi sākire auīākani paapoko apoākani, ātiātaā ikani.

¹⁴ Pamanaāri Teoso erekari ikaminina pite misiritakani. Ari, pamanaāri Teoso erekari ikaminina ninoa. Na pamanaāpiti Teoso maerekati isikinina ninoa. ¹⁵ Pipoxokoniuatoko poxokorinikata. Pitxiapata kamatinanirinikata. ¹⁶ Āti pitiretini atokotxikana, ikini-mane pitiretako. Na piuikapeua. Pisākirauatoko kākiti matxineirotenikata, katxineiroteni pimisākiretini atokotxikana. “Kimaroreno nota,” na pitxape.

¹⁷ Kākiti kaminiāri maerekati pitemoni, na pikamapiri maerekati iuamoni. Atāonoka pikama ikinimane ikapani. ¹⁸ Pinirekariko pauini kākiti sauaki ereka inini, ininiā maxikatīka kona pitxitapiri āti. ¹⁹ Nitiretakini, na hīxikatxitapiri āti. Teosora xikatxitariko, kotxi Teoso sākire iōkatsopatakori txari:

Nota parīka āti nixikatxitini. Notara misiritari maerekati kamakari, itxa Apiananiri sākire. ²⁰ Ari, kona pixikatxitapiri āti. Pikamariko ātimoni ia Teoso sākire iōkatsopatakori iaōka:

Pomanatakiri natxitiniā, pisikakienatari iua. Iposonatinā, pisikari iātini. Ikara atoko pikaminiā, ipētauata maerekati pitemoni ikamini,

itxa Teoso sākire iōkatsopatakori. ²¹ Na pauiritapiri maerekati piauīte atoko ininiua. Erekari pikamakasaaki, maerekati iokanatapeēkaika.

13

Aāuīteakori Nirekakiti Akīpitini

¹ Akīpitariko aāuīteakori nirekakiti, kotxi Teosora auiritana ninoa auitexiakori ininiua. Teosora takari ninoa auitexiakori aāuīteakori ininiua ikapani. ² Aāuīteakori nirekakiti amakamakaniā, Teoso nirekakiti apaka !akama, kotxi Teoso txīkitakana ninoa aāuīteakori

ininiuana. Ninoa paniätakiti amakamakaniä, amisiritaäkako. ³ Erekarî kamakani !ipîkari iauîtena. Maerekati kamakaninani pîkana ninoa. Pinirekatari pimapîkakaniri piauîte? Ininiä erekari pikamako, ininiä iua txaiko: “Erekai pite.” ⁴ Teoso nitiri itxaua piauîte, erekari pitemoni ikamini îkapani. Txamari maerekati pikaminiä, erepaniko. Pipîkariko iua, kotxi iposotari imisiritinî. Iua Teoso nitiri itxaua kâkiti maerekati kamakani imisiritinî îkapani. ⁵ Ininiäkara pikamariko piauîteakori nirekakiti, kotxi pimakamakaniäakiri, pimisiritiko auapitika. Apaka pikamariko ninoa nirekakiti, kotxi pimarotari pâkixinireë ikara atoko atâo pikamini.

⁶ Piauîteakori Teoso nitiriakori itxauana, ininiä erekari apaka pisikiniri txineiro ninoa-moni iparîkana ikaminina îkapani. ⁷ Ininiäkara pîkitxitana ninoa amanaäkiti, sitatxi pauini îkapani, pitîi papakapini îkapani. Pipaxitanako ninoa. Pikamariko ninoa nirekakiti.

Hîtretakiniua Îkapani

⁸ Pîkitxitariko ikinika piamotakiti. !Erekari pimaîkitxitakaniri âti. Âtinoka tîpito erekari. Ia tîpito na txineironi. Ia tîpito atiraôki. Ia atoko inakari tîpito xipokini kona erekari. Âtipirika hîtretakakauako. !Erekari pixipokiniri pitiretiniri âti. Âti tîretakari kîpitapekari Teoso paniätakiti iökatsopatakori. ⁹ Teoso paniätakiti iökatsopatakori txari: “!Pisîrîkape pîtanoro minakotokatika. Na pokaniuatape. Na pînîrekapiri apanakini tii.” Akîpitari ikara Teoso paniätakiti iökatsopatakori, apanakini ipaniätakiti apaka, ia Teoso paniätakiti âtika akîpitiniä. Ia Teoso paniätakiti paniätaua: “Piteka pitiretinîua atokotxikana, pitiretariko âti.” ¹⁰ Pitiretinîari âti, maerekati ! pikaminiri iua. Ininiä âti pitiretinîä, pikamari Teoso paniätakiti iökatsopatakori ikinika.

¹¹ Matiretari âti, kotxi aimarotari kaiamapekari Kristo kanapiriini. Ininiä pimerekako. Kona pimakapeko. Piparîkauatoko Teoso îkapani, kotxi itixine Xesosi anikiniua ôti apokaâpotanapanoka. Akokaxiti aûukari Xesosi sâkire. Uatxa paîtiki ikanapiriä. ¹² Îkanôkari xipokaâpotanapanoka. Pokamara apokaâpotanapanoka Kristo kanapiriäksaaki. Maerekati ipiäkasaaki kamakori atoko itxa, ininiä maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiä maerekati ! imaîkaua. Pokamarari atoko itxa erekari akamakiti. ¹³ Pokamara kâkiti kamari atâo inakarinoka apanakini apisatoö. Makamari ikara atoko inakari âtipirika. !Erekari kiiniri maerekati akamini. !Erekari apoâtini. !Erekari asîrîkini sito aîtanoro minakotokatika. !Erekari akaminiri maerekati aîto nireëkiti. !Erekari aneenamauatini. !Erekari axikotiniri âti. ¹⁴ Ikara atoko inakari akamini !erekari. Makamari ia atoko inakari: Maamanaâri Apiananiri Xesosi Kristo kapakiniua, sotato mâka paikori sotato îto kapakini atoko. ! Hîxinikapiri: “Kanatokopa nitxa nikaminiri niîto nireëkiti?” Kotxi maerekatinoka aîto nireëkiti.

14

Kona Hîtaparakienatakapeua

¹ Hâuiritariko Xesosi sâkire poiönoka auîäkari hîtekata apotiitiniua. Na hîxitapiri iua, ixinikakiti na hîte xinikakiti atoko iminakanisaaki. ² Kâkiti iteene auikinîari Xesosi sâkire, atxiîti nikari itanapoko nipokori. Âti kâkiti poiönoka auikinîari Xesosi sâkire, atxiîti inikari takarinoka. ³ !Erekari ikinipoko niäkari sâpiretiniri takarinoka niâkarimoni: “Pikerokari” ininiri. Apaka !erekari takarinoka niäkari sâpiretiniri ikinipoko niâkarimoni: “Pikerokari” ininiri, kotxi Teoso apakapapekari iua. ⁴ Kinakariparai pite âti nitiri pini-takari: “Pikerokari” âtimoni inakari. Ikerokiniâri, iua patrâote pinitamariko. Maerekati likama, kotxi Apiananiri moianatari iua.

⁵ Atxiîti âti sâkire: “Ia ôti erekari iteene axinikiniri Teoso.” Atxiîti âtipekana: “Ikinîotika erekari iteene axinikiniri Teoso.” Hâkixinireë hîxinikariko: “Natokopa itxa atâo nikamini?” ininiä eereka atâo hîkamini tîkane himarotape. ⁶ Hîte: “Ia ôti apiaerekata iteene axinikiniri Teoso,” hininiä, ininiä ikara atoko hîxinika Teoso hîpaxitini îkapani, ininiä erekapitkari. Ikinipoko niäkari nikari ikinipoko, Teoso ipaxitini îkapani, kotxi apisapanika itxari Teoso: “Erekapitkai ia nipokori pisikinino niniäkiti îkapani,” itxari. Ikinipoko maniäkiti apaka auikari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitkai ia kienatxi pisikinino niniäkiti îkapani,” itxari. Ininiä iua apaka paxitari Apiananiri. ⁷ Kona ateka auîtetaua. Kona aûua ateka îkapaninani. Kona apina ateka îkapaninani. ⁸ Auapanika anakasaaki, aparîkauata Apiananiri îkapani. Apîkasaaki, apina Apiananiri îkapani. Ininiä auapanika anakasaaki, apîkasaaki apaka, Apiananiri nakiti atxaua. ⁹ Kristo ipina, eereka ôkitikaua iuaîkana, auapanika inakani auîte ininiua îkapani, ipîkani auîte apaka ininiua îkapani. ¹⁰ Ininiä !apakata pitxitiniri pitari. “!Kîikitei,” kona pitxapiri, kotxi akinika aâpokoko Teoso apisatoö. Iuasaaki iua sâpiretariko akamakiti, erekari inini atxiîti, maerekati inini atxiîti. ¹¹ Teoso sâkire iökatsopatakori txari:

Nota Apiananiri, ātipirika auakari nitxaua. Ikinimane kākiti kapotoreēkauako nota apisatoō. Ikinimane txanoko nota Teoso nininiua.

¹² Ininiā iusaakiikarako akinika asāpiretari Teoso ikinika akamakiti ikorapokoriti aūakasaaki.

Masikataparaxiniretakakaua

¹³ Ininiā hītokakariko hītaparakienatakakiniua. Hāxixinireē hītxako: “!Nītxīkitakapaniri nitari kerokiniri ikamakiti. !Nītxīkitakapaniriko nitari kaminiri maerekati,” hītxako. ¹⁴ Xesosi Apiananiri nakiti nitxaua, ininiākara nimarotari, apakatapitika Teoso sākire auiākari nikiniri ikinipoko nipokori, kotxi nipokori maerekati !auari. Iuaritika kākiti auikiniāri iua nipokori maerekati inini, !apakata inikiniri. ¹⁵ Hinikiniāri ikinipoko nipokori, atxīiti hītari āxixinire maxirauata, ininiā na atāo hītiretari iua. Kristo ipina iua hītari ikapani, ininiā hītakanapariko iua nipokori hinikini, kotxi atxīiti iua !auikaikari Xesosi sākire, iua nipokori hinikini xika. ¹⁶ Erekaru auakasaaki, !hāuiritapiri āti sāpiretinii ikara erekaru maerekati inini. ¹⁷ Teoso aūiite ininiāua, kona nipokorinanini, kona iātakorinanini, axinika. Teoso aūiite ininiāua, axinikari Erekaru Matamatakoti sikakiti atemoni. Iua txīkitakaua atāonoka akamini. Ikamaerekaxiniretaua. Isikapoxokonitaua. Teoso aūiite ininiāua, ikara atoko itxa aūiini. ¹⁸ Ikara atoko aparīkauatiniā Kristo ikapani, Teoso apokaerekataua. Kākiti apaka apokaerekataua.

¹⁹ Ininiākara manirekaru kākiti auini ereka inini, neenamtxi mauakani ikapani. Masikataparaxiniretakakaua. ²⁰ Na himisiritapiri Teoso parīka nipokori xika. Ikinipoko nipokori erekaru hinikini, txamari hīte nikakiti txīkitakiniāri āti takanapiniri Kristo, hīkerokari. ²¹ Hītari kerokiniāri ikamakiti hīte niākiti xika, apiaerekata himanikakaniri iua nipokori. Hītari kerokiniāri ikamakiti hīte iātakiti xika, apiaerekata iua iāriā himiātakani. Na xatiki hītxīkitakapiri hītari kaminiri maerekati. ²² Hītemoni ikinipoko nipokori nikiko erekaru, txamari na hīsāpiretapiri apanakini. Erekaru Teosonoka imarotiniri. Hīxinikasaakiri hīkamakiti atāo inini, hāxixinireē himarotakasaakiri hīkamakiti atāo inini, iusaaki hīpoxokoniuata. Ininiā kona hīteka apoūtaua. ²³ Hinikasaakiri nipokori, hāxixinireē: “Erekaru atxīiti ia nipokori ninikini?” hinakasaaki, iusaaki Teoso txai: “Maerekati pikama,” kotxi kona paukari pikaminiri erekaru. Himauikakaniāri hīkamakiti ereka inini, ininiā maerekati itxaua hīkamakiti.

15

Āti Nireēkiti Kamiko Pirena

¹ Atxīiti ikinipoko Teoso sākire aūiika, ininiā amoiatariko Teoso sākire poiāonoka auiākari, imaposotakiniti ikamini ikapani. !Erekaru ateka nireēkitinoka akamini. ² Erekaru akaminiri aītari nireēkiti, iua amoiatatini ikapani, Teoso sākire iteene auikini ikapani. ³ Kristo apaka !ikamari iuaka nireēkiti. Iua kamari Teoso nireēkiti, kotxi Teoso sākire iōkatsopatoriā Kristo txari iri:

Kākiti misākirepiretakasaakii pite, notara ninoa misākirepireta.

⁴ Ikinika Teoso sākire iōkatsopatakori iōkatsopataāka ate oerekiko ikapani. Teoso sākire iōkatsopatakori aūikasaaki, aiātapari apoxokoniritika erekaru apokini. Aimarotari erekaru apokapitīkako. Teoso sākire iōkatsopatakori sikataparaxiniretaua.

⁵ Teoso sikataparataua, ininiā apoxokoniritika aiātapari erekaru apokini. Isikataparaxiniretaua. Ninirekaru Teoso txīkitakiniri hīte nireēkiti ātinoka inini, Kristo Xesosi nireēkiti iaōka hīkamini. ⁶ Erekaru hinireēkiti hāxixinireē ātinoka inini. Erekaru hīsākire ātinoka inini. Ikara atoko hininiā, hīkinika txari Teoso: “Peerekai pite,” kotxi iua aūiite Xesosi Kristo iri itxaua.

Xoteo Minakanuia Poxokoniuatini

⁷ Hāpakapariko āti, Kristo apakapiniū atokokana, ininiā kākiti txari Teoso: “Peerekai pite,” txariko. ⁸ Nisāpiretai. Kristo Xoteoakori nitiri atoko itxapekaua. Ikara oerekari Teoso sikiniri isikaenetakiti. Teoso sikaenetakiti Apraāomoni, Isakimoni, Xakoo pakinimoni, isikaenetakiti apokapeka Xesosi ikorapokoriti apokasaaki. ⁹ Kristo Xoteoakori nitiri atoko itxapekaua, ininiā Xoteo minakanuia txari: “Kaamonīkareri Teoso. Peerekari iua,” itxana. Teoso sākire iōkatsopatakori txari:

Xoteo minakanuia auiniātaā nitxariko Teoso: “Peerekai pite.” Nixikarauata pite ikapani, kotxi peerekai pite.

¹⁰ Iuaīkana Teoso sākire iōkatsopatakori txari:

Hīte Xoteo minakanuia hīpoxokoniuatako Xoteoakorikata, Teoso nakitiakorikata.

¹¹ Iuaīkana Teoso sākire iōkatsopatakori txari:

Hīte hīkinika Xoteo minakanuia, “Peerekari Apiananiri” hītxako. Hīkinika itixi auakanii hīxikarauatako Teoso ikapani.

¹² Iuaĩkana Teoso sãkire iõkatsopatakoriã Isaiã txari:

Auako Xesee apika mekaniri. Xoteo minakanuia auĩte itxauako. Ninoa imarotariko isãkire iaõka ikamini,

itxa Teoso sãkire iõkatsopatakori.

¹³ Teosora txĩkitakai himarotiniiri isãkire iaõka ikamini. Ninirekari iua iteene kamapox-okonitiniĩ hĩte. Ninirekari ikamaerekaxiniretiniĩ hĩte, kotxi hãuikari iua sãkire. Ininiã himarotari hãpakapapitikariko Teoso sãkire iaõka. Erekarĩ Matamatakoti posotiireẽ himarotari ikara.

Paoro Teoso Iokanapirena Erekarĩ Sãpiretakari Xoteo Minakonimoni

¹⁴ Nitariakori, nota imarotari ereka hinini. Nimarotari hĩte iteene kimarore hinini hõerekakiniua ikapani. ¹⁵ Iuaritika ia niõkatsopatakitiã nõtãkikapekai hĩte nitaparaxinireritika. Himarotakiti, iuaĩkana nisãpiretai, iuaĩkana hĩxinikiniri ikapani. Teoso sikari erekarĩ notamoni, ininiã ikara atoko niõkatsopata hĩtemoni. ¹⁶ Teoso sikari erekarĩ notamoni, kotxi itxĩkitakano Xesosi Kristo nitiri nininiua. Ipaniãtano nĩparĩkauatini Xoteo minakanuia ikapani. Sasetotxi apakapari kãkiti mĩkiti, ininiã sika itxari Teosomoni. Ikara atoko itxa sasetotxi parĩka. Nota sasetotxi atoko nitxaua. Nisãpiretari Teoso iokanapirena erekarĩ Xoteo minakonimoni, ininiã ninoaka sikaua Teosomoni inireẽkiti ikaminina ikapani. Teoso apakapari ikara atoko inakari ninoaka iuamoni sikakanuia. Erekarĩ Matamatakoti kamaerekatari kãkiti Teoso apakapinina ikapani.

¹⁷ Ininiã Teoso ikapani nĩparĩkauatakasaaki, niuikari Xesosi Kristo. ¹⁸ Nota kona iuikaua, kotxi Kristo posotiireẽ Xoteo minakanuia kamari Teoso nireẽkiti. Kristo paniãtano nota iua sãkire nisãpiretinina Xoteo minakanuia. Ipaniãtano inireẽkiti nikamini Xoteo minakonikata nauakasaaki, ininiãkara ninoa auikari nisãkire. Ininiã ikamarina Teoso nireẽkiti. ¹⁹ Erekarĩ Matamatakoti posotiireẽ noerekari Teoso takaõtxikare ninoamoni. Noerekari posotiiretxi kãkiti maposotakiniti ninoamoni. Ininiãkara ninoa kamari Teoso sãkire iaõka. Kristo iokanapirena erekarĩ ikinika nisãpiretapekari kãkiti Xerosareẽ sitatxiti auakani. Eereka kãkiti apikoxiti auakani nisãpireta. Eereka kãkiti apikoxiti auakani nisãpireta. Nitxaãpota kãkiti nisãpiretini. Imapotõkire Irĩria tixinipeka napoka, Kristo iokanapirena erekarĩ nisãpiretini ikapani. ²⁰ Aĩtipirika ninirekarĩ nisãpiretiniri Kristo iokanapirena erekarĩ Kristo mimarotakoniatã. Ininiã kona nĩparĩkauata Teoso ikapani aĩ parĩkauatiniãtã, kotxi aĩ sãpiretapekari Kristo iokanapirena kãkiti iuaãtã. ²¹ Kotxi Teoso sãkire iõkatsopatakori txari: Mitxi iua masãpiretakoni imarotariko iua sãkire. Mitxi iua sãkire makenakotakani imarotariko iua sãkire,

itxa Teoso sãkire iõkatsopatakori.

²² Kaiõkokaikani ninirekamari nisini hĩtemoni, txamari kona apakata, kotxi iusaaki nisãpiretari Kristo sãkire Kristo sãkire mimarotakanimoni.

Paoro Seenetini Homamoni

²³ Itokanani ninirekamari naõkitiniĩ hĩte. Uatxaika apakata nisini hĩtemoni, kotxi nixipokapekari nĩparĩka ikorapokoriti. ²⁴ Nirekarĩ Espãnia tixinimoni nisini. Iuaã nisikasaaki, ninirekarĩ naõkitiniĩ hĩte. Ninirekarĩ mapaõti nikaikotini hĩtekata, kotxi nipotxitari hĩtekata nauini. Ninirekarĩ hĩte moanatinino Espãniamoni nisini ikapani, ininiã eereka Espãnia tixinimoni nisa. ²⁵ Uatxa hĩtemoni nisini apisapanika, nisa Xerosareẽmoni, kotxi ninirekarĩ nanikiniro txineiro kãkiti Teoso nakitiakori iuaã auakani nisikini ikapani. ²⁶ Kristo sãkire auĩãkani, Xoteo minakanuia Masetõnia tixini auakani, Akaia tixini auakani pakini sikaro oa txineiro. Inirekarĩ nisikiniro Teoso nakitiakorimoni, matxineirotenimoni, Xerosareẽ sitatxitiã. ²⁷ Ninoa poxokoniuaata oa txineiro isikinina Xerosareẽ auakanimoni. Erekarĩ oa txineiro isikinina, kotxi Xoteoakori Kristo sãkire auĩãkani sikari Teoso sikakiti Teoso iokanapirena erekarĩ Xoteo minakonimoni. Ininiã erekarĩ Xoteo minakanuia sikiniri ipixini itxineirotena Teoso sikakito, Xoteoakorimoni. ²⁸ Ininiã oa txineiro nanika Xerosareẽ auakanimoni. Ninoamoni txineiro nisika atoko, ininiã eereka nipotorika Espãniamoni nisini. Espãnia napokinĩ apisapanika nisako hĩtemoni. ²⁹ Ereẽ napokasaaki, nisãpiretai ikini sereti erekarĩ Kristo sikakiti hĩtemoni.

³⁰ Nitariakori nota amanaã hĩte, himisãkiretiniri Teoso nota ikapani. Hĩkenakotari namanaãkiti? Himisãkiretariko Teoso nota ikapani. Xesosi Kristo aũũte itxaua, ininiã namanaã himisãkiretiniri Teoso nota ikapani. Erekarĩ Matamatakoti txĩkitakaua atiraõkiuatini, ininiã himisãkiretari Teoso nota ikapani. Ikara atoko hĩkaminiã, Teoso sikataparatanõ nimisiritiko auakasaaki. ³¹ Kristo sãkire mauĩãkani Xotẽia tõpa auakani nirekarĩ imisiritinino nota. Himisãkiretari Teoso ninoa mamisiritakanino ikapani. Himisãkiretari Teoso, Teoso nakitiakori Xerosareẽ auakani apokaerekatiniro txineiro Xoteo minakanuia iokanatakito. ³² Ininiã Teoso nirekiniãri, napoka hĩtemoni nipoxokoniritika. Ininiã asikapoxokoni-takakaua. ³³ Teoso akamaerekaxiniretakiri aua hĩtekata. Ameẽ.

16

Paoro Akiriuãkaãpotana Ixinikakini

¹ Niokanataro aitaro Pepi inakoro hitemoni. Peerekaro oa. Omoianatana Xesosi sãkire auiaãkani Sëkireia sitatxiti auakani. ² Apiananiri nakito otxaua, ininiã hãpakaparoko hïpoxokoniritika, kotxi iua nakitiakori apaka hïtxaua. Onirekiniãri himoianatiniro, himoianataroko, kotxi omoianatapekana itomaneri kãkiti. Omoianatapekano nota apaka.

³ Hïsãpiretanako Pirisira, oitaniri Åkira pakini nixinikamanapitinina ninoa. Ninoa parïkauatapeka Kristo Xesosi ïkapani notakata. ⁴ Okaãkanapanokana nota imoianatinina xika. Peerekana, kotxi erekari ikaminanona. Xoteo minakanuia, ikini Teoso misãkirekitoãtaã apotiitakanuia apaka imarotari erekari Pirisira, Åkira pakini kamakiti nota ïkapani. ⁵ Xesosi sãkire auiaãkani apotiitaua ninoa aapoko Teoso imisãkiretinina ïkapani, ininiã hïsãpiretanako nixinikamanapitinina ninoa.

Hïsãpiretariko nitiretakiti Epeneto inakori nixinikamanapitiniri iua. Åsia tixiniã iua merepitipanika auikari Kristo sãkire. ⁶ Hïsãpiretaroko Maria nixinikamanapitiniro oa. Oa iteene parïkauata ate ïkapani. ⁷ Hïsãpiretanako ninirimane Åtorõniko, Xõnia pakini nixinikamanapitinina ninoa. Mitxipe ninoa aua notakata kateia åki. Teoso kãkitimoni iokanatakini iteene imarotana Åtorõniko, Xõnia pakini. Ninoa ipi auikari Kristo sãkire, iua sãkire nauikini apisapanika.

⁸ Hïsãpiretariko Åpirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹ Hïsãpiretariko Opano nixinikamanapitiniri iua. Iua parïkauata Kristo ïkapani atekata. Hïsãpiretariko nitiretakiti Esitaki nixinikamanapitiniri iua. ¹⁰ Hïsãpiretariko Åperi nixinikamanapitiniri iua. Imisiritiko sauaki iua ïkipatari Kristo sãkire auikini. Hïsãpiretanako Arisitõporo aapoko auakani nixinikamanapitinina ninoa. ¹¹ Hïsãpiretariko ninirimane Erotxião nixinikamanapitiniri iua. Hïsãpiretanako Apiananiri nakitiakori Nasiso aapoko auakani nixinikamanapitinina ninoa.

¹² Hïsãpiretanako sitoakoro Tipena, Tiposa pakini nixinikamanapitinina ninoa. Ninoa parïkauatapitipo Apiananiri ïkapani. Hïsãpiretaroko nitiretakito Pesitxi nixinikamanapitiniro oa. Oa apaka parïkauatapitipo Apiananiri ïkapani. ¹³ Hïsãpiretanako Hopo, inoro pakini nixinikamanapitinina ninoa. Apiananiri mereëri iua. Iua inoro turetano nota, ninoro turetino atokotxikana. ¹⁴ Hïsãpiretanako Asïkirito, Pirekõtxi, Êmisi, Pataropa, Êmasi, ikinika aitarikori ninoakata apotiitakanuia pakini nixinikamanapitinina ninoa. ¹⁵ Hïsãpiretanako Pirõroko, Xõria, Nereo, Nereo itaro, Orïpa, ikinika Teoso nakitiakori ninoakata apotiitakanuia pakini nixinikamanapitinina ninoa.

¹⁶ Himaaratakakauako, kotxi aitaritakaua. Kristo nakitiakori ikini Teoso misãkirekitoãtaã apotiitakanuia xinikamanapitai hïte.

Paoro Ôtãkikare Mapotõkire

¹⁷ Nitariakori iteene nõtãkikai hïte. Erepaniko kãkiti neenamtxi nireëkani. Ninoa nirekari Kristo sãkire auiaãkani omanatinina apanakini Kristo sãkire auiaãkani. Na atão ninoa oerekakiti sãkiretxiti, ininiã atxiiti kãkiti takanapari Kristo sãkire auikini ninoa oerekakiti xika. Kristo sãkire nota oerekakiti hitemoni atão. Ninoa oerekakiti koketakori sãkiretxiti. Ninoa moianariakori kona hïtxapeua. ¹⁸ Kãkiti ikara atoko inakani kona parïkauata aãuïte Kristo ïkapani. Ninoa parïkauata ïitona nireëkiti ïkapani. Imisirienetarina kãkiti sãkire auiaãkani. Imisirienetarina kãkiti ikara atoko inakani, kotxi kãkiti potxitari isãkirena. Kãkitimoni peerekari ninoa sãkire. ¹⁹ Ikinika kãkiti imarotari hïte kaminiri Kristo sãkire iaõka, ininiã nota iteene poxokoniua hïte ikara atoko hininiã. Ninirekari kiikite hinini erekari hïkamini ïkapani. Ninirekari himimarotakaniri maerekati hïkamini. ²⁰ Teoso akamaerekaxiniretakiri, païtiki xipokariko Satanasi posotiire, ininiã hïposotari hïokanatiniri Satanasi isini.

Aãuïte Xesosi Kristo åtipirika sikari ikinipoko erekari hitemoni.

²¹ Tximõtxio, notakata parïkauatakari, xinikamanapitai hïte. Ninirimane Arõsio, Xasão, Sosipato pakini xinikamanapitai hïte apaka.

²² Nota Tësio inakori iõkatsopari ia iõkatsopari Paoro ïkapani. Nota apaka xinikamanapitai hïte, kotxi Apiananiri nakiti nitxaua.

²³ Nota Paoro aua Kaio aapoko. Kristo sãkire auiaãkani apotiitaua iua aapoko Teosokata isãkirauatinina ïkapani. Iua nirekari himarotiniri iua xinikamanapitinii hïte. Erãsito inakori apaka xinikamanapitai. Txineiro nïkatakari iua. Sitatxi auakani sikakito inïkata iua. Aitari Koato inakori xinikamanapitai hïte apaka.

²⁴ Aãuïte Xesosi Kristo åtipirika sikari ikinipoko erekari hitemoni. Ameë.

²⁵ "Peerekari Teoso," matxako. Iua posotari ikamataparaxiniretinii hïte, ininiã kona hïotokakari hãuikiniri Kristo sãkire. Teoso iokanapirena erekari nota sãpiretakiti, Xesosi

Kristo sākire pakini sāpiretari ikara atoko inakari. Ikara Teoso sākire kitxakapirīka ! kimarotikori. Uatxa imarotapeēkaika. ²⁶ Īkorsaaki asāpiretapekari ikara Teoso sākire, Teoso sākire sāpiretakani iōkatsopatakiti kitxakapirīka. Uatxa aimarotari ninoa sāpiretakiti. Teoso auapika inakari paniātari isākire sāpiretiko ikini itixiti auakanimoni. Ininiā apakata ikinimane auikiniri isākire. Apakata ikinimane kaminiri inireēkiti iaōka.

²⁷ Iuanani Teoso txaua. Iuanokara imarotari atāo ikinipoko. Ātipirika matxariko iua: “Peerekai pite, kotxi peerekari Xesosi Kristo.” Ameē.

1 KORĪTO

Merepanika Paoro Iokanatsopatakiti Korīto Auakanimoni

¹ Nota Paoro, Xesosi Kristo iokanatakkitino. Teoso akiritano iua iokanatakiti nininiua ĩkapani, kotxi inirekari iokanatinino kăkitimoni isăkire nisăpiretini ĩkapani. Aĩtari Sóseni inakori aua notakata uai. ² Niokanatsopata hĩtemoni, kăkiti Xesosi săkire auĩăkani Korĩto sitatxiti auakanimoni. Kristo Xesosi makatxakakini hĩtxaua Teoso ĩkapani. Teoso akiritai hĩte iua nakitiakori hininiua ĩkapani. Apaka niokanatsopata ikini tōpati auakanimoni, aăũte Xesosi Kristo uăka akiritakanimoni. Ate auĩte Xesosi, ninoa auĩte apaka itxaua. ³ Aĩri Teoso, Apiananĩri Xesosi Kristo pakini sikari ikinipoko erekari hĩtemoni. Ninoa kamaerekaxiniretai hĩte.

Paoro Misăkiretari Teoso Korĩto Auakani ĩkapani

⁴ Ātipirika nimisăkiretari Teoso ia atoko: “Peerekai pite, kotxi Xesosi Kristo sikari ikinipoko erekari Korĩto auakanimoni. Ikara erekari pite sikakiti. ⁵ Peerekai pite, kotxi pite kamaerekatari ninoa auini. Pite oerekana ninoa săkire atăo inini ĩkapani. Pite kamaimaroretana. Ininiă ninoa săkire apiaerekata. Ninoa imarore apiaăpota.” Ia atoko nimisăkiretari Teoso.

⁶ Hĩtemoni asăpiretakiti Kristo pirena auapeka hăkixiniree. Ininiă iteene hăuikari Kristo săkire. ⁷ Ininiă hiătapakasaakiri aăũte Xesosi Kristo kanapiriini, ikini sereti erekari Teoso sikakiti aua hĩtemoni iua parĩka hĩkamini ĩkapani. ⁸ Hĩte isikataparaxiniretiniritika ikanapiriini ōti apokako. Ininiă maerekati hĩtemoni !uari aăũte Xesosi Kristo apokasaaki. ⁹ Teoso kamariko ikara hĩtemoni, kotxi ikinika isăkire iaōka ikamako. Iuakara akiritai hĩte, himoianatiniri imi aăũte Xesosi Kristo.

!Homanatakakapeua

¹⁰ Nitariakori, aăũte Xesosi Kristo posotiiree nōtăkikai. Hĩsăkire ōtinoka hĩtxako. !Ninirekari homanatakakiniua. Ninirekari ōtika hĩxinikakiti auini. Ninirekari ōtika hinirekakiti auini. ¹¹ Nitariakori, Kroee aapoko auakani săpiretano hĩtekarika hitaiaatakiniua. ¹² Kotxi apanakini hĩte txari: “Paoro săkireta nota kĩpita.” Ātipekana: “Aporo săkireta nota kĩpita.” Ātipekana: “Petro săkireta nota kĩpita.” Ātipekana: “Kristo săkireta nota kĩpita.” ¹³ !Apakata ikara atoko hĩkamini. Kristo !ikaiarikaăka. Kona Paoro ipina aamina ĩpiriămitakari nopini hĩte ĩkapani. Kona Paoro uăkaă hĩpatxisataăka.

¹⁴ Nisăpiretari Teoso ereka inini, kotxi kona notani patxisatai hĩte. Krispo, Kaio pakininanira nipatxisata. Apikomoni !nipatxisatari kăkiti. ¹⁵ Ininiă kona kăkiti săpiretari nipatxisatiniri kăkiti nota uăkaă. ¹⁶ ĩ. Nimaxinĩkaretari. Nipatxisatari Esitėpana, iua aapoko auakani pakini. Apikomoni nipatxisatakini !nixinikaika. ¹⁷ Kristo kona iokanatano nipatxisarauatini ĩkapani. Iokanatano Teoso iokanapirena erekari nisăpiretini ĩkapani. !Inirekari kăkiti săkiree, kăkiti imaroree nisăpirenauatini, kotxi kăkiti imarore !isăpiretari Kristo ipinini aamina ĩpiriămitakari nopini amaerekani imakatzakini ĩkapani.

Teoso Imarore

¹⁸ Teoso săkire mauĩkani uăkatari !kiĩkiteri kăkiti Kristo ipinini aamina ĩpiriămitakari nopini săpiretakani. Atepekana, Kristo ipinini săpiretiko oerekari Teoso posotiire, kotxi Kristo ipinini makatzakari amaerekani. ¹⁹ Teoso săkire iōkatsopatakori kitxakapĩrka txari: Nixipokariko ĩkorapokoriti kimarorerini imarore. Nixipokariko kiĩkiterini ĩkite.

Itxa Teoso kitxakapĩrka. ²⁰ Ītapari kimaroreri? Ītapari apaiaōkarauatakari? Naniparari kaxinikerari ĩkorapokoritikiri? Teoso oerekapekari ĩkorapokoritikiri imarore miĩkiteti imarore atokotxkana inini. ²¹ Paimatireri Teoso, kotxi !auiritari ĩkorapokoriti auakani imarotiniri iua ninoaka imaroree. Apanakinimoni Kristo săkire săpiretiko !kiĩkiteri, iuaritika Teoso apokaerekatari imakatzakiniri kăkiti maerekani, Kristo săkire săpiretiko auikasaakina.

²² Xoteoakori nirekari atamatiniiri Teoso takaōtxikare, isăkire auikinina ĩkapani. Krekoakoripekana nirekari imaroretxi apiari imarotini. ²³ Iuaritika ate săpiretari Kristo ipinini ĩpiriămitakari nopini amaerekani imakatzakini ĩkapani. Xoteoakori !inirekari ikara asăkire auikinina. Krekoakoripekana uăkatari ikara asăkire miĩkiteti săkire inini. ²⁴ Iuaritika Teoso akiritakini aua Xoteoakori, Krekoakori pakini. Ninoamoni Kristo parĩka oerekari Teoso posotiire. Iua parĩka oerekari Teoso imarore. ²⁵ Kăkiti uăkatari Teoso imarore !kiĩkiteri, iuaritika axapitiki Teoso imarore apiata. Ikinipoko kăkiti imarore poiăoka. Axapitiki Teoso tapara apiata. Ikinipoko kăkiti tapara poiăoka.

²⁶ Nitariakori, Teoso akiritakasaakii, hĩxinikari kăkiti xinikakiti atokokana. Natokopa itxa hĩte iuasaaki? Iuasaaki !kimarorei. !Kaposotiirei iuasaaki. Auĩtetxi !hĩtxaua iuasaaki. Itori

hīte ikara atoko inakani iusaaki. ²⁷ Teoso mereēri kākiti. Īkorapokoriti auakani uākatari ninoa kākiti Teoso mereēkini miikiteni ininiua. Imereēna ninoa, kimaroreni ĩkorapokoriti auakani pētauatini ĩkapani. Īkorapokoriti auakani uākatari ninoa kākiti Teoso mereēkini iōkapetakani ininiua. Imereēna ninoa, katapararini ĩkorapokoriti auakani pētauatini ĩkapani. ²⁸ Iua mereēri kākiti. Īkorapokoriti auakani uākatana ninoa Teoso mereēkini minakani ininiuana. Imereēri apanakini manirekakini. Imereēri kākiti omanatakoni. Kinirepa Teoso mereēri kākiti ikara atoko inakani? Teoso oerekari kākiti, kākiti uākatakiti apiari inini na atō. ²⁹ Ikara atoko ininiā, kākiti !iposotari iuikiniua Teoso apisatoō. ³⁰ Teosora txīkitakaua Xesosi Kristo nakitiakori aniniua. Kristo nakiti aniniāua, aimarotari imaroretxi atō inakari. Kristo txīkitakaua atō inakari akamini Teoso apakapiniua ĩkapani. Iua txīkitakaua Teoso nakitiakori aniniua ĩkapani. Iikixirauata ate ĩkapani ĩpīkasaaki.

³¹ Teoso sākire iōkatsopatakori txari:
!Apakata piuikiniua. Apakatapitika piuikiniri Apiananiri.

2

Xesosi ĩpinini ĩpiriāmitakari Nopini

¹ Nitariakori, napokasaaki hītemoni, nisāpiretai Teoso sāpiretakiti. Kona nisāpiretai notaka sākire nimatire. Iusaaki kona noerekaī notaka imarore. Teoso sākirenoka nisāpiretai hīte. ² Hītekata nauakasaaki, na ninirekari āti imaroretxi nimarotini. Ninirekari Xesosi Kristonoka nisāpiretinii. Apiata ninirekari nisāpiretinii iua ĩpinini kākiti ĩkapani ĩpiriāmitakari nopini. ³ Hītekata nauakasaaki kona kataparaxinireno. Nikikinanaka nīpīkarauatini xika. ⁴ Iusaaki kona kākiti imaroreēni nisākiraauata. Kona kākiti imaroreēni ninirekari hāuikiniri Teoso iokanapirena nisāpiretakiti iusaaki. Teoso iokanapirena nisāpiretakasaaki, kākiti imarotari Erekarī Matamatakoti posotireē nisākiraauata. ⁵ Ininiā kona kākiti imaroreēni hāuikari Teoso iokanapirena. Hāuikari Teoso iokanapirena Teoso posotireē.

Erekari Matamatakoti Imarore

⁶ Teoso sākire auīākani iteene ākixinireē aneēkani imarotari Teoso iokanapirena asāpiretakiti kimatireri inini. Ikara imaroretxi kona ĩkorapokoriti auakani imaroreni. Kona auītetxiakori imaroreni ikara imaroretxi. Kotxi ninoa imarore paītiki ! auaika. ⁷ Asāpiretari Teoso imarore mitxi kākiti mimarotakiniti, kotxi Teoso kipatari. Itixi kamiko apisa Teoso nirekaua asāpiretiniri ikara imarore kākitimoni ate iotximere aāpakapini ĩkapani. ⁸ Auītetxiakori ĩkorapokoriti auakani ! imarotari ikara Teoso imarore. Ninoa imarotaākamariko, ininiā ! okamarinako Apiananiri kaiotximereri aamina ĩpiriāmitakari nopini. ⁹ Kītxakapirīka Teoso sākire iōkatsopatakori txari:

Kākiti oki !atamatapanikari Teoso kamakiti tīkane iua tiretakani ĩkapani. Kākiti kenakoki !ikenakotapanikari Teoso kamakiti tīkane iua tiretakani ĩkapani. Kākiti !ixinika-panikari Teoso kamakiti tīkane iua tiretakani ĩkapani.

¹⁰ Iuaritika Teoso oerekepekaua Erekarī Matamatakotiā. Ikinipoko imarotakari itxaua Erekarī Matamatakoti. Ikinipoko kipatakori Teoso imarore imarota. ¹¹ Kākiti ākixinirenoka imarotari iua xiniākiti. Āti ! imarotari iua xiniākiti. Iua atokokanera Erekarī Matamatakotinoka imarotari Teoso xiniākiti, kotxi Teoso itxaua iua. ¹² Kona ate apakapari ātiāo matamatakoti ĩkorapokoritikiri. Ate apakapari Erekarī Matamatakoti, Teoso iokanatakiti atemoni, ininiākara aposotari aimarotiniri Teoso sikakiti atemoni. Itori isikakiti.

¹³ Atemoni isikakiti asāpireta. Kona kākiti imaroreēni asāpiretari kākiti. Erekarī Matamatakoti oerekaua asāpirenauatini. Ate atamatari Teoso oerekakiti isākire iōkatsopatakoriā, eereka ātiātaā isākire iōkatsopatakoriā aātamatarī iua oerekakiti, ininiā iusaaki aimarotari atō. Ikara atoko aōerekai hīte. ¹⁴ Erekarī Matamatakoti mauakiniti ! apakapari Erekarī Matamatakoti oerekakiti, kotxi iuamoni ikara sākiretxi miikiteni sākire. !Iposotari imarotiniri Erekarī Matamatakoti sāpiretakiti, kotxi Erekarī Matamatakoti !auari iuamoni. ¹⁵ Erekarī Matamatakoti auakasaakiri kākiti, iusaaki iposotari ataerekatiniri imakinika, ininiā kākiti Erekarī Matamatakoti mauakiniti !iposotari apoītiniri iua.

¹⁶ Teoso sākire iōkatsopatakori txari:
Kiripa imarotatari Apiananiri xiniākiti iua oerekini ĩkapani?
Iuaritika Kristo oerekaua iua xiniākiti.

3

Teoso Nitiriakori Atxaua

¹ Nitariakori, hīte ! ikamari ikinipoko Erekarī Matamatakoti nireēkiti. Hīkamari hīteka nireēkiti ĩkorapokoriti auakani kamini atokokana. Ininiākara nisākiraauata hītekata amarinikata nisākirauatini atoko, kotxi poiāonoka hāuikari Kristo sākire. ² Tinitxiā atoko inakari nisākire nisikāi. Xinitxi atoko inakari nisākire kona nisikāi, kotxi !himīteenekari

nisäkire kamimari. Uatxapiima hĭte ! iposopanika noerekakiti kamimari himarotini. ³ İkorapokoriti auakani xinikini atoko hĭxinikapanika. İkara xika hĭxikotakakaua. Hina-iatakakaua. Homanatakakaua. Hĭteka nireĕkiti hĭkama, İkorapokoriti auakani kamini atokokana. ⁴ Kotxi ātikaka hĭte txari: “Paoro sākire nikĭpita.” Apanakini txari: “Aporo sākire nikĭpita.” İkara atoko hininiā, kākiti İkorapokoritikini sākire atoko hĭsākirauata. !Kĭlkitepanikai.

⁵ Kiripa Paoro? Kiripa Aporo? Kristo nitiriakorinoka atxaua. İua sākire sāpiretakaninoka atxaua. Hĭte auikapekari Kristo sākire asāpiretakasaaki. Apiananiri sikari parĭkatxi İkin-inapemoni akamini İkapani. ⁶ İa atoko itxa parĭkatxi Teoso sikakiti: Merepanika nota sāpiretari Teoso sākire kākitimoni, takariki nitakini atokokana. Eereka Aporo oerekari ninoa kākiti apikomoni Teoso sākire. Āparaā takari nireĕkiti atoko itxa apikomoni Teoso sākire isāpiretakiti. Nota, Aporo pakini parĭkauata İkara atoko, İuaritika Teosonoka aneĕkakari takari. İuanokara txĭkitakari kākiti auikini isākire. ⁷ Takariki taākari, āparaā siākari pakini minakati ninoa, kotxi Teosonoka aneĕkakari takari. ⁸ Teoso sākire merepanika sāpiretakari nirekari iparĭkauatini Teoso İkapani. Teoso sākire apikomoni sāpiretakari apaka nirekari iparĭkauatini Teoso İkapani. İniniā Teoso sikariko ninoa parĭka İki ninoamoni iparĭkana iaĕka. ⁹ Teosokata parĭkauatakani atxaua. Teoso kikiote atoko hĭtxaua. Apaka Teoso aapoko atoko hĭtxaua.

¹⁰ Teoso sikapekano İkinipoko erekari nıparĭka İua İkapani nikamini. Apokotxi kamiko apisa aapokotxi kamakari kimaroreri takari kaikori, İnopini aapokotxi İkamini İkapani. İua aapokotxi kamakari kimaroreri atoko nitxaua. Merepanika nota parĭkauata Kristo sākire nisāpiretini. Kaikori aapokotxi kamakari takakiti atoko itxa İkara İua sākire. Eereka apanakini oerekarauata apikomoni. Ninoa parĭka aapokotxi kamiko kaikori nopini atokokana itxa. Erepaniko akamakasaakiri İkara parĭkatxi. ¹¹ Kaikori, aapokotxi kamakari takakiti atoko itxa Xesosi Kristo sākire. Āti kaikori kākiti sākire !auari. Auape kaikori Xesosi Kristo sākire, kotxi kataparari. ¹² Xesosi Kristo sākire aūikasaaki, kaikori aūiini İkapani İxosope. Aapokotxi İua kaikori nopini atoko itxa aparĭka. Aparĭka atxĭiti oro atoko itxa. Atxĭiti pirata atoko itxa. Atxĭiti kai erekari atoko itxa. Atxĭiti aamina atoko itxa. Atxĭiti aātsopa atoko itxa. Atxĭiti katsotati atoko itxa aparĭka.

¹³ İtixi xipokini ōti kākiti İmarotariko natokopa itxa iparĭka, kotxi İuasaakiko arikatxi ataerekatari iparĭka. ¹⁴ İparĭka marikakaniā, apakapari iparĭka İki. ¹⁵ İparĭka arikiniā, ! apakapari iparĭka İki. İuaritika Teoso auiritari İua auini ātipirika Teosokata, txamari İua xipokaarita.

¹⁶ Kona hĭte İmarotapanikari Teoso misākiretiko aikoti hininiua? Kona hĭte İmarotapanikari Erekarı Matamatakoti auini hiĭto āki? ¹⁷ Kākiti xipokiniāri Teoso misākiretiko aikoti, Teoso xipokariko İua. Teoso misākiretiko aikoti İua nakiti. Hĭtera Teoso misākiretiko aikoti hĭtxaua.

¹⁸ Kona hĭteka misirienetapeuako. Atxĭiti ātikaka kākiti hĭte sauaki uākatarı kimaroreni İniniua, kotxi İmarotarına İkorapokoriti auakani İmarore. İkorapokoriti auakani uākatarı Kristo sākire auĭākari mĭlkitei İniniua. İniniā erekape kākiti İkorapokoriti auakani akiritini mĭlkitei hininiua, kotxi İuasaaki kimaroreri atāo İnakari hĭtxaua. ¹⁹ Teosomoni !kĭlkiteri İkorapokoriti auakani İmarore. Teoso sākire İĕkatsopatakori txari: Teoso maĭkari kimarorerini İkorapokoriti auakani ninoaka İmaroreĕ.

²⁰ Apaka Teoso sākire İĕkatsopatakori txari: Apiananiri İmarotari İkorapokoriti kimarorerini İmarore İtxapĕ.

²¹ İniniā !apakata kākiti İuikiniua İmarore xika. İkinika aua hĭtemoni. ²² Paoro aua hĭtemoni. Aporo aua hĭtemoni. Petro aua hĭtemoni. İtixi aua hĭtemoni. Hāuini, hĭpinini apaka aua hĭtemoni. Uatxa auakari, katana auakari apaka aua hĭtemoni. İkinipoko aua hĭtemoni. ²³ Kotxi hĭte Kristo nakiti hĭtxaua. Kristo, Teoso nakiti itxaua.

4

Kristo İokanatakini Kākitimoni

¹ Erekarı kākiti İmarotini auĭetxiakori aminakaniua. Kristo nitiriakori atxaua. Teoso İokanapirena nĭkatakani atxaua. İua sikari İokanapirena atemoni apanakini asāpiretini İkapani. İua Teoso İokanapirena ! İmarotaāka mĭtxi. ² Nitiritxi atāo İnakari ātipirika kamari İauĭte paniātakiti. ³ !Nimaākatari hĭte ataerekatinino nota. !Nimaākatari apanakini ataerekatinino apaka. Kona notaka ataerekataua apaka. ⁴ Nākixinireĕ maerekati !auari, İuaritika nıkamapekari maerekati. Apiananirinokara ataerekatano. ⁵ İniniā !hĭsāpiretapiri: “Kona erekari İua parĭka. Peerekari İkara parĭka,” kona hĭtxape Apiananiri apokini apisa. Apiananiri apokini hiātapaako. İua oerekariko İpiāmoni İomaātakori. Oerekariko kākiti nirekakiti ākixinireĕna iparĭkauatakasaakina. İuasaaki Teoso txariko kākiti: “Erekapitikari pikamakiti,” itxa.

⁶ Nitariakori, ikara nota pirena, Aporo pirena pakini nisâpiretai atâo inakari himarotini ikapani, âti apiata himiukakani ikapani. Ininiâ hîkamariko Teoso sâkire iôkatsopatakori iaôka, kotxi !apakata kâkiti iteene iuikiniri âti, âtipekana imanirekakani inini. ⁷ Pite apiananitakari !auari. Himapakapakiniti !auari. Kapakapare hininiâ, kinirepa mapakapareni sâkirauatini atoko hîtxa? ⁸ Ikinipoko hinireêkiti auapeka hîtemoni atxiiti? Katiîpekai hîte. Ate ereê mauakanisaaki, atxiiti hîteka kamari auîtexi hininiua. Ninirekari auîtexi atâo hininiua, ininiâ ate auîtexi atxaua hîtekata. ⁹ Îkorasaaki neenamatchi xipoka atoko, auîtexi kâiatakari kanapiriâ isotatonekata. Ninoa mapotôkire kâkiti auîtexi maîkakani minaâka apanakini atamatinina ikapani, inapetinina ikapani. Eereka okaâkana ninoa kâkiti. Nota xinikari Teoso nirekari ate iua iokanatakini ikara kâkiti maîkakani atoko aniniua. Ikinimane atamataua. Kâkiti, Teoso nitiriakori iaxitikini apaka atamataua apininimoni asini. ¹⁰ Hîtemoni, miikiteni ate txaua, Kristo ikapani aparîkauatakasaaki. Hîtemoni, kimarorei hîte, Kristo ikapani hîparîkauatakasaaki. Hîtemoni, !kaposotiireua ate. Hîtemoni kaposotiirei hîte. Hîte paxitaâka, txamari ate omanataâka. ¹¹ Uatxapiima Kristo sâkire ate auikini xika anatxita. Aposonata. !Kamâkaua. Amisiritaâka. !Kaapokoua. ¹² Iteene aparîkauata anireêkiti aamotini ikapani. Kâkiti takasaakiri maerekati atemoni, ate amanaâri Teoso erekari ninoamoni itakini ikapani. Amisiritikosaaki, iusaaki amîteenekari. ¹³ Apanakini misâkirepiretakasaakia, erekari ate apakapapiretana ninoa. Uatxapiima apanakinimoni îkorapokoriti txiko atoko atxaua. Kasakari atoko atxaua ninoamoni.

¹⁴ Kona niôkatsopata ikara hîpêtauatini ikapani. Niôkatsopata ikara nipinitini ikapani monôkori apokini apisa, kotxi namariteni nota tirketakini atoko hîtxaua. ¹⁵ Hîtemoni tesi mio Teoso sâkire oereêkani auaâkamako, iuaritika poiâo hîri atoko inakari aua. Notara hîri atoko nitxapekua, kotxi hâuikari Teoso iokanapirena erekari noerekasaakii Kristo Xesosi posotiireê. ¹⁶ Ininiâ nôtâkikai: Nota kamakiti atokotxikana hîkamako. ¹⁷ Ikara ikapani niokanatarî Tximótxio hîtemoni. Iua namarite nitiretakiti atoko. Iua kamari Apiananiri paniâtakiti iaôka. Iua txîkitakai hîxinikiniri nikamakiti ikiniôtika Kristo posotiireê. Ikini tôpati Kristo sâkire auîâkani apotitiniâtaâua, noerekari kâkiti erekari ikamini ikiniôtika, erekari nota kamini atokotxikana.

¹⁸ Âtikaka hîte iukaua, kotxi hîuâkatari nota mapokakani hîtemoni. ¹⁹ Txamari Teoso auiritiniâno, pâitiki napokako hîtemoni. Iusaakiko !ninirekari nimarotiniri ninoa iukakania sâkire. Napokasaaki ereê, ninirekari nimarotiniri Teoso posotiire. ²⁰ Teoso auîtexi ininiâtaâua kona sâkiretxinani aua. Iposotiire apaka aua. ²¹ Kiripa hîte nireka? Hinirekatari ninoropatiniî aiêê, ereê napokasaaki? Hinirekatari nitiretiniî, nimatxitakanii, ereê napokasaaki?

5

Maerekati Xesosi Sâkire Auiâkani Sauaki

¹ Isâpiretaâka kâkiti ereê kaminiri maerekati itotxi nireêkiti âti kâkitikata. Iua kâkiti maerekani apiari, kotxi iua sirîka iri îtanorokata. Teoso sâkire mauîâkani kamari maerekati, iuaritika ninoa !ikamari ikara atoko inakari maerekati, kiki hîte sauaki auakari kamakiti atoko. Ninoa !inirekari isâkiretinirina ikara atoko inakari maerekati. ² Iuaritika hîte iuikaua. !Himatnaniuaata himaerekani xika. Apiaerekata îkora iri îtanorokata sirîkakari hîokanatinî itakanapiniî. ³ Niîto kona ereê aua, iuaritika nixinikakiti auapitika ereê hîtekata, ininiâ nota ereê hîtekata nauini atokokana, nimererepekari iua maerekati kamakari misiritiko. ⁴ Aâuîte Xesosi Kristo uâkaâ hâpotiitakasaakia, nota aua hîtekata nixinikakitiâ. Iusaaki himarotakasaakiri Xesosi Kristo posotiire, ⁵ hisikariko iua Satanasimoni iua îto ipinini ikapani, ixinire ereka inini Xesosi kanapiriâkasaaki.

⁶ !Apakata hîuikinîua. Himarotari axapiti pâo tireêkari tirekakari itori pâo. Iua atokokana âtika maerekati kamakari txîkitakari kaiâopokori kâkiti kaminiri maerekati. ⁷ Ininiâ hîokanapariko maerekati mitxi hîkamakiti, amaneri hinini ikapani. Ininiâ pâo miâtiâkati atoko hîtxaua, kotxi ikoke !auari. Kîtxakapirîka kâkiti okari ipira soti auîte, ininiâ Teoso nitiri napaâpotakasaaki ninoa nopini, kona okana ninoa. Kristo, apira soti auîte atoko itxa. Iua ipina ate mapinakani ikapani. ⁸ Pâskaa kiiniritisaaki, Teoso !auiritari pâo âtikakari nikiko, kotxi maerekati pâo tirekakari atoko itxa. Ininiâ maôkanapari maerekati mitxi akamakiti. Pâo miâtiâkati atoko matxaua, ininiâ makamari erekari. Masâkiretari atâo inakarînoka. ⁹ Niokanatsopatapeka hîtemoni himapotiitakanua maerekati kamakanikata, itotxi nireêkiti kamakanikata. ¹⁰ Na nixinikari îkorapokoriti maerekati kamakani. Maerekati itotxi nireêkiti kamakani, kamanarerini, kamisirienerini, kamakori teosonetakani pakini îkorapokoriti auakani na nixinikanâta. !Hîposota hîtakanapinina ninoa, kotxi auapikana. Hîpîkasaakinokara, hîtakanapana ninoa. ¹¹ Uatxa niokanatsopata

hîtemoni, himapotiitakaniua maerekati kamakanikata, “Xesosi sâkire auîâkarirano” in-akanikata. Îtanoro minakotokatika sirîkakani, kamanarerini, kamakori teosonetakani, âti misâkirepiretakani, ipoâtakani, kamisirienereri pakini hitakanapako. Kona hinipokotape ikara atoko inakanikata.

¹² Kona nota parîkani Xesosi sâkire mauîâkani misiritiko nisâpiretini. Hîte parîkakara Xesosi sâkire auîâkani misiritiko hîsâpiretini. ¹³ Teosokara sâpiretariko Xesosi sâkire mauîâkani misiritiko. Hîte iokanatariko maerekati kamakari hîte sauaki auakari isini.

6

Âti Naiatakasaakiri Âti

¹ Xesosi sâkire auîâkari naiatiniâri âti Xesosi sâkire auîâkari, ! apakata Xesosi sâkire mauîâkani apisatoô anikiko. Hanikana ninoa Xesosi sâkire auîâkanimoni maerekati kamakari misiritiko himarotini ikapani. ² Kona himarotapanikari Xesosi sâkire auîâkani mereëriko Xesosi sâkire mauîâkani misiritiko âti ôti? Hîkamariko ikara atoko inakari xipokatxi ôtisaaki, ininiâ hîposotapitikari uatxa himereiniri kâkiti misiritiko, âti naiatakasaakiri âti. ³ Atxiîti hîte kona imarotapanikari himereiniri Satanasi nitiriakori misiritiko âti ôti? Ininiâ hîposotapitikari himereiniri kâkiti misiritiko îkorapokoriti uatxa. ⁴ Txamari neenamtxi hîte sauaki auiniâ, hanikatarî kâkiti Teoso sâkire auîâkani mapaxitakanimoni? ! Apakata, kotxi ninoa !imarotari Teoso paniâtakiti. ⁵ Ikara atoko nitxai nikamapêtatiniî ikapani. Atxiîti kona hîposotatari hâpokiniri kimaroreri hîte sauaki neenamtxi xipokini ikapani? Atxiîti kona âtika aua? ⁶ Txamari âti Xesosi sâkire auîâkari anikari âti Xesosi sâkire auîâkari Xesosi sâkire mauîâkani apisatoô maerekati kamakari misiritiko himarotini ikapani. Ikara atoko !apakata.

⁷ Ininiâ iteene hîkerokari, kotxi hanikari hîtari kâkiti misiritiko mereëkarimoni. Erecape hâuiritiniri hîtari kaminiri maerekati hîtemoni. Erecape hâuiritiniri hîtari îtirîkiniri hîtii. ⁸ Txamari hîitiriua. Hîkamari maerekati. Hîtariakorimonira hîkamari ikara. !Apakata. ⁹ Kona himarotapanikari atâo minakati kamakani !isari Teoso auîetxi ininiâtaâua? Kona hîteka himisrienetapeua. Ia atoko inakari kâkiti !isari Teoso auîetxi ininiâtaâua: maerekati îtotxi nireëkiti kamakani, kamakori teosonetakani, îtanoro minakotokatika sirîkakari, kiki sito ininiua nirekakari, kiki âti kîkîkata sirîkakari. Ninoa !isari Teoso auîetxi ininiâtaâua. ¹⁰ Kîitirini, kamanarerini, poâtakani, âti misâkirepiretakani, kamisirienererini pakini ! isari Teoso auîetxi ininiâtaâua. ¹¹ Ikara atoko mitxi hîtxaua hîte apanakini. Iuaritika himaerekani maktxakaâkapeka. Teoso kamai hîte inakitiakori hinini. Apiananiri Xesosi kamaerekatai. Erekarî Matamatakoti, aTeosone nakiti, iua apaka txîkitakai hîte atâo inakari kamakani hininiua.

Maerekati Îtotxi Nireëkiti

¹² Nota posotari ikinipoko nikamini, txamari kona erekari ikinipoko nikamini. Nota posotari ikinipoko nikamini, txamari kona ninirekari nikamakiti niauite ininiua. ¹³ Nipokori kamaâka tikakotxi ikapani. Tikakotxi nerekari nipokori. Txamari Teoso xipokariko nipokori, tikakotxi pakini. Teoso linirekari akaminiri maerekati aito nireëkiti âti kâkiti îtokata. Apiananiri kamari aito iua nireëkiti akamini ikapani. Aito Apiananiri nakiti.

¹⁴ Teoso ôkitikari Apiananiri ipikani sauaki. Iua atokokana iua ôkitikaua ate iposotîireë. ¹⁵ Ininiâ !apakata Kristo îto hîsikini sito kanokareromoni. !Apakata. ¹⁶ Kiki sirîkasaaki kanokarerokata, iuaasaaki âtinoka îtotxi atoko itxauana ninoa. Teoso sâkire iôkatsopatakori sâpiretaua:

Kiki sirîkîni sitokata, âtika îtotxi atoko itxauana.

¹⁷ Kâkiti mojanatakasaakiri Apiananiri, âtika xiniretxi atoko itxauana ninoa xinire.

¹⁸ Âtokata hîsirîkîni hinirekasaaki, himitekako. Kona hîkaikotape iuaâ. Apanakini maerekati kâkiti kamakiti ! imisiritari hîto. Imisiritari hâkixinire. Hîkamakasaakiri maerekati hîto nireëkiti sitokata, himisiritari hîto, hâkixinire pakini. ¹⁹ Kona himarotapanikari hîto Erekarî Matamatakoti misâkiretiko aikoti atoko ininiua? Hîte îtoâkarari iua. Teoso sikari iua hîtemoni, ininiâ hîto kona hîte nakiti. ²⁰ Teoso iamotapekai hîte Xesosi ipîkasaaki, ininiâ hîto îki auapitika. Ininiâ uatxa iua nakiti hîtxaua. Ininiâ uatxa hîtoâ hîpaxitariko Teoso.

7

Îtanorouatiko Sâkiretxiti

¹ Uatxa napakapapiretariko mitxi hiôkatsopatakiti notamoni. !Erekari kiki kaxirotiniro sito. ² Txamari inirekasaakiri sitokata isirîkîni, erekari kiki auini iuaka îtanorokata. Erekarî sito auini oaka ôtanirikata. ³ Ininiâ erekari kiki sikiniri iito îtanoromoni. Erekarî sito sikiniri oito ôitanirimoni. ⁴ Îtanorotxi îto kona oa nakitinanini. Ôtaniri nakiti apaka oito.

Apaka ĩtaniritxi ĩto kona iua nakitinanini. ĩtanoro nakiti apaka ĩito. ⁵ Kona hĩtxape: "Kona ninirekari nisĩrĩkini pitekata," kona hĩtxape. Hinirekasaakiri nĩpokori himanĩkakanĩ Teoso himisĩkiretini ĩkapani, atxiĩti iuasaaki ! hinirekari hĩsĩrĩkini hĩtanorokata. Hĩtanoro apaka kona nirekari osĩrĩkini hĩtekata iuasaaki, Teosonoka hĩxinĩkini ĩkapani. Ininiĩ ikara atoko hĩkaminiĩ erekari, txamari paĩtiki eereka iuaĩkana hĩsĩrĩkako hĩtanorokata. Ininiĩ ikara atoko Satanasĩ kona sikanireĕtai maerekati hĩto nireĕkiti hĩkamini ĩto sitokata hĩsĩrĩkini. ⁶ Ikara nota ĕtĩkikai hĩte. Kona nĩpaniĩtai ikara hĩkamini. ⁷ Notamoni erekari nota atoko hinini. Iuaritika ĩkinimane aua Teoso siĩkiti iparĩka kamini ĩkapani. Teoso sikari ĩti isĩkakiti ĩtimoni. ĩtiĩo isĩkakiti isĩka ĩtimoni.

⁸ Uatxa nimisĩkiretanako mĩtanoroni, mĩtanoroni, tikĩnitakoni pakini. Erekari himĩtaniriuatakani, himĩtanorouatakani nota atoko hinini. ⁹ Txamari himaposotakaniĩri hĩtakanapiniri hĩto nireĕkiti, erekari hĩtanorouatini, erekari hĩtaniriuatini, kotxi kapatakari atoko itxa hĩto nireĕkiti.

Hĩkamari Atĩo Hĩtaniriuatakasaaki

¹⁰ Ia nĩpaniĩtana kĩkiti ĩtaniriuatakani: !Apakata sito takanapiniri oĩtaniri. Kona notani paniĩtai. Apiananirira paniĩtai. ¹¹ Otakanapiniĩri oĩtaniri, !apakata iuaĩkana oĩtaniriuatini. Erekari oĩtanirimoni iuaĩkana okanapiriini. Iua atokotxikana ! apakata kĩki takanapiniro ĩtanoro. ¹² Nĕtĩkikari apanakini. Apiananiri paniĩtakiti apanakini ĩkapani ! auari, ĩniniĩ nota ĕtĩkikana ninoa ia atoko: Xesosi sĩkire auĩĩkari auiniĩ ĩtanoro Xesosi sĩkire mauĩĩkato, oa nirekiniĩri okaĩkotini uakata, !apakata iua iokanatiniro oa otakanapiniri iua. ¹³ Iua atokotxikana, Xesosi sĩkire auĩĩkaro auiniĩ oĩtaniri Xesosi sĩkire mauĩĩkati, iua nirekiniĩri ĩkaĩkotini oakata, !apakata otakanapiniri iua. ¹⁴ Iuasaaki ĩtaniritxi Xesosi sĩkire mauĩĩkati apakapari Teoso sĩkire ĩtanoro kamakiti eeka atamatakasaaki. Iua atokotxikana, ĩtanorotxi Xesosi sĩkire mauĩĩkato apakapari Teoso sĩkire oĩtaniri kamakiti eeka oĩtamatakasaaki. Imakamakaniĩrina ikara atoko, !erekana ĩmiakori. Irĩtxi, ĩnorotxi pakini kaminiĩri nĕtĩkĩkakitani iaĕka, erekana ĩmiakori. ¹⁵ Xesosi sĩkire mauĩĩkati nirekiniĩri itakanapiniri ĩtanoro, oa auiritariko isini. Xesosi sĩkire mauĩĩkato nirekiniĩri otakanapiniri oĩtaniri, iua auiritaroko osini. Ikara atoko ĩniniĩ, ninoa sĩkapeĕkaika. Ikara atoko ĩniniĩ erekari, kotxi Teoso ! ĩnerekari anenamauatini ikara xĩka. ¹⁶ Pite ĩtanorotxi, pimarotatari? Atxiĩti pĩtaniri auĩkari Xesosi sĩkire imaerekani makatxakiko ĩkapani, Xesosi sĩkire piĩĩpiretakasaakiri iua. Pite ĩtaniritxi, pimarotatari? Atxiĩti pĩtanoro auĩkari Xesosi sĩkire omaerekani makatxakiko, Xesosi sĩkire piĩĩpiretakasaakiro oa.

Teoso Akiritakasaakiri Kĩkiti

¹⁷ Ininiĩ ĩkininape kamariko iparĩka Teoso sĩkakiti iuamoni, kotxi Apiananiri akiritaua ikara parĩkatxi akamini. Ikara nĩpaniĩtari ĩkinimane Teoso mereĕkini apotiĩniniĩtaĩua. ¹⁸ Teoso akiritakasaakiri kĩki, Teoso takaĕtxikare ĩtoĕ auiniĩ, !apakata Teoso takaĕtxikare makatxakiko. Teoso akiritakasaakiri kĩki, Teoso takaĕtxikare ĩtoĕ maukaniĩ, !apakata Teoso takaĕtxikare ĩtoĕ takiko. ¹⁹ Teoso takaĕtxikare hĩtoĕ auiniĩ, ikara kona txĩkitakai Teoso anaakori hininiua. Teoso takaĕtxikare hĩtoĕ maukaniĩ, ikara apaka kona txĩkitakai Teoso anaakori hininiua. Teoso nireĕkiti iaĕka kamiko txĩkitakai Teoso anaakori hininiua. ²⁰ Teoso akiritakasaakii, iuasaaki mitxi hĩparĩka hĩkamapanĩkako. ²¹ Teoso akiritakasaakii, nitiritxi amotakori hininiĩua, ĩniniĩ kona maerekaxinireti hĩtxapeua nitiritxi hininiua xĩka. Iuaritika hĩauĩte sĩkaniĩ, ĩniniĩ hĩsako. ²² Apiananiri akiritiniĩri nitiritxi amotakori, Apiananiri sĩkakakiti itxaua iua. Apiananiri akiritiniĩri nitiritxi minakatua, Apiananiri nitiri iamotakiti itxaua iua. ²³ Xesosi amotakini hĩtxaua, ĩniniĩ iuaĩkana kĩkiti nitiri iamotakoni ! hĩtxapeuako. ²⁴ Nitariakori, Teoso akiritakasaakii, iuasaaki mitxi hĩparĩka hĩkamapanĩkako.

Mitxitakani, Tikĩnitakoni Pakini

²⁵ Uatxa nĕtĩkikai hĩte mitxitakani. Apiananiri kona sĩpiretano ipaniĩtakiti hĩte ĩkapani, iuaritika nisĩpiretai nixĩnikakiti, kotxi Apiananiri amonĩkapekano, ĩniniĩ kĩkiti posota auĩniri nisĩkire. ²⁶ ĩkorasaaki pamonĕkoniri Xesosi sĩkire auĩĩkanimoni, ĩniniĩ notamoni apiaerekata kĩkiti mĩtanorouatakani. ²⁷ Hĩtanorouatapeka hininiĩ, kona hĩtakanapapero hĩtanoro. Mĩtanorouatakatiapanika hininiĩ, kona hĩnitapero hĩtanoro. ²⁸ Iuaritika hĩtanorouatiniĩ, maerekati ! hĩkama. Kĩkiti ĩtanorouatiniĩ, apokapitakako ninoa maxĩkiko. Kona ninirekari ikara atoko hĩte ĩkapani.

²⁹ Nitariakori, poiĩo ĕtinoka aua aparĩkauatini Apiananiri ĩkapani. Ininiĩ hĩte kĩtanororini parĩkauatoko Teoso ĩkapani mĩtanoroni parĩkauatini atokotxikana. ³⁰ Txĩapatakari parĩkauatoko Teoso ĩkapani, kĩkiti matxiapatakati parĩkauatini atokokana. Poxokori parĩkauatoko mapoxokoniti parĩkauatini atokokana. Tiitxi amotakari parĩkauatoko Teoso

îkapani, tiitxi mauakiniti parîkauatini atokokana. ³¹ Îkorapokoriti tiitxi auakini lixinikapiriko itiina, kotxi îkorapokoriti kâkiti potxtakiti xipokaâpota.

³² Ninirekari erekaxinire hinini. Kiki mîtanoroti posotari ixinikiniri kanatokopa iparîkauatini Apiananiri ikamapoxokonitini îkapani. ³³ Txamari kiki kîtanorori xinikari parîkatxi îkorapokoritikiri, kotxi inirekari ikamapoxokonitiniro îtanoro. ³⁴ Mîtanirito, mitxitakaro pakini nirekari oparîkauatini Apiananiri îkapani, kotxi onirekari oîto, oxinire pakini osikini uamoni. Txamari sito kîtaniriro xinikari parîkatxi îkorapokoriti auakari, kotxi onirekari ôtaniri okamapoxokonitini. ³⁵ Ikara atoko nisâpiretai hîte, hîte ereka hinini îkapani. Kona ninirekari nimauiritakani erekari hâpakapini. Ninirekari atâonoka hîkamini. Ninirekari hîparîkauatini Apiananirinoka îkapani.

³⁶ Âtokoro iri atxiiti ! auiritapanikaro oa îtaniriuatini, txamari oaneêpeka. Âtokori nirekiniâri itakiniro oa, erekari iua auiritiniri iua. !Ikamari maerekati. Erekari iua auiritinina ninoa îtaniriuatini. ³⁷ Atxiiti âtokoro iri âkixinireê linirekaro oa îtaniriuatini. Atxiiti lisikaenetaro oa âtimoni. Iua xinikakiti omîtaniriuatakani îkapani pataparari ininiâ, âkixinireê imarotiniâri inireêkiti oa mîtaniriuatakani, ininiâ iua kiki kamari erekari. ³⁸ Oa sikakari oîtaniriuatini îkapani kamari erekari. Iuaritika oa masikakati oîtaniriuatini îkapani kamari apiaerekata.

³⁹ Teoso paniâtakiti iôkatsopatakori paniâtaro sito kaikotini oîtanirikata iua auapanika inakasaaki. Iua ipininiâ, apakata oîtaniriuatini onirekakitkata. Txamari Apiananiri sâkire auiâkarikatanoka apakata oîtaniriuatini. ⁴⁰ Notamoni oa apia poxokoniuata omîtaniriuatakaniâ iuaîkana. Ikara atoko inakari nôtâkikaro sito, kotxi nimarotari Erekari Matamatakoti Teoso nakiti aua notamoni.

8

Nipokori Teoso Kamakori Sikiko

¹ Uatxa nisâpiretai nipokori sikiko teoso kâkiti kamakitimoni. Amakinika aimarotari ikara. Ikara inakari aimarotapeka ate. Kâkiti imaroretxi auiniâ iuikaua. Apiaerekata kâkiti auini tiraôkitxi, kotxi isikataparatarari kâkiti xinire. ² “Kimaroreno nota” inakari !auari imaroretxi. Kaiâopokori imaroretxi imimarotakiniti aua. ³ Iuaritika kâkiti tiretiniâri Teoso, Teoso imarotari iua.

⁴ Maxinikari nipokori teoso kamakorimoni sikakori. Aimarotari teoso kâkiti kamakiti !kakamareri. Aimarotari âtika Teoso atâo inakari aua. ⁵ Aua kâkiti kamakiti. Kâkiti takauâkatari “teoso” itxaua. Kâkiti takauâkatari teoso iaxiti auakani, îkorapokoriti auakani apaka. Kaiâopokori ikara atoko inakari teosoakori aua. Kaiâopokori ikara atoko inakari auîtetxiakori aua. ⁶ Atemoni âtika Teoso aua. Iua aîri iaxitikiri. Iua kamari îkinipoko. Aparîkauata iuanoka îkapani. Âtika aâuîte aua, Xesosi Kristo. Ikini sereti kamakari iua. Iua posotiireê aâuini aua.

⁷ Apanakini !imarotapanikari kâkiti kamakiti teoso minakanuia, kotxi mitxi iteene itotarina teoso kâkiti kamakiti. Ininiâ inikasaakirina nipokori teoso kamakorimoni siâkori, iuâkatarina ikara nipokori teoso atâo inakarimoni siâkori. Iuasaaki ninoa uâkatarari maerekati ikaminina, kotxi âkixinireêna !iteene imarotarina atâo inakari. ⁸ Txamari nipokori !itxîkitakaua Teosomoni asini. Ikara nipokori anikini !imisiritaua. Apaka !Ikamari ereka anini.

⁹ Iuaritika erepaniko. Hinirekiniâri ikara nipokori hinikini, hîxinikariko apanakini Teoso sâkire poiâonoka auiâkani. Ninoa imarotiniâri hîte nikiniri ikara nipokori, ininiâ ninoa apaka nikari, txamari iuasaaki ninoa kamari âkixinirena manirekakiniti. ¹⁰ Teoso sâkire poiâonoka auiâkari atamatiniâri Teoso sâkire iteene imarotakari nikiniri nipokori teoso kamakori misâkiretiko aikotiâ, isikataparaxiniretari iua apaka nikiniri nipokori teoso kamakorimoni siâkori. ¹¹ Ininiâ pimarore xika, atxiiti pitari Teoso sâkire poiâonoka auiâkari sari imisiritikomoni. Kristo ipina iua îkapani apaka. ¹² Ikara maerekati hîtarimoni hîkaminiâ, hîkarotari âkixinire. Hîtari âkixinire hîkarotakasaaki, hîkamari maerekati Kristomoni. ¹³ Ininiâ nipokori ninkini txîkitakinîâri nitari kaminiri maerekati, itixi auapanika inakasaaki kona ninikaikari iua nipokori, kotxi kona ninirekari nitari kaminiri maerekati.

9

Teoso Iokanatakini Kâkitimoni

¹ Teoso iokanatakiti nitxaua. Ninireêkiti nîposota nikamini. Naôkitapekari Xesosi Kristo aâuîte. Iparîka nikamakasaaki, hîte auikari Apiananiri sâkire. ² Atxiiti apanakini !auikari Teoso iokanatakiti nininiua. Hîtera auikari Teoso iokanatakiti nininiua. Hîtera oerekari Apiananiri iokanatakiti nininiua, kotxi hîte auikari Apiananiri sâkire, nota sâpiretakasaakii hîte.

³ Kākiti maukakaniāri Teoso iokanatakiti nininiua, napakapapiretana ninoa ia atoko: ⁴ Apakata atxiiti aāpakapiniri nipokori, iāriā pakini aparīkauatini īkapani? ⁵ Apakata atxiiti ate anikiniro ātanoro Teoso sākire auīākarō atekata, apanakini Teoso iokanatakini, Apiananiri itariakori, Petro pakini anikinina ninoa ītanoro atokotxikana? ⁶ Atxiiti apakata Panapee, nota pakininoka parīkauatini anikakiti aāpakapini īkapani?

⁷ Sotato sikaasaaki ineenamauatini īkapani, iuaka !iamotari anikakitina. Aua atxiiti ova takakari. Ova itakakiti matximakati aua? !Auari. Kona auari kema auite piratakari ipira tiniā miātakati.

⁸ Ikara nisākire kona kākiti sākirenanini. Iua atokotxikana Teoso sākire. ⁹ Moisesi iōkatsopatapekari Teoso paniātakiti. Ia atoko itxa:

Kona hūtxikari kema auite nama trikopani ikamakasaaki. Hāuiritariko inikini.

Teoso turetatarī kema auite? Itiretapitikari. ¹⁰ Apiata isāpiretari ikara kākiti parīkauatakani īkapani. Ininiā takarauatakari takarauata, kotxi inirekari ikiena inikini. Kienatxi apakari apari ikiena, kotxi inirekari ikiena inikini. ¹¹ Katarakeri takarauatini atokokana, ate takari Teoso sākire hākixinireē. Katarakeri nikari ikiena itakakiti, ininiā atxiiti apakata ate apakapiniri kienatxi hūte sikakiti? Kotxi ate parīkauata hūte īkapani. ¹² Apakatinīā apanakini apakapiniri iparīkana īki hūte sikakiti, ininiā apiata apakata ate apakapiniri ate parīka īki, iuaritika kona aamanaāri hīsikiniāua ate parīka īki. Amūteenekari ikinipoko, kotxi !anirekari aiotokakiniri Kristo iokanapirena erekari hīkenakotini. ¹³ Himarotari Teoso misākiretiko aikoti āki parīkauatakani iuaātaā apakapari ikiena. Teosomoni sikakori takikoātaā parīkauatakani apaka apakapari ipixini iuaātaā siākori inikinina īkapani. ¹⁴ Iua atokotxikana Apiananiri paniātari iua iokanapirena erekari sāpiretakani apaka apakapiniri iparīkana īki.

¹⁵ Ikara atāopitikara, iuaritika kona nipaniātai ikara atoko hīkamini. Kona niōkatsopatarī ikara, niparīka īki notamoni hīsikini īkapani. Niparīka īki namanaini apisa erekape nipinini. Niuikari niparīkauatini hūte īkapani hūtxineirote nimapakapanisaaki. ¹⁶ Teoso iokanapirena erekari noereka, iuaritika !apakata niukiniua, kotxi Teoso sikari ia parīkatxi notamoni. Nimisiritiko auapitika, Teoso iokanapirena erekari nimasāpiretakaniā. ¹⁷ Teoso iokanapirena erekari nisāpiretiniāri kākiti, nākixinireē iteene ninirekiniāri ikara nikamini, ininiā napakapapitikariko niparīka īki. Nimanirekakaniāri ikara nikamini, iuaritika nikamari, kotxi Teoso sikari ikara parīkatxi notamoni nikamini īkapani. ¹⁸ Ia atoko niūkitxitiko: Teoso iokanapirena erekari nisāpiretakasaaki, kona minakati napakapa. Ikara atoko kamapoxokonitari nākixinire, kotxi maīkitika nisāpiretai Teoso sākire. Teoso iokanapirena erekari sāpiretakari nitxaua, ininiā niposotiire auapitika hūkitxitinino nota nipaniātiniāi hūte, iuaritika !ninierekari ikara atoko nikamini nota nireēkiti napakapini īkapani.

Parīkatxi Ikinimane Īkapani

¹⁹ Ninireēkiti nikama. Kākiti nitiri iamotakori !nitxaua. Iuaritika notaka nitxikitakaua ikinimane nitiri nininiua, Teoso sākire apikomoni kākiti auikini īkapani. ²⁰ Xoteoakori sauaki niparīkauatakasaaki, Xoteo auini atoko nitxa nota auini. Ikara atoko ininiā, Xoteoakori auikari Xesosi sākire. Moisesi paniātakiti iaōka kamakani sauaki nauakasaaki, ninoa auini atokokana nitxa nota auini, kotxi ninirekari Moisesi sākire auīākani auikiniri Xesosi sākire. ²¹ Xoteo minakaniua !imarotari Moisesi paniātakiti. Ininiā ninokata nauakasaaki, kona nipaniātari Moisesi paniātakiti ikaminina, Xesosi sākire auikinina īkapani. Iuaritika nikamari Teoso paniātakiti, kotxi iuatxikana Kristo paniātakiti nikamini. ²² Kākiti mataparaxinirenikata nauakasaaki, nota apaka kona kataparaxinireno, Xesosi sākire auikinina īkapani. Ikini kākiti sauaki nauakasaaki, nikamari kākiti auini atoko nitxa nota auini, ininiā ikinipoko niposotakiti nikama apanakini maerekani makatxakiko īkapani. ²³ Ikara atoko nikama Teoso iokanapirena erekari nisāpiretini īkapani. Nikamari ikinipoko, Teoso iokanapirena erekari nisāpiretini īkapani. Ikara atoko ininiā, nota apaka apakapari Teoso iokanapirena erekari hūtekata.

Saporiēta Apakapari

²⁴ Himarotari mitekaxi. Kākiti miteēkani miteka, iuaritika ātinoka apakapari imitekini īki. Merepitipanika mitekaxi mapotōkire apokakarinnoka apakapari imitekini īki. Ininiā miteēkari atoko hūtxako. Hīsapitipo. Teoso parīka hīkamapitipo hīparīka īki hāpakapini īkapani. ²⁵ Ikini miteēkari parīkauatipitipo iūto tapara iteene auini īkapani. !Auiritari iūto misiritakari. Ikara atoko ikama, saporiēta imitekini īki apakapini īkapani. Ikara saporiēta kona okanani aua. Oxipokapitikako. Ate parīkauatipitipo ātiāo aāpakapakiti aāpakapini īkapani. Ikara aāpakapakiti !ixipoka. ²⁶ Miteēkari isinimoni mimarotakati atoko !nitxaua. Nimarotari nisinimoni. Nisapitipo mitekaxi mapotōkiremoni. Maxikatiika !ninenamauata. Na neenamauata nisanōkakata. ²⁷ Nitxikitakari niūto ninitiri ininiua, nota nireēkiti ikamini

Îkapani, kotxi nisâpiretapekari ikara apanakinimoni, ininiâkara kona ninirekari nimapakapakaniri notaka parîka îki.

10

Kâkiti Isaeokini Aõerekini Pirena

¹ Nota nirekari hîxinikiniri kitxakapirîka, aãtokiriakorini takanapakasaakiri Exito tixini, ikinika ninoa aua katxiâri patapi. Iua katxiâri oerekana isininimonina. Apaka ikinika ninoa napari potxoari uiniti âki. ² Ninoa sari Moisesikata, ininiâ katxiâri patapi auakasaakina, potxoari uiniti patapi auakasaakina, iuusaaki ninoa patxisatiko atoko aua iuusaaki. ³ Ninoa ikinikana nikari xinitxi Teoso iokanatakiti. ⁴ Ninoa ikinikana iâtari âparaâ Teoso sikkakiti. Ninoa iâtari âparaâ kai auiteâkiriâ. Kristo iua kai auite âparaâ potoriâniâtaâ atokokana. Iua sari ninoakata. ⁵ Txamari Teoso !apokaerekatari kaiâopokori ninoa, ininiâ ipinana. Itona iarika âparaâ makipakanîtaâ.

⁶ Uatxa axinikana ninoa, ininiâ aimarotari amanirekakaniri maerekati ninoa nirekiniri atoko. ⁷ !Hîteosonetapiri kâkiti kamakiti, ninoa apanakini teosonetiniri atokokana, kotxi Teoso sâkire iõkatsopatakori txari:

Ninoa topâka inipokotinina Îkapani, iâtinina Îkapani, eereka õkitikauana isarauatinina Îkapani teoso ikamakitina apisatoõ.

⁸ !Apakata aanokarauatini ninoa apanakini anokarauatini atoko, kotxi âti õtinokara vîtxi tres mio ninoa okaâka îkora maerekati xika. ⁹ !Apakata aãtamakaerekatiniri Kristo ninoa apanakini kitxakapirîka atamakaerekatiniri atoko, kotxi iua xika imini okana ninoa. ¹⁰ ! Hîtsoatape, ninoa apanakini kitxakapirîka tsoatini atokokana, kotxi eereka Teoso nitiri xipokana ninoa.

¹¹ Ikara imisiritikona apoka ninoamoni apanakini pinitiko Îkapani. Ikara imisiritikona iõkatsopataâka ate pinitiko Îkapani, kotxi itixi mapotõkire õti apokaâpota. ¹² Hitemoni ereka hinini, ininiâ erepaniko, kotxi atxiiti paîtiki hîkamari maerekati. ¹³ Hîte atamakaerekataâka ikinimane atamakaerekataâka atokotxikana. Iuaritika Teoso !itakanapai hîte. Kona iua auiritari hãtamakaerekatiko himamîteenekakiniti. Iuusaaki oerekai himitekini, ininiâ hîposotari himîteenekiniri.

Teoso Kâkiti Kamakiti

¹⁴ Ininiâ nitariakori nota tiretakini, himiteka teoso kâkiti kamakiti hîtakanapini. ¹⁵ Hîte kâkiti kimarorerini, ininiâ iteene himixinikariko nisâkire. ¹⁶ Iârîâ aãtakasaaki, akinika aãpotiitakasaakiua, axinikari Xesosi ipinini. Iuusaaki atxari Teoso: "Erekapitikai, kotxi Xesosi arêka xiketa ate Îkapani." Amaxiõpekitaakasaakiri komiri, anikasaakiri, aãpitiitakasaakiua, axinikari Kristo îto noropatiko ate Îkapani. ¹⁷ Iuusaaki itomaneua ate, iuaritika âtika komiri atokokana atxaua. Âtika îtotxi atokokana atxaua, kotxi amakinika anikari âtika komiri. Ikara komiri Kristo îto atokokana itxaua.

¹⁸ Hîxinikanako kâkiti Isaeokini îkorapokoritikini. Ninoa sikari Teoso xinitxi. Eereka ninoa nikari ikara xinitxi. Inikasaakinina ikara xinitxi, iuusaaki ninoa oerekari iTeosonetinirina iua. ¹⁹ Kiripa ninireka nisâpiretinî? Nisâpiretari teoso kâkiti kamakiti kona kakamareri. Iua teoso siâkori kona itxa. ²⁰ Iuaritika erepaniko. Ikara atão maerekati. Xoteo minakanuia sikkakiti teoso kâkiti kamakitimoni ninoa sika Satanasi nitiriakorimoni. Kona Teoso atão inakari isikana isiâkitina. Ininiâ na ninirekari hîte moianatiniri Satanasi nitiriakori. ²¹ Kona hîposotari Apiananiri iãkoanaâ hiâtini, apaka Satanasi nitirini iãkoanaâ hiâtini. Kona hîposotari Apiananiri kiena hinikini, apaka Satanasi nitirini kiena hinikini. ²² Atauako anirekatari akaminiri Teoso naiatinuia? Ate tapara apiata atxiiti?

Xesosi Auiâkani Kamakiti

²³ Nota posotari ikinipoko ninirekiti nikamini, txamari kona ikinika erekari nikamini. Ikinipoko ninirekiti nîposotapitika nikamini, txamari kona ikinipoko kamari nãkixinire aneini. ²⁴ ! Hinitapiriko hîteka nirekiti hãpakapini. Himoianatariko âti iua nirekiti apakapini.

²⁵ Hîposotari hinikiniri nipokori amotakoriãtaâ auakari. Iuusaaki kona hîpimaãpiri: "Ia nipokori sikaãkapeka teoso kâkiti kamakitimoni?" !hîtxapeko. Kotxi himarotakasaakiri hinikiniri nipokori teoso kâkiti kamakitimoni sikiko, hãkixinire karotaâka atxiiti. ²⁶ Teoso sâkire sâpiretaua:

Itixi Apiananiri nakiti itxaua, ikinika itixi auakani pakini.

²⁷ Xesosi mauîâkani aiatakasaakii hîte hinipokotini ninoakata, hinirekiniâri hîsa. Hinikariko isikkakitina. Kona hîpimaãpiri: "Ia nipokori teoso kâkiti kamakiti sikaãkapeka?" kona hîtxape, hãkixinire himakarotari Îkapani. ²⁸ Txamari apanakini kâkiti iuaâ

săpiretakasaakii: "Ia nipokori sikaăkapeka teoso kăkiti kamakitimoni," itxa. Iuasaaki kona hinikapiri, kotxi atxiiti hîkaroxiniretari ikara kăkiti mataparaxinireti, kotxi: Itixi Apiananiri nakiti itxaua, ikinika itixi auakani pakini.

²⁹ Na nitxai: "Kona hinikapiri ikara, hîteka âkixinire himakarotakani îkapani," nitxai. Nitxai: "Hinikapiri ikara, âti kăkiti âkixinire himakarotakani îkapani." Nota âkixiniree nota nireekiti nikamini îkapani erekari. Âti kăkiti âkixiniree nota nirekakiti nikamini îkapani !erekari, ininiâ iuamoni ikara nikamakasaaki, nikamari maerekati. Kinirepa !apakata nikaminiri nota âkixinire auiritakiti? ³⁰ Napakapakasaakiri nipokori, ininiâ iuasaaki nimisăkiretari Teoso erekari isikakiti. Ininiâ kinirepa nimisăkirepiretaaka?

³¹ Nisăpiretai hîte. Hinikasaaki, hiatakasaaki, ikinipoko hîkamakasaaki, hîkamariko ikinika Teoso ereka inini imarotiko îkapani. ³² Kona hîtxikitakapiri, Xoteoakori, Xoteo minakaniua, kăkiti Xesosi săkire auiakani pakini kaminiri maerekati. ³³ Ninirekari ikinimane kăkiti nireekiti nikamini, ikinika nikamakasaaki. !Ninirekari erekari notanani îkapani. Ninirekari erekari itomaneri îkapani, imaerekanina Xesosi makatxakini îkapani.

11

Sitoăkini Xesosi Săkire Auiăkani

¹ Hîkamariko nota kamakiti atoko inakari. Kristo kamakiti atoko nota kamini atoktxikana hîkamako. ² Nitariakori, peerekai hîte, kotxi iteene hîxinikano nota. Peerekai hîte, kotxi hîkamapanikari noereekiti nisăpiretakiti iaôka.

³ Ninirekari himarotiniri ia: Kiki auite Kristo itxaua. Sito auite kiki itxaua. Kristo auite Teoso itxaua. ⁴ Ininiâ kiki ikii mâka imamakatzakakaniâ Teoso imisăkiretakasaaki, apaka Teoso săkire oerekasaaki, kona ipaxitari iauite Kristo.

⁵ Sito okii mâka mauakaniâ Teoso omisăkiretakasaaki, apaka Teoso săkire oerekasaaki, kona opaxitari oăuite oitaniri. Okii mâka omatakakaniâ, oa kii kixăkakeri atoko itxa. ⁶ Okii mâka omanirekakaniâ, ininiâ okisauakaiăkotaăkako. Opêtautiniâ, okii kixăkiko xika, oiăko kisauakiko xika, ininiâ iuasaaki okii mâka otaka. ⁷ Kiki misăkiretakasaakiri Teoso, kona erekari itakiniri ikii mâka, kotxi Teoso atoko itxa iua. Ikamaăka Teoso ereka oerekini îkapani. Sito kamaăka oitaniri ereka oerekini îkapani. ⁸ Merepitipanika Teoso kona kamari kiki sito itoa. Teoso kamaro sito kiki itoa. ⁹ Kiki kona kamaăka sito îkapani. Sito kamaăka kiki îkapani. ¹⁰ Ininiâ oa takari okii mâka. Ikara atoko ininiâ, oerekari oauitetiniri oitaniri. Iuasaaki Teoso nitiriakori iaxitiki apaka imarotari oauitetiniri oitaniri.

¹¹ Kiki, sito pakini Apiananiri săkire auikasaaki, sito nirekari kiki. Kiki nirekaro sito. ! Apakata sitonoka auiniâ. !Apakata kikinoka auiniâ. ¹² Kotxi sito ina kiki itoa. Eereka ikinipoko kiki iponaniâ sito itoa. Ikara atoko itxapitikama, Teoso kamari ikinipoko. ¹³ Hîteka hîxinikapiretari ia: Sito kii mâka mauakaniâ, iuasaaki atăokani Teoso omisăkiretini? ¹⁴ Kăkiti itotakiti oerekaua kiki itanoiăkori pêtatiko. ¹⁵ Sito auiniâ oiăko paitanori, oăuikari oiăko, kotxi oiăko sikaăka okii ipatakari îkapani. ¹⁶ Kăkiti nirekiniâri inenamauatini iăkotxi pirenaxika, ininiâ kona ate, ikinika Teoso săkire auiakani pakini !uari ikara. Ininiâ !apaniătai ikara atoko inakari hîkamini.

Xesosi Ipinini Xinikiko Kiiniriti

¹⁷ Uatxa niôkatsopatakitiâ kona niuikai, kotxi hăpotiitakasaakiaua, apia erekari kona hîkama. Apiata maerekati hîkama. ¹⁸ Merepanika nikenakopiretari hăpotiitakasaakiaua Teoso misăkiretiko aikotiâ hîtaparakienatakakiniua. Nixinikari ipixini ikara nikenakopiretakiti atăo inini. ¹⁹ Apanakini oerekakiti atăo minakati auapitika hîte suaki. Akenakotakasaakiri ninoa oerekakiti, aimarotari Teoso !apokaerekatana ninoa. Iua apokaerekatana iua săkire atăo inakari oerekakani. ²⁰ Hăpotiitakasaakiaua, kona atăo hîkamari kiiniri, Apiananiri ipinini xinikiko kiiniriti. ²¹ Kotxi hinikasaaki, himixirikari hîkiena apanakini nikiniri apisapanika. Ininiâ apanakini natxita, apanakini poăta iuasaaki. ²² Auapitika haăpoko hinikini îkapani, hiătini îkapani. Hăpotiitakasaakiaua, homanatarari apanakini Xesosi săkire auiakani. Hîkamapêtatari aitariakori matiini. Kiripa nitxai hîte? Atxiiti hinirekari niuikinii? Kona xatiki niuikai hîte.

²³ Apiananiri săpiretakiti notamoni, iua atoktxikana nisăpiretapekai hîte. Ia nisăpiretai: Îkanôka Apiananiri Xesosi mîkapiritiko oțisaaki, iua kosekari komiri. ²⁴ Iuasaaki imisăkiretari Teoso: "Erekapitikari ia komiri pisikakiti atemoni," itxa. Ipošo atoko imaxiôpekari iua komiri, sika itxari imoianariakorimoni. Itxana: "Apakapa, nika hîtxako. Ia niito okaăka hîte îkapani. Ia komiri hinikasaaki, hîxinikanoko nota. Hîxinikari nipinini hîte îkapani," itxa. ²⁵ Ninoa nipokotaka atoko, mitxi komiri ikosekini atokokana, ikosekari iăkoanatxi. Iuasaaki itxana: "Ia iăkoanatxi oerekari Teoso kamapekari ikamaenetakiti amaneri, kotxi niarêka xiketa hîte îkapani. Ia iăriâ hiătakasaaki, hîxinikanoko nota. Hîxinikariko nipinini hîte îkapani," itxa Xesosi.

²⁶ Ia komiri hinikasaaki, ia iākoanxiākiri hiātakasaaki, hōerekari Apiananiri ipinini kākiti ĩkapani. ĩkara hōerekirinirika iua ĩkorapokoriti kanapiriāko.

²⁷ Maxikatīka kākiti nikiniāri ia komiri, maxikatīka iātiniāri Apiananiri iākoanaākiri, ikamari maerekati, kotxi ! ipaxitari Apiananiri ĩto, iarēka pakini. ²⁸ Ia komiri hinikini apisapanika, ia iākoanxiākiri hiātini apisapanika, erekari hūxinikiniri hāxixinireē auakari. Maerekati auakasaaki, hamanaāri Teoso imakatzakiniri ĩkapani. Eereka ia komiri hinika, ia iāriā hiāta. ²⁹ Maxikatīka hinikiniāri, hiātiniāri, ininiā hiteka akiritari himisiritiko apokini, kotxi kona hīpaxitari Apiananiri ĩto. ³⁰ ĩkara xika itomaneri hite sauaki iōkapeta. ĩkara xika apanakini amianata. ĩkara xika apanakini ipīpeka.

³¹ Amaerekani anitiniā, aamananiāri Teoso makatzakiniri amaerekani, ininiā amisiritiko kona apoka. ³² Txamari Apiananiri apokiniāri amaerekani, imisiritaua ate uatxa, amaerekani atakanapini ĩkapani, ininiā eereka limisiritaikaua iua sākire mauīākanikata.

³³ Ininiā nitariakori, hāpotiitakasaakia Xesosi ipinini xinikiko kiiniriti ĩkapani, hiātapana apanakini. ³⁴ Hinatxitiniā, hinipokotako hāapoko. Ininiā hāpotiitakasaakia ! hīkamari maerekati, ininiā Teoso !imisiritai. Apikomoni nōtākikai ereē napokasaaki.

12

Erekari Matamatakoti Sikakiti Kākitimoni

¹ Nitariakori, nirekari himarotiniri Erekari Matamatakoti sikakiti. ! Apakata himimarotakaniri. ² Mitxi Xesosi sākire mauīākani hinakasaakia, himisirienetaāka, ininiā hāuikari teoso kamakari masākireti teoso atāo inakari ininiua. ĩkara himarotape. ³ Kākiti sāpiretiniāi hite: “Maerekati kamakari itxaua Xesosi,” ininiā uasaaki himarotari Erekari Matamatakoti !auari iuamoni. Kākiti sāpiretiniāi hite: “Apiananiri itxaua Xesosi,” ininiā uasaaki himarotari Erekari Matamatakoti auapitika iuamoni, kotxi ĩkara iua oerekakiti.

⁴ Erekari Matamatakoti siākiti ikini sereti aua, iuaritika Erekari Matamatakoti ātinoka aua. ⁵ Ikini sereti parīkatxi Teoso ĩkapani aua, iuaritika Apiananiri ātinoka aua. ⁶ Ikini sereti Teoso kamakiti aua kākiti ĩkapani, iuaritika Teoso ātinoka aua.

⁷ Erekari Matamatakoti iuaka oerekaua kākitimoni, ikinimane eereka inini ĩkapani. ⁸ Iua Erekari Matamatakoti sikari apanakinimoni isākire kiikiterini ininiuana ĩkapani. Iua Erekari Matamatakoti sikari apanakinimoni isākire kimarorerini ininiuana ĩkapani. ⁹ Iua sikari apanakinimoni Teoso sākire iteene auikinina ĩkapani. Isikari apanakinimoni amianatakani imakananitinina ĩkapani. Erekari Matamatakoti ātinoka aua, iuaritika ikini sereti isika kākitimoni. ¹⁰ Apanakini isikaposotiireta posotiiretxi ikaminina ĩkapani. Apanakini isikaimaroreta Teoso sākire isāpiretinina ĩkapani. Apanakini isikaimaroreta Erekari Matamatakoti sākirauatakasaaki imarotinina ĩkapani, maerekati matamatakoti sākirauatakasaaki imarotinina ĩkapani apaka. Apanakini isikaimaroreta ikini sereti kākiti sākire isākiretinina. Apanakini isikaimaroreta ĩkara sākiretxi mimarotakoti ikenakotakasaakina, isāpiretinirina iua kenakotakani ninoo sākireē ninoo apaka imarotiniri ĩkapani. ¹¹ Ātinoka Erekari Matamatakoti aua. Iuanokara parīkauata ĩkara atoko. Isikari ĩkara isikakiti kākitimoni inireēkiti iaōka.

Kristo Īto Pirena

¹² Kākiti ĩto ātinoka aua, iuaritika aua ikii, ikanoke, iuako, itapike, ikiti, txaāpota. Itori ĩkara atoko inakari aua ĩtotxiā, iuaritika ātinoka ĩtotxi aua. Iua atokokana itxa Kristo ĩto. Xesosi sākire auīākani Kristo ĩto atoko itxauana. ¹³ Atxiiti Xoteoakori atxaua. Atxiiti Xoteo minakanua atxaua. Atxiiti nitirixi amotakoni atxaua. Atxiiti nitirixi minakatua atxaua. Iuaritika ātika ĩtotxi atoko atxaua, kotxi Erekari Matamatakoti ātinoka inakari apoka atemoni. Iua apotiitaua ātika ĩtotxi atoko anini ĩkapani. Iua aua aāxixinireē.

¹⁴ Kākiti ĩto ātinoka aua, iuaritika aua ikii, ikanoke, iuako, itapike, ikiti, txaāpota. ĩtotxiā kaiāopokori aua. ¹⁵ Ininiā ! apakata kiŭtxi sāpiretiniā: “Uakōtxi ! nitxaua, ininiā ĩtotxiā auakari ! nitxaua.” ĩkara atoko isāpiretiniā, iuaritika ĩtotxiā auakaripitikara kiŭtxi. ¹⁶ Kenakokitxi sāpiretiniāri: “Okītxi ! nitxaua, ininiā ĩtotxiā auakari ! nitxaua.” ĩkara atoko isāpiretiniā, iuaritika ĩtotxiā auakaripitikara kenakokitxi. ¹⁷ ĩtotxi okītxinoka auiniā, kanatokopa itxa kākiti kenakorauatini? ĩtotxi kenakokitxinoka auiniā, kanatokopa itxa kākiti imixikarauatini? ¹⁸ Teoso kamari ikinika ĩtotxiā auakari. Iua inireēkiti iaōka ikaminana ninoo. ¹⁹ Ātinoka ĩtotxi auakiti auiniā, ĩtotxi ! auari. ²⁰ ĩtotxiā auakani itori aua, iuaritika ĩtotxi ātinoka aua.

²¹ Okītxi kona posotari isāpiretiniri uakōtxi: “Kona nota nirekai pite.” Apaka kiŭtxi kona posotari isāpiretiniri kiŭtxi: “Kona nota nirekai pite.” ²² Kona ĩkara atoko itxa. Atxiiti auākatari āti aīto auakari !itxa, kotxi !kataparari, iuaritika ĩkara mauakanā, aīto ! iparīkauata atāo. ²³ Kākiti tīretari iītoā auakari poiāori kākiti atamatakiti. Ipatari apanakini

ītoā auakari kākiti matamatakani īkapani. ²⁴ Aītoā auakari apiata apotxitakiti aua apaka. Kona apatari ikara. Apanakini aītoā auakari Teoso takari aītoā iteene apaxitini īkapani. ²⁵ Ininiā Teoso kamari ītotxi ātinoka inini. Ikamari ītotxiā auakani itiretakakiniuana īkapani. Apanakini ītotxiā auakari naiatiniāri apanakini ītoā auakari, lapakata. ²⁶ Āti ītotxiā auakari tsiika. Iuasaaki ikinika kākiti īto atatsiuruata. Āti ītotxiā auakari iuikaāka, ininiā ikinika ītotxi auakini poxokoniuaata.

²⁷ Kristo īto atoko hītxaua hīte. Ītotxiā auakani atoko hītxaua Kristo ītoā. ²⁸ Teoso sākire auīākani ītotxiā auakani atoko itxauana. Ikini sereti parīkatxi aua ītotxi īkapani akamini īkapani. Merepanika Teoso mereēri iua iokanatakini. Eereka imereēri kākiti Teoso sākire sāpiretakani. Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auīetxiakori, kākiti sākire apanakini mimarotakiniti sākiretakani pakini. Teoso takari ikara atoko inakani parīkauatakani iua sākire auīākani imoianatinina īkapani. ²⁹ Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰ Kona ikinimaneni amianatakani makananitakani txaua. Kona ikinimaneni imarotari isākiretiniri kākiti sākire apanakini mimarotakiniti. Ikinimane liposotari isāpiretiniri ikara sākiretxi iua kenakotakanimoni ninoa sākireē ninoa apaka imarotini īkapani. ³¹ Auapitika ikara Erekari Matamatakoti sikakiti aparīkauatini īkapani. Iuaritika hinirekariko isikakiti apiaerekatakari. Uatxa noerekaiko isikakiti apiaerekatakari.

13

Tiraōkitxi Pirena

¹ Atxiīti nimarotari ikini uāka sākire nisākiretini. Atxiīti nimarotari Teoso nitiriakori iaxitikini sākire nisākiretini, txamari iuasaaki nitiraōkiuatini !uari, ininiā !apakata nimarore. Metao āsokiko ene atoko nitxa. Ipi panera tore āsokiko ene atoko nitxa. ² Atxiīti nimarotari Teoso sākire nisāpiretini. Atxiīti nimarotari ikinipoko apanakini mimarotakiniti. Atxiīti ikinipoko imaroretxi aua notamoni. Atxiīti iteene nauikari Teoso posotiire, ininiā niposotari ōtanoxiratarī nipaniātini ātiātaā isini. Txamari iuasaaki nitiraōkiuatini !uari, ininiā minakati nitxaua. ³ Atxiīti nisikari ikinipoko nitii, nitxineirote pakini matxineirotenimoni. Atxiīti nauiritari niito arikiko. Txamari iuasaaki nitiraōkiuatini !uari, ininiā !apakata.

⁴ Pitiraōkiuatakasaaki, piposotari piātapiniri pinirekakiti apokini. Pitiraōkiuatakasaaki, pikamari erekari ātimoni. Pitiraōkiuatakasaaki, kona pixikotari āti. Pitiraōkiuatakasaaki, kona pisāpiretari apanakini piuikiniri pikamakiti. Pitiraōkiuatakasaaki, !piuikaua. ⁵ Pitiraōkiuatakasaaki, kona pitxīkitakari āti pētauatini. Pitiraōkiuatakasaaki, kona pinirekari piteka nireēkitinani. Pitiraōkiuatakasaaki, !katimari pomanākarauatini. Pitiraōkiuatakasaaki, !pixinikapinikari maerekati apanakini kamakiti pitemoni. ⁶ Pitiraōkiuatakasaaki, kona pipoxokoniuaata āti kamakasaakiri maerekati. Pitiraōkiuatakasaaki, pipoxokoniuaata atāo inakari pikenakotakasaaki. ⁷ Pitiraōkiuatakasaaki, pimīteenekari ikinipoko. Pitiraōkiuatakasaaki, pauikari kākiti sākire. Pitiraōkiuatakasaaki, pauikari kākiti kamaenetakiti ikamini. Pitiraōkiuatakasaaki, !katimari pitakanpiniri piparīka pikamini. ⁸ Tiraōkitxi !ixipoka. Txamari kākiti sāpiretakiti xipokapitikako. Kākiti sākiretiniri āti uāka sākire xipokapitikako. Kākiti imarore ereēkokapitikako. ⁹ Kotxi poiāonoka aimarore. Poiāonoka Teoso sākire aimarota asāpiretini. ¹⁰ Āti ōti aimarotari ikinipoko atāo inakari. Iuasaaki atāo minakati !auaika. ¹¹ Amarini ninakasaakiuua, nisākirauata amarini sākirauatini atokokana. Iuasaaki nimarotakiti amarini imarotakiti atoko itxa. Nixinikakiti amarini xinikakiti atoko itxa iuasaaki. Txamari kikipe ninakasaakiuua, !ninarekaikari amarini atokokana nininiua. ¹² Uatxa aātamatakiti Teoso oerekakiti !aposota iteene aātamatini. Ātakaāri katxikoroā atamatakori atoko itxa aātamatakiti, Teoso oerekakiti. Āti ōti Teoso apisatoō aāpoka. Uatxa poiāonoka nimarota. Āti ōti Teoso apisatoō aāpokasaaki, nimarotari ikinipoko, Teoso imarotininino atokokana.

¹³ Ininiā aua ipi āti pakini erekari aākixinireē auakari. Aua Teoso sākire auikiko. Aua Teoso kamaenetakiti ikamini auikiko. Aua tiraōkitxi. Ikara tiraōkitxi apiaerekatakari.

14

Erekari Matamatakoti Siākiti

¹ Ininiā ikiniōtika hīturaōkiuatako. Hinirekariko Erekari Matamatakoti siākiti. Apiata hinirekariko iua sikini Teoso iokanapirena hīsāpiretini. ² Kākiti sākire mimarotakoti sākiretakari misākiretari Teoso. !Misākiretari kākiti, kotxi kākiti !imarotari isākire. Erekari Matamatakoti posotiireē isāpiretari atāo inakari Teoso oerekakiti. ³ Teoso sākire

săpiretakaripekana misăkiretari kăkiti. Iua txîkitakari kăkiti apiata auikiniri Teoso săkire. Isikataraxiniretana ninoa. Imîkapiritari ninoa âkixinire. ⁴ Kăkiti săkire mimarotakoti săkiretakari, iuaka txîkitakaua apiata auikiniri Teoso săkire. Teoso săkire săpiretakaripekana, txîkitakari ikinika Xesosi săkire auiaġkani apiata auikinirina Teoso săkire. ⁵ Erekarî hîte hîkinika săkiretiniri kăkiti săkire mimarotakoti. Iuaritika apiaerekata hîsăpiretiniri Teoso săkire, kotxi Teoso săkire săpiretakari apiari itxaua. Kăkiti săkire mimarotakoti săkiretakari poiăori itxaua. Iua săpiretiniări isăkire kenakotakani ninoa săkireê ninoa apaka imarotiniri İkapani, iuasaaki erekari, kotxi iuasaaki itxîkitakari Xesosi săkire auiaġkani apiata auikiniri Teoso săkire. ⁶ Hîtemoni napokasaaki, nisăkiretiniări kăkiti săkire mimarotakoti, nitxîkitakatai hîte apiata hăuikiniri Teoso săkire? Konapitini. Ininiâ kona itxa. Noerekiniâi Teoso oereêkiti notamoni, nisăpiretiniâi Teoso imarore, nisăpiretiniâi Teoso săkire, noerekiniâi Teoso săkire atăo hăuikini İkapani, iuasaaki nitxîkitakatai hîte apiata hăuikiniri Teoso săkire. ⁷ Maxinikari xikari moianatakari atxiiti viorăo, atxiiti xăkakori pakini. Kăkiti mimatireni kaminiări ikara, iuasaaki xikari atăo inakari !imarotaăka. Ienenoka aua.

⁸ Ătıpekana noerekai. Trăpeta ene atăo ininiâ, sotatoakori kenakotakasaakiri, aiamatana ineenamautini İkapani. Trăpeta ene na atăo ininiâ, sotatoakori !imarotari neenamatzı manapıe inini.

⁹ Iua atokokana kăkiti săkire imarotakiti himasăkiretakaniâ, kiriăpa ninoa imarotari hîsăpiretakiti? Ikara atoko hîsăkirauatinâ, maxikatııka hîsăkirauata. ¹⁰ İtori uăkati săkire aua ikini itixiti. Apakata ikinika imarotiko. ¹¹ Kăkiti săkire nimimarotakaniâ, ininiâ notamoni iua âti tixinikiri atoko itxa. Apaka iuamoni nota âti tixinikiri atoko nitxa. ¹² Hîte iteene nirekari Erekarî Matamatakoti siăkiti hăpakapini, ininiâ apiata hinirekariko isikini isikakiti Teoso săkire auiaġkani iua săkire iteene auikinina İkapani.

¹³ İkara atoko ininiâ, erekari kăkiti săkire mimarotakoti săkiretakari amanainiri Teoso isikaimaroretiniri iua săpiretiniri isăkire kenakotakani ninoa săkireê ninoa apaka imarotiniri İkapani. ¹⁴ Teoso nimisăkiretiniâ kăkiti săkire mimarotakotiâ, ninixire misăkiretari Teoso, txamari ! nimarotari notaka săkire. ¹⁵ Ininiâ kipa atăo nıkamini? Ia atăo: Nımisăkiretari Teoso nixinireê. Apaka nımisăkiretari Teoso niıkiteê. Nixikarauata nixinireê. Apaka nixikarauata niıkiteê. ¹⁶ Kăkiti săkire mimarotakotiâ hîsăpiretiniări Teoso ereka inini, kăkiti ereê pisăkire mimarotakani sauaki, ! iposotari “atăopitikara” inini, kotxi ! imarotari pisăpiretakiti. ¹⁷ Atxiiti atăo hîsăpiretiniri Teoso ereka inini, txamari iuasaaki kona pitxîkitakari iua kăkiti apiata auikiniri Teoso săkire.

¹⁸ Peerekari Teoso, kotxi apiata isikaimaroretano nota nımisăkiretiniri iua kăkiti săkire mimarotakotiâ. Poiăonoka hîte imarotari kăkiti săkire mimarotakotiâ himisăkiretiniri iua. ¹⁹ Iuaritika, Xesosi săkire auiaġkanikata nauakasaaki, apiaerekata nisăpiretinina sîkonoka săkiretxi ninoaka săkireê, kotxi apakata ninoa imarotiniri nisăkire. Nipositiniări sîko mio săkiretxi kăkiti săkire mimarotakotiâ nisăpiretiniri kăkiti, itori nisăkire, iuaritika maxikatııka nisăkirauata, kotxi kăkiti limarotari.

²⁰ Nitariakori, !apakata himarore amarini xapitikiri imarore atokokana inini. Iuaritika amarini xapitikiri makamakaniri maerekati âtimoni, iua atokotxikana amarini xapitikiri atoko İhıkamapiri maerekati âtimoni. Aneekari imarore atoko itxako hîte imarore. ²¹ Teoso săkire iăkatsopatakori txari:

Niokanatarı âti uăka hîtemoni, hîte nımisăkiretini İkapani. Ăti tixinikini săkireê nımisăkiretai hîte. Iuaritika kona hîkăpitari nisăkire, itxa Apiananiri.

²² Ininiâ Teoso săkire auiaġkari săkiretiniări Teoso săkire mauiaġkani săkire, iua mimarotakiniti, Teoso săkire mauiaġkani iuasaaki imarotari Teoso posotiire. Teoso săkire auiaġkari săpiretiniări Teoso săkire apanakini Teoso săkire auiaġkanimoni, ninoa iuasaaki imarotari Teoso posotiire. ²³ Teoso săkire auiaġkani apotiitiniâua, ikinimane săkiretiniări kăkiti săkire mimarotakotinani, iuasaaki kăkiti Teoso săkire poiăopanika imarotakari İroiniâ, Teoso săkire mauiaġkati atxiiti İroiniâ, ininiâ iua uăkakai hîte mapitxiritakani hininiua.

²⁴ Txamari ikinimane săpiretiniări Teoso săkire iuasaaki, Teoso săkire mauiaġkati İroiniâ, kăkiti Teoso săkire poiăopanika imarotakari İroiniâ, ininiâ iua imarotari maerekati kamakari ininiua. Iuasaaki imarotari imisiritiko auapitika âti ôti. ²⁵ Iuasaaki ikinimane imarotari iua xinikakiti âkixinireê. Ininiâ iuasaaki ikapotoreekaua Teoso apisatoô. İtxari: “Atăopitikara Teoso aua hîte sauaki,” itxa.

Kăkiti Apotiitakasaakıua Teoso Apisatoô

²⁶ Nitariakori, kanatokopa itxa Teoso săkire auiaġkani apotiitakasaakıua? Aăpotiitakasaakıua, akinika aminari xikari Teoso İkapani. Akinika iposope Teoso săkire aăerekini atăo aimarotini İkapani. Akinika iposope Teoso oerekakiti asăpiretini. Akinika iposope kăkiti săkire mimarotakoti asăkiretini. Akinika iposope iua săpiretakiti asăpiretini

ikinimane imarotiniri ikapani. Ikara atoko itxa aãpotiitakasaakia Teoso apisatoõ. Iuasaaki makamari ikinika, Teoso sãkire Teoso nakitiakori apiata auikini ikapani. ²⁷ Iuasaaki kãkiti sãkiretiniãri kãkiti sãkire mimarotakoti, ipinoka kãkiti kamari ikara atoko inakari, atxiiti ipi ãti pakini kamari ikara atoko inakari. !Apakata apikomoni kãkiti sãkiretiniãri kãkiti sãkire mimarotakoti iuasaaki. Æti sãkirauatakasaaki, apanakini kenakotari. Ætinoka sãkirauata iuasaaki. Isãkirauataka atoko, ãti sãpiretari isãpiretakiti isãkire mimarotakani sãkireẽ, isãpiretakiti imarotinina ikapani. ²⁸ Iuasaaki isãkire sãpiretakari mauakanã, !apakata kãkiti sãkire mimarotakoti sãkiretakari sãkirauatini. Erekarã ãkixinireẽ isãkirauatini Teosokata.

²⁹ Kãkiti apotiitakasaakia Teoso apisatoõ, iuasaaki ipi, atxiiti ipi ãti pakini Teoso sãkire sãpiretakani sãpiretari Teoso sãkire. Iuasaaki apanakini xinikariko iua sãpiretakiti, atão inini imarotini ikapani. ³⁰ Topãkakari xinikasaakiri apikomoni Teoso oerekakiti, ininiã iuasaaki sãkirauatakari iotoka, Teoso oerekakiti topãkakari sãpiretini ikapani. ³¹ Ikara atoko ininiã ikinimane posotari Teoso sãkire isãpiretinina. Teoso sãkire sãpiretakani ãti sãkirauata, eereka ãti sãkirauata. Ikara atoko itxaãpotana. Ininiã ikinimane oerekaãkako. Ikinimane sikataparaxiniretaãkako. ³² Teoso sãkire sãpiretakani posotari iãtapiniri Teoso oerekakiti isãpiretini ikapani. ³³ Kotxi Teoso kona potxitari ienenoka auini. !Apakata kaiãopokori sãkirauatini, kotxi apanakini !imarotari ninoo sãpiretakiti. Neenamatzã atoko itxa. Teoso nirekari inakitiakori kamakiti atão inini apotiitakasaakia Teoso apisatoõ.

³⁴ !Apakata sito sãkirauatini hãpotiitakasaakia Teoso apisatoõ. !Auiritaãka osãkirauatini iuasaaki, kotxi Teoso sãkire iõkatsopatakori paniãtaro sito kaminiri kiki paniãtakiti. ³⁵ Ninoo nirekiniãri ipimarauatinina imimarotakinini imarotinina ikapani, ininiã ninoo pimaãna itanirina aapokona apokasaakina. Sito sãkirauatiniã kãkiti apotiitakasaakia Teoso apisatoõ, kãkiti pãtauata oa sãkirauatini xika.

³⁶ Hite kona apokaerekatari nisãpiretakiti? Atxiiti hite kamari Teoso sãkire? Konapitini. Atxiiti Teoso sãkire iokanataãka hitenanimoni? Konapitini.

³⁷ Teoso sãkire sãpiretakani hininiãua, Erekarã Matamatakoti siãkiti auiniã, ininiã iuasaaki himarotari ikara nisãkire niõkatsopatakiti Apiananiri paniãtakiti inini. Hīsãpiretari hãuikiniãri ikara. ³⁸ Himamaãkatakaniãri ikara nisãkire, apanakini limaãkatari hite sãkire.

³⁹ Ininiã nitariakori, iteene hinirekariko Teoso sãkire hīsãpiretini. Apaka hãuiritariko kãkiti sãkire mimarotakoti sãkiretiko. ⁴⁰ Ininiã hãkamariko ikinika atão hãpotiitakasaakia Teoso apisatoõ, Teoso sãkire ikinimane kenakotini ikapani.

15

Xesosi Õkitikiniua Pirena

¹ Nitariakori, uatxa iuaãkana nirekari hite xinikiniri Teoso iokanapirena erekarã hitemoni nisãpiretakiti. Hite apakapapekari ikara nisãpiretakiti. Hite iteene auikari ikara.

² Ikara Teoso iokanapirena erekarã oerekai himaerekani makatxakiko. Ininiã atão hãxinikariko ikara nisãpiretakiti. Itene hãuikiniãri Teoso iokanapirena erekarã, himaerekani makatxakaãka. Atão minakati hãuikiniã, ininiã maxikatitika hãuikari.

³ Nisãpiretipekai mitxi nota apakapakiti, kotxi ia himimarotakanã !apakata. Ia napakapakiti: Kristo ipina amaerekani imakatxakini ikapani. Teoso sãkire iõkatsopatakori sãpiretaua ikara. ⁴ Eereka ikataãka. Ipi õti, ãti õtisaaki iuaãkana õkitikaua. Teoso sãkire iõkatsopatakori sãpiretaua ikara. ⁵ Eereka Petro atamatari iua. Eereka ikinika Kristo moianariakori atamatari iua. ⁶ Eereka kiẽtosi ãtariakori atamatari iua ãti õti apotiitakasaakia. Kaiãopanikani ninoo auapanika. Ætikaka ipiẽ. ⁷ Eereka Txiake atamatari iua. Eereka ikinika Xesosi iokanatakini atamatari iua. ⁸ Imapotõkire nota apaka atamatari iua. ! Natamatari Xesosi iõrapokoriti itipokotakasaaki. Eereka iua apoka notamoni.

⁹ Xesosi iokanatakiti poiãori nitxaua. Apanakini iua iokanatakini apiata. Mitxi ! erekarã nikamakiti, kotxi nimisiritana Xesosi sãkire auiaãkani Teoso nakitiakori, iuaritika Xesosi akiritano iua iokanatakiti nininiua. ¹⁰ Teoso sikari ikinipoko erekarã notamoni, ininiãkara iua iokanatakiti kãkitimoni nitxaua. Kona maxikatitiani sikari ikinipoko erekarã notamoni, kotxi iteene nipaãkauata Teoso ikapani. Apanakini Xesosi iokanatakini iteene paãkauata, iuaritika nota paãkauata apiata. Kona nota posotiẽreẽni nipaãkauata. Ikinipoko erekarã Teoso sikakiti notamoni sikaposotiẽretano nota nipaãkauatini ikapani. ¹¹ Atxiiti nota sãpiretai ikara Kristo sãpiretakiti. Atxiiti apanakini iua iokanatakini sãpiretai. Ikara Kristo sãpiretakiti ate sãpiretai. Ikara Kristo sãpiretakiti hite auika.

Ipikani Õkitikiko Pirena

¹² Ate sãpiretai Kristo iuaãkana õkitikiniua. Ininiã kinirepa ãtikaka hite txari ia? “!Auari ipikani iuaãkana õkitikiniua,” hitxa. ¹³ Ipikani iuaãkana õkitikiniua mauakanã, ininiã Kristo apaka kona õkitikaua. ¹⁴ Kristo mõkitikaniãua, ininiã maxikatitika asãpiretai iua sãkire. Kristo mõkitikaniãua, maxikatitika hãuikari iua sãkire. ¹⁵ Kristo mõkitikaniãua, na atão

asâpiretai Teoso kamakiti, kotxi ate sâpiretapekai iua ôkitikiniiri Kristo. Ipîkani iuaîkana ôkitikiko mauakaniâ, Teoso kona ôkitikari Kristo. ¹⁶ Kotxi ipîkani iuaîkana môkitikakaniâua, Kristo apaka kona ôkitikaua. ¹⁷ Kristo iuaîkana môkitikakaniâua, maxikatîika hâuikari iua sâkire, kotxi !imakatxakari himaerekani. ¹⁸ Kristo iuaîkana môkitikakaniâua, ipîkani iua sâkire auîâkani pîpinanaka. ¹⁹ Xesosi môkitikakaniâua, iuaritika ikiniôtika ate auikari iua sâkire îkorapororiti aâuakasaaki, ininiâ mîlkiteni apiarini atxaua ate.

²⁰ Ikara na atâo. Uatxa maxinikari atâo inakari. Kristo ipîkaripeka ôkitikapeêkaika. Iua amâtiiri merepitipanika auakari atoko itxa. Iua merepanika ôkitikaua, ininiâkara aimarotari apîkasaaki ate apaka ôkitikaua. ²¹ Âti kiki kamakitiâ ipîkitxi apoka ikinimanemoni. Iua atokokana âti kiki kamakitiâ, ipîkani ôkitikiko apoka. ²² Adâo kamakitiâ ikinimane ipina. Kristo kamakitiâ iua sâkire auîâkani auapininiika âtipirika. ²³ Kâkiti ôkitikaâka ia atoko. Kristo mitxi ôkitikaua. Iua merepanika ôkitikakariua. Ikanapiriâkasaaki iua nakitiakori ôkitikauako apaka. ²⁴ Eereka itixi xipokaâka. Iuasaaki ikinika auîtetxi maerekati, ikinika kaposotiireri maerekati pakini xipokako. Eereka ikinika iua nakitiakori isika iri Teosomoni. ²⁵ Kristo ikinimane auîte itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa. ²⁶ Imokaiakari atoko itxa ipîkitxi. Imokaiakariakori ixipokasaaki, imapotôkire ixipokari ipîkitxi. ²⁷ Teoso sâkire îokatsopatakori txari:

Teoso takapekari ikinika iua kiti patapi.

Ikara Teoso sâkireê “ikinika” aua, iuaritika aimarotari iuaka !itakaua Xesosi kiti patapi, kotxi Teosora txîkitakari Xesosi ikinimane auîte ininiua. ²⁸ Kristo ikinimane auîte inakasaakiua, iua Teoso âkiri auîtetariko Teoso, kotxi mitxi Teoso txîkitakari iua ikinimane auîte ininiua. Iuasaaki Teosonoka ikinimane auîte itxaua.

²⁹ Ipîkani môkitikakaniâua, kinirepa apanakini patxisataâka ipîkani ôkitikiniua îkapani?

³⁰ Atepekana, ipîkani môkitikakaniâua, kinirepa ikiniôtika amîteenekari monôkori?

³¹ Nitariakori, nimarotari ipîkitxi monôkori ikiniôtika. Ikara nisâpiretai, kotxi niuikai hîte. Niuikari aâuini aâuîte Kristo Xesosikata. ³² Uai Êpeso sitatxitiâ kâkiti âkiti kaneenamari atoko inakani nirekari imâikini nota. Ipîkani môkitikakaniâua, kinirepa nimîteenekari ikara atoko inakari? Ipîkani môkitikakaniâua, ininiâ atxari:

Manipokota, maiâta, kotxi katana apinako.

³³ Kona hâuiritapiri âti misirienetini. Kâkiti erekari moianatiniâri maerekati kamakani, ninoa txîkitakari iua maerekati kamakari ininiua. ³⁴ Himerekako. Himarotariko atâo inakari hikamini îkapani. Maerekati !hikamapinikako. Hipêtauatoko, kotxi apanakini hîte !imarotari Teoso.

Kâkiti Îto Ôkitikasaakiua

³⁵ Atxiiti âti txari: “Kanatokopa itxa kâkiti ôkitikiko? Iuasaaki kanatokopa inakaripa îito?” itxa. ³⁶ !Kiikiteri kâkiti pimarauatini ikara atoko. Takariki, pimatakakaniâri kipatxi âki !ipitxaka. ³⁷ Pitakarauatakasaaki, pitakari okinoka, atxiiti triko, atxiiti kimi. Takari aneêkari kona pitaka. Kona takariki atokoni itxa takari ipitxakasaaki. Ipitxere ipinimoni. ³⁸ Teoso kamari takari pitxere inireêkiti iaôka. Ikini takariki Teoso sikari ipitxere. ³⁹ Âti xinitxi kona âti xinitxi atokoni. Aua kâkiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰ Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi takote auakani ipinimoni. ⁴¹ Peereri atokatxi. Peereri kasiri apaka, txamari kasiri âtiâo. Peereri îoriki apaka, txamari îoriki âtiâo. Apaka âti îoriki âti îoriki atokotxikana !auari.

⁴² Iua atokokana itxa ipîkani iuaîkana ôkitikikosaaki. Îtotxi ixiti taâkori !auaika. Iua ôkitikakori kona ipinaika. ⁴³ Îtotxi katikosaaki, !erekari. Îtotxi iuaîkana ôkitikikosaaki, peerekari. Îtotxi katikosaaki !kataparari. Iuaîkana ôkitikikosaaki, kataparari. ⁴⁴ Aîto katikosaaki, aîto itixi auakani îto atokotxikana. Aîto iuaîkana ôkitikikosaaki âtiâo aîto. Îtotxi îkorapororiti aâuini îkapani aua. Apaka aua îtotxi ipinimoni, Teoso sikakiti apîkasaaki. Ikara îtotxi îpina. ⁴⁵ Teoso sâkire îokatsopatakori txari:

Teoso txîkitakari kiki merepitipanika auakari Adâo inakori auâki inini.

Adâo imatonôkari auakari, Kristo inakori, txîkitakari kâkiti auâki inini, apaka imapinakani îkapani.

⁴⁶ Teoso nireêkiti axinikini kona apoka merepanika. Merepanika axinikari ateka nireêkiti, eereka axinikari Teoso nireêkiti. ⁴⁷ Kiki merepitipanika auakari kipatxi kamakori itxaua. Âti kiki Apiananiri, Teoso tixinekiri iua. ⁴⁸ Ikinimane kâkiti itixi auakani, iua Adâo kipatxi kamakori atokokana. Ikinimane kâkiti Teoso tixine sikani, Kristo Teoso tixinekiri atokokana. ⁴⁹ Aponaniâkasaaki, kipatxi kamakori aîto, Adâo îto atokokana itxa aîto. Iua atokokana Teoso tixinekiri îto, Kristo îto atokokana itxako aîto.

⁵⁰ Nitariakori, nisāpiretai hīte, ! apakata kākiti īto, iarēka pakini sini Teoso auītetxi ininiātaāua. Ipinakari kona auapininiika ! itxa. ⁵¹ Hīkenakotariko nisākire. Nisāpiretaiko kākiti mimarotakiniti mitxi. Kona ikinimaneni ipina. Iuaritika amakinika t̄x̄ikitakaāka ipinipo aniniua. ⁵² Iuasaaki imapotōkire trōpetakero xōkaāka. Iuasaaki mēkokari katimari atoko itxa. Poki katimari matākaātini atoko itxa. Amakinika katimaritika t̄x̄ikitakaāka ipinipo aniniua. Iua trōpetā xōkikosaaki, iuasaaki ipikani ōkitikaāka. Kona ipinaikanako. Iuasaaki at̄x̄ikitakaāka ipinipo aniniua. ⁵³ Kotxi arakakani t̄x̄ikitakaākako miarakakani ininiua. Ipikani t̄x̄ikitakaākako mipikani ininiua. ⁵⁴ Arakakani t̄x̄ikitakikosaaki miarakakani ininiua, apaka ipikani t̄x̄ikitakikosaaki mipikani ininiua, iuasaaki Teoso sākire iōkatsopatakori apopeka. Ia atoko itxa Teoso sākire kitxakapirika:

Ip̄ikitxi xipokaākako. Auape kāiatakari, ip̄ikitxi xipokakari.

⁵⁵ Ip̄ikitxi t̄sii !auaika. Maerekani misiritikoātaā anikakari kona kāiata.

⁵⁶ Ip̄ikitxi t̄sii mitxi aua amaerekani xika. Teoso paniātakiti iōkatsopatakori oereka amaerekani. Teoso paniātakiti iōkatsopatakori mauakaniā, !auari kākiti misiritiko. Txamari maerekanitxi tapara aua, kotxi Teoso paniātakiti iōkatsopatakori auapitika. ⁵⁷ Erekapititari Teoso, kotxi aūiite Xesosi Kristo t̄x̄ikitakaua akāiatini.

⁵⁸ Ikara atoko ininiā, nitariakori nota t̄retakini, kataparaxinire h̄txako. Kona h̄uiritapiri apanakini t̄x̄ikitakinii maerekati h̄kamini. H̄ipar̄ikauatoko ikiniōtika Apiananiri ikapani, kotxi himarotari maxikatika !h̄ipar̄ikauata iua ikapani. H̄ipar̄ika īki h̄apakapapitikako.

16

Txineiro Sikiko Xesosi Sākire Auiākani Īkapani

¹ Uatxa nisāpiretai txineiro himakatzakini Teoso nakitiakori ikapani. H̄ikamariko Karāsia tixini auakani nipaniātini atokotxikana. Nipaniātana ninoa Teoso misākiretikoātaā apotitakaniua ia atoko: ² Ikinii Tom̄iko h̄ikinika h̄ite n̄kataro txineiro ninoa ikapani. Txineiro Teoso siākiti iaōka, hin̄ikataro ipixini ninoa ikapani. Ininiā ereē napokasaaki apikomoni txineiro kona apotitiāka. ³ Napokasaaki ereē, niokanataro kākiti, txineiro h̄isikakito anikakani Xerosareēmoni. H̄isāpiretano h̄iokanatsopatakitiā himereēkini h̄txineirote anikakani ikapani. ⁴ Atxiiti erekari nota sini apaka, ininiā ninoa moianatano nota.

Paoro Paniātakiti Pirena

⁵ Masetónia tixinimoni nisako, eereka napoka h̄itemoni, kotxi nisapitikako Masetóniamoni. ⁶ Iuasaaki atxiiti nikaikota h̄itekata. Atxiiti nikaikota mitaāsaaki h̄itekata. Ininiā eereka h̄ite posotari himoianatinino nota naiamatakasaaki apikoxiti nisini ikapani. ⁷ Kona ninirekari mapaōtinoka nikaikotini h̄itekata uatxa. Apiananiri auringitiniāno, ninirekari apikomoni nikaikotini h̄itekata. ⁸ Txamari nikaikota uai Épeso sitatxiti P̄etekōsitxi kiiniriti manapi ōti. ⁹ Kotxi uatxa kaiāopokori kākiti ikorapokoritxi auakani nirekari nisāpiretiniri Teoso iokanapirena erekari ninoamoni. Txamari kaiāopokori kākiti linirekano.

¹⁰ Atxiiti Tximōtxio sari h̄itemoni, ininiā h̄apakapariko iua, imap̄ikarauatakani ikapani h̄ite sauaki, kotxi iua par̄ikauata Apiananiri ikapani nota par̄ikauatini atokokana. ¹¹ Ininiā kona apakata kākiti mamaākatakani iua. Ikanapiriākasaaki notamoni, iuasaaki h̄iokanataro iua erekaxinire inini. Niātapani iua aītariakorikata.

¹² Iteene ninirekari aītari Aporo apokini h̄itemoni aītariakorikata. Txamari uatxa linirekari isini h̄itemoni, iuaritika iposotakasaaki isapitikako h̄itemoni.

¹³ Araōkire h̄txako. Iteene h̄auikariko Teoso sākire. H̄itaparaxinireritika h̄auako. H̄itapararitika h̄auako Teoso ikapani. ¹⁴ Xesosi tiraōkiā ikinipoko h̄ikamako.

¹⁵ H̄ite imarotari Esitēpana, inirimane pakini. Ninoa Akaia tixini auakani. Iuaātaā ninoa merepitipanika auikari Xesosi sākire. Ninoa iteene par̄ikauata Teoso nakitiakori ikapani. Nitariakori, iteene nipaniātai h̄ite. ¹⁶ H̄ikamariko kākiti ikara atoko inakani paniātakiti. H̄ikamariko ikinimane amoianari paniātakiti, atekata par̄ikauatakani paniātakiti. ¹⁷ Esitēpana, Potonato, Akaiko pakini apokasaaki uai, nipoxokoniua, kotxi iminarina notamoni mauakati h̄ite masikakiniti. ¹⁸ Ninoa sipapoxokonitari nākixinire, h̄ite ākixinire apaka. Erekarī ate iuikiniri kākiti ikara atoko inakani.

¹⁹ Teoso misākiretikoātaā apotiitakaniua Ásia tixini auakani xinikamanapitai h̄ite. Ákira inakori, Pirisira inakoro pakini iteene xinikamanapitai h̄ite, kotxi Apiananiri nakiti h̄txaua. Apaka Xesosi sākire auiākani ninoa aapoko apotiitakaniua xinikamanapitai h̄ite. ²⁰ Ikinimane aītariakori uai auakani xinikamanapitai h̄ite. Haōkitakakasaakia, himaratakauako, kotxi Teoso nakitiakori h̄txaua.

²¹ Nota Paoro iōkatsopataro ia nitakapiretanapini niuakoā. ²² Kākiti matiretaniāri Apiananiri Xesosi Kristo, maerekati takaāka iua nopini.

“Apiananiri, uai pina atemoni,” atxari Xesosi.

²³ Apiananiri Xesosi Kristo sikari ikinipoko erekari hītemoni. ²⁴ Nitiretai hīte hīkinika, kotxi Kristo Xesosi nakitiakori atxaua. Ameē.

2 KORĪTO Paoro Iokanatsopatakiti Iuaīkana Korīto Auakanimoni

¹ Nota Paoro, Xesosi Kristo iokanatakitino. Teoso nirekari iokanatinino kākitimoni isākire nisāpiretini ikapani. Ia aātsopa niōkatsopata. Aītari Tximótxio aua notakata. Ia iōkatsopari niokanata kākiti Teoso mereēkinimoni, Korīto sitatxiti auakanimoni. Apaka ia iōkatsopari niokanata kākiti Teoso nakitiakorimoni, Akaia tixini auakanimoni. ² Aīri Teoso, Xesosi Kristo Apiananiri pakini sikari ikinipoko erekari hītemoni. Ikamaerekaxiniretai hīte.

Teoso Mīkapiritiniua Pirena

³ Peerekari Teoso. Aāuīte Xesosi Kristo iri itxaua. Kaamonīkareri iua. Āti kākiti amonīkakari iua atoko inakari ! auari. Amaerekaxinirensaaki, iua atekata aua. Amaerekaxinireni imaktxakināua. Iuasaaki imīkapiritāua. ⁴ Imīkapiritāua amaerekaxinirensaaki, ininiā apanakini maerekaxinirensaaki, iua atokotxikana ate mīkapiritana ninoa apaka, kotxi aimarotari Teoso mīkapiritiniua ate. ⁵ Kristo iteene misiritaāka, ininiā ate misiritaāka apaka. Iua atokokana Teoso moianatari Kristo, ininiā iua moianataua ate apaka. ⁶ Apanakini misiritaua, kotxi anirekari Teoso mīkapiritini hīte. Anirekari Teoso makatxakiniri himaerekani. Teoso mīkapiritāua ate, ininiā hīte apaka imīkapirita. Teoso mīkapiritakasaakii hīte, iskataparatai himisiritiko hīpoxokoniritika himīteenekini ikapani. Hīte misiritiko ate misiritiko atokokana. ⁷ Aimarotapitkari erekari Teoso sikiini hīte, kotxi himisiritaāka ate misiritiko atokokana, ininiā Teoso mīkapiritai hīte, ate imīkapiritini atokokana.

⁸ Aītariakori, anirekari hīxinikiniri ate misiritiko Ásia tixini aūakasaaki. Iuasaaki iteene amaxikaāka. Kona amīteenekari. Auākati aōkiko. ⁹ Iuasaaki aākixinireē atxa: “Apinapitakako,” atxa. Ikara atoko ininiā, aimarotari kona ate posotiere ! auari. Aimarotari Teosonoka sikataparataua, kotxi iua posotari ōkitikiniri ipīkari. ¹⁰ Pamonōkoniri iuasaaki, iuaritika Teoso makatxakaua amapinakani ikapani. Iua makatxakapanikaua amapinakani ikapani. Ate auikari iua sākire, iuaīkana imaktxakinīua tīkane. ¹¹ Hīte moianataua ate, kotxi himisākiretari Teoso ate ikapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiāopokori kākiti sāpiretari Teoso iua ereka inini, kotxi ikamari ninoa amanaākiti iaōka ate ikapani.

Paoro Masikani Korītomoni

¹² Ate poxokoniua, kotxi ate kamari erekarinoka Teoso oerekakitnoka, kākitimoni, hītemoni apaka. Atāonoka anireka akamini kākitimoni. Aimarotari ikara aākixinireē, ininiā apoxokoniua. Ikara atoko aūuini, kotxi ikinipoko erekari Teoso sikakiti sikataparataua. Kākiti imaroreē liposotari ikaminiri iua auini ereka inini, kotxi !kiūkiteri kākiti. ¹³ Hātatsopatakasaakiri aiōkatsopatakiti hītemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴ Hīte na iteene imarotapanikaua ate, iuaritika ninirekari hīukiniua ate, Apiananiri Xesosi uai ikanapiriini ōtisaaki, ate iukini atokotxikana.

¹⁵ Ikara nimarota, ininiā ninirekamari hītemoni nisini, ipikata hīpoxokoniuatini ikapani. ¹⁶ Masetōnia tixinimoni nisini apisapanika, ninirekamari hītemoni nisini. Eereka nikanapiriāksaaki uaimoni, ninirekamari hītemoni iuaīkana nisini, ininiā iuasaaki ninirekamari hīte iokanatinino nota Xotēia tōpamoni. Txamari na nisa. ¹⁷ Atxīiti hīte txano nota: “Pixinikasaakiri uai papokini, na iteene pinirekari uai papokini,” hītxano. Txamari ninirekapitkari napokini hītemoni. Na nota xinikari Teoso sākire mauīkani xinikakiti atoko, kotxi ninoa sākire: “Ari, nisapitika,” txamari ākixinireē itxana: “Na nisapani,” itxana. ¹⁸ Nota sākire hītemoni ninamaā: “Ari nisapitika,” ninakasaaki, nākixinireē apaka txari: “Ari, nisapitika,” nitxa. Teoso atāonoka sākiraatkareri imarotari ikara nisākire atāo inini. ¹⁹ Sírasī inakori, Tximótxio inakori, nota pakini sāpiretapekai hīte Teoso ākiri, Xesosi Kristo sākire. Xesosi sākire inamaā auakari, isākire ākixinireē auakaritxikana isākireta. “Nikamapitkariko,” inakasaaki, ākixinireē inirekapitkari ikaminiri. Ikamari isākire iaōka. ²⁰ Teoso sikaenetakiti kākitimoni kaiāopokori aua. Iua Kristo sikaua ikinipoko Teoso sikaenetakiti, ininiākara atxari: “Ameē.” Peerekari Teoso, kotxi Kristo sikapitkaua Teoso sikaenetakiti. ²¹ Teosokara sikataparaxiniretai hīte, ate apaka, Xesosi Kristo amatakanapakani ikapani. Teosokara mereēua iua nakitiakori aniniua ikapani. ²² Apaka Teosokara sikaua Erekarer Matamatakoti, Teoso nakiti aniniua aimarotini ikapani. Iua Erekarer Matamatakoti aua aākixinireē. Teoso takaōtxikare itxaua iua. Iua Erekarer Matamatakoti merepitpanika Teoso sikakiti atemoni, ininiā aimarotari hīukomoni isikapanikaua itanapoko inīkatakiti ate ikapani.

²³ Kona nisari hīte Korīto sitatxiti auakanimoni, kotxi kona ninirekari hīte matinaniuatini hīte maerekani nisāpiretini xika. Teoso imarotari ikara atāo inini. ²⁴ Hīauīte kona ate txaua. Kona apaniātai: “Ja atoko inakari hāuika. Kona ikara atoko inakari kona hāuikape.” Kona ikara atoko !atxai hīte, kotxi hīte auikapitikari Teoso sākire atāo inakari. Aparīkauata hītekata hīpoxokoniuatini ikapani.

2

¹ Nākixinireē nitxari: “Na nisa iuaīkana ninoamoni nikamamatinanitinina ikapani.” ² Nota xika maerekaxinireninoka hininiā, kiripa kamapoxokinitano nota? Hītenoka auā nota kamapoxokonitakani. Ininiā kona nota nirekari maerekaxinireni hinini nota xika. ³ Kona ninirekari hītemoni napokini, maerekaxiniretikano ninini, hīte maerekani xika, ininiākara nota iokanatsopari ikora mitxi niōkatsopatakiti hītemoni ereē napokini apisapanika. Kotxi nikamapoxokonitakini hīttxaua hīte. Nimarotari ia. Nota nienenīkasaaki, hīte himakinika enenīka apaka. ⁴ Niokanatsopari ikora niōkatsopatakiti hītemoni, kotxi himaerekani xika maerekaxiniretinoka nitxa. Nitxiapata. Niokanatsopari ikora niōkatsopatakiti hītemoni, iteene nitiretinini himarotini ikapani. Na ninirekari nikamamatinanitinini.

Maerekanitxi Maxinīkaretiko

⁵ Iua kiki maerekati kamakari maerekaxinireti txīkitakano. Iua apia maerekaxinireti txīkitakai hīte, maerekati ikamini xika. Na iteene ninirekari nitxitiniri iua. ⁶ Uatxa atokopeka homanatiniri. Iua txitaākapeka imaerekani xika. ⁷ Uatxa himaxinīkaretariko maerekati ikamakiti, ininiā hāpakapariko iua. Himisākiretariko iua. Hīkamapoxokonitari iua. Ikara atoko himinakanīari, iua kona erekaxinireri. Ikara atoko himinakanīari, atxiiti itakanapari Teoso kimapore. ⁸ Ininiākara nota ōtākikai hīte nitapararitika. “Atiretapi-tikai,” hīttxariko iua, hītiretiniri imarotini ikapani. ⁹ Ininiā mitxi niokanatsopata hītemoni, kotxi iusaaki nataerekatai hīte. Ninirekari nimarotiniri, hīkīpititari nōtākikinini atxiiti? ¹⁰ Himaxinīkaretakasaakiri maerekati āti kamakiti, nota apaka maxinīkaretari. Maerekati āti ereē kamakiti auiniā, nimaxinīkaretari, kotxi nitiretai hīte. Kristo nirekari nimaxinīkaretariniri maerekati ikamakiti. ¹¹ Axinīkasaakiri maerekati āti kamakiti, akamari Satanasi nireēkiti. Ininiākara !akamari Satanasi nireēkiti. Paimatireri iua. Inirekari akerokiniri. Aimarotari iua nireēkiti, ininiā apia imatirerini matxaua.

Txito Paoro Nitini

¹² Tōatxi sitatxiti napokasaaki Kristo iokanapirena erekari nisāpiretini tīkane, kākiti iuaā auakani nirekari nisākire imarotininina, kotxi Apiananiri sikanireōtana nisākire imarotininina ikapani. ¹³ Iuaritika !erekaxinireno, kotxi ninitapiimari aītari Txito inakori. Kona napokari. Ininiā nitakapiretanapana kākiti iuaā auakani: “Ereēpiko. Masetōnia tixinimoni nisako,” nitxana.

Kamariāro Atoko Atxa

¹⁴ Peerekari Teoso kamakiti ate ikapani. Kristo nakiti aniniāua, Teoso txīkitakaua ātipirikai akāiatini, ikinimane imarotini ikapani. Teosokata akāiata. Teoso paniātaua Kristo pirena imarotiko ikini tōpati iaripiretini, kamariāro iarikatxiātini atokokana Kristo pirena iaripiretini ikapani. ¹⁵ Kristo sikaua Teosomoni, ininiā Teoso apokaerekataua, kotxi kamariāro arikiko Teoso ikapani atokokana atxa. Kamariāro arikasaaki omari samariāpota ikini tōpati. Iua atokokana asaāpota kākitimoni, kākiti apokakonimoni, kākiti pīpinanaākanimoni apaka. ¹⁶ Kākiti pīpinanaākanimoni kanaiatxiāri atoko atxa, kotxi asāpiretana Kristo sākire imauīkakanianā, ipinana. Kākiti Teoso apokakinimoni kamariāro eretxiāro atoko atxa, kotxi asāpiretana Kristo sākire auikiniāna, auapininīka itxanako Teosokata. Kiripa posotari ikara atoko inakari parīkatxi ikamini Teoso ikapani? ¹⁷ Ate posotari Teoso ikapani aparīkauatini, kotxi kona apanakini atokoni !atxa ate. Kaiāpopokori kākiti sāpiretari Teoso sākire txineiro apakapini ikapani. Ninoamoni Teoso sākire tūitxi vētxitiko atoko itxa. Kona ikara atokoni !akama, kotxi Teoso iokanataua ate kākitimoni. Teoso atamataua, ininiā atāonoka asākiraūata, kotxi Kristo nitiriakori atxaua.

3

Iōkatsopari Atoko Hīttxa

¹ Atxiiti iuaīkana ate sāpiretari erekari akamakiti asākire hāuikini ikapani? Atxiiti hinirekatarī apanakini iōkatsopatiniri erekari ate kamakiti ate sākire hāuikini ikapani? Atxiiti ate nirekatarī apanakini iōkatsopatiniri erekari hīte kamakiti hīte sākire ate auikini ikapani? Apanakini kamari ikara atoko. Ate kona kamari ikara atoko. ² Kona ninirekari iōkatsopari ikara atoko inakari, kotxi iua iōkatsopari atoko hīttxa hīte. Ate ākixinireē iōkatsopari atoko hīttxa. Ikinimane atatsopari ikara iōkatsopari, ininiā imarotarina erekari hīte kamakiti.

³ Iōkatsopari Kristo iōkatsopatakiti ate mīkiti atoko hīt̄xa. Kona txītaā iōkatsopataāka. Erekarī Matamatakoti Teoso Mapinakati iōkatsopatarī. Kona aātsopāā iōkatsopataāka. Kākiti ākixinireē iōkatsopataāka.

⁴ Ikara atoko atxai hīte, kotxi iteene aimarotari Teoso, Kristo nakitiakori aniniua. ⁵ ! Kimaroreua ate. Ateka !aposotari aparīkauatini Teoso īkapani. Teosora sikaposotiiretaua. Isikari imarore atemoni. ⁶ Isikaposotiiretaua Teoso īkapani aparīkauatini īkapani, isākire amaneri kākiti asāpiretini īkapani. Ikara isākire amaneri oerekaua Erekarī Matamatakoti aākixinireē auini. Isākire amaneri loerekaua ipaniātakiti iōkatsopatakori Moisesimoni isikakiti. Ipaniātakiti iōkatsopatakori Moisesimoni isikakiti paniātari kākiti ipinini imaerekani xika. Erekarī Matamatakoti aākixinireē auiniā, itxīkitakaua aāuapininiika anini.

Teoso Parīka Amaneri

⁷ Teoso paniātakiti tesi pakini iōkataāka kai nopini. Teoso sikasaakiri ikara Moisesimoni, Teoso iotximere iteene aua. Moisesi toō iuasaaki apakapari Teoso iotximere. Iteene iotximere aua Moisesi toō, ininiā kākiti Isaeo auakani kona posotari atamatiniri. Iotximere poiāoōpotakasaaki, liposotapanikarina itoō atamatinina. Ininiā Teoso iotximere auakasaaki, isākire iōkatakori apoka itiximoni kākiti ipinini īkapani. ⁸ Uatxa iua Erekarī Matamatakoti txīkitakari kākiti ātipirika auini īkapani, ininiā uatxa Teoso parīka apiata. Peerekari ikara iparīka. ⁹ Peerekari Teoso parīka ipaniātakiti iōkatakori kākitimoni isikasaaki, txamari iuasaaki oerekari kākiti misiritiko imaerekani xika. Uatxa Teoso parīka apiarekata, kotxi Kristo kamaerekatarī kākiti. ¹⁰ Uatxa Teoso parīka apiata. Peerekari. Iotximere apiari atoko itxa, ininiā iua parīka kitxakapirīka iotximere napakari atoko itxa. ¹¹ Kitxakapirīka Teoso parīka ipaniātakiti iōkatakori isikasaaki peerekari, txamari ikara Teoso parīka xipope. Īkorasaaki iparīka kākiti ikamaerekatini !ixipoka, ininiā apiaerekata.

¹² Ia Teoso parīka !ixipoka, ininiā ataparaxiniriritika asākirauata. ¹³ Moisesi atoko ! atxaua, kotxi iua ipatoōtaua mākatxi mataā, itoō iotximere Isaeo auakani matamatakani īkapani. Itoō iotximere poiāota, iuaritika liposotarina atamatinirina. ¹⁴ Moisesi ipatoōtinua atokokana ninoa Isaeo auakani oki ipataāka, kotxi ! imarotarina atāo Teoso nireēkiti. Uatxapiima okina ipataākapanika atatsopatakasaakirina Teoso sākire iōkatsopatakori, Xesosi apokini apisapanika auakari sākiretxiti. ! Imarotarina Teoso nireēkiti. Kristo sākire auikikosaaki, iua ipatoōtiko makatxakaāka, ininiā iuasaaki kākiti imarotari Teoso nireēkiti. ¹⁵ Īkorasaaki apaka Moisesi iōkatsopare atatsopatakasaakina, !imarotarina. Okina ipataākapanika. ¹⁶ Kākiti akiritakasaakiri Apiananiri, ipatoōtiko makatxakaāka. ¹⁷ Erekarī Matamatakoti itxaua Apiananiri. Erekarī Matamatakoti auiniā aākixinireē, !aparīkauataika amaerekani makatxakiko īkapani, kotxi Xesosi makatxakapekari amaerekani. ¹⁸ Xesosi sākire auīākani atxaua, ininiā atoō kona ipataāka. Atakaāri atoko atxaua. Kākiti atamatakasaakia ate, atamatari Apiananiri iotximere. Apiananiri Erekarī Matamatakoti aākixinireē txīkitakaāpotaua ikara atoko aniniua, ininiā apiaāpota aiotximere.

4

Teoso Iokanapirena Erekarī Pokamara Atoko Itxa

¹ Teoso amonīkaua ate, ininiā iua paniātāua ia parīkatxi akamini, iokanapirena erekarī apanakinimoni asāpiretini. Ikara atoko ininiā, isikataparaxiniretaua, ininiā ! anierekarī atakanapiniri ikara parīkatxi. ² Kākiti kipatarī ikamakiti, maerekati ikamakasaaki, kotxi ipētauaata. Ikara atoko inakari maerekati !akamaika. Atakanapapekari. !Amisirienetari kākiti. Kona akoketari ate sākire Teoso sākirekata. Teoso kenakotarī asākire, ininiā atāonoka asākire, ininiā kākiti ākixinireē imarotari akamakiti atāo inini. ³ Kākiti mimarotakanisaakiri Teoso iokanapirena erekarī asāpiretakiti, kākiti pīpinanaākari atoko itxa. ⁴ Kākiti pīpinanaākari !imarotari Teoso iokanapirena, kotxi kākiti teosone, Satanasi inakori, ipatarī ninoa oki, ininiā !atamatarina pokamara ninoa iopiniākari. Teoso iokanapirena erekarī pokamara atoko itxa. Peerekari ikara Teoso iokanapirena. Iua erekarī pirena sāpiretari Kristo Apiananiri ininiua, kotxi Teoso itxaua. ⁵ Ate kona sāpiretari kākiti ateka pirena. Ate sāpiretari Xesosi Kristo Apiananiri ininiua. Ate hīte nitiriakori atxaua, kotxi Xesosi nirekarī hinitiriakori aniniua. ⁶ Kitxakapirīka ipiānoka auakasaaki, Teoso txari: "Piopinikaxitita." Iuasaakipeka iopinikaxitita. Iua Teosotxikana iopinikari aākixinire. Ikara iopinikare kamaimaroretāua Teoso Apiananiri kaiotximereri ininiua. Kristo aātamatakasaaki, aātamatarī Teoso iotximere.

Xesosi Sākire Auiākani Misiritiko

⁷ Kopiti maikoti atoko atxaua, kotxi atapara ! auari. Iuaritika atemoni auari Teoso iokanapirena erekarī katireri. Ininiā aimarotari Teosonoka kaposotiireri, kataparari ininiua. Atepekana !aposotari. Atapara ! auari. ⁸ Asinimoni amaxikakini aua, iuaritika

!okaua ate. Atxiīti !aimarotari akamakiti tūkane, iuaritika kona aiotokakari Kristo sākire aūiukini. ⁹ Amisiritiko aua, iuaritika Teoso kona takanapaua ate. Atxiīti akarotaāka, iuaritika kona aōkaāka. ¹⁰ Īkiniōtika aiō okiko monōkoni aua Xesosi sākire aūiukini xika. Xesosi atatsirauata. Ipina. Iua atokotxikana ate atatsirauata. Atxiīti aiō ipina iua sākire aūiukini xika. Xesosi auapika, kotxi ipīpe, eereka ōkitikaua, ininiā iua atokokana aiō auapika. ¹¹ Auapanika anakasaaki, aōkiko monōkoni aua Xesosi sākire aūiukini xika. Aiō ipinapitikako, iuaritika aūapanika, kotxi Xesosi auapanika. ¹² Xesosi iokanapirena asāpiretini xika, apanakini nirekari okiniua ate. Xesosi iokanapirena asāpiretakasaakii, hīte auikari, ininiā hīte auapika himaxipokakani.

¹³ Teoso sākire iōkatsopatakori txari:

Nota auikari Teoso sākire, ininiā nisāpiretari kākiti.

Iua atokotxikana ate auikari Teoso sākire, ininiā ate sāpiretari kākiti. ¹⁴ Teoso ōkitikari Apiananiri Xesosi, iuaīkana auini ĩkapani, ininiā aimarotari Teoso ōkitikiniua ate apaka, iuaīkana aūiuni ĩkapani. Eereka Teoso anikauako ate hītekata Xesosi aāōkitini Teoso apisatoō. ¹⁵ Amīteenekari ikinipoko amisiritiko Xesosi sākire hītemoni asāpiretini ĩkapani. Kākiti apikomoni, apikomoni, apikomoni, txaāpota apakapari ikinipoko erekari Teoso sikakiti, ininiā ninoa kākiti kaiāopokori txari Teoso: “Erekapitikari pisikakiti notamoni.” Ikara atoko ininiā, kākitiopokoni txari: “Peerekari Teoso,” itxako.

Maerekaxinireni !Atxaua

¹⁶ Ininiākara maerekaxinireni !atxaua. Aiō xipokaāpota, iuaritika aākixinire ikinioitika apiatapaāpota. ¹⁷ Īkorasaaki amaxikiko auapitika Xesosi sākire aūiukini xika. Kona okanani aua amaxikiko. Eereka Teosokata ātipirika aūapika, kotxi aūiukari isākire. Peerekari iuaasaakiko. !Axinikaikari mitxi amaxikiko, kotxi iuaasaakiko peerekari. ¹⁸ Kona amaākatari aātamatakiti. Amatamatakiniti axinika. Atamatakori xipokako. Matamatakoti kona xipoka.

5

Aūuapoko Teoso Tixineē

¹ Īkorapokoriti aūuakasaaki, aiō aūuapoko itxaua aākixinire ĩkapani. Āti ōti aiō xipoka. Ixipokasaaki, Teoso sikari ātiāo aūuapoko. Iua aiō isikaua, itixine aāpokasaaki. Iua aiō kona xipokaika. Iua aūuapoko kona uakōtxiā kamakorini. ² Īkorasaaki aātsirsiuatakasaaiki, atxari: “Ninirekari ātiāo niūto, niūto Teoso sikakiti itixine napokasaaki.” ³ Anirekari ātiāo aiō, ininiā maītotika !atxaua. ⁴ Īkorasaaki ia aiō auapanika inakasaaki, aātsiitiri katsiiri. Kona kataparari ia aiō. Anirekapitikamari aiō. Anirekari ātiāo aiō, ininiā aiō maxipoākati makatxakari aiō xipoākari. ⁵ Teoso kamari aiō maxipoākani ĩkapani. Isikapanikauako aiō ikara atoko inakari. Aimarotari ikara atāo inini, kotxi isikapekari Erekar Matamatakoti atemoni. Ipxixini Teoso sikaenetakiti isikapekaka, ininiā apikomoni isikaenetakiti isikapitikaauako.

⁶ Ininiā kataparaxinirepitikaua ate. Aimarotari aūuapoko ia aiō ininiāua, kona aāpokapanika Apiananiri tixinemoni. ⁷ Xesosi sākire auikiko oerekaua atāo aūiuni tūkane. Aōkinoka kona oerekaua atāo aūiuni tūkane. ⁸ Kataparaxinirepitikaua ate. Kona ate pīkari apinini. Apiaerekata apinini, kotxi iuaasaakiko Apiananirikata aūua. ⁹ Anirekari amūini-tiniri Apiananiri, ia aiō āki aūuakasaaki, ia aiō xipokasaaki apaka. ¹⁰ Āti ōti ate amakinika sariko Īristomoni. Iuaasaaki Kristo sāpiretaua aparīka ĩki. Iua imarotari ikinipoko akamakiti ia aiō āki aūuakasaaki. Atxiīti akamari erekari. Atxiīti akamari maerekati. Akamakiti iaōka isikaua aparīka ĩki.

Kākiti Mikanapiriōko Teosomoni

¹¹ Aimarotari Apiananiri katapara inini, kotxi imisiritari kākiti imaerekani xika. Ininiā asāpiretari kākiti auikiniri iua sākire. Aparīkauata, iua sākire kākiti auikini ĩkapani. Teoso iteene imarotaua. Imarotari axinikakiti aākixinireē. Ninirekari hīte apaka iteene imarotiniua ate hākixinireē. ¹² Kona ate nirekari iuaīkana asāpiretini hīte ereka anini. Anirekari asāpiretini, apakatapitika hūiukiniua ate, kotxi atāonoka akama. Ikara atoko inakari himarotiniā, himarotari kākiti hāpakapiretini, ninoa misākirepiretakasaakiaua ate. Ninoa kākiti ate misākirepiretakani iuikari atamatakorinoka. Kona imaākatari kākiti ākixinire ereka inini. ¹³ Atxiīti kākitimoni kona kiikiteua ate. Ikara atoko atxa Teoso ĩkapani. Atxiīti pāikiteua ate. Ikara atoko atxa hīte ĩkapani. ¹⁴ Kristo iteene tiretaua, ininiākara anirekari iua nireēkiti akamini, kotxi aimarotari iua ipina ikinimane ĩkapani, kotxi ikinimane ipikani atoko itxauana. ¹⁵ Kristo ipina ikinimane kākiti ĩkapani, kākiti mapinakani ĩkapani, kākiti ātipirika auini ĩkapani. Ininiā iua kākiti kona kamaikariko iua nireēkiti ikinioitika. Ikamariko Kristo nireēkitinoka, kotxi Kristo ipina iua ĩkapani. Iuaīkana ōkitikaekaua.

¹⁶ Ininiā uatxa ! axinikaikari kākiti ĩkorapokoriti auakani xinikakiti atokokana. Mitxi axinikari Kristo ninoa xinikiniri atoko. Uatxa ! axinikaikari Kristo ninoa xinikiniri atoko. ¹⁷ Kristo sākire auīākari ākixinire amaneri itxaua. Mitxi maerekati ikamakiti kona ikamaika. Amanerinoka ikama. ¹⁸ Ikara atoko inakari Teosora kaminaua. Mitxi amokaiaikari atoko itxa Teoso, iuaritika imikanapiriāua ate iuamoni, kotxi Kristo ipina ate ĩkapani. Ipaniātaua ate asāpiretiniri ikinimane kākiti, Teoso nirekari imikanapiriinina ninoa iuamoni. ¹⁹ Teoso mikanapiriāri kākiti ikini itixiti auakani iuamoni, kotxi Kristo ipina kākiti ĩkapani. Teoso mikanapiriākasaakiri kākiti iuamoni, kona iaōtari maerekati ikamakitina. Kona ixinikaikari imaerekanina, ininiā kona imisiritana imaerekani xika. Ia pirena, kākiti imikanapiriini pirena, ipaniātaua asāpiretiniri ikinimane kākiti.

²⁰ Asāpiretari Kristo sākire kākitimoni. Asākirauata iua ĩkapani, ininiā Teoso iteene ōtākikai hīte ate sākireē. Kristo nireēkiti iaōka ate ōtākikai hīte. Hīkanapiriāko Teosomoni. ²¹ Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiā Xesosi sākire aūiikiniā, Teoso apakapaua ate, maerekati makamakani apakapini atoko, kotxi iua kamaerekataua ate.

6

¹ Ate parīkauata Teosokata, ininiā ate iteene ōtākikai hīte. Teoso sikari ikinipoko erekari hītemoni, ininiā ! apakata mamaākatakinitika hininiri Teoso. ² Kotxi Teoso sākire iōkatsopatakori txari:

Erekari kākitimoni nisika. Niketo apokasaaki, iusaaki nikenakotari hākiritinino nota. Kākiti maerekani nimaktxakini ōtisaaki, nimoianatai hīte.

Nisāpiretai. Uatxa apokapeka Teoso keto erekari kākitimoni isikini. Uatxa Teoso makatxakari kākiti maerekani.

Teoso Nitiriakori Atāo Inakani

³ Kona xatiki akerokari akamakiti kākitimoni, ininiā kākiti kona txari: “Ninoa kerokari ikamakitina, atāo minakati isāpiretinia,” ! itxana. ⁴ Teoso nitiriakori atāo atxaua. Aūuini ikiniōtika oerekari kākiti Teoso nitiriakori atāo inakani aniniua, kotxi amīteenekari amaxikiko. Amīteenekari amisiritiko. Amīteenekari katiiri. ⁵ Teoso nitiriakori atāo atxaua, kotxi Teoso parīka akamini xika anoropataākapeka. Kateia āki atakaākapeka. Ahoātaā kākiti apotiitakanuia naiatapekaua. Teoso parīka akamini, pasāpaniri aparīka. Itokata !aimaka. Itokata anatxita. ⁶ Kākiti imarotari ate Teoso nitiriakori aniniua, kotxi kona akamari maerekati. Aimarotari Teoso sākire. Kona katimari aomanākarauatini. Amoianatari kākiti. Erekari Matamatakoti oerekaua atāo akamini. Atāo atiretari kākiti. Ikara atoko aniniā, kākiti imarotari Teoso nitiriakori aniniua. ⁷ Ate Teoso nitiriakori atāo atxaua, kotxi atāo inakarinoka asāpireta. Teosora sikaposotiiretaua. Erekari akamakiti aīkeeko akikomoni, asanaremoni pakini atoko itxa, kotxi erekari akamakasaaki, maerekati iokanataāka. ⁸ Teoso nitiriakori atxaua, ininiā apanakini kākiti paxitaua. Txamari apanakini kākiti kona paxitaua. Apanakini sākire: “Peerekana ninoa.” Txamari apanakini sākire: “! Erekana ninoa.” Apanakini sākire: “Kamisiriennerini ninoa,” iuaritika atāo inakarinoka asākire. ⁹ Minakanuia ate, iuaritika ikinimane imarotaua. Kaiāokatanani apinaarita, iuaritika aūapanika. Amisiritaāka, iuaritika kākiti kona okapanikaua. ¹⁰ Amatinaniuatakasaaki, Apiananiri kamapoxokonitaua ate. Kona katxineiro-teua ate, iuaritika atxīkitakari kaiāopokori kākiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹ Hīte Korīto sitatxiti auakani asāpiretai ikinipoko axinikakiti. Nikipatakiti !uari. Iteene atiretai hīte. ¹² Ate nirekari atiretinii hīte, txamari kona hīte nirekari hītiretinia ate. ¹³ Uatxa nimisākiretai hīte namariteakori nimisākiretini atokotxikana. Hītiretauako ate, ate tiretinii atokotxikana. Hōerekaua hītiretinia ate.

Xesosi Sākire Mauiākani Moianariakori !Hītxapeua

¹⁴ Xesosi sākire mauiākani moianariakori ! hītxapeua, kotxi ! apakata erekari kaikotini maerekatikata. ! Apakata pokamara ĩkanōkarikata auini. ¹⁵ Kona Kristo moianatari Satanasi. Xesosi sākire auīākari nireēkiti āti. Xesosi sākire mauiākati nireēkiti ātiāo. Ininiā !apakata Xesosi sākire auīākari auini Xesosi sākire mauiākatikata. ¹⁶ Teoso misākiretiko aikoti āki !uari kākiti kamakiti teoso. Aīto Teoso misākiretiko aikoti atoko itxa. Teoso ātipirika auakari itxaua. Iua txari:

Nota auako ninakitiaorikata. Nitīpokota ninoa sauaki. Ninoa Teosone nitxauako. Nota nakitiaakori itxauanako ninoa.

¹⁷ Ininiākara hītakanapanako nisākire mauiākani. Kona ninoakata ! hāuape. ! Hīkaikotape maerekati takote, ininiā napakapai hīte.

¹⁸ Ininiā hīri nitxauako. Namariteakori, namariteakoro hītxauako hīte,

itxa Apiananiri, Kaposotiireri sâkire.

7

¹ Nitiretakini ikara atoko itxa Teoso kamaenetakiti ate ikapani. Ininiã matakanapari ikinipoko maerekati aïto txikotakari, aãkixinire txikotakari pakini. Teoso nakitiakorinoka matxaua. Erekarinoka makama Teoso apaxitini.

Paoro Poxokoni

² Hîtiretauako ate. Kona amisiritari kãkiti. Kona aõerekari kãkiti maerekati ikamini. Kona amisirienetari kãkiti. ³ Kona ikara atokoni nitxa hîte nitxitini ikapani. Kona nitxitai, kotxi nisãpiretapekai iteene atiretinii hîte. Ininiã ipikixi kona oiarikaua. Auakari kona oiarikaua. Ate oiarikakari !auari. ⁴ Nimarotari hîte kaminiri nota õtãkikakiti iaõka. Nota iuikai hîte. Hîte kamatapaxiniretano nota. Amaxikaãkapika, iuaritika iteene nipoxokoniua.

⁵ Masetonia tixini ate apokasaaki, kona aiotoka. Kona atomata, kotxi asinimoni aua kãkiti ate misiritakani. Kãkiti naiataua. Aãkixinireã apikarauata. ⁶ Teoso, mikapiritari kãkiti matinaniuatani, ininiã imikapiritaua ate Txito apokasaaki. ⁷ Iua apokini kamapoxokonitaua. Apaka isãkire kamapoxokonitaua, kotxi isãpiretaua hîte kamapoxokonitini iua. Isãpiretaua ate hîte kinirão aõkitaka ininino nota. Isãpiretaua, hîte maerekaxinireni, kotxi hîtxikitanano maerekaxinire ninini. Isãpiretaua hîte ãtipirika sãpiretiniri apanakini nota kamakiti ereka inini. Txito sãpirena nikenakotakasaaki, apia nipoxokoniua.

⁸ Mitxi niokanatsopatakiti hîtemoni maerekaxinireti txikitakai hîte, iuaritika erekari niokanatiniri iua niõkatsopatakiti hîtemoni. Merepanika nota matinaniua, kotxi nimarotari niokanatsopatakiti hãtatsopatini xika hîte matinaniua. Mapaõtinoka maerekaxinireni hîtxaua. ⁹ Uatxa poxokopekano nota. Na nipoxokoniua hîte maerekaxinireni nitxikitanini ikapani. Nipoxokoniua, kotxi maerekaxinireni hinini xika, hîtakanapari maerekati hîkamakiti. Iuasaaki hîkanapiriã Teosomoni. Teoso apokaerekatari ikara atoko inakari himaerekaxinireni, ininiã kona ate misiritai. ¹⁰ Erekarî Teoso txikitakiniri kãkiti matinaniuatini, kotxi iuasaaki kãkiti takanapari maerekati ikamakiti. Ikanapiriã Teosomoni, ininiã Teoso makatzakari iua maerekani. Ikara atoko inakari matinaniutxi erekari. Txamari kãkiti Teoso manirekakani matinani ãtião, ininiã ninoa ipinapikako. ¹¹ Hîte matinaniua himaerekani xika, ininiã Teoso kamaerekatai. Ininiãkara uatxa erekarinoka hinireka hîkamini. Uatxa iteene hinirekari hîkaminiri Teoso nireãkiti. Hinirekari ikinimane imarotini hîkamakiti ereka inini. Uatxa homanatarî maerekati mitxi hîkamakiti. Maerekaxinireti hîtxaua himaerekani xika. Uatxa iteene hîtiraõki aua. Hinirekari himarotini nota pirena, nota ereka ninini himarotini ikapani. Uatxa hinirekari maerekati kamakari misiritiko. Ininiãkara kona hîkerokari, iua kiki maerekati ikamakasaaki.

¹² Iua iõkatsopari mitxi niokanatakiti hîtemoni, niõkatsopata hîte ikapanikara. Kona iua maerekati kamakari ikapanini niokanatsopata. Kona iua maerekati kamakari misiritakiti ikapanini niokanatsopata. Niokanatarî iua iõkatsopari hîtemoni atiraõki himarotini ikapani. Teoso imarotari atiretinii.

¹³ Ininiã ate kamatapaxiniretaãka, kotxi hîte kamatapaxiniretaãka apaka. Apaka apoxokoniua, kotxi Txito poxokoniua. Iua poxokoniua, kotxi hîte himakinika kamapoxokonitari iua. ¹⁴ Txito hîtemoni isini apisapanika, nota sãpiretari iua niuikinii hîte, kotxi peerekai hîte. Atão nisãkire, kotxi kona nipëtauata hîkamakiti xika, kotxi hîkamakiti atão. Atãonoka asãkire hîtemoni. Atãonoka asãkire Txitomoni apaka ate iuikinii hîte. ¹⁵ Apiaãpota Txito tiretinii, kotxi hîkamari iua sãkire iaõka. Imarotari hãpakapiniri iua hîpaxitiniritika. ¹⁶ Nipoxokoniua, kotxi nimarotapitikari hîkaminiri nõtãkikinii iaõka.

8

Txineiro Apanakini Sikakiti

¹ Nitariakori, anirekari asãpiretinii Teoso misãkiretikoãtaã apotiitakaniua Masetonia tixini auakani. Peerekari Teoso kamakiti ninoa ikapani, kotxi ikinipoko erekari isika ninoamoni. ² Ninoa litene kauarena. Pasãpaniri ninoa misiritiko, iuaritika ienenikana ninoa. Na katxineiroteni, iuaritika iptoxitirina itina isikinina kãkiti kaamonirinimoni. ³ Nota imarotari ninoa minakati auiniãna, isikarauatana apanakinimoni. Iteene isikarauatana, ininiã kaiãokotani inatxitana. ⁴ Nota kona amanaãri ninoa txineirote kãkiti Teoso nakitiakori Xerosareã sitatxiti auakani ikapani, iuaritika ninoaka txano: "Ate nirekari txineiro asikini ninoamoni. Pauritaua asikiniro ninoamoni. Asikiniãro apoxokoniua, kotxi ikara atoko akamini amoiatarî kãkiti Teoso nakitiakori," itxana. ⁵ Kona ikarananini ninoa nireka. Iteene ninoa kamapoxokonitaua ate, kotxi mitxipe ninoa txaua: "Ate nirekari Apiananiri nireãkiti akamini," itxana. "Iua oerekiniãri inireãkiti hîtemoni, ate nirekari hîte paniãtakiti apaka akamini," itxana Masetonia tixini auakani. ⁶ Txito amanaãpekai hîte txineiro hîsikini

Xerosareē sitatxiti auakani ikapani, ininiā apaniātari iua sini hītemoni hīsikakiti apakapini ikapani, hītiraōki ninoa Teoso nakitiakori hōerekini ikapani. ⁷Hīte iteene auikari Xesosi sākire. Apanakini poiāoka. Hīte imarotari Xesosi sākire hīsāpiretini kākitimoni. Apanakini na iteene imarotari. Hīte iteene imarotari Xesosi sākire. Apanakini poiāonoka imarota. Hīte iteene nirekari Teoso parīka hīkamini. Apanakini poiāonoka nirekari. Hīte iteene tiretaua ate. Apanakini poiāoka tiretaua. Hīte apiaerekata, ininiākara ninirekari hīsikakiti apaka apiari inini, kotxi ikara atoko hīkaminiā, hōerekari Xerosareē sitatxiti auakani hītiretinina.

⁸Kona nipaniātai nitapararitika hīsikiniro hītixineirote ninoamoni. Nataerekatari hītiraōki. Atāo atxiīti hītiretari apanakini? Masetōnia tixini auakani atāo tiretari apanakini. Hīte tiraōki ninoa tiraōki atoko atxiīti? ⁹Himarotari Apiananiri Xesosi Kristo sikari ikinipoko erekari hītemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakininotoka itxapeka hīte ikapani. Ininiākara ikinipoko itakanapini xika, ikinipoko aua hītemoni.

¹⁰Uatxa nota ōtākikai hīte, erekari hīkaminiri hīsākire iaōka, kotxi kita anokanani hīte merepanika xinikari: "Natokopa itxa akaminiri Xerosareē sitatxiti auakani ikapani?" hītxa. Hīte merepanika nirekari txineiro hīsikinina ninoa. ¹¹Ininiā nōtākikai uatxa. Hīkamariko mitxi hīsākire iaōka. Hīpoxokoniritika hinirekariko hīokanatiniro txineiro ninoamoni, ininiā erekari hīpoxokoniritika hīkaminiri hīsākire iaōka. Ipixini txineiro hītemoni auakaro hīsikako ninoamoni. ¹²Hīpoxokoniritika hinirekiniāri hīsikarauatini Teosomoni, iua apakapapitikari hīsikakiti. Poiāoka auiniāi, ininiā erekapitikari poiāonoka hīsikini Teosomoni. Iua apakapapitikari. Iua imarotari !apakata apikomoni hīsikiniri.

¹³Kona ate nirekari hīte kaamoni hinini, ikinipoko ninoamoni auini ikapani. Erekari ninoa auakiti hīte auakitiixikana. ¹⁴Uatxa hīte txineirote auapitika ninoa hīsikini ikapani. Āti ōti hīte txineirote mauakanisaaki, atxiīti ninoa txineirote aua, ininiā ninoa sikai hīte. Ininiā hīte moianatinina atokotxikana, ninoa moianatai hīte. Ikara atoko inakari atāo. ¹⁵Teoso sākire iōkatsopatakori txari:

Kiki kaiāopokori apakapakari itetakori !auari. Kiki poiāoka apakapakari !kaamoniri.

Txito Iokanatikō Korītmoni

¹⁶"Peerekai," atxari Teoso, kotxi iua sikanireōtari Txito itiretinii hīte, nota tiretinii atokotxikana. ¹⁷Txito nirekapitikari ate paniātakiti ikamini, hītemoni isini. Apaniātiniri apisapanika, inirekari hītemoni isini, ininiā ipoxokoniritika isa hītemoni. ¹⁸Aiokanatarī āti āitari iuakata. Ikinimane Teoso misākiretkoātāa apotiitakaniua iteene apokaerekatari iua, kotxi isāpiretari Teoso iokanapirena erekari ikinimanemoni. ¹⁹Ninoa mereēri iua āitari atekata isini Xerosareēmoni, oa txineiro aanikasaaki. Oa txineiro asikakito oerekana Xerosareē auakani Apiananiri ereka inini. Oerekana apoxokoniritika amioanatinina.

²⁰Oa txineiro kaiāopokoro aua, ininiā iua āitari siniā atekata, iua imarotari atāo asikiniro oa txineiro Xerosareē auakanimoni. ²¹Anirekari atāo akamini oa txineiro asikasaaki ninoamoni. Anirekari Apiananiri imarotiniri atāo akamini. Anirekari kākiti apaka imarotiniri atāo akamini.

²²Iuaikana aiokanatarī ātipekana āitari hītemoni. Aātaerekatapekari iua. Ipoxoniritika imoianatarī kākiti. Apiapoxokonita iua, kotxi imarotari hīte kaminiri mitxi hīsākire iaōka. ²³Txitopekana, nota moianari itxaua. Iua miparīkatano nota, hīte amioanatinini ikapani. Xesosi sākire auīākani mereēna ātariakori Txitokata sikani hītemoni. Kākiti imarotakasaakina ninoa, "Peerekari Kristo," itxana kākiti. ²⁴Ininiākara hōerekana ninoa kikiakori atāo hītiretinina, ininiā ikinimane Xesosi sākire auīākani imarotari atāo hītiraōkiuati. Iuasaakiko ninoa imarotari ate sākire atāo inini ate iulkinii hīte.

9

¹Nisāpiretai hīte txineiro asikakito tīkane Teoso nakitiakorimoni, Xerosareē auakanimoni. Nimasāpiretakaniāi hīte, iuaritika hīte nirekari hītixineirote hīsikini ninoamoni. Nimarotari ikara. ²Nimarotari iteene hinirekari hīmoianatinina ninoa. Nitxapekana Masetōnia tixini auakani: "Nota iuikana ātariakori Korīto sitatxiti auakani, Akaiā tixini auakani, kotxi kita anokanani ninoa iposope txineiro iokanatinina Xerosareēmoni," nitxana. Hīte poxokonitini txineiro hīokanatinini, sikanireōtana Masetōnia tixini auakani apaka iokanatiniro txineiro. ³Uatxa niokanatanana ninoa ātariakori ipi āti pakini hītemoni. Hīte iposope hininiā hītixineirote hīokanatinini, erekapitikari, kotxi ikara nisākire iaōka. Ininiā atāo ate iulkinii hīte. ⁴Masetōnia tixini auakani siniā notakata, hītixineirote miposonitipanika, ininiā ate pētauata, kotxi ate auikari hīsākire. Hītepekana apia pētauata hīsākire iaōka himakamakani xika. ⁵Ininiākara ninirekari ninoa ātariakori sini hītemoni nota ereē napokini apisapanika. Ninoa moianatai txineiro kaiāopokoro hīsikaenetakito hāpotiitini ikapani. Ininiā napokasaaki ereē, iposope hīsikakito nanikini. Ininiā iuasaaki aimarotariko

kinirão sikaenetaka hinakito txineiro. Iuasaaki aimarotariko hîpoxokoniritika hîsikiniro hîtxineirote.

Takari Itori Auini

⁶ Ia nisãkire hîxinika. Poiãoka komiri pitakiniã pitakarauatakasaaki, poiãonoka iri pimaporoka. Kaiãopokori pitakiniã, kaiãopokori pimaporoka. ⁷ Ininiã pãkixinireë pixinikari atão pisikakiti ãtmoni. Kona erekari pimanirekasikatakiniti pisikini. Æti itapararitika paniãtiniã pisikarauatini, ! apakata. Teoso apokaerekatari kãkiti ipoxokoniritika isikarauatini ãtmoni. ⁸ Teoso posotari ikinipoko erekari isikini hîte, ininiã ikiniõtika ikini sereti hiamonitakiti auiniã, hãpakapari ikinika hinireëkiti. Ininiã ikinipoko erekari hîkama. ⁹ Teoso sãkire iøkatsopatakori txari: Teoso sikari itori erekari matxineirotenimoni. Teoso kamakiti atão inakari ! ixipoka. Auapikako.

¹⁰ Teosora sikari takariki katakarerimoni itakarauatini ìkapani, ininiã eereka iposope inakasaaki, auari kienatxi inikakiti ìkapani. Iua atokokana Teoso sikari kaiãopokori takariki hitemoni. Iua anakakari hîtakare, ininiã eereka iposope inakasaaki, kaiãopokori auari, ininiã kaiãopokori hîkamakiti atão inakari apanakinimoni. ¹¹ Teoso sikai ikini sereti erekari, ininiã ikinipoko auape hitemoni. Ininiãkara kãkiti mauarenimoni hîsikariko kaiãopokori. Ate anikasaakiro hîsikakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹² Ikarã atoko inakari hîkaminiã, hîsikari Teoso nakitiakori amonitakiti ninoamoni. Apaka hîsikasaakiri hîsikakiti ninoamoni, ninoa kaiãopokori txari: “Peerekari Teoso,” itxanako. ¹³ Ninoa poxokoniuatãko, kotxi hîte sikari kaiãopokori ninoamoni, apanakinimoni apaka. Ninoa txariko: “Peerekari Teoso,” kotxi imarotarina erekari hîte kamakiti. Imarotarina hîte kaminiri Kristo paniãtakiti iaõka. Imarotarina hîte atão auikiniri Kristo iokanapirena erekari. ¹⁴ Ininiã ninoa misãkiretari Teoso hîte ìkapani, kotxi iteene ninoa tiretai hîte, kotxi Teoso sikari ikinipoko erekari hitemoni. ¹⁵ Matxari Teoso: “Peerekai pite, kotxi pite sikaua pamarite. Æti pisikakiti iua atoko inakari lauiri.”

10

Paoro Apakapapiretari Apoõtiko

¹ Kataparaxinireri Kristo, iuaritika ianaka õtãkikari kãkiti, ininiã nota Paoro ianaka nõtãkikai. Txamari apanakini hîte sauaki auakani txari: “Paoro ìtakoxiti auakasaaki, itapararitika itxitaua ate, atemoni iøkatsopatakasaaki. Txamari iua atekata auakasaaki, ipîkarauata amaerekani isãpiretiniua,” itxana. Ikarã apanakini sãkire na atão, kotxi ìtakoxiti nauanãta, iuaritika amaãtiki nõtãkikai hîte. ² Kona ninirekari noerekinii hîte apanakini nitxitini ereë napokasaaki. Niposotapitikari nitapararitika nitxitiniri apanakini ereë napokasaaki, kotxi ninoa txari: “Paoro kamakiti Teoso sãkire mauïãkani kamakiti atokotxikana,” itxana. Txamari na atão ninoa sãkire. ³ Aïto tapara poiãoka, kotxi kãkiti atxaua, ininiã aïto taparaã ! apakata anaïatiniri maerekati. Teosora sikataparataua aãkixinireë, maerekati anaïatini ìkapani. ⁴ Ate ikeeko kona Xesosi sãkire mauïãkani ikeeko atokoni. Teoso ikeeko isika atemoni. Kaposotiireri Teoso ikeeko, ininiã aposotari Satanasi kamakiti axipokini aiko kaikori axipokini atokokana. ⁵ Kãkiti iuikaua. ! Inirekarina auikinirina Teoso imarore. “Paimãtirea ate,” itxanãtana. Teoso sikaimaroretãua ate, ninoa sãkire paxirari inini aõerekini ìkapani. Ikinipoko axinikakiti anireka Kristo nireëkiti iaõka axinikini, ininiã axinikakiti ãtião auiniã, atxîkitakari iua axinikakiti imamakini Kristo nireëkiti iaõka inini ìkapani. ⁶ Hîte iteene kamakasaakiri Kristo nireëkiti iaõka, ate misiritariko kãkiti ereë Kristo nireëkiti imakamakanisaaki.

⁷ Hîte xinikari hãtamatakitinoka. Kona hîxinikari kãkiti ãkixinireë auakari. Kãkiti ereë uãkatiniãri Kristo nakiti ininiuana, erekari imarotinirina ate apaka Kristo nakitiakori aniniua, ninoa Kristo nakiti ininiuana atokotxikana. ⁸ Atxîiti iteene niuikari Api-ananiri sikaposotiiretiniua ate, iuaritika kona nipõtauata niuikiniri ikara, kotxi Api-ananiri sikaposotiiretãua ate, hîte akamataparaxiniretini ìkapani. Kona ate nirekari hîte ãkixinire tapara poiãopotini. ⁹ Kona ninirekari hîpîkarauatini, iøkatsopari niokanatsopatakiti hãtatsopatini xika. ¹⁰ Apanakini txari: “Paoro txitãua itapararitika iokanatsopatakitiã, txamari iua atekata auakasaaki, isãkire ãtião. Iuasaaki kona kataparaxinireri iua. Iuasaaki ipîkarauata ate itxitini,” itxana apanakini. Na atão ninoa sãkire. ¹¹ ìtakoxiti ate auakasaaki, asãkire aiokanatsopatakiti iuatxikana asãkireta, ereë hîtãkata aãuakasaaki.

¹² Ninoa ate misãkirepiretakani iteene iuikaua. Atãuako ninoa apiaerekata? Atãuako ! erekaua ate? ! Kîkitena ninoa. Ninoa uãkatari ninoa kamakitinoka erekari inini, ininiã ninoa iaõtari apanakini kamakiti. Apanakini kamakiti ninoa kamakiti atoko ininiã, ninoa uãkatari apanakini kamakiti apaka erekatxikana. Txamari na atão. ¹³ Atepekana, kona

ate iuikari ateka kamakiti. Ate iuikari parîkatxi Teoso sikakiti atemoni akamini îkapani. Iuanoka ate iuika. Iua paniâtaua aparîkauatini hîte îkapani. Iua aparîka ate iuikapitika. ¹⁴ Teoso paniâtakitinoka akama. Ia aparîka, ininiâ ate sari hîtemoni Kristo iokanapirena erekari asâpiretini îkapani. Ininiâ apakatapitika ate iuikiniri ikara aparîka. ¹⁵ Apanakini parîka Teoso îkapani ate kona txari: “Iua parîkatxi ate kamakiti,” kona atxa. Ate nirekari hîte auikaâpotiniri Kristo sâkire, Kristo sâkire iteene hâuikini îkapani, ininiâ ate nirekari aparîkauatini Teoso îkapani hîte auiniâtaâ, Kristo sâkire apanakini auikini îkapani. ¹⁶ Ate nirekari Kristo iokanapirena erekari asâpiretiniri kâkiti, hîte tixine apiko auakani Xesosi sâkire masâpiretakotipanika ininiâtaâ. Ininiâ kona aparîkauata apanakini parîkauatiniâtaâ. Ininiâ apanakini parîka: “Ate parîkakara iua,” kona atxari.

¹⁷ Teoso sâkire iôkatsopatakori txari:

Pinirekatarî piuikarauatini? Pinirekiniâri, ininiâ piuikariko Apiananiri kamakitinoka.

¹⁸ Teoso kona apokaerekatarî kâkiti iuaka, “Erekapitikano,” inakari. Teoso sâpiretiniâri: “Erekapitikari iua kâkiti,” ininiâ Teoso apokaerekatarî iua.

11

Teoso Maiokanatakini

¹ Atxiiti miîkiteti sâkirauatini atoko nimisâkiretai hîte, iuaritika hâuiritano nota. ² Teoso nirekinii hîte iua nakitiakorinani hininiua, iua atokotxikana nota nirekai hîte Teoso nakitiakorinani hininiua. Nisikaenetai Kristomoni hitaniri atoko inini îkapani. Iuamoninani nisikaenetai. Ninirekari iuamoni nisikinii, âtokoro kîkikata masirîkakato atoko inakaro. ³ Kitxakapirîka Satanasi auaitotari imini. Iua imini misirienetaro Eva, kotxi paimatireri Satanasi sâkire. Nipîkari Satanasi misirienetari hîte apaka, ininiâ eereka hîxinikakiti na atâoni. Nota pîkari Xesosi hitakanapini. Mitxi iteene hitiretari iua. Iuananira hitireta. ⁴ Kotxi hîte apakapari hîpoxokoniritika ikinimane ereê apokakani, “Ate Xesosi sâkire sâpiretakaniua” inakani, txamari Xesosi pîrena ninoa sâpiretakiti na atâoni. Kona ate sâpiretari ikara atoko inakari, iuaritika hâuikari ninoa sâkire. Hâuikasaakiri ninoa sâkire, atxiiti hâpakapari matamatakoti, txamari kona hâpakapari Erekari Matamatakoti ate sâpiretakiti. Ate sâpiretai hîte atâo Kristo iokanapirena erekari, txamari hîte auikari âtiâo.

⁵ Hîtemoni, Teoso iokanatana ninoa kâkitimoni. Hîtemoni, ninoa Teoso iokanatakini apiarini. Nota poiâo atxiiti? Ninoa apiata atxiiti? Konapitini. ⁶ Atxiiti kona nota iteene imarotari nisâkirauatini, iuaritika nimarotapitikari Teoso sâkire. Himarotapekari ikara atoko inakari, kotxi asâpiretapekai.

⁷ Teoso iokanapirena erekari nisâpiretakasaakii hîte, maxikatîka nisâpiretai. Kona ninirekari hîlkitxitinino, ininiâ nota poiâotakaua, hîte atâo inakari himarotini îkapani. Ikara atoko nikerokatarî atxiiti? ⁸ Hîtekata niparîkauatakasaakii, kâkiti âtiâtaâ Xesosi sâkire auîâkani iokanataro txineiro notamoni, txamari kona nota moianatana ninoa iuasaaki. Hîtekara nimoianata iuasaaki. ⁹ Hîtekata nauakasaaki, nota nirekamaro txineiro. Txamari kona nota amanaâi hîtxineirote. Aîtariakori Masetônia tixinikini mininano itanapoko niamonitakiti. Iua atokotxikana kona namanaâpaniro hîtxineirote nota îkapani, kotxi atxiiti nota minari atoko nitxa hîporikiâ. Kona ninirekari ikara atoko inakari nininiua. ¹⁰ Kristo atâonoka isâkire. Isâkire nâkixinireê auape, ininiâ nota sâkire apaka atâo. Nisâpiretapanikari kâkiti hîtxineirote nimanirekakani pîrena. !Auari ikara nisâkire iotokakakari ikinika Akaia tixiniâ. ¹¹ Kinirepa ikara atoko nitxa sâkireta? Atxiiti kona nitiretai hîte? Teoso imarotari nota iteene tîretini hîte.

¹² Uatxa iuaîkana nisâpiretai hîtxineirote nimapakapakani. Nanera kâkiti uatxa hîtekata auakani Teoso maiokanatakini txari: “Ate kamari Paoro parîkatxikana,” itxana. Ikara atoko ininiâ iuikauana. Txamari ninoa parîka âtiâo, kotxi ninoa apakaparo hîtxineirote. Ate kona apakaparo hîtxineirote. ¹³ Teoso kona iokanatana nanera hîtemoni. Na atâo Teoso iokanatakini !itxauana. Imisirienetaina hîte, “Aparîkauata Teoso îkapani,” inakasaakina. Nanera txari: “Kristo iokanatakiniraua ate,” itxana. Txamari na atâo nanera sâkire. ¹⁴ Ikara atoko inakari auapitika, kotxi Satanasi sari kâkitimoni. Itxari: “Nota Teoso nitiri nitxaua. Nota oerekai atâo inakari.” Ininiâ iua sâkire auîâkani auapitika. ¹⁵ Ininiâkara nanera kikiakori Satanasi nitiriakori txari: “Atâo inakari kamakaniua ate. Teoso nitiriakori atxaua,” itxana. Xipokatxi ôtsaaki imisiritaâkanako ninoa maerekati ikamakitina xika.

Paoro Misiritiko Pirena

¹⁶ Iuaîkana nisâpiretai. Miîkiteti !nitxaua, iuaritika hîte potxitari kâkiti miîkiteni, ininiâ miîkiteti atoko niuikaua, kotxi nota posotari niuikiniua. ¹⁷ Apiananiri kona sâkirauata ia atoko. Miîkitetinoka sâkirauata ia atoko iuikiniua. ¹⁸ Nanera kikiakori iuikaua, Teoso sâkire mauîâkani iuikiniua atokokana, ininiâ nota apaka sâpiretari niuikiniua. ¹⁹ Hîte auiritari kâkiti miîkiteni himoiananiri ininiua, kotxi !kiîkitei hîte. ²⁰ Nanera hîtekata auakani txîkitakai

hīte iniriakorina hininiua. Hīte auiritari ikara atoko inakari. Nanera amanaaāpotari ikini sereti hīte nakiti. Ikamarina inireēkitina hītemoni. Ipaniātaina ikiniōtika inireēkitina hīkamini. Imisiritaina hīte. Hīte auiritari ikara atoko inakari ikaminina. ²¹ Erekarī nipētauatini atxiīti? Kotxi kona kataparaxinireno nota nanera kamakiti atoko nikamini hītemoni. Kataparaxinirena nanera.

Ikamakitina iuikana, ininiā mīkiteti atoko kataparaxinireno nota. Nikamakiti niuikako. ²² Nanera Epireoakorikani? Ari. Nota apaka Epireo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Apraāo apika mekaniriakorikani? Ari. Apraāo apika mekanirikanarano nota apaka. ²³ Nanera Kristo nitiriakorikani? Atxiīti. Mīkiteti iuikiniua atoko nitxa: “Kristo nitiri apiaerekatakari nitxaua nota.” Nota apia parīkauata Teoso ikapani. Apiata nimisiritiko, kotxi kaiāokatani kateia āki nitakaāka. Kaiāokatani nota noropataāka aāpitsā. Kaiāokatani nipinaarita. ²⁴ Ipi ipi āti pakinikata Xoteoakori noropatano aāpitsā. Iuasaaki inoropatanona trīta novi pakinikata. ²⁵ Ipi āti pakinikata Homanoakori noropatano aākeē. Ātikata kai soroā nikiporonakaāka. Ipi āti pakinikata maporoā nisikasaaki, maporo sakika apanīkakiā. Āti ikanōkati, āti pokamarariti pakini ninapa potxoari uiniti nipimakaātini. ²⁶ Nianaxititapika. Natamonōkonitari uini torōkani. Natamonōkonitari kīitiririni. Natamonōkonitari ninirimane. Natamonōkonitari ninirimane minakanuia. Natamonōkonitari sitatxi nauakasaaki, kākiti mauakaniātaā nauakasaaki, potxoari uiniti nīpiriātakasaaki pakini. Natamonōkonitari kākiti, “Xesosi sākire aūika” inakanikata nauakasaaki, kotxi na atāo ninoa sākire. ²⁷ Kaiāokatani nisāpaka itori parīkatxi xika. Kaiāokatani nitsii aua. Kaiāokatani kona apakata nimakini ikanōka. Kaiāokatani ninatxita, niposonata. Kaiāokatani nipokori !auari. Kaiāokatani nimūteenekari katxiīkareri. Kaiāokatani nimāka !auari. ²⁸ Ikara atoko inakari monōkoti auapika notamoni. Apaka niparīka kasāpaniri aua, kotxi ikiniōtika niparīkauata kākiti Teoso misākiretkoātaā apotiitakaniua ikapani. ²⁹ Āti iōkapetiniā, nota apaka niōkapeta. Āti txīkitakaāka maerekati ikamini, ininiā nota maerekaxiniretinoka nitxa.

³⁰ Hīte nirekiniāri niuikiniua, ininiā niuikari niōkapere. ³¹ Aūite Xesosi Kristo iri, Teoso imarotari nisākire atāo inini. Ātipirika matxari: “Peerekai.” ³² Tamāsiko sitatxiti nauakasaaki, kākiti aūite apiari Areta inakori auakasaaki, Tamāsiko auakani aūite paniātari sotatoakori kaikotini sitatxi kākiti Ironakiniātaā nota imaīkinina ikapani. ³³ Txamari kona nota pokika sitatxi toreātaā. Niīroā kotari mitari āki. Iuasaaki aītariakori iokatsakano aapokotxi sonāā sitatxi pirikere mapara. Ixitipe apoka nitxa. Ikara atoko itxa nimitekini, ininiā kona ninoa māikano iuasaaki.

12

Taponetxi Teoso Sikiniri Paoro

¹ Hinirekatari apikomoni niuikiniua? ! Apakata, iuaritika hinirekiniāri, niuikapanikauako, kotxi Apiananiri sikano taponetxi peereri. Iua oerekano imarore. ² Akokaxiti katosi anokanani inakasaaki, nanikaāka Teoso tixinemoni iaxiti apiko nopinixiti. Iuasaaki nitaponeuataako? Atxiīti niūto atāo anikaākauako? Kona iteene nimarotari. Teosonokara imarotari. ³ Ianoka nimarota. Nanikaāka Teoso tixinemoni nitaponeē atxiīti, atāo niūto anikaāka atxiīti. Teosonoka imarotari. ⁴ Iuaxiti nikenakotari sākiretxi erekari. Ikara kona nimarota iuaīkana nisāpiretini. Apaka !auritaāka nisāpiretiniri kākiti. ⁵ Ninirekiniāri, niuikari nitapone ikara atoko inakari, txamari !apakata notaka niuikiniua. Niōkaperenoka niuika. ⁶ Ninirekiniāri niuikiniua, atāonoka nisāpireta, kotxi kona mīkiteti !nitxaua. Txamari kona ninirekari niuikiniua, kotxi atxiīti kākiti uākatari nota apiari nininiua. Ninirekari kākiti atāo imarotini. Erekarī kākiti imarotini nisākireē, nikamakitiā pakini.

Paoro Misiritiko Inako Tsii Atoko Inini

⁷ Peerekari nitkakiti Teoso tixine nanikikosaaki, iuaritika Teoso kona nirekari niuikiniua, ininiākara Teoso auiritari Satanasi misiritinino niūtoā. Katsiiri. Inako atoko itxa niūtoā, ininiā niuikiniua !auari. ⁸ Ipi āti pakinikata namanaāri Apiananiri ia nitsii imakatxakini. ⁹ Txamari itxano: “Kona nimakatxakari. Ikinipoko erekari nisikakiti sikataparatai. Iuanoka pinireka. Piōkapetakasaaki, nota tapara pākixinireē apiata,” itxano. Ininiākara nipoxokoniritika niuikari niōkapere, kotxi iuasaaki nimarotari Kristo posotiire nākixinireē aūini. ¹⁰ Niōkapetakasaaki, nipoxokoniua. Nixiniketikosaaki, nipoxokoniua. Nimaxikikosaaki, nipoxokoniua. Nimisiritikosaaki, nipoxokoniua. Nikamakiti tūkane nimimarotakanisaaki, nipoxokoniua. Ikara atoko inakari nimiteeneka nipoxokoniritika, kotxi Kristo nakiti nitxaua. Niōkapetakasaaki, nitapara nākixinireē apiata.

Paoro Nirekari Erekarī Korīto Auakanimoni

¹¹ Mīikitēti sākīrauātini atoko nisākīrauata, txamari hīte xika nisākīrauata mīikitēti sākīrauātini atoko, kotxi hīte iukaākamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hītekata auakani kona apiaerekata. ¹² Hītekata nauakasaaki, nikamakiti oerekai atāo Teoso iokanatakiti nininiua, kotxi iusaaki noerekai Teoso oerekakiti kākītimoni. Noerekai kākīti maposotakiniti. Noerekai posotīretxi iusaaki. !Asāpaka ikara atoko inakari aōerekini hīte. ¹³ Atxiīti apiata nitiretari apanakini Teoso misākīretikoātaā apotiitakiniua ātiātaā auakani? Konapitini. Ninoa nitiretini atokotxikana nitiretai hīte. Namanaāna ninoa txineirote niamonitakiti ikapani. Hīte txineirote kona xatiki namanaāni, ininiā nikerokatari atxiīti? Himaxinīkaretariko ia nikerokakiti.

¹⁴ Ipikata nisipeka hītemoni. Naiamatapeka iuaīkana hītemoni nisini tīkane. Kona hītxineirote kona namanaāpani. Hītxineirote kona ninireka. Hītera ninireka. Amarini kona nīkatana iri, inoro pakini. Iri, inoro pakinira nīkatana imiakari. Nota hīri atoko nitxaua. ¹⁵ Nipoxokoniuaa ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte ikapani apiaāpotakasaaki, hīte tiraōki nota ikapani poiāōpota.

¹⁶ Atāokani ikara atxiīti? Iuaritika ia nimarota. Kona xatiki namanaāni hinakiti hīsikinino. Atxiīti āti ereē auakari txari: “Paoro misirienetaua ate. Paxirari isākire,” itxa atxiīti. Txamari ikara na atāo. ¹⁷ Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Misirienetaina. ¹⁸ Nōtākikari Txito hītemoni isini tīkane. Nipaniātari āti aītari iuakata isini. Atauako Txito misirienetai hīte? Konapitini. Erekari Matamakatira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹ Atxiīti hīte xinikari ikara asāpiretai, ate ereka anini himarotini ikapani. Konapitini. Ate sākīrauata hītekata Kristo sākīrauātini atokokana, kotxi Teoso atamataua. Ate tīretakini hītxaua hīte, ininiā ikinipoko akamakiti akaminii hīte, hīte ākixinire tapara auini ikapani. ²⁰ Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipīkari nimarotini hīte txitakakiniua, hīxikotakakiniua, homanatakakiniua, hīpotxinani auini, himisākīrepīretakakiniua, aāpirena hīsāpiretini, hīuikiniua, hineenamauatini. Ikara nimarotini nipīka, ereē napokasaaki. ²¹ Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini maerekati hīkamakiti xika, kotxi kaiāopokori kamari maerekati akokaxiti, iuaritika !itanapanapanikari iua maerekati. Ixinikakitina maerekatinoka. Maerekati ikini sereti iītona nireēkiti aua. Itanoro minakotokatika isirīkana. Ikara atoko inakari kona itakanapanikanana.

13

Paoro Sākire Imapotōkire Ōtākikare

¹ Ipikata nota sari hītemoni. Iuaīkana hītemoni nisako. Teoso sākire iōkatsopatakori txari: Ipi āti pakini kākīti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākīti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako, itxa Teoso sākire. ² Akokaxiti hītekata nauakasaaki, nōtākikapekai himaerekani hītakanapani. Iusaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisirītapitikari ikinimane maerekati kamakani,” nitxapekana. Iuaīkana uatxa itakoxiti nauakasaaki, ikara nisākīretxikana nisāpiretai hīte. ³ Hīte nirekari himarotini: “Atāokani atxiīti Paoro sāpiretari Kristo sākire?” hītxa. Napokasaaki ereē, himarotitapitīkariko atāo nisāpiretini Kristo sākire. Kristo !iōkapeta. Oerekapekai iposotīre hīte sauaki. ⁴ Kristo okikosaaki aamina ipiriāmitakari nopini, iīto iōkapere aua. Uatxa kataparari iua, kotxi Teoso sikataparatarari iua. Ate ito apaka iōkapeta, mitxi Kristo ito iōkapetini atoko, iuaritika Teoso sikataparataua Kristokata aūuini hīte amoiānātini ikapani.

⁵ Hixinīkariko hākixinireē auakari. Atāokani hāuīkatari Teoso sākire? Hīteka ataerekatauako. Himarotatarari Xesosi Kristo hākixinireē auini? Teoso sākire hākixinireē mauakaniā, Kristo Xesosi !auari hākixinireē. ⁶ Ninirekari himarotini Kristo Xesosi auini ate ākixinireē. ⁷ Ate misākīretari Teoso, maerekati hīte makamakani ikapani. Kona ate nirekari kākīti sākire: “Peerekari Paoro. Iua imarotapitikari Teoso sākire oerekini, kotxi Korīto sitatxiti auakani kamari Teoso sākire iaōka.” Ikara kona ate nireka, ate iuikiniua ikapani. Atxiīti kākīti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. ⁸ !Apakata aiotokakini atāo inakari. Atāo inakari auapika. Atāo inakari !ixipoka. Apakata aōerekini atāo inakari. ⁹ Atxiīti ate iōkapeta, iuaritika apoxokoniuaa hītaparaxinire

akenakoenetakasaaki. Ate misākiretari Teoso hīte atāonoka hīkamini īkapani ikiniōtika, Xesosi sākire iaōka hīkamini īkapani. ¹⁰ Ikara atoko inakari niōkatsopata hīte īkapani hītekata nimauakanisaaki, kotxi ereē napokasaaki, kona ninirekari nitxitinii hīte. Niposotapitikari nitxitinii, kotxi Apiananiri sikaposotiiretapekano atāo nikamini hītemoni. Txamari kona ninirekari Xesosi sākire hītakanapini, nota txitinii xika. Ninirekari hīte kataparaxinire hinini, Xesosi sākire iteene hāuikini īkapani.

¹¹ Nitariakori, xipope niōkatsopare. Ereēpiko. Ikiniōtika atāonoka hīkamako. Xesosi sākire iaōka hīkamako. Hīkamariko nisāpiretakiti iaōka. Hīxinikakiti ātinoka itxauako. Kona hītxitakakapeua. Ininiākara Teoso katiraōkiri, kauaīreri, auapikako hītekata.

¹² Haōkitakakasaakua, hīpoxokoniritika hāpakapakauako, kotxi Apiananiri nakitiakori hītxaua.

Ikinimane Teoso nakitiakori uai auakani xinikamanapitai hīte.

¹³ Apiananiri Xesosi Kristo sikari ikinipoko erekari hītemoni. Teoso iteene tiretai. Erekari Matamatakoti moianatai hīte hīkinika. Ameē.

KARÁSIA **Paoro Iokanatsopata Karásia Auakanimoni**

¹ Nota Paoro iokanatsopata ia aätsopa hitemoni. Nota Teoso iokanatakitino kákitimoni Teoso iokanapirena nisápiretini íkapani. Kona kákitini iokanatano nota. Xesosi Kristora iokanatano nota. Aíri Teoso, Xesosi ipinaáka atoko ókitikakarira, iura iokanatano nota kákitimoni. ² Ikinika áitariakori notakata auakani, nota apaka xinikanátaí híte. Híte ikini aikoti Teoso misákiiretikoátaá apotiitakaniua Karásia tixini auakani axinikanátapika.

³ Aíri Teoso, Xesosi Kristo aáuíte pakini sikari ikinipoko erekari hitemoni. Ninoa kamaerekaxiniretai híte.

⁴ Xesosi ipina amaerekani imaktxakini íkapani. !Erekari uatxa auakani. Maerekati kamakani sauaki aáukasaaki, Xesosi ipina ate imaktxakini íkapani, amapinakani íkapani. Xesosi ípipe ate íkapani, kotxi aíri Teoso nirekari Xesosi ipinini ate maerekani imaktxakini íkapani. ⁵ Ikinioítika: “Peerekai,” matxari Teoso. Átipirika kákiti txapikari Teoso: “Peerekai.” Ameë.

Áti Iokanapirena Erekari !Auari

⁶ Nikenakopiretari Teoso hitakanapaápotini. Iuasaaki nitsoríkaánáta. Kinirepa hitakanapari Teoso sákiere? Kotxi mapa kasiritinoka híte auikari Teoso iokanapirena erekari. Kristo iteene tiretai híte, ininiá akiritai híte inakitiakori hininiua íkapani. Kinirepa háuikatarí áti iokanapirena? ⁷ Atáo nisápiretai híte. Áti iokanapirena erekari ! auari. Nike-nakopiretari kákiti híte oereékani. Ninoa nirekari ikoketinirina isákiirena Kristo iokanapirenakata. Uatxa !himarotaikari atáo sápirenatxi. ⁸ Atáo asápiretapekai Teoso iokanapirena erekari. Átiáo sákiiretxiti asápiretiniáí, Teoso iokanataua ate kákiti misiritikomoni, átipirika misirikaretxi auiniátaá. Teoso nitiri iaxitikiri apaka sápiretiniáí átiáo iokanapirenatxi, Teoso iokanatarí iua initiri imisiritikomoni átipirika misirikaretxi auiniátaá. ⁹ Híte auikapekari Teoso iokanapirena erekari. Átiáo iokanapirenatxi sápiretakari sápiretiniáí Teoso iokanapirena atáo minakati, iokanataáakako imisiritikomoni átipirika misirikaretxi auiniátaá. Asápiretapekai íkara inakari sákiiretxiti. Uatxa iuaíkana nisápiretai.

¹⁰ Íkara atoko nitxai híte, ininiá himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atáo minakati sápiretakani txai híte: “Paoro nirekari kákiti apokaerekatiniri iua.” Íkara na atáoni. !Ninirekari kákiti apokaerekatinino nota. Ninirekiniári kákiti apokaerekatinino, kona Kristo nitiri !nitxaikaua.

Teoso Akiritari Paoro

¹¹ Nanera atáo minakati sápiretakani híte oereékani: “Paoro iokanapirena kona Teoso iokanapirenani,” itxana ninoa sákiere. Nitariakori atáopitikara nisápiretai híte. Iokanapirenatxi hitemoni nisápiretakiti kona kákiti sákiireni. Teoso sákiirera. ¹² Kona kákitini sápiretano ia iokanapirenatxi. Kona kákitini oerekano. Xesosi Kristora sápiretano nota iua iokanapirenatxi.

¹³ Híte imarotari mitxi nauakasaaki, Xoteo kiomaneakorini oerekakiti nauikasaaki, iuasaaki kona nitiretana Xesosi sákiere auíákani. Iteene nimisiritana ninoa. Ninirekari nixipokiniri Xesosi sákiere kípitakani. ¹⁴ Iuasaaki nimarotari Xoteoakori kitzakapiríkarini paniátakiti. Nikamari imakinika ninoa paniátakiti. Iuasaaki nimoianariakori apaka kamari ninoa kitzakapiríkarini paniátakiti. Nota apiata kamari ninoa sákiere iaóka. Iteene ninirekari nikaminiri kitzakapiríkarini paniátakiti.

¹⁵ Teoso iteene tiretano nota. Iua mereëno nota nauini apisapanika. Iuasaaki akiritano nota initiri nininiua tíkane. ¹⁶ Teoso keto manapi apokasaaki, oerekari imi notamoni, imi Xoteo minakonimoni nisápiretini íkapani. Iuasaaki kona nisápiretari kákiti Teoso oerekakiti sákiiretxiti, ininiá na kákitini sápiretano nikamakiti tíkane. ¹⁷ Iuasaaki kona nisari Xerosareë sitatxitimoni, ininiá nota apisapanika Teoso iokanatakini kona ótákiikano. Kona kákitimonini nisa noerekiko íkapani. Arápia tixinimoni nisapitipo. Eereka nikanapiriá Tamásiko sitatxitimoni.

¹⁸ Ipi anokanani, áti anokanani pakinikanani napaáka atoko, nisa Xerosareëmoni Petro nimisákiiretini íkapani. Ipi semanati ninapa Petrokata. ¹⁹ Apanakini Teoso iokanatakini isákiere sápiretakani kona naókita. Apiananiri itari Txiako inakorinoka naókita. Ininiákara kona kákiti sákiireni nisápiretai híte. Teoso iokanapirenakara nisápiretai híte.

²⁰ Ia niókatsoptakiti nisápiretakiti hitemoni atáo inakari. Teoso imarotari atáo inakari nisápiretinií.

²¹ Xerosareëmoni nisaäka atoko, nisari Síria tixini, Sirísia tixini apaka. ²² Iuasaaki Kristo säkire auïäkani, Xotéia tópa auakani, ! aókitapanikano nota iuasaaki. ²³ Ninoa imarotari apanakini minapiretakiti. Apanakini säkire: “Kiki mitxi ate misiritakari, uatxa säpiretari Xesosi säkire. Mitxi iua nirekari ixipokiniri Xesosi oereëkiti säkiretxiti, iuaritika uatxa inirekari oerekiniri Xesosi oerekakiti säkiretxiti kákitimoni,” itxana apanakini säkire. ²⁴ Ininiäkara ninoa: “Peerekari Teoso,” itxana, kotxi nota aukapekari Xesosi säkire.

2

Xesosi Iokanatakini Apakapari Paoro

¹ Katosi anokanani napaäka atoko, nikanapiriä Xerosareëmoni nimoianari Panapee inakorikata. Nanikari nimoianari Txito inakori apaka notakata. ² Xerosareëmoni nisa, kotxi Teoso oerekano nisini iuamoni. Iuaä napokasaaki, nisäkiraauata Xesosi säkire auïäkani auïteakorikata. Ninoakatánoka nisäkiraauata. Teoso iokanapirena erekari Xoteo minakonimoni nisäpiretakiti nisäpiretana ninoa. Nota nirekari ninoa imarotini nisäpiretakiti atão inini. Apaka ninirekari ninoa imarotini iuaíkana katana nisäpiretakiti atão inini íkapani. Nisäpiretakiti ikenakotakasaakina, ninoa: “Atão pitikara pisäpiretakiti Xoteo minakonimoni,” itxana. ³ Txito nimoianari na Xoteo ! itxaua. Krekora itxaua, ininiäkara Teoso takaótxikare ! auari iuamoni, iuaritika Xesosi säkire auïäkani auïteakori na paniätari itsiki mata kisauakiko. ⁴ Mitxi apanakini kikiakori apoka iuaä. Ninoa säkire: “Ate aukari Xesosi säkire,” itxana ninoa. Txamari na atão ninoa säkire. Ninoa apotiitaua Xesosi säkire auïäkankata. Inirekarina Txito ítoä Teoso takaótxikare takiko. Ninoa nirekari imarotini kitxakapiríkarini Xoteo kiomaneakorini paniätakiti atakanapini, kotxi atakanapapekari ipixini ninoa paniätakiti, kotxi Kristo Xesosi nakitiakori atxapekaua. Ninoa nirekari imarotini ikinika ate oerekakiti säkiretxiti. Ninoa nirekari ate kaminiri ikinika kitxakapiríkarini Xoteo kiomaneakorini paniätakiti. Ninoa nirekari ikinika Xesosi säkire auïäkani, Xoteo minakanuia apaka kaminiri Xoteo kiomaneakorini paniätakiti. Ninoa nirekari nitritxi amotakoni atoko aniniua. ⁵ Kona xatiki akamari ninoa nireëkiti, kotxi inirekarina Teoso iokanapirena atão inakari akoketini Xoteo kiomaneakorini paniätakitikata. Ate nirekari Teoso iokanapirena atáonoka inakari asäpiretinii.

⁶ Xesosi säkire auïäkani auïteakori txari notamoni: “Xoteo minakonimoni pisäpiretakiti erekapitikari. Apikomoni ate säkire ! auari ninoa pisäpiretini íkapani,” itxana. Ninoa auïtetxiakori itxauana, iuaritika Teosomoni ninoa apanakini kákiti poiáorini atokotxikana itxauana, kotxi Teoso atamari aákinire. Ininiäkara nota !nipíkari auïtetxi. ⁷ Ninoa Xesosi säkire auïäkani auïteakori apokaerekatari nipaříka. Ninoa imarotari Teoso sikano nota ia paríkatxi, ia iokanapirenatxi erekari nisäpiretinina Xoteo minakanuia. Iua atokotxikana Teoso sikari paríkatxi Petromoni, iokanapirenatxi erekari Xoteoakori isäpiretini íkapani. ⁸ Teoso iokanitari Petro Xoteoakorimoni, ininiä isikaposotiiretari ia ninoa sauaki iparíkauatakasaaki. Iua atokotxikana Teoso iokanatanano nota Xoteo minakonimoni. Nota apaka isikaposotiireta ninoa sauaki nipaříkauatakasaaki. ⁹ Iuasaaki ninoa auïteakori Txiako, Petro, Xoão pakini imarotari Teoso sikinino notamoni ia paríkatxi, ininiäkara imaíkarina niuako, Panapee uako pakini, kotxi akinika aparíkauata Teoso íkapani. Akinika aápokaerekatari nota, Panapee pakini säpiretiniri Teoso säkire Xoteo minakonimoni. Akinika aápokaerekatari Txiako, Petro, Xoão pakini säpiretiniri Teoso säkire Xoteoakorimoni. ¹⁰ Ninoa paniätaua ate matxineiroteni atiretini. Iuanoka ipaniätaua. Napokaerekatari ninoa säkire, kotxi ninirekapitikari matxineiroteni nitiretini.

Paoro Ótáikari Petro

¹¹ Eereka Petro motikaétaua ate Átxiokia sitatxiti aúuakasaaki. Iuasaaki Petro kamakiti na atóni. Ininiäkara nota säkiraauata Petro apisatoó: “Petro, pite kerokari,” nitxari iua. ¹² Merepanika Petro nipokota ikiniótika áitariakori Xoteo minakonikata. Eereka átikaka kikiáikini apoka Txiako iokanatakini. Iuasaaki Petro píkana ninoa, ininiä kona inikaika áitariakori Xoteo minakonikata, Xoteo kiomaneakorini säkire xika, kotxi ninoa säkire: “Kákiti Teoso takaótxikare ítoä mauakaní, !pinipokotape ninoakata,” itxana ninoa säkire. Petro píkana Txiako iokanatakini, kotxi ninoa nirekari Teoso takaótxikare auini áitariakori ítoä, Xoteo minakanuia ítoä. ¹³ Apanakini Xoteoakori Xesosi säkire auïäkani apaka kamari Petro kamakiti atokokana, ininiä ninoa apaka kerokari. !Nipokotaikana áitariakorikata, Xoteo minakonikata. Ninoa kerokiniri xika Panapee apaka kerokari. Iua apaka ! inipokotaika áitariakorikata, Xoteo minakonikata. ¹⁴ Nimarotakasaakiri ninoa kerokiniri ikamakitina, nota misäkiretari Petro ikinimane ókiátaá, kotxi ninoa íkamari atão inakari. Teoso iokanapirena erekari iaóka íkamana. Nitxari iua: “Xoteokarai, iuaritika pauanáta Xoteo minakanuia sauaki, ininiä Xoteo kamakiti atoko ! pikamaika. Xoteo minakanuia

atoko pitxaua. Ininiäkara kinirepa pite paniätana Xoteo minakanuia: ‘Hĩkĩpitariko Xoteo kiomaneakorini sãkire?’ !Erekari,” nitxa Petromoni.

Xesosi Sãkire Auikiko Kamaerekatari Kãkiti

¹⁵ Ate Xoteo atxaua, kotxi aĩri, ainoro pakini Xoteo txaua apaka. Xoteo kiomaneakorini sãkire: “Xoteo minakanuia maerekati kamakani itxauana,” itxana isãkirena. Xoteo minakanuia !atxaua ate. ¹⁶ Aimarotari, aũuikiniãri Xesosi Kristo sãkire, iua kamaerekatari aãkixinire, ininiäkara Teoso apakapaua. Kitxakapirĩka Teoso sãpiretari Moisesi ipaniãtakiti kãkiti kamini ikane. Ininiäkara Moisesi iõkatsopatarari ikara Teoso sãkire. Txamari ! aposotari akaminiri imakinika Teoso paniãtakiti, Moisesi iõkatsopatakiti, ininiäkara !ika-maerekatari aãkixinire. !Apakapaua ate. Ate auikari Xesosi sãkire ereka anini ikapani, ininiã Teoso apakapapitikausa ate. Teoso paniãtakiti iõkatsopatakori ikinika ! aposota akamini, ininiã Xesosi kamaerekatari aãkixinire Teoso apakapiniua ikapani, Kristo sãkire aũuikasaaki. ¹⁷ Anirekasaakiri Teoso kamaerekatinina, aãpoka Kristomoni. Iuasaaki aimarotari maerekati kamakani aniniua. Iuaritika Kristo makatxakari amaerekani Teoso apakapiniua ikapani. Ikara atoko ininiã, atxĩiti Kristo nirekatari maerekati akamini, imaktxakiniĩri ikapani? Konapitini. ¹⁸ Atxĩiti kãkiti imarotari Xoteo kiomaneakorini paniãtakiti kamiko na kamaerekatari kãkiti aãkixinire, ininiã itakanapari ninoã paniãtakiti ikamini. Atxĩiti ãti õti iuaĩkana ikamari ninoã Xoteo kiomaneakorini paniãtakiti iaõka, ininiã iuasaakiikarako ikerokari. ¹⁹ Moisesi iõkatsopatakiti oerekano nota ipĩkari atoko nininiua, kotxi nota kona posotari ikinika Moisesi iõkatsopatakiti iaõka nikamini, ininiã nimisiritiko auapitikako. Ininiã nimarotari Moisesi iõkatsopatakiti kona makatxakari nimaerekani. Ininiã nimarotari Xesosi sãkire auĩakarinkara auapininiika. Ininiã uatxa ikiniõtika ninirekari Teoso nireẽkitinoka nikamini. ²⁰ Xesosi okaãka aamina ĩpiriãmitakari nopini. Aamina ĩpiriãmitakari nopini okakori atoko nitxaua, kotxi maerekati mitxi nikamakiti ! ninirekari nikaminiri. Mitxi ninireẽkiti kona auaiika. Iuaritika auãkipanika nitxaua, kotxi Kristo aua nãkixinireẽ. Teoso aĩri sãkire nauikiniã, auãkipanika nitxa. Iua tirtano nota. Iua ipĩpe nota ikapani. ²¹ Moisesi iõkatsopatakiti kamiko kamaerekatiniaua ate, kinirepa Xesosi ipina? Moisesi iõkatsopatakiti kamiko na xatikĩ kamaerekataua ate. Teoso tiraõkinokara kamaerekatari aãkixinire.

3

Natokopa Itxa Teoso Kamaerekatiniaua?

¹ Hĩte Karásia tixini auakanii kona kĩkĩteĩ hĩte. Kipa misirienetai hĩte atão inakari himakamakani ikapani? Kotxi himarotapitikari atão inakari. Himarotari Xesosi Kristo ipina aamina ĩpiriãmitakari nopini amaerekani imaktxakini ikapani. Ate oerekapekai ikara atão inini. ² Ianoka nipimaãĩ hĩte: Kisaakipa hãpakapari Erekarĩ Matamatakoti? Hãpakapatarari iua, Moisesi paniãtakiti hĩkamakasaaki? Konapitini. Hãpakapatarari Erekarĩ Matamatakoti Teoso iokanapirena erekarĩ hãuikasaaki? Ari, Teoso iokanapirena erekarĩ hãuikasaaki, iuasaakiikara hãpakapari iua Erekarĩ Matamatakoti. ³ Kipa iomaĩikitetai hĩte? Merepanika Teoso sikari Erekarĩ Matamatakoti hĩtemoni, ininiã Erekarĩ Matamatakoti sikaposotiiretai hĩte Teoso paniãtakiti hĩkamini ikapani. Uatxa hĩxinikatarari Teoso paniãtakiti hĩkamini hĩteka posotiireẽkani? Konapitini. Kona hĩte posotari. ⁴ Himisiritapeẽkaika Xesosi sãkire hãuikini xika. Kinirepa hĩmĩteenekatarari himisiritiko? Atauako uatxa kona hãuikaikari mitxi hãuikakiti Xesosi sãkire? ⁵ Kirisaakipa Teoso sikari Erekarĩ Matamatakoti hĩtemoni? Kirisaakipa Teoso oerekari iposotiire hĩtemoni? Atauako ikara atoko itxa Moisesi paniãtakiti hĩkamakasaaki? Konapitini. Isikai Erekarĩ Matamatakoti, oerekai iposotiire, Teoso iokanapirena hãuikasaaki.

⁶ Hĩxinikariko Apraãoni. Apraão auikari Teoso sãkire, ininiäkara Teoso kamaerekatari iua, ininiã Teoso apakapari iua. ⁷ Ininiã ninirekari himarotiniĩri, kãkiti Teoso sãkire auĩakani Apraão apika mekaniriakori atão inakani itxauana ninoã. ⁸ Teoso kamaerekatari Xoteo minakanuia, kotxi ninoã auikari Xesosi sãkire. Kitxakapirĩka Teoso sãkire iõkatsopatakori sãpiretapekari ikara Teoso iokanapirena erekarĩ Apraãomoni. Ikara iõkatsopatarari txari: “Nota sikariko erekarĩ ikinimane kãkitiimoni, kotxi pite Apraão auikari nota sãkire.” ⁹ Apraão kĩpitari Teoso sãkire, ininiäkara Teoso takari erekarĩ iuamoni. Iua atoktxikana Teoso takari erekarĩ iua sãkire kĩpitakanimoni.

¹⁰ Apanakini uãkatari Teoso apakapiniua ninoã, kotxi ikĩpitarina Moisesini sãkire. Txamari Teoso misirikare pamonõkonipaniriko ninoamoni, kotxi Teoso sãkire iõkatsopatakori txari: “Teoso misiritariko kãkiti ikinika Moisesi paniãtakiti ikiniõtika imakamakanisaaki.” ¹¹ Teoso sãkire iõkatsopatakori txari: “Teoso kamaerekatariko kãkiti, iua sãkire auĩakani. Ininiã isãkire auĩakani auapininiika itxako Teosokata,” itxa Teoso sãkire iõkatsopatakori. Ininiäkara aimarotari Moisesi paniãtakiti kĩpitiko kona kamaerekatari kãkiti. ¹² Moisesini

iökatsopatakiti kona paniätäua aäuikiniiri Xesosi ipinini amaerekani imakatsxakini ikapani. Moisesi iökatsopatakiti paniätäua akaminiri ikinika Teoso paniätakiti. Teoso säkire iökatsopatakori txari: “Käkiti, Teoso paniätakiti iökatsopatakori ikinika makerokakatirako auapininiika itxako Teosokata,” itxa Teoso säkire iökatsopatakori.

¹³ Txamari ätika Teoso paniätakiti Moisesi iökatsopatakiti akerokiniä, amisiritaäkako. Kristo makatsakäua ate ikara misirikaretxi monökori, kotxi Teoso misiritari Xesosi Kristo aamina ipiriämatakari nopini ate maerekani xika ate mapinakani ikapani. Teoso säkire iökatsopatakori txari:

Käkiti aamina nopini okakori Teoso misiritakiti itxäua.

¹⁴ Teoso sikaenetari erekari Apraõomoni. Kristo ipipe hite Xoteo minakanuia ikara erekari häpakapini ikapani. Ininiä Xesosi Kristo säkire aäuikasaaki, aäpakapari mitxi Teoso sikaenetakiti. Aäpakapari aäxixinireë Erekar Matamatakoti, Teoso sikaenetakiti atemoni.

Teoso Sikaenetakiti Säkiiretxiti

¹⁵ Nitariakori, ikinimane käkiti imarotakiti nisäpiretaiko hite, noereëkiti säkiiretxiti iteene himarotini ikapani. Ipi käkiti aua itiina isikaenetakakana. Iuasaaki, iökatarina iuäkana isikaenetakitina tsopä. Eereka !auiritaäkana imaxinikaretinirina isikaenetakitina. Apaka !auiritaäka säkiiretxi apikomoni itakinina isikaenetakitina tsopä. Teoso sikaenetakiti inakitiakorimoni ikara atoko itxa. ¹⁶ Himarotariko ia. Teoso sikaenetari erekari Apraõomoni, Apraõo apika mekanirimoni apaka. Teoso säkire iökatsopatakori na txari: “Apika mekanirakori.” Teoso säkire iökatsopatakori txari: “Apika mekaniri.” Ininiä ätika apika mekaniri. Kristo itxäua iua. ¹⁷ Ia ninireka nisäpiretini. Kitxakapirika Teoso sikaenetakiti Apraõomoni apokapeka. Koatrosëtosi trita pakini anokanani Apraõo auaka atoko, Teoso säpiretari Moisesi ipaniätakiti iökatsopatinii ikapani käkiti kamini ikapani. Moisesi iökatsopatakiti kona xipokari Teoso sikaenetakiti Apraõomonikari. ¹⁸ Teoso sikari Kristo käkitimoni, kotxi mitxi isäpiretari isikaenetakiti Apraõomoni. Teoso sikasaakiri ipaniätakiti säkiiretxiti Moisesimoni ikara iaöka käkiti kamini ikapani, isikaenetakiti auapeka iuasaaki. Ipaniätakiti sikiko !ixipokari isikaenetakiti.

¹⁹ Ininiäkara kininiäpa Teoso sikari ipaniätakiti Moisesimoni käkiti kamini ikapani? Teoso paniätakiti iökatsopatakori oerekäua maerekati kamakanuia ate, kotxi !aposotari ikinika ipaniätakiti akamini. Kristo, Apraõo apika mekaniri ikorapokoriti apokini apisapanika, Moisesi iökatsopatakiti oerekäua Teoso nireëkiti akamini ikapani. Teoso sikaenetakiti itxäua Xesosi Kristo. Teoso sikasaakiri ipaniätakiti säkiiretxiti Moisesimoni, Teoso nitiriakori aua iuaätaä. Teoso säpiretari isäkire Moisesimoni. Eereka Moisesi säpiretari käkiti. ²⁰ Teoso säpiretakasaakiri Apraõo isikaenetakiti, lipaniätari äti käkiti säpiretiniri Apraõo. Teosonokara säpiretari Apraõo.

Moisesi Iökatsopatakiti

²¹ Moisesi iökatsopatakiti aäuikiniä, atxiiti !anirekaikari Teoso sikaenetakiti? Anirekapitiki. Akiomaneakorini paniätakiti säkiiretxiti, kona txikitakäua aäuapininiika anini tkane. Ininiäkara akiomaneakorini säkire kona kamaerekataua ate, ininiä Teoso kona apakapaua ate, ininiäkara kona aäuapininiika !atxa Teosokata. !Auari mauritakoti säkiiretxiti käkiti auapininiika inini txikitakakari. ²² Teoso säkire iökatsopatakori txari: “Ikininape käkiti kamari maerekati.” Kateia äki auakani atoko atxäua, kotxi !aposotari erekari akamini. Teoso sikaenetakiti sikaäka Xesosi Kristo säkire auiäkanimoni.

²³ Xesosi Kristo säkire auikiko apisa, käkiti kateia äki auakani atokokana itxäua. Käkiti moiaäkari atoko itxäua Teoso paniätakiti Moisesimoni sikakori. !Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka ikorapokoriti. Ipinapeka käkiti ikapani, ininiä uatxa aäuikiniäri iua säkire, kona Teoso misiritakäua uatxa. ²⁴ Kristo mapokakani apisa, ate oerekakari atoko itxäua Teoso paniätakiti iökatsopatakori. Kristomoni anikakari atoko itxäua ikara. Kristo apokasaaki, Teoso kamaerekataua ate, kotxi aäuikari Kristo säkire. ²⁵ Uatxa apokapeka Xesosi Kristo säkire auikiko. Ininiäkara Teoso paniätakiti iökatsopatakori !imoiaäkäua ate.

²⁶ Teoso anaakori hitxäua, kotxi häuikari Kristo Xesosi säkire. ²⁷ Hite patxisatapeëkaika, ininiäkara hīpatxisatiko oerekari apanakini Kristo ätipirika himoianatini ikapani. Ininiäkara Kristo atokopeka hitxa. ²⁸ Ikara atoko aniniä, akinika Kristo Xesosi nakiti atxäua, kotxi akaikotapika iuakata. Xoteoakori, Xoteo minakanuia, nitiritxi, nitiritxi minakanuia, kiki, sito, amakinika Kristo nakiti atxäua. ²⁹ Kristo nakiti pininiäua, Apraõo apika mekaniri pitxäua apaka. Ininiä pite apakapitikariko Teoso sikaenetakiti.

¹ Apikomoni nisäpiretaiko hïte äti säkiretxiti. Amarini !apakapari irini tii itakanapakiti iua ikapani, kotxi xapitipanikari. Ikinipoko irini nakiti imi nakiti txapekaua, auaritika na apakapapanikari. Axapitipanika inakasaaki, nitiritxi atoko itxaua. ² Axapitipanika inakasaaki apanakini moiaäri iua. Ninoa nïkatari itxineirote. Irini ketotiniiri manapi apokasaaki, imi apakapari ikinika irini tii itakanapakiti. ³ Mitxi iua eenetxi atoko atxaua ate. Nitiritxi atoko atxaua ate. Akiomaneakorini paniätakiti säkiretxiti amoiaäkiri atoko itxaua, kotxi oerekaua akamakiti tïkane. ⁴ Teoso iokanatarari imi käkitimoni iketo manapisaaki. Sito ito äki aua merepanika, ikinimane käkiti atoko. Iua kïpitari ikinika Teoso paniätakiti iökatsopatakorari. ⁵ Amakamakaniäri ikinika Teoso paniätakiti iökatsopatakorari, amisiritiko auapitika. Xesosi makatxakaua ate amamisiritakoni ikapani. Ininiä Teoso anaakori atxaua.

⁶ Teoso anaakori aniniäua, Teoso iokanatarari Erekarari Matamatakoti imi nakiti aäkiniremoni. Ininiä iua Erekarari Matamatakoti aäkinireë auiniä, aäkiritari Teoso: "Papai, niri," atxariko. ⁷ Ininiä nitiritxi atoko itxaikaua. Teoso anaakori atxapekaua. Iua anaakori aniniäua, ikini isikaenetakiti isikaua atemonikari, kotxi Kristo makatxakapekari amaerekani.

!Erekaxinireri Paoro Karásia Auakani Xika

⁸ Mitxi hïte !imarotarari Teoso. Iuasaaki nitiritxiakorari amotakoni atoko hïtxaua. Hïparïkauata teoso minakanuia ikapani. ⁹ Uatxa hïte imarotarari Teoso. Ari, uatxa Teoso imarotarari hïte. Ininiä kinirepa hïte nirekari hïkanapiriini mitxi hïauiteakorimoni. Teosa kaposotiirena ninoa. !Kïkitena ninoa. Kinirepa hïte nirekari iuaïkana ninoa nitiriakorari amotakoni atoko hininiäua? Kinirepa hïte nirekatari iuaïkana hïuikiniiri ninoa oereëkiti säkiretxiti? ¹⁰ Hïte nirekari Xoteo kamakiti atoko inakari hïkamini. Hïuäkatari Teoso apokaerekatinii hïte, kotxi ninoa kiinirite atokotxikana hïte apaka kama. ¹¹ Ininiä !erekaxinireno nota ikara nikenakoenetini. Atauako maxikatïka nota säpiretari Teoso säkire hïtemoni?

¹² Nitiriakorari, nota iteene ötäkikai hïte. Hïtakanapariko Xoteo kiomaneakorini paniätakiti hïkamini. Nota atoko hïtxako, kotxi hïte sauaki nauakasaaki nota hïte atoko nitxaua. Xoteo minakanuia atoko nitxaua. Hïtekata nauakasaaki, !himisiritano nota. Hïtoretano nota. ¹³ Hïxinikari merepitipanika Teoso iokanapirena erekarari hïte nisäpiretakasaaki, namianare xikara nisäpiretai hïte, hïtekata nauakasaaki. ¹⁴ Iuasaaki namianatakasaaki, hïparïkauatapitipo nota ikapani. !Hinaiakakano. !Hïokanatanano nisini namianare xika. Hïte apakapano nota Teoso nitiri iaxitikiri hïpakapini atokokana. Hïte apakapano nota, Kristo Xesosi hïpakapini atokokana. ¹⁵ Iuasaaki hïte iteene hïpoxokoniua. Nimarotarari ereka hinini, kotxi noki amianatakasaaki, hïposotäakamariko, hïmakatxakamariko hïteka oki notamoni hïsikini ikapani. ¹⁶ Atauako uatxa himokaiakari nitxatxaua nota, atão inakari nisäpiretinii xika?

¹⁷ Ninoa kamisirienererini iteene tiretapitikamai hïte, txamarini ninoa äkixinire nireëkiti !erekari hïte ikapani. Inirekarina hïte omanatinuia ate. Inirekarina hïte apokaerekatinina ninoanoka. ¹⁸ Erekarari käkiti iteene tiretinii hïte, äkixinire inireëkiti erekarari inakasaaki. Nota hïtekata nimaukanisaaki apaka, erekarari käkiti iteene tiretinii, äkixinire inireëkiti erekarari inakasaaki. ¹⁹ Hïte namariteni nota tiretakini atoko hïtxa. Hinoro atokotxikana nitxa nota. Kaiamapeka auaenetakoro atoko nitxa, kotxi nota atatsiirauata hïte xika. Kristo kamakiti atokotxikana hïkamakasaaki, iuasaakinoka nitsii näkixinire auakari iotoka. ²⁰ Kiniräo auaka nitxa hïtekata uatxa. Ninirekarari äpisatoötakakiniua, ininiä nixinikakiti ipinimonipo itxa atxiiti. !Erekaxinireno nota hïte xika.

Akaa, Sara Pakini

²¹ Hïte Xoteo kiomaneakorini paniätakiti nireëkani, himarotarari ninoa säkire? ²² Teoso säkire iökatsopatakorari säpiretaua, ipi Apraão anaakori aua. Sito niterotxi iamotakitokata aua imi äti. Niterotxi minakotokata itanorokata aua äti imi. ²³ Akaa inakoromoni, niterotxi iamotakitomoni imi aua, kotxi Apraão sirïka oakata. Imi aua Saramoni niterotxi minakotomoni, kotxi Teoso sikaenetari iua imi. ²⁴ Apraão anaakori oerekaua Teoso parïka käkiti ikapani. Iparïka ipi aua, naia sito ipi atoko. Akaa inakoro äkiri nitiritxi amotakori itxaua. Teoso parïka ötanoxiratarari Sinai inakori iua auakasaaki, niterotxi Akaa atoko itxa. Teoso paniätakiti iuasaaki amakamakaniäri, amisiritiko auapitikako, nitiritxi amotakori atokotxikana. Nitiritxi makamakaniäri ipaträote paniätakiti imisiritiko auapitikako. ²⁵ Ininiäkara ötanoxiratarari Sinai inakori Arápia tixini auakari Akaa atoko itxa. Apaka ikorasaaki Xerosareë sitatxiti oa atokokana itxa, kotxi Xerosareë auakani Akaa anaakori atoko itxana ninoa. Nitiritxiakorari amotakoni atoko itxana. Ninoa Xerosareë auakani ! ikamari ikinika Teoso paniätakiti, ininiä Teoso misiritapitikanako ninoa. ²⁶ Äti Xerosareë auapitika, iaxiti auakari Xerosareë, Teoso tixine. Xerosareë iaxiti auakari Sara atoko, kotxi

Sara niterotxi amotakoro !otxaua oa. Ate inoro atoko otxaua oa. Sara ākiri atoko atxaua, kotxi amisiritiko !auaika. Aāuikiñiāri Xesosi sākire, akiomaneakorini kona paniātaikaua ate ninoa nireēkiti akamini. ²⁷ Teoso sākire iōkatsopatakori txari:

Pite sito meenetoi pipoxokoniuatoko. Pite sito pauākitakarauatini tsi mimarotakatoti, pixikarauata pipoxokoniritika, kotxi pite takanapakoroi, itori pamariteakori auako. Kitaniriro poiōka oamariteakori auako,

itxa Teoso sākire iōkatsopatakori.

²⁸ Ininiā nitariakori, Sara ākiri, Isaki inakori atoko atxaua, kotxi Teoso sikaenetari Apraāo imi Saramoni auini. Iuatxikana Teoso sikaenetaua Xesosi amaerekani imaktxakini ikapani, Teoso anaakori aniniua ikapani. ²⁹ Akaa ākiri Isimaeo inakori iponaniā, kotxi Apraāo nirekari imi, ininiā iua sirīka Akaakata. Sara ākiri Isaki inakori iponaniā Erekar Matamatakoti posotireē, Eereka Isimaeo misiritari Isaki. Iua atokokana itxa uatxa. Teoso anaakori minakaniua misiritari Teoso anaakori. ³⁰ Teoso sākire iōkatsopatakori txari:

Hīokanataroko niterotxi imotakoro ospinini imikata, kotxi niterotxi ākiri kona apakapaniri ipixini iri tii. Niterotxi minakoto ākirinoka apakapari iri tii,

itxa Teoso sākire iōkatsopatakori. ³¹ Ininiā nitariakori, niterotxi amotakoro ākiri atoko ! atxaua. Niterotxi minakoto ākiri atoko atxaua.

5

Takaōtxikari !Ikamaerekatari Kākiti

¹ Nitiritxi kamari ipatrāote nireēkitinani. Ikara atoko uatxa !atxaua, kotxi aāuikari Kristo sākire. Kristo makatxakapekaua amisiritiko monōkoni. Ininiākara nitiritxi amotakoni atoko iuaikana !hītxapeua. !Hāuiritapiri kākiti paniātiniū ninoa auīākiti hāuikini.

² Hīkenakotako. Nota Paoro sāpiretaiko hīte. Hāuiritiniāri takaōtxikari takiko hītoā Xoteo atoko, ininiā hāuikari takaōtxikari kamaerekatinii hīte Teoso apakapiniū ikapani. Txamari na atāo. Kristonoka kamaerekatari kākiti Teoso apakapiniū ikapani. Erepaniko, pinirekiniāri takaōtxikari, !pinirekaikari Kristo. ³ Iuaikana nota ōtākikai hīte. Hāuiritiniāri takaōtxikari takiko hītoā Xoteo atoko, ininiā Moisesi paniātakiti ipixini hīkamapeka. Ikara atoko hininiā, ikinika ipaniātakiti hīkamako. ⁴ Ātikaka hīte nirekari Moisesi paniātakiti hīkamini Teoso kamaerekatinii ikapani. Txamari ikara atoko hinirekiniā, hītakanapari Kristo. Ininiākara Teoso liposotari ikinipoko erekari isikiniū. ⁵ Atepekana, ate auikari Xesosinoka txīkitakiniri kākiti ereka inini ikapani, Teoso apakapiniū ikapani. Ikamaerekataua Erekar Matamatakoti posotireē, kotxi aāuikari Xesosi sākire. ⁶ Takaōtxikari hītoā auiniā, iua takaōtxikari ! ikamaerekatai hīte. Takaōtxikari hītoā mauakaniā, takaōtxikari mauakani !ikamaerekatai apaka. Kristo Xesosi nakitiakori aniniāua, Teosora kamaerekataua, kotxi aāuikari Xesosi sākire, ininiā atiretari iua.

⁷ Merepanika hīte auikapitikari Xesosi sākire. Kipa xipokatari atāo inakari Teoso sākire hāuikini? Natokopa itxa Teoso sākire atāo inakari hītakanapini? ⁸ Hīte akiritakari itxaua Teoso. Kona iuani xipokari hāuikiniri atāo inakari isākire. ⁹ Kākiti sākire txari: “Pāo ātikaākari axapitiri ipani, iuaritika iātikakakiti itori ipe.” Iua atokokana ātika maerekati kamakari xika kaiōpokori kākiti kamari maerekati. ¹⁰ Teoso kamaimaroretano nota hīte takanapini hīkerokakiti, atāo inakari hīkamini ikapani. Hīte nitariakori hītxaua, kotxi Apiananiri nakitiakori atxaua, ininiārako nimarotari nota ōtākikinii iaōka hīkamapanikako. ! Nīmarotari iua kiki himisirienetakiri. Ia nimarota. Teoso misiritapanikariko iua.

¹¹ Apanakini sāpirenātari: “Paoro paniātari Xoteo minakaniua takiniri takaōtxikari iūtoāna.” Na atāo ninoa sākire. Nipaniātaākamari takaōtxikari takiko, nimisiritiko ! auamako. Kona nipaniātari Xoteo minakaniua takiniri takaōtxikari iūtoāna. Ikara xika nimisiritaāka. Nisāpiretari ia: Kristo aamina ipiriāmitakari nopini ipipe amaerekani imaktxakini ikapani. Kristonoka kamaerekataua Teoso apakapiniua ikapani. Ikara noerekakiti xika nimisiritaāka. ¹² Ninoa kamisirienenerini nirekiniāri itsiki mata kisauakiko, erekari itsikipati tsotatiko apaka. Nomanākarauata, ninoa misirienetiniū xika.

¹³ Nitariakori, Teoso akiritai hīte iua nakitiakori hininiua ikapani, ininiākara uatxa hīposotari hīteka nireēkiti hīkamini. Iuaritika ! hīkamapiri maerekati hīto nireēkiti. Ia hīkamako: Hītoretakakauako ātipirika. Ikara atoko hininiā, hīmoianatakakauako. ¹⁴ Teoso paniātakiti txari: “Pitiretana apakanii piteka pitiretiniaua atokokana.” Ikara paniāretxi pikaminiā, pikamapekari ikinika Moisesi paniātakiti. ¹⁵ Kaxipiri itopa auakani atoko ! hītxape. Ninoa karotakakaua, okakakaua itxana. Erepaniko. Kaxipiri itopa auakani atoko hininiā, hīxipokakauako.

Aīto Nireēkiti

¹⁶ Nōtākikare ia atoko itxapaniko: Hāuiritariko Erekar Matamatakoti oerekinii iua kimapore ikiniōtika. Iua hīkimapore oerekari ininiāua, ! hīkamapiri maerekati hīto nireēkiti.

17 Aïto ! inirekari Erekarí Matamatakoti nireëkíti. Iuatxikana Erekarí Matamatakoti ! inirekari hïito nireëkíti. Erekarí Matamatakoti mokaiakari itxaua aïto. Ininiã aãkixinire nireëkíti ! aposota akamini aïto nireëkíti xika. ¹⁸ Iua Erekarí Matamatakoti oerekiniãï pikimapore ikiniõtika, pikaminiãri iua nireëkíti, ininiã Xoteo kiomaneakorini paniãtakiti loerekaikari pikimapore.

¹⁹ Aïmarotapitikari kãkíti ïto nireëkíti. Inirekari ïtaniritxi minakotikatika osirïkini, ïtanorotxi minakotokatika isirïkini, mitxitakari ãtokata isirïkini. Kãkíti ïto nirekari kãkíti xinikaxititini maerekati ïto nireëkíti. Kãkíti ïto nirekari ãti kãkíti ïto, maerekati ikaminina ïkapani. ²⁰ Kãkíti ïto nirekari teoso kãkíti kamakíti iteosone ïkapani. Kãkíti ïto nirekari maerekani matamatakoni paniãtakiti ikamini. Kãkíti ïto nirekari omanãkaretxi, neenamtxi, xikoretxi, norikaretxi, iuikaretxi. Kãkíti ïto nirekari kãkíti omanatiniri apanakini. ²¹ Kãkíti ïto nirekari ãti kãkíti tii. Inirekari okanitxi, poãtaktxi, maerekati kiiniriti ikamini. Ikara atoko inakari maerekati kãkíti ïto nireëkíti. Uatxa nipinitai hïte, mitxi nipinitiniã atokotxikana. Ikara maerekati kamakani !aupani Teoso auïtetxi ininiãtaãua.

Erekarí Matamatakoti Nireëkíti

²² Iua Erekarí Matamatakoti aãkixinireë auiniã, ! ikara atokoni itxa akamakíti. Iua Erekarí Matamatakoti aãkixinireë auiniã, atiraõkiuata. Apoxokoniua. Erekaixinireua. ! Katimari aomanãkarauatini. Aamonãkarauata. Ereka. Akamaenetakíti akamapitika. ²³ Ate liuikaua. !Akamari maerekati aïto nireëkíti. Ikara atoko atxa, Erekarí Matamatakoti aãkixinireë auiniãua. Ikara atoko aniniã, amisiritiko !auari. ²⁴ Kristo nakitiakori aniniãua, !anirekaikari akaminiri maerekati aïto potxitakíti, aïto nireëkíti. Amanirekakiniti aõkini atokokana, aõkapekari maerekati aïto nireëkíti. ²⁵ Erekarí Matamatakoti txïkitakari axinire auãki inini, ininiãkara makamari ikinipoko iua nireëkíti ikiniõtika. ²⁶ !Apakata aãuikinua. ! Apakata anenamauatini. !Apakata axikotakakiniua.

6

Himoianatakakiniua

¹ Nitariakori, hïte Erekarí Matamatakoti nireëkíti kamakanii, himarotakasaakiri aïtari kaminiri maerekati, hõtãkikariko iua imaerekani itakanapini ïkapani. Hõtãkikariko hïtiraõkiritika. Iuasaaki erepaniko, kotxi atxiiti hïte apaka nirekari iua maerekani atokotxikana hïkamini. ² Himoianatakakauako hïtpara poiãonoka inakasaaki. Ikara atoko hininiã, hïkamari Kristo paniãtakiti apanakini hïtoretini. ³ !Erekarí ate iuikinua. Kãkíti minakati: “Apiari nota,” inakari, iuanika misirieneta. ⁴ Erekarí nataerekatiniri notaka kamakíti. Erekarí atxiiti? Nikamakíti eka ininiã, nipoxokoniua. !Apakata nãkixinireë nixinikiniri: “Iua ãti kamakíti apiaerekata. Nota kamakíti poião erekarí.” !Apakata ikara atoko ninini. ⁵ Ikininape kãkíti aua iparïka kasãpaniri. Iuanoka posotari ikaminiri.

⁶ Teoso sãkire oereëkari oerekiniãï pite Teoso sãkire, iuasaaki minakíti auiniãï pisikari iuamoni. Nipokori atxiiti, txineiro atxiiti, pisika iuamoni, kotxi iua kikiote !auari. ⁷ Pitika !pimisirienetapeuako, kotxi !piposotari Teoso pimisirienetini. Teoso misirienetakari ! auari. Pikiikioteë mitxi pitakakíti iaõka papakapa. Iua atokokana pikamakíti eka inini, papakapari erekari. Pikamakíti maerekati inini, papakapari maerekati. ⁸ Piïto nireëkíti pikaminiã, papakapari piïto siãkitinoka. Piïto sikai ipïkitxinoka. Teoso misiritapitikai. Erekarí Matamatakoti nireëkíti pikaminiã, papakapari iua siãkíti. Iua siãkíti Teosokata ãtipirika pauini ïkapani. ⁹ !Apakata asãpakini erekari ikiniõtika akamini. Makamari erekari ikiniõtika, maiotokanikaua anini. Erekarí akamini amaïotokakaniã, erekarí Teoso sikakíti aãpakapini apokapitakoko. ¹⁰ Ininiã aposotakasaakiri, makamari erekari ikininapemoni. Merepanika makamari erekari aïtariakorimoni Xesosi sãkire auïãkanimoni.

Imapotõkire Õtãkikaretxi

¹¹ Hãtamatariko ia niõkatsopare mitari. Ia iõkatsopari imapotõkire nota niuakoã niõkatsopatakiti. ¹² Apanakini hïte sauaki nirekari ninoaka apokaerekatiko, ininiã isãpiretari kãkíti potxitakitinoka. Ninoakara paniãtai hïtakiniri takaõtxikari hïtoã. Kininiãpa ninoa nirekari takaõtxikari hïtakini? Ninoa misiritiko monõkoni xika, ninoa paniãtari Xoteo minakanua takiniri takaõtxikari ïtoãna, ininiã Xoteoakori potxitari ninoa oereëkíti sãkiretxiti. Inirekarina Xoteoakori apokaerekatinina ninoa. Txamari Kristonoka kamaerekatari kãkíti, kotxi ipïpe aamina ipiriãmitakari nopini kãkíti maerekani imaktaxikini ïkapani. ¹³ Ninoa kamisirienererini kamari Moisesi paniãtakiti takaõtxikari itakinina ïtoãna. Txamari ikinika Moisesi paniãtakiti ! ikamana. Ninoa nirekari hïte takiniri takaõtxikari hïtoã, ininiã eereka ninoa iuikaua, kotxi hïte kamari ninoa paniãtakiti. ¹⁴ Kona ninirekari niuikinua. Teoso !inirekari niuikinua. Nota iuikari aãuïte Xesosi Kristo. Iuanokara niuika, kotxi iua ipina aamina ipiriãmitakari nopini ate ïkapani. Ininiã

nota ! ninirekaikari Xesosi sãkire mauiãkani nireëkiti. Iuatxikana ninoa ! inirekari nota nireëkiti. ¹⁵ Takaõtxikari hĩtoã auiniã, iua takaõtxikari ! ikamaerekatai hĩte. Takaõtxikari hĩtoã mauakaniã, takaõtxikari mauakani ! ikamaerekatai. Teoso txĩkitakiniã iua anaakori hininiãua, iuasaaki ikamaerekatai hĩte. Ininiãkara hãkixinire amaneri itxaua. Ininiã mitxi hinireëkiti ! hinirekaika. ¹⁶ Teoso kamaerekaxiniretai hĩte, ikara sãkiretxiti hãuikasaaki. Iua amonĩkai hĩte. Ikara atoko Teoso kamari kãkiti iua nakitiakori ininiuana, atão Isaeo mekaniriakori ininiuana.

¹⁷ Ixipope ia iõkatsopari. Nipinitana nota kamamaxiretakani. !Hĩkamamaxiretapeno, kotxi nimisiritaãkapeka. Nikaro mata auapeka nĩtoã. Auĩtetxi nitiri amotakori karo mata atoko itxa nikaro mata, kotxi Apiananiri Xesosi nitiri nitxaua.

¹⁸ Nitariakori, aãuĩte Xesosi Kristo sikari ikinipoko erekari hĩte ãkixiniremoni. Ameë.

ÉPESO Paoro Iokanatsopatakiti Épeso Auakanimoni

¹ Nota, Paoro. Niökatsopatari ia aätsopa. Teoso nirekano Xesosi Kristo iokanatakiti nininiua. Ininiä niökatsopata Teoso nakitiakorimoni Épeso sitatxiti auakanimoni. Kristo Xesosi säkire auiäkaniimoni, ipaniätakiti kamakanimoni niökatsopata. ² Aäri Teoso, Apiananiri Xesosi Kristo pakini sikari ikinipoko erekari hitemoni. Ninoa kamaerekaxiniretai hite.

Teoso Mereëua Itixi Kamiko Apisapanika

³ Masäpiretari Teoso, aäüite Xesosi Kristo iri: “Erekapitikai,” kotxi itakapekari ikinika erekari ate äkixiniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴ Itakari ikara erekari ate äkixiniremoni, kotxi itixi kamiko apisapanika Teoso mereëpekaua Kristo nakitiakori aniniua. Imereëua Teoso nireëkitinoka akamini ikapani, maerekati amakamani ikapani, atiraökuiatini ikapani. ⁵ Itixi kamiko apisapanika, Teoso mereëua iua anaakori aniniua ikapani. Xesosi Kristo ipipe ate ikapani, ininiä iua txikitakaua Teoso anaakori aniniua. Teoso txikitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekaripotxitakiti ikamini tükane.

⁶ Teoso txikitakaua iua anaakori aniniua, kotxi inirekari asäpiretiniri: “Peerekari ikinipoko erekari pisikakiti käkitimoni.” Teoso sikaua ikara erekari, kotxi iua tirketakiti nakitiakori atxaua.

⁷ Xesosi ikitxitari amaerekani, kotxi iarëka xiketa ate ikapani, ininiä Teoso maxinikaretari amaerekani. Uatxa !imisiritaikaua amaerekani xika. Teoso kamari ikara ate ikapani, kotxi ikinipoko erekari isika atemoni. !Ixipoka ikara erekari Teoso sikakiti. Ikinipoko erekari aua iuamoni. ⁸ Käkiti kona posotari iaötiniri erekari Teoso sikakiti ate maerekati kamakanimoni. !Kaiäotikori. Ikinipoko imaroretxi aua iuamoni. Atäo inakarinoka imarota ikamini, ininiä ikara erekari ikaminiäua. ⁹ Mitxi !aimarotari Teoso inireëkiti ikamini tükane. Uatxa ikamaimaroretäua. Ipotxitari oerekinua inireëkiti. Peerekari iua potxitakiti. Äkixinireë ixinikari ikara ikamini. ¹⁰ Teoso ketotini öti manapi, ikinipoko iposope inakasaaki, iua apotiitariko ikinimane itixine auakani, itixiä auakani pakini.

¹¹ Xesosi Kristo nakitiakori atxaua, ininiä aäpakapari ate ikapani inikatakiti. Itixi kamiko apisapanika ixinikari ikamakiti ate ikapani. Ikamari ikinika inirekakiti iaöka. ¹² Iua mereëua ate, merepitipanika Kristo säkire auiäkaniua, ikinimane asäpiretini ikapani: “Peerekari Teoso. Erekapitikari ikamakiti.”

¹³ Hitepekana auikari Xesosi säkire, atäo inakari hikenakotakasaaki. Ikara atäo inakari Teoso iokanapirena erekari itxaua, kotxi iua iokanapirena oereka himaerekani makatxakiko. Xesosi säkire häuikasaaki, Erekarimatamatakoti apoka häkixinireë. Iua Teoso takäötxikare itxaua. Iua oerekai hite Teoso nakitiakori hininiua. Xesosi sikaenetapekari Erekarimatamatakoti atemoni iokanatin. ¹⁴ Isikaenetakiti Erekarimatamatakoti atemoni auape, ininiä aimarotapitikari aäpakapiniri ikinika isikaenetakiti, inikatakiti ate ikapani. Iuasaaki Xesosi apakapaua ate iua nakitiakori, iua iamotakini, kotxi imaktaxakapekari amaerekani. Ikara atoko ininiä, ikinimane käkiti txari iua: “Peerekai pite. Erekapitikari ikinipoko pikamakiti.”

Paoro Misäkiretiniri Teoso

¹⁵ Ikara atoko ininiä, nota kenakopiretakasaakiri Apiananiri Xesosi säkire häuikini, ikinimane Teoso nakitiakori hitiretini nikenakopiretakasaaki, ¹⁶ nimisäkiretapikari Teoso hite ikapani. Nitxari iua: “Erekapitikai, kotxi pite maktaxakari ninoa Épeso sitatxiti auakani maerekani,” nitxa. ¹⁷ Teoso, aäüite Xesosi Kristo Teosone itxaua. Xesosi iri itxaua. Kaiotximereri iua Teoso. Nimisäkiretari Teoso hite ikapani ia atoko: “Pisikaimaroretana ninoa äkixinire. Ninirekari Erekarimatamatakoti oerekinina pite iteene imarotinina ikapani. ¹⁸ Piopinikariko ninoa äkixinire atäo inakari imarotinina ikapani. Pite akiritana ninoa ikinipoko erekari apakapinina ikapani. Ikara poerekana ninoa imarotinirina ikapani, iätapinirina ikapani. Pikamaimaroretana ninoa pite nikatakiti pite nakitiakori ikapani. Ikara pinikatakiti, pisikaenetakiti, peerekari. Itori pinikatakiti. !Ixipoka pinikatakiti. !Kaiäotikori pinikatakiti pinakitiakori ikapani. ¹⁹ Pikamaimaroretana ninoa kaposotiire pinini. Ininiä piposotari iteene pisikaposotiiretinua ate pisäkire auiäkani. Ikara piposotiire !auari ätimoni. Pataparari pite posotiire.” Ia atoko nimisäkiretari Teoso hite ikapani.

²⁰ Ikara Teoso posotiire ökitikari Kristo ipikani sauaki auakasaaki. Iposo atoko iposotiireë itakari Kristo apiari topäkiniätaä, ikikomoni itixineë. ²¹ Ininiä Kristo Apiananiri itxaua.

Iua posotiire apiata. Maerekani matamatakoni auíteakori posotiire poiãoka. Īkorapokoriti auíteaxiakori posotiire poiãoka. Kristo posotiire apiata. Īkoraasaaki Kristo Apiananiri. Apaka katana Kristo atoko inakari !auari. !Auari áti kaposotiireri Kristo atoko. Kristo apiata. ²² Teoso txíkitakari Kristo ikinimane auíte ininiuua. Itakari ikinimane imokaiakariakori ikiti patapi, ininiã Xesosi paniãatakutinoka ikamana. Imokaiakari !auaika. Ininiã ikinipoko Teoso kamakiti auíte itxaua Kristo. Teoso sikari iua isãkire auíãkani auíte ininiuua. Inakitiakori kii atoko itxa Xesosi. ²³ Iua íto atoko itxa inakitiakori, ininiã ikinimane inakitiakori sauaki iua aua. Itxíkitakari ikinipoko atão inini.

2

Mitxi Ipíkani Atoko Atxaua

¹ Hítepekana, Xesosi txíkitapekari hĩxinire auãki inini. Mitxi, isãkire hãuikini apisapanika, ipíkani atoko itxa hãkixinire, Teoso manirekakiniti hĩkamini xika, himaerekani xika. ² Iuasaaki híte kamari ikini sereti maerekati, ĩkorapokoriti auakani maerekani atokokana. Iuasaaki hĩkípitari Satanasi sãkire, maerekani matamatakoni auíte sãkire. Iua, initiriakorikata aua ítima auiniãtaã. Iua parĩkauata Teoso sãkire makípítakani xinire áki. ³ Mitxipekana amakinika ate Teoso sãkire makípítakani atxaua, kotxi akamari maerekati aito paniãtakiti. Iuasaaki akamari maerekati aito nireëkiti. Akamari maerekati axinikakiti iaõka iuasaaki. Ikinimane itixi auakani atoko, ate, apanakini apaka maerekati kamakani atxaua iuasaaki, ininiã Teoso omanãkarauata amaerekani xika. Iposope amisiritiko.

⁴ Iuaritika Teoso iteene amonĩkaua. Kaamonĩkareri Teoso atoko inakari !auari. Iua iteene tiretaua. Ate maerekati kamakani atxaua, iuaritika itiretaua. ⁵ Ipíkani atoko anakasaaki, maerekatinoka akamakasaaki, iuasaaki itxíkitakaua auãki anini, Kristo auãki inĩkitakini atoko. Iuasaaki imaktxakari amaerekani, kotxi inirekari ikinipoko erekari isikiniua. ⁶ Ininiã Teoso õkitikaua ipíkani sauaki aãuakasaaki, Kristo õkitikini atokokana. Ininiã itixineë Teoso takaua ate aítopãkini Kristo Xesosikata, kotxi iua nakitiakori atxaua. ⁷ Ininiã katanarako átipirika inirekari oerekiniri ikinipoko erekari atemoni. Erekari isikakiti !ixipoka. !Kamapotõkiri. Kona erekaua, iuaritika iteene itiretaua, kotxi Xesosi Kristo nakitiakori atxaua. ⁸ Atemoni erekari isikakitinokara makatxakari amaerekani, isãkire aãuikasaaki. Ininiã !aposota ateka maerekani amaktxakini, kotxi maerekati kamakani atxaua. Teoso sikakitinokara makatxakari amaerekani. ⁹ Akamakiti erekari !iposotari amaerekani imaktxakini. Ininiã kãkiti iuikiniua !auari. Teosonokara posotari imaktxakiniri kãkiti maerekani. ¹⁰ Peerekari Teoso parĩka aãkixinireë, kotxi ikamaua ate ereka anini. Ininiã Xesosi Kristo nakitiakori atxaua. Ikara iparĩka amaneri. Ikamaua ate amaneri anini, erekari akamini ikapani. Ikara ikamini apisapanika Teoso xinikari ikara. Iuasaaki inirekari ekerarinoka akamini.

Kristo Nakitiakori Átika Nirimanetxi

¹¹ Xoteo minakanuia hĩtxaua, kotxi ikara atoko hĩponaniã. Teoso takaõtxikare auaitotakini takauãkatai híte: "Teoso takaõtxikare mauaitotakini." Xoteoakori auari ikara Teoso takaõtxikare, kotxi ikisauakarina amarini tsiki mata axapiti. Ikara oerekari Teoso nakitiakori ininiuana. ¹² Hĩxinikariko mitxi, Kristo sãkire hãuikini apisa, Kristo !auari hĩtemoni. Iuasaaki maparakini atoko hĩtxaua. Isaeokini !hĩtxaua. Átião hĩtxaua. Ikara xika kona híte posotari hãpakapiniri Teoso sikaenetakiti iuasaaki. Iuasaaki !himarotari Xesosi makatxakiniri himaerekani. Iuasaaki !himarotari Teoso.

¹³ Uatxa Kristo Xesosi apakapapekai híte. Mitxi itakoxiti auakani atoko hĩtxaua, iuaritika uatxa iua minai híte Teosomoni, kotxi Kristo arẽka xiketa híte ikapani.

¹⁴ Iuanokara kamaerekaxiniretaua, ininiã ixipokari Xoteo, Xoteo minakanuia pakini omanatakiniua. Ikara omanãkaretxi paretxi atoko itxa. !Auiritari Xoteo sini Xoteo minakonimoni. Uatxa átika nirimanetxi atxaua. ¹⁵ Kristo ipíkasaaki, ixipokari ikara omanãkaretxi, kotxi iuasaaki ikamari ikinika paniãtakori iõkatsopatakori ikinimane ikapani. Ikara Xoteoakorimoni sikakori. !Isikaãka Xoteo minakonimoni. Ininiã Kristo ipíkasaaki, itxíkitakana Xoteoakori, Xoteo minakanuia pakini átika kãkiti amaneri atoko inini. Neenamtxi !auaika, kotxi Kristo kamaerekaxiniretaua amakinika. ¹⁶ Ipina aamina ipiriãmitakari nopini, ininiã iuasaaki iuaikana iminana Xoteoakori, Xoteo minakanuia pakini Teosomoni. Átika nirimanetxi atoko iminana Teosomoni. Iuasaaki ixipokari Xoteoakori, Xoteo minakanuia omanatakiniua. ¹⁷ Xesosi apoka ĩkorapokoriti Teoso iokanapirena erekari isãpiretiniri kãkiti. Isãpiretari kãkiti, Teoso omanatiniri kãkiti imaerekani xika xipope, Xesosi sãkire auikasaakina. Isãpiretai híte Xoteo minakanuia. Apaka isãpiretari Xoteoakori. Mitxi õtakoxiti auakani atoko hĩtxaua, kotxi iuasaaki !himarotari Teoso sãkire. Mitxi Xoteoakori imarotari Teoso sãkire, ininiã Teoso takote auakani atoko itxauana. ¹⁸ Erekari

Matamatakoti átinoka aua. Kristo sákire aáuikasaaki, iua Erekarí Matamatakoti anikaua ári Teosomoni. Anikari Xoteoakori, Xoteo minakaníua pakini uamoni.

Teoso Aapoko Atxaua

¹⁹ Uatxa Teoso mimarotakani lhítaxikaua. Uatxa áti uáka lhítaxikaua. Teoso tixine auakani hítaxaua, apanakini Teoso sákire auiákanikata. Iua aapoko auakani hítaxaua.

²⁰ Teoso aapoko atoko atxaua. Aapokotxi kamaáka kaikori nopini imirikakani íkapani. Xesosi moianariakori tosi pakini, iua iokanatakini kákitimoni, ninoá sápiretakiti iua kaikori atoko itxa. Kítzakapíríka Teoso sákire sápiretakani sápiretakiti apaka iua kaikori atoko itxa. Aapokotxi aua átika kai mitari, apanakini kai soro maíkakari. Xesosi Kristo iua kai mitari atoko itxa. ²¹ Ininiá iua maíkaua. Iuakata aáua, ininiá kákiti itoápotari auikiniri Xesosi sákire. Apiananiri aapoko aneéápotini atoko itxa. Iua Apiananiri aapoko atoko atxa. Imisákiretiko aikoti atoko atxa. ²² Ininiá iua apotiitai híte híkinika iua aapoko hiníniuá íkapani, kotxi Teoso auiniátaá hítaxaua. Erekarí Matamatakoti auiniátaá hítaxaua apaka.

3

Paoro Sápiretari Teoso Sákire Xoteo Minakonimoni

¹ Ikara atoko ininiá, nota Paoro kateia áki naua, híte Xoteo minakaníua Xesosi Kristo sákire nisápiretini xika. Kateia áki naua, kotxi nauikari Xesosi sákire.

² Híkenakopiretápekari paríkatxi Teoso sikakiti notamoni, isákire Xoteo minakaníua nisápiretini íkapani. Ikinipoko erekari isika notamoni, híte nisápiretini íkapani. ³ Teoso oerekapekano kákiti mítxi mimarotakiníti. Mítxi axapítiki íkara Teoso oerekakiti niókatsopatapeka hítemoni. ⁴ Uatxa ia hátatsopatakasaaki, híposotari himarotiniri nimarotakiti, kákiti mítxi mimarotakiníti, Kristo paríka kákiti íkapani. ⁵ Kítzakapíríka kákiti kona imarotari íkara Kristo paríka kákiti íkapani. Uatxa Erekarí Matamatakoti oerekari íkara Xesosi iokanatakinimoni. Apaka oerekari íkara Teoso sákire sápiretakanimoni. Teoso paríkanoka íkamana ninoá. ⁶ Nisápiretai híte kákiti mítxi mimarotakiníti. Xoteo minakaníua apakapariko Teoso níkatakiti itixineé, Xoteoakori apakapiniri atokotxikana. Xoteo minakaníua, Xoteoakorikata Kristo íto atoko itxauana. Xoteo minakaníua apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari sápiretari kákiti isikaenetakiti, kotxi isikari Kristo, Xoteoakori maerekani, Xoteo minakaníua maerekani apaka imatxakini íkapani. Ikara kákiti mítxi mimarotakiníti.

⁷ Teoso iokanatanano nota kákitimoni iua iokanapirena erekari nisápiretini íkapani. Ikara paríkatxi isikano, kotxi ikinipoko erekari Teoso sikano nota iposotiireé. ⁸ Itomaneri Teoso nakitiakori poiáorini, iuaritika nota poiáori niníniuá atoko inakari !auari. Iuaritika Teoso sikano ikinipoko erekari, kotxi iokanatanano Xoteo minakonimoni erekari Kristo auakiti nisápiretinina íkapani. Ikara erekari !ixipoka. Itori. !Kimarotikori ikinipoko erekari Kristo auakiti. ⁹ Apaka Teoso nirekari noerekiniri ikinimane, íkara mítxi imimarotakiníti, Teoso nakitiakori tirketakiníua. Itixi kamikosaaki, Teoso kípatari íkara kákiti mimarotakiníti. Ikipatiniritika uatxa íkara noerekari ikinimane. Teoso kamakasaakiri itixi, Xesosi Kristokata íkamari ikinipoko. Mítxi kona xatiki !auari. ¹⁰ Uatxa Teoso nirekari imereékini oerekiniri ikinipoko Teoso imarore auítetxiakori matamatakonimoni, Teoso tixine auakanimoni. ¹¹ Itixi kamiko apisapanika, átipirika Teoso nirekari aáuíte Kristo Xesosi kaminiri íkinika inirekakiti kákiti íkapani. ¹² Kristo kamakiti ate íkapani aáuíkinia, aposotapítikari aáupokini Teosomoni, ininiá !kapíkareua Teosomoni aáupokini. Ataparaxiniriritika asari uamoni. ¹³ Ininiákara nótáikikai híte. !Himatinaniuatape nimisiritiko xika. Nimisiritáka híte íkapani, Xesosi sákire háuikini íkapani, ininiá híuikariko nimisiritiko. Teoso auiritari nimisiritiko, kotxi iua iteene tirtai híte.

Iuaíkana Paoro Misákiretiniri Teoso

¹⁴ Teoso nirekakiti kákiti íkapani níxinikasaaki, níkapotoreékaua aáuíte Xesosi Kristo iri apisatóo, nimisákiretiniri íkapani. ¹⁵ Ikinimane Teoso nakitiakori, itixine auakani, apaka íkinimane íkorapokorití auakani apakapari iua uáka. ¹⁶ Ia atoko nimisákiretari Teoso híte íkapani: “Peerekai pite. Ikinipoko erekari aua pitemoni. !Ixipoka íkara erekari. Ininiákara, písikaposotíretana Épeso auakani ákixinire. Nínirekari Erekarí Matamatakoti iteene sítakaparatínina ninoá ákixinire. ¹⁷ Nínirekari iteene auikinirina Kristo sákire, ininiá Kristo auapíka ákixinireéna. Nínirekari ninoá iteene imarotiniri pite tiraóki. Takari kotsa kípatxi erekari áki auini atokokana, nínirekari ninoá kaikotini pítekata píteraóki sítakaparatínina íkapani. Imarotiniárina píteraóki, !irikana. !Íkamarina maerekati. ¹⁸ Nínirekari ninoá, pinakitiakori, apanakini pinakitiakori pakini, imarotiniri Kristo tiraóki kákiti íkapani, kotxi Kristo tiraóki !ixipoka. !Kaiáotikori iua tiraóki. ¹⁹ Kákiti kona posotari imarotiniri íkinika

Kristo tiraõki. Ninirekari ninoa Épeso auakani apakapiniri ikini sereti erekari pisikakiti ãkixinireña, pite atão imarotinina ïkapani." Ikara atoko nimisãkiretari Teoso hïte ïkapani.

²⁰ Ininiã uatxa maxinikariko iua. Kaposotiireri apiatakari itxaua. Ikinipoko iposota ikamini. Imaposotakiniti !auari, ininiã ikinika aamanaãkiti, ikinika axinikakiti pakini, iposota ikamini. Ari, apikomoni iposota ikamini ate ïkapani. Axinikakiti, aamanaãkiti poiãoka. Apiata iposotiire. Iua posotiire parïkauata aãkixinireë. ²¹ Ininiã Teoso mereëkini kitxakapirïka auakani, uatxa auakani, katana auakani pakini ãtipirika txariko Teoso: "Peerekai pite. Apiananiri pitxaua." Ikara atoko itxana, kotxi Xesosi Kristo makatzakari amaerekani Teoso anaakori aniniua ïkapani. Ameë.

4

Xesosi Auiãkani Átika Íto Atoko Itxauana

¹ Kateia ãki naua, kotxi nauikari Apiananiri sãkire. Ininiã nota iteene õtãkikai hïte ikiniõtika atão hïkamini, kotxi Teoso akiritai hïte iua anaakori hininiua ïkapani. Ikara atoko hininiã, iua kamakiti atokokana hïkamako. ² Ininiãkara !hïukaueua. !Hinirekapiri hinirekakitinoka hïkamini. Hãuiritariko ãti kaminiri iua nirekakiti. Katima homanãkarauatka ! hïtxapeko. Himïteenekakakauako hïkerokasaakiri hïkamakiti. Hïtoretakakauako. ³ Erekari Mata-matakoti txãkitakari axinikakiti, anireëkiti pakini átinoka inini, kotxi iua kamaerekaxiniretaua. Ininiãkara hïparïkauatoko ikara atoko auini ïkapani. ⁴ Xesosi ïto atoko atxaua. Átika iïto, ininiã ïtotxi átika atoko atxaua. Erekari Matamatakoti átinoka aua. Teoso akiritakasaakii inakitiakori hininiua, hiãtapariko hãpokini iua tixine iuakata hãuini ïkapani. Ininiã átinoka hiãtapakiti. ⁵ Átinokara Apiananiri aua. Átinokara aãuiãkiti sãkiretxiti aua. Átinokara apatx-isatiko. ⁶ Átika Teoso aua. Iua ikinimane iri átika aua. Iua ikinimane apisatoõ apiatakari itxaua. Ikini itixiti iua aua. Amakinika aãkixinireë iua aua.

Teoso Sikakiti Atemoni

⁷ Kristo sikapekari iposotiire ate amakinimoni iparïka akamini ïkapani. Iposotiire isikaua aparïka akamini ïkapani. Aparïka pamimari, ininiã apiata isika iposotiire atemoni. ⁸ Kotxi Teoso sãkire kitxakapirïka txari:

Ikaniãsaaki itixinemoni, imikanapiriãna kãkiti mitxi imokaiakari maïkakini. Iuasaaki isikari erekari kãkitimoni.

⁹ Iua kanïka, kotxi mitxipe iua katxaka itixi patapixiti ipïkani auiniãtaã. ¹⁰ Iua itixi patapixiti katxakakari, iuatxikana kanïka iaxiti apiko nopinixiti, ininiã uatxa iua aua ikini itixiti, iaxiti, Teoso tixine pakini. !Auari iua mauakaniãtaã.

¹¹ Iposotiire isikasaaki isãkire auiaãkanimoni, isikari ia atoko parïkauatankani ininiuana ïkapani: Kristo iokanatakini kãkitimoni, Teoso sãkire sãpiretakani, Teoso iokanapirena erekari sãpiretakani, Teoso nakitiakori õtãkikakani, Teoso sãkire oerekakani pakini isikaua. ¹² Ikara atoko isikaua, kotxi inirekari ninoa oerekiniua inakitiakori iparïka atão akamini ïkapani. Ikara atoko isikaua, kotxi ninoa sikataparaxiniretaua. ¹³ Ninoa sikataparaxiniretiniritika átika aãuiãkiti auako. Ipinimoni inakari aãuiãkiti !auaika, kotxi atão aimarotariko Teoso ãkiri sãkire. Ininiã kiïkiteua, kimaroreua iuasaaki. Kristo atoko atxauako, kotxi paimatireri iua.

¹⁴ Ininiã iuasaaki amarini atoko ! atxaikaua, kotxi amarini ! imarotari atão inakari. Tsakati anikakiti atoko, ïtima anikakiti atoko itxana kãkiti kamisirienereri sãkire auiaãkani. !Imarotarina atão Teoso sãkire. Ninoa kamisirienereri xinikaxitita atão minakati oerekini ïkapani. ¹⁵ Atão inakarínoka asãpiretako kãkiti atiraõkiritika. Ikara atoko akaminiã, aimarore aneeãpota. Kristo sãkire iteene aũukaãpota. Erekari akamakiti aneeãpota. Ininiã Kristo atoko atxaua, kotxi iua ïto atokotxikana atxaua. Ate kii atoko itxaua Kristo. ¹⁶ ïtotxi kamari ikii paniãtakiti. Iua atokokana ate kamari Kristo paniãtakiti. Ininiã aãpotiitaua. Amoianatakakaua Kristo parïka akamini ïkapani, kotxi ïtotxi átika atoko atxaua. Kristo sikataparataua amoianatakakiniua. Ininiã ikinika Kristo nakitiakori atão parïkauatiniã iua ïkapani, apiaãpota aimarotari iua imarore atão akamini ïkapani. Akinika atão aparïkauatiniã Kristo ïkapani, ikamataparaxiniretaua. Iuasaaki atiretakakaua. Iuasaaki ïtotxi erekari, mamianatakati atoko itxaua Kristo nakitiakori.

Aãuini Amaneri

¹⁷ Ikara atoko ininiã, ia nisãpiretai. Apiananiri imaroreë iteene nõtãkikai. ! Hïkamapinikariko apanakini Xoteo minakanua kamakiti atoko. !Kiïkiteri ninoa kamakiti. !Kiïkiteri ixinikakitina. ¹⁸ !Imarotarina atão inakari. Mapiãri atoko itxa iïkitena. Ikara atoko ininiã, !kimarorena. Teoso ! itxãkitakana auapininiika ininina, kotxi ãkixinireña ! inirekarina atão inakari imarotinina. ¹⁹ Ninoa ãkixinire ãpatapeka, ininiã ! ipëtuatana maerekati ikamakasaakina. Ininiãkara ninoaka sikaua Satanasimoni iïtona nireëkitinoka

ikaminina ikapani. Ininiã ikamarina ikinika maerekati. Itori maerekati inireka ikaminina. !Nirekarina iotokakinirina ikara maerekati ikaminina.

²⁰ Hitepekana, ikara maerekati ! hõerekaãka, Kristo himarotakasaaki. ²¹ Iuasaaki hikenakotapitikari iua sãkire. Iua oerekai atão inakari, kotxi Xesosi imarotari ikinipoko atão inakari. ²² Hõerekaãka hõtakanapiniri maerekati mitxi hõkamakiti, hõxinikakiti pakini. Himãka kitzakari hõkini atokokana hõtapaniko himaerekani hõtakanapini. Hõtakanapariko ikara kitzakari hinireëkiti, kotxi ikara maerekati hinireëkiti misirienetai. ²³ Ininiã eereka hamanaãriko Teoso txõkitakiniri hõxinikakiti, hinireëkiti pakini amaneri inini. ²⁴ Ininiã himãka amaneri hõeretakini atokokana, amanerinoka atão inakarínoka hõkamako, kotxi Teoso txõkitakai hõxinire amaneri inini, Teoso atoko hinini ikapani. Ininiã atão inakari himarota. Erekarínoka hõkama. Teoso ikapaninanira hõparõkauatako.

²⁵ Ininiã aãpirena kona hõkamape hõtariakorimoni. Atão inakarínoka hõsãkiretako, kotxi amakinika ate ãtika ãtotxi atoko atxaua. ²⁶ Hinaiatakasaakia, !hãuiritapiri homanãkare txõkitakinii maerekati hõkamini. Himakini apõsapaniko, hõtokakariko homanãkaruatini. ²⁷ Ikara homanãkare himatakanapakanisaaki, hãuiritari Satanasi txõkitakinii maerekati hõkamini, ininiã !hãuiritapiriko iua.

²⁸ Atxiiti hõtiriuatapeka, ininiã !hõtiriuatapinikako. Hõparõkauatako. Erekarì parõkatxi hõuakoã hõkamako, hõparõka ãki hõpakapini ikapani. Ininiã eereka aua minakati hõtemoni, kãkiti minakati mauinakinimoni hõsikini ikapani. ²⁹ Maerekati sãkiretxiti !hõsãpiretapiri kãkiti. Erekarínoka hõsãpiretako, hõsãkire kenakotakani hõsikataparaxiniretini ikapani, ikinipoko erekari Teoso sikakiti ninõa apakapini ikapani. ³⁰ Kona hõkamamatinanitapiri Erekarì Matamatakoti Teoso nakiti himaerekani xika. Erekarì Matamatakoti Teoso takaõtxikare itxaua. Teoso sikapekari iua atemoni, ininiã aimarotapitikari aãpakapiniri ikinipoko Teoso sikaenetakiti Kristo uai kanapiriãkasaaki. Iuasaaki imakatzakaua ikinika maerekati auiniãtaã. ³¹ !Hinõkatapiri homanãkare hãkixinireë. Katima naiataki !hõtapeko. ãtipirika apanakini homanãtini, hõtakanapako. !Hõtixitapiri ãti. !Himisãkirepiretapiri ãti. Ikini sereti maerekati ikara atoko inakari hõtakanapako. ³² Erekarì hõkaminakauako. Hõamonõkauako. Himaxinõkaretariko maerekati ãti kamakiti hõtemoni, maerekati ate kamakiti Teoso maxinõkaretini atokotxikana. Teoso maxinõkaretari amaerekani, kotxi Kristo ipina ate ikapani.

5

Hõtiraõkiuatako Ikinioõtika

¹ Teoso anaakori itiretakini hõtchaua, ininiã hõkamariko Teoso kamakiti atokotxikana. ² Hõtiraõkiuatako ikinioõtika, Kristo tiretiniua atokotxikana. Iuaka isikaua Teosomoni, kotxi ipina ate ikapani. Teoso apokaerekatari Kristo ipinini ate ikapani. Peerekari isikiniua Teosomoni.

³ Teoso nakitiakori hõtchaua, ininiã kona ninirekari nikenakopiretiniiri põtaniri minakotikatika, põtanooro minakotokatika pisirõkini. !Apakata maerekati hõto nireëkiti hõkamini. !Apakata maerekati hõto nireëkiti hõxinikini, hõsãpiretini. Ikara hõxinire txikotakari hõtakanapako. Txineiro potxitakani !hõtchapeuako. ⁴ !Hõsãpiretapiriko sãkiretxi maerekati. Sãkiretxi miõkiteti apaka !hõsãpiretape. !Hinapetapiri ãti. Hõsãkiriuatakasaaki, hõtchariko: "Peerekari Teoso, kotxi isikaua ikinipoko erekari." ⁵ Aimarotari ia: !ãtanooro minakotokatika sirõkakari, maerekati iõto nireëkiti kamakari, txineiro potxitakani pakini !iteosonetari Teoso. Teoso kamakori misãkiretakani atoko itxana. Ikara atoko inakani !apakapari Teoso sikaenetakiti iua anaakorimoni, Kristo, Teoso pakini auõtetxi ininiãtaãua.

⁶ Kona hãuiritapiri kãkiti misirienetini hõte miõkiteti sãkiretxitiã. Kona !hãuikapiri ninõa sãkire, kotxi ikara atoko inakari maerekati xika, Teoso misiritariko isãkire makõpitakani. ⁷ Ininiã ikara atoko inakani moianariakori !hõtchapeuako.

Pokamara Atoko Hõtchaua

⁸ Mitxi hõte mapiãri atoko hõtcha, kotxi !himarotari Apiananiri iuasaaki. Uatxa hõte imarotapitikari iua, ininiã pokamara atoko hõtchaua. Ininiãkara erekarínoka hõkamako ikinioõtika. ⁹ Erekarì Matamatakoti auakasaaki kãkiti ãkixinireë, erekarínoka inireka ikamini. Atãonoka ikama. Atão inakarínoka isãpireta. Ikara atoko inakari Erekarì Matamatakoti sikakiti. ¹⁰ Hinitariko Apiananiri nireëkiti hõkamini ikapani. ¹¹ Ikara atoko ininiã, kona himoianatapiri kãkiti maerekati kamakani, kotxi ikara parõkatxi ipiãã potõrikakari. Ikara atoko inakari parõkatxi !iminari erekari atemoni. Ininiã maerekati !hõkamape. Ia hõkamako. Hõerekariko kãkiti maerekati makamakani. ¹² Apõttauata asãpiretiniiri Teoso sãkire makõpitakani kamakiti ipiãã, kotxi apia maerekati ikora. ¹³ Ikinika tirikapì kamara auiniãtaã atamataãka, ¹⁴ kotxi tirikapì iopinikari ikinika. Ininiã ãti txari: "Himereka, imakakani atoko inakanii. Hõkitikauako ipõkani atoko inakanii. Ininiã iuasaaki Kristo iopinikariko hãkixinire."

Mũikiteti !Hĩtxapeua

¹⁵ Erepaniko. Atão inakari hĩkamako ikiniõtika. !Hĩkamapiri mũikiteti kamakiti atoko. Hĩkamariko kãkiti kũikiteri kamakiti atoko. ¹⁶ Hĩkamariko erekari, kotxi poiãonoka hãuini. Hĩkamariko erekari ikiniõtika, kotxi maerekati auapitika ìkorasaaki. ¹⁷ Ininiã mũikiteti ! hĩtxapeua. Himarotariko Apiananiri nireẽkiti.

¹⁸ Kona hiãtapero iãriã kapoãro hĩpoãtini ìkapani, kotxi itxĩkitakai maerekati hĩkamini. Hãuiritariko Erekari Matamatakoti txĩkitakinii erekarinoka hĩkamini. ¹⁹ Hĩsãpiretakakaua xikari Teoso ìkapani, xikari kitxakari, xikari ìkorapokoriti auakari pakini. Hĩxikaretari ìkara atoko inakari xikari Teoso ìkapani. Hãkixinireẽ apaka hĩxikarauata Teoso ìkapani. ²⁰ Ætipirika hĩtxariko aĩri Teoso: “Erekapitukai pite, kotxi erekari ìkinipoko psikakiti atemoni.” Xesosi Kristo aãũite ininiua, asãpiretari Teoso ìkara atoko inakari.

Tanorotxi Pirena.

²¹ Hĩpaxitakakauako, ãti nirekakiti hĩkamini, kotxi hĩpĩkariko Teoso manirekakiniti hĩkamini. ²² Ininiã hĩte sitoakoro hĩkamariko hĩtaniri nireẽkiti. Apiananiri nireẽkiti hĩkamini atokokana hĩkamariko hĩtaniri nireẽkiti, ²³ kotxi pĩãniri pikii atoko itxaua. Ininiã iua piauũite itxaua. Iua atokokana Kristo inakitiakori kii atoko itxaua Kristo. Iua ìto atoko atxaua. Aãũite itxaua. Amaerekani makatxakakari itxaua. Ininiã sito kamariko oĩtaniri paniãtakiti. ²⁴ Ininiã kãkiti Kristo nakitiakori kamari Kristo nireẽkiti. Iua atokotxikana sito kamariko ìkinipoko oĩtaniri nireẽkiti.

Taniritxi Pirena

²⁵ Hĩte taniritxi, hĩtaretaroko hĩtanoro. Kristo tiretinina inakitiakori atokokana, hĩtaretaroko hĩtanoro. Iua iteene turetana, kotxi ipina inakitiakori ìkapani. ²⁶ Iua ipina, kotxi inirekari itxĩkitakiniiua ate iua nakitiakori aniniua. Inirekari imakatxakiniri amaerekani. Æparaã makatxakiniri aĩto txiko atokokana, iua sãkire makatxakari amaerekani aãkixinireẽ auakari. ²⁷ Kristo ipina inakitiakori ìkapani, kotxi inirekaua iposope anini ate apakapini ìkapani. Iuasaaki peerekaua. Ætika amaerekani !auaika. Ætika akerokakiti !auaika. Ikara atoko inakari maerekati !auaika. Iuasaaki atão Teoso nakitiakori atxaua. Erekarinoka akama iuasaaki. ²⁸ Ikara atoko ininiã, kiki tiretaroko ìtanoro, ìto itiretini atokokana. Ætanoro tiretakari iuaka itiretaua. ²⁹ Kãkiti !omanatari iuaka ìto. Isikakienatari. Itiretari. Apiananiri tiretiniri inakitiakori atokokana, kãkiti tiretari iuaka ìto. ³⁰ Apiananiri ìto atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxaãpota. ³¹ Iua ìto atoko atxaua, ininiãkara kiki ìtanorouatakasaaki, itakanapana ìri, inoro pakini ìtanorokata ìkaikotini ìkapani. Ininiã ãtinoka ìtotxi atoko itxauana. ³² Nĩsãpiretai mitxi !kimarotikori. Kristo inakitiakorikata ãtika ìtotxi atoko itxauana. Kãkiti !imarotari ìkara mitxi. ³³ Ininiã pitiretaroko pĩãnoro piteka ìto pitiretini atokokana. Pite tanorotxipekana, pipaxitariko pĩtaniri.

6*Amarini Pirena*

¹ Hĩte amariniakori, hĩkĩpitanako hĩri, hinoro pakini sãkire, kotxi ìkara Apiananiri paniãtakiti. Atão pikĩpitanako ninoã sãkire. ² Kitxakapĩrĩka Teoso sãkire paniãtaua:

Hĩpaxitanako hĩri, hinoro pakini.

Ikara Teoso paniãtakiti hĩkaminiã, Teoso sikaenetakiti isika hĩtemoni. Mitxi Teoso paniãtakiti lauari Teoso sikaenetakiti.

³ Hĩri, hinoro pakini sãkire hĩkĩpitiniã, ia isikaenetakiti apokapitikako hĩtemoni. Hĩkĩpitiniãri ninoã sãkire, erekari hãuini. Hĩkĩpitiniãri ninoã sãkire, hãuiniritika kiomãtxi hĩtxauako.

Irĩxi Pirena

⁴ Hĩtepekana irĩtxiakori, kona hĩtxĩkitakapena hamariteakori omanãkaruatini atão minakati hĩkamini xika. Hõerekanako Apiananiri nireẽkiti ikaminina. Hõerekanako Apiananiri sãkire imarotina.

Nitiritxi Pirena

⁵ Hĩtepekana nitiritxiakori amotakoni, hĩkamariko hãauĩteakori ìkorapokoriti auakani paniãtakiti. Hĩpaxitanako ninoã. Hĩpĩkariko ninoã manirekakiniti hĩkamini. Hãkixinireẽ hinirekariko ninoã nireẽkitinoka hĩkamini. Kristo paniãtakiti hĩkamini atokokana, hĩkamariko ninoã paniãtakiti. ⁶ !Hĩparĩkauatapeko hĩparĩka erekari apanakini atamatini ìkapani ìkapani, kotxi iuasaaki hinirekari ninoã poxokotini. Kristo nitiriakori hĩtxaua, ininiã hĩparĩkauata Teoso nireẽkiti hĩkamini, kotxi hãkixinireẽ ìkaranoka hinireka hĩkamini. ⁷ Hĩkamariko hĩparĩka ìkinika hĩpoxokoniritika, hinirekiniritika. Apiananiri ìkapani hĩparĩkauatini atokokana,

hīparīkauatako hīauīte īkorapokoriti auakari īkapani. ⁸ Kotxi himarotari Apiananiri sikariko parīkatxi īki kākītimoni, ikinipoko erekari ikamakiti īki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina īki.

Patrão Pirena

⁹ Hītepekana patrão, ia atoko inakari hīkamako hinitiriakorimoni. !Hītɰapiri hinitiriakori: "Ikinika nota paniātakiti himakamakaniā, iteene nimisiritai hīte," kotxi hīte patrão te aua apaka iaxiti. Iua Teoso. Teoso kamakiti poiāorimoni, iua atokotɰikana ikamakiti auītetɰimoni.

Kākiti Xinire Tokapare

¹⁰ Nitariakori, ia nisākire mapotōkire: Katapara hītɰako. Hīkosekataparatariko Apiananiri tapara, kotxi kaposotiireri iua. ¹¹ Sotato ieretakari iito tokapare, neenamatzī ikamini apisapanika. Iua atokokana Teoso sikaua axinire tokapare, ininiā maeretakariko ikinika ikara axinire tokapare, kotxi neenamatzī auapitika Satanasiakata. Iua paimatīreri. Ix-inikaxititapekari itxīkitakinīua maerekati akamini. ¹² !Aneenamauata kākītikata. Aneenamauata maerekani matamatakoni auīteakorikata, ikinika maerekani matamatakoni kaposotiirerīnikata. Aneenamauata auītetɰiakorikata īkorapokoriti ipiaā auakanikata. Aneenamauata ikinipoko maerekani matamatakoni iaxiti auakanikata.

¹³ Ininiākara hīeretakariko ikinika Teoso sikakiti hīxinire tokapare. Ininiā maerekati apokasaaki, !inokai. Kona hīrika. Kona himiteka. Hīokanatarī Satanasi isini. Hīte kīiata.

¹⁴ Sotato iposope ineenamauatini atoko hītɰako. Sotato takari ipakiomatare. Ipakiomatare maīkari ikinipoko iito tokapare. Sotato pakiomatare atoko itxa hīxinire tokapare maīkiko. Atāo inakari sākiretixiti itxaua iua. Ininiā hītakariko ikara hīpakiomatare.

Sotato takari itorota koana, itorota tokapare īkapani. Sotato torota koana atoko itxa hīkamakiti atāo inakarinoka. Ininiā hīeretakariko ikara hītorota tokapare.

¹⁵ Sotato kiti apaka iposope ineenamauatini, kotxi itakari ikiti mata ikiti tokapare īkapani. Sotato kiti mata atoko itxa Teoso iokanapirena erekari aanikapiretakiti kākītimoni. Ikara iokanapirena sāpiretaua Teoso !imisiritaiakaua, isākire aūiukasaaki. Ininiā hīeretakariko ikara hīkiti mata.

¹⁶ Sotato maīkari itokapare, iito imokaiakari xiripi minokakani īkapani. Xiripitxi tiri-nakari itokaparemoni apokasaaki, oaka. Iua tokaparetxi atoko itxa Teoso sākire auikiko. Iteene hāuikiniāri Teoso sākire Satanasi !iposotari inokiniā maerekatiā. Ininiā himaīkariko ikara tokaparetxi.

¹⁷ Sotato takari ikii tokapare metao kamakori. Sotato kii tāta atoko itxa amaerekani makatɰakiko aimarotini. Ikara imaroretxi axinīkakiti akii tokapare itxaua. Ininiā hītakariko ikara hīkii tāta.

Sotato anikaro iouata mitaro. Oa iouata mitaro atoko itxa Erekarī Matamatakoti sāpiretiniua Teoso sākire. Ininiā himaīkaroko oa iouata mitaro.

¹⁸ Himisākiretariko Teoso ātipirika. Hamanaāriko, Erekarī Matamatakoti nireēkiti iaōka hāpakapini. Araōkire hītɰako. !Hītakanapari hīsākirauatini Teosokata. Hamanaāriko Teoso, ikinimane inakitiakori nireēkiti isikinina.

¹⁹ Himisākiretari Teoso nota īkapani apaka. Hamanaāri Teoso, isākire isikinino nisākirauatakasaaiki, nitaparaxinireritika nisākirauatini īkapani, kotxi ninirekarī Teoso iokanapirena erekari nisāpiretiniri kākiti. Mitxi Teoso iokanapirena erekari !kimarotikori.

²⁰ Uatxa Teoso iokanatanano nota kākītimoni, iokanapirena erekari nisāpiretini īkapani. Ikara nisāpiretini xika, kateia āki naua nota uatxa. Hamanaāri Teoso, isākire nitaparaxinireritika nisāpiretini, kotxi ikara inakari niparīka.

²¹ Niokanatarī Tɰīkiko inakori hītemoni. Aītari atiretakiti iua. Apiananiri nitiri itxaua. Atāo iparīkauata Apiananiri īkapani. Iua sāpiretaiko hīte nota pirena. Ikara atoko himarotariko nauini, nikamakiti pakini. Iua sāpiretai ikinipoko nota pirena.

²² Ininiā niokanatarī iua hītemoni ate pirena himarotini īkapani, isikataparaxiniretinii hīte īkapani. ²³ Nitariakori, aīri Teoso, Apiananiri Xesosi Kristo pakini kamaerekaxiniretai. Itiretaina hīte. Itxīkitakaina Teoso sākire iteene hāuikini. ²⁴ Teoso sikari ikinipoko erekari aūiute Xesosi Kristo ātipirika tiretakanimoni. Amēē.

PIRIPOSI

Paoro Iokanatsopatakiti Piriposi Auakanimoni

¹ Nota Paoro, Tximótxio pakini, Kristo Xesosi nitiriakori iua amotakini atxaua. Nióokatsopata ikini kákiti Kristo Xesosi nakitiakorimoni, Piriposi sitatxiti auakanimoni aiokanapireta. Nióokatsopata híte kótáikikarerinimoni, kotxi híte ótáikikana Xesosi sákire auíákani. Hítepekana, kamiparítkarerini, nióokatsopata hítemoni, kotxi híte moianatana Xesosi sákire auíákani.

² Ereékai híte. Aíri Teoso, Xesosi Kristo Apiananiri pakini sikai ikinipoko erekari. Ninoa kamaerekaxiniretai.

Paoro Misákiaretari Teoso Piriposi Auakani Íkapani

³ Híte nixinikasaaki: “Erekapitikari aTeosone,” nitxa. ⁴ Teoso nimisákiaretakasaaki híte himakinika íkapani, nipoxokoniritika nimisákiaretari Teoso. ⁵ Nipoxokoniuata, kotxi híte miparítkatano nota Teoso iokanapirena erekari nisápiresetini íkapani, kotxi híte iokanataro txineiro notamoni. Teoso iokanapirena erekari háuikasaaki, hípotorika himiparítkatinino. Eereka kona híte itokaika himiparítkatinino nota. Uatxa auapika himiparítkatinino nota. ⁶ Teoso sikari erekari hítemoni merepanika isákire háuikasaaki, ininiá nota imarotapitikari Teoso sikari erekari hítemoni ikiniótika. Ikara Teoso paríka hítemoni. Erekarí isikiniritika Xesosi kanapiriá íkorapokoriti. ⁷ Atáopitika nixinikinií híte nipoxokoniritika, kotxi iteene nitiretai híte himakinika. Atxiíti kateia áki naua. Atxiíti mapara naua, kákiti Teoso iokanapirena erekari atáo ininiua noerekini íkapani. Atxiíti nisápiresetari Teoso iokanapirena erekari, kákiti iteene imarotini íkapani. Kateia áki nauakasaaki, mapara nauakasaaki, ikiniótika híte notakata apakapari ikinipoko erekari Teoso sikakiti. ⁸ Nota iteene tiretai híte. Kristo Xesosi tiretini atokokana nitiretai híte. Teoso imarotari ikara nisákire atáo inini.

⁹ Nota misákiaretari Teoso híte íkapani ia atoko: Ninirekari hítiráókuiatini apiaópotini ikiniótika. Hítiráóki aneéápotakasaaki, ninirekari himarore apaka aneéápotini. Imaroretxi himaróápotakasaaki, ninirekari atáonoka himarotini. ¹⁰ Ikara atoko hininiá, himereéri apia erekari híkamini. Ininiá maerekati !híkama. Maerekati na apanakinimoni !híkama. Ikara atoko hininiá, íposopeka hítxa Kristo kanapiriákasaaki. ¹¹ Ikara atoko hininiá, ikinipoko híkamakiti erekari. Xesosi Kristonokara kamaerekatai híte híkamakiti ereka inini íkapani. Apanakini atamatakasaakiri erekari híkamakiti, ninoa imarotari Teoso posotiire, ininiá eereka ninoa: “Peerekari Teoso,” itxanako.

Paoro Misiritiko Pirena

¹² Nitariakori, himarotari nota iteene misiritaáka. Iuaritika Teoso iokanapirena erekari iaripiretapeka. Ninirekari himarotini, nimisiritiko xika apikomoni kákiti imarotari Teoso iokanapirena erekari. ¹³ Ininiá nimisiritiko xika ikinika sototoakori, Homanoakori auíte aapoko iníkatani, ikinimane kákiti mapara auakani apaka imarotari nota uai kateia áki nauakasaaki Kristo sákire nisápiresetini xika. ¹⁴ Itori áitariakori Apiananiri sákire auíákani, sikataparaxiniretaáka, kotxi imarotarina Teoso níkatini nota kateia áki nauakasaaki. Ininiá ninoa sápiresetari Teoso sákire itaparaxinireritikana. Mapíkaretika itxana.

¹⁵ Ninoa sápiresetari Kristo sákire, kotxi inirekarina erekari ikaminina. Txamari apanakinipekana sápiresetari Kristo sákire nota xikotiko xika. Inirekarina kákiti auikiniri ninoaka sákire, nota sákire poiáoka auikinina íkapani. Ninoa sápiresetari Kristo iokanapirena, kotxi ninoa potxitari kákiti taparakienatakakiniua. ¹⁶ Áitariakori, erekarinani nirekakani, sápiresetari Kristo iokanapirena, kotxi ninoa tiretano nota. Ninoa imarotari Teoso sikinino nota ia paríkatxi, Teoso iokanapirena erekari atáo inini noerekini íkapani. ¹⁷ Nota xikotakani sápiresetari Kristo sákire, txamari inirekarina ninoaka nireékiti ikaminina. ! Inirekarina Teoso nireékiti. Inirekarina nota apia atatsiitini nimisiritiko uai kateia áki nauakasaaki.

¹⁸ Atxiíti Kristo iokanapirena sápiresetakani ákixinire erekari. Atxiíti ninoa ákixinire kona erekari. Iuaritika erekapitikari, kotxi Kristo iokanapirena sápiresetapeéka. Ininiákara nipoxokoniuata nota. Ari, ! notokapani nipoxokoniuatini. ¹⁹ Nipoxokoniuata, kotxi nimarotari nitakanapiniri kateia, kotxi híte misákiaretari Teoso nota íkapani. Nimakatx-akaáka kateia áki, kotxi Erekarí Matamatakoti Xesosi Kristokata auakari moianatano nota. ²⁰ Kona ninirekari nipétauatini, Kristo iokanapirena nisápiresetakasaaki. Ninirekari kataparaxinire ninini, Kristo apanakini nisápiresetini íkapani. Ikara atoko nininiá, apanakini imarotari Kristo Apiananiri ininiua. Ikiniótika nauapanika ninakasaaki, ninirekari kákiti imarotini Kristo Apiananiri ininiua. Ari, nipíkasaaki apaka, ninirekari apanakini imarotini Kristo Apiananiri ininiua. ²¹ Auapanika ninakasaaki, ninirekari Kristo nireékitinoka

nikamini. Erekapitokari nipinini, kotxi eereka Kristokata nauapika. ²² Auapanika nikakasaaki, nipaŕikauatapitipo Teoso säkire nisäpiretini, ininiäkara erekari nipaŕika. Kipa ninireka? Nota auapanika nininikani? Nipininikani? ! Nimarotari ninireëkiti. ²³ Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ikapani. Ikara atoko apiaerekata. ²⁴ Txamari hite noerekini ikapani, ninirekari auapanika ninini, kotxi hite nirekapanikano nota. ²⁵ Ikara nimarotapitika, ininiäkara auapanika nitxa, himakinika noerekini ikapani, kotxi nota nirekari himaroäpotiniri Teoso säkire. Ninirekari häuikiniri hïpoxokoniritika. ²⁶ Ininiäkara eereka hïtxari: "Erekapitokari Kristo Xesosi, kotxi Paoro iuaikana apoka atemoni," hïtxapaniko. Ininiäkara iteene hïpoxokoniuata iuaasaaki.

²⁷ Atxiiti auapanika nitxa, atxiiti nipina, iuaritika ikiniötika eereka hïtxako häuini. Erekarikari Kristo iokanapirena, ininiäkara hite apaka eereka hïtxako häuini. Atxiiti nisa hitemoni. Atxiiti kona nisa. Atxiiti nikenakopiretai hite uai kateia äki nauakasaaki. Iuaritika, häuini eereka inakasaaki, nimarotariko hite himakinika iteene auikiniri Kristo säkire iua iokanapirena erekari. Häuini eereka inakasaaki, nimarotari hite himakinika säpiretiniri Kristo iokanapirena iaöka apanakinimoni. ²⁸ Häuini eereka inakasaaki, na hïpikana hite omanatakani. Hïtparaxinireritika häuiniäkara, ninoa hite omanatakani imarotari ixipokinina äti öti. Hïtparaxinireritika häuiniäkara, ninoa hite imarotari Teoso makatxakinii hite himapinikani ikapani. ²⁹ Ininiäkara Teoso sikari erekari hitemoni, kotxi iua auiritai hite auikiniri Kristo iokanapirena. Apaka erekari isikai hite, kotxi iua auiritai hite atatsiitiniri himisir-itiko Kristo ikapani. ³⁰ Hite atamatapekari nota misiritiko, hite sauaki nauakasaaki. Hikenakopiretai nimisiritiko auapanika uatxa. Uatxa hite nota atoko, kotxi hite apaka misiritaäka.

2

Kristoka Poiötakaua.

¹ Kristo sikatparaxiniretaua ate, iua nakiti aniniäua. Kristo mikapiritaua ate, amarini axapitiri inoro mikapiritini atoko itxa, kotxi iua tiretaua. Ätipirika iua Erekarikari Matamatakoti amoiarari itxaua. Kristo iteene tiretaua. Iua amonikaua. ² Ininiäkara nota ötäkikai hite hikinika. Hïxinikariko Teoso nireëkitinoka hïkamini, ininiäkara hïxinikakiti ätinoka txauako. Hïtaretakauako Teoso tiretinuata atokokana. Hinireëkiti ätinoka txauako. Ikara atoko hininiäkara, iteene hïkamapoxokonitano nota. ³ Kona kapotxinaniri hïtxapeua. !Hïuikapeua. Hïteka minakati hïtxauako. Hïxinikariko: "Apanakini apiata, nota poiäoka". ⁴ !Hïxinikapiri pite nireëkitinani. Himipaŕikatanako apanakini, ninoa nireëkiti ikaminina ikapani.

⁵ Xesosi Kristo xiniäkikitanerako hïxinikako. Kristo kamakitanerako hïkamako. ⁶ Teoso itxaua Kristo Xesosi, ininiäkara iposotari ipaniätiniri ikinimane inireëkiti ikaminina. ⁷ Iuaritika itakanapari auütetxi nininua. Nitiritxi atoko itxapekaua. Iuaka minakati itxikitakaua, kotxi käkitipeka itxaua uai itixi iponaniäkasaaki. ⁸ Iuaasaaki kiki inakasaakiua, iuaikana iuaka ipoiötakaua, kotxi ikïpitari Teoso säkire ipinini ikapani. Imarotari okiko tikane, kokaneŕi okiko atoko inaäkako aamina ipiriämikitakari nopini. Iuaritika ikïpitari Teoso säkire ipinini ikapani. ⁹ Ikara atoko ininiäkara, Teoso txikitakari iua Apiananiri ininiäkara. Äti iua atoko inakari !auari. Teoso takari iuäka. Äti uäka iua atoko inakari !auari, ¹⁰ kotxi käkiti ikininape kenakotakasaakiri iuäka Xesosi, ikapotoreëkauako Xesosi apisatoö. Ikinimane Teoso tixine auakani, ikinimane itixi auakani, ikinimane ipikani auiniäuaäka pakini kapotoreëkauako Xesosi apisatoö, kotxi iauütena itxaua Xesosi. ¹¹ Ikinipoko käkiti txako: "Xesosi Kristo Apiananiri itxaua," itxanakako. Ikara atoko ininiäkara ikinimane: "Peerekari äiri Teoso," itxanakako.

Iöriki Atoko Hïtxako

¹² Ininiäkara nota tiretakai, hïkïpitariko nisäkire uatxa, mitxi hïtekata nauakasaaki nisäkire hïkïpitini atokokana hïtxako. Uatxa kona hïtekataikano, iuaritika ninirekari apiata hïkïpitiniri nisäkire. Teoso makatxakapekari himaerekani itixine hïsinini ikapani, ininiäkara ikiniötika hïpaŕikauatako Teoso ikapani. Hïpikariko maerekati hïkamini. Erekarinara hïkamapikako. ¹³ Hïposotari ikara atoko hïkamini, kotxi Teosokara moianatai hite. Iua kamanirekaretai hite iua nireëkiti hinirekani ikapani. Iua sikaposotiiretai hite iua nireëkiti hïkamini ikapani.

¹⁴ Hïpaŕikauatasaaki, !hïtsoatape, !hïtxitakapeua. ¹⁵ Ikara atoko hïkaminiäkara, hïkerokiniri !auari, himaerekani !auari, ininiäkara erekarinoka hïkama apanakinimoni. Ininiäkara Teoso anaakori erekarinini hïtxaua. Käkiti kamisirienererini sauaki häuanäta hite. Käkiti maerekani sauaki häuanäta. Iöriki iopinikari iaxiti ikanöka. Iöriki atoko hïtxako. Hïopinikariko maerekati auiniätaä, atäo inakari käkiti imarotini ikapani. ¹⁶ Hite iopinikari ipiä, Teoso säkire apanakinimoni hïsäpiretakasaaki. Teoso säkire txikitakari käkiti ätipirika auäki inini tikane, Teosokata auini ikapani. Hite Teoso anaakori erekarinini hininiäua, nota iuikaiko

hïte, Kristo uaimoni kanapiriäkasaaki, kotxi hïte auikapekari Teoso säkire nisäpiretakiti. Kona maxikatitïkani nïparïkauatapitïpo hïte ïkapani, kotxi hïte auikapekari Teoso säkire nisäpiretakiti.

¹⁷ Atxiïti nota okaäka Teoso säkire nisäpiretini xika. Atxiïti niarëka oxikepokataäka, Teosomoni sikakori atoko inakari, Teoso säkire nisäpiretinii xika, Teoso säkire häuikini xika. Nokaäka atxiïti, iuaritika nïpoxokoniyata. Nïpoxokoniyata hïtekata. ¹⁸ Ininiä erekari hïte apaka poxokoniuatini. Erekarï hïpoxokoniuatini notakata.

Tximótxio Pirena

¹⁹ Xesosi Apiananiri nirekiniäri nota iokanatiniri Tximótxio hïtemoni, ininiä mapaõtipëka inakasaaki niokanatarï iua. Ininiä eereka iua minapiretari hïte pïrena, nota apaka poxokoniuatini ïkapani. ²⁰ Äti Tximótxio atoko inakari uai !auari, kotxi iua iteene tïretai hïte. Iua nirekarï häuini ereka inini. ²¹ Apanakini käkiti xinikari ninoaka nireëkitinoka. !xinikarina Xesosi Kristo nireëkiti. ²² Hïmarotari iua Tximótxio parïkauatape notakata, imi irikata parïkauatakarï atoko itxa. Iparïkauata notakata Teoso iokanapïrena erekari apanakini asäpiretini ïkapani. Ininiäkara hïmarotari Tximótxio atamakaäkapeka, ininiä hïmarotari erekapitakarï iua. ²³ Kiatokopa ninataäka? Uatxa !nimarotari. Nïmarotakasaakiri, niokanatarï Tximótxio hïtemoni. ²⁴ Apiananiri kamaimaroretano nota, Tximótxio tikinïmoni nota apaka apoka ereë hïtemoni.

Eparotxito Pirena

²⁵ Notamoni erekari iuaïkana niokanatiniri hïkanapïrena mïkari, Eparotxito inakori. Hïte iokanatapekari iua notamoni nota itiretini ïkapani. Iua nitari atoko itxa. Imïparïkatapitïpono nota, Teoso iokanapïrena asäpiretakasaaki. Iua, nota pakini sotato atoko atxaua, kotxi ate neenamauata Teoso ïkapani. ²⁶ Iua ipiätai hïte hïkinika. Iua maerekaxiniretinoka itxa, kotxi ikenakopiretari hïte imaropiretiniri iua amianatini. ²⁷ Atäõpitikara iua amianatapitika. Iua ipinaarita, iuaritika Teoso amonïkarï iua. Itxïkitakarï iua iuaïkana ereka inini. Ininiä Teoso amonïkano nota apaka, kotxi Eparotxito ipinaäkamako, apia maerekaxiniretinoka nitxamako. ²⁸ Ininiäkara iteene ninirekarï niokanatiniri iua hïtemoni, hïpoxokoniuatini ïkapani haõkitakasaakiri. Ikara atoko ininiä, nota maerekaxiniretinoka ninini !auaika. ²⁹ Ininiä hïpoxokoniritika hãpakaparïko iua, kotxi iua Eparotxito aïtari itxaua, kotxi Apiananiri nakitiakori atxaua. Hïpaxitarïko käkiti Eparotxito atoko inakari, ³⁰ kotxi Kristo ïkapani iparïkauatini xika ipinaarita. Iuaka monõkorïmoni isa nota imoianatini ïkapani, kotxi iua imarotari hïte nirekapitikamarï himoianatinino, txamarï !hïposota himoianatinino, ininiä iua iteene moianatano.

3

Kiatokopa Käkiti Atäo Ereka Inini?

¹ Nitariakori, apikomoni nisäpiretai. Hïpoxokoniuatoko, kotxi Apiananiri nakitiakori atxaua. !Nisäpaka iuaïkana nisäpiretakitïpeka nisäpiretinii hïte. Iuaïkana nõtäkikai hïte, atäo minakati himauïkakanï ïkapani. ² Erepanïko käkiti maerekati kamakani, atäo minakati säpiretakani, kotxi ninoä säpiretari käkiti: “Teoso takaõtxikare pïtöä mauakanïä, kona Teoso nakiti !pitxaua,” itxana. ³ Ninoä auapitika Teoso takaõtxikare iïtoäna, txamarï kona Teoso nakitiakori !itxauana. Atera Teoso nakitiakori, kotxi atemoni aua atäo inakari Teoso takaõtxikare ate äkixinireë, kotxi Erekarï Matamatakoti oerekaua amisäkiretiniri Teoso. Kristo Xesosinokara ate iuika. Aïmarotari atëka kamakiti !itxa. Teoso kamakitinokara apakata.

⁴ Hïuäkatarï atxiïti hïte kamakiti ereka inini Teoso apakapiniï ïkapani? Konapitini. Nota kamakiti apiaerekata, iuaritika nikamakiti !txïkitakano Teoso apakapiniï ïkapani. Hïkenakotarïko erekari nota kamakiti: ⁵ Teoso takaõtxikare niïtoä takaäka oiito õti nauakasaaki. Nirini, ninoronï pakini Xoteo itxauana. Natokiri kitxakapirïka Pëxamï inakori. Kitxakapirïka natokiriakorini, nakiroakoroni pakini ikinika Xoteoakori itxauana, ininiä atäo Xoteo nitxaua. Nota kïpitari aäüteakori kitxakapirïkarini paniätakiti, kotxi nota pariseo nitxaua, ininiä Teoso säkire iõkatsopatarïko oerekakarï nitxaua. ⁶ Nota iteene nirekarï Teoso nireëkiti nikamini, ininiä nimisiritari käkiti Xesosi säkire auïäkani, kotxi niuäkatarï Teoso nirekarï ikara nikamini. Aätokiriakorini paniätakiti ikinika nikïpita. !Nikerokari.

⁷ Mitxi niuäkatarï ikara atoko nininiä erekapitakarï, ininiä, “Teoso apakapapitikanö nota,” nitxa. Uatxa nimarotari Kristo, ininiä nimarotari mitxipe minakati nininiua nota. ⁸ Uatxa nimarotari niuïte Kristo Xesosi. Ikara apiaerekata. Xesosi nimarotini apisapanika, nikamakiti litxa xatiki. Nitakanapapekarï mitxi nikamakiti. !Itxaika. Mitxi nikamakiti itiki atoko, kotxi !nïnirekaikari. Kristo nakiti uatxa nitxaua. ⁹ Nitakanapapekarï

mitxi nikamakiti Mistokata ātipirika nauini ikapani. Nota kīpitari Moisesini paniātakiti. Ikara atoko inakarini kona ereka txīkitakano nota. Teosonokara kamaerekatano nota, kotxi nauikari Kristo sākire. ¹⁰ Ninirekari Kristo iteene nimarotini. Ninirekari nimarotini Teoso posotiire, kotxi iposotiireē ōkitikari Kristo, uaiikana auāki inini ikapani. Kristo atatsiirauatape, ininiā nota apaka nirekari natatsiirauatini atāo iomanari nininiua ikapani. Ninirekari nota nireēkiti ipinini, Kristo aamina ipiriāmitakari nopini ipinini atoko. Ninirekari Xesosi nireēkitinoka nikamini, ininiā iua atoko nitxaua. ¹¹ Ininiā itixi xipokini ōti Teoso ōkitikanoko, uaiikana auāki ninini tīkane.

Mitekakari Atoko Nitxa

¹² Ikara ikinika !nimarotapanika. Nimaroāpotapanikariko. Teoso kamapanikari iparīka nota ākixinireē. !Ixipokapanikari, ininiā !niotokakari niparīka Teoso ikapani. Niparīkauatapitipo. Mitekakari mitekini atoko, !niotoka. Mitekakari nirekari mitekaxi mapotōkire apokini. Iua atokokana nota nirekari niparīka mapotōkire napokini, kotxi Kristo Xesosi mereēno nota ikara atoko nikamini ikapani. ¹³ Nitariakori, niparīka mapotōkire !napokapanika. Ia nikamako: !Nixinikaikari mitxi nikamakiti. Mitekakari masaporikakati atoko nitxa. Nitaparitika nisa apikomoni, niparīka mapotōkire napokini ikapani. ¹⁴ Mitekakari iteene nirekari mitekaxi mapotōkire apokini imitekini īki apakapini ikapani, ininiā imitekapitipo. !Iotoka. Iua atokokana nota parīkauatapitipo Teoso ikapani, niparīka mapotōkire napokini ikapani, niparīka īki Teoso sikakiti napakapini ikapani, kotxi Teoso pīkapiretano nota Kristo Xesosiā itixine nisini ikapani, niparīka īki napakapini ikapani.

¹⁵ Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hīte atāo inakari. ¹⁶ Mitekaxi kamakari paniātakiti iaōka mitekakari kama imitekasaaki. Iua atokokana makamariko Teoso paniātakiti. Uatxaika akamakiti atokokana makama.

¹⁷ Nitariakori, hīkamariko nota kamakiti atoko inakari, kotxi ate oerekapekai hīte ikara atoko inakari hīkamini. Hīkīpitariko nota kamakiti atoko inakari kamakani sākire. ¹⁸ Kaiāopokori kākiti !auikari Kristo ipinini amaerekani imakaxakini ikapani. Kristo omanatakani itxauana nino. Itokatapeka ikara nisāpiretai hīte, ininiā uaiikana uatxa ikara nisāpiretai. Iteene nimatinaniuata nino xika. ¹⁹ Itixi mapotōkire ōtisaaki nino iokanataāka maerekani misiritikoāta. Iitona iteosenona atoko itxana, kotxi iitona nireēkitinoka ikamana. Ikamakitiina !erekari, iuaritika iuikarina ikamakitiina. !Ipētuaatana. Nino xinikapikari ikorapokoriti. !Ixinikarina Teoso. ²⁰ Atepekana, Teoso tixine auakani atxapekaua. Alātapani apoxokoniritika kākiti maerekani makaxakakari uaxitukiri uaimoni apokini. Iua Xesosi Kristo Apiananiri itxaua. ²¹ Iuasaakiko inoākari aito mataparati. Itxikitakari aito iua ito erekari atoko inini. Iposotari, kotxi kaposotiireri itxaua iua. Ikinimane kamapitkariko ipaniātakiti, kotxi kataparari iua Xesosi.

4

Ōtākipirenatxi

¹ Nitariakori, nota iteene tiretai hīte. Nipiātai hīte. Hīkamapoxokonitano nota. Niuikai hīte, kotxi niparīka īki atoko hītxa. Nitiretakini, hīxinikariko ikara nota ōtākikinii uatxa. Nota ōtākikinii hīkīpitiniā, !hītkanapani Apiananiri.

² Nota ōtākikai hīte Epōtixa inakoro, Sītxiki inakoro pakini. Hīkīpitariko Apiananiri sākire. Hīotokakariko hītxitakakinua. ³ Pitepekana nimoianari erekari, nota nirekai pite ōtākikinina naia sito ipi, kotxi nino parīkauatapeka notakata Teoso iokanapirena erekari asāpiretakasaaki. Nino parīkauata notakata, Kremēxi inakori pakinikata, apanakini nimoianariakorikata apaka. Nino uāka Teoso aātsopateē iōkatapeēkaika, Teosokata auapiniika ininina tīkane.

⁴ Hienenikapikako, kotxi Apiananiri nakiti hītxaua. Iuaiikana nitxai. Hienenikako.

⁵ Erekari hīkamako apanakinimoni. !Hītxitapena. Erekari apanakini imarotini hīte ereka hinini. Apiananiri kaiamapeka ikanapiriini uaimoni. ⁶ Na xatiki maerekaxiniretika !hītxape. Maerekaxinireti hinakasaaki, himisākiretariko Teoso. Hamanaāri hinireēkiti. Himisākiretakasaakiri Teoso, hītxariko: “Erekapitikari notamoni pikamakiti,” hītxariko. ⁷ Ikara atoko aniniā, Teoso kamaerekaxiniretaua. Kiātokoā ininiāpa Teoso kamaerekaxiniretaua? !Kimarotikori, iuaritika peerekari. Hāxixinire erekaxinirepeka ininiā, maerekati !īroā hāxixinireē. !Hinirekaikari maerekati hīxinikini. !Hinirekaikari maerekati, kotxi Kristo Xesosi nakiti hītxapekaua.

⁸ Nitariakori, nisāpiretakiti xipokini apisa, nisāpiretapanikaiko hīte. Hīxinikariko atāo inakari sākiretxiti. Hīxinikariko atāo inakari hīsāpiretini. Hīxinikariko atāo inakari hīkamini. Hīxinikariko erekarinoka. Hīxinikariko tiraōkitxi. Hīxinikariko potxitakori. Ikara atoko

inakarínoka h̄xinikako, kotxi erekapit̄ikari ikara. Peerekari ikara. ⁹ H̄ikamap̄ikariko no-erekak̄iti iaōka. H̄is̄āpiretanako apanak̄ini h̄itemoni nis̄āpiretak̄iti. H̄ikamariko nota kamak̄iti h̄itiākiti atokokana. Ininiā Teoso k̄ak̄iti kamaerekax̄iniretakari kaikota h̄itekata.

Paoro Potxitari Ninoa Sikakiti

¹⁰ Apiananiri nak̄iti nit̄xaua, ininiā iteene n̄ipoxokoniua. Iuākana h̄ite oerekari h̄it̄iretinino, tx̄ineiro h̄is̄ikak̄ito h̄ōkanatinano, ininiā n̄ipoxokoniua. Ātipirika h̄xinikano, kotxi iteene h̄it̄iretano. Tx̄amari mit̄xi ! h̄īposotari h̄is̄ikak̄iti h̄ōkanatini notamoni. ¹¹ ! Namanaāi iuākana tx̄ineiro h̄ōkanatini notamoni. Ikinipoko ninireēkiti auakasaak̄i, n̄ipoxokoniua. Ikinipoko ninireēkiti mauakanisaak̄i, iuaritika n̄ipoxokoniua. ¹² Nota napapekari nimamākani, nimanipokoreni, nimatx̄ineiroteni pak̄ini. Apaka n̄imarotari ātikataā ninireēkiti ikinipoko auinano. Teoso oerekapekano ik̄iniōtika n̄ipoxokoniuatini. Nienenīka n̄ipokori auakasaak̄i. Nienenīka ninatx̄itakasaak̄i apaka. Nienenīka ik̄ini sereti auinakasaak̄ino. Nienenīka minakati mauinakanisaak̄ino. ¹³ Ikinipoko n̄iposota nikamini, kotxi Kristo sikano iposotiire.

¹⁴ Erekapit̄ikai h̄ite, kotxi nimatx̄ineirotenisaak̄i, h̄ōkanatari tx̄ineiro notamoni. ¹⁵ Teoso iokanapirena erekari merepit̄ipanika h̄ikenakotakasaak̄i, ereē Masetonia tixini nosipikasaak̄i, h̄ite Piriposi auakaninokara iokanataro tx̄ineiro napakapini ĩkapani. Apanak̄ini Xesosi s̄ak̄ire auīākani ātiātaā auakani, ! iokanatinano nota. Himarotapekari ikara. ¹⁶ Tesarōnika sitatx̄iti nauakasaak̄i, ninirekak̄iti auakasaak̄i, itokata tx̄ineiro h̄ōkanatinano. ¹⁷ ! Niātaparo tx̄ineiro h̄is̄ikinino. Niātapari Teoso sik̄inini erekari, kotxi h̄ite t̄iretpekanota. ¹⁸ Napakapapekari ikinipoko h̄ōkanatak̄iti. Kaiāopokori h̄ōkanatak̄iti. Eparotx̄ito inakori mininano h̄is̄ikak̄iti, ininiā ik̄inika ninireēkiti uatxa auinano nota. Teosomoni sikak̄ori kamariri atoko itxa h̄ite sikak̄iti notamoni. Teoso potxitari h̄is̄ikak̄iti notamoni. ¹⁹ NiTeosone s̄ikaiko h̄ite hinireēkiti ik̄ini sereti, kotxi ikinipoko aua iuamoni. Isikaua, kotxi Kristo Xesosi nak̄itiakori atx̄aua. ²⁰ Ātipirika matx̄ari Teoso: “Peerekaī aīri, aTeosone. Ameē.”

Takanapap̄irenatxi

²¹ H̄is̄āpiretanako ikinimane ereē auakani Kristo Xesosi nak̄itiakori, nix̄inikamanap̄itinina ninoa. Aītariak̄ori uai notakata auakani xinikamanap̄itai h̄ite apaka. ²² Ikinimane uai auakani Teoso nak̄itiakori iokanapireta h̄itemoni ix̄inikiniina. Homanoakori auīte aapoko auakani, Teoso nak̄itiakori, iokanapireta h̄itemoni iteene ix̄inikiniina.

²³ Xesosi Kristo Apiananiri sikari ikinipoko erekari h̄itemoni. Ameē.

KOROSO Paoro Iokanatsopatakiti Koroso Auakanimoni

¹ Nota Paoro. Niokanatsopata hitemoni. Teoso mereeno nota, kotxi inirekari nota Xesosi Kristo iokanatakiti nininiua. Aitari Tximótxio apaka iokanapireta hitemoni. ² Ininiã aiokanataria ia iökatsopari Teoso nakitiakorimoni, ikinika Teoso paniätakiti kamakanimoni Koroso sitatxiti auakanimoni. Aitariakori hitxaua. Añri Teoso, Apiananñri Xesosi Kristo pakini sikari ikinipoko erekari hitemoni. Ninoa kamaerekaxiniretai hite.

Teoso Misäkiretiko Koroso Auakani İkapani

³ “Erekapitikai,” atxari Teoso, aũũte Xesosi Kristo iri, iua amisäkiretakasaaki hite İkapani. Ätipirika amisäkiretari Teoso hite İkapani. ⁴ Ikara atoko atxari Teoso, kotxi ate kenakopiretari hite auikinñri Kristo Xesosi säkire. Apaka akenakopiretari hite tñretinñri ikinika käkiti Teoso nakitiakori. ⁵ Teoso iokanapirena erekari atão säkiretixiti itxaua. Ikara hñkenakotakasaaki, hñkenakotari Teoso sikaenetakiti ipotetakiti itixinee hite İkapani, ininiã hiätapari häpakapinñri Teoso sikaenetakiti. Himarotari häpakapinñri, ininiã Teoso säkire häuikinñri aua, hñtiraökiuatini pakini aua. ⁶ Teoso iokanapirena erekari hñkenakotakiti iaripiretapeka ikini itixitimoni. İkiniötika apikomoni käkiti kenakotari. Iuasaaki käkiti auikaöpotari Teoso iokanapirena. İkiniötika käkiti apakapari erekari Teoso sikakiti. Iua atokokana hite kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atão sikinñri ikinipoko erekari käkitimoni.

⁷ Amoiarari, atiretakiti, Epäpara inakori, iuara oereaki Teoso sikinñri ikinipoko erekari käkitimoni. Iua Kristo nitiri itxaua. Ätipirika iparñkauata Kristo İkapani, ininiã ätipirika iparñkauata hite İkapani. ⁸ Iua säpiretaua ate hñtiraöki, Erekarari Matamatakoti säkiti hitemoni.

⁹ Hite pñrena akenakopiretakasaaki, ätipirika amisäkiretari Teoso hite İkapani. Ate nirekari hite iteene imarotinñri Teoso nireekiti hñkamini İkapani. Anirekari kñkiteni hininiãua. Anirekari himarotinñri Teoso imarore Erekarari Matamatakoti säkiti.

¹⁰ Ininiã ate misäkiretari Teoso hite atão hñkamini ikiniötika, kotxi Apiananñri anaakori hitxaua. Anirekari hñkamakiti kamapoxokonitini Teoso. Ininiã hñkamakiti ikiniötika erakarinnoka, amätiñri erekari atoko. Ininiã ikiniötika himaröpotari apikomoni Teoso nireekiti. ¹¹ Anirekari Teoso sikatapaxiniretinñri hite iposotiiree, kotxi kaposotiñri iua. Ininiã iuasaaki hiätapari himisiritiko xipokini. Iuasaaki !hinaiataua. Iuasaaki hñposotari himñteenekinñri himisiritiko hñpoxokoniritika. ¹² Iuasaaki hitxariko añri: “Erekapitikai,” kotxi iua kamaerekataua. Ininiã aäpakapari iua potetakiti inakitiakori İkapani Teoso tixinee, ipiã mauakaniãtaã. ¹³ Iua sikakaua ipiã posotiiree aũuakasaaki, maerekati posotiiree aũuakasaaki. Iua anikaua imi itiretakiti auiniãtaã. Iuaãtaã auakani aũũte itxaua imi. ¹⁴ Imi Kristo İkitxitari Teoso amaerekani İki ipñkasaaki, ininiã Teoso makatxakari amaerekani. ! İxinikaikari amaerekani.

Kristo Apiananñri

¹⁵ Käkiti kona posotari atamatini Teoso. Teosotxikana itxaua Kristo, iuaritika aposotari Kristo aätamatini. İkinipoko kamiko apisa, Kristo aua Teosokata. ¹⁶ Iua kamari ikinipoko. İkamari iaxiti auakani, uai itixi auakani apaka. İkamari ikinipoko käkiti atamatakiti, käkiti matamatakini apaka. İkamari ikinika kaposotiñrini, aũtñtxiakori matamatakoni, ikinika Teoso nitiriakori pakini. İkamari ikinika. İkinika kamaãka iua İkapani. ¹⁷ Kristo aua ikinipoko apisa. Iua mañkari ikinika imaxipokakani İkapani. Ikara atoko ininiã, ikinipoko auapanika. Iua mauakaniã, ikinika iarika. Iua mauakaniã, ikinipoko xipoka.

¹⁸ Käkiti Teoso mereekini Kristo İto atoko itxauana. Teoso mereekini kii atoko itxa Kristo. Merepitipanika ipñkari ökitikakarua iua. Ininiã ökitikasaakiua, oerekari käkiti Apiananñri ininiua. Äti kaposotiñri iua atokokana inakari !auari. ¹⁹ Teosotxikana iua. İkinika Teosomoni auakari aua iuamoni. Ikara atoko Teoso apokaerekatari. ²⁰ Kristo arëka xiketakasaaki aamina ipñriämatakari nopini, iuasaaki Kristo xipokari Teoso omanäkarauatini käkiti maerekani xika. Kotxi Teoso nirekari Kristo mininñri ikinipoko iuaikana iuamoni, İkorapokriti auakani, iaxiti auakani pakini. Ininiã uatxa Teoso apakapari Kristo säkire auñkani.

Kristo Kamakiti Koroso Auakani İkapani

²¹ Hñtepekana, mitxi !himarotari Teoso. Iuasaaki !häuari Teosokata. Maerekati hñkamakiti xika homanatarari Teoso häkixiniree. Teoso mokaiakariakori hitxaua iuasaaki. Uatxa Teoso apakapai hñte, ²² kotxi Kristo İto ipina hñte İkapani. Ininiã iua anikai hñte Teosomoni iua makatxakakini hininiua İkapani. Teosomoni himaerekani ! auaika, kotxi Kristo

makatxakapekari imakinika himaerekani. Teoso apisatoõ hãpokasaaki, kona äti posotari apoõiniii himaerekani xika. ²³ Ikara atoko aua hõtemoni, iteene hãuikiniãri Kristo sãkire ikiniõtika, Kristo sãkirenoka hãuikiniã, isãkire himatakanapakaniã. Ikara atoko hãkaminiã, apanakini kona txõkitakai hõtakanapiniri hiãtapiniri ikinika Teoso kamakiti hõte ikapani. Teoso iokanapirena erekari sãpiretaua ikinika Teoso kamakiti inakitiakorini ikapani. Hõte kenakotapekari Teoso iokanapirena erekari. Isãpiretaãkapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisãpiretini ikapani.

Paoro Parõkauata Kãkiti Teoso Mereẽkini Ìkapani

²⁴ Uatxa nipoxokoniuaata hõte ikapani natatsiirauatini, kotxi natatsiirauatini xika hõte aukari Kristo sãkire. Natatsiirauata niõtoã Teoso mereẽkini ikapani. Kristo ìto atoko itxauana kãkiti Teoso mereẽkini. Natatsiirauatipitika, iuaritika Kristo atatsiirauatini apiata. ²⁵ Teoso iokanatano nota imereẽkini nitiri nininiua. Ipaniãtano nisãpiretini ikinika isãkire hõtemoni. ²⁶ Ipaniãtano nisãpiretini mitxi kãkiti mimarotakiniti. Okananipeka Teoso !oerekari ikara kãkiti mimarotakiniti. Kristo ipinini apisa ikini itixiti auakani !imarotari ikara. Mitxi kãkiti mimarotakiniti uatxa oerekaãka Teoso nakitiakorimoni. ²⁷ Uatxa Teoso nirekari inakitiakorini Xoteo minakanuia imarotini mitxi kãkiti mimarotakiniti, kotxi peerekari. Natokopa itxa ikara kãkiti mimarotakiniti? Nisãpiretai. Kristo posotari kãkiti ãkixinireẽ auini. Ia mitxi kãkiti mimarotakiniti. Kristo aua hãkixinireẽ. Ininiã himarotari hõsini Teoso tixinemoni. ²⁸ Ininiã asãpiretari kãkiti Kristo pirena. Aõãkikari ikinimane Teoso imaroreẽ. Aõerekari ikinimane Teoso imaroreẽ, kotxi Teoso sikaimarorettaua. Iua aua ikinika imaroretxi. Ikara atoko aanikana Kristo nireẽkitinoka kamakani Teosomoni. ²⁹ Ikara nikamini ikapani, niparõkauatapitipo. Pasãpaniri. Kristo posotiireẽ niparõkauata, kotxi kaposotiireri iua. Iua iteene sikataparatarari nãkixinire, ininiã niposotari iteene niparõkauatini iua ikapani.

2

Paoro Nirekakiti

¹ Ninirekari himarotini iteene nimisiritiko hõte ikapani. Apaka iteene nimisiritãka Araotxisiãa sitatxiti auakani ikapani. Nimisiritãka apanakini nimataõkitakini ikapani apaka. ² Ninirekari ikinimane ninõa kataparaxinire ininõa. Apaka ninirekana itiretakini-uana, ininiã ätika ninõa nireẽkiti. Ikara atoko ininiãna, iteene imarotarina ikinika Teoso sãkire. Iuasaaki imarotarina Kristo, mitxi kãkiti mimarotakiniti, mitxi aõri Teoso moerekakiniti. ³ Paimatireri Kristo. Iua mimarotakiniti !auari. Ikinipoko imarota. ⁴ Ikara atoko nisãpiretai hõte, apanakini mamisirienetakanii tãkane kãkiti imaroreẽ. ⁵ Niõto !auari hõtekata, iuaritika nixinikapikai hõte nãkixinireẽ. Nipoxokoniuaata, kotxi nimarotari hõkamakiti atão inini. Apaka nipoxokoniuaata, kotxi hõte iteene aukari Kristo sãkire.

Atão Kristo Sãkire Auiãkani Kamakiti

⁶ Hãpakapapekari Kristo Xesosi hãauõte ininiua ikapani, ininiã hõkamariko inirekakiti ikiniõtika. ⁷ Iua taparanoka hõkosekako. Aãkotsa kosekiniri ãparaã atoko hõtxako. Ikara atoko hininiã, kataparari hõxinire. Ininiã atão hãuikari Kristo sãkire mitxi aõerekakiti atoko, ininiã kataparaiko. Ininiã iteene hõtxariko Teoso: "Ikinika pikamakiti ate ikapani peerekari," hõtxako.

⁸ Erepaniko. Kona hãuiritapiri kãkiti makatxakinii Teoso kimaporeẽ. !Hãuikapiri ninõa sãkire, kotxi ätião ninõa sãkire. Na atão isãkirena. Kãkiti imarorenoka imarotana. Kamisirienererini ninõa. Maxikatõka isãkirauatana. Kitxakapirõka auakani sãpiretakiti ninõa sãkire. Ìkorapokoriti auakani nireẽkiti maerekati isãpiretana kãkiti. Kona Kristo sãkireni.

Apiananiri Itxaua Kristo

⁹ Kristo aua iõto, iuaritika Teosotxikana iua. Kristo aua ikinipoko Teoso posotiire, ikinipoko itiraõki, ikinipoko imarore, txaãpokata, kotxi Teoso itxaua. ¹⁰ Kristo aua hãkixinireẽ, ininiã ikinipoko aua hõtemoni. !Auari apikomoni hinirekakiti, kotxi auõtetxiakorini iaxiti auakani auõte itxaua. Apiananiri itxaua. Kaposotiireri iua atoko inakari !auari.

Kristo Kamakiti Hõte Ìkapani

¹¹ Hãpakapapekari Teoso takaõtxikare kãkiti mataãkiniti. Hãkixinireẽ Teoso takari itakaõtxikare. Kristo makatxakasaakiri himaerekani hiõto nireẽkiti, iuasaaki hãpakapari Teoso takaõtxikare. ¹² Hiãpatxatõkosaaki, Kristokata ikatakoni atoko hõtxaua. Eereka hõkitikaãka Kristo õkitikiko atoko. Hõte õkitikaãkako, kotxi hõte aukari Teoso posotiire Kristo õkitikini ipõkasaaki.

¹³ Mitxi ipĩkani atoko hĩtxaua himaerekani xika. Xoteo minakanuia hĩte, ininiã mitxi kona himarotari Teoso nireẽkiti. Hĩponaniãkasaaki, maerekati auape hĩtemoni. Iuaritika Teoso txĩkitakai auãki hinini Kristokata. Teoso makatxakari ikinipoko himaerekani. !Ixinikaikari himaerekani. ¹⁴ Iua oakari iõkatsopatakori amaerekani sãpiretiko. Ikara iõkatsopatakori sãpiretari amisiritiko amaerekani xika. Amitekini !auari. Amisiritiko auapitika. Iuaritika iua oakari ikara iõkatsopatakori. Imakatxakari ikara iõkatsopatakori. !Piriãmitakari nopini Kristo tokakitikosaaki, ikara iõkatsopatakori tokakitaãka apaka iuaã, ininiã hitxaika. Iuasaaki amisiritiko !auaika. ¹⁵ Kristo !piriãmitakari nopini ipĩkasaaki, iuasaaki imakatxakari ikinika Satanasi posotiire, initiriakori posotiire pakini. Iua oerekari ikinimane !kaposotiirena ninoã. Iua õkitikasaakia, oerekari ikinimane iuananira Apiananiri ininiua. Iuasaaki Kristo oerekari ikinimane ikãiatini.

¹⁶ Ininiã kona hãuiritapiri apanakini txitinii hinikakiti xika, hiãtakiti xika pakini. Kona hãuiritapiri apanakini txitinii kiiniri Teoso ikapani hĩkamini xika, kiiniri kasiri itopaĩtakasaaki hĩkamini xika, kiiniri tomatiko õti hĩkamakiti xika pakini. ¹⁷ Kiiniri Teoso ikapani !korasaaki sanõkatxi atoko itxa. Oerekaua atão inakari, txamari na iteene oerekaua. Iteene oerekaãka atemoni, Kristo aõkitakasaaki. ¹⁸ Erepaniko kãkiti ia atoko inakari: Ninoã iuikari im-iuikakanianua. Ninoã teosonetari Teoso nitiriakori matamatakoni. Ninoã sãpiretari kãkiti matamatakoni aõkitinina itaponeãna. Ixinikarina ninoã nireẽkitinoka. Ixinikarina kimarorerini ininiuana, ininiã iuikauana. Erepaniko kãkiti ikara atoko inakani. Hãuikiinãri ninoã sãkire, !auaika hĩparĩka !ki. ¹⁹ Kãkiti ikara atoko inakani !nirekari Kristo iauĩtena ininiua. Kotxi Kristo akii atoko itxa. Ate iua !to atoko atxaua. Ikara atoko ininiã, isikataparataua. Aãpotiitaua. Asikataparatakakaua. !tika !totxi atoko atxaua. Ikara atoko aniniã, aimaroãpotari isãkire, kãkiti !to aneini atoko.

Apinini, Aãuini Pakini Kristokata

²⁰ Mitxi hinireẽkiti itixi auakani nireẽkiti atoko. Hãuikasaakiri Kristo sãkire, mitxi hinireẽkiti !auaika. Ipĩpe. Txamari hĩkamapanikari !korapokoriti auakani kamakiti atoko. Ninoã nireẽkiti iaõka hĩkamapanika. ²¹ Ninoã txari: "Kona pimaĩkapiri ikara. Kona pinikapiri ikara nipokori. Kona piouãtakapiri ikara." Kinirepa hĩkĩptari ikara isãkirena? ²² Ninoã paniãtakiti xipokapitikako. Ikara atoko !itxa, kotxi ikara atoko inakari paniãtakori kãkitinoka paniãtakiti. Kãkiti oerekakiti sãkiretxitinoka ikara. ²³ Kãkiti uãkatari ninoã paniãtakiti kimarorerini paniãtakiti atoko. Ninoã xinikakiti iaõka inirekarina Teoso. "!Erekano," itxana, txamari !kixinireãna itxana "Peerekano." Ninoã misiritaua !toãna. Ikamarina ikinika !tona nireẽkiti.

3

Atão Hĩkamakiti Erekarĩ Hãuini !kapani

¹ Hĩte õkitikaãka Kristokata hãuini amaneri inini ikapani, ininiã hinirekariko hĩkaminiiri Teoso tixine auakani kamakiti iaõka. Iuaã Kristo topãkanãta Teoso kikomoni. Api-ananiri itxaua Teoso kikomoni topãkakari. ² Hĩxinikariko Teoso tixine. Kona hĩxinikapiri !korapokoriti. ³ Ipĩkani atokopeka hĩtxa, kotxi hãuini kitxakari !auaika, ininiã kona hĩxinikaikari !korapokoriti auakari. Teoso sãkire mauĩãkani !imarotari hãuini amaneri Kristokata Teoso auiniãtaã. ⁴ Kristo txĩkitakari aãuini amaneri inini. Iua uai apokasaaki iuaĩkana atamataãka. Iuasaaki hĩte apaka atamataãka iuakata. Iuasaaki hĩtemoni auari Kristo iotximere atokokana. ⁵ Hĩxipokariko hĩto nireẽkiti, kotxi !korapokoriti auakari nirekari !totxi nireẽkitinoka. Hõkariko. Kĩpa aua aãkixinireẽ aõkini ikapani? Auari anokaretxi. Auari aĩto nireẽkitinoka kamiko nirekiko. Auari !ti !to nirekiko. Apaka auari !ti nakiti nirekiko aãkixinireẽ. Iteene anirekiinãri !ti nakiti, ateosone atoko itxaua anireẽkiti. ⁶ Ikara maerekati xika, Teoso omanãkare apokapitikako Teoso paniãtakiti makĩpitakanimoni. ⁷ Mitxi hĩte kamari maerekati ikara atoko inakari. Iuasaaki hĩtotapekari ikara atoko inakari hĩkamini. ⁸ Uatxa ia atoko inakari hĩtakanapako: omanãkaretxi, !ti iteene txitiko, Teoso misãkirepiretiko, maerekati sãkiretxiti pakini. ⁹ Kona himisirenetakapeua, kotxi hĩtakanapapekari maerekati mitxi hĩkamakiti. Himãka kitxakari hõkini atoko, hĩtakanapapekari ikara maerekati.

¹⁰ Uatxa hĩkamakiti amaneri. Himãka amaneri hĩeretakini atoko, hĩkamakiti uatxa amaneri. Teoso txĩkitakari hĩkamakiti amaneri inini, ininiã himarotari atão inakari imarotari. Ininiã Teoso kamakiti atokokana hĩkama, kotxi hĩte kamakari itxaua. ¹¹ Uatxa kãkiti apiari !auari. Krekoakori, Xoteoakori, Teoso takaõtxikare auaiãtotakini, Teoso takaõtxikare mauaiãtotakini, mimarorenĩ, kãkiti !topa auakani, nitiritxi amotakoni, kãkiti miamotakoni pakini !auari kãkiti apiari. !ti kãkiti !ti kãkixitxikana, kotxi Kristonoka Apiananiri. Iua aua ikinimane isãkire auĩãkani !kixinireẽ.

¹² Ininiãkara hiamonikariko äti. Hikamariko erekari ätimoni. !Hüikauepa. Kaneenama ! hitxape. !Katimari homanäkarauatini. Ikara atoko häuako, kotxi Teoso mereëkini, iua nakiti-akori, itiretakini hitxaua. ¹³ Himiteenekakauako. Himaxinikaretariko apanakini kamakiti, hite mapokaerekatakiniti. Kristo maxinikaretapekari maerekati hite kamakiti, ininiã iua atokotxikana himaxinikaretariko maerekati apanakini kamakiti hitemoni. ¹⁴ Ikara erekari hikamako. Erekar apiari hikamini, hitiraökiuatini. Hitiraökiuatako. Hitiraökiuatakasaaiki, ininiã iuaaaki ikinika hikamakiti atão.

¹⁵ Kristo kamaerekaxiniretai, ininiã erekari häkixinire. Häuiritariko ikara erekari kaiko-tini. !Hikamapiri ikara erekari makatzakiko ikapani. Hikinika ätika itotxi atoko hitxaua. Teoso akiritai hite häkixinire ereka inini ikapani. Hitxariko Teoso ätipirika: "Erekapitikari pikamakiti nota ikapani," hitxako. ¹⁶ Häuiritariko ikinika Kristo säkire kaikotini häkixinireë, ininiã iuaaaki himarore iteene aua. Höerekakakaua. Hötäkikakakaua. Hixikaretari xikari Teoso ikapani. Hixikaretariko xikari Teoso säkire iökatsopatakori xikariti. Hixikaretariko xikari kitxakari, amaneri pakini Teoso ikapani. Hixikarauatakasaaiki, häkixinireë hitxariko Teoso: "Erekapitikari pikamakiti nota ikapani." ¹⁷ Ikinika hikamakiti hikamako Apiananiri Xesosi ikapani. Häsäkirauatakasaaiki, häsäkirauata Apiananiri Xesosi ikapani. Iuaaaki hitxariko äiri Teoso: "Erekapitikari pikamakiti nota ikapani," hitxariko.

Käkiti Aapoko Auakani Ötäkikiko

¹⁸ Hite itanorotxi, hikipitariko hitaniri säkire, kotxi Apiananiri nakiti hitxaua, ininiã ikara atão hikamini.

¹⁹ Hite itaniritxi, hitiretaroko hitanoro. Kona hitxitapero oa. Kona homanatapero.

²⁰ Hite amarini, hikipitariko hiri, hinoro pakini säkire. Ikinika ninoo paniätakiti hikamako, kotxi Teoso apokaerekatari ikara atoko inakari.

²¹ Hite iritxi, kona hikamanaiamanetapena hamariteakori, kotxi eereka maerekaxinireti aua ninooamoni, ininiã inirekaikarina hite paniätakiti ikaminina.

²² Hite nitiritxi, hipatrãote ikorapokoriti aua, ininiã hikamariko ikinika ninoo paniätakiti. Apanakini iteene parikauata ipatrãote apisatoö, iua apokaerekatiniri ikapani. Iua mauakanisaaki apaka iteene hiparikauatako. Ikinini hixinireritika hikamariko hiparika. Ikara atoko ininiã, atão hipaxitari Teoso. ²³ Ikinika hikamakiti hikamako hitaparaxinireritika. Hiparikauatakasaaiki, parikotxi Apiananiri ikapani hikamini atokotxikana, hiparikauata kãkiti ikapani. ²⁴ Hiparikauatako ikara atoko, kotxi himarotari Apiananiri sikiini ipotetakiti iax-itikiri hiparika iki. Itixine häpokasaaiki, häpakapariko. Apiananiri Kristo nitiriakori hitxaua. ²⁵ Maerekati kamakari häpakapariko imisiritiko. Teoso misiritari äti maerekati kamakari, äti maerekati kamakari imisiritini atokotxikana.

4

¹ Hite patrão, hikamariko atão inakari hinitiriakori ikapani. Kona himisirienetapena ninoo. Kotxi hite apaka aua hipatrãote Teoso tixineë.

Apikomoni Paoro Ötakikakiti

² Kona hitakanapapiri Teoso himisäkiretini. Araökire hitxako maerekati mapokakani ikapani. Ätipirika hitxariko Teoso: "Erekapitikari ikinipoko pikamakiti nota ikapani," hitxariko iua.

³ Apaka himisäkiretariko Teoso ate ikapani. Hamanaäriko Teoso, iua oerekinuia isäkire apanakinimoni asäpiretini ikapani, kotxi anirekari asäpiretiniri kãkiti Kristo pirena, mitxi kãkiti mimarotakiniti. Ikara nisäpiretini xika, kateia äki naua.

⁴ Himisäkiretariko Teoso, Kristo pirena atão nisäpiretini ikapani, kãkiti atão imarotini ikapani.

⁵ Kimarorerini hitxauako Teoso säkire mauäkani sauaki häuakasaaki. Aäuiini poião, ininiã ikiniötika hinitiri kãkiti Teoso säkire hisäpiretini ikapani.

⁶ Teoso sikapekai ikinipoko erekari, ininiã hisäkirauatakasaaiki, hõerekari kãkiti hisäkireë hitiretinina. Iökira mauakaniã nipokoriã, !kaposeri. Iua atokotxikana erekari mauakaniã hisäkireë, kãkiti !inirekari ikenakotiniri hisäkire. Erekar hisäkire ininiã, himarotari häpakapapiretiniri kãkiti.

Paoro Iokanapiretini Pirena

⁷ Txikiko inakori säpiretaiko ikinika nota pirena. Äitari, atiretakiti itxaua. Iua parikauatapitipo Apiananiri ikapani. Aplananiri nitiri itxaua atekata. ⁸ Niokanatar iua hitemoni, hite imaropiretini ikapani, hite isikataparaxiniretini ikapani. ⁹ Niokanatar Onesimo inakori apaka iuakata. Koroso sitatxitikiri iua, hite atoko. Äitari atiretakiti itxaua apaka. Ätipirika atão iparikauata Kristo ikapani. Ninoo säpiretaiko hite ikinipoko Kristo säkire auäkani kamakiti uai.

¹⁰ Arisitako inakori, notakata kateia āki auakari, xinikamanapitai hīte. Panapee itaro ākiri Marko, xinikamanapitai hīte apaka. Nisāpiretapekai hīte Marko pirena. Ininiā ereē iua apokasaaki, hīpoxokoniritika hāpakapariko iua. ¹¹ Xosoe Xósite inakori xinikamanapitai hīte apaka. Ninoa ipi āti pakini Xoteoakori notakata parīkauatakani itxauana. Ninoa parīkauata notakata, Teoso auītetxi ininiua pirena asāpiretini ĩkapani. Isikataparaxiniretanona nota.

¹² Epápara inakori apaka xinikamanapitai hīte. Ereēkiri iua. Kristo nitiri itxaua. Ātipirika imisākiretari Teoso hīte ĩkapani, Teoso nireēkitinoka hīkamini ĩkapani, ĩkinika hīkamakiti atāonoka hīkamini ĩkapani. ¹³ Nota imarotari iteene iparīkauatini hīte ĩkapani. Apaka nimarotari iparīkauata kākiti Araotxiséia sitatxiti auakani ĩkapani. Apaka nimarotari iparīkauata Ierapori sitatxiti auakani ĩkapani.

¹⁴ Aītari atiretakiti, amianari imarotakari Arókasi inakori apaka xinikamanapitai hīte. Témasi inakori apaka xinikamanapitai hīte. ¹⁵ Hīsāpiretanako aītariakori Araotxiséia auakani nixinikinina ninoa. Hīsāpiretaroko Nīpa inakoro, Teoso mereēkini oaāpoko apotiitakanuia pakini, nixinikinina ninoa. ¹⁶ Ia niokanatsopatakiti hātatsopatako hīkinika hīkenakotini ĩkapani, eereka hīpaniātariko atatsopatiko Araotxiséia sitatxitiā, Kristo sākire auīākani kenakotiniri ĩkapani. Apaka hīte atatsopatariko Araotxiséia auakani iokanatsopatakiti. ¹⁷ Hītchariko Akipo inakori: “Pikamariko ĩkinipoko parīkatxi Apiananiri paniātakiti pikamini.” ¹⁸ Nota Paoro niōkatsopatari ia niuakoā: Hīxinikariko kateia āki nauini. Teoso sikari ĩkinipoko erekari hītemoni. Amē.

1 TESARÓNİKA Merepanika Paoro İokanatsopatakiti Tesarónika Auakanimoni

¹ Paoro, Sírası, Tximótxio pakini iokanatsopata Teoso mereëkinimoni Tesarónika sitatxtiã. Aİri Teoso nakitiakori hİtxaua. Apiananiri Xesosi Kristo nakitiakori hİtxaua. Aİri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hİte.

Paoro Misäkiretari Teoso Tesarónika Auakani İkapani

² Amisäkiretari Teoso hİte İkapani. Ätipirika atxari Teoso: “Peerekai pite, kotxi Tesarónika auakani auikari pisäkire,” atxari. ³ Aİri Teoso amisäkiretakasaaki, axinikapikari hİte parİka Teoso İkapani. Atão hİparİkauata, kotxi iteene hãuikari iua sãkire. Axinikari hİparİka Teoso İkapani, kotxi iteene hİtretari iua. Axinikari himarotıniri Apiananiri Xesosi Kristo sãkire iaõka hİkamini. Hİpoxokoniritika hİãtapari isãkire iaõka apokini.

⁴ Nitariakori, Teoso tıretapitikai hİte. Iua mereëi hİte iua nakitiakori hininua İkapani. Aimarotari ikara. ⁵ Teoso iokanapirena erekari hİtemoni asãpireta Teoso posotiireë. Ate sãkirenoka !kaposotiireri. Erekari Matamatakoti oerekai asãkire atão inini. Hİte iteene imarotari asãkire atãonoka inini. Hãtamatari aparİka hİte İkapani hİte sauaki aãuakasaaki, ininiã himarotapitikaua ate. ⁶ Ininiã hİte kamari ate kamakiti atokotxikana. Hİkamari Apiananiri kamakiti atokotxikana. Himisiritiko aua, iuaritika hãuikari Xesosi sãkire. Himisiritiko aua, iuaritika Erekari Matamatakoti kamapoxokonitai. ⁷ Ininiãkara Masetónia tixini auakani, Akaia tixini auakani pakini nirekari hİte atoko ininina. ⁸ Inirekarina hİte atoko ininina, kotxi hİte sãpiretari Apiananiri sãkire Masetónia auakanimoni, Akaia auakanimoni pakini. Apaka ikini itixiti iaripireta hİte iteene auikniri Teoso sãkire. Ininiã kona ate sãpiretari kãkiti iteene hãuikiniri Teoso sãkire, kotxi ikinimane imarotape. ⁹ İkinimane sãpiretari hİpoxokoniritika hãpakapiniua ate. Ninoa sãpiretari hİte takanapıniri teoso kamakori. Isãpiretarina hİparİkauatini uatxa Teoso atão inakari İkapani, auãkipika inakari İkapani. ¹⁰ Ninoa sãpiretari, hİte iãtapıniri Teoso äkiri itixine auakari kanapiriini İkorapokoriti. Iua Xesosi. İpikani sauaki Teoso õkitikakiti iua. Iua makatzakapekari amaerekani, ininiã amisiritiko !auaika kãkiti misiritiko õti apokasaaki.

2

*Paoro Parİka Tesarónika Sitatxtiã
(Ätosi 17.1-9)*

¹ Nitariakori, himarotari maxikatİka kona ate sari hİtemoni. ² Himarotari amisiritiko Piriposi sitatxtiã aãuakasaaki, hİtemoni aãpokini apisa. Iuaã auakani asokaua, kateia äki taka itxauana. Iuaritika Teoso sikataparaxiniretaua asãpiretiniri Teoso iokanapirena erekari hİtemoni. İtori kãkiti !nirekari asãkire, iuaritika ate sãpiretari Teoso iokanapirena erekari hİtemoni. ³ Ate oerekakiti !akeroka. Teoso nireëkitinoka anireka kamani. Äti anireëkiti !auari. !Anirekari amisirienetini hİte.

⁴ Teoso auiritaua iua iokanapirena erekari asãpiretiniri kãkiti. Teoso auikari atão asãpiretiniri isãkire kãkitimoni, ininiã asãpiretari isãkire kãkitimoni. Asãkirauata, kona kãkiti akamapoxokonitini İkapanini. Anirekari akamapoxokonitini Teoso, kotxi iua ataerekatari aãkixinire. ⁵ !Asãpiretai eureka hinini, ate nireëkiti hİkamini İkapani. Asãpiretari Teoso sãkire hİtemoni, kona hİte nakiti anirekini İkapanini. İkara himarotape. Teoso apaka imarotari ikara nisãkire atão inini. ⁶ Ate !anirekari kãkiti iuikiniua ate. !Anirekai hİte iuikiniua ate. !Anirekari apanakini iuikiniua ate. Kristo iokanatakiniraua ate hİtemoni, ininiã aposotari apaniãtini ikinipoko anireëkiti hİsikiniua. Iuaritika !anirekari ikara atoko akamini. ⁷ Hİte sauaki aãuakasaaki iteene atiretai hİte. Sito tıretıniri oimi atokokana, ate tıretai hİte. ⁸ İteene atiretai, ininiã anirekari asikini Teoso iokanapirena erekari. Kona iuananini anireka asikini hİte. Axinire, aİto pakini anireka asikini, kotxi ate tıretakini hİtxapekaua. ⁹ Nitariakori, hİxinikari aparİka hİte sauaki. Pasãpaniri. İkanõka, pokamara pakini aparİkauatapitipo, akiena, anireëkiti pakini aãpakapini İkapani, kotxi !anirekari aamanaini hİte aamonitakiti İkapani. !Anirekari hİte parİka apiatini ate İkapani, Teoso iokanapirena erekari asãpiretakasaaki.

¹⁰ Hİte Kristo sãkire auiãkani sauaki aãuakasaaki, hİte itikari aãuini ikiniõtika. Teoso apaka itikari. Himarotari Teoso nireëkitinoka akama iusaaki. Himarotari erekarinoka akama iusaaki. Himarotari !akamari maerekati iusaaki. ¹¹ Hİri atoko atxaua iusaaki, kotxi atãkikai hİte. Amİkapiritai, imi iri mİkapiritini atokokana. Apaniãtai atão inakarinoka

híkamini. ¹² Ikara atoko akaminii, kotxi Teoso anaakori hĩtxaua, ininiã anirekari hĩte kaminiri hĩri kamakiti iaõka. Iua akiritai hĩte hĩauĩte inini ĩkapani. Inirekari hĩtamatiniri iua iotximere itixine hĩaukasaaki. ¹³ Ininiã ãtipirika amisãkiretari Teoso: “Erekapitikai, kotxi Tesarónika auakani auikari pisãkire, ninoamoni asãpiretakiti. Ninoa imarotari kona ate sãkireni asãpiretana. Ninoa imarotari asãpiretana atão pite sãkire,” nitxari Teoso. Teoso sãkire parĩkauaa hĩte Xesosi sãkire auĩãkani ãkixinireẽ isãkire hĩauikini ĩkapani. ¹⁴ Xotẽia tixini auakani, Kristo Xesosi nakitiakori, Teoso sãkire auĩãkani, ninoa kamakiti atoko hĩkamako hĩte nitariakori. Xoteoakori misiritana ninoa. Iua atokotxikana hĩte nirimane misiritapekai hĩte. ¹⁵ Ninoa Xoteoakori okari Apiananiri Xesosi. Ninoa apaka okana ninoaka nirimane, Teoso sãkire sãpiretakani. Ninoatxikana misiritapekuaa ate. Teoso ! apokaerekatari ninoa kamakiti. Ninoa omanatari kãkiti. ¹⁶ Kotxi !auĩtarina Xesosi sãkire asãpiretini Xoteo minakaniua, imaerekanina makatxakiko ĩkapani. Uatxa ninoa maerekani xãpoka. Uatxa Teoso omanãkare apokaepka ninoamoni.

Paoro Ipiãtinina Tesarónika Auakani

¹⁷ ãtiãtaã ate auakasaaki, ãtipirika axinikapikai. Aĩto hĩtekata mauakanisaaki, aãkixinire xinikapikai. Ate ipiãta. Iteene anirekari iuaĩkana aõkitinii. ¹⁸ Anirekapitikamari hĩtemoni akanapiriini. Nota Paoro itokata nirekamari napokini hĩtemoni, txamari Satanasi !auĩtãtaua asini hĩtemoni. ¹⁹ Aãũte Xesosi ãti õti ikanapiriãkasaaki, aãpotiitãtaua iua apisatoõ. Iuasaaki aiãtapakiti apokaepka. Kipa aiãtapakiti? Hĩtera. Iuasaaki iteene apoxokoniuatãko. Kinirepa apoxokoniuatã? Kotxi hĩte aua iuaã. Iuasaaki aãpakapari aparĩka iki. Kinirepa aãpakapari aparĩka iki? Kotxi hĩte auikari Xesosi sãkire ate sãpiretakiti. Ininiã peerekari iuasaaki. ²⁰ Atãõpitikara nisãkire. Ate iuikai hĩte. Hĩte kamapoxokonitãtaua ate.

3

¹ Iuasaaki !amĩteenekari amimaropiretakanii hĩte, ininiã axinikari atenoka kaikota uai Atena sitãtxitiã. ² Ininiã iuasaaki aiokanatarari aĩtari Tximõtxio hĩtemoni. Teoso nitiri itxaua. Imoianataua Kristo iokanapirena erekari asãpiretakasaakiri kãkiti. Aiokanatarari iua hĩtemoni, Xesosi sãkire iteene hĩauikini ĩkapani, isikataparaxiniretinii ĩkapani. ³ Ikara atoko ininiã, kona hĩxinikari Teoso sãkire hĩtakanapini, kãkiti misiritinii xika, kotxi himarotari amisiritiko apokapitikako. Teoso auĩtarari. ⁴ Hĩtekata aãuakasaaki, asãpiretapekai amisiritiko apokini. Uatxa himarotapitikari atão asãkire, kotxi uatxa apopeka asãkire iaõka. ⁵ Ininiã apikomoni !nimĩteenekakarari nimimaropiretakanii hĩte. Ininiã iuasaaki niokanatarari Tximõtxio hĩtemoni, Xesosi sãkire hĩauikini nimarotini ĩkapani. Nipĩkari Satanasi sikanireõtinii hĩte, Xesosi sãkire hĩauikini hĩtakanapini. Nipĩkari maxikatĩka Xesosi sãkire asãpiretinii hĩte, hĩtekata aãuakasaaki.

Tximõtxio Sãpiretakiti Ikanapiriãkasaaki

⁶ Uatxa Tximõtxio kanapiripeka atemoni. Iua minapiretai hĩte. Erekarari isãpiretakiti. Iua txaua ate: “Tesarónika auakani iteene auikari Xesosi sãkire. Ninoa tiraõkiuatapika. Ipotxitarina ixinikiniina hĩte. Ipiãtaina hĩte, ninoa hĩpiãtini atokotxikana,” itxa Tximõtxio atemoni. ⁷ Nitariakori, ate amaxikiko auapitika. Ate misiritiko auapitika, iuaritika hĩkamapoxokonitãtaua, kotxi iteene hĩauikari Xesosi sãkire. ⁸ Uatxa peerekari ate auini, kotxi Apiananiri sãkire iaõka hĩkama. ⁹ Iteene apoxokoniuatã Teoso apisatoõ, kotxi hĩauikari iua sãkire. Axinikasaakii, apoxokoni iteene auapitika. Ininiã ãtipirika atxari aTeosone: “Peerekai pite, kotxi Tesarónika auakani iteene auikari pisãkire, ininiã ikamapoxokonitãtaua ate,” atxari. ¹⁰ ĩkanõka, pokamara pakini iteene aamanaãri Teoso hĩte iuaĩkana aãõkitini, kotxi anirekari apikomoni Teoso sãkire himimarotakiniti aõerekinii.

¹¹ Anirekari aĩri Teoso, aãũte Xesosi Kristo pakini oerekiniãua aãpokini hĩtemoni. ¹² Anirekari Apiananiri txĩkitakinii himarotiniiri hĩtĩretakakiniua. Anirekari hĩtĩraõki aneini. Anirekari iteene hĩtĩraõkiuatini. Anirekari ikinimane apaka hĩtĩretini, ate tĩretinii hĩte atokotxikana. ¹³ Anirekari Apiananiri sikataparaxiniretinii hĩte. Ininiã Apiananiri Xesosi Kristo ikinika inakitiakorikata ĩkasaaki uai, iuasaaki maerekati !auaika hĩtemoni aĩri Teoso apisatoõ. Iuasaaki hĩte apoĩtakari !auari. Iuasaaki erekai hĩte.

4

Akamakiti Teoso Apokaerekatakiti

¹ Nitariakori, apikomoni nisãpiretai. Asãpiretapekai hĩkamakiti tĩkane, hĩuini Teoso apokaerekatini ĩkapani. Ikara atoko inakari hĩkamapitika uatxa. Erekarari hĩuini uatxa, ininiã nõtãkikai Apiananiri Xesosi posotĩreẽ, apikomoni iua apokaerekatakiti ikinĩõtika hĩkamini ĩkapani. ² Himarotapitikari aõereẽkiti hĩkamini ĩkapani. Apiananiri Xesosi paniãtaua ikara aõerekinii hĩte.

³ Teoso nirekari himaerekani xipokaãpotini hãkixinireẽ. Ininiãkara hñtaniri minakotikatika, hñtanoro minakotokatika, !hñsiríkape. ⁴ !Hãuiritapiri hñto nireëkiti ikamini. Hñto auñte hñtxauako, ininiã maerekati hñto nireëkiti !hñkama. Atão hñpaxitariko hñteka ãto, apanakini ãto apaka. ⁵ !Apakata hñxinikiniri ãtipirika maerekati hñto nireëkiti ãti ãtokata hñkamini. Xoteo minakanuia, Teoso mimarotakani, xinikari ikara atoko inakari. ⁶ !Apakata hñxikitakiniri ãti ãtari maerekati ãtotxi nireëkiti ikamini, kotxi Apiananiri misiritariko kãkiti ikara atoko inakari maerekati ikaminiã. Asãpiretapekai ikara. Apinitapekai. ⁷ Teoso kona akiritaua iuamoni, maerekati ãto nireëkiti akamini ãkapani. Akiritaua iua nakiti aniniua ãkapani, erekarinoka akamini ãkapani. ⁸ Ininiã ikara asãkire manirekakati, !omanataua ate. Omanatari Teoso. !Inirekari Teoso sãkire, kotxi Teoso sikari Erekar Matamatakoti kãkitimoni.

⁹ Hñtariakori hñtoretini pirena kona aiõkatsopata hñtemoni, kotxi Teoso oerekapekai hñtoretakaninua. ¹⁰ Nimarotari hñtoretiniri ikinika hñtariakori Masetõnia tixini uaakani. Iuaritika nitariakori, aõtãkikai apiata hñtoretiniri kãkiti ikiniõtika. ¹¹ Hãpaiaõkariko hñtsorãkaãti. Apanakini parãka !himaãkatape. Hñkamariko hñteka parãka hãuini ãkapani. Ikara atoko asãpiretapekai hñte. ¹² Ikara atoko hñkaminiã, Xesosi sãkire mauãkani paxitai. Ikara atoko hñkaminiã, !auari hiamonitakiti.

Apiananiri Kanapiriini

¹³ Nitariakori, anirekari himarotiniri atão inakari ipãkani pirena. Kona anirekari himatinaniuatini Xesosi sãkire mauãkani matinaniuatini atoko, kotxi ninõa ipãkasaaki, !imarotarina isinimonina. ¹⁴ Aãuikari Xesosi ipinini. Aãuikari iuaãkana õkitikinua. Ininiãkara aãuikari ipãkani Teoso sãkire auãkani apaka õkitikinua. Teoso minana ninõa Xesosikata ikanapiriãkasaaki. ¹⁵ Iuasaaki ate auãkipanika inakanuia Apiananiri kanapiriãkasaaki, !asari ninõa mitxi ipãkani apisapanika. Mitxi atoko ate sa Apiananirimoni. Apiananirira sãpiretapekai ikara. ¹⁶ Iuasaaki Apiananiri poterika itixine. Iuaka katxaka uaimoni. Iuasaaki akiripoakata iua apokasaaki, ininiã kãkiti kenakotariko Teoso nitariakori auñte sãkire. Teoso trõpetane xõkiko kenakotaãka. Iuasaaki mitxi ipãkani, Kristo sãkire auãkani, merepanika õkitikauako. ¹⁷ Eureka ate auapanika inakanuia anikaãkako ipãkanikata Apiananiri aaõkitini ãkapani. Aaõkitari iua itanoxiti katxiãriã. Ininiã eereka iuakata aãuapininiika. ¹⁸ Ikara sãkiretxiti hñsãpiretakauako, ininiã hñkamataparaxiniretakauako.

5

Apiananiri Kanapiriini Õti

¹ Nitariakori, kona asãpiretari Xesosi kanapiriini õti. !Asãpiretari apokini kasiriti, ikanapiriinikanani pakini. ² Kotxi atão himarotari, Apiananiri uai apokini, kñtiriti ãkanõka apokini atokokana itxako. Ininiã kãkiti !imarotari Apiananiri apokini õti. ³ Iuasaaki kãkiti sãkire: "Neenamtxi !auari. Erekaua. Imonõkoni !auari," inakasaaki, iuasaakipeka katimaritika Teoso xipokari ikinipoko. Katimari sito amarini tsĩkini atoko itxako. Oa sito tsii apokasaaki, omitekini !auari. Iua atokokana kãkiti mitekini !auari iuasaaki Xesosi kanapiriãkasaaki. ⁴ Nitariakori, kãkiti ipiã auakani atoko !hñtxaua. Himarotapitikari ãti õti Apiananiri uai kanapiriini, ininiã hiãtapari ikanapiriini õti apokini, himatikokakani ãkapani, kñtiriti tikokakiniri kãkiti atoko himinakanani ãkapani ikanapiriãkasaaki. ⁵ Hñte hñkinika kaiotximereri anaakori hñtxaua. Pokamarari anaakori atoko hñtxaua. !Akaikota ipiã. !Akaikota ãkanõka, kotxi !anirekaikari maerekati akamini. ⁶ Ininiãkara apanakini imakakani atoko !himapeko. Araõkire matxako, maerekati mapokakani ãkapani. Añto auñte matxaua. ⁷ Imakakani imaka ãkanõka. Poãtakani poãta ãkanõka. !Iãtapari Xesosi kanapiriini. Ikara atoko !hñtxapeko.

⁸ Pokamarari anaakori atxaua, ininiã añto auñte matxaua. Sotato takari itorota koana, itorota tokapare ãkapani. Sotato torota koana atoko itxa Teoso sãkire iteene hãuikini. Sotato torota koana atoko itxa apaka hñtiraõki. Ininiã hãuikasaakiri Teoso sãkire, hñtiraõkiuatakasaaki, hãkixinire tokapare auape. Sotato takari ikii tãta ikii tokapare ãkapani. Sotato kii tãta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. ⁹ Teoso mereẽua ate kona imisiritinua ãkapani. Iua mereẽua ate amaerekani aãuñte Xesosi Kristo makatxakini ãkapani. ¹⁰ Iua ipina kãkiti ãkapani. Ipinu iuakata aãuini ãkapani. Ikanapiriãkasaaki, isãkire auãkani auãkipanika inakani, ipãkani pakini aua iuakata. ¹¹ Ininiã hñsikataraxiniretakauako. Himoianatakauako Teoso sãkire iteene hãuikini ãkapani. Uatxa ikara atoko inakari hñkamapeka.

Paoro Õtãkikare Mapotõkire

¹² Nitariakori, aõtãkikai himarotinina hñte sauaki parãkauatakani, Apiananiri sãkire sãpiretakani, hñte õtãkikakani. ¹³ Ininiã iteene hñpaxitanako. Hñtretanako ninõa, kotxi ninõa

iteene parĩkauata hĩte ĩkapani. !Hĩxtitakakapeua. !Hineenamauatape. ¹⁴ Nitariakori, iteene aõtākikai hĩte ia atoko: Hĩpinitariko kākiti paniātakiti makĩpitakani. Hĩsikataraxiniretariko pĩkarauatakani. Himoianatariko mataparani. Katima !hĩtxapeko homanākarauatini kākiti kerokasaaki. ¹⁵ Kona hāuiritapiri misiritakori misiritiniri imisiritakiri. Ātipirika hĩkamariko erekari hītariakorimoni, Xesosi sākire mauĩkanimoni apaka.

¹⁶ Ātipirika hĩpoxokoniuatoko. ¹⁷ Himisākiretapikariko Teoso. ¹⁸ Hĩpoxokoniuatokasaaki, hĩtxariko Teoso: “Erekari pikamakiti nota ĩkapani,” hĩtxako. Himatinaniuatokasaaki, iuaritika hĩtxariko Teoso: “Erekari pikamakiti nota ĩkapani,” hĩtxako. Ikara atoko Teoso nirekari ātipirika hĩsāpiretiniri iua, kotxi Kristo Xesosi nakitiakori hĩtxaua. ¹⁹ !Hĩotokakapiri Erekari Matamatakoti parĩkauatini hākixinireē. Hĩkamariko ipaniātakiti. ²⁰ !Homanatapiri Teoso sākire kākiti sāpiretakiti. ²¹ Hātaerekatariko ĩkinika. Erekarinoka hĩkamako. ²² !Hĩsipeko maerekati kamikoātaā, kotxi hĩsiniā, apanakini xinikari atāo maerekati hinireka hĩkamini.

²³ Anirekari Teoso, kākiti kamaerekaxiniretakari, iua iteene kamaerekatinii hĩte iua nakitiakorinoka hininiua ĩkapani. Nimisākiretari Teoso hĩte ĩkapani, hĩxinire, hākixinire, hĩto pakini ereka inini, ininiā aāuĩte Xesosi Kristo uai apokasaaki maerekati !auaika hĩtemoni, ininiā hĩte apoĩtiko !auari. ²⁴ Hĩte akiritakari kamarĩ isākire iaōka.

²⁵ Nitariakori, himisākiretariko Teoso ate ĩkapani. ²⁶ Haōkitakakasaakiua, hĩtiraōkiritika hāpakapakauako, kotxi hītariakori itxauana. ²⁷ Apiananiri posotiireē nipaniātai hātatsopatiniri ia niokanatsopatakiti ĩkinika aītariakori kenakotini ĩkapani. ²⁸ Aāuĩte Xesosi Kristo sikari ĩkinipoko erekari hĩtemoni. Ameē.

2 TESARÓNİKA

Paoro İokanatsopatakiti İuaĩkana Tesarónika Auakanimoni

¹ Paoro, Sírası, Tximótxio pakini iokanatsopata Teoso mereėkinimoni Tesarónika sitatxtiã. Aĩri Teoso nakitiakori hĩtxaua. Apiananiri Xesosi Kristo nakitiakori hĩtxaua. ² Aĩri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Xesosi Kanapiriini Pirena

³ Nitariakori, átipirika atxari Teoso: “Erekapitikari pikamakiti Tesarónika auakani İkapani,” atxa. İkara atoko asápiretari Teoso, kotxi ikiniótika Teoso sákre hãuikini apiaãpota. Apaka hĩtoretakakinua ikiniótika apiaãpota. ⁴ İniniã apanakini Teoso sákre auĩákanikata aãuakasaaki, asápiretana ninoa ate iuikinii hĩte. Ate iukari himisiritiko himĩteenekini. Ate iukari hãuikiniri Teoso sákre. İteene himaxikiko, himisiritiko pakini, iuaritika himĩteenekari. İteene hãuikari Teoso sákre.

⁵ Himisiritiko himĩteenekini oerekari Teoso misiritiniri maerekati kamakani, kotxi ikara atão. Hĩte misiritaãka, kotxi hĩkamari hãuĩte Teoso paniãtakiti, ininiãkara iuamoni apakatapitika hãuini Teoso auĩttxi ininiãtaãua. ⁶ Teoso kamari atão inakarınoka. İniniã imisiritariko hĩte misiritakani. ⁷ İxipokariko hĩte misiritiko, ate misiritiko apaka. İuaasaaki hĩtomata atekata. İkara atoko inakari ikama, Apiananiri Xesosi oerekikosaaki Teoso tixine ipotorikasaaki, initiriakori kaposotiirerınikata. ⁸ Xamina tirınakariã imisiritanako Teoso mimarotakani, aãuĩte Xesosi Kristo iokanapirena erekari makĩpitakani. ⁹ Ninoa misiritaãkako átipirika. İkinipoko xipope ninoa İkapani. !Auiritaãkana Apiananiri auiniãtaã apokinina. !Atamatarina iua iotximere. !Atamatarina iposotiire. ¹⁰ Ninoa misiritaãka, Apiananiri kanapiriini ótisaaki. İuaasaaki inakitiakori, isákre auĩákanı, txariko: “Peerekai. Peerekai. Áti kaposotiireri pite atoko inakari !auari,” itxanako. İkara atoko hĩte apaka sápiretari iua iuaasaaki, kotxi hĩte auikari asápiretakiti hĩtemoni.

¹¹ İniniã amisákiiretapikari aTeosone hĩte İkapani. İa atoko atxari iua: “Pite akiritari Tesarónika auakani pinakitiakori ininiuana İkapani, ininiã ninirekari pite apokaerekatiniri ninoa kamakiti pite İkapani. Pisikaposotiiretana ninoa ikinipoko inireėkitina erekari ikaminina İkapani. Ninoa auikari pisákre, ininiã iparĩkauatana pite İkapani. İniniã pisikaposotiiretana ninoa ikara iparĩkana ikaminina İkapani.” ¹² İkara atoko amisákiiretari Teoso, kotxi apanakini atamatakasaakiri erekari hĩkamakiti, itxarinako aãuĩte Xesosi Kristo: “Peerekai pite,” itxanako, ininiã Xesosi uãka iuikaãka. Apaka Xesosi txaike hĩte: “Peerekai hĩte,” itxaike. İkara atoko aua, kotxi aTeosone, Apiananiri Xesosi Kristo pakini sikari ikinipoko erekari hĩtemoni.

2

Apia Maerekati Apokini

¹ Nitariakori, maxinikari aãuĩte Xesosi Kristo kanapiriini. Maxinikari iuakata aãpottiinina. İkara axinikasaaki, aótákkikai hĩte. ² Apanakini sápiretai: “Apiananiri kanapiriini óti apokapeka,” itxana. Maerekaxiniretika !hĩtxape. İkara atoko inakasaakina, !hĩpĩkarauatape. Paxirari ninoa sákre. Atxiĩti ninoa txari: “Erekari Matamatakoti sápiretano ikara.” Atxiĩti ninoa txari: “Paoro sápiretari ikara.” Atxiĩti ninoa txari: “Paoro iókatsopatarı ikara.” Paxirari ninoa sákre. Kona hãuikapiri ikara atoko inakari. ³ Kona xatikı hãuiritapiri kákiti misirienetini. Apiananiri kanapiriini apisapanika, kákiti !inirekari Teoso sákre ikĩpitini. İuaasaaki maerekati kamakari apiatakari apoka. Xipokatxi ákiri akiritaãka. İua xipokaãkapitikako. ⁴ İua apia maerekati !inirekari Teoso paniãtakiti ikamini. İuikauoko. “Kákiti teosonetakini posotiire poiãoka. Nota posotiire apiata,” itxako. İuaasaaki iitopãka Teoso misákiiretiko aikoti áki. “Teosorano nota. Notanokara Teoso txaua. Áti Teoso !auari,” itxako iuaasaaki. ⁵ Hĩtekata nauakasaaki, nisápiretapekai ikara. Atxiĩti hĩte xinikaparıkari nisápiretakiti? ⁶ Uatxa kona apakatapanika iua apia maerekati apokini. Himarotari Teoso !auritari iua apokini uatxa. İketo ótinokara Teoso auiritari iua apokini. İuaasaaki iuaka oerekaua. ⁷ Maerekati kipatakori posotiire auape uatxa, iuaritika maerekati mauritakati !auritapanikari iteene maerekati iarikini. Áti óti maerekati mauritakati makatxakaãka. ⁸ İuaasaaki iua apia maerekati oerekaua kákitimoni. Apiananiri kanapiriãkasaaki, okari iua. İxókare, isinanirenani xipokari iua. İotximere xipokari iua apia maerekati. ⁹ İua apia maerekati apokasaaki, Satanasi posotiire aua iuamoni. İkamariko ikini sereti posotiiretxi kákiti maposotakiniti. İua oerekari ikara, kákiti imisirienetini İkapani, isákre kákiti auikini İkapani. ¹⁰ İkini sereti maerekati ikama kákiti pĩpinanaãkanı imisirienetini İkapani. Ninoa pĩpinanaãkanı xipokapitikako, kotxi !inirekarına atão inakari itiretinina,

ininiã imaerekanina makatxakiko !auari. ¹¹ Ininiã iuasaaki Teoso txikitakana auikinirina ninoa misirienetakani sãkire, ininiã auikarina atão minakati apiatakari. ¹² Ininiã atão inakari mauikakati misiritaãkako, kotxi iteene ipotxitari imaerekani.

Iteene Hãuikariko Teoso Sãkire

¹³ Nitariakori, Apiananiri tiretakini, ãtipirika erekari amisãkiretiniri Teoso hũte ikapani ia atoko: "Erekapitikai, kotxi pite mereẽna Tesarónika auakani imaerekanina pimakatxakini ikapani."

Itixi kamiko apisapanika, iua mereẽi hũte. Imakatxakari himaerekani, kotxi Erekari Matamatakoti txikitakai Teoso nakitiakori hininiuua. Imakatxakari himaerekani, kotxi hãuikari atão inakari. ¹⁴ Teoso iokanapirena erekari asãpiretakiti hũtemoni hãuikasaaki, iuasaaki Teoso akiritai hũte. Ininiã aãũte Xesosi Kristo iotximere hũte apaka apakapako. ¹⁵ Ininiã nitariakori, iteene kataparaxinire hũtxako. Iteene hãuikariko Teoso sãkire asãpiretakiti, aiõkatsopatakiti pakini. !Hítakanapapiri.

¹⁶ Anirekari aãũte Xesosi Kristo, aãri Teoso pakini sikataparaxiniretinii hũte. Ninoa iteene tiretaua. ãtipirika isikataparaxiniretaua. Isikaua erekari aiãtapini ikapani. Aimarotari ikara erekari apokapitikako. Ikara atoko inakari ikama ate ikapani, kotxi isikaua ikinipoko erekari. ¹⁷ Erekari hũsãkiretakasaaki, erekari hũkamakasaaki, anirekari isikataparaxiniretinii hũte apikomoni erekari hũkamini ikapani.

3

Himisãkiretariko Teoso Ate Ikapani

¹ Nitariakori, nisãkire mapotõkire apoka. Himisãkiretariko Teoso ate ikapani Apiananiri sãkire katima iaripiretinii ikapani. Himisãkiretariko Teoso Apiananiri sãkire auikiko ikapani, hũte auikiniri atokotikakano. ² Himisãkiretariko Teoso imakatxakinuu ate amapinakani ikapani, maerekati kamakani sauaki aãuakasaaki, kotxi apanakini !auikari Teoso sãkire. ³ Apiananiri kamari ikinika isãkire iaõka. Iua sikataparaxiniretai hũte. Itokapakeẽtai, ininiã Satanasi !inokai. ⁴ Apiananiri txikitakaua ate aimarotiniri ate paniãtakiti hũkamini. Ate imarotari, katana apaka hũkamapanikariko asãkire iaõka. ⁵ Anirekari Apiananiri oerekinii Teoso tiraõki. Anirekari himĩteenekiniri ikinika himisiritiko, Kristo imĩsiritiko imĩteenekini atokokana.

Kãkiti Paniãtakiti Makĩpitakani

⁶ Nitariakori, aãũte Xesosi Kristo nireẽkiti iaõka asãpiretai hũte, ininiã apaniãtai ia atoko. Hĩtari kãkiti paniãtakiti makĩpitakani, aõereẽkiti iaõka imakamakaniã, ininiã iua moianari ! hũtxapeuako. Hítakanapariko iua. ⁷ Hũte imarotari akamakiti iaõka hũkamini, kotxi hũtekata aãuakasaaki ate kĩpitari kãkiti paniãtakiti. ⁸ Kona anikari nipokori amaĩkitxitakiniti. Iuasaaki iteene aparĩkauata. Ikanõka, pokamara pakini aparĩkauata akiena aiamotini ikapani, kotxi ! anirekari hũte kaamatini hũte kiena. ⁹ Apakatapitika kãkiti ikĩtxitinuu aparĩka ikapani, iuaritika !anirekari hũkitxitinuu, kotxi anirekari hũte parĩkauatini ate parĩkauatini atokokana. ¹⁰ Hũtekata ate auakasaaki, ate paniãtai hũte ia atoko: "Kãkiti manirekakaniãri iparĩkauatini, linikapani."

¹¹ Ate kenakopiretari hũte sauaki auari kãkiti paniãtakiti makĩpitakani. !Iparĩkauatana. ãtipirika ipotxitarina imarotinirina ãti kãkiti kamakiti. ¹² Aãũte Xesosi Kristo posotĩreẽ, apaniãtana kãkiti ikara atoko inakani iparĩkauatinina. Aõtãkikana iparĩkanoka ikaminina ikienana apokinina ikapani. !Himaãkatapiri apanakini kamakiti. ¹³ Nitariakori, !hũsãpakape erekari hũkamini.

¹⁴ Kãkiti ereẽ makamakaniãri ate õtãkikakiti ia iõkatsopariã, erepaniko iua. Iua moianari ! hũtxapeuako. Hítakanapariko iua, ininiã iuasaaki atxĩiti ipẽtaua. Iuasaaki atxĩiti iuaikana atão ikama. ¹⁵ Imoianari !hũtxapeuako, iuaritika himokaiakari litxaua. Hĩpinitariko iua, kotxi hĩtari itxaua.

Paoro Sãkire Mapotõkire

¹⁶ Anirekari Apiananiri, kãkiti kamaerekaxiniretakari, kamaerekaxiniretinii hũte ikiniõtika. Anirekari iua kaikotini hũtekata.

¹⁷ Nota Paoro iõkatsopata nisãkire mapotõkire niuakoã. Ia nitakaõtxikare, ininiã himarotari atão ia nota iokanatsopatakiti. Ia atoko inakari niõkatsopata. ¹⁸ Aãũte Xesosi Kristo sikari ikinipoko erekari hũte hũkinikamoni. Ameẽ.

1 TXIMÓTXIO

Merepanika Paoro Iokanatsopatakiti Tximótxiomoni

¹ Nota Paoro iokanatsopata pite Tximótxiomoni. Xesosi Kristo iokanapirena sápiretakari nota. Teoso amaerekani makatzakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatanano nota kákitimoni, iokanapirena nisápiretini íkapani. ² Pite Tximótxio, nota ákiri atoko pitxaua, kotxi merepitpanika pauikari Xesosi sáikire nota sápiretakasaakii. Aíri Teoso, aáũite Xesosi Kristo pakini sikai ikinipoko erekari. Iamoníkaina. Ikamaerekaxiniretaina pite.

Atão Minakati Oerekakani

³ Masetónia tixinimoni nisikasaaki, nipaniátaí pite Épeso sitatxiti pikaikotini. Uatxa iuaíkana nipaniátaí ereé Épeso pikaikotini. Ikara ninireka, kotxi apanakini ereé auakani oerekari Teoso sáikire kákitimoni, txamari na atãoni ninoa oerekakiti. Ninirekai pite pinitinina ninoa atão minakati imoerekakanina íkapani, ⁴ kotxi ninoa sápiretapikari kitzakapiríkari pirena. Ninoa xinikapikari aátokiriakorini uáka, ininiákara kákiti taparakienatakakaua iuáikana ixinikasaakina. Põtáikikanako ninoa ikara atoko inakari sáikiretxiti itakanapinina, kotxi ikara sáikiretxiti !oerekari kákiti Teoso nireékiti. Teoso sáikire aáuíkiniá, aimarotari Teoso nireékiti. ⁵ Nipaniátaí pite ikara atoko, kotxi ninirekari ereé Teoso sáikire auíákani itretakakiniua. Kákiti ákixinire maerekati mauakaniá, ininiá itiretakakaua. Kákiti imarotakasaakiri ikamakiti ereka inini, itiretakakaua. Kákiti ikara atoko inakari atão auikari Xesosi sáikire. ⁶ Kákiti, Teoso sáikire atão masápiretakani, takanapari ikara erekari kimaporiti. Pípinanaákani atoko itxauana, kotxi !imarotaikarina Teoso kimapore. Maxikatíika isákirauatapikana. ⁷ Ninoa kákiti nirekamari Teoso paniátakiti oerekakani ininiuana, txamari !imarotarina Teoso paniátakiti. !marotarina isápiretakitina, iuaritika ninoa: “Atãopitika asáikire,” itxanátana.

⁸ Kákiti atão sápiretakasaakiri Teoso paniátakiti iókatakori, iuasaaki aimarotari ipaniátakiti ereka inini. ⁹ Mauiritakoti aua, kona kákiti atão inakari kamakani íkapanini. Mauiritakoti aua, kotxi maerekati kamakani auapitika. Aua mauiritakoti manireékani. Aua Teoso manireékani. Aua maerekati kamakani. Aua erekari manireékani. Aua Teoso paniátakiti napetakani. Kákiti aua iri okakani. Kákiti aua inoro okakani. Aua kokanirini. Mauiritakoti aua, kákiti ikara atoko inakari íkapani. ¹⁰ Aua kákiti áti itanorokata siríakari. Aua kákiti áto tanirikata siríakaro. Aua kiki áti kikikata siríakari. Aua sito áto sitokata siríakaro. Aua kákiti áti kákiti ítiriákani ivétxitini íkapani. Aua aápirenaári. Aua kákiti áti apoítakani. Mauiritakoti aua ikara atoko inakari kákiti íkapani. Ninoa !auikari Teoso sáikire atão inakari. ¹¹ Ikara Teoso iokanapirena erekari sápiretaua. Peerekari Teoso. Peerekari iua iokanapirena. Iua paniátano nota iua iokanapirena nisápiretini ikininapemoni.

Teoso Amoníkiniri Paoro

¹² Nitxari aáũite Kristo Xesosi: “Erekari pite kaminano, kotxi pisikataparaxiniretano nota pite íkapani nívaríkauatini íkapani. Erekari pauíkiniri nisáikire. Erekari pimereinino nota pisáikire ikininapemoni nisápiretini íkapani,” nitxari Kristo Xesosi. ¹³ Meresaaki nota misáikireporetari iua Xesosi. Nasikatikinitana iua sáikire auíákani nokinina íkapani. Kaneanamarí nitxaua iuasaaki. Iuaritika Teoso amoníkano. !Imisiritano nota, kotxi iuasaaki !nimarotari nikamakiti Xesosi sáikire nimauíkakaní xika. ¹⁴ Iuasaaki !erekano. Maerekati nitxaua. Iuaritika aáũite Kristo Xesosi sikari ikinipoko erekari notamoni. Kristo Xesosi nakiti nitxapekaua, ininiákara nauikari isáikire. Iua nakiti nininiáua, nitiretari iua. Nitiretari apanakini apaka. Mítxi !nimarotari nitiraókiuatini. ¹⁵ Nisápiretaiko ia sáikiretxiti atão inakari, pauíkiniri íkapani, ikinimane auíkiniri íkapani. Nitxai: “Kristo Xesosi apoka íkorapokoriti maerekati kamakani maerekani imakatzakini íkapani,” nitxa. Maerekati apiata kamakari nitxaua nota. ¹⁶ Maerekati apiata kamakari nitxaua, iuaritika Teoso !imisiritano. Iamoníkano, kotxi inirekari apanakini imarotiniri Kristo matima omanákarauatakani kákiti maerekani xika. Xesosi nirekari nota ereka auakani, isáikire auíákani imarotiniri Xesosi amoníkinina ninoa, kotxi iua amoníkano nota maerekati apiata kamakarino. Ninoa auikari isáikire, ininiákara auapininiika Teosokata. ¹⁷ Nitxari Teoso: “Ari Teoso, peerekai. Átipirika ikinimane auíte pitxaua. Pipinini !auari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko átipirika. Ikinimane átipirika sápiretaiko ereka pinini. Atãopitikara nisáikire. Ameé.”

¹⁸ Tximótxio, namarite atoko pitxaua. Nisápiretai noerekakiti sáikiretxiti pikaminiri ikapani. Pixinikariko akokaxiti Teoso sáikire sápiretakani sápiretakiti. Ninoa sápiretai Teoso nirekakiti pite kamini tükane. Nota sáikire uatxa ninoa sáikire atokotxikana. Ikara ninoa oerekakiti sáikiretxiti pikamapikako, ininiákara pite sotato erekari atoko pitxaua Satanasi pinaiatini. ¹⁹ Pauikapikariko Xesosi sáikire. Ikara pikeeko atoko itxa. !Pikamapiri páixinire mapokaerekatakiniti, ininiá eereka !auikaikarina Xesosi sáikire. Kanaua sakikini atoko itxa ninoa auikiniri Xesosi sáikire. ²⁰ Imeneo inakori, Arexátri inakori apaka ikara atokokana itxana. Ninoa misáikirepiretari Teoso, ininiákara nota sikanapana ninoa Satanasi. Satanasi misiritakasaakina ninoa, atxiíti itakanaparina Teoso imisáikirepiretinina.

2

Teoso Misáikiretiko Ikinimane Íkapani

¹ Merepanika nótáikikai pimisáikiretiniri Teoso ikininape kákiti ikapani. Pimisáikiretariko Teoso ninoa nireékiti ikapani. Pamanaárikko Teoso sikiniri erekari ninoamoni. Pitxariko Teoso: “Peerekai pite, kotxi erekari pisikakiti kákitimoni.” ² Teoso pimisáikiretako auítetxiakori apiari ikapani, auítetxiakori poióri ikapani apaka. Pamanaárikko Teoso ninoa ikapani, aáuiini ereka inini ikapani, neenamtxi mauakani ikapani. Ikara atoko aniniá, akamari Teoso nireékiti erekarinoka. ³ Ikara akaminia erekapitikari. Teoso, amaerekani makatxakakari, apokaerekatari asáikire ikara atoko inakari akamini. ⁴ Teoso nirekari imakatxakiniri ikinimane maerekani. Inirekari ikinimane imarotiniri atáo inakari sáikiretxiti. ⁵ Átinokara Teoso aua. Áti kikinokara mikanapiriári kákiti Teosomoni. Xesosi Kristonokara mikanapiriári kákiti Teosomoni, kotxi iuanoka misáikiretari Teoso kákiti ikapani. ⁶ Iua ipina ikinimane kákiti iikixitini ikapani. Teoso ketotini óti manapi Xesosi ipina. Xesosi ipinini oerekaua Teoso nirekiniri imakatxakiniri ikinimane maerekani. ⁷ Ininiákara Teoso akiritano nota isáikire ikinimanemoni nisápiretini ikapani. Ininiá Teoso iokantakiti kákitimoni nitxaua nota. Ikara nisáikire atáo. Kona paxirarini. Teoso akiritano Xoteo minakanuia noerekini ikapani. Akiritano atáo inakari sáikiretxiti noerekinina ikapani. Akiritano noerekinina Teoso sáikire auikinina ikapani.

⁸ Ininiá ninirekari kikiakori erekarinoka kamakani, ikini itixiti auakani, misáikiretiniri Teoso. Ninirekari Teoso imisáikiretakasaakina, iusaaki ninirekari isáikire auikinina apaka, áti imomanatakanina.

Sitoakoro Xesosi Sáikire Auiákani

⁹ Ninirekari sito máka atáo inini, kiki paxitiniro ikapani. !Apakata oúikiniua omáka ereka inini xika. !Erekari sito átipirika oeretiniri oiáko kákiti xikaueretiniro ikapani. Oro, pérora pakini otakinia oiáo kákiti xikaueretiniro ikapani, !erekari. !Erekari mákatxi kakaroneri oieretakini. ¹⁰ Sito Teoso nireékiti nireékaro kaminiári erekari, erekapitikari. Mákatxi peereri atoko itxa erekari okamakiti, kotxi kákiti atamatari okamakiti. ¹¹ Teoso sáikire sápiretakari oerekarauatakasaaki, erekari sito kenakotiniri. !Apakata iusaaki osákirauatini. Erekari opaxitiniri iua, isáikire okípitini ikapani. ¹² Nota !auritaro sito oerekinina kikiakori, ikamakitina tükane opaniátinina. Erekari masáikiretoko onini. ¹³ Ikara atoko itxa, kotxi merepitipanika Teoso kamari kiki Adáo inakori. Eerekaikara ikamaro sito Eva inakoro. ¹⁴ Kona Adáoni misirienetaáka. Sitora misirienetapeéka. Oa kamari maerekati, kotxi !okamari Teoso paniátakiti, ininiákara !apakata sito paniátiniri kiki ikamakiti tükane. ¹⁵ Sito auikiniári Teoso sáikire, otiretiniriári apanakini, maerekati okamakaniá, omasarauatakaniá, Teoso makatxakari omaerekani, kotxi áto sito eenetari Xesosi, amaerekani makatxaákari.

3

Kótáikakarerini Pirena

¹ Ia nisáikire atáo. Kiki nirekiniári kótáikakareri ininiua, Teoso sáikire auiákani ótáikikini inirekiniá, iua nirekari paríkatxi erekari. ² Ia atoko kótáikakareri txauako: !Ikamari maerekati, ininiá iua apoítiko !auari. Átonanirako Ítanoro. Kíkiteri itxauako. !Katimari omanákarauatini. Ipxátaákako. Kákiti átiátaá ikani apakapako aapoko. Imarotariko oerekarauatini. ³ !Ipoátapeko. Kaneenamari !itxapeuako. Katiraókiri itxauako. !Ipotxitapiriko neenamtxi. Txineiro iteene !ixinikaperoko. ⁴ Iua níkatanako aapoko auakani, ninoa auini ereka ininina tükane. Itxíkitakanako imiakori ipaniátakiti ikípítinina ikapani, ininiá ninoa paxitari iua. ⁵ Ikara atoko itxako kótáikakareri, kotxi aapoko auakani imamimataniáretakaniá, ininiá !imarotari kákiti Xesosi sáikire auiákani iníkatini. ⁶ Kiki mapaótinoka auikiniári Xesosi sáikire, !apakata iua Xesosi sáikire auiákani ótáikikareri ininiua. Xesosi sáikire auiákani ótáikikareri ininiáua, iukaua atxiíti. Iuikiniáua, Teoso misiritari iua,

kitxakapirika Satanasi iukasaakua imisiritini atokokana. ⁷ Kiki Xesosi sākire auiaġani oġākkakari paxitaākako, Xesosi sākire mauiaġani apaka paxitari iua. Ikara atoko ininiā, ! ikamapaniri kākiti kamapētatakari. Ininiā Satanasi !imaġkari iua itakapiremoni.

Kamiparġkarerini Pirena

⁸ Ātipekana, Xesosi sākire auiaġani miparġkatakanipekana nisāpiretaiko: Iua kamariko erekari, ipaxitiko šikane. Ātika isākire itxauako. !Ipoātapeko. !Apakata txineironoka ixinikini. ⁹ Kamiparġkareri iteene auikariko Teoso sākire atāo inakari. Ākixinire imarotariko ikaminiri Teoso sākire iaōka. ¹⁰ Xesosi sākire auiaġani ataerekatariko kiki, kamiparġkareri ininiua nireēkari. Erekarinoka ikaminia, ininiā iua auiritaāka ninoa miparġkatakari ininiua. ¹¹ Iua atokokana kamiparġkareri šanoro kamariko erekari opaxitiko škapani. Aāpirena ! okamapeko. !Opoātapeko. Okamariko okamaenetakiti iaōka. Ininiā kākiti auikari osākire. ¹² Ātonanirako kamiparġkareri šanoro. Inġkatariko imiakori, kākiti iua aapoko auakani apaka, ninoa auini ereka ininina škapani. ¹³ Kamiparġkareri atāo parġkauatiniā, iteene ipaxitaāka. Apanakini apokaerekatari iparġka. Ininiā itaparaxinireritika isāpiretari Kristo Xesosi sākire auikiko kākitimoni.

¹⁴ Uatxa pitemoni niōkatsopatakasaaki, ninirekari paġtiki nisini hġtemoni. ¹⁵ Atxiġti uai okananu nauapanika, ininiā ia iōkatsopari oerekaiko pite Teoso nakitiakori atāo auini ikiniōtika, kotxi Teoso aapoko atoko atxaua, iua auiniātaā škapani. Teoso auāki itxapika. Kākiti iua nakitiakori nġkataru iua sākire. !Auiritana apanakini koketiniri atāo minakati Teoso sākirekata. Isāpiretana ikinimane Teoso sākire atāo inakari. ¹⁶ Peerekari Teoso parġka kākiti škapani. Merepanika kākiti !imarotari, eereka Teoso oerekari iparġka. Ia atoko Teoso kaminuau ate:

Kākiti itxapekaua. Iua Xesosi. Erekaru Matamatakoti oerekari kākiti Xesosi sākire atāo inini. Teoso nitiriakori iaxitikini atamatari iua. Isākire sāpiretaāka ikini itixiti auakanimoni. Kākiti auikari isākire. Eereka Xesosi anikaāka iaxiti Teoso tixinemoni.

Ikara atoko inakari Teoso parġka kākiti škapani.

4

Atāo Minakati Oerekakani

¹ Iua Erekaru Matamatakoti sāpiretaua, apanakini ! auikaikari Xesosi sākire itixi mapotōkire oġi takote. Ikara atāo. Iuasaaki ninoa auikari maerekani matamatakoni misirienere. Auikarina Satanasi nitiriakori oerekakiti. ² Kākiti ikara atoko inakani sāpiretari atāo minakati. Ninoa sākire āti, txamari ninoa xinikakiti ipinimoni. Ninoa ākixinire sākire !auaika. !Isāpiretaikarina maerekati imakamakanina škapani. Kapatakari arikakiti atoko itxa ninoa ākixinire sākire. ³ Kākiti ikara atoko inakani ! auiritari kākiti štanorouatini. “!Erekaru kākiti štanorouatini,” itxa ninoa sākire. Teoso kamari ikini nipokori kākiti nikini škapani. Txamari ninoa kamisirienereini !auiritari kākiti apanakini nipokori inikinina. Teoso nirekari Xesosi sākire auiaġani, atāo inakari imarotakani, nikiniri ikara nipokori Teoso imisākirekata atoko: “Erekapitakai ia nipokori pisikiniāua.” ⁴ Ikinika Teoso kamakiti erekari. !Apakata kākiti manirekakaniāri apanakini nipokori. Ikinipoko nipokori hinikasaaki, himisākiretariko Teoso. Hġtxariko: “Erekapitakai ia nipokori pisikiniāua.” ⁵ Teoso sākire sāpiretaua ikinipoko nipokori anikini. Nipokori anikasaaki, amisākiretiniāri Teoso, nipokori isikakiti ereka inini asāpiretiniāri, ininiā ikara nipokori erekari anikini.

Kristo Xesosi Nitiri Erekaru Inakari

⁶ Aġtariakori pōġākikiniā ikara atoko, Xesosi Kristo nitiri erekari pitxaua. Nipokori sikataparataru kākiti što. Teoso sākire aāuiākiti, oerekaretxi atāo inakari, nipokori atoko itxa, kotxi isikataparataru axinire. Pite auikapikari oerekaretxi atāo inakari. ⁷ !Pimaākatapiri miġkiteti sāpiretakiti, sākiretxi Teoso mapokaerekakiniti. Ikinioġtika piteka poerekauako Teoso paniātakitinoka pikamini, ininiā Teoso nireēkittixikana pikama. ⁸ Piġto parġkauatakasaaki, piġto tapara apiaāpota, ininiā erekari piparġkauatini. Apiaerekata pixinire parġkauatini pixinire auāki inini škapani. Pixinire škorasaaki auāki ininiā, pauapikako Teosokata ātipirika. ⁹ Ikara nisākire atāo. Erekaru ikinimane auikiniri ikara. Erekaru ikinimane kaminiri ikara. ¹⁰ Ininiākara iteene aparġkauata Teoso škapani. Pasāpaniri, iuaritika aparġkauatapitipo, kotxi aāuikari Teoso sākire, Teoso mipġkati sākire. Iua ikinimane kākiti maerekani makatxaākari itxaua. Iua makatxakari isākire auiaġani maerekani, maerekani misiritikoātaā imasikanina škapani.

¹¹ Pipaniātariko kākiti noerekakiti sākiretxiti iaōka ikaminina. Poerekana noerekakiti.

¹² Pite átokoripanika, iuaritika pimarotapitikari Teoso sáikire, ininiá ! pauiritapiri kákiti napetiniri poerekakiti sáikiretxiti. Atáo inakarínoka pikamako Xesosi sáikire auiákani atamatiní ikapani, ininiákara ninoa auikapitikariko pisáikire, ininiá ninoa nirekari pite atoko ininina. Erekarínoka pisápiretako. Erekarínoka pikamako. Kákiti pitiretako. Iteene pauikariko Teoso sáikire. Maerekati ! pikamapeko. Ikara atoko pininiá, ninoa nirekari pite atoko ininina. ¹³ Ereé nimapokakanisaakipanika, patatsopatariko Teoso sáikire ióksopatakori, apanakini kenakotiniri ikapani. Pisápiretanako Teoso sáikire. Teoso sáikireé pótáikikanako. Poerekana Teoso sáikire atáo imarotínina ikapani. Ikara atoko pitxapikanako, ereé napokini apisapanika. ¹⁴ Akokaxiti kótáikikarerini sápiretai piparíka Teoso ikapani. Iuusaaki ninoa takari iuakona pite nopini, pite ikapani imisáikiretakasaakirina Teoso. Ikara atoko ininiákara, pikamapikariko ikara piparíka Teoso ikapani. ¹⁵ Átipirika pixinikariko ikara nótáikikini. Ikinioitika pikamariko piparíka Teoso ikapani. Ininiá apanakini imarotari Teoso sáikire apiaápotá pauikini. ¹⁶ Erepaniko pikamakiti ereka inini ikapani. Erepaniko poerekakiti sáikiretxiti Xesosi oerekakiti iaóka inini. Ikara átipirika pikaminiá, piteka makatzakaua pimapinakaní ikapani. Apaka pimakatzakana pisáikire auiákani imapinakaní ikapani.

5

Ótákipirenatxi Pirena

¹ !Pitxitapiri kiki aneékari. Pótáikikariko, piri pimisáikiretini atokokana. Pótáikikariko kiki-akori pite tikini auakani, pitariakori pimisáikiretini atokokana. ² Pótáikikaroko sito aneékaro pinoro pótáikikini atokokana. Pótáikikaroko átokoro, pitaro pótáikikini atoko. Iuusaaki pipaxitaroko.

Sitoákini Tikinitakoni

³ Piníkatana sitoákini tikinitakoni onirimane matiretakini. ⁴ Tikinitakoro oimiakori auiniá, oítariakori anaakori auiniá, ninoa níkatamaroko oa. Ikara ikaminiána, erekari Teosomoni. Teoso poxokotana ninoa. Merepanika ninoa kaminiári erekari ninoaka aapoko áki, aimarotari ninoa atáo auikniri Teoso sáikire, kotxi meresaaki irina, inorona pakini níkatana ninoa. ⁵ Tikinitakoro miníkatakoto auikari Teoso iníkatiniro oa. Oa misáikiretari iua pokamara, íkanóka pakini iníkatiniro ikapani. ⁶ Tikinitakoro osarauatininoka nireékaro, ipíkaro atoko otxaua. ⁷ Pisápiretanako ereé auakani, Xesosi sáikire auiákani níkatínina inorona, inorona itaro tikinitakoro pakini. Iníkatiniána, ! apoítaákana. ⁸ Xesosi sáikire auiákani maníkataniári inirimane, itakanaparina Teoso sáikire auiknina. Apia maerekanita iua aapoko áki auakani imaníkataniá. Kákiti Teoso sáikire mauíákati maerekati itxaua. Apia maerekati itxaua iua aapoko áki auakani maníkatakati.

⁹ Apanakini sito tikinitakoni moianatana Xesosi sáikire auiákani. Pitakariko ninoa tikinitakoni uáka aátsopaá himoianatini ikapani. Sito ikara atoko inakoro seséta ano apiko auakaro oa. Átinoka oítanirini. ¹⁰ Oa imarotaáka, kotxi erekarinani okama. Atáo oóerekari oimiakori. Osikakienatana átiátaá íkani. Oimarotaáka, kotxi oa arokakititari kákiti Teoso nakitiakori. Oimarotaáka, kotxi kákiti maerekaxinireni otireta. Oimarotaáka, kotxi ikini sereti erekari átipirika okama. Tikinitakoro ikara atoko inakoro uáka aátsopaá pitaka himoianatini ikapani.

Tikinitakoni Átokoropanika Inakani Ótáikikiko

¹¹ ! Pitakapiri tikinitakoro uáka iua aátsopaá, átokoropanika inakoro, kotxi iuaíkana onirekari kíkikata osíríkini, ininiá onirekari iuaíkana oítaniriuatini, ininiá ! onirekaikari Kristo. ¹² Ikara atoko okaminiá, okamari maerekati, kotxi mitxi osáikire: “Níkarimiko paríkatxi Teoso ikapanimani. ! Nítaniriuataikako,” otxama. ¹³ Tikinitakoro átokoropanika inakoro itotari oíarneauatini. Oíanapokotapika. Apia maerekati okama, kotxi ototari aápirena okamini. Onirekari ikínika apanakini kamakiti oimarotini, txamari ikara atoko ! apakata. !Apakata áti kamakiti osápiretini apanakinimoni. ¹⁴ Ikara atoko ininiá, !pitakapiri tikinitakoro átokoro inakoro uáka iua aátsopaá. Nota ótáikikana átokoroakoro tikinitakoni iuaíkana taniriuatini. Erekari keene ininina, aapokona iparíkauatinina. Ikara atoko ininiá, Xesosi sáikire mauíákani kona misáikirepiretana Xesosi sáikire auiákani. ¹⁵ Nota ikara atoko nisápiretai, kotxi átikaka tikinitakoni átokoroakoro inakani takanapapekari Xesosi sáikire auiknina, Satanasi paniátakiti ikaminina ikapani. ¹⁶ Xesosi sáikire auiákani inirimanena tikinitikoá, iníkatana ninoa. ! Erekari imaníkataniá inirimanena tikinitakoni. ! Erekari inirekinirina apanakini Xesosi sáikire auiákani níkatínina inirimanena, kotxi ninoa níkatana kaiáopokori tikinitakoni manirimaneni. Pasápaniri ninoa paríka.

Kótáikikarerini Pirena

¹⁷ Kōtākikarerini atāo kaminiāri iparīka Xesosi sākire auīākani ĩkapani, erekari hīsikinina iparīkana ĩki apiata. Teoso sākire isāpiretiniāna apanakinimoni, Teoso sākire oerekiniāna, ininiākara erekapitikari apiata iparīkana ĩki hūikitxitinina. ¹⁸ Teoso sākire iōkatsopatakori txari: ! Hixirikanamatapiri kema auīte iparīkauatakasaaki, triko ikatxaratakasaaki. Pauiritariko inikiniri triko ĩki, iparīkauanātakasaaki.

Teoso sākire iōkatsopatakori txari apaka:

Erekapitikari parīkauatakari apakapiniri iparīka ĩki.

¹⁹ Āti apoītiniāri kōtākikarerini, ! pimaākatapiri isāpiretakiti. Ipi, atxīiti ipi āti pakini kākiti atamatiniāri kōtākikarerini kaminiri maerekati, isāpiretiniāna pite, pikenakotapitikari ninoa sāpiretakiti. ²⁰ Pōtākikanako Xesosi sākire auīākani maerekati kamakani apanakini Xesosi sākire auīākani apisatoō, ininiākara apanakini pīkari maerekati ikaminina.

²¹ Tximótxio, nota paniātai ikara noerekakiti iaōka pikamini. Teoso apisatoō, Apiananiri Xesosi Kristo apisatoō apaka, Teoso nitiriakori iaxitūkinini imereēkinini apisatoō apaka, nīpaniātai ikara noerekakiti iaōka pikamini. Ninoa kenakotari nisākire pitemoni. Ātinokarako pisākire txauako ikininape kākitimoni. Erekari pikamako ikininape kākitimoni, kākiti pipotxitakinimoni, kākiti pimapotxitakinimoni apaka. ²² Atxīiti aua Teoso sākire auīākari iteene pimimarotakiniti. Ininiā !pimereēpiri iua Xesosi sākire auīākani oṭākiākari ininiua. Atxīiti ikamapanikari maerekati. Pimereiniāri iua, pite moianatari iua maerekati ikamini. Erepaniko maerekati pimakamakani ĩkapani.

²³ Pite itokata amianata. Pitsii iriko, ininiākara kona āparaānanini piāta. Ovaō poiōka apaka piātako pipini ĩkapani.

²⁴ Apanakini ! ikipatari maerekati ikamakiti, ininiā ikinimane imarotari. Apanakinipekana maerekati ikamakitina !atamataāka ikamakasaakina. Ninoa kipatari. Okananixiti atokoikara imarotaāka ninoa maerekani. ²⁵ Iua atokokana erekari apanakini kamakiti atamataāka. Erekari apanakini kamakiti !atamataāka ikamakasaaki. Iuaritika okananixiti atokoikara imarotaāka.

6

Nitiritxi Amotakoni Pirena

¹ Nitiritxi amotakoni, Xesosi sākire auīākani, iteenerako iparīkauatana ipatrāotena ĩkapani. Ninoa paxitanako ipatrāotena. Ikara atoko ininiāna, Teoso uāka !imisākirepiretaāka. Iua sākire ate oerekakiti apaka !imisākirepiretaāka iuasaaki. ² Nitiritxi patrāote Xesosi sākire auīākari ininiāna, initiri paxitariko iua, kotxi itari apaka itxaua iua. !Apakata poiāonoka ipaxitiniri ipatrāote, itari ininiua xika. Erekari iteene iparīkauatini ipatrāote ĩkapani, kotxi ipatrāote auikari Xesosi sākire. Teoso tirketakiti ipatrāote. Tximótxio, ikara noerekakiti sākiretxiti poerekariko apanakinimoni. Pōtākikanako ikara iaōka ikaminina.

Txineiro Potxitakani Pirena

³ Aua kākiti atāo minakati oereēkani. Ninoa !auikari aūiute Xesosi Kristo sākire atāo inakari. !Auikarina atāo inakari oerekakori, Teoso sākire. ⁴ Kākiti ikara atoko inakari iuikaua, txamari !kimaroreri. Ipotxitari isākirauatini apanakinikata itaparakienatakakinina uana ĩkapani. Ininiākara xikoretxi aua, neenamatchi aua, misākirepiretakatchi aua. Ininiā kākiti !auikari āti sākire. Iuākatari āti kaminiri maerekati. ⁵ Ninoa txitakakapikaua, kotxi ixinikakitina maerekatinoka. !Imarotaikarina Teoso sākire atāo inakari mitxi imarotakitina. Ninoa oerekari Teoso sākire kākitimoni txineiro ito apakapinina ĩkapani. Txamari na atāo ninoa oerekakiti sākiretxiti. !Pimaākatapiri kākiti ikara atoko inakari.

⁶ Teoso nireēkitinoka pinirekiniā, ikinipoko pinirekiti auape, ininiā pākitxinire poxokoniua. Kipa apikomoni pinireka? !Auari. ⁷ Kiripa ate mina uai itixi aponaniākasaaki? !Kaminareua. Kiripa aanika atekata apīkasaaki? !Kanikareua. ⁸ Kamāka aniniā, kanipokore aniniā, apakatape. ⁹ Satanasi oerekari kākiti maerekati ikamini txineiro apakapini ĩkapani. Ininiā tiitxi nireēkari mokatanitika kamari Satanasi oereēkiti. !Erekari tiitxi nireēkari nireēkiti. !Kīikiteri iua. Inireēkiti txikatoro atoko, kotxi imāikari iua. Eereka !auaika itii, itxineirote, ipoxokoni pakini xipope. Inireēkiti xika Teoso iokanatari iua kākiti misiritikomoni. ¹⁰ Kākiti iteene potxitiniāri txineiro, ikamari maerekati. Takari aneē, kotxi ikotsa aua. Iua atokokana maerekati aua ikotsa. Txineiro potxitiko maerekati kotsa itxaua. Txineiro potxitiko auiniā, ikini sereti maerekati aneē. Apanakini txineiro potxitakani takanapaāpotari Teoso sākire, ininiākara txineiro potxitakari iuaka karotapekaua ākixinireē. Iuaka maerekaxinireti itxīkitakaua.

Paoro Oṭākikiniri Tximótxio

¹¹ Pitepekana Tximótxio, Teoso paniātakiti kamakari pitxaua, ininiākara ikara maerekati xatiki !pikamape. Atāo inakarinanirako ikiniōtika pikamako. Teoso nireēkitinoka pikamako. Iteene pauikariko Teoso sākire. Katiraōkiri pitxauako. Pimisiritiko auakasaaki,

pimíteenekariko. Teoso nireékitinoka pinirekako. Kona pinirekapiri piteka nireékiti. ¹² Pineenamauatako Teoso ikapani. Ikara neenamatzí erekari, Satanasi piokanatiní, kákiti Teoso sáikire auikini ikapani. Papakapariko Teoso sikakíti, kotxi iua akiritai iuakata pauap-ininiika pinini ikapani. Kaiáopokori kákiti imarotari Xesosi sáikire iteene pauikini, kotxi ikenakotapekari pisápiretinina. Peerekari pisáikire ninoamoni. ¹³ Tximótxio, nimisáikiretai pite Teoso apisatoó, Kristo Xesosi apisatoó apaka. Ninoakara kenakotari nisáikire uatxa. Teoso ikinimane auáki inini txíkitakakari iua. Kristo Xesosi Homano auíte Pósiso Pirato inakori apisatoó auakasaaki, isápiretari atáo Teoso sáikire. ¹⁴ Nipaniátaí ikara noerekakíti sáikiretxiti iaóka pikamini. ! Pimamakapiri ikara noerekakíti. Ikara noerekakíti iaóka pikaminiritika aáuíte Xesosi Kristo kanapiriáko. ¹⁵ Teoso ketotari Xesosi kanapiriini óti. Iúasaaki Teoso akiritari Xesosi íkorapokoriti ikanapiriini ikapani. Iuanokara kaposotiireri. Peerekari iua. Auítetxiakori auíte itxaua. Apiarini sauaki iuanokara Apiananiri txaua. ¹⁶ Iuanoka ! ipina. Iuanokara ikinipoko auáki inini txíkitakakari. Iua auiniátaá iotximere auapika, ininiákara kákiti ! iposota imatokotiniri Teoso. ! Katamatikori. Kákiti ! iposotari atamatiniri iua. Iuanokara kaposotiireri átipirika. Átipirika maákitari: “Peerekari Teoso.” Ameé.

Xesosi Sáikire Auiákani Katxineiroterini

¹⁷ Pipaniátanako kákiti katxineiroterini: “Katii hininiá, ! húikapeuako. ! Hípoxokotapero hítxineirote, kotxi áti óti atxiíti hítxineirote ! auaika. Hípoxokotariko Teoso, átipirika auákiri, kotxi iuara sikaua ikinipoko apotxitakíti. Kaiáopokori isikaua. ¹⁸ Erekari híkamako. Hítxineirote kaiáopokoro auini atokokana, erekari kaiáopokori híkaminanako apanakini. Kaiáopokori hítii auiniá, hísika kákiti kaamonirimoni. Himarotakasaakiri, matxineiroteni amonítakiti hísikanako ninoa. ¹⁹ Ikara atoko hininiá, hápotiiápotari erekari Teoso tixinekiri. Iuaá apotiitakori ! ixipoka. Ipinaákana atoko, auinapanikana. Ikara atoko híkaminia, hápakapari Teoso sikakíti. Iua txíkitakai háuapininiika hinini Teosokata.”

Ikara pisápiretako katxineirotenimoni.

Paoro Iókatsozare Mapotókiré

²⁰ Ari, Tximótxio, atáo pikamariko paríkatxi Teoso sikakíti pitemoni pikamini ikapani. ! Pimaákatapiri sáikiretxi Teoso mapokaerekatakiniti. ! Pimaákatapiri kákiti, “Kimaroreno nota,” inakari, kotxi ! imarotari imaroretxi atáo inakari. ²¹ Ninoa sáikire: “Imaroretxi auapitika notamoni,” itxa. Txamari na xatiki imarotari Teoso imarore. Ikara xika ninoa takanapaápotari Teoso sáikire auikinina.

Teoso sikai ikinipoko erekari. Ameé.

2 TXIMÓTXIO

Paoro Iokanatsopatakiti Iuaĩkana Tximótxiomoni

¹ Tximótxio, nota Paoro iokanatsopata pitemoni. Teoso mereẽno nota, Kristo Xesosi iokanatinino İkapani, isäkire nisäpiretini İkapani. Käkiti Kristo Xesosi nakiti ininiãua, Teoso txĩkitakari ixinire auãki inini, kotxi Teoso kamaenetapekari ikara ikamini.

² Pite Tximótxio namarite nitiretakiti atoko pitxaua. Aĩri Teoso, aãuĩte Kristo Xesosi pakini sikai ikinipoko erekari. Iamonĩkana. Ikamaerekaxiniretaina.

Paoro Ötãkikiniri Tximótxio

³ Nota parĩkauata Teoso İkapani. Ninirimane kitxakapirĩkarini parĩkauatini atokokana nĩparĩkauata. Nãkixinireẽ nimarotari maerekati nimakamakani, Teoso İkapani nĩparĩkauataksaaki. Nota txari Teoso: “Erekapitikari pikamakiti Tximótxio İkapani,” nitxa. Nimisãkiretapikari Teoso pite İkapani, İkanõka, pokamara, İkanõka, pokamara nitxapika. ⁴ Nipiãtai. Nixinikari pite txiapatini nitakanapakasaakii, ininiã ninirekari naõkitiniii iuaĩkana nipoxokoniuatini İkapani. ⁵ Nixinikari pite atão auikiniri Teoso sãkire. Merepanika pakiro Arõitxi inakoro, pinoro Eonisi inakoro pakini atão auikari Teoso sãkire. Nimarotapitikari pite apaka auikiniri Teoso sãkire ninoa auikiniri atokotxikana. ⁶ Ininiãkara nõtãkikai. Akoka niuauo nitakasaakiri pikiiã, Teoso sikai parĩkatxi iua İkapani pikamini. Iuaasaaki isikaposotiiretai ikara parĩkatxi pikamini İkapani. Iteene pikamariko ikara parĩkatxi iua İkapani. ⁷ Teoso sikapekaua Erekarı Matamatakoti, ininiã !kapĩkareua. Iua Erekarı Matamatakoti sikataparatarı aãkixinire. Iua oerekaua atiraõkiuatini. Oerekaua maerekati aĩto nireẽkiti amanirekaranı.

⁸ Ininiã !pipẽtatapiri aãuĩte sãkire pisäpiretini. Apaka !pipẽtatapeno nota, kotxi kateia äki naua Xesosi sãkire nisäpiretini xika. Maãtatsiirauata, Teoso İokanapirena erekari asäpiretini xika, kotxi Teoso sikataparataua amisiritiko amĩteenekini İkapani. ⁹ Teoso makatxakapekari amaerekani. Iua akiritapekaua inakitiakori aniniua İkapani. Aparĩka kona txĩkitakari Teoso makatxakiniri amaerekani. Imakatzakari amaerekani, kotxi inirekari ikara atoko ikamini. Imakatzakari amaerekani, kotxi inirekari ikinipoko erekari isikiniua. Itixi kamiko apisapanika Kristo Xesosi sikari ikara erekari atemoni. Iuaasaaki imakatzakari amaerekani. Iuaasaaki akiritaua inakitiakori aniniua İkapani. ¹⁰ Uatxa Teoso oerekari ikara erekari kãkitimoni, kotxi amaerekani makatzakakari Xesosi Kristo apokapeka İkorapokoritı. Iua xipokapekari ipĩkitxi. Isäpiretari Teoso İokanapirena erekari, kãkiti mapinakanı İkapani, Teosokata ätipirika auini İkapani.

¹¹ Teoso mereẽno nota ikara İokanapirenatxi säpiretakari nininiua tũkane. Imereẽno iua İokanatakiti kãkitimoni nininiua. Imereẽno Xoteo minakanıua oereẽkari nininiua. ¹² Teoso İokanapirena erekari nisäpiretini xika, natatsiirauata. Iuaritika !nipẽtauaata, kotxi nimarotari Xesosi. Iteene nauikari iua sãkire. Nimarotapitikari iua nĩkatinino nota. Inĩkatiniritikano İkanapiriãko. ¹³ Teoso sãkire pitemoni noerekakiti iaõka poerekako apanakini, kotxi noerekakiti atão. Pauikapikariko Kristo Xesosi sãkire. Katiraõki pitxako, kotxi Xesosi nakiti atxaua. ¹⁴ Pimarotari Teoso İokanapirena erekari. !Pauiritapiri ikoketiko. Teoso sikari ikara İokanapirena pitemoni, apanakini pisäpiretini İkapani. Erekarı Matamatakoti auaĩtotaua. Iua posotiireẽ pinĩkatariiko Teoso İokanapirena pitemoni isikakiti.

¹⁵ Pimarotari kãkiti Xesosi sãkire auĩãkani Asia tixine auakani takanapano nota. Aĩtariakori Pixero inakori, Emozeni inakori pakini pakini takanapano nota. ¹⁶ Onesĩporo inakori !İtakanapano. Ninirekari Teoso tiretinina iua aapoko auakani. Itokata İkamapoxokonıtano nota. !Ipẽtatano kateia äki nauakasaaki. ¹⁷ Homa sitatxiti apokasaaki, initaãpotano nota, eereka apokano. ¹⁸ Pite imarotari iua iteene moianatinino nota, Ėpeso sitatxiti nauakasaaki. Ininiã nitxari Apiananiri: “Ninirekari piamonĩkiniri Onesĩporo itixi xipokini õti manapisaaki.”

2

Misirikaretxi Mĩteenekiko

¹ Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiã iua sikari ikinipoko erekari atemoni. İkara erekari sikataparatarı axinire. ² Pite kenakotapekari nisäkire noerekakiti kãkitimoni. Ininiã poerekariko ikara iaõka apanakinimoni atão inakari kamakanimoni. Eereka ninoa posotari oerekiniri nisäkire noerekakiti apanakinimoni apaka.

³ Sotato erekari mĩteenekari imisiritiko. Kristo Xesosi sotatone atoko atxaua, ininiã pimĩteenekariko pimisiritiko sotato erekari mĩteenekiniri atoko. ⁴ Sotato parĩkauataksaaki,

!ixinikaikari iparíka mitxi ikamakiti sotato iminakanisaaki. Ixinikapikari sotato auíte nireékiti ikamini, iauíte poxokotiniri íkapani. Ikaranokara ixinikanáta.

⁵ Átipekana nisápiretai. Miteékari mitekaxti mapotókire merepanika apoókari apakapari imitekini íki. Mitekaxti paniátakari paniátini iaóka imitekiniá, apakapari imitekini íki.

⁶ Átipekana nisápiretai. Katarakeri poparíkari níkari itakare merepanika, kotxi iteene iparíka. ⁷ Pixinikariko ikara nisákire. Apiananiri kamaimaroretai ikara.

⁸ Pixinikariko Teoso iokanapirena erekari nisápiretakiti kákitimoni. Xesosi Kristo nisápireta íkinimanemoni. Iua ípinaka atoko, iuaíkana auáki itxíkitakaáka. Iua Taviini apika mekaniri. ⁹ Natatsiirauata Teoso iokanapirena erekari nisápiretini xika. Nota omanatakani iaxirikapekano kohétxiá, kokaniri iaxirikinina atoko, nota masikani íkapani. Teoso sákire !iaxiriáka. Iaripireta íkini tópati. ¹⁰ Teoso mereépekari kákiti, imaerekani imaktxakini íkapani. Ininiá nota míteenekari nimisirítiko Teoso iokanapirena ninóa kenakotini íkapani, imaerekanina Kristo Xesosi makatxakini íkapani, átipirika Teosokata auinina íkapani. Iuasaaki peerekari. ¹¹ Nisápiretaiko ia sákiretxi atáo inakari:

Xesosi Kristo ípina ate íkapani, ininiá amanreakaniári mitxi anireékiti, Xesosi nireékitinoka anireekiníá, ininiá aúapika iuakata átipirika.

¹² Amíteenekiniári amisiritiko Xesosi sákire aúuikini xika, auítetxi atxauako iuakata. Akipatiniári iua aimarotini, iua apaka kipatari ate imarotini.

¹³ Atxiíti !akamari akamaenetakiti. Xesosi kamapitikari iua kamaenetakiti, kotxi iua ! iposotari maerekati ikamini.

Teoso Nitiri Atáo Inakari

¹⁴ Ikara nisákire pikamaxinikaretana Xesosi sákire auíákani. Ninóa Apiananiri apisatoo apotiitakasaakia, pótákikanako: “! Hítxitakapeua maxikatíika kákiti sákire xika, kotxi ! erekari,” pitxako ninoamoni. Kákiti kenakotiniári hítxitakaniua, ininiá !nirekaikarina Xesosi sákire auikinina.

¹⁵ Tximótxio, pite Teoso nitiri pitxaua, ininiá iteene papaiaókariko isákire iókatsopatakori Teoso apokaerekatiníi íkapani. Ininiá !pipétauata, kotxi atáo poerekari Teoso sákire iókatsopatakori apanakinimoni. Teoso sákire iókatsopatakori atáo inakarinoka itxa. ¹⁶ Apanakini sákirauatakasaaki, isákiretarina sákiretxi Teoso mapokaerekatakiniti. Ikara atoko !pisákiretape. Kákiti ikara atoko inakani takanapaápotari Teoso. ¹⁷ Ninóa oerekakiti sákiretxiti karótxi arakakari atoko itxa. Ikara atoko inakari amianari iarikaápoti. Ikara amianari iarikini atoko, ninóa oerekakiti iarikaápoti. Itxíkitakari kákiti maerekati ikamini. Imeneo inakari, Pireto inakori pakini oerekakiti sákiretxiti ikara atoko itxa. ¹⁸ Ninóa takanapapekari Teoso sákire atáo inakari. Ninóa sákire: “Teoso ókitikapekana Xesosi sákire auíákani ixinirena auáki inini íkapani. !Ókitikapanina íltona itixi xipokini óti,” itxana. Ikara ninóa sákire xika, apanakini !auikaikari Xesosi sákire.

¹⁹ Aapokotxi tsota paikori inakasaaki, itsota iriko pañanori inakasaaki, iua aapokotxi ! irika. Teoso sákire ikara aátsota atoko. Auapika. !Xipoka. Teoso sákire txari: “Apiananiri imarotari inakitiakori.” Apaka Teoso sákire txari: “Kákiti, ‘Nota Kristo nakiti’ inakari takanapariko imaerekani.”

²⁰ Íkini sereti tiitxi aua aapokotxi mitari áki. Aua apiata karonetakari oro kamakori, pirata kamakori pakini. Apaka aua poiáo íki aamina kamakori, kipatxi kamakori pakini. Apanakini tiitxi áki kaapokori takari nipokori kiiniri íkapani. Apanakini tiitxi áki itakari nipokori ikiniótika kákiti níkini íkapani. ²¹ Ikara tiitxi atoko itxa kákiti. Kákiti takanapiniári imaerekani, tiitxi apiata karonetakari atoko itxa iua. Teoso nirekari iua. Imereéri iua iparíka erekari ikamini íkapani. Ininiá kákiti iua atoko inakani iposope Teoso paríka ikamini íkapani.

²² Átokoripanika pinakasaakia, apanakini nirekiniá maerekati pikamini, pimatekako, maerekati pimamakani íkapani. Pinirekariko atáo inakarinoka pikamini ikiniótika. Pinirekariko Xesosi sákire iteene pauikini. Pinirekariko iteene katiraóki pinini. ! Pinirekapiri neenamtxi. Ikara atoko kákiti kaminiá, erekaxinireri. Iua akiritari Apiananiri imoianatiniri íkapani.

²³ Tximótxio, kákiti txitakakasaakia sákiretxi mílketiti mimaroreti xika, !pikamapiri ikara atoko inakari, kotxi eereka ninóa neenamauata isákirena xika. ²⁴ Apiananiri nitiri atáo inakari ia atoko itxako: “! Itxitari áti. Itiretari ikinimane. Koerekari erekari itxaua. !Katimari omanákarauatini. ²⁵ Ótákitikanako isákire mauikakani momanáketika.” Ikara atoko Apiananiri nitiri ininiáua, atxiíti Teoso oerekana isákire mauikakani atáo inakari imarotinina íkapani, imaerekani itakanapinina íkapani. ²⁶ Ininiá iuaíkana kiíkitepeka itxana. Teoso sikakana ninóa txikatoro Satanasi takakitiá, kotxi mitxi Satanasi maíkana, iua nireékiti ikaminina íkapani.

3

Itixi Xipokini Ôti Apisa

¹ Tximótxio, pimarotariko ia nisäkire. Itixi xipokini ôti apisa pamonôkopianiriko. ² Iuasaaki kâkiti ia atoko inakari: Kapotxinaniri iua. Txineiro turetakani iua. Isâpiretari iposotiire ikinimanemoni. Iuikaua. Imisâkirepiretari Teoso, kâkiti pakini. !Ikamari iri paniâtakiti. Inoro paniâtakiti apaka !ikama. Âti kamakasaakiri erekari iuamoni, litxari: "Erekapitikari pikamakiti nota ikapani," !itxari. !Inirekari Teoso. ³ !Itiretari inirimane. !Ikamari ikamaenetakiti. Imisâkirepiretari âti maxikatiilka. !Iposotari erekari ikamini. Paneenamari. Omanatana erekari kamakani. ⁴ Imâkapiiritari âti. Ikamakiti ikamini apisa, !ixinikari ikamakiti tîkane. Iuaka ixinikapikaua. Isarauatininokara itireta. !Itiretari Teoso. ⁵ Iua sâkire: "Nauikari Teoso sâkire," txamari !auikari Teoso posotiire. !Pauikapiri kâkiti ikara atoko inakari sâkire.

⁶ Kâkiti ikara atoko inakari ianapokota sitomoni oaâpokomoni. Sito ikara atoko inakaro miikiteto. Maerekatinoka okama. Oïto nireêkiti maerekati onirekapika. Iua ianapokotapika oamoni, ininiâ oa auikaâpotari iua oerekakiti sâkiretxiti. ⁷ Sito ikara atoko inakaro nirekari oimariniri oerekaretxi, txamari !oimarinotari oerekaretxi atâo inakari.

⁸ Kitxakapiriilka Moisesi Exito tixine auakasaaki, Xani inakori, Xâpiri inakori pakini ! inirekari auikinirina Moisesi sâpiretakiti. Ninoa atokokana kâkiti itixi xipokini ôti apisa auakani, !inirekari atâo inakari. Ixinikapikarina maerekatinoka. Teoso !inirekari kâkiti ikara atoko inakari, kotxi iua kâkiti !auikari Teoso sâkire. ⁹ Poiâonoka kâkiti auikari ikara atoko inakari sâkire, kotxi imarotari miikiteti iua. Iua atokokana kitxakapiriilka apanakini imarotari Xani, Xâpiri pakini miikiteni ininiua.

Teoso Nakitiakori Misiritiko

¹⁰ Pitepekana, pimarotapitikari noereêkiti sâkiretxiti. Pimarotari nikamakiti ikiniôtika. Pimarotari ninireêkiti nikamini. Pimarotari iteene nauikiniri Xesosi sâkire. Pimarotari nimîteenekiniri nimisiritiko. Pimarotari nitiretiniri âti. Pimarotari !katimari nomanâkarauatini. ¹¹ Pimarotari nimisiritiko. Pimarotari natatsiirauatini. Pimarotari nimîteenekiniri nimisiritiko. Âtxiokia sitatxiti nauakasaaki, Ikônio sitatxiti apaka nauakasaaki, Arisitara sitatxiti apaka nauakasaaki. Iteene natatsiirauata, iuaritika Apiananiri makatxakano ikinika nimisiritiko. ¹² Ari, ikininape kâkiti nirekiniâri Kristo Xesosi nakiti ininiâua, inirekiniâri Teoso nireêkitinoka ikaminiâ, atatsiitariko imisiritiko. ¹³ Iuasaaki maerekati kamakani maerekani, kamisirienererini maerekani, apiaâpotako. Ninoa misirienetari apanakani. Apaka apanakini misirienetana ninoa.

Teoso Sâkire Iôkatsopatakori

¹⁴ Pitepekana Tximótxio, pauikapikariko atâo inakari poerekiko. Ikara pauikapitika, kotxi pimarotana pite oerekakani. Pimarotari atâonoka ninoa oerekakiti. ¹⁵ Pite axapitipanika pinakasaaki, pimarotari Teoso sâkire iôkatsopatakori. Iua sâkire iôkatsopatakori txîkitakaua kimatire anini. Isâkire iôkatsopatakori oerekaua Teoso makatxakiniri amaerekani Kristo Xesosi sâkire aûuikasaaki. ¹⁶ Teoso oerekana isâkire iôkatsopatakani atâonoka iôkatsopatinina, ininiâ ikinika Teoso sâkire iôkatsopatakori atâonoka. Ininiâ apakata Teoso sâkire iôkatsopatakori oerekiniua atâo Teoso sâkire aûuikani !kapani. Oerekaua ikinipoko Teoso sâkire iôkatsopatakori atâo inini. Isâkire iôkatsopatakori ôtâkikaua amaerekani atakanapini. Oerekaua atâo inakarinoka akamini. ¹⁷ Ininiâ kâkiti Teoso nakiti imarotiniâri Teoso sâkire iôkatsopatakori, iposotari ikinika parîkatxi Teoso paniâtakiti ikamini. Erekari ipariika.

4

Tximótxio Ôtâkikiko

¹ Tximótxio, nôtâkikai Teoso apisatoô, Apiananiri Xesosi Kristo apisatoô apaka, kotxi âti ôti Kristo Xesosi kanapiriâkasaaki, isâpiretari ikininape kâkiti sinimoni. Isâkire auîâkani sari Teosomoni ikaikotinina !kapani. Isâkire mauîâkani sari kâkiti misiritikomoni ikaikotinina !kapani. Isâpiretari kâkiti auapanika inakani, kâkiti mitxi ipikani apaka. Xesosi kanapiriâ ikininape auite ininiua !kapani, ininiâkara nipaniâtai ia: ² Pisâpiretariko Teoso sâkire kâkitimoni. Iposope pitxako Teoso sâkire ikiniôtika pisâpiretini kâkitimoni, piîto tapara auakasaaki, pisâpakasaaki apaka. Pôtâkikanako imaerekani itakanapinina, ekerarinoka ikaminina !kapani. Pisikataparaxiniretanako, Teoso sâkire poerekinina. Pisâkirauataksaaki, !katimari pomanâkarauatini. ³ Âti ôti apokako. Iuasaaki kâkiti !inirekaikari oerekaretxi atâo inakari ikenakotinina. Ninoaka nireêkitinoka inirekana, ininiâ apotiîapotana ninoakata koerekarerini ninoa potxitakiti oerekaretxiti oereêkani. ⁴ !Inirekaikarina atâo inakari. Auikarina sâkiretxi atâo minakati.

⁵ Pitepekana, ikinika pikamako piükiteritika. Pimüteenekariko pimisiritiko. Pikamariko piparika Teoso iokanapirena erekari pisäpiretini kãkitimoni ninoa auikiniri ikapani. Teoso nitiri pitxaua, ininiã pikamariko ikinika piparika Teoso paniãtakiti.

⁶ Notapekana, nipinini õti manapi apokaãpotape. Nipinako Teoso ikapani. Pirãtxi Teoso ikapani okiko atokokana, notaka sikauako Teosomoni. Niketo apokapeka itixi nosipikini ikapani. ⁷ Neenamatzki erekari inakari nikamapeka Satanasi ninaiatini. Miteëkari mitekatzki mapotõkire apokini atokokana, nota apokapeka niparika mapotõkire. ! Nitakanapari Xesosi säkire nauikini. ⁸ Uatxa Teoso nãkatari niparika iki nota kãiatakiti napakapini ikapani. Miteëkari merepanika mitekatzki mapotõkire apokakari apakapari imitekini iki. Apakapari saporieãta. Iua atokokana Apiananiri sikanoko niparika iki, kotxi nota nirekari atão inakarinoka nikamini. Apiananiri imarotari atão, ininiã imarotari parikatzki iki apakapakani. Imarotari imisiritiko apakapakani apaka. Niparika iki isikano notamoni uai ikanapiriini õtisaaki. Na notananini apakapari. Isikari parikatzki iki ikininapemoni ikanapiriini nirekakanimoni.

Paoro Iõkatsopatakiti Mapotõkire

⁹ Piposotiniã, katima pitxako notamoni papokini. ¹⁰ Témasi inakori asikapekano, kotxi itiretari Xesosi säkire mauiakani nireëkiti. Isipeka Tesarõnika sitatxitimoni. Kiresëtxi inakori sari Karãsia tixinimoni iparõkauatini ikapani. Txito inakori sari Taomãsia tixinimoni iparõkauatini ikapani. ¹¹ Arõkasinokara moianatano uatxa. Pakiritariko Marko. Piminari iua pitekata. Iua posotari imiparõkatinino, Xesosi säkire nisäpiretakasaaki kãkitimoni. ¹² Txikiko inakori nipaniãta Épeso sitatxitimoni isini. ¹³ Tóatxi sitatxiti nauakasaaki, nitakanapari nimãka äti nimãka nopini nitakakiti. Nitakanapari iua nimãka Kapo inakorikata. Pite uai ikasaaki piminari. Apaka piminari atatsopari ninakiti aãtsopa kamakori. Apia ninirekari piminiri atatsopari ninakiti aamata kamakori.

¹⁴ Arexãtri inakori iteene misiritano. Iua Arexãtri tiitxi kamakari iua. Tiitxi metao kamakorinoka ikama. Iua misiritinino xika, Teoso misiritari iua. ¹⁵ Erepaniko iua. Pamõõkoniri iua, kotxi iua iteene misäkipiretari aõereëkiti säkiretxiti.

¹⁶ Merepitipanika nota apoítakani anikasaakino auütetxiakori apisatoõ, nisäkire ikenakotinina ikapani, na äti nimoianari kaikota notakata iuasaaki. Ikinimane nimoianariakori takanapano, iuaritika na ninirekari Teoso misiritinina itakanapininino xika. ¹⁷ Ninoa takanapano, iuaritika Apiananiri kaikota notakata. Iua sikataparaxiniretano, ininiã niposotari Teoso iokanapirena ikinika nisäpiretinina ninoa Xoteo minakanuia ikenakotinirina ikapani. Ininiã äkiti namaã takote nauakasaaki, Teoso tokapakeëtano nota. ¹⁸ Nimarotapitikari Apiananiri tokapakeëtapanikano nota ikini sereti maerekati auakasaaki. Iua nãkatano. Anikano itixinemoni, iua auütetxi ininiãtaãua. Ikinimane ätipirika säpiretari iua: "Peerekai. Pitenokara erekari." Ameë.

¹⁹ Pisäpiretana Pisisira inakoro, Ákira inakori pakini nixinikamanapitana. Apaka Onesípõro inakori aapoko auakani nixinikamanapita. ²⁰ Erãsito inakori kaikota Korõto sitatxiti. Tópimo inakori nitakanapa Mireto sitatxiã, kotxi iua amianata.

²¹ Tximótxio, piposotiniã, mitãã apisapanika papokako uaimoni. Eoporo inakori, Porotëtxi inakori, Arino inakori, Karãotxia inakori pakini ikini aítariakorikata iokanapireta pitemoni ixinikamanapitiniina.

²² Apiananiri Xesosi Kristo ätipirika kaikota pitekata pãkixinireë. Ikinipoko erekari isika pitemoni. Ameë.

TXITO Paoro Iokanatsopatakiti Txitomoni

¹ Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatano kãkitimoni Teoso mereẽkini auiaãkiti sãkiretxiti nisãpiretini ikapani. Iokanatano kãkitimoni atão inakari imarotiniina ikapani. Atão inakari imarotiko oerekaua Teoso nireẽkiti akamini ikapani. ² Aãuikari aãuapiniika anini Teosokata, kotxi kitxakapirika itixi kamiko apisa Teoso kamaenetari ikara. Ininiã apokapitikako, kotxi atãonoka iua sãkire. ! Iposotari atão minakati isãpiretini. ³ Iketotiniri manapi oerekari isãkire. Isãkire sãpiretakani sãpiretari isãkire. Ininiã Teoso sãkire notamoni isikakiti nisãpiretai, kotxi Teoso amaerekani makatxakakari paniãtano nota nisãpiretiniri isãkire.

⁴ Niokanatsopata pite Txitomoni. Namarite atão inakari atoko pitxaua, kotxi pite aukari Xesosi sãkire nota auikiniri atokotxikana. Aãri Teoso, aãuete Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoniãkai. Ikamaerekaxiniretaina.

Kõtãkikarerini

⁵ Nitakanapai pite Kreta pokomiriãti, kotxi aparika iuaãtaã kona xipokapanika, ininiã ninirekari pite kaminiri ikara parikatxi. Pimereẽna kötãkikarerini ikini sitatxiã Teoso sãkire auiaãkani õtãkikakani tikane. Pimereẽna mitxi nisãpiretakiti iaõka. ⁶ Ia atoko inakari kãkiti pimereẽ kötãkikarerini ikapani: Iua kamari erekari, ininiã maerekati auakasaaki, kona iua xikani maerekati apoka. Atonokara Itanoro aua. Imiakori aukari Xesosi sãkire. Ninoa ! neenamauata. Ikamarina iri paniãtakiti iaõka.

⁷ Teoso sikari iparika kötãkikarerimoni ikamini ikapani, ininiã kötãkikareri kamari erekari-noka. Maerekati auakasaaki, kona iua xikani maerekati apoka. ! Iuikaua. ! Katimari omanãkarauatini. ! Ipoãta. Kona kaneenamari. ! Itiretaro txineiro. ⁸ Kõtãkikareri atão inakari potxitari apakapiniri kãkiti iua aapoko ãki. Ipotxitari kãkiti erekari kamakani. ! Katima omanãkarauatini. Erekarinoka ikama. ! Ikamari maerekati. Erekarini marotakiti ! itakanapari ikamini. ⁹ Kõtãkikareri atão inakari oerekaãkapeka Teoso sãkire. Imarotari Teoso kaminiri isãkire iaõka, ininiã iteene inikatari Teoso sãkire. ! Imamakari Teoso sãkire. Ininiãkara imarotari õtãkikiniri apanakini. Iteene imarotari Teoso sãkire, ininiã imarotari oerekiniri apanakini Teoso sãkire manirekakani, Teoso sãkire auikinina ikapani.

Erepaniko, Atão Minakati Oerekakani

¹⁰ Kaiãopokori kãkiti kona nirekari Teoso nireẽkiti ikaminina. Maxikatitika isãkirauatapika. Kamisirienererini ninoa. Ikara atoko inakani nirekari Teoso takaõtxikare Xoteo minakanua itoã auini. ¹¹ Matxikikareri ninoa iotokakiniri atão minakati isãpiretinina, kotxi kãkiti aapoko ãki auakani naiatakakaua ninoa oerekakiti sãkiretxiti xika. ! Apakata ninoa oerekakiti sãkiretxiti. Iuaritika ninoa oerekari atão minakati, txineiro apakapinina ikapani. ¹² Ninoa atokiriniri kitxakapirika, koerekareri, uai Kreta pokomiriãti auakarini, txari: "Kreta auakani ãtipirika misirienetari kãkiti. Maerekati kamakani itxauana. Kaneenamari itopa auakari atoko ikamana. Iarinouatana. Paixonina," itxa iua.

¹³ Isãpiretakiti atãopitikara. Ininiã pitaparaxinireritika pipinitana ninoa imasãpiretakanirina ikara atão minakati, Xesosi sãkire atão auikinina ikapani. ¹⁴ Ininiã pisãpiretana: "! Himaãkatapiriko Xoteoakori kiomanekarorini sãkire atão minakati. ! Himaãkatapena atão inakari manirekaãkani paniãtakiti." ¹⁵ Kãkiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kãkiti imaerekani auapanika inakari, Teoso sãkire iaõka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ãkixinire, ininiã ãkixinire !õtãkikari iua maerekati imakamakani ikapani. ¹⁶ Ninoa txa: "Ate imarotari Teoso," txamari ikamarina Teoso manirekakini, ininiã !imarotarina Teoso. !Nirekarina Teoso. Arakakani atoko itxana, maerekati ikamakitina xika. !Ikamarina Teoso nireẽkiti, ininiã liposotarina erekari ikaminina.

2

Txito Õtãkikiko

¹ Ininiã poerekariko ikinika atão inakari Teoso oerekiko sãkiretxiti.

Kiki Aneẽkani Õtãkikiko

² Ia atoko põtãkikana kiki aneẽkani: "Hixinikariko hikamakiti tikane hikaminiri apisapanika. Erekarini hikamako apanakini paxitinii ikapani. Kona hikamapiri hiito nireẽkiti. Iteene

himarotariko hãuiãkiti. Iteene hõtiraõkiuatako. Katima omanãkarauataka ! hõt_xape.” Ikara atoko põtãkikana kiki aneëkani.

Sito Aneëkani Ôtãkikiko

³ Ia atoko põtãkikana sito aneëkani: “Hikamariko Teoso pïkakanï kamakiti atoko. Maxikatũka ! hãpoïtapiri äti. Kona iteene hiãtapiri iãriã kapoãro. Erekarinoka hõerekako.” Ikara atoko põtãkikana ninõa. ⁴ Apaka põtãkikana sito aneëkani õtãkikinina ätokoroakoro ia atoko: “Hõtiretanako hõtãniri, hamariteakori pakini. ⁵ Kona hikïpitapiri hiïto paniãtakiti. Erekarinãira hikamako. Hikamariko hïparïka haãpoko äki. Erekarï hikamako apanakini ïkapani. Hõtãniri nireëkiti hikamako, ininiã iuasaaki Teoso säkire mauïãkani imisãkirepiretari Teoso säkire.” Ikara atoko sito aneëkani oerekanako ätokoroakoro.

Ätokoriakori Ôtãkikiko

⁶ Ininiã iua atokokana põtãkikana ätokoriakori ia atoko: “! Apakata hikaminiri hiïto nireëkiti.”

Txito Ôtãkikiko

⁷ Txito, ikini pikamakiti pikamako kãkiti erekari kamiko imarotini ïkapani. Poerekarau-atakasaaki, poerekari kãkiti pitiretiniri atão inakari säkiretxitinoka. Poerekanako Teoso säkirenoka apiãri inini. Poerekarauatakasaaki, poerekariko kãkiti pimakoketakaniri atão minakati pisãkirekata. ⁸ Poerekariko atão inakarinoka, ininiã ! auari papoïtiko, kotxi ! pïkerokari pisãkire. Ikara atoko ininiã, pimokaïkarini pëtauata, kotxi ! iposotarina imisãkirepiretini.

Nitiritxi Amotakoni Ôtãkikiko

⁹ Ia atoko poerekanako nitiritxi amotakoni: “Hikïpitariko hïpatrãote säkire. Hikamariko hïpatrãote apokaerekatakutinoka. Kapakapaenere ! hõt_xape. ¹⁰ ! Hiïtirïkãpiri hïpatrãote tii. Hõerekariko hïpatrãote pisãkire atão inini. Ininiã hïpatrãote nirekari imarotininina Teoso oerekiko, amaerekani makatxakakari oerekiko.”

Ikinipoko Erekarï Teoso Sikakiti

¹¹ Ikinimanemoni Teoso oerekapekari erekari isikakiti kãkiti maerekani imaktxakini. ¹² Teoso sikakiti erekari oereka atakanapiniri Teoso manirekakiniti. Teoso sikakiti erekari oereka amanirekakaniri ïkorapokoriti auakani ïto nireëkiti. Teoso sikakiti erekari oereka atão paniãtakiti atakanapini, atão inakarinoka akamini, Teoso nireëkiti akamini ïkorapokoriti aãuakasaaki. ¹³ ïkorapokoriti aãuakasaaki, aiãtapari poxokonitxi õti Apianãniri aTeosone apokini õti. Iuasaaki Xesosi Kristo, amaerekani makatxakakari, motika atemoni. ¹⁴ Iuaka sikaua Teosomoni ate ïkapani ipïkasaaki. Iuasaaki ïkixitari Teoso, ininiã Teoso makatxakaua ikinika maerekãnitxi sauaki. Ikara atoko ininiã, ikamaerekataua ate. Ininiã itxïkitakaua inakitiakori aniniua, ininiã anirekari erekari akamini.

¹⁵ Auïtëtxi pininiua atoko pïpaniãtariko kãkiti kïpitiniri ikara nisãpiretakiti. Põtãkikana nisãkire makïpitakani. Kona pauiritapiri kãkiti säpiretiniri pisãkire atão minakati inini.

3

Teoso Nireëkiti Kamiko

¹ Txito, ia atoko poerekariko kãkiti: “Hïpaxitariko ïkorapokoriti auïtëtxiakori paniãtakiti, poiãori auïtëtxiakori paniãtakiti apaka. Iposope hõt_xako ikinika erekari hikamini. ² Kona himisãkirepiretapiri apanakini. ! Hineenamauatape. Merepanika hïxinikariko apanakini, eereka hïteka hïxinika. Hõerekariko kãkiti, hïxinireë hinirekiniri erekari hikamini ikini-manemoni.” Ikara atoko poerekana.

³ Teoso aimarotini apisapanika miïkiteni atxaua. Kona akïpitari kãkiti säkire, Teoso säkire apaka. Iuasaaki ate misirienetaãka. Iuasaaki akamari atão nireëkitinoka. Ikini sereti maerekati akama apoxokoniuatini ïkapani. Iuasaaki ikiniõtika axinikari maerekati akamini. !Apakata akamakiti. Kaxikorerini atxaua iuasaaki. Ate omanataãka. Apaka ate omanatari apanakini iuasaaki.

⁴ Ininiã eereka Teoso tiraõki, amaerekani makatxakakari tiraõki, iua amonïkare, apoka atemoni. ⁵ Ateka parïka erekari !imaktxakari amaerekani. Iua amonïkarenokara makatxakari amaerekani. Iuasaaki na atão akama, iuaritika imaktxakari amaerekani, kotxi itiretaua. Iuasaaki iua arokari aãkixinire. Itxïkitakaua ate aponaniini iuaïkana. Iuasaaki Erekarï Matamatakoti kamari ikinika amaneri axinireë. ⁶ Teoso iokanatarï Erekarï Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate ïkapani. ⁷ Iua sikari ikinipoko erekari atemoni, ininiã ikamaerekataua. Ininiã itxïkitakaua Teoso anaakori aniniua, ininiã aãpakapariko ipotetakiti ate ïkapani. Iua atoko ininiã, aiãtapari ätipirika Teosokata aãuini ïkapani. ⁸ Atãopitikara ia nisãpiretakiti.

Ininiã ninirekari ätipirika pisãpiretiniri ikinika nisãpiretakiti Teoso sãkire auiaãkanimoni. Ikara atoko Teoso auiaãkani itaparaxinireritika kamariko erekari apanakini ikapani. Kona maxikatüka ikamarina erekari. Teoso atão ikitxitariko kãkiti. Ikara atoko kãkiti kaminiã, ininiã erekari ikinimane ikapani.

⁹ Kona pimaãkatapiri müikiteti sãkire. !Hítaparakienatakapeua kitxakapirükarini uãka xika. Kona himaãkatapenako kãkiti kiomãtxiakori oerekakiti xika tsoatakani. Ikara sãkiretxiti ! itxikitakai erekari hininiua. !Itxa ikara sãkiretxiti.

¹⁰ Kãkiti oerekiniãri atão minakati Teoso manirekakiniti, põtãkikari iua ipikata. Iposo atoko !pimaãkataikari. ¹¹ Ikara atoko inakari atão ikite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sãpiretakiti Mapotõkire

¹² Niokanitari Atemasi inakori, atxüiti Txíkiko inakori apaka pitemoni. Ninoa apokasaaki, paiamata pisini ikapani, katimari notamoni Nikópori sitatxitiã hãpokini ikapani. Ninirekari ia mitaãti nikaikotini iuaã.

¹³ Pimoianatari Sena inakori, Aporo inakori pakini. Auütetxiakori paniãtakiti imarotakari iua Sena. Pimoianatanako ninoa aiamatini. Iamonitakitina pisikanako. ¹⁴ Aítariakori Xesosi sãkire auiaãkani apaiaõkariko erekari ikaminina, kãkiti minakati mauakiniti imoianatinina ikapani. Makamaretika hinini !apakata.

¹⁵ Notakata auakani xinikapikai pite. Pisãpiretanako ate tiretakani ereë Xesosi sãkire auiaãkani nixinikamanapitana ninoa.

Ikinika erekari Teoso sikai híte hikinika. Ikara atoko niõkatsopata pitemoni. Amëë.

PIREMÕ Paoro Iokanatsopatakiti Piremõmoni

¹ Nota Paoro. Kateia äki naua, Kristo Xesosi säkire nauikini xika. Nota, aĩtari Tximõtxiokata aiokanatsopata pitemoni Piremõmoni. Ate iteene tiretai pite. Atekata parĩkauatakari pitxaua. ² Aiokanapireta Xesosi säkire auĩäkanimoni, paapoko apotiitakanimoni. Aiokanapireta aĩtaro Ápiamoni, Akipo pakinimoni. Iua Akipo Xesosi sotatone itxaua, ate Xesosi sotatone atokotxikana.

³ Aĩri Teoso, Xesosi Kristo Apiananiri pakini sikai ikinipoko erekari. Ikamaerekaxiniretaina.

Piremõ Tiraõkiuatini Pirena

⁴ Nitari Piremõ, Teoso nimisäkiretakasaaki, ätipirika nisäkirauata pite ikapani. Nisäpiretari Teoso ereka inini, kotxi iua kamaerekatai pite. ⁵ Ikara atoko itxa nisäkire, kotxi nikenakopiretari iteene pauikiniiri Apiananiri Xesosi säkire. Nikenakopiretari ikinimane käkiti Teoso nakitiakori pitiretini. ⁶ Nimisäkiretari Teoso pite ikapani, kotxi ninirekari pisäpiretiniri pauĩäkiti säkiretxiti ikinĩõtika apanakinimoni, ininiäkara pimarotari ikini sereti erekari Teoso siäkiti Kristo nakitiakorimoni. ⁷ Ate poxokoniata, kotxi pite turetana käkiti Teoso nakitiakori. Pitiraõki iteene sikatapaxiniretaua ate. Pite aĩtari kamapoxokonitana Teoso nakitiakori äkixinire.

Paoro Amanaaõkiti Säkiiretxiti

⁸ Kristo sikaposotiuretano, ininiä nitapararitika niposotapitikari nipaniätini atõo inakari pikamini. ⁹ Iuaritika nitapararitika na nipaniätai atõo inakari pikamini. Nõtäkikai Kristo tiraõkiä pikaminiri atõo inakari. Nota Paoro kiomätxipekano. Kateia äki nauanäta, Kristo Xesosi säkire nauikini xika. Notakara õtäkikai pite atõo pikamini. ¹⁰ Nota amanaäi pinitiri Onésimo inakori piamonikini ikapani. Namarite atoko inakari iua, kotxi iua kipitari nisäkire uai kateia äki nauakasaaki. Uatxa iua auikari Xesosi säkire. ¹¹ Nimarotari iuäka poparĩkari uäka itxaua. Mĩtxi liparĩkauata, pitekata auakasaaki. Paiairiniri. Uatxa poparĩkari itxapekaua iuäka atokokana. Uatxa iparĩkauatpitikako pite ikapani, nota ikapani iparĩkauatini atokokana.

¹² Niokanatariko Onésimo, ikanapiriini pitemoni. Ininiä papakapariko iua. Nitiretari iua nota niõto nitiretini atokokana. ¹³ Ninirekamari notakata uai ikaikotini, nota imoianatini ikapani, kotxi pite kona posotari pimoianatinino uai kateia äki nauakasaaki, kotxi pite auini maioakari. Nota uai aua Teoso iokanapirena erekari nisäpiretini xika. ¹⁴ Ninirekamari Onésimo uai, txamari !ninirekari nikaminiri pite mauritakiniti. !Ninirekari nitapararitika nipaniätini pxairitiniri Onésimo notakata ikaikotini. Pite nirekiniäri, imoianatano.

¹⁵ Akokaxiti Onésimo miteka. Mapakanani itakanapai. Atxiĩti Teoso auiritari poiäoka itakanapini, ätipirika pitekata iuaikana ikaikotini ikapani. ¹⁶ Iua pinitiri piomotakiti itxapanikaua. Uatxa apiaerekata iua. Pitari pitiretakiti itxapekaua, kotxi iua auikari Kristo säkire. Iteene nota turetari iua. Pite apia tiretariko iua, kotxi iua pinitiri itxaua. Apaka iua pitari itxaua, kotxi Apiananiri nakiti hĩtxaua.

¹⁷ Nota pimoianari nininiäua, nota papakapini atokokana pitxariko papakapiniri iua. ¹⁸ Akokaxiti maerekati ikaminiä, itiriuatiniä, pisäpiretano. Nota ikĩtxitaiko. ¹⁹ Nota Paoro, uatxa niuakoä niõkatsopatari ia säkiretxiti. Notakarako ikĩtxitai pite. Pite imarotari pite xinire auäki inini, kotxi notara akokaxiti nisäpiretai Xesosi säkire pauikini ikapani. Ininiä atxiĩti erekape pite ikĩtxitinino nota? ²⁰ Ininiäkara nitari, pikaminano ninirekakiti, kotxi Apiananiri nakitiakori atxaua. Pikamapoxokonitariko näkixinire, kotxi Kristo nakitiakori atxaua. ²¹ Niõkatsopatari pite ikapani, kotxi nimarotapitikari pikaminiri namanaäkiti. Ari, nimarotari apiata pikaminano.

²² Apikomoni nitxai. Poeretari ereë nimakiniätaä ikapani. Hĩte misäkiretapekari Teoso kateia nitakanapini ikapani, ininiä nimarotari Teoso auiritano iuaikana nikanapiriini hĩtemoni.

Itakapiretanapini Pirena

²³ Epäpara inakori notakata kateia äki aua, kotxi iua parĩkauata Kristo Xesosi ikapani. Iua xinikamanapitai hĩte. ²⁴ Markoma, Arisitakoma, Témasma, Arókasima pakini notakata parĩkauatakani, ninõa apaka xinikamanapitai hĩte.

²⁵ Aäũte Xesosi Kristo sikari ikinipoko erekari häkixiniremoni. Ameë.

EPIROO

Teoso Ākiri Apiatini Pirena

¹ Teoso kitxakapirīka sǎpīretari isǎkire kaiōkatakani, isǎkire sǎpīretakanimoni. Ininiā ninoa sǎpīretana aātokiriakorini Teoso sǎpīretakiti. Kiriāpa Teoso misǎkiretana ninoa? Kaiōpokoriā imisǎkiretana ninoa: Itaponeēna, ixinireēna, isǎkire iōkatsopatakoriā, initiri itixine auakari sǎkireē, txaāpota imisǎkiretinina ninoa.

² Uatxa ĩkorasaaki, Teoso misǎkiretaua iua ākiri sǎkireē. Teoso mereēri iua ākiri ikinipoko apakapini ĩkapani. Teoso ākiri kamarari ikinipoko. ĩkamarari itixi, ikinipoko iaxiti apiko nopinixiti auakari apaka. ³ Iua iotximere Teoso iotximeretxikana. Teosotxikana iua. Kaposotiireri iua, kotxi isǎkireēnoka imaīkari imakinika auini ĩkapani. Iuanokara makatxakari amaerekani. Amaerekani imaktxakasaaki, iuaasaaki iitopāka ikinimane auīte Teoso kikomoni itixineē.

Teoso Ākiri Apiata, Initiriakori Poiāoka

⁴ Ininiā Teoso ākiri iteene apiaerekata. Apiananiri iua. Teoso nitiriakori iaxitikini poiāorini. Teoso mereēri iuāka apiari. Ninoa uāka poiāorini itxauana.

⁵ Teoso lisǎpīretari initiriakori ia isǎkire kitxakapirīkari: Pite nota ākiri pitxaua. Uatxa pite iri nitxaua nota, litxa initiriakorimoni.

Apaka Teoso !isǎpīretana ninoa ia isǎkire kitxakapirīkari: Nota iua iri nitxauako. Iua nota amarite itxauako, litxa initiriakori itixine auakanimoni.

⁶ Ātipekana. Teoso mīkasaakiri iua ākiri imatonōkari ĩkorapokoritimoni, iponaniini ĩkapani, iuaasaaki Teoso txari initiriakori: Ninitiriakori, hīkapotoreēkauako iua apisatoō. Hīteosonetariko iua, itxa. ĩkara atoko Teoso paniātari initiriakori.

⁷ Teoso sǎkire iōkatsopatakori, initiriakori pirena txari: Itxīkitakana initiriakori matamatakoni ininiuana, ĩtima atoko ininiuana. Xamina tirinakari atoko itxauana ninoa, kotxi kaposotiirerini ninoa, itxa. ⁸ Iua amaritemoni Teoso txari: Teoso pitxaua. !ixipoka auītetxi pininiāua. Ātipirika pite atāo mīkiikari pite auītetakani.

⁹ Pite tīretari atāo inakari. Pomanatari maerekati. ĩkara atoko ininiā, nota piTeosone mereēi pite apiari pininiua ĩkapani, pimoianariakori poiāorini ininiuana ĩkapani, kotxi apiata nikamapoxokonitai pite. Iitxiā nimereēkiti nopini nitakini atokokana, nitakari poxokonitxi pite nopini. Nimereēi pite auītetxi pininiāua.

ĩkara atoko itxa Teoso kitxakapirīka. ¹⁰ Iuaīkana Teoso sǎkire iōkatsopatakori txari: Apiananiri, merepitipanika pite kamarari itixi. Apaka pikamarari iaxiti piuakoā.

¹¹ ĩkorapokoriti, iaxiti pakini xipokapitikako. Iuaritika pite auapanika. Mākatxi kitxakariāpotakari atoko itxa ĩkinika.

¹² Mākatxi atoko piapirikariko iaxiti, itixi pakini. Ininiā ipinimoni itxako. Iuaritika pite mitxi atoko pitxapikako. !Pixipoka.

Itxa Teoso sǎkire.

¹³ Teoso txari imi:

Nota kikomoni piitopākiniritika nixipokariko pimokaikariakori. Nikamariko ninoa pikiti pitakiniātaā atoko ininiua.

ĩkara atoko !itxari initiriakori iaxitikini.

¹⁴ Ininiā kipa Teoso nitiriakori iaxitikini? Ninoa erekari matamatakoni. Iparīkauatana Teoso ĩkapani. Teoso iokanatana ninoa imoianatinirina kākiti iua sǎkire auīākani, kotxi Teoso makatxakari ninoa kākiti maerekani.

2

Erepaniko

¹ Ininiā iteene mamixinikari ikinika atāo sǎkiretxiti mitxi akenakotakiti. Amakamakaniāri ĩkara atoko, kanaua tiokaāpotakari atoko atxaua. Ininiā iuaasaaki !aimarotaikari atāo. Maxinikari atāo inakari. ² Kitxakapirīka Teoso nitiriakori iaxitikini sǎpīretari atāo inakari ate apiko atokiriakorimoni. Kākiti makamakaniāri ninoa paniātakiti, ininiā ninoa kākiti apakapari Teoso misirikare. Atāo ninoa apakapiniri imisiritikona. ³ Ininiā uatxa amitekini !auari, amanirekakaniāri amaerekani makatxakiko. Peerekari Teoso makatxakiniri kākiti maerekani. Merepitipanika Apiananiri sǎpīretari ĩkara maerekanitxi

makatzakiko. Iua sākire kenakotakani apaka sãpiretaua ate iua sãpiretakiti atokotxikana. ⁴ Teoso apaka oerekaua ninoa sākire atão inini, kotxi oerekari itakaõtxikare. Ikamari kãkiti mimarotakiniti. Ikamari ikini sereti posotiiiretxi. Erekari Matamatakoti siãkiti isika inirekakinimoni. Kãkiti isika inirekaka iaõka. Ikara atoko Teoso oerekaua ninoa sākire atão inini.

Xesosi Kãkiti Atoko Itxa

⁵ Teoso litxĩkitakana initiriakori iaxitikini itixi amaneriã auakani auĩteakori ininiuana. Iua itixi amaneri ikari asãpiretai hĩte. ⁶ Kitxakapirĩka Teoso sãkire iõkatsopatakori Xikari oitoãtaã txari:

Kipa kãkiti? Kinirepa pite xinikana ninoa? Ate minakati. Kinirepa aĩtari iaxitikiri maãkatatari kãkiti?

⁷ Mapakanani pikamari kãkiti itari iaxitikiri poiãori ininiãua. Iuasaaki pinitiriakori iaxitikini apiatakani txaua. Eereka pitxĩkitakari iua auĩtetxi ininiua. Pitxĩkitakari iua kaiotximereri ininiua. Pitxĩkitakari ikinimane paxitiniri iua. Pitxĩkitakari iua ikinipoko auĩte ininiua.

⁸ Pitxĩkitakari ikinimane kaminiri iua paniãtakiti. !Auari ãtika iua paniãtakiti makamakati. Ikara atoko Teoso sãpiretaua ate itxĩkitakiniri ikinipoko auĩtetiniri iua. !Auari ãtika iua mauĩtetakati. Txamari kona ate atamatapanikari iua ikinipoko auĩte ininiua. ⁹ Iuapitikara aãtamatakiti Xesosi. Mapakananinoka Teoso txĩkitakari iua poiãori ininiua. Iuasaaki Teoso nitiriakori iaxitikini apiata. Teoso txĩkitakari iua poiãori ininiua, kotxi iuasaaki Xesosi atasiirauata. Iuasaaki ipina. Uatxa Teoso txĩkitakari iua auĩtetxi ininiua. Itxĩkitakari iua kaiotximereri ininiua. Itxĩkitakari ikinimane paxitiniri iua. Teoso kamari ikara atoko inakari, kotxi Xesosi ipina kãkiti mapinakanani ikapani. Iuasaaki Teoso oerekari ikinipoko erekari isikini kãkitimoni.

¹⁰ Ikinika Teoso sãkiti. Ikinika iua kamakiti. Apakata iua txĩkitakiniri kãkiti maerekani makatzakakari atasiirauatini, kotxi iuasaaki iposope kãkiti maerekani makatzakiko, kotxi iuasaaki Xesosi kamari ikinipoko iri paniãtakiti. Ininiãkara Teoso anikari iua anaakori iotximere auiniãtaã. Kaiãori ninoa. ¹¹ Kãkiti kamaerekatakari iritxikana iua kamaerekatakini iri. Ikara atoko ininiã, Xesosi !ipẽtatari iua itariakori akiritiniua ate. ¹² Itxari Teosomoni:

Nisãpiretariko piuãka nitariakorimoni. Pitemoni apotiitakanuia sauaki nixikaretari ereka pinini.

¹³ Iuaĩkana kitxakapirĩka Teoso sãkire iõkatsopatakori txari:

Nauikariko Teoso sãkire.

Iuaĩkana Xesosi txari Teoso:

Uai nota aua pamariteakorikata. Pite sikana ninoa notamoni.

itxa.

¹⁴ Kaĩtori Teoso anaakori. Ninoa aua ixini, iarẽka pakini. Ininiã kaĩtopekari Xesosi ninoa atokokana. Ininiã ipikasaaki ixipokari ipikitxi posotiire auakiti. Satanasi inakori iua.

¹⁵ Ikara atoko inakasaaki, isikakari kãkiti ipikitxi pikakani. Mitxi ninoa iaxirikakoni atoko itxana. ¹⁶ Aimarotari, iuasaaki limoianatana initiriakori iaxitikini. Iuasaaki imoianatana Aprão apika mekaniriakori. ¹⁷ Ikara atoko ininiã, Xesosi txĩkitakaãka itariakori atokokana ininiua, ininiã iposotari sasetotxi auĩte apiatakari ininiua kãkiti ikapani. Iparĩkauatakasaaki Teoso ikapani, ikamari ikinipoko ikamaenetakiti. Maerekati kamakani kãkiti, iuaritika iamoniãkari kãkiti. Kãkiti itxapekaua Xesosi, ininiã iua ipina kãkiti maerekani imakatzakini ikapani, iuaĩkana kãkiti imikanapiriini Teosomoni ikapani. ¹⁸ Ikorapokoriti Xesosi auakasaaki, imarotari Satanasi atamakaerekatiniri iua. Ininiã Satanasi atamakaerekatakasaakina kãkiti, iua posotari isikataparatinina ninoa.

3

Xesosi Apiatakari, Moisesi Poiãori

¹ Ininiã nitariakori, Teoso mereẽkini, hĩte akiritaãka Teoso tixine hãuini ikapani. Iteene hĩxinikariko Kristo Xesosi, kotxi iua Teoso iokanatakiti itxaua. Apaka iua sasetotxi auĩte apiatakari itxaua. Iuara asãpiretari apanakini. ² Moisesi kamari ikinika Teoso paniãtakiti inirimane apisatoõ, Teoso aapoko aamata kamakari ikamakasaaki. Iua atokokana Xesosi kamari ikinika iua mereẽkari paniãtakiti. ³ Apiaerekata Xesosi, ininiã iua apakapari apiata ipaxitiko, Moisesi poião, kotxi aapokotxi kamakari apakapari apiata ipaxitiko. Poião aapokotxi paxitiko aua. Iua atokokana, Xesosi aapokotxi kamakari atoko itxaua. Moisesi aapokotxi atoko itxaua. ⁴ Ikinika kãkiti aapokona kamakani auapitika, iuaritika Teoso ikinipoko kamakari itxaua. ⁵ Moisesi Teoso nitiri itxaua. Iua ãtipirika kamari ikinipoko

Teoso nirekakiti inirimane apisatoõ. Ikara erekari ikamakiti oerekari Teoso sãkire iua sãpiretakiti atão inini.

⁶ Kristo Teoso ãkiri itxaua. Iua ãtipirika kamari ikinipoko Teoso paniãtakiti Teoso aapoko inikadini. Teoso aapoko atoko atxaua ate, iteene aũukiniãri iua sãkire, apoxokoniritika ãtipirika aiãtapiniãri Xesosi kanapiriini õti.

Erepaniko, !Hítakanapapiri Hãuikakiti

⁷ Ininiã Erekar Matamatakoti txari:

Uatxa õti hikenakotakasaakiri nisãkire,

⁸ kona hĩkamapiriko hĩxinire paikori inini hãtokiriakorini atoko hinini. Æparaã makipakaniãtaã auakasaakina, iuaã ninõa !auikari nota sãkire. !Ikamarina nĩpaniãtakiti. Iuasaaki ninõa ataerekatapikano nota.

⁹ Koarãtakanani, ikiniõtika hĩte apika atokiriakori ataerekatapikano nota. Ninõa atamatari niposotiire. Txamari ikiniõtika ninõa ataerekatano nota. !Auikarina nisãkire.

¹⁰ Ikara xika nomanatana ninõa. Iuasaaki nitxa: “Ãtipirika ninõa sapika apanakini sãkire tikini. !Imaratarina nixinikakiti, nikamakiti pakini.”

¹¹ Nomanatakasaakina ninõa imaerekanina xika, iuasaaki nitxako: “Atão nisãpiretana ninõa. Ninõa maĩroãpekanii karako nikamakiti tomatikoãtaã,”

itxa Erekar Matamatakoti.

¹² Ininiã nitariakori, erepaniko. Atxiiti ãtikaka hĩte aua hĩxinire maerekati mauikareti. Ikara atoko inakasaaki, hĩtakanapapekari Teoso ãtipirika auãki inakari, maerekati tikini hĩsini ikapani.

¹³ Ininiã ikiniõtika hĩkamataparaxiniretakauako. Uatxapanika inakasaaki hõtãkikauako. Ininiã maerekanitxi kona misirienetai. !Ikamari kaikoxinire hinini. ¹⁴ Aãuini mapotõkire manapi iteene aũukiniãri Kristo sãkire merepitipanika aũukiniri atokotxikana, atão iuakata parĩkauatakani atxaua. ¹⁵ Uatxa nisãpiretai kitxakapirĩka iõkatsopatakiti:

Uatxa ia õti hikenakotakasaakiri iua sãkire, kona hĩkamapiriko hĩxinire paikori inini, hãtokiriakorini atoko hinini, Æparaã makipakaniãtaã auakasaakina. Ninõa !auikari nota sãkire.

¹⁶ Ninõa kenakotari Teoso sãkire, txamari !inirekarina ikaminirina isãkire iaõka. Kipa ninõa? Exito tixini Moisesi makatzakakinira ninõa. ¹⁷ Kikãkititipa kamari Teoso natiniua koarãtakanani? Ninõa maerekati kamakani. Ikara xika ninõa ipĩpeka Æparaã makipakaniãtaã. ¹⁸ Kirimonipa Teoso txari ia? “Atão nisãpiretai hĩte. Kona hĩmaĩroãpekanii karako nikamakiti tomatikoãtaã.” Teoso sãpiretari ikara iua sãkire mauikakanimoni. ¹⁹ Ininiã aimarotari, ninõa !iroã iuaã, Teoso sãkire imauikakanina xika.

4

Tomatikoãtaã Aua Teoso Nakitiakori Ìkapani

¹ Auapitika Teoso kamaenetakiti kãkiti tomatiniãtaã Teoso kamakiti aĩroini tĩkane, ininiã erepaniko. Atão inakari hĩkamako iuaã hĩiroini ikapani. ² Teoso iokanapirena erekari sãpiretaãka atemoni, kitxakapirĩka Moisesi auakasaaki auakanimoni apaka. Txamari maxikatĩka ninõa kenakotari Teoso sãkire, kotxi ninõa !auikari ikenakotakitina. ³ Ate, Teoso sãkire auĩãkanua, Ìroã ikara Teoso kamakiti tomatikoãtaã. Ininiã Teoso sãpiretakiti iaõka auapeka. Ia atoko Teoso txari:

Nomanatakasaakina ninõa imaerekanina xika, iuasaaki nitxako: “Atão nisãpiretana ninõa. Ninõa maĩroãpekanii karako nikamakiti tomatikoãtaã,”

itxa Teoso. Ikara atoko itxama, iuaritika ikara tomatikoãtaã iposope iparĩka ixipokasaaki, itixi ikamakasaaki. Ikara atoko ikama ate ikapani. ⁴ Teoso sãkire iõkatsopatakori sãpiretari itomatini õti pirena. Itxari:

Iparĩkauata seisi õti, ininiã eereka apikomoni ãti õti inakasaaki itomata. Iuasaaki itakanapari ikinika iparĩka,

itxa Teoso sãkire iõkatsopatakori. ⁵ Teoso sãkire iõkatsopatakori txari:

Ninõa maĩroãpekanii karako nikamakiti tomatikoãtaã.

⁶ Iuaritika apanakini Ìroãpanikako iua tomatikoãtaã. Txama apanakini kitxakapirĩka auakani !Ìroã. Ninõa merepitipanika sãpiretaãka Teoso iokanapirena erekari, txamari !Ìroãna, kotxi !Ikamarina Teoso paniãtakiti. ⁷ Ininiã Teoso kamari iketo õti apanakini iuaãtaã apokini ikapani. Iuasaaki Teoso akiritari iketo õti “uatxa.” Ikara atoko Teoso misãkiretari Tavii:

Uatxa õti hikenakotiniãri nisãkire, ininiã kona hĩkamapiriko hĩxinire paikori inini.

⁸ Aãtokiri kitxakapirĩka auakari Xosoe inakori, iuara anikari kãkiti itixi Teoso sikaenetakitimoni. Txamari !Ìroãna atão inakari tomatikoãtaã Teoso sikakiti, kotxi eereka Teoso sãpiretari ãti õti tomatikoãtaã Ìroiko õti. ⁹ Ikara atoko ininiã, auapanikako Teoso kamakiti

tomatikoãtaã inaktiakori ikapani. ¹⁰ Ininiã kãkiti Iroãkasaaki Teoso kamakiti tomatikoãtaã, iotokakari iparika, Teoso iparika iotokakini atokokana. ¹¹ Ininiã nitariakori makamariko ikinika atão Inakari iua tomatikoãtaã aïroini ikapani. Erepaniko, kotxi apanakini Iïroã, Teoso sãkire imaukakanina xika. Ininiã !hikamapiri ninoo kamakiti atokokana.

¹² Teoso sãkire kaposotiireri. Isãkire auãki itxapika, kotxi Teoso ätipirika auãki inakari säpiretakiti. Saasara ipi auanaro auakaro, iteene kauanaro, ininiã iposotari ikisauakiniri inirekiniãtaã. Iposotari ikisauakiniri kãkiti pakaki, iua äki auakari axipe imaktxakini ikapani. Apiata Teoso sãkire, kotxi Teoso sãkire posotari apokini kãkiti iikite kãkiti xinirekata apotiitiniãtaãua. Teoso sãkire imarotari ikinika axinikakiti, anireëkiti pakini aãkixinireë. Teoso sãkire atamakaerekatari ikara aãkixinireë auakari. ¹³ Teoso atamatari ikinipoko akamakiti, ininiã !aui iomaãtakori. Ikinipoko Iipataãka. Aãuïte Teoso apisatoõ ikinipoko kasarori.

Xesosi Sasetotxi Auïte Apiatakari

¹⁴ Ininiã atemoni auari sasetotxi auïte apiatakari, Xesosi, Teoso äkiri. Apiananiri iua. Iua sari iaxiti Teoso auiniãtaã. Ininiã iteene maãuikari iua sãkire. ¹⁵ Ate nakiti sasetotxi auïte apiatakari imarotari ate äkixinire iõkapetini. Imarotari ate maposotakiniti. Imarotari ate tsi. Ikara atoko inakari imarota, kotxi Satanasi iteene atamakaerekatari iua, ate atamakaerekatiko atoko. Iuaritika maerekati ! ikama. ¹⁶ Ininiã ataparaxinireritika masa Teosomoni. Aãuïte topãkiniãtaã masa ikinipoko erekari isikakiti aãpakapini ikapani, iamoni kiniaua ikapani. Isikaua ikinipoko erekari. Isikataparataua amaxikiko auakasaaki.

5

Xesosi Sasetotxi Auïte Apiatakari Mereïko

¹ Ikinimane sasetotxi auïte apiatakari mereeëka kãkiti sauaki. Iua misãkiretari Teoso kãkiti ikapani. Isikari kãkiti sikakiti iuamoni. Kitxakapirika iua okari pirãtxi Teoso apisatoõ kãkiti maerekani iikixitini ikapani. ² Iamonikari mimaroreni, Teoso takanapakani pakini, kotxi imarotari kãkiti äkixinire iõkapetini, kotxi iua apaka kãkiti itxaua. ³ Sasetotxi apaka maerekati kamakari itxaua. Ikara xika merepanika iua okari pirãtxi Teoso apisatoõ iua maerekani iikixitini ikapani. Eereka iua okari pirãtxi kãkiti maerekani iikixitini ikapani.

⁴ Kãkiti paxitari sasetotxi, iuaritika ninoo kona mereëri sasetotxi parika. Teosonoka mereëri kãkiti sasetotxi ininiua ikapani, sasetotxi Arão inakori Teoso mereini atokokana kitxakapirika.

⁵ Xesosi iua !ikamaua sasetotxi auïte apiatakari ininiua. Kona itxari: "Apakatapitika sasetotxi nininiua." Iuaritika Teoso txari iua:

Pite namarite. Uatxa noerekariko kãkiti nota pite iri nininiua, itxa Teoso.

⁶ Iuaikana Teoso txari:

Ätipirika sasetotxi pitxaua. Sasetotxi Meokisiteki inakori atoko inakari pitxaua, itxa Teoso Xesosimoni. ⁷ Xesosi ikorapokoriti auakasaaki, iua iteene misãkiretari iri. Ipinini apisapanika iteene amanaãri iri imapinakanini ikapani. Imisãkiretakasaakiri iua, iteene itxiita. Irinokara posotari itxikitakiniri imapinakanini. Iri kenakotari isãkire, kotxi Xesosi txari: "Pinirekakitinokara ninireka." ⁸ Xesosi Teoso äkiri, iuaritika atatsiirauatakasaaki, imaroãpotari Teoso nireëkiti iaõka ikamini. ⁹ Iua kamari ikinipoko iri paniãtakiti. Ikara atoko ininiã, kãkiti maerekani makatxakakari itxapekaua. Imakatxakari ipaniãtakiti kamakani maerekani, ininiã ninoo auapininiika itxanako Teosokata. ¹⁰ Teoso mereëri iua sasetotxi auïte apiatakari ininiua, Meokisiteki inakori sasetotxi ininiua atokokana.

Erepaniko, Atão Sãkiretxiti !Hitakanapape

¹¹ Aua apikomoni kaiãopokori ikara atoko inakari asãpiretini hïte, txamari pamimari ikara asãpiretini hïte, kotxi !katimari himarotiniri Teoso sãkire. ¹² Akokaxiti hïte auikari Xesosi sãkire, ininiã uatxa apiaerekata Xesosi sãkire oereëkani hininiua. Txamari hïte nirekari äti oerekini iuaikana merepitipanika atão inakari Teoso sãkire iõkatsopatakoriã auakari. Hïte eenetxi xapitikiri atoko. Hinirekari Teoso sãkire tinitxiã atoko inakari. Teoso sãkire nipokori atoko inakari !hïposotapanika hãpakapini. ¹³ Teoso sãkire imarotakari tinitxiãnoka nirekakarini atoko inakari, iteene !imarotapanikari Teoso sãkire. !Imarotari atão inakarinoka ikamini, kotxi iua eenetxi xapitiri atoko inakari. ¹⁴ Kãkiti aneëkari nikari xinixi. Kataparaxinireri nirekari Teoso sãkire, xinixi aneëkari nirekini atokokana. Kãkiti ikiniõtika kenakotiniãri Teoso sãkire, ininiã imarotari atão inakari. Imarotari atão minakati apaka.

6

Maãpaiaðkarauata Apikomoni

¹ ! Apakata ikiniðitika merepitiþanika Kristo sãkire oerekakorinoka axinikini, kotxi aimarotapekari. Aimarotapekari atakanapiniri maerekati akamakiti. Aimarotapekari ateka kamakiti txikitakaua apinini. Aimarotapekari Teoso sãkire aãuikini. ² Aimarotapekari apatxisarauatini. Aimarotapekari atakauakotinuaa ãti nopini. Aimarotapekari ipikani iuaikana ðkitikiniua. Aimarotapekari Teoso misiritinina maerekati kamakani ãtipirika. ! Apakata ikara ãtipirika aðekinii. ³ Apikomoni auapitika, ininiã maãpaiaðkarauata apikomoni. Teoso auiritiniãua, apikomoni maxinika.

⁴ Kãkiti takanapiniãri Teoso sãkire auikini, lapakataika ikanapiriinina Teosomoni. Mitxi ninoa imarotari Teoso sãkire atão inakari. Mitxi ninoa imarotari erekari iaxitiki. Mitxi imarotari Erekari Matamatakoti parika ãkixinireãna. ⁵ Mitxi imarotarina Teoso sãkire ereka inini. Mitxi imarotarina Teoso posotiire itixi amaneri apokasaaki. ⁶ Ikara atoko ninoa imarota, iuaritika ninoa takanapari Teoso. Ininiãkara ! apakata iuaikana ikanapiriinina Teosomoni, kotxi iuaikana imisiritarina Teoso ãkiri aamina ipiriãmitakari nopini imisiritiko atoko. Iuasaaki ninoa txikitakari kãkiti iuaikana napetiniri Xesosi.

Kikio Atoko Anini Pirena

⁷ Teoso takari erekari itixi ia atoko inakari nopini: Åparaã ikipa kaiãokatanu iuaã, ininiã iminua kienatxi katakereri nirekakiti. ⁸ Txamari itixi inako, aanaia pakini auiniã, ! itxa. Ikara xika atxiiti imisiritaãka. Ininiã arikaãkako. Ikara atoko inapeëkanako kãkiti. Maerekati aniniãua, ininiã pamonðkoniri atemoni. Ikara atoko ininiã, imapotðkire ðti Teoso linirekaikaua ate. Ixipokaua aanaia xipokiko atoko.

⁹ Nitariakori, ikara atoko asãpiretai hite, iuaritika ate imarotari kona hite ikara atokoni. Aimarotari hãpakapiniri erekari, kotxi Teoso makatxakapekari himaerekani. ¹⁰ Teoso kamari ikinika atão. Iua !imaxiniãkaretari hãparika iua ikapani. Hitiãraðki iuamoni !imaxiniãkareta, kotxi himoianatapekari iua nakitiakori. Uatxa himoianatapanikana ninoa. ¹¹ Ate nirekari ikinika hikaminiritika Teoso ikapani imapotðkire ðti manapi apokini. Ikara atoko ininiã, himarotari hiãtapakiti apokapitikako hitemoni. ¹² Kona apakata hãrinauati. Apanakini Teoso sãkire auiaikani kamakiti atoko hikamako, kotxi ninoa iãtapari Teoso sikaenetakiti apakapinina.

Teoso Sikapitikariko Isikaenetakiti

¹³ Kitxakapirika Teoso sãpiretari isikaenetakiti Apraãomoni. Apiatakari Teosonokara aua. Åti apiatakari iua atoko inakari !auari, ininiã iuaka uãkaã isãpiretari isikaenetakiti isikini Apraãomoni. ¹⁴ Ininiã Teoso txari Apraão: "Nitakapitikari erekari pitemoni. Nisikaiko itomaneri papika mekaniriakori," itxa. ¹⁵ Ininiã Apraão kenakotakasaakiri ikara, iteene iãtapari Teoso sãpiretakiti apokini. Eereka Apraão apakapari Teoso sikaenetakiti.

¹⁶ Kãkiti sãpiretakasaakiri isikaenetakiti ãti kãkitimoni, iuasaaki ninoa apoka ãti apiatakari apisatoð isikaenetakiti isãpiretinina ikapani. Ininiã iuasaaki kãkiti imarotapitikari isãkire atão inini. Ikara atoko ininiã, aãpirena ! auari isikaenetakiti xika. ¹⁷ Teoso nirekari inakitiakori iteene imarotiniri imatakanapaniniri isikaenetakiti isikinina ninoa. Ininiã isikaenetakiti isãpiretakasaaki, isikari isãkire iuaka uãkaã. ¹⁸ Ininiã ipi aua: Teoso, Teoso sãkire pakini. Teoso mitxi atoko itxapikako. Teoso sãkire mitxi atoko itxapikako. Ininiã Teoso liposotari atão minakati isãpiretini. Amiteka iuamoni, iua nikatinua ikapani, aiãtapakiti aãpakapini ikapani. Ininiã asikataparaxiniretaãka.

¹⁹ Ikara atoko inakasaaki, aposotari iteene aãuikiniri Teoso sãkire. Aiãtapari ikinipoko iua sãkire iaðka apokini. Teoso sãkire aãuikini, minari maporo maikakari atoko itxa. Maporo maikakari !auiritari maporo tiokini. Teoso sãkire aãuikini maikari axinire. Isikataparitari axinire. !Auiritaua atiokini maerekanitximoni. Teoso sãkire aãuikini anikaua Teosonari Auini Pakitaãtaã, mãkatxi mata arðkakarini apikomoni auakari pakitamoni. Kitxakapirika sasetotxiakori auite apiatakarinoka iroã iuaã. ²⁰ Iuaã Xesosi iroã ate iroini apisa. Iuaã imisãkiretari iri ate ikapani. Sasetotxiakori auite apiatakari itxapekua ãtipirika ate ikapani. Meokisiteki inakori sasetotxi ininiua atoko itxa Xesosi.

7

Meokisiteki Pirena

¹ Meokisiteki inakori Sareë tixini auakani auite itxaua. Iuasaaki sasetotxi itxaua apaka. Teoso, Apiananiri, kamari iua sasetotxi ininiua. Kitxakapirika Apraão kamari neenamatzxi ãti tixini auakani auiteakorikata. Iua kanapiriãkasaaki, aðkitari Meokisiteki. Iuasaaki Meokisiteki takari erekari Teoso sikakiti iuamoni. ² Iuasaaki Apraão sikari iua tiitxi

imakatxakakiti ipixini. Tesi tiitxi auiniã, isikari ãti Meokisitekimoni. Meokisiteki akiritaãka “Auñtetxi Atão Inakari Kamakari.” Apaka akiritaãka “Auñtetxi Kãkiti Kamaerekaxiniretakari.”³ !Kimarotikori Meokisiteki iri, inoro pakini. !Kimarotikori apika atokiriakori. !Kimarotikori iponaniini, ipinini pakini. Teoso ãkiri atoko itxa. Sasetotxi ãtipirika itxaua.

⁴ Hixinikariko iua Meokisiteki. Apiatakari iua. Apraão iteene paxitari iua, ininiã isikari ipixini tiitxi iua makatxakakiti iuamoni. ⁵ Eereka ãti õti Apraão tikini Teoso paniãtari Arevii apika mekaniriakori, sasetotxiakori, apakapiniri ipixini kãkiti apakapakiti, txineiro, tiitxi pakini. Ninoa apakapari kãkiti sikakiti Teoso ãkapani. Ikinimane ninoa Apraão apika mekaniriakori itxauana. Iuaritika sasetotxiakori apakapari inirimane sikakiti. ⁶ Iua Meokisiteki Arevii nirimane !itxaua. Iua aua kitxakapirika Arevii apisapanika. Iuaritika iua apakapari ipixini Apraão makatxakakiti. Eereka Meokisiteki takari erekari Teoso sikakiti Apraãomoni, Teoso sikaenetakiti apakapakarimoni. ⁷ Iua Apraão poiãori. Apiatakari Meokisiteki, kotxi apiari takari erekari Teoso sikakiti poiãorimoni. ⁸ Ikinika Arevii apika mekaniriakori, Teosomoni kãkiti sikakiti apakapakani, ipinanipeka. ãtipirika auakari atoko itxa Meokisiteki. ⁹ Atxiiti aposotari asãpiretiniri ia atoko: “Arevii sikari isikakiti Meokisitekimoni Teoso ãkapani, kotxi iua ina Apraão ãto ãki.” ¹⁰ Kotxi Apraão aõkitakasaakiri Meokisiteki, iuasaaki Arevii kona auapanika. Ininiã iua auini apisapanika Apraão ãtoã aua, kotxi Apraão apika mekaniri itxaua Arevii.

Xesosi Meokisiteki Atoko Inini

¹¹ Arevii apika mekaniriakori sasetotxiakori itxauana. Iua apika mekaniri Arão inakori. Arão apika mekaniriakori apaka sasetotxiakori itxauana. Teoso sikari ipaniãtakiti iõkatsopatakori ninoamoni, isãkire kãkiti imarotini ãkapani. Iuaritika ninoa sasetotxiakori parika !oerekari kãkiti kamaerekatikoo. Ininiã ãtião sasetotxi nirekaãka. Sasetotxi Arão atoko inakari linirekaãkaika. Sasetotxi Meokisiteki atoko inakari nirekaãka.

¹² ãtião sasetotxi auakasaaki, ãtião Teoso paniãtakiti iõkatsopatakori aua iuasaaki. ¹³ Xesosi kona Arevii apika mekanirini. Iua Xotaa apika mekaniri. Xotaa mekaniriakori kona sasetotxiakorini. Ninoa kona okari pirãtxi Teoso ãkapani. Kona iparikausatana Teosomoni sikakori takikoãtaã. ¹⁴ Ikinimane imarotari aãuñte Xesosi Xotaa nirimane ininiua. Moisesi iõkatsopatakiti lauritanana ninoa sasetotxi ininiuana. ¹⁵ Ate sãpiretapekari Meokisiteki pirena. Aimarotari auapitika ãti sasetotxi, Meokisiteki atoko inakari. Uatxa aimarotari Xesosi Meokisiteki atoko itxaua.

¹⁶ Kitxakapirika sasetotxi pitxaua, kotxi pikiomaneakori sasetotxi apaka itxauana. Teoso kamari Xesosi sasetotxi ininiua, kotxi iua auapikako. Kaposotiireri iua. !Ixipoka. ¹⁷ Teoso txari Xesosi isãkire iõkatsopatakoriã:

ãtipirika sasetotxi pitxaua. Sasetotxi Meokisiteki atoko inakari pitxaua, itxa.

¹⁸ Ininiã mitxi auakari sasetotxiakori parika !auaika, kotxi itapara !auari. Xipope ikara. ¹⁹ Moisesi paniãtakiti iõkatsopatakori !ikamari kãkiti ereka inini. Uatxa apiaerekatakari aiãtapakiti apokapeka ãkorapokoriti. Ininiã iua anikaua Teosomoni.

²⁰ Teoso isãkireẽ txikitakari Xesosi sasetotxi ininiua. ²¹ Teoso lisãkirauata ikara atoko kãkiti sasetotxipeka inakasaaki. Teoso txikitakari Xesosi sasetotxi ininiua isãkireẽ, kotxi itxari Xesosi:

Nota Apiananiri sãpiretapekari nikamaenetakiti. Ikara nikamapitikako, ininiã ãtipirika sasetotxi pitxaua, sasetotxi Meokisiteki atoko inakari pitxaua, itxa Teoso. ²² Ininiã ikara Teoso sãkireẽ, aimarotari Teoso kamapitikariko ikamaenetakiti apiari, kotxi iposope isikiniua Xesosi.

²³ Auapeka itori sasetotxiakori. Ninoa kona posotari ãtipirika iparikausatina, kotxi ikoriãpekana. ²⁴ Xesosi auapikako, ininiã ãtipirika sasetotxi itxaua. ²⁵ Ininiã iposotari imaktxakiniri ikinika amaerekani, Teosomoni anikasaakia, kotxi ãtipirika aua, ininiã ãtipirika imisãkiretari Teoso ate ãkapani.

²⁶ Ininiã ikara atoko inakari sasetotxi auñte apiatakari anirekapitika. Apiaerekatakari iua. !Kaneenamari. Ikerokakiti !auari. Itxiko ixinireẽ !auari. Maerekati !ikama. Iaxiti apiko nopinixiti auakari, auñtetxi Apiatakari itxaua. Ikara atoko inakari sasetotxi anirekapitika. ²⁷ Apanakini sasetotxi auñte apiatakani ãkorapokoriti auakani atoko !itxaua. Ninoa ikiniõtika okari pirãtxi, merepanika ninoaka maerekani makatxakiko ãkapani. Eereka ninoa okari pirãtxi kãkiti maerekani makatxakiko ãkapani. Kona ikara atokoni itxa Xesosi. ãtikatanokara Xesosi oxiketari iarëka kãkiti ãkapani. Iuaka ipina kãkiti ãkapani. ²⁸ Mitxipe sasetotxi auñte apiatakani mereeëka Moisesi paniãtakiti iõkatsopatakori iaõka. Ninoa tapara !auari. Moisesi sãkire tikini Teoso mereëri imi ãtipirika sasetotxi ininiua ãkapani. ãtipirika erekarinoka kamakari iua.

8

Xesosi Sasetotxi Auíte Apiatakari

¹ Ia atoko asäpiretakiti: Atemoni auapitika atão sasetotxi auíte apiatakari. Iaxiti iua topäka aäuíte Teoso kikomoni, auítetxi auiniätaä. ² Iuaä Teoso auiniätaä, imisäkiretari iua ate ikapani. Iuaä aua atão inakari Teoso aapoko, Apiananiri kamakiti. Kona käkiti kamakitini.

³ Ikinika sasetotxi auíte apiatakari auari iparika. Isikari käkiti siäkiti Teosomoni. Isikari pirätxi okakori Teosomoni. Ininiä Xesosi parika apaka aua isikarauatini. Iuaka isikaua Teosomoni. ⁴ İkorapokoriti Xesosi auakasaaki, sasetotxi !itxaua, kotxi auape İkorapokoriti sasetotxiakori käkiti siäkiti sikakani Teosomoni. Moisesi iökatsopatakiti atokotxikana ikamana. ⁵ Sasetotxi İkorapokoriti auakani kamakiti atão, txamari ninoa parika linirekaäkaika. Ninoa parika sanökaxi atoko itxa, Xesosi parika iaxitikiri aimarotini ikapani.

Kitxakapirika Teoso paniätakasaakiri Moisesi Teoso aapoko aamata kamakori ikamini ikapani, Teoso txari Moisesi:

Pikamariko naapoko nipaniätakiti iaöka ixirata auíte nopini aäuakasaaki noerekakiti. İpini-moni inakari !pikamape,

itxa Teoso.

⁶ Xesosi parika Teoso sikakiti apiaerekata. Kitxakapirika sasetotxiakori parika poião erekari. Iua atokokana Teoso kamaenetakiti amaneri apiaerekata. Kitxakapirika ikamaenetakiti poião erekari. Xesosi txikitakari Teoso kamaenetakiti amaneri apokini käkiti ikapani, kotxi iua ipina käkiti ikapani. Teoso kamaenetakiti amaneri apiaerekata, kotxi ikamaenetari kaiäopokori erekari apiaerekatakari.

⁷ Teoso kamaenetakiti Moisesimoni apakatinia maerekati imakatzakini ikapani, ininiä kona ikamari äti ikamaenetakiti apiatakari. ⁸ Txamari Teoso !apokaerekatari käkiti, kotxi käkiti kamapanikari maerekati. Ininiä Apiananiri txari käkiti:

Äti öti nisäpiretariko nikamaenetakiti amaneri Isaeo nirimanemoni, Xotaa nirimanemoni pakini.

⁹ Kitxakapirika nisäpiretari mitxi nikamaenetakiti ninoa atokiriakorinimoni. Iusaaki nota makatzakana ninoa imisiritikosaakina Exito tixiniä. Txamari ninoa !ikamari nisäkire iaöka. Ininiä nitakanapana ninoa. Nikamaenetakiti amaneri kona mitxi nikamaenetakiti atokoikani.

¹⁰ Äti öti İkari nikamaenetakiti amaneri nisäpiretariko Isaeo tixini auakani. Ia atoko inakari nikamaenetakiti amaneri: Nitakariko nipaniätakiti käkiti iikiteë. Niökatariko nipaniätakiti ninoa äkixinireë. Iusaaki ninoa Teosone nitxauako. Iusaaki ninoa nota nakitiakori itxauanako.

¹¹ Iusaaki käkiti kona oerekari äti imarotini Apiananiri. Kona käkiti oerekari itari imarotini Apiananiri, kotxi iusaaki ikinimane imarotanoko nota. Poiäoka inakani, apiatakani pakini imarotanoko nota.

¹² Nimaxinikaretariko ikinika maerekati ikamakitina. Kona nimisiritalkanako ninoa. Kona nixinikaikariko maerekati ikamakitina,

itxa Apiananiri. ¹³ Teoso kamakasaakiri ikamaenetakiti amaneri, iusaaki oerekari käkiti mitxi ikamaenetakiti Xoteoakorinoka ikapani ikamape, ininiä inapape. Tiitxi kitxakari patimari xipokini atoko, ikara mitxi Teoso kamaenetakiti xipoka.

9

Teoso Aapoko Aamata Kamakori

¹ Kitxakapirika Teoso kamaenetakiti isäpiretakasaakiri Moisesi, Teoso oerekari Moisesi oerekiniri käkiti Teoso apisatoö apokini. Iua apaka säpiretari käkiti iua aapoko İkorapokoriti ikaminina ikapani. ² Ininiä ninoa kamari Teoso aapoko aamata kamakori. Sasetotxiakori İroiniätaä aua tirikapı takiko tiitxiti. Iuaä aua apaka komiri Teosomoni siäkori amesa nopini. Iua pakita ninoa takauäkatari “Teoso Auini Pakitaätaä.” ³ Apanikaki mäkatxi mata kasıpiri arökakari aua. Iua mäkatxi mata apikomoni auakari pakita ninoa takauäkatari “Teosonani Auini Pakitaätaä.” ⁴ Iuaä aua kamariäro arikiko amesati oro kamakoro. Iuaä aua Teoso kaixane. Iua kaixa akiritaäka “Teoso kamaenetakiti kaixati.” Iua kaixa nopini mapara itaäka oronokara. Iua äki itakaäka kopitipaki oro kamakoro. Iua kopitipaki äki itakaäka xapitiri komiri manaa inakori. Iua kaixa äki aua apaka Arão tsonareke. İkora mitxi pitxaka iuaikana. Apaka iua kaixa äki aua ipi kaita. İkora kaita nopini aua Teoso paniätakiti iökatakori. ⁵ Iua kaixa nopini aua ipi Teoso nitiriakori iaxitikini atoko inakani. Oro kamakori ninoa. Akiritaäka Keropiı inakoni. Keropiı matameëkari imikita iua kaixa tore nopini. Iuaä Teoso maxinikaretari käkiti maerekani.

Uatxa !apakata apikomoni noerekinii ikara pirena.

⁶ Teoso Auini Pakitaãtaã sasetotxiakori Iroã ikiniõtika iparĩkana ikaminina Teoso İkapani. ⁷ Sasetotxi auite apiatakarinoka Iroã Teosonani Auini Pakitaãtaã. Åtikanani åtikatika Iroã. Iua anikari arẽkatxi iuakata. Arẽkatxi imanikakaniã, !iıroã. Iua arẽkatxi isika Teosomoni merepanika iuaka maerekani Teoso makatxakini İkapani. Eereka ikamari ikara apanakini kãkiti maerekani Teoso makatxakini İkapani. ⁸ Iuasaaki Teoso kona auiritari kãkiti İroini Teosonani Auini Pakitaãtaã. İkara atoko Erekarı Matamatakoti oerekaua ate, kotxi kona Teoso oerekapanikari ikinimane kãkiti İroini Teoso apisatoõ. Teoso aapoko aamata kamakori auapanika inakasaaki, Teoso kona oerekari kãkiti iuamoni apokini. ⁹ İkara Teoso aapoko kitxakapirĩka auakari ate oerekiko itxaua uatxa. Oerekari ia. Kãkiti sikakiti Teosomoni, pirãtxi okiko Teoso İkapani apaka, kona posotari oeretiniri Teoso teosonetakani åkixinire. ¹⁰ İkara Teoso oerekakiti kitxakapirĩka oerekari kãkiti iniãkiti atão inakari, iãtakiti atão inakari pakini. Oerekari kãkiti iito arokiko, itii arokiko pakini Teoso apisatoõ apokini iposope inini İkapani. Teoso kamaenetakiti amaneri apokasaaki, kona akamaikari ikara mitxi Teoso oerekakiti.

Kristo Arẽka

¹¹ Kristo apokapeka. Sasetotxi auite apiatakarı itxaua. Oerekaua erekari Teoso sikakiti. İparĩkauata Teoso aapoko apiaerekatakari åki. Iua Teoso aapoko kãkiti makamakiniti. Iua aapoko !auari İkorapokoriti. ¹² Iua İroãkasaaki iuaãtaã, !anikari potxi arẽka, kema auite åkiri arẽka İroini İkapani. Iua İroãkasaaki Teosonani Auini Pakitaãtaã iaxiti auakariãtaã, anikari iuaka arẽka, kotxi ikitakari iarẽka åtikatika ikinimane kãkiti İkapani. İniniã İkitxitari Teoso åtikatika kãkiti maerekani İki, ininiã kãkiti aua Teosokata åtipirika. ¹³ Potxi arẽkaã, kema auite arẽkaã, kema auite åkiri ariãkori paniã pakiniã, kitxakapirĩka sasetotxi tseõtari maerekati kamakani Teoso apisatoõ apokinina İkapani. İniniã iuasaaki maparanoka oeretaãka. Åkixinirena loeretaãta.

¹⁴ Apiaerekata Kristo arẽka, kotxi iua posotari oeretiniri aãkixinire. Maerekati !auari Kristomoni. Iuaka sikaua Teosomoni Erekarı Matamatakoti posotiireẽ, åtipirika auakari posotiireẽ. Iuara oeretari aãkixinire. İmakinika akamakiti apinini txĩkitakakari imaktxaka. İniniã uatxa aposota aparĩkauatini Teoso åtipirika auãki inakari İkapani.

¹⁵ İniniã iua Kristo txĩkitakari Teoso kamaenetakiti amaneri apokini. İniniã kãkiti Teoso akiritakini posotari apakapiniri åtipirika Teoso sikaenetakiti iua anaakori İkapani. Kristo ipĩkasaaki, isikakana ninõa imaerekanina itakanapinina İkapani. Iuasaaki İkitxitari Teoso imaerekanina İki. İkara imaerekanina ikamana Teoso kamaenetakiti mitxipe auakari auakasaaki.

¹⁶ Kãkiti ipinini apisa, iõkatsopatarı itii apakapakani uãka, ininiã ipĩkasaaki itii apakapakani imarotaãka. İniniã iua ipinini imarotiko tsopa ininiã, iuasaaki itii apakapakani apakapari ipĩkari tii. ¹⁷ İpĩkari tii apakapakani imarotiko tsopa nirekaãka kãkiti ipĩkasaakinokara. İkara !inirekaãka ipinini apisa. Iua auãkipanika inakasaaki, kãkiti ! apakapari itii. ¹⁸ İniniãkara mitxi Teoso sikaenetakiti isika kãkitimoni, arẽkatxi auakasaaki, ipĩkari auakasaaki. ¹⁹ Kitxakapirĩka Moisesi merepitipanika sãpiretari kãkiti İkinika Teoso paniãtakiti iõkatsopatakori. Eereka ikosekari kema auite åkiri arẽka, potxi arẽka pakini. İkara ikoketa åparaãkata. İposo atoko itseõtari Teoso sãkire aãtsopate, ikinimane kãkiti pakini isopo inakori poria, soti auite piti põkamarariã pakiniã. ²⁰ Iuasaaki itxari: "İa arẽkatxi oerekaua Teoso kaminiri ikamaenetakiti. Teoso paniãtai hĩkĩpitiniri iua sãkire." ²¹ Iua atokokana Moisesi tseõtari Teoso aapoko aamata kamakori, İkinika iua åki auakari pakini arẽkatxiã. ²² Teoso sãkire iõkatsopatakori paniãtari kãkiti, tiitxi pakini oeretiko arẽkatxiã. Okakori mauakaniã, arẽkatxi kiããkori mauakaniã, Teoso !imaktxakari kãkiti maerekani.

²³ İniniã Moisesi takari pirãtxi arẽka İkinika Teoso aapoko åki auakari nopini oeretiniri İkapani. İkinika Teoso aapoko åki auakari İkorapokoritikiri, iaxitiki oerekiko İkapani itxa. Sanõkatxi atoko itxa. Pirãtxi arẽka kona apakata iaxiti İkapani. Teoso nirekakari arẽkatxi apiatakarı. ²⁴ Kristo iparĩka ikamakasaaki ate İkapani, kona İroã Teoso aapoko kãkiti kamakitiã. İkorapokoriti kãkiti kamari Teoso aapoko atoko inakari, txamari na atão iua aapoko. Kristo İroã atão Teoso aapoko Teoso tixineẽ. Uatxa iuaãtaã Teoso apisatoõ iua misãkiretari Teoso ate İkapani. ²⁵ Sasetotxiakori auite apiatakarı Iroã Teosonani Auini Pakitaãtaã İkinikanani. Iuasaaki anikari pirãtxi arẽka. Kristo !ikamari ikara atoko. Åtikatika Kristo oxiketari iarẽka. ²⁶ Iua ninõa atoko inaãkamako, itokata imisiritaãkamako itixi kamikosaakipekamako. Uatxa imapotõkire õti takote iua apokapeka maerekati åtikatika imaktxakini İkapani. Iuaka isikaua ipinini İkapani, amaerekani ixipokini İkapani. ²⁷ Teoso kamari ikinimane kãkiti åtikatika koriini. Eereka ikinimane sari Teoso apisatoõ. Iuasaaki apanakini apakapari imisiritiko. Apanakini apakapari iparĩkana İki. ²⁸ İniniã Kristo okaãka åtikatika kaiõpokori kãkiti İkapani, imaerekanina imaktxakini İkapani. Iuaĩkana iua kanapiriã. Iuasaaki !imisiritaãkaikako kãkiti maerekani xika. Iua İkasaaki, imaktxakariko

ia iātapakani, maerekani sauaki auakani. Anikana itixinemoni ātipirika Teosokata auinina ikapani.

10

Pirātxi Arēka Kona Apakata

¹ Kitxakapirīka Teoso paniātakiti Xoteoakorimoni sanōkatxi atoko itxa. Ikara oerekari kākiti iuaasaaki auakani atāo inakari apokini āti ōti. Ikinipoko atāo inakari !apokapanika ninoamoni. Ininiā pirātxi okiko ātipirika kona txīkitakari kākiti iposope Teosomoni apokini. !Ikamaerekatana ninoa. ² Pirātxi arēka makatxakiniāri kākiti maerekani, ininiā ninoa takanapamariko pirātxi okinina, kotxi Teosomoni apokakani oeretapeēkaika, ininiā imarotamarina ākixinireēna imaerekanina mauakani. ³ Txamari pirātxi arēka !imakatxakari kākiti maerekani. Ininiā ikinikanani pirātxi okakori oerekari kākiti imaerekani auapanika. ⁴ Kema auīte arēka, potxi arēka pakini kona posotari imakatxakiniri kākiti maerekani.

⁵ Kristo apokasaaki ikorapokoriti, itxari Teoso:

Pirātxi okakori pitemoni siākori kona pinireka. Ininiā pite kamari itotxi nota ikapani.

⁶ Pirātxi arikiko pite ikapani, pite !apokaerekatari. Kākiti sikiniri isikakiti pitemoni imaerekani pimakatxakini ikapani, pite !apokaerekatari. !Ikamapoxokonitai.

⁷ Iuaasaaki nitxai. “Uaīkarano nota. Paātsopateē iōkatapeēkaika nota pirena. NiTeosone uai napoka pinireēkiti nikamini ikapani,”

itxa Xesosi.

⁸ Merepanika Xesosi txari iri: “Pirātxi okakori pitemoni siākori kona pinireka. Pirātxi arikiko pite ikapani, pite !apokaerekatari. Kākiti sikiniri isikakiti pitemoni, pite !apokaerekatari. !Ikamapoxokonitai,” itxa. Iuaritika Teoso sākire iōkatsopatakori kitxakapirīka paniātari ikara kamiko. ⁹ Eereka Kristo txari iri: “Uaīkarano nota. Uai napoka pinireēkiti nikamini ikapani,” itxa. Ikara atoko inakasaaki, Xesosi xipokari pirātxi okiko, kotxi iua apoka uai Teoso nireēkiti ikamini ikapani.

¹⁰ Teoso nireēkiti iaōka ikamini kamaerekataua ate, kotxi Xesosi Kristo ipina ātikatika ikinimane ikapani.

¹¹ Sasetoxiakori ikorapokoriti auakani sapika ikiniōtika Teoso apisatoō iparīkana ikaminina ikapani. Ātipirika iua okari pirātxi Teoso isikini ikapani. Itxama, ikara !iposotari maerekati imakatxakini. ¹² Iuaritika Kristo, ate sasetotxine, iuaika sikapekaua ikoriini kākiti maerekani imakatxakini ikapani. Ikamari ikara ātikatika. Iposo atoko, iitopāka Teoso kikomoni. Ikara atoko ininiā, xipokari iparīka. ¹³ Iuaā iātapari ikinika imokaiakari xipokini. Ikiti itakiniātaā atoko ninoa. ¹⁴ Ininiā ātikatika okaāka kākiti ereka inini ikapani. Iua kamaāpotana ninoa erekaāpo ininina ikapani.

¹⁵ Erekari Matamatakoti apaka txaua ate ikara atāo inini. Merepanika itxari:

¹⁶ Apiananiri txari: “Ia nikamaenetakiti nikamako ninakitiakori ikapani āti ōti. Ia nikamaenetakiti: Nipaniātakiti natakako ninoa ākixinireē. Nipaniātakiti niōkatakō iikiteēna.”

Itxa Erekari Matamatakoti. ¹⁷ Apikomoni itxa:

Kona nixinikaikari maerekati ikamakitina. Apaka nipaniātakiti ninoa takanapakiti, !nixinikaikako.

¹⁸ Teoso makatxakasaakiri maerekati akamakiti, ininiā amaerekani makatxakaākapeka. Ininiā lauauka okakori kākiti maerekani makatxakini ikapani.

Maāpoka Teosomoni

¹⁹ Ininiā nitariakori uatxa !hīpīkarauatape hīiroini Teosonani Auini Pakitaātaā, kotxi Xesosi iikixitapekari āiroini ikapani iuaa arēkaā. ²⁰ Xesosi ipikasaaki, iua kamari kimapori amaneri, maxipokati, Teosomoni asini ikapani. Ipīkasaaki, imakatxakari mākatxi mata Teosonani Auini Pakitaātaā arōkakari, Teosomoni āiroini ikapani.

²¹ Atemoni aua sasetotxi apiatakari Teoso aapoko nīkatakari. ²² Ininiā maāpoka Teosomoni. Maāuiritari atāo inakarinoa kaikotini aākixinireē. Maāuikari ikinika iua sākire. Kākiti kitxakapirīkarini tseērauata arēkatxiā, maerekati makatxakiko ikapani. Ininiā maamanaāri Xesosi tseētiniiri aākixinire oeretiniiri ikapani. Kitxakapirīka kākiti kipaātaua Teoso aapoko iroini ikapani. Iua atokokana maamanaāri Xeosi aīto arokini āparaā ereriā. Ikara atoko aniniā, maāpoka Teosomoni. ²³ Iteene maāuikari aimarotakiti asāpiretakiti, kotxi Teoso kamapitīkariko ikamaenetakiti. ²⁴ Maxinīkariko ia. Natokopa itxa aōtākikakakiniua atiraōkiuatini ikapani, erekari akamini ikapani apaka? ²⁵ !Apakata atakanapiniiri aāpotiitiniua Teoso ikapani. Apanakini !itotaikari apotiitiniua Teoso ikapani. Masikataparaxiniretakakaua. Apiata masikataparaxiniretakakaua, kotxi aūīte kanapiriini ikorapokoritimoni kaīamapeka.

²⁶ Atão inakari aimarotiniã, atão inakari aãpakapiniã, eereka maerekati akamapika, kotxi anirekari maerekati akamini. Iuasaaki !auaika amaerekani ikixitiko. Iuasaaki !auaika amaerekani makatxakiko. ²⁷ Iuasaaki aimarotari kãkiti ikara atoko inakani misiritaãkako, kotxi Teoso mokaikariakori itxauana. Arikatxi apiatakari xipokanako ninoa. Pikaretxinoka aua ninoa ikapani. ²⁸ Kitxakapiriã kãkiti makipitakaniãri Moisesi paniãtakiti okapekaika. Ipi, atxiiti ipi ãti pakini kãkiti atamatiniãri iua kaminiãri maerekati, ininiã okaãka. !Auiritaãka imitekini. ²⁹ Ininiã natokopa itxa kãkiti misiritiko Teoso ãkiri sãkire imakipitakaniã? Apiata iua misiritiko, kotxi Teoso ãkiri ikatxaratini atoko itxa imakipitakaniãri iua sãkire. Iuasaaki !ipaxitari iua arẽka amaerekani makatxakakari Teoso sikaenetakiti. Iuasaaki imisãkirepiretari Erekaru Matamatakoti, ikinipoko erekaru sikakari. ³⁰ Aimarotari ia sãpiretakari. Iua txari:

Notanoka xikatxirauata. Notanoka misiritanako ninoa imaerekanina xika, itxa Teoso.

Apaka Teoso sãkire iõkatsopatakori txari:

Apiananirinoka sãpiretari kãkiti inakitiakori misiritiko.

³¹ Kãkiti maerekati kamakani apokasaaki Teoso ãtipirika auãki inakari apisatoõ, iuasaaki pamonõkoniri, kotxi kãkiti misiritakari itxaua.

³² Hixinikariko merepitanika Teoso sãkire hãuikini õti. Hiikite iopinikiko atoko itxa iuasaaki. Iuasaaki himarotari Teoso sãkire. Iuasaaki iteene hãtatsirauata Xesosi sãkire hãuikini xika. Iuaritika iuasaaki hitaparaxinireritika hãua. Iuasaaki !hitakanapari Xesosi sãkire hãuikini. ³³ Iuasaaki kãkiti apisatoõ apanakini napetai. Ninoa misãkirepiretai hite. Imisir-itaina hite. Iuasaaki hite moianatari apanakini Teoso sãkire auãkani, kãkiti misiritakini. Ininiã iuasaaki hite apaka misiritaãka. ³⁴ Hitiretana apanakini Teoso sãkire auãkani kateia ãki auakani. Apanakini mixirikari hitii Kristo sãkire hãuikini xika, iuaritika hipoxokoniua, kotxi iuasaaki himarotapekari auapitika iaxiti hitii Teoso sikakiti. Ikora tiitxi kona xipoka. Apiaerekata tiitxi iuaxiti auakari.

³⁵ Ininiã kona hitakanapari hitaparaxinire, kotxi ãti õti Teoso ikixitai hitaparaxinire auiniã.

³⁶ Himiteenekariko ikinika Kristo ikapani. Hikamariko ikinika hitaparaxinireritika. Ininiã Teoso paniãtakiti hikamakasaaki, hãpakapariko isikaenetakiti. ³⁷ Teoso sãkire iõkatsopatakori txari:

Apikomoni mokatanitika iua kanapiriãko. Iketo õti ikanapiriãpitika.

³⁸ Kãkiti atão inakari kamakari auini erekari, kotxi aukari nota sãkire. Kãkiti sipikapapiretiniãri nisãkire, nota lapokaerekatari iua,

itxa Teoso. ³⁹ Ate kona sipikapapiretari Teoso sãkire. Ininiã !axipokaãka. Teoso sãkire auãkani atxaua ate. Iua makatxakari amaerekani aãkixinireã auakari.

11

Teoso Sãkire Auikiko Pirena

¹ Atão aũukasaakiri Teoso sãkire, iuasaaki aimarotapitikari aãpakapiniri aiãtapakiti. Atão aũukasaakiri Teoso sãkire, iuasaaki aimarotari amatamatakiniti auapitika. ² Kitxakapiriãka Teoso apokaerekatana isãkire auãkani, kotxi iteene auikarina isãkire.

³ Teoso sãkire aũukasaaki, aimarotari iua kamari itixi, iaxiti pakini isãkireãnokara. Aãtamatakitiã !ikamari itixi, iaxiti pakini. Isãkireãnokara ikamari ikinipoko.

Teoso Sãkire Auãkari Apeo Inakori (Xenesisi 4.2-12)

⁴ Apeo inakori aukari Teoso sãkire, ininiã Teosomoni isikakiti apiaerekata, kotxi Apeo sikari Teosomoni Teoso sãkire iaõka. Itari Kaii inakori sikakiti poião erekari. Apeo aukari Teoso sãkire, ininiã Teoso apokaerekatari iua sikakiti. Teosomoni atão inakari kamakari itxaua Apeo. Kitxakapiriãka Apeo koriã, iuaritika iua auikiniri Teoso sãkire oerekapanikaua Teoso tiritiniri kãkiti isãkire auãkani.

Teoso Sãkire Auãkari Enoki Inakori (Xenesisi 5.21-24)

⁵ Enoki inakori apaka aukari Teoso sãkire. Ininiã Teoso anikari iua iaxiti. Kona ipina. Mapikatipanika anikaãka Teosomoni. Iuasaaki kãkiti !apokaikari iua, kotxi Teoso anikapekari iua. Isini apisa kãkiti imarotari Teoso apokaerekatiniri iua. Iua kamapoxokonitari Teoso. ⁶ Teoso sãkire amauikakaniã, kona akamapoxokonitari Teoso. Kãkiti Teosomoni apoãkari, merepanika auikariko Teoso auini. Apaka ninoa auikariko Teoso sakiniri erekari kaiãopokori iua nitakarimoni.

Teoso Sãkire Auãkari Noee Inakori (Xenesisi 5.28-9.29)

⁷ Noee apaka auikari Teoso sākire. Teoso sāpiretari iua kākiti mimarotakiniti monōkoni. Iuasaaki iua pīkarauata, ininiā ikamari maporo mitari iua aapoko āki auakani mapinakani ikapani. Noee auikari Teoso sākire, ininiā isāpiretari Teoso misiritiniri kākiti imaerekani xika. Teoso txīkitakari iua atāo inakari ikamini, kotxi iua auikari Teoso sākire.

Teoso Sākire Auīākari Apraāo Inakori

⁸ Apraāo apaka auikari Teoso sākire, Teoso paniātakasaakiri iua ātiātāā isini. Iua kīpitari Teoso sākire, ininiā iua sari, txamari kona imarotari isinimoni. ⁹ Iua auikari Teoso sākire, ininiā iua aua Teoso sikaenetakiti tixitiā. Iuaā iua aapoko aamata kamakori, kotxi āti tixinikiri itxaua. Apaka Isaki, Xakoo pakini aua aapokotxi aamata kamakori. Ninoa apaka apakapari itixi Teoso sikaenetakiti. ¹⁰ Apraāo iātapari Teoso sitatxine apokini, kotxi Teoso kamari ikara sitatxi. Ixinikakiti iuaōka ikamari. Ikara sitatxi kamaāka kaikori nopini, ininiā lixipoka.

¹¹ Apraāo auikari Teoso sākire. Iua imarotari ikiomaneēpeka inini. Apaka imarotari itanoro Sara kona posotakiri keene onini. Iuaritika auikari Teoso sākire irītxi ininiua ikapani. Imarotari Teoso sikapitikariko isikaenetakiti. ¹² Ininiā iua kiki iteene kiomātxi inakariua, iuaritika irītxi itxaua. Iua aua itomaneri imekaniriakori, itomaneri apika mekaniriakori pakini. Itomaneri apika mekaniriakori iōriki iaxiti auakani atoko itxanako. Ikipatxite atoko itxanako apika mekaniriakori. Kaiāopanina ninoa.

Teoso Sākire Auīākani Iātapakiti

¹³ Ikinika ninoa kākiti Apeo, Enoki, Noee, Apraāo pakini auikari Teoso sākire. Iko-riākasaakina, ninoa kona apakaparina ikinika Teoso sikaenetakiti. Ninoa imarotari Teoso sikaenetakiti ōtakopanikari apokini tīkane. Ninoamoni ikorapokoriti kona atāo ninoa tixine. Maparakinini atoko itxauana. ¹⁴ Kākiti ikara atoko inakani oerekari ninoa nitiniri ninoaka tixine. ¹⁵ Itixi itakanapakitina ixinikaākamanako, ininiā iuaīkana ikanapiriāmanako iuaātaā. ¹⁶ Ninoa kona kanapiriā, kotxi inirekarina apiaerekatakari itixiti, iaxiti auakari. Ininiā Teoso lipētauata ninoa Teosone ininiua ikapani, kotxi iua kamapekari sitatxi ninoa ikapani.

Apraāo Okaaritiniri Imi

¹⁷ Apraāo auikari Teoso sākire, Teoso ataerekatakasaakiri iua. Iuasaaki iposope okiniri Isaki Teoso ikapani. Teoso sikaenetakiti apakapakari iua Apraāo. Iposope imatonōkari imi okini Teoso ikapani. ¹⁸ Teoso sāpiretapekari iua: "Isakimoni auako pimekaniriakori, papika mekaniriakori pakini," itxari. ¹⁹ Iuasaaki Apraāo xinikari Isaki ipininiā, Teoso ōkitikari iua iuaīkana. Iuasaaki Isaki ipinaarita, ininiā kākiti ipikari iuaīkana ōkitikinina atoko itxa Isaki iuasaaki.

Isaki, Xakoo, Xosee Pakini Auikiniri Teoso Sākire

²⁰ Isaki apaka auikari Teoso sākire, kotxi itakari erekari imi Xakoo, Isaoo pakinimoni, Teoso nireēkiti iuaōka ikaminina tīkane. ²¹ Xakoo apaka auikari Teoso sākire. Ikoriiini apisa itakari erekari Xosee anaakorimoni. Iuasaaki isāpiretari Teoso iua ereka inini. Iuasaaki iioīteka iu itsonarekeē. ²² Xosee apaka auikari Teoso sākire. Ipinini apisa isāpiretana Isaekini Exito ospipkinina ikapani. Ininiā iua paniātana ninoa anikiniri iua api Teoso siākiti itixitimoni.

Moisesi Auikiniri Teoso Sākire

²³ Moisesi iri, inoro pakini auikari Teoso sākire. Iponaniāka atoko, ninoa kipatari iua ipi āti pakini kasiriti. Iuasaaki imarotarina Moisesi kona āti eenetxi atokini. Ipinimoni itxa. Ninoa imarotari Paraoo paniātiniri amarini okiko, iuaritika lipikarina Paraoo paniātakiti.

²⁴ Moisesi auikari Teoso sākire. Mitapeka inakasaaki, kona inirekari kākiti akiritiniri iua Paraoo ākero ākiri ininiua. ²⁵ Iua mereeri imisiritiko Teoso nakitiakorikata. Ininiā iua sari ninoakata. !Inirekari poxokonitxi maerekati kamakiti, kotxi ikara poxokonitxi mokatanitika xipoka. ²⁶ Tuamoni apiaerekata ninoa xinitiniri iua Kristo sākire auikini xika. Kona iua nirekari katiiri ininiua Exito auakanikata, kotxi imarotari āti ōti Teoso sakiniri iua iparika iiki.

²⁷ Exito ipotorikasaaki, iua auikari Teoso sākire. Iuasaaki Exito auakani auite omanākarauata. Iuaritika lipikari iua. Imūteenekari ikinipoko, kotxi auikari Matamatakoti sākire. Atamatakiti sākire auikini atokotxikana, auikari imatamatakiniti sākire. ²⁸ Iua auikari Teoso sākire, ininiā ipaniātari kākiti okiniri soti auite. Eereka ipaniātari itakiniri iarēka ironakikoātaā tinikata. Ininiā Teoso nitiri ipīkitxi mīkari iaxitikiri ninoa nopini inapaōpotakasaaki, kona okari Isaekini merepanika auakani, kotxi atamatarari arēkatxi.

²⁹ Kākiti Isaekini auikari Teoso sākire, ininiā ipiriātarina potxoari uiniti Pōkamarariā inakori sonākakari kimaporiti nopini. Kākiti Exitokini apaka nirekari inapinina ninoa napini atoko. Txamari iuasaaki āparaā kanapiriāpe iua kimaporiti nopini, ininiā ikinika ninoani axāpoātape.

Teoso Säkire Auiäkani Käiatini

³⁰ Isaeokini auikari Teoso säkire, ininiä Xerikoo sitatxiti iakirokana setxi pakini öti. Iuusaaki pirikeri sitatxi äkitakari irikapoakata, kotxi ninoa kamari Teoso säkire iaõka.

³¹ Haapi inakoro kanokarero otxaua mitxi. Eereka oauikari Teoso säkire, kotxi oapapakana käkiti iuaätaã apokakani, Teoso iokanatakini, ininiä kona okoriã käkiti Teoso säkire mauïäkanikata.

³² Kiripa apikomoni nisãpiretai? Auapitika apikomoni itomaneri käkiti Teoso säkire auiäkani. Kona apakata uatxa nisãpiretinii hïte Kitxião pirena, Paraki pirena, Sãsão pirena, Xepitee pirena, Tavii pirena, Samoeo pirena, apanakini Teoso säkire säpiretakani pirena pakini. ³³ Ninoa käkiti auikari Teoso säkire. Ininiä inaiatakasaakina Teoso säkire mauïäkani, ninoa käiata. Ninoa kamari atão inakarinoka. Iuusaaki apakaparina Teoso sikaenetak-iti. Ninoa okaãka äkitimoni. Iuaritika kona äkiti okana. Äkiti nama totaãka iuusaaki.

³⁴ Xaminamoni okapeëkana, iuaritika xamina !arikana. Kona apakata okikona iouata mitaroã. Ninoa matapani, iuaritika kataparaxinirepeka itxana, kotxi auikarina Teoso säkire. Neenamati auakasaaki, patapanana ninoa, ininiä äti uãka sotatoakori miteka.

³⁵ Sitoakoro Teoso säkire auiäkani iuaãkana aua imiakori, kotxi Teoso ökitikana ninoa ipïkasaakina. Apanakini Teoso säkire auiäkani noropataãka. Imatakanapananiãrina Teoso säkire auikinina, okaãkana, iuaritika ninoa ! inirekarina itakanapinirina, kotxi ninoa imarotari äti öti Teoso ökitikana ninoa. Iuusaaki apiaerekata ninoa apakapakiti.

³⁶ Apanakini Teoso säkire auiäkani napetaãka. Inoropataãkana aãpitsaã. Apanakini Teoso säkire auiäkani iaxirikaãka, kateia äki taka inaãkana. ³⁷ Apanakini kiporonakaãka kai sooroã. Apanakini käkiti sehotxiã kitxirikaãka apanïkaki iütuna, auãkipanika inakasaakina. Apanakini okapeëka iouata mitaroã. Apanakini mäka soti auite mata, potxi mata pakini. ! Kamãkana. !Katiina. Maerekati kamakani nitana ninoa okinina ikapani. Imisiritapeëkana. ³⁸ !Apakata ikorapokoriti ninoa ikapani, kotxi ninoa iteene erekari.

Ninoa miteëkata äparaã makipakaniãtaã, ötanoxiritari auiniãtaã apaka. Aariko itixiãkiriã, kai iriko äki apaka apanakini Teoso säkire auiäkani aua, kotxi aapokona !auari.

³⁹ Teosomoni peerekana ninoa, kotxi iteene auikarina iua säkire. Iuaritika ninoa ! apakapanikari Teoso sikaenetakiti iuusaaki. ⁴⁰ Teoso nirekari apiari erekari äte ikapani. Inirekana ninoa atekata aãpakapiniri isikaenetakiti.

12*Teoso Oerekari Atão Iua Anaakori Aniniua*

¹ Ininiä kaiãopokori Teoso säkire auiäkani itixine apokakani atamataua ate uatxa. Ininiä matakanapari ikinika ate iomakotetakari. Matakanapari maerekati akamakiti, kotxi ikara patimari iaxirikiniri axinire. Ataparaxiniriritika maãuako. Mamïteenekari ikinipoko. Mitekakani mitekini atoko mamitekako Teoso oerekinimoni. ² Ätipirika maãtamatari Xesosï. Maãuikari iua säkire, kotxi iuanoka amaerekani makatxakakari. Iua txïkitakaua ate atão aãuikiniri Teoso säkire. Xesosï xinikari poxokonitxi apokini öti, ininiä iuusaaki imïteenekari aamina ipiriãmitakari nopini ipinini. !Imaãkatari pëtatxi ikara atoko ipinini. Ikinipoko iposo atoko iitopãka iri kikomoni, kotxi iparïka ate ikapani iposope. ³ Hïxinikariko Xesosï. Iteene imïteenekari maerekati kamakani manirekakaniri iua. Hïxinikariko iua, ininiä kataparaxinirei hïte. Iuusaaki lhiökapeta.

⁴ Hïarëka kona xiketapanika maerekati hïtakanapini xika. Ininiä hïte kona naiatari maerekati iua Xesosï naiatiniri atoko. ⁵ Atxiiti himaxinïkaretari Teoso säpiretakiti ate isikataparaxiniretini ikapani. Iua akiritaua iua anaakori aniniua. Ia isãkire:

Namarite, Apiananiri auiritai pite atatsirauatini atão inakari pimarotini ikapani, ininiä kona pimatinaniuatape iua misiritakasaaki pimaerekani xika.

⁶ Kotxi Apiananiri misiritana itiretakini maerekati ikamakasaakina, imaerekani itakanap-ina ikapani. Imisiritana ikinimane iua anaakori atão inakari imarotinina ikapani.

⁷ Ininiä himïteenekariko hïri iaxitikiri misiritinii himaerekani xika. Ikara himisiritiko oerekai Teoso anaakori hininiua, kotxi inïkatai hïte amarini irïtxi nïkatini atokokana. Ikiniri irïtxi ikorapokoriti auakari misiritari iua anaakori atão erekari ikaminina ikapani.

⁸ Teoso mamisiritakaniã hïte maerekati hïkamakasaaki, ininiä iua anaakori atão inakani ! hïtxaua. Teoso hïri !itxaua iuusaaki. Ikinimane Teoso säkire auiäkani misiritaãka, maerekati ikamakasaakina. ⁹ Akinika ate irïtxi aua ikorapokoriti. Ninoa misiritaua maerekati akamakasaaki.

Iuaritika ate paxitana ninoa. Apiata apaxitari aïri iaxiti auakari imisiritakasaakiaua ate, maerekati akamakasaaki, kotxi axinire iri itxaua. Ininiä akamakasaakiri aïri iaxiti auakari nireëkiti, aãuapininiika atxako. ¹⁰ Ikorapokoriti auakani irïtxi misiritaua maerekati akamakasaaki. Mapakananinani ikara atoko ikamana. Imarotakitina iaõka ikamana. Teoso misiritaua maerekati akamakasaaki ereka anini ikapani iua atoko anini

ĭkapani. ¹¹ Amisiritikosaaki, kona apoxokoniuaata, kotxi patsiiri. Iuaritika eereka akamari atāo inakarinoka. Iuasaaki erekaxinireua, kotxi Teoso oerekepekaua atakanapiniri amaerekani imisiritakasaakiaua.

¹² Ininiā hōkitikari hūuako sāpakakari. Hĭkamataparatarari hĭpotoriki iōkapetakari. ¹³ Hōeretariko kimaporĭ atāo hĭsini ĭkapani. Ikinika himaerekani hĭtakanapako. Ininiā hĭkamakiti atāo inakari aua. Ininiā apanakini hĭte amatatakani ĭrika hĭte maerekani xika. Ininiā maerekati likamana, kotxi hĭte oerekepekana erekari imarotinina ĭkapani. Ininiā erekepekana ninoa.

¹⁴ ĭkinipoko hĭkamako apanakinikata himaneenamauatakani ĭkapani. ĭkinipoko hĭkamako erekarinoka hĭkamini ĭkapani. Kākiti makamakanisaakiri erekari, kona amatapaniri Apiananiri. ¹⁵ Erepaniko, kotxi atxĭiti kona hāpakapari ĭkinipoko erekari Teoso siākiti. Kona hāuiritapiri kapixi inakari aneini hāxixinireē, kotxi ikara maxikari kaiāori kākiti. Itxikotari ninoa āxixinire. ¹⁶ Kona hāuiritapiri anokaretxi kamakani auini hĭtekata. Kona hāuiritapiri Teoso manirekakiniti kamakari Isao atoko inakari auini hĭte sauaki. Merepitipanika iponniākari iua Isao, txamari isikari iri sikaenetakiti itarimoni axapitiki ipokori apakapini ĭkapani. ¹⁷ Eereka iuaĭkana inirekamari ikara iri sikaenetakiti. Inirekari iri takiniri erekari iuamoni, txamari !apakataika iua apakapiniri. Itxiapata, kotxi mitxi ikamakiti inirekari imamakini, txamari iposope itarimoni iri sikaenetakiti isikini.

¹⁸ ĭtxakapirĭka kākiti Isaeokini sari ixirata Sinai inakorimoni Teoso paniātakiti apakapinina ĭkapani. Iuasaaki ixirata arika. Ipiā, ĭtima kataparari apaka aua iuasaaki. Ikara atoko inakari ixiratamoni kākiti maātakakitimoni lhaāpoka. ¹⁹ Ixirata Sinai inakoriātāā kākiti kenakotari trōpeta. Ikenakotari iaxitiki sākire. Iuasaaki iteene ipĭkarena auana, ininiā ! inirekaikarina ikenakotinirina apikomoni ikara sākiretxi. ²⁰ Kotxi iuasaaki ĭmĭteenekarina ia Teoso paniātakiti, kotxi iuasaaki Teoso txari: “Kākiti, pirātxipeka apaka maātakinĭri oxiratari, ikiporonakaākana kai soroā ipininina ĭkapani.” ²¹ Iua xirata auĭte kamari kākiti pĭkarauatini. Iuasaaki Moisesi txari: “Nitĭtinanaka. Iteene niĭkarauata,” itxa.

²² Hĭte kona apoka oxiratari Sinai inakorimoni. Hĭte apokeka ixirata auĭte iaxitiki Siāo inakorimoni. Hāpoka Xerosareē sitatxiti iaxitikirimoni, Teoso ātipirika auāki inakari sitatxineātaā. Hĭte apokeka Teoso nitiriakori iaxitikini apotiĭtiniātaāua. Nino a iāōtiko ! auari, kotxi kaiāopokori. ²³ Hĭte apokeka Teoso mereēkini apotiĭtiniātaāua. Iproxokoniuatana. Teoso anaakori itxauana. Iuākana iōkatsopatapeēka Teoso aātsopateē itixineē. Hĭte apokeka Teosomoni. Iuara sāpiretari kākiti misiritiko. Apaka iua ĭkitxitana atāo inakari kamakani erekari ikamakiti ĭkapani. Hĭte apokeka erekari kamakanimoni. Teoso txĭkitakana ninoa atāo inakari ikaminina. ²⁴ Hĭte apoka Xesosimoni. Iuara txĭkitakari Teoso kamaenetakiti amaneri apokini. Xesosi arēka xiketakasaaki, hĭte apoka Teosomoni. Apeo oxiketari pirātxi arēka imaerekani makatxakiko ĭkapani. Kristo oxiketari iuaka arēka ātikatika amaerekani imakatxakini ĭkapani, ininiā Kristo arēka apiaerekata.

²⁵ Ininiā erepaniko. Hĭkenakotariko Teoso sākire isākirauatakasaaki. ĭtxakapirĭka kākiti manirekakaniāri Teoso sākire sāpiretari ĭkorapokoriti auakari, imisiriākaana. Imitekinina !auari. Teoso tixine auakari sākire amanirekakaniā, apiata amisiritiko. Amitekini !auari, ininiā erepaniko. ²⁶ Teoso misākiretakasaakiri Moisesi, itixi iakeka. Uatxa Teoso sāpiretari ikamaenetakiti. Itxari: “Iuaĭkana niōkokariko itixi. Niōkokariko iaxiti apaka,” itxa. ²⁷ Isākire “iuaĭkana,” kotxi iōkokariko ĭkinipoko ikamakiti. Ninoa makatxakaākako. Auapitikako maiōkokaētakoni. Ikara kaikotako.

²⁸ Teoso auĭtetxi ininiātaāua, ate sinimoni, !iōkokaāka. Iuaātaā ixipokini !auari. Ininiā mapoxokoniuaata. Masāpiretari iua: “Peerekai pite.” Atāo maparĭkauata Teoso ĭkapani. Makamari iua apokaerekatakiti. Mapaxitari iua. Mapĭkari iua manirekakiniti akamini. ²⁹ Kotxi aTeosone xipokari imanirekakiniti, xamina tirinakari xipokiniri atokokana.

13

Iōkatsopari Mapotōkire Pirena

¹ Ininiā hĭtĭretakauako. Itaritxi atoko hĭtxako, kotxi Teoso anaakori hĭtxaua. ² Ātiātaā ĭkani apokiniā, hāpakapanako ninoa haāpoko. Apanakini apakapakasaakina ātiātaā ĭkani, apakapana Teoso nitiriakori itixinekini. Iuasaaki !imarotarina ninoa Teoso nitiriakori ininiuana. ³ Hĭtĭretanako Teoso sākire auĭākani kateia āki auakani. Kateia āki ninoakata hāuini atokokana, hĭxinikanako ninoa. Ininiā hĭtĭretanako misiritakoni. Kākiti misiritiniāi hĭte, iuasaaki hinirekari apanakini tĭretinĭi. Iua atokotxikana hĭtĭretanako misiritakoni.

⁴ Hĭpaxitaroko āti ĭtanoro. Hĭpaxitariko āto ĭtaniri. Pitanirĭkatanani pisirĭkako. Pitanorokatanani pisirĭkako. Teoso misiritanako ĭkinika kanokarero, kanokareri pakini.

⁵ Txineiro !hĭtĭretape. !Hinirekapiri āti kākiti nakiti. Hĭpoxokotariko hĭteka tĭi, hĭteka txineirote pakini. Apikomoni !hinirekape, kotxi Teoso txari:

Nimatakanapapekaniikariko hĭte. Nimasikepekaniikariko hĭte,

itxa. ⁶ Ininiã ia Teoso sãkire iõkatsopatakori aãuika:

Apiananiri nimoianari itxaua, ininiã kona nipikari kãkiti kaminiri maerekati notamoni.

⁷ Hixinikariko hãuũteakori Teoso sãkire hĩtemoni sãpiretakani. Hixinikariko ninoa auini, ninoa ipinini apaka. Hãuũkariko Teoso sãkire ninoa auikiniri atokotxikana. ⁸ Xesosi Kristo kitxakapirĩka atokotxikana uatxa. Xesosi Kristo uatxa atokotxikana ãtipirika.

⁹ Kona hãuũkapiri apanakini oerekakiti atão minakati, kotxi ikini sereti oerekakori atão minakati auapitika. Hãuũritariko ikinipoko erekari Teoso sikakiti sikataparatiniri hãkixinire. Anikakiti !isikataparatarari aãkixinire, ininiã !hãuũkapiri kãkiti sãpiretinii apanakini nipokori erekari hixinire ikapani, apanakini nipokori !erekari hixinire ikapani.

¹⁰ Sasetotxiakori Teoso aapoko aamata kamakori ãki parĩkauatakani Teosomoni sikakori takikoãtaã !apakaparina erekari Teoso sikakiti ate apakapiniri atokokana.

¹¹ Teoso aapoko aamata kamakori auakasaaki, sasetotxiakori auũte apiatakari anikari pirãtxi arẽka Teosonani Auini Pakitaãtaã. Iuaã isikari pirãtxi arẽka Teosomoni kãkiti maerekani Teoso makatxakini ikapani. Iua pirãtxi ito anikaãka aapokotxi mapotõkire. Iuaã arikaãka. ¹² Xesosi pirãtxi okakori atoko itxa, kotxi anikaãka sitatxi mapotõkire okiko ikapani. Ininiã iua arẽkaã imakatzakari kãkiti maerekani, ikamaerekatinina ikapani. ¹³ Ininiã masa iuamoni ipininiãtaã. Iua napetiko atokokana maãpakapa. ¹⁴ !korapokoriti kona au sitatxi maxipoãkati. Aiãtapari sitatxi iaxiti ikari.

¹⁵ Kipa asika Xesosimoni Teoso ikapani? ãtipirika masikari asãkire erekari. Matxari: "Peerekari Teoso." Ikara asikakiti Teosomoni, kotxi asãpiretari kãkiti iua aãuũte ininiua. ¹⁶ ! Himaxinikaretapiri erekari hikamini apanakinimoni. ! Himaxinikaretapiri himoianatakiniua. Ikara atoko akaminiã, Teosomoni asikakiti inireẽkiti atoko itxa, ininiã ikara atoko inakari akaminiã, ikamapoxokonitari Teoso.

¹⁷ Hikãpitariko hãuũteakori sãkire. Hikamariko ninoa paniãtakiti, kotxi ninoa nĩkatari hixinire. Teoso sikari ikara parĩkatxi ninoamoni, ininiã ãti õti ninoa sãpiretari Teoso ikamakitinina. Ininiã hikamariko ninoa paniãtakiti, ininiã iuaasaaki ninoa poxokoniuata iparĩkauatakasaaki. Himakamakaniãri ninoa paniãtakiti, ninoa matinaniuata, ininiã ikara atoko inakari ! erekari hĩte ikapani.

¹⁸ Himisãkiretariko Teoso ate ikapani. Aimarotari aãkixinire ereka inini, kotxi anirekari ikiniõtika atão inakarinoa akamini. ¹⁹ Iteene namanaãi himisãkiretiniri Teoso, iua paĩtiki iokanatinino iuaĩkana hĩtemoni.

Teoso Misãkiretikoo

²⁰ Nimisãkiretari Teoso, kãkiti kamaerekaxiniretakari. Aãuũte Xesosi ipĩkaripeka inakasaaki, Teoso õkitikari iua. Soti auũte atoko atxaua. Soti auũte nĩkatakari apiari atoko itxa Xesosi, ininiã iua iteene nĩkataua. Xesosi ipĩkasaaki, iuaasaaki kãkiti apakapari Teoso sikaenetakiti. ãtipirika Teoso sikari ikara isikaenetakiti kãkitimoni. ²¹ Nimisãkiretari Teoso isikiniri ikinika erekari hinireẽkiti hĩtemoni, iua nireẽkiti hikamini ikapani. Namanaãri iua Xesosi Kristo uãkaã, ikaminuaa ate iua apokaerekatakiti. ãtipirika kãkiti txari Xesosi: "Erekaĩ pite." Ameẽ.

²² Nitariakori, iteene hĩkenakotariko ikara nisãpiretakiti. Ia niõkatsopatakiti xapitinoka.

²³ Ninirekari himarotiniri aĩtari Tximõtxio kateia ãki auakari sikakaãka. Mokatanitika iua apokiniã uai, nota sari iuakata hĩtemoni. ²⁴ Hĩsãpiretari hãuũteakori ate xinikamanapitinina ninoa. Hĩsãpiretari ikinimane Teoso nakitiakori axinikamanapitinina. Xesosi sãkire auĩãkani uai Hĩãria xixini auakani xinikamanapitai hĩte. ²⁵ Ikinipoko erekari Teoso sikakiti auã hĩtemoni.

Ameẽ.

TXIAKO

Txiako Iokanatsopatakiti

¹ Nota Txiako. Teoso nitiri nitxaua. Apiananiri Xesosi Kristo nitiri nitxaua apaka. Niökatsopatar i a aätsopa hitemoni, Xoteoakori tosi nirimanetximoni Xesosi säkire auäikanimoni. Hite iarikape ikinika itixiti.

Ereëkai hite.

Auiäkori Ataerekatiko

² Nitariakori, ikini sereti maerekati apokasaaki hitemoni, hieneniäkako, kotxi ikara ataerekatai hite. ³ Kotxi himarotari häuiäkiti ataerekatikosaaki, hūtaparaxinireritika häua. Himiteenekari imakinika himisiritiko hūpoxokoniritika. ⁴ Ininiä imakinika himiteenekasaaki, hūxinikakiti, hūsäkire, hikamakiti pakini erekari. Kona apikomoni pinireka ereka pinini ikapani.

⁵ Himarore mauakanisaaki, hamanaäri Teoso imarore isikinii ikapani. Ininiä isikaiko hite hamanaäkiti. Itori Teoso sikakiti ikinimanemoni. !Isäpaka ate ätipirika aamanainiri iua. ! Itxtai. Isikapitukari hamanaäkiti. ⁶ Hamanaäkasaakiri, häuikariko Teoso sikinii hamanaäkiti. !Erekari hūxinikiniri: "Atxiiti iua sikano namanaäkiti. Atxiiti kona isikano namanaäkiti." Ikara atoko ! hūxinikape. Ikara atoko xinikakari, tsakati potxoari uinitikiri atoko itxa. Itima anikari tsakati itano, eereka ititika. Käkiti ikara atoko inakari, äti öti auikari Teoso säkire, äti öti kona auikari Teoso säkire. Itxaäpota. ⁷ Käkiti ikara atoko inakari kona xatiki apakapari Apiananiri säkiti, ⁸ kotxi ipi ixinikakiti aua, ininiä apanakini !auikari isäkire ikamakiti tükane.

Matiiti, Katiiri Pakini Poxokoniuatini

⁹ Pite äitari Teoso säkire auäikari, atxiiti poiäori pitxaua, iuaritika pipoxokoniuatoko, kotxi Teoso txikitakai pite apiari pininiua. ¹⁰ Pite katiiri, pipoxokoniuatoko, kotxi Teoso kamapoiäotakai pite, kotxi katimari pixipokini aäui katimari xipokini atoko. ¹¹ Atokatxi kanikasaaki, kapatakari itxaua. Iuasaaki katsotati txiaroka. Iiui katxaka. !Erekaikaro. Iua atokokana käkiti katiiri xipokini. Paütiki ipinako, ininiä itakanapariko imakinika itii, iparika pakini.

Misirikaretxi Miteenekakani

¹² Teoso takari erekari käkitemoni imisiritiko miteenekakarimoni, Teoso säkire matakana-pakatimoni. Ikinipoko imiteenekasaaki, Teoso txikitakari iua ätipirika auini Teosokata. Apiananiri sikaenetari ikara iua tirketanimoni.

¹³ Pinirekasaakiri maerekati pikamini, kona pitxapiri: "Teoso sikanireötano maerekati nikamini," kotxi Teoso kamanireötiko maerekati ikamini ikapani !auari. Apaka kona Teoso sikanireötari käkiti maerekati ikamini ikapani. ¹⁴ Käkiti sikanireötäka maerekati ikamini, kotxi iua ito nireëkiti kosekari iua maerekati ikamini. Iuasaaki iteene inirekari inireëkiti ikamini. ¹⁵ Maerekati piito nireëkiti pikamakasaaki, maerekati itxaua. Ininiä eereka maerekati pikamapika. Eereka iua maerekati txikitakari pixinire ipinini.

¹⁶ Nitariakori nota tirketakini, kona häuiritapiri äti misirienetini. ¹⁷ Ikinipoko sikakori erekari atao inakari, iaxitikiri itxaua. Äiri sikakiti ikara. Iuara kamari atokatxi, kasiri, iöriki pakini ponikini. Iua ätipirika kamari erekarinoka. Kita, uatxa, katana pakini, iua atokotxikana äiri Teoso. ¹⁸ Aponaniä iuaikana ääixinireë, kotxi aäuikari iua säkire. Iua nirekari aponaniä ikara atoko. Teoso kamari ikinipoko. Ikamakini, merepanika iuaikana ponaniäkani, atxaua ate.

Teoso Säkire Kipitiko Pirena

¹⁹ Ininiä nitariakori nota tirketakini, iteene himixinikariko äti säkire. Eereka iteene hūxinikariko hūkenakotakiti, hūsäkirautini apisapanika. Katima !hūtxape hinaiatiniua. Hinaiatiniua apisa hūxinikariko hikamakiti tükane, ²⁰ kotxi käkiti omanäkarauatakasaaki, !ikamari atao inakari Teoso paniätakiti iäoka. ²¹ Ininiä hōkariko ikinika maerekati häixinire txikotakari. Hūtakanapariko ikinipoko maerekati. Häuikariko Teoso säkire häixinireë takakori. Himarotariko iuanoka makatxakiniri himaerekani.

²² Teoso säkire akenakotakanani atxa, !hūtxape. Hikamariko isäkire iäoka apaka. Teoso säkire kenakotakani makamakaniäri ipaniätakiti, ninoaka misirienetaua. ²³ Teoso säkire kenakotakari makamakaniäri isäkire iäoka, kiki ätakaäriä atamatoötakari atoko itxa. ²⁴ Iua itoö atamataka atoko, isa. Iuasaakipeka imaxinikaretoötapekua. Isanöka !ixinikaika. ²⁵ Ikinika Teoso paniätakiti erekari. Maerekati kamakani iaxirikakoni atoko. !Iposotarina erekari ikaminina. Ininiä käkiti kamakasaakiri Teoso paniätakiti, Teoso paniätakiti sikakari käkiti

erekari ikamini ikapani. Käkiti iteene imarotiniäri Teoso paniätakiti, imamaxinikaretakaniäri, ätipirika ikaminiäri, ininiä Teoso takari erekari iuamoni, ikamakitimoni.

²⁶ Käkiti säpiretiniäri: “Nota auikari Teoso säkire. Nikamari iua säkire iaöka,” txamari käkiti nini iauite atoko itxa. !Iposotari iotokakiniri maerekati isäpiretini. Iuaka misirienetaua. Iua auäkiti na atão. Ikamakiti na atão apaka. ²⁷ Käkiti auäkiti atão inakari auakasaaki, ikamakiti atão inakari auakasaaki, aäri Teoso apokaerekatari. Iua käkiti kamari ia atoko: Itiretana imenökariakori, tikinitakoni pakini, kotxi maureni ninoa. !Auiritari ikorapokoriti maerekati txikotiniri iua äkixinire.

2

Hïpaxitana Ikinî Käkiti

¹ Nitariakori, Xesosi Kristo aäuite Apiananiri itxaua. Iua säkire atão auäkani hininiäua, ininiä hïpaxitariko ikinimane käkiti. !Apakata hïpotxitakininani hïtiretini. ² Maxinikariko. Atxiiti hïpotxitakasaakia, kiki apoka eremäkari. Iuakokiä aneo oro kamakoro aua. Apaka iuasaaki apoka äti kiki matiiti. Kitxakari imäka. ³ !Apakata hïpaxitiniri eremäkarinoka. Hïsäpiretiniäri: “Uai iitopanaxi ereri nopini piitopäka,” pitxari. Txamari hïsäpiretari matiiti: “Ikiraä pitima.” Atxiiti hïsäpiretari iua: “Uai ixiti nikiti takote piitopäka,” pitxari. Ikara atoko hikaminiä, !apakata. ⁴ Ikara atoko hikamakasaaki, hïxinikari katiiri apiaerekatini, matiiti poião ereka inini. Iuasaaki hïxinikäkiti na atão itxaua. Hïkixinire maerekati itxaua.

⁵ Nitariakori nota tiretakini, hïkenakotariko nisäkire. Teoso mereëpekarî matiini ikorapokoriti auakani isäkire iteene auikinina ikapani. Ininiä ninoa Teoso tiretakani sariko Teoso auitexi ininiätaäua. Ikara isikaenetapeka iua tiretakanimoni. ⁶ Txamari hïte kona paxitana matiini. !Apakata. Katiirinira misirienetai hïte. Ninoa anikai hïte käkiti misiritiko mereëkanimoni. ⁷ Ninoa katiirini misäkirepiretari Teoso. Peerekari iua uäka, iuaritika ninoa kona paxitari iuäka. Ninoa misäkirepiretakiti nakitiakori hïtxaua hïte.

⁸ Kitxakapirïka Teoso säkire iökatsopatakori txari:

Piteka pitiretiniua atokokanera, pitiretanako pite takote auakani.

Ikara ikinimane auite paniätakiti hikaminiä, hikamari atão inakari. ⁹ Hïtiretiniäri hïpotxitakininani, maerekati hikama. Ikara Teoso paniätakiti oerekai maerekati kamakani hininiäua. ¹⁰ Ikinika Teoso paniätakiti hikaminiä, txamari ätinoka Teoso paniätakiti himakamakaniä, ininiä ikinika ipaniätakiti makamakani atoko hïtxaua. ¹¹ Teoso txari: Kona pisirïkape pïtanoro minakotokatika.

Apaka itxari:

Kona pokaniuatape.

Atxiiti kona pisirïka pïtanoro minakotokatika, txamari pokaniuata, ininiäkara !pikamari ikinika Teoso paniätakiti. Ätika Teoso paniätakiti pimakamakaniä, !apakata. Ikara atoko ininiä, Teosomoni maerekati kamakari pitxaua.

¹² Teoso säkire iaöka akaminiä, aposotari erekari akamini. Öpölkakoni atoko atxaua. Maerekati !imaikaikaua. Ininiäkara atão hïsäkirauatoko. Atão inakari hikamako, kotxi Teoso kamariko hïtemoni isäkire iaöka. ¹³ Himaamonïkaniäri äti, Teoso kona amonïkai hïte. Imereëri himisiritiko. Apiaerekata hiamonïkiniri äti, maerekati ikamakasaaki. Poião erekari himisiritiniri iua imaerekani xika.

Käkiti Säkire, Käkiti Kamakiti Pakini Pirena

¹⁴ Nitariakori, käkiti txari: “Nota Teoso säkire auäkari nitxaua,” itxamari, likamari Teoso nirekaäkiti. Atauako iua auikari Teoso säkire? Atauako, iua säkire posotari imakatzakiniri imaerekani Teosomoni isini ikapani? Konapitini. ¹⁵ Atxiiti hïtari, atxiiti hïtaro Teoso säkire auäkani imäkana !auari. Atxiiti nipokori !auari ninoamoni. ¹⁶ Iuasaaki atxiiti hïtxana: “Hïsipiniikaua, erekaxinire hinini. Kamäkaiko. Iteene hinikako,” hïtxana atxiiti. Txamari iuasaaki mäkatxi !hïsikana, nipokori !hïsikana. Ikara atoko hikaminiä, !apakata hikamakiti. Hïsäkireninira hïsikiniä, ininiä maxikatïika hïsäpiretakiti. ¹⁷ Atxiiti ikara atoko atxa. Asäpiretari aäuikiniri Xesosi säkire. Txamari kona akamari ipaniätakiti. Ikara atoko aniniä, asäkire kona itxa. Aäuikäkiti säkiretxiti ipinakari atoko itxa. !Kakamareri iua.

¹⁸ Käkiti atxiiti txari: “Pite auikari Teoso säkire. Nota parïkauata Teoso ikapani.” Piposotari atxiiti poerekinino pauikäkiti, Teoso paniätakiti pimakamakaniäsaaki? Kona piposota, kotxi atão pauikäkiti !auari. Notapekana, nota posotari noerekiniri nisäkire nauikäkiti nikamakitiä Teoso paniätakiti nikamakasaaki. Ikara atoko nininiä, käkiti imarotapitikari atão nauikiniri Xesosi säkire. ¹⁹ Pite auikari ätinani Teoso auini. Ininiä erekapitikari pauikakiti. Txamari ikara !imakatxakari pimaerekani Teosomoni pisini ikapani, kotxi Satanasi nitirïakori apaka auikari ätinani Teoso auini. Iua xika ninoa titinanaka ipïkarauatinäna. Ninoa imarotari äti öti ixipokinina.

²⁰ ! Kĩĩketei pite. Pinirekatari noerekinii ! apakata pisãkireẽ pauikiniri Xesosi sãkire, iua paniãtakiti iaõka pimakamakanisaaki. Iuasaaki pisãkire na atão. Ipĩkari atoko itxa. ²¹ Maxinikariko ate apika atokirini, Apraão. Kitxakapirĩka isikasaakiri amarite Isaki inakori Teosomoni sikakori takikoãtaã, iuasaaki Teoso apokaerekatari ikamakiti, kotxi ikamakiti oerekari Teoso, iua auikiniri isãkire, ininiã Teoso kamaerekatari iua. ²² Ininiã himarotari atão iua auikiniri Teoso sãkire. Ikamakiti oerekari isãkire atão inini. Hĩxinikari iua. Atão ikamari Teoso paniãtakiti, ininiã atão iua auikari Teoso sãkire. ²³ Ininiã Teoso sãkire iõkatsopatakori apokapeka. Itxari: Apraão auikari Teoso sãkire, ininiã Teoso txĩkitakari iua atão inakari ikamini, Teoso apakap-iniri ikapani.

Ininiã iua akiritaãka Teoso moianari. ²⁴ Ininiãkara ia himarota. Teoso kamaerekatari kãkiti ãkixinire isãkire iaõka ikamakasaaki. Kona Teoso kamaerekatari kãkiti ãkixinire, isãkirenoka auakasaaki. Inirekari atamatiniiri kãkiti parĩka apaka.

²⁵ Ato atão Teoso sãkire auĩkaro nisãpiretai hĩte. Kitxakapirĩka kanokarero Haapi inakoro aua. Teoso kamaerekatari oa ãkixinire, kotxi oa apakapana Xosoeo iokanatakini otixine apokasaakina. Oaãpoko okipatana nino. Iuasaaki oa oerekana ãti kimaporiti imitekinina ikapani.

²⁶ Kãkiti ĩtoã ixinire mauakanisaaki, iua ipĩpe. Iua !kakamareri. Ininiã iua atokokana iua sãkire iua auĩkiti ipinakari atoko, erekari imakamakanisaaki. Iua auĩãkitinani, isãkirenani, ĩmakatxakari imaerekani.

3

Kãkiti Nini Pirena

¹ Nitariakori, ! apakata itori hĩte Teoso sãkire oerekakani hininiua, kotxi ate Teoso sãkire oerekakani maerekati akamakasaaki, apiata Teoso misiritaua ate. ² Amakinika ate kerokapanikari. Kãkiti makerokakaniãri isãkire, ininiã erekari iua. !Auiritari ĩto kaminiri maerekati.

³ Anirekasaakiri kavaro kĩpitiniri anireẽkiti, atakari inamaã metaoke ĩpiriãketakari. Ininiã iuasaaki ikamariko anireẽkiti. Ia metaoke axapitikeri, iuaritika aposotari akakiriokiniri kavaro, ininiã isari anirekinimoni.

⁴ Apaka hĩxinikaroko maporo. Maporo mitaro. ĩtima kataparari anikaro. Maporo oerekakere axapitiki, iuaritika kãkiti kakiriokaro maporo oerekakireẽ, ininiã maporo sari kãkiti nirekinimoni.

⁵ Iua atokokana, aĩtoã auakari anini apaka axapitiki, iuaritika iposotari iteene maerekati ikamini. Hĩxinikariko. Xaminaminiki axapitiki, iuaritika iposotari iotikiniri itori kiki.

⁶ Iua atokokana ninitxi. Xamina tirinakari atoko itxa, ininiã kona erekari. Maerekati ninitxi sãpiretakiti. Iarika kãkiti xinireẽ ikinika, xamina ĩtopa iarikini atoko. Ininiã iua maerekatina itxa, ininiã ikinipoko ikamakiti maerekatina. Maerekani misiritikoãtaã ĩkari itxa asãkire maerekati. Xamina tirinakari iuaãtaãkiri atoko itxa asãkire maerekati.

⁷ Kãkiti piratarari ikini sereti kaxipiri ĩtopakiri, kotipiriki, imini, iaã auakari pakini. Itori kãkiti piratapeka. ⁸ Txamari ninitxi paneenamari. Kãkiti !iposotari imĩkapiritiniri inini. Kona ikamari anireẽkiti. Imini katiĩri atoko itxa. Imini tsiĩ posotari okiniri kãkiti. Iua atokokana, kãkiti sãpiretakiti posotari okiniri kãkiti.

⁹ Anini posotari isãpiretiniri erekari aĩri aãũtemoni. Apaka iposotari maerekati isãpiretini kãkitimoni. ĩkora atoko !erekari, kotxi Teoso kamari kãkiti iuaka atoko inakari ikapani.

¹⁰ Anamaã potorika erekari, maerekati pakini. Nitariakori, ia koketakori na atão. ! Apakata. ¹¹ Amomo !posotari ãparaã ponikoãri, posiãri pakini otĩkitakini. ¹² Nitariakori, atauako mãka mina iritari !õpeta? Atauako iõpeta mina iritari mãka? Konapitini. Apaka amomo ãparaã ponikoãri !auari ãparaã maxiãri pakini. Iua atokokana kãkiti sãkire. !Apakata kãkiti ãti õti isãkire ereka inini, ãti õti isãkire maerekati inini.

Imaroretxi Pirena

¹³ Kiripa kimaroreri hĩte sauaki auakari? Kãkiti atão kimaroreri inakari, oerekari imarore ikamakiti erekari ikamakasaaki. Erekari ikamakasaaki, !iuikaua, kotxi atão imaroretxi auiniã kãkitimoni, ! auiritari iua iuikiniua. ¹⁴ Txamari pinĩkatiniãri xikoretxi paxixiri pãkixinireẽ, piteka nireẽkitinani pinirekiniã pãkixinireẽ, kona pitxape: “Kimaroreno nota.” Iuasaaki kona pikipatapiri atão inakari. ¹⁵ ĩkora pimarore !iaxitikirini. ĩkopokoritikirinokara ikara pimarore. Ikara pimarore piĩto nireẽkitikara. Imaroretxi ikara atoko inakari Satanasi oerekakiti. ¹⁶ Xikoretxi auakasaaki, piteka nireẽkitinani pinirekini auakasaaki, ikara atoko inakasaaki, neenamatinokara aua, ikini sereti maerekati aua apaka.

¹⁷ Imaroretxi iaxiti ikari kona ikara atokoni itxa. Iua imaroretxi imarotakari, erekari-noka ikama. !Nirekari neenamatzxi. Merepitipanika ixinikari apanakini kākiti nireēkiti. Apiananiri nireēkiti ikama. Iamonīkari āti. Erekarinoka ikama ātimoni. Apiarimoni isākire atokotxikana isākire poiāorimoni. Ikamakiti isākire iaōka itxa. ¹⁸ Kauaīreri ōtākikari apanakini imaneenamauatakani, ininiākara itori kākiti kamari atāo inakaranoka.

4

Īkorapokoriti Auakani Nireēkiti !Hinirekape

¹ Neenamatzxi auakasaaki hītemoni, hītxitakakasaakiaua, nāpa ikara atoko inakari potorika? Hākixinireē ipotorika neenamatzxi. Hinireēkiti maerekati xika hineenamauata. ² Hinireēkiti kona hāpakapa, ininiā hōkari āti. Iteene hinirekari āti nakiti, txamari !hāpakapari hinireēkiti. Hītxitakakaua. Hineenamauata. Txamari kona hāpakapari hinireēkiti. Kona hamanaāri Teoso hinireēkiti hāpakapini ĩkapani. Ikara xika kona hāpakapari hinireēkiti. ³ Atxiīti Teoso hamanaākasaaki, kona hāpakapari hinirekakiti, kotxi hamanaākasaaki, maerekati hīxinikapanika. Hinirekari hāpakapiniri hamanaākiti hītenani ĩkapani, hītenoka poxokoniuatini ĩkapani. Ikara xika Teoso !isikai hinireēkiti.

⁴ Kanokarero, kanokareri pakini atoko hītxaua. Hīte takanapari Teoso, ĩkorapokoriti auakaninoka hītiretini ĩkapani. Hītiretiniāri ĩkorapokoritinoka, iuasaaki homanatarī Teoso. Hinirekiniāri ĩkorapokoriti auakani nireēkiti, ininiā Teoso mokaiakari hītxaua. ⁵ Kona maxikatīlka Teoso sākire iōkatsopatariki sāpiretaua ia atoko inakari:

Erekari Matamatakoti aākixinireē auakari nirekari iteene anirekiniri Teoso tīretiniua. Iua !nīnīrekarī anirekiniri ĩkorapokoriti auakaninoka tīretiniua.

⁶ Teoso sikari iteene erekari atemoni, kotxi Teoso sākire iōkatsopatariki txari:

Teoso ! apokaerekatari kākiti iuikakanua. ! Imoianatana ninoa. Kākiti miuikakanua, ikinipoko erekari isika ninoamoni.

⁷ Ininiā hāuiritariko Teoso hīauite ininiua. Iua nireēkitinoka hīkamako. Kona hīkamapiri Satanasī nireēkiti. Kona hīkīpitapiri iua sākire, ininiā eereka iua miteka. ⁸ Teosomoni hāpokako, ininiā iua apoka hītemoni. Maerekati kamakani hininiāua, hītakanapariko hīmaerekani. Kona hāuiritapiri hīuako kaminiri maerekati. Hītepekana, hīte sākire ipinimoni itxa. Hākixinire xinikakiti ipinimoni itxa. Ininiākara hīokanatariko maerekati hākixinire auakari, erekarinoka kaikotini ĩkapani. ⁹ Himatinaniuatoko, hītxiapatoko iteene, maerekati hīkamakiti xika. Hītakanapariko hīsiroatini hītxiapatinini ĩkapani. Hītakanapariko hīpoxokoniuatini himatinaniuatini ĩkapani. Ikara atoko hīkamako, maerekati hīkamakiti xika. ¹⁰ Apiananirimoni hītxariko: “Nīmaerekani xika !erekano nota. Minakatī nitxaua. ! Nīposotari erekari nikamini. Pīamonīkano,” hītxariko Teoso. Eereka iua sikataparaxiniretai hīte.

!Himisākirepiretapiri Hītari

¹¹ Nitariakori, ! himisākirepiretakapeua. Āti misākirepiretiniāri āti, kona ipaxitari Teoso paniātakiti. Āti akiritiniāri āti: “Maerekati kamakari,” akiritari Teoso paniātakiti: “maerekati.” Ikara atoko inakasaaki, iuamoni iuaka sākire apiata, ininiā iua !ikamari Teoso paniātakiti iaōka. ¹² Teosonokara atāo inakari imarotakari aua. Iuanoka posotari isāpiretiniri kākiti: “Pīte kamakiti kona erekari. Pītepekana kamakiti erekari.” Iuanoka posotari ikara atoko inini, kotxi iuanoka posotari kākiti maerekani imaktxakini. Iuanoka posotari iokanatiniri kākiti imisiritikomoni. !Apakata ikara atoko hīte ininiri apanakini.

Katana Kamaenetakori

¹³ Atxiīti hīte txari: “Atxiīti uatxa, atxiīti katana asa sitatximoni. Anapariko ātikanani iuaātaā. Aparīkauata itomane txineiro aāpakapini ĩkapani,” hītxama. ¹⁴ Txamari kona himarotari katana auakari tīkane. Kanatokopa itxa kākiti? Ianiī atoko itxa kākiti. Ianiī apoka, eereka patimari ixipokini. Ikara atoko kākiti auini. ¹⁵ Apiaerekata hīsākire ia atoko hinini: “Teoso nirekiniāri, nauapanika ninakasaaki, nikamariko ikara parīkatxi,” hītxako. ¹⁶ Ikara atoko himasākirauatakaniā, hīuikaua, kotxi hīuikari hīkamakiti tīkane. Maerekati ikara atoko inakari. ¹⁷ Ininiā erepaniko. Kākiti erekari imarotakani makamakaniāri ikara erekari imarotakiti, ikamari maerekati.

5

Katiiri Pirena

¹ Hīkenakotariko nisākire. Ikinika katiirini kapotxinanirini hīkenakotariko nisākire. Hītxiapatoko. Hākiripoatoko, kotxi itori hātatsire apokako hītemoni. ² Hītii paiakepeka. Kapite nikapekari himāka. ³ Hinakiti oro kamakori, pīrata kamakori pakini oereēkatapeka. Ikara oerekari hīkamakiti !apakata. Hītii xipokini atoko, hīte apaka xipokako. Apiata himisiritiko.

Maxikatiika hāpotiitari hīti, kotxi itixi xipokini ōti apokanapanoka. ⁴ Himarotariko ia. Kākiti hīte kikioteē parīkauatakasaaki, himisirienetana ninoa. Na atāo hīkitixitana iparīkana īki. Ininiā ninoa akiritari Teoso. Iuasaaki Apiananiri kaposotiireri kenakotari ninoa sākire. ⁵ Īkorapokoriti hāuakasaaki, ikinipoko aua hītemoni. Hiamotari ikinika hīto potxitakiti. Kākiti sikari kema auite ito kienatxi, okiko ōti manapi paīperi inini ĩkapani. ⁶ Hīte iokanatapekari kākiti erekarini ipininimoni. Hōkapekana ninoa maxikatiika. Ninoani kona naiatai hīte, iuaritika hōkana ninoani.

Apiananiri Kanapiriini Hiātapari

⁷ Nitariakori, atxiiti hītemoni ! katimari Apiananiri kanapiriini, iuaritika hiātapariko hīpoxokoniritika, kotxi himarotapitikari āti ōti iua kanapiriini. Hīxinikariko katakareri. Iua iātapapikari itakare aneini, ikiena iposope inikini ĩkapani. Iātapari āparaā kipini itakare aneini ĩkapani. Iua imarotapitikari ikiena aneini, ininiā iātapari. ⁸ Iua atokokana hiātapariko Apiananiri kanapiriini. Hītaparaxinireritika hiātapari, kotxi Xesosi kaiaampeka ikanapiriini. ⁹ Nitariakori, kona hītxitakapeua. Hītxitakakiniāua, hāpakapariko himisiritiko. Kākiti misiritiko mereēkari kaiaampeka apokini hītemoni.

¹⁰ Nitariakori, hīxinikariko Teoso sākire sāpiretakani, kitxakapirīka auakani, sāpiretari Teoso sākire Teoso posotiireē. Ninoa misiritaāka, iuaritika ninoa mīteenekari imakinika. Ninoa oerekaua amīteenekiniri imakinika. ¹¹ Ari, aimarotari Teoso takari erekari misirikaretxi mīteeneēkanimoni. Hīxinikari Xo inakori. Iua iteene atatsiirauata, iuaritika, ! itakanapari Teoso. Atatsiirauataka atoko, Apiananiri sikari ikini sereti erekari iuamoni, kotxi kati-raōkiri, kaamonīkareri itxaua iua.

¹² Nitariakori, “Ari,” hinakasaaki, “Kona,” hinakasaaki, kona maxikatiika hīsākirauatape. Hīkamariko hīsāpiretakiti iaōka. Hīkamaenetakiti hīsāpiretakasaaki, kona hākiritapiri Teoso tixine auakani uāka, kona hākiritapiri itixi auakani uāka, hīsāpiretakiti apanakini atāo imarotini ĩkapani. Na atāo hīsākire ininiā, Teoso misiritapitikai.

Teoso Misākiretiko Kākiti ĩkapani

¹³ Hātatsiirauatakasaaki, himisākiretariko Teoso. Hīpoxokiniuatakasaaki, hīxikarauata Teoso ĩkapani. ¹⁴ Āti amianatakasaaki, hīpīkapietanako kōtākikarerini Xesosi sākire auiākani Teoso imisākiretinina amianatakari ĩkapani. Iuasaaki itakarina iītxi iua amianatakari nopini Apiananiri uākaā. ¹⁵ Hāuikiniāri Teoso posotiire himisākiretakasaakiri Teoso, iua makananitapitikari iua amianatakari. Ininiā Apiananiri ōkitikariko iua. Maerekati ikaminiā, Teoso makatxakari imaerekani apaka. ¹⁶ Ininiā hīkerokakiti hīsāpiretakakauako. Himisākiretariko Teoso āti ĩkapani. Ininiā apanakini misākiretariko Teoso hīte ĩkapani. Iua atokokana, Teoso txīkitakari hākixinire ereka inini. Atāo inakarinoka kamakari sākire kataparari, Teosokata isākirauatakasaaki, kotxi Teoso kamapitikari iua amanaākiti iaōka.

¹⁷ Kitxakapirīka Erīasi inakori, ate atoko inakari iua. Iua misākiretari Teoso itapararitika āparaā makipakani ĩkapani. Ikara atoko inakasaaki, āparaā ! ikipa ipi āti pakini anokanani, seisi kasiriti. ¹⁸ Iuaīkana imisākiretari Teoso āparaā iuaīkana ikipini ĩkapani. Ininiā āparaā kipa. Iuaīkana itixi iriuita.

¹⁹ Nitariakori, āti takanapiniāri atāo inakari Teoso sākire, hōtākikariko iua Teosomoni ikanapiriini ĩkapani. ²⁰ Maerekati kamakari takanapiniāri imaerekani, iua pōtākikasaaki, ininiā pite makatxakapekari iua ipinini. Teoso makatxakari ikinipoko maerekati ikamakiti.

1 PETRO

Merepanika Petro Iokanatsopatakiti

¹ Petro nitxaua nota. Xesosi Kristo iokanatakiti nitxaua. Niokanatsopata hïte Xesosi sâkire auïâkanimoni. Hïte iarikape Pôto tixiniâ, Karásia tixiniâ, Kapatósia tixiniâ, Ásia tixiniâ, Pitxínia tixiniâ pakini. Hítakanapari hïteka tixine Xesosi sâkire hâuikini xika. Áti uâkakata hâuanâta.

² Aïri Teoso mereëi hïte iua nakitiakori hininiua ïkapani. Itixi kamiko apisa, iua imarotapekari hïte iua anaakori hininiua. Erekarî Matamatakoti parïkauata hâkixinireë Teoso nireëkitinoka hïkamini ïkapani. Ininiâ uatxa hïposotiire aua Xesosi Kristo paniâtakiti hïkamini ïkapani, kotxi Xesosi Kristo arêka xikepoata hïte ïkapani. Teoso sikari ïkinipoko erekarî hïtemoni. Itori isikai. Iteene ikamaerekaxiniretai.

Kâkiti Maerekani Makatxakiko

³ Mamisâkiretari Teoso: “Peerekai pite. Aâuïte Xesosi Kristo Teosone pitxaua. Iua iri pitxaua,” matxari. Maerekati kamakanuia, iuaritika iteene iamoniãkaua. Itxïkitakari axinire iuaïkana iponaniini, kotxi Xesosi Kristo ipina, iuaritika iuaïkana ôkitikaua. Ininiâ ïkiniôtika aimarotari Teoso kaminiri ïkinipoko ikamaenetakiti. ⁴ Iuaïkana axinire iponaniâ, ininiâ iua anaakori atxaua. Ininiâ aïri potetakiti erekarî aua itixineë aâpakapini ïkapani. Ikara ipotetakiti lixipoka. !Oerêkata. Auapika. Teoso nïkatari ikara hïte ïkapani.

⁵ Hïte auikari Teoso sâkire, ininiâ iposotiire tokapakeëtai hïte. Hïte itokapakeëtiniritika Xesosi kanapiriãko xipokatxi ôtisaaki. ⁶ Ikara himarota, ininiâ iteene hïpoxokoniua. Uatxa atxïti ! erekaxinirei hïte, kotxi ikini sereti maerekati apoka hïtemoni. ⁷ Ikini sereti himaxikiko apoka hïtemoni, kotxi iuasaaki Teoso aimarotari atâo hâuikini iua sâkire, himïteekiniãri himaxikiko. Iuasaaki Teoso ataerekatai hïte, oro ataerekatiko atokokana. Kâkiti axitaro oro otxiko makatxakiko ïkapani, oronoka kaikotini ïkapani. Iuasaaki peerekaro. Pakarono. Iuaritika âti ôti oxipokaãkako. Erekarî oro, iuaritika apiaerekata hâuikini Teoso sâkire, kotxi isâkire hâuikini ! ixipoka. Xesosi Kristo kanapiriãkasaaki ïkoraporiti, Teoso sâpiretaiko hïte: “Erekarî hâuikini nisâkire, kotxi himïteekari ïkinipoko. Peerekai hïte,” itxaiko hïte. Iuasaaki hïto iotximere auape Xesosi iotximere atokokana.

⁸ Hïte kona aôkitapanikari Teoso, iuaritika hïtoretari iua. Kona hâtamatapanikari, iuaritika hâuikari iua sâkire. Ininiâ hïte iteene poxokoniua. Kâkiti sâkireë ! apakata hïsapiretiniri hïpoxokoni. ⁹ Hïpoxokoniua, kotxi himaerekani makatxakaãkapeka. Ininiâ hïxinire ! ipinaika, kotxi hâuikari Xesosi sâkire.

¹⁰ Kitxakapiriãka Teoso sâkire sâpiretakani nirekamari imarotininina kâkiti maerekani makatxakiko. Initarina ikara imarotininina Teoso sâkire iôkatsopatakoriã. Iteene apaiaôkarauatana ikara imarotininina ïkapani. Ninoa sâpiretari ikara erekarî, Teoso âti ôti sikiniri kâkiti. ¹¹ Inirekarina imarotininina ikara erekarî apokini ôti. “Kisaakipa apoka atxïti? Natokopa itxa apokini?” itxanâta. Iuasaaki Erekarî Matamatakoti oerekana ninoa âkixinireëna Kristo atatsïrauatinini ïkane. Oerekana ninoa Kristo atatsïrauatinini xipoka atoko, ïkinimane auïte itxauako. Peerekari iuasaaki. ¹² Kitxakapiriãka Teoso sâpiretari ikamakiti ïkane isâkire sâpiretakanimoni, kona ninoanoka imarotini ïkapanini. Ninoa sâpiretari Teoso kamakiti ïkane hïte ïkapani, kotxi uatxa apokapeka ninoa sâkire iaôka. Kitxakapiriãka Teoso sâpiretari ikamakiti ïkane ninoamoni, ate uatxa imarotini ïkapani. Teoso iokanapirena erekarî sâpiretakani sâpiretakai uatxa ikara Teoso sâpiretakiti kitxakapiriãka. Teoso paniãtari Erekarî Matamatakoti potoriãkine itixine uai apokini ïkapani. Erekarî Matamatakoti posotiireë ninoa sâpiretari Teoso iokanapirena erekarî. Teoso nitiriakori iaxitiki iteene nirekamari imarotininina hïte imarotakiti.

Ereka Hïtxako

¹³ Ininiâ iposope hïtxako hïxinikiniri atâo inakari hïkamini. !Hïkamapiri maerekati hïto nireëkiti. Iteene hâuikariko hâpakapiniri ïkinipoko erekarî Teoso sikakiti Xesosi Kristo kanapiriãkasaaki. ¹⁴ Amarini kaminiri iri paniãtakiti atokotxikana, hïkamariko Teoso paniãtakiti. Xesosi sâkire himimarotakanisaaki, hïkamari maerekati hinireëkiti. Uatxa ! hïkamapinikariko. ¹⁵ Hïte akiritakari kamari erekarinoka, ininiâ iua atokokana erekarinoka hïkama ïkiniôtika. ¹⁶ Teoso sâkire iôkatsopatakori txari: Erekarinoka hïkamako, kotxi nota kamari erekarinoka,

itxa Teoso kitxakapiriãka.

¹⁷ Himisâkiretari hïri iaxiti auakari. Atâonoka ikaminana ïkinimane kâkiti ipariãkana atamatakasaaki. Ininiâ kâkiti kamakasaakiri maerekati, aïri misiritiniri âti atokotxikana, imisiritari âti. Himitekini ! auari. Hïxinikariko, haãpoko atâo inakari ïkoraporiti ! auari.

Teoso tixineë aua haãpoko. Ininiã ìkorapokoriti hãuakasaaki, iteene hìpaxitariko Teoso. Hìpìkariko iua manirekakiniti hìkamini. ¹⁸ Mìtxi !apakata hãuini, kotxi iuasaaki hìkamari hãtokiriakorini sãkire iaõka. Uatxa Xesosi oerekaì àtião hãuini, kotxi iamotai hìte, iua nakitiakorini hininiua ìkapani. Himarotari iamotini. !Iamotai pirataã. !Iamotai oroã. !Iamotai txineiroã, kotxi pirata, oro, txineiro pakini xipokako. ¹⁹ Kristo arëkaã iamotai hìte, kotxi ipìkasaaki iamotai hìte. Peerekari iua arëka, kotxi iua arëka makatxakari amaerekani. Soti auìte erekari atoko itxa Kristo. Kona maerekati aua iuamoni. ²⁰ Itixi kamiko apisa, Teoso mereëri iua. Iua apoka uai himaerekani imaktxakini ìkapani. ²¹ Xesosi txìkitakai hìte auikini Teoso auini, kotxi Teoso iuaikana òkitikari Xesosi ipìkani sauaki. Iuasaaki isãpiretari Xesosi ìkinika ikamakiti ereka inini. Ikara atoko ininiã, hãuikari Teoso sãkire. Himarotari isãkire iaõka ikamini. ²² Erekari Matamatakoti oerekapekai atão inakari, ininiã uatxa hìkamari atão inakari. Ikara atoko ininiã, hãixinire erekari. Ininiãkara atão hìtoretari hìtariakori. Ininiã iteene hìtoretakakauako hãixinireë.

²³ Hìte xinire iuaikana iponaniãpeka. Teoso sãkireë hìxinire iponaniã iuaikana. Teoso sãkire auapika. !Xipoka. Ininiã iua anaakori hìtxaua. Hìri ìkorapokoriti auakani xipoka. Hìri iaxiti auakari !ixipoka, ininiã hìte iua anaakori !ixipoka apaka. ²⁴ Teoso sãkire iòkatsopatakorini txari:

Kãkiti katsotati atoko itxa. Katsotati paìtiki ipinini. Iua atokokana patimari kãkiti ipina. Ìkinika erekari ikamakiti, aãui atoko itxa. Aãui patimari ipinini. Iua atokokana patimari kãkiti kamakiti xipokini.

²⁵ Iuaritika Teoso sãkire auapika. !Kaxiporeri, itxa Teoso sãkire iòkatsopatakorini. Teoso sãkirepitikara sãpiretaãkapeka hìtemoni, hìkenakotakasaakiri Teoso iokanapirena erekari.

2

¹ Ininiãkara hìtakanapariko ìkinipoko maerekati hìkamakiti. ! Himisirienetapiri àti. Hìkamariko hìsãkire iaõka. !Hìxikotapiri àti. !Hìmisãkirepiretapiri àti. Ìkini sereti maerekati kãkiti kamakiti hìtakanapako.

² Hinirekariko Teoso sãkire makoketakoti. Tinitxiã imi axapitiri nirekini atokokana, hinirekariko Teoso sãkire. Teoso sãkire hãpakapakasaaki, himaroãpotari iua, ininiã apiaãpota hãuikini iua sãkire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiã hìsako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. Kãkiti ìnirekari iua. Iuaritika Teoso mereëri iua. Teoso tiretakiti itxaua Xesosi. ⁵ Hìte apaka kai atoko hìtxaua Teoso aapoko ìkapani. Itxìkitakari hìxinire auãki inini, kotxi iua nakitiakorini hìtxaua. Ininiã, Teoso aapoko atoko hìtxaua. Ininiã iua aapoko ãki sasetotxi hìtxaua, iua ìkapani hìparìkauatini. Ininiã hìsìkariko iua amanaãkiti, iua nireëkiti. Iua apakapariko hìsìkakiti, kotxi Xesosi Kristo makatxakapekari himaerekani. ⁶ Teoso sãkire iòkatsopatakorini txari:

Hãtamata. Nitakari kai Sião sitatxitiã. Iua kai apiari, Teoso mereëkiti. Apiaerekata iua. Iua kai atoko inakari sãkire auikani ìpëtãuata, itxa Teoso sãkire.

⁷ Iua kai atoko inakari itxaua Xesosi. Peerekari Xesosi hìtemoni, kotxi hìte auikari iua sãkire. Àti iua atoko inakari !auari. Txamari isãkire makìpitakani !inirekari iua. Teoso sãkire iòkatsopatakorini txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaãka aiko kamikosaaki, apanakini kai soro maìkakari ininiua ìkapani.

⁸ Iuaikana Teoso sãkire iòkatsopatakorini txari:

Iua kai xika kãkiti maìkitita. Iua kai xika kãkiti irika, itxa Teoso sãkire. Imãkititana, kotxi !auikarina Teoso sãkire. Teoso txìkitakana ninoa irikini, kotxi !auikarina iua sãkire.

⁹ Hìtepekana, Teoso mereëkini hìtxaua. Sasetotxi hìtxaua. Hìparìkauata Apiananiri ìkapani. Hìte makatxakaãka maerekani sauaki erekarinoka hìkamini ìkapani. Teoso nakitiakorini hìtxaua. Imereëi hìte iua ereka inini kãkiti hõerekini ìkapani, kotxi ipiã hãuakasaaki, iuara akiritai hìte ipiã hìtakanapini ìkapani. Itakai ikamaraã atão inakari himarotini ìkapani. Peerekari iua kamara. ¹⁰ Mìtxi Teoso nakitiakorini ! hìtxaua. Uatxa Teoso nakitiakorini hìtxapekaua. Mìtxi Teoso !amonìkapanikai. Uatxa Teoso amonìkapekai.

Teoso Nitiriakorini Iamotakoni Pirena

¹¹ Nitiretakini, uai itixi hãuakasaaki, àti tixinikini atoko hìtxa. Atão hãapoko Teoso tixine aua. Ìkorasaaki hìsãpota hãapokomoni. Ininiã ìkini nixinireritika nõtãkikai hìte himakamari maerekati hìto nireëkiti. Hìto nireëkiti hìxinire mokaiaakari atoko itxa. Hìto !

inirekari h̄xinire nireēkiti. ¹² Teoso sākire mauīākani sauaki h̄aukasaaki, ikiniōtika erekarinoka h̄kamako. Atxiiti ninoa maxikatūka apoītai maerekati h̄kamini, iuaritika iuasaaki ninoa imarotari erekarinoka h̄kamini. Ininiā Teoso ketotini ōti manapi iua oerekariko atāo inakari ninoamoni. Ininiā iuasaaki ixinikarinako erekari h̄kamakiti. Ininiā itxarinako Teoso: “Peerekai pite,” itxana.

H̄tkamariko H̄īauīte Paniātakiti

¹³ H̄tkamariko kākiti auītetakini paniātakiti, kotxi Apiananiri nirekari ikara atoko h̄kamini. Ikinimane h̄īauīteakori paniātakiti h̄kamako. H̄īauīte apiari paniātakiti h̄kamako. ¹⁴ H̄īauīte poiāori paniātakiti apaka h̄kamako, kotxi h̄īauīte apiari paniātana h̄īauīte poiāorini maerekati kamakani imisiritinina īkapani. Ipaniātana ninoa isāpiretinina erekari kamakani: “Erekapitkari h̄kamakiti.” ¹⁵ Teoso nirekari h̄kamini erekari, ininiā iuasaaki mīikiteni ! iposotari imisākirepiretinii h̄ite. ! Kasākirena iuasaaki, kotxi apanakini imarotari erekarinoka h̄kamini. ¹⁶ H̄iposotari ikinipoko hinireēkiti h̄kamini, kotxi Teoso sikakai h̄ite. Iuaritika kona hinirekapiri maerekati h̄kamini. Teoso nitiriakori h̄itxaua, ininiā iua paniātakitinoka h̄kamako. ¹⁷ H̄īpaxitariko ikinimane. H̄itiretanako ikinimane aītariakori Teoso sākire auīākani. H̄īpikariko Teoso. H̄īpaxitariko h̄īauīte apiari.

H̄tkamariko H̄īpatrāote Paniātakiti

¹⁸ Nitiritxiakori, h̄tkamariko h̄īpatrāote paniātakiti. H̄īpaxitariko iua. Atxiiti iua tiretai. Atxiiti imisirital. Iuaritika h̄īpaxitariko iua. ¹⁹ Erekapitkari himīteenekini kākiti misiritinii maxikatūka. Himīteenekiniāri, Teoso nireēkiti h̄kamini īkapani, erekapitkari. ²⁰ Erekarī h̄īpatrāote misiritinii h̄ite, maerekati h̄kamakasaaki. Iuasaaki himīteenekini himisiritiko kona txīkitakari Teoso apokaerekatinii. Erekarī h̄kamakasaaki, himīteenekiniāri himisiritiko, iuasaaki Teosomoni erekapitkai.

Kristo Misiritiko

²¹ Teoso akiritai h̄ite inakitiakori hininua īkapani, himisiritiko himīteenekini īkapani. Kristo misiritaāka h̄ite īkapani, ininiā iua nirekari amīteenekini amisiritiko iua misiritiko imīteenekini atokokana.

²² Maerekati !ikama. !imisirienetari āti.

²³ Ninoa misākirepiretakasaakiri iua, !apakapaenetana. Imisiritakasaakirina iua, !itxitana. !Isāpiretanā imisiritinina imaerekanina xika. Iua auikari iri nūkatiniri iua, kotxi atāonoka kamakari itxaua Teoso. Atāo imarotari kākiti kamakiti. ²⁴ Aamina īpiriāmitakari nopini Xesosi ito misiritaāka ate maerekani xika. Ipina ate īkapani, apikomoni maerekati akamini amanirekani īkapani. Inirekari anireēkiti maerekati ipīkari atoko inini. Itxīkitakari axinire auāki inini atāo inakarinoka akamini īkapani. Xesosi karo txīkitakaua erekape anini. ²⁵ Xesosi himarotini apisapanika, soti auīte pīpīnanakakani atoko h̄itxa. Uatxa h̄īkanapiriāpeka h̄īpitikirimoni. H̄īxinire nīkatarimoni h̄āpokapeka uatxa.

3

Taniritxi, Tanorotxi Pakini Ōtākikiko Pirena

¹ Nitiritxi kaminiri ipatrāote paniātakiti atokokana, h̄ite tanorotxi h̄tkamariko h̄itaniri nireēkiti. Atxiiti h̄itaniri ! auikari Teoso sākire, ininiā erekarinoka h̄kamako. Atamatakasaakirina erekari h̄kamakiti, ninoa auikari Teoso sākire. H̄īkamakiti erekari txīkitakana auikinirina Teoso sākire. H̄īsākirenoka ! itxīkitakana auikinirina. ² Maerekati himakamakanisaaki ikiniōtika, Teoso iteene h̄īpaxitiniā ikiniōtika, iuasaaki ninoa auikari Teoso sākire atāo inini.

³ Apanakini sito xinikapikari oīako oēeretini, oro oītoā otakini, omāka ereri oieretakini, oīto ere inini īkapaninani oxinika. Sito erero !oxinikari ikaranani. ⁴ Sito erero oākixinire ereri apaka. H̄ākixinire ereri inakasaaki, ikara ereri !ixipokapani. H̄ākixinire ereri inakasaaki, ! h̄itxitapiri h̄itaniri. H̄īkamari iua nireēkiti. Teosomoni apiaerekata h̄ākixinire ereri inini.

⁵ Kitxakapirīka sitoākini ererini, Teoso sākire auīākani, ikara atoko inakani. Ninoa ākixinire erekari, kotxi ikīpitarina itanirina sākire. ⁶ Sara inakoro kamari Apraō sākire iaōka. Oa kamari Apraō paniātakiti, kotxi oamoni oa auīte itxaua Apraō. Sara anaakoro atoko h̄itxaua atāonoka h̄īkaminiā, himapikarauatakaniā.

⁷ H̄ite taniritxi, iua atokokana h̄xinikariko erekari h̄īkaminana h̄itanoro. H̄īpaxitaroko h̄itanoro, kotxi !katapararo. Oa apaka h̄itekata apakapariko Teoso sikakiti erekari. Iua txīkitakai h̄īapininiika hinini iuakata. H̄itiretaroko h̄itanoro, ininiā Teoso kenakotariko himisākiretiniri iua.

Himisiritiko Pirena

⁸ Ia nisākire mapotōkire nisāpiretai. H̄īxinikakiti ātika xinikakiti atoko h̄itxako. H̄īamonīkakuako. H̄itiretariko āti, h̄itari h̄itiretini atokotxikana. H̄īkamariko erekari ātimoni.

! Hīuikapeua. ⁹ Āti kaminiāri maerekati hītemoni, ! hīkamapiri maerekati iuamoni. Āti misākirepiretakasaakii, kona hīte misākirepiretapiri iua. Āti kaminiāri maerekati hītemoni, iuasaaki hamanaāri Teoso sikiniri erekari iuamoni, kotxi Teoso paniātai ikara atoko inakari hīkamini, erekari Teoso sikakiti hīte apaka apakapini ikapani. ¹⁰ Teoso sākire iōkatsopatakori txari:

Pinirekiniāri pauini ereka inini, pinirekiniāri ikiniōtika pipoxokoniuatini, ! pauiritapiri pisākire maerekati inini. ! Pimisirienetapiri āti.

¹¹ Pinirekiniāri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko kākiti auini ereka inini.

¹² Apiananiri nīkatari kākiti atāo inakari kamakani. Teoso imisākiretakasaakina, Teoso kenakotapitikari isākirena. Txamari Apiananiri misiritari maerekati kamakani, itxa Teoso sākire kitxakapiriāka.

¹³ Erekarini hīkamakasaaki, kākiti !nirekari imisiritinīi. ¹⁴ Atāo inakari hīkamakasaaki, kākiti misiritinīāi, hāpakapariko erekari Teoso sikakiti. Ininiā ! hīpikapena ninoa. Maerekax-iniretinoka ! hītxape. ¹⁵ Hāxixinireē hītxako: “Teosonoka niauūte. Apiananiri itxaua. Iua nireēkitinoka nikamako.” Ikara atoko hītxako. Hāpaiaōkariko Teoso sākire, isākire iteene himarotini ikapani. Ininiā kākiti pimainiāi: “Kinirepa hāuikari Teoso sākire?” Iuasaaki himarotari hāpakapapiretiniri iua. Hāpakapapiretakasaakiri iua, ! hītxitapiri. Hīpaxitariko iua iuasaaki. ¹⁶ Hīsākiraatakasaaki, ! hīsāpiretapiri hāxixinire manirekakiniti. Hinirekariko erekari hāxixinire nireēkiti hīkamini. Apanakini misākirepiretai. Ninoa atamatakasaakiri erekari hīkamakiti Kristo paniātakiti, ipētatarini imisākirepiretinīi. ¹⁷ Teoso nirekiniāri hātatsiirauatini erekari hīkamini xika, ininiā erekari, kotxi iuasaaki hīkamari erekari. Txamari hātatsiirauatiniā himaerekani hīkamini xika, !erekari, kotxi iuasaaki hīkamari maerekati.

¹⁸ Xesosi Kristo ipina kākiti maerekani imakatzakini ikapani. Iuasaaki iposope imakatzakiniri kākiti maerekani. Iuaikana !atatsiirauataika kākiti maerekani imakatzakini ikapani. Erekarinoka kamakari ipīpe maerekati kamakani ikapani. Ipīpe, Teosomoni ate anikini ikapani. Ito ipīpe, iuaritika Erekarini Matamatakoti txīkitakari iua iuaikana auāki inini. ¹⁹ Iuasaaki Erekarini Matamatakoti posotiireē isari ipīkani auiniātaāmoni. Iuaā kateia āki ipīkani aua. Iuaā isāpiretana Teoso misiritinina ninoa, kotxi iuaka kāiata. ²⁰ Kitxakapiriāka ninoa ipīkani, auākipanika inakasaakina, linirekarina Teoso paniātakiti ikaminina. Iuasaaki Noee kamanātari maporo. Teoso iātapana imaerekanina itakanapinina ikapani. Txamari ! itakanaparina. Iuasaaki poiāonoka !ipina. Oitonoka !ipina, xirataātxi apokasaaki. Teoso nīkatana ninoa imapinakani ikapani. ²¹ Ikara xirataātxi hīpatxisatiko atokokana. Hīpatxisatiko oerekari kākiti, Teoso makatzakapekai himapinakani ikapani. Hīpatxisataāka hītoākiri txiko makatzakiko !ikapanini, kona maerekati hīkamakiti makatzakiko ikapanini. Hīpatxisatikosaaki, hītxari Teoso: “Nāxixinireē ninirekari nikaminiri ikinika pite nireēkiti iaōka,” hītxariko. Xesosi iuaikana ōkitikasaakia, imakatzakai himapinakani ikapani. ²² Iua kanapiriā Teoso tix-inemoni. Uatxa iri kikomoni iitopāka. Iuaā Teoso nitiriakori, auītetxiakori, kaposotiirerini pakini auite itxaua. Ninoa ikinika kamari Xesosi paniātakiti.

4

Hīkamariko Ikinipoko Teoso Nireēkiti

¹ Xesosi atatsiirauata iitoā hīte ikapani. Ininiā hinirekariko Xesosi xinikakiti iaōka hīkamini. Ikara atoko hinirekiniāi, hīxinikakiti sikataparitari hāxixinire. Kākiti atatsiirau-atakasaaki iitoā, !nirekaikari maerekati ikamini. ² Ininiākara ikorapokorit auakasaaki, !nirekaikari maerekati iito nireēkiti ikamini. Ikamari Teoso nireēkiti iaōka ikiniōtika. ³ Mitxi maerekati hīkamakiti iaōpe. Mitxi Teoso sākire mauīākani nireēkiti iaōka hīkama. Ikinī sereti maerekati hīkama iuasaaki. Iuasaaki hīkamari ikinī sereti hīto nireēkiti. Hinirekari āti kākiti iito. Hīpōta. Ikinipoko maerekati hīkama hīpōatakasaaki. Hīkamari kiiniri maerekati. Hīteosonetari kākiti kamakiti, Teoso mauritakiniti.

⁴ Ninoa Teoso sākire mauīākani txai: “Kinirepa kona hīpotxitari ate kamakiti iaōka hīkamini? Peerekari akamakiti,” itxaina. Ininiā ninoa nireēkiti iaōka himanirekani xika, ninoa misākirepiretai hīte. ⁵ Txamari āti ōti ninoa apakapapiretariko Teoso, kotxi Teoso iposope isāpiretiniri maerekati kamakani misiritiko. Isāpiretari kākiti auākipanika inakani, apaka kākiti mitxi ipīkani. ⁶ Ininiā Teoso iokanapirena erekari sāpiretaāka kākiti. Uatxa ninoa ipīpe. Auākipanika inakasaaki, isāpiretaāka ninoamoni kākiti misiritiko imaerekani xika. Isāpiretaāka ninoamoni kākiti kaminiri Teoso nireēkiti āxixinireē ikiniōtika.

⁷ Imakinika xipokini ōti imatokotapeka. Ininiā kona hāuiritapiri hīto kaminiri inireēkiti. Araōkire hītxako, ininiā hīposotari hūmisākiretiniri Teoso. ⁸ Iteene hītiretakauako. Ia apiata Teoso nirekakiti. Iteene hītiretakauako, kotxi iteene hītiretinīāri āti, poiāo hīxinikari maerekati ikamakiti. ⁹ Kākiti apokasaaki hāapoko, hīpoxokoniritika hāpakapanako. Kona

hītsoatape hāxixinireē ninoa apokini xika. ¹⁰ Hīkinika hāpakapapekari imaroretxi Teoso parīka hīkamini ikapani. Ikara Teoso sikakiti hītemoni. Ininiā ikara himaroreē hīparīkauata apanakini ikapani. Iuasaaki Teoso nitiriakori erekarini hītchaua. Hīsikariko ātimoni ikini sereti erekari Teoso sikakiti. ¹¹ Hīsākirauatakasaaki, hīsāpiretariko Teoso sākire kākītimoni. Himoianatakasaakiri āti, himoianatariko Teoso posotiereē, ininiā iuasaaki kākiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ātipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameē.

Xesosi Sākire Auiākani Misiritiko

¹² Nitiretakini, ! hītikokape himisiritiko apokasaaki, kotxi ikara ataerekatai. Iteene himisiritaākako, kotxi ikara atoko inakari apokapitikako. ¹³ Iuasaaki hīpoxokoniuatoko, kotxi Xesosi atatsiirauatape, ininiā hīte apaka atatsiirauatoko. Xesosi kanapiriāksaaki, peerekari iuasaaki. Hīte amatatariko ikara, ininiā iuasaaki iteene hīpoxokoniua. ¹⁴ Kākiti xinitakasaakii hīte, Kristo nakitiakori hininiua xika, hīpoxokoniuatoko, kotxi iuasaaki himarotari Teoso aua hītekata. Himarotari Erekarini Matamatakoti aua hāxixinireē. ¹⁵ Kokaniri, kiitiriri, maerekati kamakari, aāpirena kamakari pakini ! hītchaua. Ikara atoko inakari hininiāua, apakatapitika hātatsiirauatini, kotxi hātatsiirauata maerekati hīkamini xika. ¹⁶ Iuaritika hātatsiirauatiniā Xesosi sākire hāuikini xika, ininiā iuasaaki erekapitikari. ! Hīpētāuatape. Hītchariko Teoso: “Peerekai pite, kotxi Xesosi nakiti nitxaua,” hītchako. ¹⁷ Apokapeka Teoso anaakori misiritiko ōti. Merepanika Teoso misiritari iua anaakori imaerekanina xika. Teoso misiritiniāua ate isākire auiākani amaerekani xika, ininiā Teoso iokanapirena erekari manirekakani mitekini ! auari. Iteene imisiritana ninoa. ¹⁸ Kītchakapirīka Teoso sākire iōkatsopatakori txari: Pamimari atāo inakari kamakani sini Teoso tixinemoni. Ininiākara Teoso manirekakani mitekini, maerekati kamakani mitekini ! auari. Imisiritaākapitikanako, itxa Teoso sākire. ¹⁹ Apanakini atatsiirauata, kotxi Teoso nirekari atatsiirauatini. Ikara atoko hātatsiirauatiniā, iuaritika erekari hīkamapanikako. Hāuikariko ikinipoko kamakari sākire, kotxi iua kamari ikinipoko isākire iaōka.

5

Kōtākikarerini, Ātokoriakori Pakini

¹ Kōtākikarerini nitxaua nota, ininiā nōtākikai hīte kōtākikarerini. Nota amatari Kristo misiritiko. Ikanapiriāksaaki, natamari iua iotximere ikinimane auiete inakasaakiaua. ² Ininiā nota ōtākikai hīte. Hinīkatanako Teoso sākire auiākani ereē. Soti auieteakori ipitikirini nīkatini atokokana, hinīkatana. Hīsāpiretanako Teoso sākire, kotxi ikara sikakienatari ninoa āxixinire. Teoso sikana ninoa hītemoni hinīkatini ikapani. Atāo hinirekariko hinīkatini ninoa. Kona hītchape hāxixinireē: “!Ninirekari ninīkatini ninoa, iuaritika ninīkatana, kotxi ikara nīparīka.” Kona hīxinikapiri ikara atoko inakari. !Hīparīkauatape txineiro hāpakapini ikapani. Hīparīkauatoko apanakini himoianatini ikapani. ³ Ninoa auiete atoko ! hītchapeua. Teoso sikana ninoa hītemoni hinīkatini ikapani, soti auieteakori ipitikirini nīkatini atokokana, ininiā erekari hīkamako, hīte kamakiti iaōka ninoa kamini ikapani. ⁴ Ininiā ipitikirini apiri apokasaaki, Xesosi apokasaaki, hāpakapariko hīparīka iki. Iuasaaki hāpakapariko saporīeta atoko inakari. Ikara Teoso sikakiti peerero, ininiā ikara apakapani auapininiaua. Amatapikarinu Teoso iotximere. Iuasaaki erekari hāpakapakiti lixipoka.

⁵ Hīte ātokoriakoripekana, hīkamariko aneēkani paniātakiti. Hīkinika, himoianatakauako. ! Hīuikapeua, kotxi Teoso sākire iōkatsopatakori txari: Teoso iotokakari iuikakanua kaminiri inireēkitina. Iua sikari ikinipoko erekari miuikakanuamoni.

Itxa Teoso sākire. ⁶ Ininiā hīteka poiāotakuako, kotxi Teosonoka kaposotiireri. Iketo manapi Teoso iuikai hīte, erekari hīkamakiti isāpiretiniri ikinimane. ⁷ Maerekaxiniretinoka hinakasaaki, imakinika himaerekaxinire hīsāpiretariko iua. Hīsikariko himaerekaxinireni iuamoni, kotxi iua tiretai.

⁸ Kona hīkamapiri hīto nireēkiti. Araōkire hītchako, kotxi himokaiakari Satanasi inakori ākiti monōkoro atoko itxa. Isaāpota initiniri ikiena. ⁹ Satanasi apokasaaki hītemoni, iteene hāuikariko Teoso sākire. Iuasaaki hītparaxiniretika hāuako. ! Himitekape. ! Hīkamapiri inireēkiti. Himarotari hītariakori ikini itixiti auakani atatsiitini imisiritikona hīte atatsiirauatini atokotxikana. ¹⁰ Hīte atatsiirauatoko poiāonoka, ereka Teoso parīka hāxixinireē iposope ikamini. Iua sikataparaxiniretai. Iteene hāuikari Teoso sākire iuasaaki. Satanasi ! iposotari itxīkitakinii maerekati hīkamini iuasaaki. Teoso, ikinipoko erekari sikakari, kamari ikara atoko inakari hīte ikapani. Iua akiritai itixine hīsini, ātipirika hāuini ikapani, iua iotximere ātipirika hātamatini ikapani, kotxi Kristo Xesosi nakitiakori hītchaua. ¹¹ Ātipirika ikinimane txari iua: “Peerekai pite.” Ātipirika ikinimane auiete itxaua. Ameē.

Petro Takapiretanapini

¹² Sírası moianatano ia niõkatsopatakiti axapitiri niõkatsopatini hīte ĩkapani. Iua aītari. Iua iteene auikari Xesosi sākire. Niõkatsopata hīte nisikataparaxiniretini ĩkapani. Ninirekari himarotiniiri atāo asāpiretinii erekari Teoso sikakiti pirena. ! Hītakanapapiriko erekari Teoso sikakiti hītemoni. ¹³ Teoso nakitiakori, Papirónia sitatxiti auakani, xinikamanapitai hīte. Teoso mereēna ninoā hīte imereini atokotxikana. Marko, namarite atoko inakari, xinikamanapitai hīte apaka. ¹⁴ Haõkitakakasaakiua, himaratakakauako, kotxi hītiretakakaua. Teoso kamaerekaxiniretai hīte Kristo Xesosi sākire auiākani. Ameē.

2 PETRO

Petro Iuaĩkana Iokanatsopatakiti

¹ Nota Simão Petro nitxaua. Xesosi Kristo nitiri, iua iokanatakiti nitxaua. Niokanatsopata hitemoni, kotxi hite auikari Xesosi Kristo sãkire, ate auikiniri atokotxikana. Peerekari iua sãkire aũuikini. Aũuikari iua sãkire, kotxi atãonoka kamakari itxaua. ATeosone, amaerekani makatxakakari itxaua Xesosi Kristo.

² Himaroãpotakasaakina Teoso, aũũte Xesosi pakini, hãpakapari ikinipoko erekari ninoa sikakiti. Itori hãpakapa. Ninoa iteene kamaerekaxiniretai hite.

Erekari Akamini

³ Teoso posotiireẽ isikaua imakinika anireẽkiti Ikorapokoriti aũuini İkapani, Teoso paniãtakiti akamini İkapani. Aãpakapari iua posotiire, iua aimarotakasaaki. Iua akiritaua iua nakitiakori aninua İkapani. Aãpoka iuamoni akiritakasaakia, kotxi peerekari iua. Aãpoka iuamoni, kotxi erekarinoka ikama. ⁴ İkara atoko ininiã, isikaua apia erekari isikaenetakiti. Isikaenetakiti anirekakiti apiari. Ikamaenetari ikamakiti erekari ikaminaua. Teoso nirekari ikara atoko ikaminiãua, atão inakarınoka akamini İkapani, atão inakarınoka Teoso kamini atokotxikana. Kristo sãkire mauĩakani nirekari maerekati İltona nireẽkiti ikaminina. Hite İnirekaikari ninoa nireẽkiti iaõka hĩkamini, ininiã ikara maerekati İnokai hite.

⁵ Ininiã ikinika hãkixinire taparaã hãuikariko Teoso sãkire. Hãuikiniãri Teoso sãkire, hĩkamariko erekarınoka. Erekarınoka hĩkaminiã, hinirekariko Teoso sãkire iteene himarotini. ⁶ İteene himarotiniãri Teoso sãkire, hĩto aũte hĩtxauako. Hĩto aũte hininiãua, himĩteenekariko himisiritiko. Himisiritiko himĩteenekiniã, hĩkamariko erekari Teoso kaminiri atokokana. ⁷ Hĩkaminiãri erekari Teoso kaminiri atokokana, hĩtiretanako hĩtariakori, Teoso sãkire auĩakani. Hĩtariakori, Teoso sãkire auĩakani, hĩtiretiniã, hĩtiretari ikinimane. ⁸ İkara atoko hininiã, ikara atoko apiaãpotiniã, aũũte Xesosi Kristo himarotakasaaki, erekari hĩparĩka iua İkapani. İuasaaki makamareti atoko ! hĩtxapeuako. Himinariko ito kãkiti Kristomoni isãkire auikinina İkapani. ⁹ İkara erekari mauakanĩã hitemoni, mõiãreni atoko hĩtxaua. !Himarotari atão inakari. !Hĩxinikari Teoso kamakiti katana. Himaxinĩkaretapekari Xesosi makatxakiniri himaerekani mitxi hĩkamakiti.

¹⁰ Ininiã nitariakori, ikara atoko ! hĩtxapeko. Hĩkamariko ikinipoko Teoso paniãtakiti, ininiã iteene himarotari Teoso akiritinini inakitiakori hininiua İkapani. İuasaaki himarotari Teoso mereinini hite iua anaakori hininiua İkapani. İkara atoko inakari hĩkaminiã, !hĩkamari maerekati. ¹¹ İkara atoko hĩkaminiã, Teoso ipoxokoniritika apakapai hite aũũte Xesosi Kristo aũteti ininiãtaãua hãuini İkapani. İuaã Xesosi, amaerekani makatxakakari, ãtipirika ikinimane aũte itxauako.

Atão Inakari Teoso Sãkire

¹² Ninirekari ikara noerekakiti ãtipirika nisãpiretinini. Himarotapekari ikara noerekakiti, iuaritika iuaĩkana nisãpiretai. Hite imarotari ikara noerekakiti atão inini, iuaritika kona nitakanapari ikara nisãpiretinini. ¹³ Nota auapanika ninakasaaki, notamoni atãopitika nitxĩkitakinini hite ikara noerekakiti hĩxinikini. ¹⁴ Kotxi nimarotari paĩtiki nipinini. Aũũte Xesosi Kristo oerekapekano paĩtiki nipinini. ¹⁵ Ininiã uatxa Teoso sãkire nisãpiretapikai, ininiã kona himaxinĩkaretari noerekakiti nipĩkasaaki.

¹⁶ Asãpiretai aũũte Xesosi Kristo posotiire. Asãpiretai iua iuaĩkana kanapiriini. İkara asãpiretakiti hitemoni kona kãkiti sãkireni. Kona kãkiti kimarorerini xinikakitini asãpiretai. Atão inakari ate sãpiretai hite, kotxi ateka atamatari Xesosi ikinimane aũte ininiua. ¹⁷ Afiri Teoso oerekari iuikiniri iua. Oerekari iua eraka inini, kotxi itxari iua: "Ere namarite, nitiretakiti. İua iteene kamapoxokonitano," itxa Teoso kaposotiireri. ¹⁸ Ateka kenakotari ikara Teoso sãkire, itixineẽ isãkirauatakasaaki. İuasaaki ate aua Xesosikata õtanoxiratarı Teoso nakiti nopini.

¹⁹ Ininiã aimarotapitikari Teoso sãkire sãpiretakani sãpiretakiti kitxakapirĩka atão inini. Himixinikariko ninoa sãpiretakiti. Ninoa sãpiretakiti tirikapi ipiã iopinikini atoko itxa, kãkiti sinimoni atamatini İkapani, kotxi axinikasaakiri ninoa oerekakiti, aimarotari atão inakari, atão minakati pakini. Teoso sãkire sãpiretakani sãpiretakiti hĩxinikiniritika Xesosi kanapiriãko. İuasaaki iua txĩkitakai Teoso iteene himarotini. İuasaaki atokatxi ponikini atoko itxa Xesosi apokini. İõriki İkanõkapanika pokĩkini atoko itxa iuasaaki İnokai apokini. ²⁰ Merepanika ninirekari iteene himarotiniri Teoso sãkire sãpiretakani sãpiretakiti Teoso sãkire iõkatsopatakoriã. Kona ninoa sãkireni. Kona ninoa xinikakitini. ²¹ Kitxakapirĩka Teoso sãkire sãpiretakani kona iõkatsopatarı kãkiti nireẽkiti sãkiretxiti. Erekari Matamatakoti txĩkitakari kãkiti Teoso nakitiakori sãpiretiniri atão inakari Teoso sãkire.

2

Atão Minakati Oerekakani

¹ Kitxakapirika Teoso sãkire sãpiretakani auakasaaki, auari apaka atão minakati oerekakani. Iua atokotxikana uatxa aua atão minakati oerekakani hite sauaki. Kãkiti mimarotakanisaakiri, oerekari atão minakati. Kona erekari ninoa oerekakiti. Na atão ninoa oerekari Teoso sãkire. Ninoa !auikari Apiananiri ipinini kãkiti !kapani Teoso !ikixitini !kapani. Ikara xika mokatanitika Teoso xipokanako ninoa. ² Itori kãkiti auikari isãkirena, ininiã ikamarina ninoa kamakiti atokokana. Ikamarina maerekati !itona nireëkiti, maerekati ninoa kamini atokotxikana. Ininiã ikara xika, apanakini misãkirepiretari Teoso sãkire atão inakari auikiko. ³ Kapotxinanirini ninoa atão minakati oerekakani. Isãkirena atão minakati xika, imisirienetai. Ninoa nireëkiti iaõka ikaminiina hite. Kitxakapirika Teoso sãpiretapekari imisiritinina ninoa imaerekanina xika. Ixipokinina õti paftiki apokapitikako. Teoso !imaka. Ninoa xipokini õti apokapitikako.

⁴ Teoso nitiriakori iaxiti auakani kamakasaakiri maerekati, imisiritana. !Auritana imitekinina. Iokanatana maerekani misiritikoãtaã. Iuaã itakana kateia ãki ipiaã. Iuaã iãtãparina Teoso misiritinina ninoa imaerekanina xika.

⁵ Kitxakapirika Teoso xipokari ikinimane kãkiti iua nireëkiti manirekakani xirataãtxiã. Teoso !auritana ninoa mitekini. Noee, apikomoni setxi kãkitikata nãkataãka. Ninoanoka ! xipokaãka. Iua nãkatari Noee, kotxi atão inakari sãpiretakari itxaua.

⁶ Apaka ixipokari Sotoma sitatxiti auakani, Komoha sitatxiti auakani pakini arikatxiã. Atapaninoka kaikota iusaaki. Ininiã ikara pinitari kãkiti Teoso nireëkiti manirekakani.

⁷ Iusaaki Teoso makatxakari Aroo inakori imapinakani !kapani, kotxi erekari kamakari itxaua. Maerekati kamakani txãkitakari Aroo matinaniuatini, kotxi ikiniõtika iua atamari maerekati ninoa kamakiti, maerekati ninoa !to nireëkiti. Itxiko atoko itxa ninoa kamakiti. ⁸ Aroo, atão inakari kamakari, aua ninoa sauaki. Ikiniõtika atamari maerekati ninoa Teoso paniãtakiti manirekakani kamakiti. Ikiniõtika ikenakotari maerekati ninoa sãpiretakiti. Ininiãkara ãkixinireë Aroo maerekaxiniretinoka itxa ninoa maerekani xika, kotxi iua ãkixinireë inirekari atão inakarinoika ikamini.

⁹ Ikara atoko ininiã, Apiananiri imarotari iua nireëkiti nirekakani imakatzakini imisiritikosaakina. Iua apaka imarotari imisiritiniri atão minakati kamakani uatxa. Apaka imarotari imãkinina ninoa, kãkiti misiritiko sãpiretiko õtisaaki imisiritinina !kapani. ¹⁰ Iteene Teoso misiritari kãkiti, maerekati !ito nireëkiti kamakani. Ninoa maerekani txikotari ninoa ãkixinire. Apaka itene imisiritari auãtxi paniãtakiti makamakani.

Ninoa atão minakati oerekakani iteene iuikaua. ! Ipaxitarina ãti. ! Ipãkarina imisãkirepiretinirina iaxiti auakani. ¹¹ Teoso nitiriakori iaxitikini iteene kaposotireni. Apiataparatana ninoa. Iuaritika Teoso nitiriakori !apoõtana ninoa atão minakati oerekakani. ! Imisãkirepiretana Teoso apisatoõ.

¹² Ninoa atão minakati oerekakani misãkirepiretari ikinika imimarotakininitina. Kaxipiri !topa auakari atoko itxana, kotxi ikamarina !itona nireëkitinoka. Kaxipiri !topa auakari iponaniã, eereka imaãkaãka, oka inaãka. Iua atokokana ninoa atão minakati oerekakani xipokaãkako imaerekanina xika.

¹³ Ininiã ninoa misiritaãka, kotxi na atão ninoa kamakiti. Kona !kanõkananini ikamarina maerekati. Ipotxitarina maerekati !itona nireëkiti ikaminina pokamara, ikinimane atamatini !kapani. Ninoa kamapikari maerekati, iuaritika apotiitauana hãtekata kiiniri Teoso !kapani hãkamakasaaki. Ininiã apanakini !auikari hite sãkire ninoa maerekani xika. Itxiko mãkatxi kasarori nopinikiri atoko itxana ninoa. Karõtxi kãkiti toõã auakari atoko itxana ninoa. ¹⁴ Inirekapikarinina sito !tanoro minakotokatika isirãkinina. Kona iposotarina iotokakinirina maerekati ikaminina. Anikarinina kãkiti mataparaxinireni, maerekati ikaminina !kapani. Kapotxinanixinirena ninoa. Ininiã Teoso misiritapitikanako ninoa. ¹⁵ Ninoa osipikari kimapori atão inakari. Ipãpinanakana. Ikamarina maerekati Paraão inakori maerekani atokokana. Iua Paraão, Peoo inakori ãkiri. Kitxakapirika aua. Iua nirekaro txineiro maerekati ikamini !kapani. ¹⁶ Txamari ipira txitari iua imaerekanina xika, kotxi Teoso txãkitakari poho sãkirauatini kãkiti sãkirauatini atokokana. Ininiã ipira iotokakari iua atão minakati sãpiretakari kaminiri maerekati miãkiteti.

¹⁷ Ninoa atão minakati oerekakani !iposotari ikaminirina ikamaenetakitina. Aariko ãparaã mauakiniti atoko itxana. Kãkiti nirekari ãparaã, txamari ! auari. Katxiãri !tima anikakiti atoko itxana ninoa. Kãkiti nirekari ãparaã kipini, txamari !likipa. Teoso mereëri ipiaãtaã ninoa ãtipirika kaikotini !kapani. Kãkiti atamarauatini iuaãtaã !auari. ¹⁸ !Kiikiteri ninoa sãkire. Iuikauana isãkirauatakasaakina. Isãpiretarina kãkiti, erekari akaminiri aito nireëkiti. Ininiã isikanireõtari kãkiti ikara maerekati ikamini. Imisirienetarina Teoso sãkire poiãopanika auãkani. Ninoa !okananipanikani auikari Teoso sãkire. ! Okananipanikani

imarotarina atão inakari. Atão minakati oerekakani sikanireõtana ninoa ikara maerekati ikaminina.

¹⁹ Itxana: “Kateia ãki auakani atoko hïtxaua. !Erekari ikara atoko hinini. Hïkamariko hinirekakiti. Ininiã ikara atoko hïkaminiã, hïsikakaãka,” itxana. Txamari ninoaka kateia ãki auakani atoko itxauana, kotxi ninoa !iposotari itakanapinirina imaerekantina. Imaerekantina iauïtëna itxaua, kotxi ikamarina imaerekantina paniãtakitinoka. ²⁰ Mïtxi ninoa imarotari Apiananiri Xesosi Kristo sãkire, kãkiti maerekani makatzakakari sãkire. Iuasaaki ninoa iotokakari ikaminirina Xesosi sãkire mauïãkani kamakiti, kãkiti xinire maerekati inini txïkitakakari. Txamari eereka iuaïkana ikamarina ikara maerekati. Eereka !iposotaïkarina ikara maerekati itakanapinina. Ininiã uatxa apiata imisiritikona. ²¹ Erekamariko atão inakari kamiko ninoa mimarotakanimako, kotxi ninoa imarotari, iuaritika !inirekaïkarina Teoso paniãtakiti, iua iokanatakini sãpiretakiti. Uatxa ninoa misiritiko apiata. ²² Atãopitikara kitxakapirïka sãkiretxiti:

Anãpa kanapiriã okanakakitimoni onikiniri ikapani. Irari ipitikiri arokakito kanapiriã iãropemoni osirïkini ikapani.

Ininiã iuaïkana ninoa atão minakati oerekakani kamari maerekati, mitxi ninoa takanapakiti.

3

Apiananiri Kanapiriini

¹ Nitiretakini, mitxi niokanatsopatapeka hïtemoni. Iuaïkana niõkatsopatari ia aãtsopa. Imakinika niõkatsopata, kotxi ninirekari hïte iuaïkana hïxinikiniri erekari mitxi himarotakiti.

² Ninirekari hïxinikiniri Teoso sãkire sãpiretakini sãkire kitxakapirïka, kotxi Teoso nakitiakori itxauana. Apaka ninirekari hïxinikiniri ate paniãtakiti, kotxi Apiananiri iokanatakini atxaua. Kãkiti maerekani makatzakakari iokanatakini atxaua.

³ Merepanika himarotariko ia: Imapotõkire õti takote auako kãkiti Teoso sãkire napetakani. Ninoa kamari maerekati iïtona nireëkiti. ⁴ Ia atoko itxanako: “Ïtapari iua? ‘Nïkanapiriãko,’ itxa iua. Txamari kona apoka. Aãtokiriakorini ipïkasaakipanika, itixi kamikosaakipanika iuatxikana. Mïtxi itixi, uatxa iuatxikana,” itxana.

⁵ Ninoa nirekari imaxinïkaretinirina Teoso kamakiti kitxakapirïka auakari, kotxi Teoso txïkitakari iaxiti apiko nopinixiti auini isãkireë. Apaka ikamari itixi ãparaã kamakori. Ikamari itixi ãparaã sauaki. ⁶ Apaka ninoa maxinïkaretari ia: Teoso iokanatarari iua ãparaã, ininiã xirataãtxi xipokari itixi mitxi auakari, ikinimane kãkiti iuasaaki auakani apaka. ⁷ Uatxa isãkireë inïkari iaxiti apiko nopinixiti, itixi pakini arikatxi xipokiniri ikapani. Imakinika inïkatiniritika Teoso manirekakani misiritiko isãpiretako. Iuasaaki ninoa xipokaãkako. Iuasaaki ixipokari iaxiti apiko nopinixiti, itixi pakini.

⁸ Nitiretakini, kona himaxinïkaretapiri ia nisãkire: Teosomoni ãti õti, mio anokanani atoktxikana itxa. Iuamoni mio anokanani, ãti õti atoktxikana itxa. ⁹ Apiananiri kamapitakari ikamaenetakiti. Apanakini kãkiti xinikari !katimari ikaminiri ikamaenetakiti. Kona ikara atokoni. Iãtapari kãkiti auikiniri isãkire, kotxi !inirekari kãkiti sini imisiritikomoni. Inirekari ikinimane takanapiniri imaerekani.

¹⁰ Apiananiri kanapiriãkasaaki, kiïtiriri ïkanõka apokini atokokana. Iua apoka kãkiti mimarotakanisaakiri. Iuasaaki iaxiti apiko nopinixiti ereëkoka itaparakieneritika. Iuasaaki ikinipoko xipokaãka arikatxiã. Iuasaaki iteene ipataka aua. Imakinika itixi xipokako iuasaaki.

¹¹ Ikara atoko itxako ikinipoko xipokini, ininiãkara natokopa itxa hãuini ikinioïtika ereka hinini? Erekarinoka hïkamako ikinioïtika, kotxi iua nakitiakori hïtxaua. Teoso nireëkitinoka hïkamako ikinioïtika. ¹² Iuasaaki iãtapari hïpoxokoniritika Teoso keto apokini. Iteene hinirekariko ikara õti apokini. Iuasaaki iaxiti apiko nopinixiti xipokaãka arikatxiã. Ikinika iãkokoko kapatakari xika. ¹³ Iuaritika aiãtapari iaxiti apiko nopinixiti amaneri, itixi amaneri apaka atão inakari kamakani ikapani. Ikara atoko inakari Teoso sikaenetakiti.

¹⁴ Ininiã nota tiretakini, hinirekasaakiri Xesosi kanapiriini õti apokini, iteene hïparïkauatako maerekati himakamakani ikapani. Ininiã iua kanapiriãkasaaki, iua imarotari himakamakani maerekati. Iuasaaki imarotari hïkerokiniri !auari. Iuasaaki imarotari erekaxinire hinini. ¹⁵ !Katimari iua kanapiriini, kotxi iãtapari kãkiti takanapiniri maerekati ikamakiti, imisiritiko mapokakani ikapani. Iua atokokana aïtari atiretakiti Paoro iõkatsopata hïtemoni Teoso imaroreë. ¹⁶ Ikinika Paoro iokanatsopatakitiã isãpiretari Apiananiri kanapiriini õti Teoso imaroreë. Ipixini iua iõkatsopatakiti pamimari kãkiti imarotiniri ikapani. Aua kãkiti miïkiteni. !Apakata aãuikiniri ninoa sãkire. Kãkiti ikara atoko inakani oerekari Paoro iõkatsopatakiti, apanakini Teoso sãkire iõkatsopatakori pakini, txamari na

atão ninoã sãpiretakiti. Ipinimoni ninoã oerekakiti. Imamakarina Teoso sãkire, ininiã ikara xika ixipokaãkanako.

¹⁷ Nĩtĩretakini, himarotapekari pamonõkoniri ninoã atão minakati oerekakiti. Ininiã araõkire hĩtxako. Kona hãuikapiri Teoso sãkire kerokakani sãkire, kotxi Teoso paniãtakiti makamakani itxauana. Kona hĩtakanapapiri Teoso sãkire atão inakari, uatxa iteene hãuikakiti. ¹⁸ Ikiniõtika himarotariko ikinipoko erekari aãũte Xesosi Kristo sikakiti hĩtemoni, amaerekani makatxakakari sikakiti hĩtemoni. Ikiniõtika himaroãpotariko iua. Ninirekari ikinimane uatxa sãpiretiniri iua: “Peerekai pite.” Ninirekari ikinimane ãtipirika sãpiretiniri iua: “Peerekai pite.” Ameẽ.

1 XOÃO Merepanika Xoão Iokanatsopatakiti

Xesosi "Teoso Säkire" Inakori

¹ Nota iökatsopata hïte İkapani, iua "Teoso säkire" inakori asäpiretini İkapani. Ätipirika auakari itxaua. Itxïkitakari İkinipoko auäki inini. Itixi kamiko apisa iua aua. Atera kenakotari isäkire. Aökiä ate atamatari iua. Auakoä amaätakari iua. Ininiä atäopitika ate imarotari iua. ² Iua İkinipoko auäki inïkitaäkari. Iuaka oerekaua atemoni. Ate imarotapekari iua, ininiä asäpiretai ätamatakiti, akenakotakiti pakini. Ate säpiretai hïte iua ätipirika auakari, käkiti auäki inïkitaäkari, ininiä käkiti auapikako Teosokata. Iua Xesosi Kristo inaäka akiritiko. Iua aua irikata, Teosokata. Iuaka oerekaua atemoni. Äätamatari iïto. ³ Ate säpiretai hïte ätamatakiti, akenakotakiti pakini, amoianatakakiniua İkapani. Atäo nisäpiretai. Amoianatakakaua Teosokata, Xesosi Kristo pakinikata. ⁴ Ia säkiretxiti aiokanata hïtemoni, iteene hïpoxokoniuatini İkapani.

Teoso Pokamara Atoko Itxa

⁵ Teoso pokamara atoko itxa, kotxi maerekati ! ikama. İpia ! auari Teoso auiniätaä, kotxi maerekati ! ikama. İkara iokanapirena imi säpiretaua ate. Ininiä ate säpiretai hïte. ⁶ Maerekati akamakasaaki, İpiaä auakani atoko atxa. Iuasaaki, "Teoso amoianata," aniniä, paxirari asäkire. Kona atäo akamakiti iuasaaki. ⁷ Teoso aua ikamaraä, kotxi erekarinoka İkama. Ate ikamaraä aüüiniä Teoso atoko aniniä, erekarinoka akaminiä, ininiä ate Teoso säkire auïäkani moianariakori atxaua, ininiä amoianatakakaua. İkamaraä aüüiniä, Teoso arokaua Xesosi arëkaä. İmaktxakari İkinika maerekati akamakiti, kotxi imi Xesosi Kristo İpina ate İkapani. İarëka xikepoakata ate maerekani İmaktxakini İkapani.

⁸ "Na nota kamari maerekati," aniniä, ateka misirienetaua. İkara atoko aniniä, ate ! İmarotari atäo Teoso säkire aäxixinireë. ⁹ Amaerekani Teosomoni asäpiretiniä, iua makatx-akapitikari amaerekani. Oeretari ate äkixinire. İmaktxakari İkinipoko amaerekani. İkamari İkara atoko, kotxi İmaktxakaenetari amaerekani. İkamapitikari İkamaenetakiti. İkamapikari atäo. ¹⁰ "Uatxapiima maerekati ! nikama," pininiä, pitemoni Teoso säkire paxirari atxiïti? Kotxi Teoso txapekari käkiti: "Maerekati kamakari käkiti." "Maerekati ! nikama," pininiä, ! pimarotari Teoso säkire päkixinireë. ! Pikamari Teoso säkire iaöka iuasaaki.

2

Käkiti Teoso Atäo İmarotakari

¹ Namariteni nota tiretakini atoko hïtxaua hïte. İkara niökatsopata, maerekati hikamakani İkapani. Maerekati akamakasaaki, masäpiretari Xesosi Kristo. Äiri Teoso misäkiretakari itxaua Xesosi. Atäo İnakinokana kamakari itxaua iua. Iua misäkiretari Teoso ate İkapani, amaerekani İmaktxakini İkapani. ² Iua makatxakari maerekati akamakiti. Kona ate maerekaninanini İmaktxaka. İpina İkini İtixiti auakani maerekani İmaktxakini İkapani.

³ Teoso paniätakiti akïpitiniä, atäo İmarotari Teoso. ⁴ Teoso paniätakiti makïpitakiti, "Nota İmarotari Teoso," İnakari, paxirari isäkire. Äkixinireë ! İmarotari atäo İnakari Teoso säkire. ⁵ Teoso säkire Kïpitakari iteene tiretari Teoso. Kininiäpa İmarotatari iua nakiti aniniäua? ⁶ Akamakiti İkiniötika Xesosi kamakiti atokokana akaminiä, iuasaaki İmarotari Teoso nakiti aniniäua. "Teoso nakiti nitxaua," pininiä, pikamariko Xesosi kamakiti atokokana.

Iteene Matiretakakaua

⁷ Nitiretakini, Apiananiri paniätaua atiretakakiniua. Ia paniätxi niökatsopatakiti hïtemoni, kona amaneriikani. Hïkenakopiretapekari İkara paniätxi merepitipanika Xesosi säkire hïkenakotakasaaki. Iuasaaki hïkenakotari İkara paniätxi hïtiretakakiniua İkane. İkara paniätxi kitxakapirïkari itxaua. Hïkenakotapekari İkara paniätxi. ⁸ İuaritika İkara paniätxi amaneri itxaua. Xesosi Kïpitari İkara paniätxi, kotxi İtiretari käkiti. Hïte apaka tiretari käkiti, ininiä İmarotari İkara paniätxi ereka inini. Ininiä İpia napaäpota, kotxi käkiti İmaroäpotari atäo Teoso säkire. Atäo İnakari käkiti İmarotakasaaki, pokamazarari atoko itxa käkiti äkixinireë.

⁹ "Pokamara naua," pininiä, txamari iuasaaki pomanatari pitari Xesosi säkire auïäkari, İkara atoko pininiä, uatxapiima İpiaä pauapanika. ¹⁰ Pitari Xesosi auïäkari pitiretiniä, pokamara pauapitika. Ininiä erekari päkixinire, ininiäkara päkixinireë auakari kona txïkitakari maerekati pikamini. ¹¹ Pitari Xesosi säkire auïäkari pomanatiniä, İpiaä auakari

atoko pitxaua. Iuasaaki pitipokotapika ipiaã. !Pimarotari pisinimoni. Mõsiãreti atoko pitxaua, kotxi !apakata patamarauatini ipiã xika.

¹² Namariteni nota turetakinì, niõkatsopata hite ìkapani, kotxi Xesosi makatxakapekari himaerekani, kotxi kãkiti maerekani makatxakakari itxaua.

¹³ Hite irõtxiakoripekana, niõkatsopata hite ìkapani, kotxi hite iteene imarotari Xesosi, itixi kamikosaaki auapeka inakari.

Hite ãtokoriakoripekana, niõkatsopata hite ìkapani, kotxi homitikapekari Satanasi hõtapararitika.

Namaritenipekana, niõkatsopata hite ìkapani, kotxi himarotari aõri Teoso.

¹⁴ Hite irõtxiakoripekana, niõkatsopata hite ìkapani, kotxi himarotari Xesosi. Itixi kamikosaaki auakaripeka itxaua.

Hite ãtokoriakoripekana, niõkatsopata hite ìkapani, kotxi pataparari hãkixinire. Teoso sãkire auapika hãkixinireẽ. Homitikapekari Satanasi hõtapararitika.

!Hinirekapiri Itixi Auakani Nireẽkiti

¹⁵ Itixi auakani nireẽkiti atoko inakari !hinirekape, kotxi ninoa nirekari maerekati ikaminina. Hõtiretiniãri ninoa kamakiti, !hõtiretari aõri Teoso. ¹⁶ Maerekati kãkiti kamakiti ia atoko itxapaniko: Inirekarina maerekati iõtona nireẽkiti ikaminina. Inirekarina maerekati okina nireẽkiti ikaminina. Iuikauana, katii ininiãuana. Iuikarina ikamakitina. Ikara maerekati kãkiti kamakiti potorika ìkorapokoriti. Kona Teosomonikirini ikara. ¹⁷ Itixi xipokako. Ikinipoko tiitxi kãkiti nireẽkiti apaka xipokako. Kãkiti Teoso nireẽkiti kamakari-rako lixipoka. Auapininiika Teosokata.

Kristo Omanatakani

¹⁸ Namariteni nota turetakinì, itixi xipokini õti katanapanoka apoka. Kristo omanatakani auõte apokako itixi xipokini õti apisa. Ikara himarotapeka. Uatxa Kristo omanatakani itomane apokapeka. Ikara atoko ininiã, aimarotari itixi xipokini õti takotepeka inini. ¹⁹ Ninoa Kristo omanatakani, mitxi atekata apotiitaua, Teosokata aãpotiitakasaakiua. Txamari ninoa !auikari Xesosi sãkire ate auikiniri atokokana, ininiã ninoa sipe. Ninoa atão Xesosi sãkire auikaãkamako, atekata ikaikotapikamanako. Itakanapaua, kotxi ate auikari Xesosi sãkire. Ninoa !auikari.

²⁰ Teoso, erekarinoka kamakari, sikapekai hite Erekarì Matamatakoti himoianari tũkane. Ininiã hite imarotari atão inakari Xesosi sãkire. ²¹ Hite imarotari atão inakari Xesosi sãkire, iuaritika niõkatsopata hõtemoni. Niokanatsopata hõtemoni, kotxi himarotari atão inakari. Paxiene kamakari ìmarotari atão inakari sãkiretxiti.

²² Natokopa itxa iua paxiene kamakari? Paxiene kamakari txari: “Xesosi kona Teoso mereẽkitini.” Kãkiti ikara atoko inakari Kristo omanatakari itxaua iua. Iua !hinirekari aõri Teoso. Ìmi apaka !inireka. ²³ “Xesosi kona Teoso ãkirini” inakari, na kaikota Teosokata. “Teoso ãkiripitikara Xesosi” inakarirako kaikotapitikako Teosokata.

²⁴ Hãuiritariko merepitipanika Xesosi sãkire hãkenakotakiti kaikotini hãkixinireẽ. Ikara kaikotiniã hãkixinireẽ, Teoso ãkirikata hãkaikotapikako. Aõri Teosokata hãkaikota apaka. ²⁵ Xesosi sikaenetapekaua aãuapininiika anini Teosokata.

²⁶ Niõkatsopata hite nõtãkikini ìkapani, kotxi aua kãkiti Xesosi hõtakanapini nireẽkani. ²⁷ Erekarì Matamatakoti, Xesosi sikakiti, auapanika hite ãkixinireẽ, ininiã hite na nirekari ãti koerekareri. Iua Erekarì Matamatakoti oerekai ikinipoko. Iua oerekakiti atãopitika. Kona paxieneni iua. Ininiã hãkaikotako Xesosikata, Erekarì Matamatakoti oereẽkiti hãkõpitini.

²⁸ Ininiã namariteni nota turetakinì, himoianatapikariko Xesosi. Ininiã uaimoni ikanapiriãkasaaki, hõpõkarauatini !auari. Ininiã na hõpõtãuata haõkitakasaakiri iua. ²⁹ Xesosi kamari atão inakarinoka. Ikara himarotapeka. Ininiãkara himarotari, kãkiti atão inakarinoka kamakani Xesosi anaakori ininiãuana.

3

Teoso Anaakori

¹ Aõri Teoso iteene turetãu ate. Hõxinikariko iua tiraõki. Iua iteene turetãu ate, ininiã, “Namariteni,” itxaua ate. Ari, atãopitikara Teoso anaakori atxaua. Ninoa Teoso anaakori minakanuua !auikari Teoso anaakori aniniua, kotxi ninoa ìmarotari Teoso. ² Nituretakinì, Teoso anaakori atxapekaua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriãkasaaki, Xesosi atoko atxapekauako, kotxi iuasaaki aãtamatariko iua. ³ Kãkiti ikara auiaãkani, !inirekarina maerekati ikaminina, kotxi Xesosi !ikamari maerekati.

⁴ Maerekati kamakari !ikamari Teoso paniãtakiti. Amakamakanisaakiri Teoso paniãtakiti, iuasaakipeka akamari maerekati. ⁵ Himarotari Xesosi apokapeka ìkorapokoriti

maerekati akamakiti imakatsakini ikapani. Xesosi ! ikamari maerekati. ⁶ Käkiti Xesosi ätipirika moianatakari !nirekaikari maerekati ikamini. Iua ätipirika maerekati kamakari laõkitapanikari Xesosi. Iimarotapanikari Xesosi.

⁷ Namariteni nota tirketakini, !häuiritapiri apanakini misirienetini hite. Atão inakarinoa kamakari kamapitikari Teoso nirekitinoka, Xesosi kaminiri atokokana, kotxi Xesosi kamari atão inakarinoa. ⁸ Ätipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaäpokatapitiporiri maerekati. Uatxa ikamapanikari. Teoso äkiri apoka ikorapokoriti maerekati Satanasi parika ixipokini ikapani.

⁹ Teoso anaakori !nirekaikari maerekati ikaminina, kotxi Teoso aua äkixinireena. Ininiä liposotarina maerekati ikamaäpotinina, kotxi iritarina Teoso. ¹⁰ Ininiä kipa Teoso anaakori txataua? Atão inakarinoa kamakanira Teoso anaakori txaua. Äti tirketakanira Teoso anaakori txaua. Ininiä kipa Satanasi anaakori txataua? Erekar makamakanira Satanasi anaakori txaua. Äti matirketakanira Satanasi anaakori txaua.

Käkiti Tirketakiniua Pirena

¹¹ Matirketakaua. Merepitipanka Xesosi säkire hikenakotakasaaki, hikenakotari ikara ötäkipirenatxi, hütirketakiniua. ¹² Kaii inakori atoko !hixape. Maerekatinoa kamakari nakiti itxaua iua Kaii. Satanasi nakiti itxaua. Kaii okari atão itarika. Kixikapa okari? Ixikotiniri xika okapiri, kotxi itari kamari erekarinoka. Kaii kamari maerekatinoka.

¹³ Nitariakori, Xesosi säkire mauiakani omanatakasaakii hite, !hütsorikaätapeko. “Kixikapa ninoa omanataua ate?” !hixapeko, kotxi ikara atoko inakari apokapitikako. ¹⁴ Atiretiniäri äitariakori Xesosi säkire auiakani, aimarotari !apinaika. Aäupininiika Teosokata. Matiraökiti äkixinire ipikari atoko itxa. ¹⁵ Käkiti itari omanatakari, Xesosi säkire auiakari omanatakari, kokaniri atoko itxaua. Himarotari kokaniri !uari ätipirika Teosokata.

¹⁶ Xesosi Kristo ipina amaerekani imakatsakini ikapani, ätipirika Teosokata äüini ikapani. Ikara oerekaua atão tiraökixi. Ininiä erekari äitariakori ätiritini. Xesosi tiritiniua ate atokokana, erekari ätiritiniri äitariakori. Atxiiti apina äitari mapinakani ikapani. ¹⁷ Pitii, pikiena pakini auiniäi, pitari, Teoso säkire auiakari tii, ikiena pakini mauakaniä, pisikariko iuamoni. Pimasikakaniäri iuamoni, Teoso tiraöki päkixiniree !uari. ¹⁸ Namariteni nota tirketakini, “Apanakini ate tireta,” atxaua, txamari kaamoni inakasaakina na asikana minakati, ininiä na atão ätoretana. Atão matiretana apanakini. Kaamoni inakasaakina, masikana ninoa amonitakitina.

Teoso Säkire Ktipitakari

¹⁹ Ikara atoko akaminiä, aimarotari Teoso anaakori aniniäua. Aimarotari atão inakari säkiretxiti akipitini. Ikara atoko akaminiä, erekapitikari ääkixinire. Ikara atoko akaminiä, !apikari Teoso amisäkiretini. ²⁰ “Kona erekano,” pininiä päkixiniree, mitxi pimaerekani pikamini xika, !pipikarauatape, kotxi Teoso iteene imarotari, iuaritika iteene iamoniäi. Poiäoka aimarotari ääkixiniree auakari. Teoso imarotari ikinipoko.

²¹ Nitirketakini, päkixiniree: “Namanaäpekari Teoso imakinika nimaerekani imakatsakini,” pininiä, kataparaxinirepitikari Teoso pimisäkiretini. ²² Ininiä iua sikaua aamanaäkiti, kotxi ate kamari ipaniätakiti iaöka. Iua apokaerekatikitinoka akama. ²³ Teoso paniätaua ate: “Häuikariko namarite Xesosi Kristo säkire.” Apaka Teoso paniätaua: “Hütirketakauako.” Teoso paniätaua ikara akamini. ²⁴ Teoso säkire iaöka kamakari kaikotapika Teosokata ätipirika. Teoso kaikotapika iuakata ätipirika apaka. Aimarotari Teoso kaikotini atekata, kotxi iua sikaua Erekar Matamatakoti ääkixiniree auini ikapani.

4

Atamakaerekarauatini

¹ Nitirketakini, !häuikapiri ikinimane käkiti säkire, “Erekari Matamatakoti aua nota äkixiniree,” inakani. Hätaerekatanako ninoa. Atão Erekar Matamatakoti auatana atxiiti äkixinireena? Atxiiti matamatakoti äkixinireena auakari kona Teosomoni ikarini. Itomaneri käkiti, “Nota Teoso säkire säpiretakarino,” inakani, txamari na atão ninoa säkire. Käkiti ninoa atoko inakani aua ikini itixitika. !Isäpiretarina atão Teoso säkire. Imisirienetarina käkiti. ² Käkiti säpiretiniäua: “Teoso äkiri Xesosi Kristo apokaepa ikorapokoriti. Käkitipeka itxaua,” ininiä iuasaaki aimarotari Erekar Matamatakoti auapitika iua äkixiniree. Ikara atoko aimarotari Erekar Matamatakoti Teoso sikakiti auätotiniri käkiti. ³ Käkiti säpiretiniäua: “Xesosi na atão käkiti !itxaua,” ininiä iuasaaki aimarotari Erekar Matamatakoti !uari iua käkiti äkixiniree. Matamatakoti iua käkiti äkixiniree auakari Satanasi nakiti itxaua. Kristo omanatakari nakiti itxaua. Iua Erekar Matamatakoti Teoso nakiti itxaua.

Hikenakopiretapekari: “Maerekati Matamatakoti Kristo omanatakoti iokanatakoti apokapitikako İkorapokoriti,” itxa. Uatxa apokapeka.

⁴ Hİte namariteni, Teoso nakitiakori hİtxaua. İniniã hİte ! auikari atão minakati sãpiretakani sãpiretakiti, kotxi Erekarı Matamatakoti hİte ãkixınireẽ auakari apia posotiİrerı itxaua iua. Maerekati matamatakoti, Xesosi sãkire mauİãkani ãkixınireẽ auakari, kaposotiİrerı itxaua, İuarıtıka Erekarı Matamatakoti hİte ãkixınireẽ auakari apia sikaimaroretai hİte. ⁵ Ninoa atão minakati sãpiretakani xinikakiti, itixi auakani xinikakiti atokotxıkana, İniniãkara itixi auakani auikari ninoa sãkire. ⁶ Atepekana, Teoso nakitiakori atxaua. Teoso İmarotakari auikari asãkire. Teoso nakiti minakatiua ! auikari asãkire. İniniãkara aimarotari kãkiti Erekarı Matamatakoti auaãkixıniretakini. İua Erekarı Matamatakoti atãonoka İsãkirauata. Aimarotari kãkiti ãti matamatakoti auaãkixıniretakini. İua ãti matamatakoti kamisirienereri itxaua.

Teoso Tiraõki

⁷ Nitiretakini, matiretakakaua, kotxi tiraõkitxi Teosomoni potoriakari itxaua. Kati-raõkirini Teoso anaakori itxauana. Ninoa atão İmarotari Teoso. ⁸ Matiraõkiti ! İmarotari Teoso, kotxi Teoso tiraõkiuatipika. Tiraõkitxi Teosomoni potoriãkari itxaua. ⁹ Teoso İokanatarı İmatonõkari İmi atemoni, Teosokata ãtipirika aãuini İkapani. İkara atoko İniniã, Teoso oerekaua İtİretiniua. ¹⁰ İkara tiraõkitxi atão İnakari itxaua. Mitxi ate ! atiretari Teoso. İuarıtıka iua tiretaua ate, İniniã İokanatarı İmi atemoni İpinini İkapani, maerekati akamakiti İmaktxakini İkapani.

¹¹ Nitiretakini, İkara atokorako itxa Teoso tiretiniua, İniniã matiretakakaua. ¹² ! Auari Teoso atamatakari, İuarıtıka Teoso auari aãkixınireẽ, atİretakakiniãua. İniniã Teoso oerekaua atão atiraõkiuatini.

¹³ Aimarotari Teosokata akaikotini ãtipirika. Aimarotari Teoso ãtipirika kaikotini atekata. Aimarotari İkara atoko İnakari, kotxi iua sikari Erekarı Matamatakoti atemoni. ¹⁴ Aãamatapekari Xesosi kamakiti. Akenakotapekari İsãpiretakiti. İniniã asãpiretari İkinimane, aİri Teoso İokanatarı İmi kãkitimoni, amaerekani makatzakakari İniniua İkapani, kãkiti ãtipirika Teosokata auini İkapani. ¹⁵ “Xesosi Teoso ãkiripitikara,” İna sãkiretakani, Teoso kaikotapika ninoakata. Apaka ninoa kaikota Teosokata ãtipirika. ¹⁶ Aimarotari Teoso tiretiniua. Aãuikapiretapitikari Teoso tiretiniua.

Teoso tiraõkiuatipika. Kãkiti katiraõkiri kaikota Teosokata ãtipirika. Teoso kaikota ãtipirika İuakata apaka. ¹⁷ Teoso oerekapekaua atão atiraõkiuatini iua tiraõkiuatini atokokana. İniniã kataparaxınireua Kristo apisatoõ aãpokasaaki, kãkiti misiritiko õtisaaki. Aimarotari ! İmisiritaua İuasaaki, İniniã kataparaxınireuako, kotxi İkorapokoriti aãuakasaaki Kristo atoko atxaua. ¹⁸ Atiraõkiuatakasaaki, ! apİkarauata. Atão atiraõkiuatiniã, ! auari apİkare. Apİkarauatakasaaki, amaãkuaa.

¹⁹ Atiretari Teoso, kotxi mitxipeka iua tiretaua ate. ²⁰ İua itari omanatakari, “Nota tiretari Teoso” İna sãkiretakari, paxirari İsãkire. ! Itiretari itari İuakata auakari. İniniã ! İposotari İtİretiniri Teoso İmaõkitakinini. ²¹ İniniã Teoso paniãtaua: “Teoso tiretakari tiretariko itari apaka.”

5

Teoso ãkiri Auikiko

¹ Xesosi Teoso mereẽkiti itxaua. İkara auİãkani Teoso anaakori itxauana. Aİri Teoso atİretiniã, aİtariakori apaka atireta, kotxi Teoso anaakori ninoa apaka txaua. ² Teoso atİretiniã, İnİreẽkiti İaõka akaminiã, aimarotari Teoso anaakori apaka atİretini. ³ Teoso atİretiniã, akİpitari İpaniãtakiti. Aposotari akaminiri İpaniãtakiti, kotxi İna kamimari İpaniãtakiti. ⁴ Aposotari akaminiri İua paniãtakiti, kotxi İua anaakori atxapekaua, İniniã İsikatarataua, maerekati itixi auakani nİreẽkiti İmakamakani İkapani. Kininiãpa İsikatarataua maerekati ninoa nİreẽkiti İmakamakani İkapani? İsikatarataua, kotxi Xesosi sãkire aãuika. ⁵ Kİpa posotatari maerekati itixi auakani nİreẽkiti İmakamakani? Kãkiti auikiãri Xesosi Teoso ãkiri İniniãua, İuanokara posotari maerekati İmakamakani.

⁶ Xesosi Kristo Teoso ãkiri itxaua. Teoso oerekapekaua Xesosi İua ãkiri İniniãua. Kãuaãriã Xesosi patxisatikosaaki İsãpiretaua. İuaİkana Teoso sãpiretaua Xesosi İua ãkiri İniniãua, Xesosi İpİkasaaki İareka İxikepoatakasaaki. Teoso sãpiretaua kona Xesosi patxisatikosaakinanini. İua oerekaua Xesosi Teoso ãkiri İniniãua İpİkasaaki apaka. Erekarı Matamatakoti sãpiretaua Xesosi Teoso ãkiri İniniãua. İua atãonoka İsãkire. ⁷ Teoso tixini auakani İpi, ãti pakini oerekaua Xesosi Teoso ãkiri İniniãua, aİri Teosoma, “Teoso Sãkire” İnakorİma, Erekarı Matamatakotİma pakini. Naia İpi, ãti pakini atİnoka. ⁸ İkorapokoriti auakani İpi, ãti pakini, Erekarı Matamatakotİma, Xesosi patxisatikoma, Xesosi İpininİma pakini oerekaua Teoso ãkiri İniniãua Xesosi. ⁹ Kãkiti erekarini sãpiretakiti aãuikapitika, İniniã apiata maãuikari Teoso

sāpiretakiti, kotxi atāonoka isākire. Iuara sāpiretaua Xesosi iua ākiri ininiāua. ¹⁰ Teoso ākiri auīākari ākixinire imarotari ikara Teoso sāpiretakiti atāo inini. Teoso sāpiretakiti mauīākati txari: “Paxirari Teoso sākire,” kotxi ! auikari Teoso sāpiretakiti Xesosi iua ākiri ininiua. ¹¹ Kiripa Teoso sāpiretaua? Iua sāpiretaua: “Nitxīkitakai auāki hinini notakata hāuapininiika hinini tīkane. Ikara atoko nitxīkitakai namarite nakitiakori hinakasaakia.” ¹² Iua Teoso ākiri nakiti Teosokata ātipirika auako. Iua Teoso ākiri nakiti minakatiua, !auapani ātipirika Teosokata.

Aāuini Ātipirika Anini Tīkane

¹³ Hīte auikari Xesosi Teoso ākiri ininiua. Niokanatsopata hītemoni, Teosokata ātipirika hāuini himarotini ikapani. ¹⁴ Teoso nireēkiti atokotxikana aamanainiāri Teoso, aimarotari ikenakotari amisākiretiniri, ininiā kataparaxinirepitikaua amisākiretiniri, kotxi aimarotari iua apakapapiretapitikaua. ¹⁵ Ikara atoko aniniā, aimarotari ikenakotari aamanaākiti, ininiā isikapitikaua.

¹⁶ Hīmarotakasaakiri pitari kaminiri maerekati, himisākiretari Teoso iua ikapani. Ininiā Teoso makatxakari maerekati ikamakiti. Teoso kamari iua ātipirika iuakata auini ikapani. Ikara maerekati makatxakiko auapitika, ininiā kona itxīkitakari iua xinire ipinini. Ātiāo maerekati kākiti kamakiti aua. Ikara maerekati makatxakiko ! auari, ininiā itxīkitakari kākiti xinire ipinini. Nota !ōtākikai himisākiretiniri Teoso ikara atoko inakari maerekati kamakari ikapani. ¹⁷ Teoso paniātakiti amakamakaniā, iuara maerekati txaua. Iuaritika aamanainiāri Xesosi ikara maerekati imakatxakini, ininiā ikara maerekati ! itxīkitakari kākiti xinire ipinini.

¹⁸ Teoso anaakori atāo inakani !inirekaikari maerekati ikaminina. Aimarotari ikara. ! Inirekaikarina maerekati ikaminina, kotxi Teoso ākiri nīkatana ninoa. Ininiā maerekati auīte Satanasi liposotari imisiritūnina.

¹⁹ Ikini itixiti auakani auīte itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰ Aimarotari, Teoso ākiri apokapeka ikorapokoriti. Aimarotari iua sīkaua imarore, ininiā aimarotari Teoso atāo inakari. Akaikota iua atāo inakarikata. Ari akalkota imi Xesosi Kristokata. Teoso atāo inakari itxaua iua. Itxīkitakaua iuakata ātipirika aāuini.

²¹ Namariteni, nota tiretakini, !hīteosonetapiri Teoso minakatiua. Ameē.

2 XOÃO

Iuaĩkana Xoão Iokanatsopatakiti

¹ Nota Xoão, mitxipe Xesosi imarotakarino nota. Niokanatsopata hĩte Xesosi sãkire auĩãkanimoni, hamariteakorimoni apaka. Teoso mereẽpekai hĩte inakitiakori hininiua ikapani. Nitiretai, kotxi hĩtiretari Teoso sãkire atão inakari. Kona notananini tiretai hĩte. Ikinimane atão inakari imarotakani tiretai hĩte apaka. ² Atiretai hĩte, kotxi atão inakari aua aãkixinireẽ. Atão inakari kaikotapika atekata ãtipirika.

³ Aĩri Teoso, imi Xesosi Kristo pakini sikari ikinipoko erekari hĩtemoni. Amonĩkai hĩte. Ikamaerekaxiniretaina hĩte. Ininiãkara himarotari atão inakari. Himarotari Teoso tiraõki.

⁴ Iteene nipoxokoniua, kotxi nimarotari apanakini hĩte kĩpitapikari Teoso sãkire. Atão inakarínoka hĩkama, kotxi aĩri Teoso paniãtaua ikara atoko inakari akamini. ⁵ Nota tiretakini, ia nipaniãtai: “Matiretakakaua.” Ikara Teoso paniãtakiti !amanerini. Akenakopiretapekari ikara Teoso paniãtakiti, merepitipanika Xesosi sãkire akenakotakasaaki. ⁶ Kisaakipa atiraõkiuata? Teoso paniãtakiti ikiniõtika akĩpitakasaakira, iusaaki atiraõkiuata. Merepitipanika pikenakotapekari ia Xesosi paniãtakiti: “Matiraõkiuata ikiniõtika.”

Kristo Omanatakani

⁷ Kaiõpokori kamisirienererini aua ikini itixiti. Ninoa sãkire: “Na kãkiti !itxaua Xesosi Kristo,” itxana isãkirena. Ikara atoko inakani misirienetari kãkiti. Kristo omanatakani itxauana ninoa. ⁸ Erepaniko. !Hãuikapiri isãkirena atão minakati, kotxi ninoa nirekari ixipokinirina hĩparĩka Teoso ikapani. Hinirekapitikari Teoso sikinii ikinipoko hĩparĩka iki.

⁹ Kãkiti takanapiniãri Kristo oerekakiti sãkiretxiti, ikamari maerekati. Teoso nakiti !itxaua. Kãkiti ãtipirika auĩkiniãri Kristo oerekakiti, imoianatari aĩri Teoso, imi pakini. ¹⁰ Kãkiti apokiniã paapoko, Kristo oerekakiti mauikakati, sãkiretxi atão minakati oerekakari, kona pauiritapiri ikaikotini paapoko. !Papakapapiri iua. ¹¹ Iua apakapakari apaka kamari maerekati iuakata, kotxi auiritari atão minakati isãpiretini.

¹² Ninirekari ito nisãpiretinii, txamari ! ninirekari aãtsopaã nisãpiretakiti nitakini. Ninirekari naõkitinii hĩte. Iusaaki asãkirauatako aãpisatoõtakiniiua, ininiã iteene apoxokoniua iusaaki.

¹³ Hĩtariakori Teoso mereẽkini uai auakani iokanapireta hĩtemoni. Ixinikamanapitaina hĩte. Ameẽ.

3 XOÃO Iuaĩkana Xoão Iokanatsopatakiti

¹ Nota Xoão, mitxi Xesosi imarotakarino, niõkatsopata pite nitiretakiti Kaiomoni. Nitiretai pite, kotxi pite tiretari atão inakari Teoso sãkire.

² Nitiretakiti, ninirekari ereka pinini pauini. Nimarotari pãkixinire ereka inini. Iua atoktxikana ninirekari piĩto ereka inini pimamianareni ĩkapani. ³ Aĩtariakori mitxi hĩtemoni nota iokanatakini, apokaþeka uai. Isãpiretanona pite iteene auikiniri atão inakari Teoso sãkire. Ikinĩõtika pikamari Teoso sãkire iaõka. Atãonoka pikama. Ininiã ninoã minapiretakiti iteene kamapoxokonitano. ⁴ Namariteni atoko hĩtxaua, ininiã nikenakopiretakasaakiri ikiniõtika hĩkaminiri atão inakari Teoso sãkire iaõka, nipoxokoniua. Ikara atoko inakari minapirenatxi, ninoã minapiretakiti, apia kamapoxokonitano nota.

⁵ Nitiretakiti peerekai pite, kotxi ikiniõtika pimoianatana aĩtariakori ereẽ apokakani. Mitxi ĩpimarotana ninoã, iuaritika pimoianatana. ⁶ Ninoã aĩtariakori sãpiretapekari pitiraõki Xesosi sãkire auĩakanimoni uai auakanimoni. Paapoko iuaĩkana ipotorikasaakina, erekari ninoã amonitakiti pisikinina, kotxi Teoso apokaerekatari ikara atoko pitiretinina. ⁷ Ninoã takanapari aapokona Xesosi sãkire isãpiretinina ĩkapani. Xesosi sãkire mauĩakani ! isikana iamontakitina ninoamoni. ⁸ Ininiãkara maãþakapana Xesosi sãkire sãpiretakani aãuapokoã. Ininiã amoianatana Teoso sãkire atão inakari iaripiretini ĩkapani.

Txiótepi, Temétxio Pakini

⁹ Niõkatsopataþeka Xesosi sãkire auĩakanimoni ereẽ pauiniãtaã auakanimoni. Txamari Txiótepi inakori ! ikĩþitari nõtãkikare. Iua iuikapikaua. Inirekari ninoã auĩtetiniri iua, ininiã ! imaãkatari nisãkire. ¹⁰ Iua kamapiretapikaua ate. Kona ikarananini ikama. Apaka !apakapana aĩtariakori, hĩtemoni sikani. Apaka !auiritana apanakini apakapinina ninoã. ! Auiritakari aĩtariakori nirekaãkani apotiĩtiniua Teoso misãkiretiko aikotiã. Ereẽ napokasaaki, iuasaakiko nisãpiretai hĩte iua apisatoõ ikinika maerekati ikamakiti.

¹¹ Nitiretakiti, !pikamapiri maerekani kamakiti atoko. Erekarini kamakiti atoko inakarinara pikamako. Erekarini kamakari Teoso nakiti itxaua. Maerekati kamakari !imarotari Teoso.

¹² Temétxio inakoripekana, ikinimane sãpiretari iua ereka inini. Atão inakari Teoso sãkire oerekaua Temétxio kamakiti atão inini. Ate apaka sãpiretari iua ereka inini. Himarotari atão inakarinoka asãpireta.

¹³ Ninirekamari ito nisãpiretinii, txamari ! ninirekari aãtsopaã nisãpiretakiti nitakini. ¹⁴ Ninirekari paĩtiki naõkitinii pite. Iuasaaki asãkirauatako aãþisatoõtakakauako.

¹⁵ Ninirekari Teoso kamaerekaxiniretinii. Aĩtariakori uai auakani sãpiretai ixinikamanapitinii. Pisãpiretana ikinikana aĩtariakori ereẽ auakani, axinikamanapitinina ninoã.

XOTA

Xota Iokanatsopatakiti

¹ Nota Xota. Xesosi Kristo nitiri amotakori nitxaua. Txiaxo itari nitxaua. Niokanatsopata kâkitimoni, Teoso akiritakinimoni, Teoso aïri tiretakinimoni. Xesosi Kristo nîkatakiniimoni niokanatsopata.

² Teoso iteene amonîkai. Iteene ikamaerekaxiniretai. Iteene itiretai.

Atâo Minakati Oerekakani

³ Hîte nota tiretakini, Xesosi makatxakapekari himaerekani, nota maerekani apaka. Ninirekamari niôkatsopatiniri amaerekani makatxakiko pirena hîtemoni. Iuanoka ninireka niôkatsopatinî, txamari nixinikari erekape âtiâo niôkatsopatinî. Ninirekari nôtâkikinî. Teoso oerekakiti sâkiretxiti inakitiakorimoni isikakiti hinîkaenetariko. Teoso oerekakiti ikinika isikapekari inakitiakorimoni. !Hâuiritapiri apanakini koketiniri ikara ninoa oereêkitikata. ⁴ Hîte Xesosi sâkire auîâkani sauaki aua Teoso mapaxitakani. Merepanika ninoa apotti-itakasaakiaua hîtekata, !hîmarotari kamisirienererini ininiuana. Ninoa koketari isâkirena Teoso sâkirekata. Ninoa sâkire: “Ate sirîka anireêkitokata, kotxi Teoso katiraôkiri, ininiâ iua limisiritaua.” Ikara atokora itxana ninoa. Xesosi Kristonokara aâuîte. Apiananiri itxaua. Iuaritika ninoa linirekari Xesosi. Kitxakapirîka Teoso sâkire iôkatsopatakori sâpiretari Teoso misiritiniri kâkiti ninoa atoko inakani.

⁵ Kitxakapirîka Exito tixini auakani misiritana Xoteoakori. Hîmarotapekari ikara inakari. Ninirekari iuaîkana hîxinikiniri ikara inakari pirena. Teoso moianatana Xoteoakori, ininiâ ninoa mîteka, Exito tixini osipîkinina îkapani. Hîxinikariko ia: Teoso makatxakana ninoa iuaasaaki imapinakanina îkapani, iuaritika mapa kasiriti napa atoko Teoso okana ninoa iua sâkire mauîkani.

⁶ Âtipekana nisâpiretai. Hîxinikariko Teoso nitiriakori iaxitikini kitxakapirîka. Teoso txîkitakana ninoa auîtetxi ininiuana, txamari !inirekaikarina Teoso paniâtakiti ikaminina, ininiâ itakanaparina auiniâtaâna Teoso tixineê. Hîxinikariko ia: Teoso paniâtana ninoa ipiaâ ikaikotinina âtipirika. Itixi xipokini ôtsaaki Teoso misiritanako ninoa.

⁷ Âtipekana nisâpiretai. Hîxinikariko Sotoma sitatxiti, Komoha sitatxiti, apanakini sitatxiti apaka iuaâtaâ takote auakari. Iuaâ auakani !inirekari Teoso paniâtakiti ikaminina, ninoa Teoso nitiriakori atokokana. Maerekatinoka inirekapikana, kiki sirîkîni âti kikikata. Ininiâ Teoso xipokari iuaâ auakari sitatxiniri. Ninoa maerekani xika Teoso iokanatana ninoa arikatxi maxipokatimoni. Iuaâ imisiritâkapikana. Ikara ôtâkikaua maerekati amakamâkani tîkane.

⁸ Ninoa maerekati kamakani, kamisirienererini hîte sauaki auakani, kitxakapirîkarini atokokana itxana. Ixiniâkitina maerekati xika ninoaka îto imisiritauana. !Inirekarina Teoso ninoa auîte ininiuua. Imisâkirepîretarina Teoso nitiriakori iaxiti auakani. ⁹ Mikeo inakori Teoso nitiriakori auîte itxaua, iuaritika !imisâkirepîretari âti Teoso nitiri iaxitikiri. Kitxakapirîka iua Mikeo Satanasikata itaparakienatakakaua, kotxi Mikeo nirekari Moisesini îto ikatini, txamari Satanasî nirekari Moisesini îto iua inakiti îkapani. Iuaasaaki Mikeo !imisâkirepîretari Satanasî. Ianoka isâkire: “Teoso misiritapanikaiko pite,” itxari Satanasî. ¹⁰ Txamari ninoa kamisirienererini hîte sauaki auakani misâkirepîretari ikinika imimarotakinîtinina. Ninoa îikite kaxipiri îtopa auakani îikite atokokana, kotxi ikamarina îtonani nireêkiti. Ikara îikitenâ xipokanako ninoa.

¹¹ Teoso misiritanako ninoa. Kitxakapirîka Kaî inakori kamari maerekati. Iua maerekani atokokana ninoa maerekani. Kitxakapirîka Paraâo inakori kamari maerekati txineiro apakapini îkapani. Iua maerekani atokokana ninoa maerekani. Kitxakapirîka Koree inakori !inirekari Moisesi iauîte ininiuua. Iua atokokana ninoa !inirekari Teoso iauîtetxi. Ininiâ ixipokaâkanako Koree xipokiko atokokana.

¹² Hâpotitakasaakiaua hinipokotini îkapani, ninoa kamisirienererini apaka nipokota hîtekata. !Ipêtauatana. Itxikotarina iua kiiniri imaerekanina xika. Ninoaka itiretaua. !Tiretarina apanakini. Îtima anikari katxiâri iaxitikiri, ininiâ katxiâri napiniâtaâ âparaâ kipa, takari aneini îkapani. Txamari ninoa kamisirienererini katxiâri âki âparaâ mauakinîti atoko itxa. !Erekana kâkiti îkapani. Mitaâsaaki aua txipokori, txamari ninoa kamisirienererini mitaâsaaki aamina mariti atokokana ninoa. Aamina mariti ipîkari atoko, kotxi !iminâua. Ninoa iua atokokana, kotxi !ikamari erekari. Aamina mariti tokaâka. Ikotsa maporokaâka, ininiâ atâo ipîkari itxaua. Ninoa kamisirienererini ikara aamina atoko, kotxi ipinanako. !Ikaikotana Teosokata âtipirika.

¹³ Potxoari uiniti tsakati pamonōkoniri atoko itxa ninoa kamisirienererini. Tsakati sori txiko atoko itxa ninoa maerekani. Iōriki atoko itxana. Iua iōriki sinimoni !kimarotikori. Ninoa sariko ipiāmoni ātipirika ikaikotinina ikapani. Teoso mereēri ikara ipiaātaā ninoa auini ikapani.

¹⁴ Kitxakapirīka Enoki inakori sāpiretapekari kamisirienererini pirena. Iua Enoki Adāo apika mekaniri apika mekaniri itxaua. Enoki txari: Hātamatariko. Apiananiri apokako itiximoni itomaneri inakitiakorikata. Mio, apikomoni mio, apikomoni mio, itxaāpokata inakitiakori iuakata ikani.

¹⁵ Iua ikinipoko misiritiko sāpiretakari itxaua. Iua apokasaaki, isāpiretanako maerekati kamakani misiritiko, Teoso manireēkani misiritiko, kotxi Teoso !ipotxitari ninoakamakiti. Ninoa misākirepiretapikari Teoso. Ninoa maerekani xika, Teoso imanirekakanina xika, imisiritaākanako,

itxa Enoki sāpiretakiti kitxakapirīka.

¹⁶ Ninoa kamisirienererini ātipirika tsoatapika. Ātipirika apoītapikana apanakini. Iitona nireēkitinanira ikamana. Iuikauana. “Peerekai pite,” itxana ātimoni inireēkitinani apakapinina ikapani.

Ōtākipirenatxi

¹⁷ Nīretakini hīxinikariko aāuīte Xesosi Kristo iokanatakini sāpiretakiti akokaxiti. ¹⁸ Ninoa txai: “Xipokatxi ōti kaiamapeka inini manapi apokanako kikiakori hīte napetakani tīkane. Ninoa kamariko ninoaka nireēkiti, Teoso manireēkiniti,” itxana Xesosi Kristo iokanatakini sāpiretakiti. ¹⁹ Ninoa maerekani xika kākiti txitakakaua. Ninoa kamisirienererini kamari iitona nireēkitinoka. Erekar Matamatakoti !auinana ninoa.

²⁰ Hītepekana nota tīretakini, iteene hāuikapikariko Teoso oereēkiti. Ikara atoko hininiā, kataparaxinireiko hīte. Hāuikariko Teoso oereēkiti, kotxi Teoso sākire itxaua. Himisākiretariko Teoso. Erekar Matamatakoti oerekai atāo hīsākirauatini ikapani. ²¹ Maerekati kamakani, iuaritika aāuīte Xesosi Kristo !imisiritai. Iua anikai ātipirika iuakata hāuini ikapani. Ikara hiātapakasaaki, ātipirika hīxinikapikariko Teoso tiraōki hīte ikapani. !Hītakanapapiri iua.

²² Apanakini !auikapanikari ikinika Teoso oereēkiti, iuaritika !hītixitapena. Himoiatananako ninoa iteene auikini ikapani. ²³ Pamonōkoniri, kākiti kamakasaakiri maerekati. Xamina tirinakari atoko itxa imisiritikona imaerekanina xika. Ininiā hīsāpiretanako Teoso sākire, imisiritikona apokini apisapanika. Xamina tirinakari āki katxakakari pimakatxakini atokokana itxa, pisāpiretakasaakiri Teoso sākire ninoamoni. Apanakinpekana hiamonīkako. Hiamonīkasaakina, erepaniko, kotxi pamonōkoniri ninoa maerekani. Homanatariko maerekati ninoa kamakiti, hīte makamakaniri ikapani.

Peerekari Teoso

²⁴ Teoso kaposotiireri nīkataua maerekati amakamakani ikapani. Iua anikaua iua apisatoō apoxokoniritika. Iuasaakiko amaerekani !auaikako. Peerekari aāuini iua apisatoō. ²⁵ Āti Teoso !uari. Iuanokara Teoso txaua. Iuanokara kimaroreri. Amaerekani makatxakakari itxaua, kotxi aāuīte Xesosi Kristo ipina ate ikapani. Iua iotximere aua, kotxi imaerekani !uari. Auītetxiakori auīte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. Ikara atoko itxapikako ātipirika Teoso. Ameē.

APOKORÍPISI Xesosi Kristo Iuaka Oerekiniua Pirena

Ia Aätsopa Oerekaua Xesosi Kamakiti

¹ Ia aätsopa oerekari Teoso nakitiakori Xesosi Kristo paítiki kamaenetakiti. Teoso iokanitari inítiri iaxitikiiri Xoõomoni Xesosi Kristo kamaenetakiti oerekini íkapani. ² Ikinika Xoõo atamatakiti, ikinika ikenakotakiti pakini isäpireta ia aätsopaã. Ikara atoko isäpiretaua ate Teoso säkire, Xesosi Kristo säpiretakiti iuamoni. ³ Ia aätsopa atatsopatakani Teoso takariko erekari ninoamoni. Teoso takariko erekari ia isäkire kenakotakanimoni, ia isäkire kípitakanimoni, kotxi ikinika Xoõo iõkatsopatakiti okatapaniri apokini.

Xoõo Iõkatsopare

⁴ Nota Xoõo. Niokanitari ia niõkatsopare Teoso mereëkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hitemoni. Ikamaerekaxiniretai híte. Uatxa iua aua. Merepitipanika kixakapirika iua aua. Iua átipirika auapikako. Setxi matamatakoni iaxitikiini Teoso topäkiniãtaã apisatoõ auakani sikari erekari hitemoni. ⁵ Xesosi Kristo apaka sikari erekari hitemoni. Atão inakarínoka säpiretakari itxaua iua. Iua merepitipanika õkitikaua ipíkani sauaki. Apaka itixi auakani auíteakori auíte itxaua iua.

Iua ate tiretakari. Ipinata ate íkapani amaerekani imaktxakini íkapani, ininiã isikakaua erekari akamini íkapani. ⁶ Itxíkitakaua auítetxiakori aniniua. Itxíkitakaua sasetotxiakori aniniua, kotxi asäkirauata Teosokata. Ininiã atxari Xesosi:

“Átipirika peerekai pite. Átipirika pitenokara kaposotiireri. Ameë.”

⁷ Hätamata, Xesosi napani. Iua inako katxiãrikata. Iuasaaki ikinimane kãkiti atamatariko. Aamina ípiriãmitakari nopini iua tokakitakani apaka atamatariko iua. Iuasaaki ikini uãkati kãkiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameë.

⁸ Apiananiri txari:

–Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni –itxa.

Xoõo Atamatarí Aítari Iaxitikiiri

⁹ Nota Xoõo, hítari. Nikamari Xesosi Kristo nireëkiti, ininiã himoianari nitxaua, kotxi átipirika nimíteenekari nimisirítiko, híte misirítiko himíteenekini atoko. Ikara misirikaretxi apokapitika atemoni, kotxi aãuíte Xesosi Kristo nakitiakori atxaua. Nota aua Patamosi inakori pokomiríiti. Nitakaãka uai, kotxi Teoso säkire nisäpireta apanakinimoni. Ikinipoko nimarotakiti Xesosi Kristo pirena nisäpiretini xika kãkiti takano nota uai. ¹⁰ Kãkiti Api-ananiri xinikini õtisaaki, Erekarí Matamatakoti sikaimaroretano nota. Iuasaaki nikenakotari säkiretxi nitikinimoni. Säkiretxi apiaenetakari, trõpeta atoko nikenakota. ¹¹ Itxari:

–Kãkiti apisapanika naua nota. Nota auapanika ikinipoko xipokaãka atoko. Piõkatsopata aätsopaã patamatakiti tükane. Eereka piokanatarí iua aätsopa kãkiti Teoso mereëkinimoni setxi sitatxiti auakanimoni Ásia tixineë. Piokanatsopata Épeso sitatxiti auakanimoni, Esimina sitatxiti auakanimoni, Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini –itxa notamoni.

¹² Ininiã eereka nikirioka notakata säkirauatakari natamatini íkapani. Nikiriokasaaki, natamatari setxi tirikapi topãkini oro kamakori. ¹³ Tirikapi topãkiniãtaã, natamatari kãkiti itari iaxitikiiri, iuaritika ipininimoni itxaua. Iua mãka õtanori. Ikítiãpeka apoka. Ipakiomatare atoko oro kamakoro aua itorotamoni. ¹⁴ Iãko iteene kasarori mapoa atoko itxa. Xamina tirinakari atoko itxa oki. ¹⁵ Ikíti mëkoríka pirõsi xamina äki imëkoríkini atoko. Isäkire ene äparaã torõkani atoko. ¹⁶ Iuako ikikomoni imãkaro setxi iõriki. Inamaã iouata mitari pokíka. Iua iouata ipi uanaro aua. Atokatxi iotximere atoko itxa itoõ.

¹⁷ Natamatakasaakiri, nirika ikitimoni. Koriãkari atoko nitxa. Ininiã iuasaaki itakari iuako ikikomnikiri nota nopini. Itxano:

–Kona pípkarauatape, kotxi ikinipoko auini apisapanika nota aua. Ikinipoko xipokaãka atoko nota auapanika. ¹⁸ Nota auãkipika inakarino. Nota koriãkaripekano, iuaritika hätamatano. Átipirika auãki inakarino nota. Ameë. Kaposotiireno nota, kotxi nipaniantari kãkiti ipinini. Niposotiire aua niokanatiniri kãkiti maerekati kamakani misirítikoãtaã. ¹⁹ Piõkatsopatarí mitxi patamatakiti, uatxaika patamatakiti pakini. Apikomoni noerekakiti

apaka piökatsopata, kotxi noerekaiko katana itiximoni ikari. ²⁰ Kiripa ninoa iöriki setxi pakini niuako nikikomoni auakani? Teoso nitriakori itxauana. Ninoa anikari nota säkire nisäkire auiäkanimoni ninoa setxi sitatxi auakanimoni. Kiripa ninoa setxi tirikapi topäkini oro kamakori? Nisäkire auiäkani ninoa setxi sitatxi auakani itxauana –itxa Xesosi Xoöomoni.

2

Xesosi Iokanapirena Épeso Auakanimoni

¹ Xesosi misäkiretari Xoöo:

–Piokanatariko ia nisäkire Teoso nitrimoni, Teoso säkire auiäkanikata auakarimoni Épeso sitatxitiä:

Ninoa setxi iöriki maikakarino nota. Nimaikari ninoa iöriki niuako nikikomoni. Ninoa setxi tirikapi topäkini oro kamakori sauaki tipokotakarino nota. Ia nota säkire.

² Nimarotari ikinika hikamakiti. Nimarotari itori parikatxi pamimari hikama. Parikatxi kamimari inakasaaki, kona hitakanapari. Maerekati kamakani apokasaaki hitemoni, kona hite apakapana. Apokapeka apanakini käkiti hitemoni. Itxana: “Teoso iokanatakini-raua ate.” Txamari, kona atäo ninoa säkire. Nimarotari kona hite auiritana ninoa kaminiri maerekati. Hite atamakaerekatana. Eereka himarotari kona atäo ninoa säkire.

³ Himisiritaäka nisäkire hīsäpiretini xika, iuaritika himiteenekari ikinipoko nota ikapani. Kona hisäpaka hīparitkautatini nota ikapani.

⁴ Ikara hikamakiti erekari, txamari hitakanapari hitiretinino. Merepanika hitiretano.

⁵ Hixinikariko merepitipanika hitiretinino. Uatxa poiäoka hitiretano. Iuaikana hikamariko merepitipanika hikamakiti atoko. Himatakanapakaniäri ikara himaerekani, patimari napokini hitemoni. Nimakatzakariko hitirikapite topäkini. Ininiä Teoso säkire auiäkani ! auaika ereë, himatakanapakaniäri ikara himaerekani. ⁶ Auapitika atäo hikamakiti, kotxi hite omanatari Nikoraito inakoni kamakiti. Nota apaka omanatari ninoa kamakiti.

⁷ Kakenakokii hite, ininiä hikenakotariko Erekari Matamatakoti säkire Teoso säkire auiäkanimoni. Maerekati makamakati nauiritako amätiiri Teoso tixine apanikaki auakari itximini. Iua amätiiri tximakari auapika ätipirika Teosokata,

–itxa Xesosi Épeso auakanimoni.

Xesosi Iokanapirena Esimina Auakanimoni

⁸ –Piokanatariko ia nisäkire Teoso nitrimoni, Teoso säkire auiäkanikata auakarimoni Esimina sitatxitiä:

Ikinipoko auini apisapanika nota aua. Ikinipoko xipokaäka atoko, nota auapanika. Nipipe, iuaritika iuaikana nökitikaua. Uatxa ! nipinaika. Ia nota säkire. ⁹ Nimarotari hätsiire. Nimarotari hite minakati ! auari. Iuaritika ikinipoko erekari aua hitemoni. Nimarotari apanakini misäkirepiretinii hite. Ninoa txa: “Xoteoakorira ate.” Txama kona atäo Xoteoni !itxauana. Ninoa apotiitiniätaäua Satanasi nakiti. ¹⁰ Kona hipikapiri himisir-itiko ikapani ikari. Satanasi takari apanakini hite kateia äki ataerekatinii ikapani. Himisir-itaäkako tesi pakini öti. Atxiiti hīpina nisäkire häuikini xika, iuaritika kona hitakanapapiri nisäkire häuikini, ininiäkara nisikai ätiäo saporietä. Iua saporietä apakapakari auapika ätipirika Teosokata.

¹¹ Kakenakokii hite, ininiä hikenakotariko Erekari Matamatakoti säkire Teoso säkire auiäkanimoni. Maerekati makamakati kona iuaikana ikoriäika,

–itxa Xesosi Esimina auakanimoni.

Xesosi Iokanapirena Pékamo Sitatxiti Auakanimoni

¹² Eereka Xesosi iuaikana misäkiretari Xoöo:

–Piokanatariko ia nisäkire Teoso nitrimoni, Teoso säkire auiäkanikata auakarimoni Pékamo sitatxitiä:

Notamoni auari oa iouata ipi uana auakito. Ia nota säkire. ¹³ Nimarotari ikinika hikamakiti. Nimarotari häuiniätaä. Ereë Satanasi käkiti auite itxaua. Iuaritika hite auikari nota säkire. Kona hite takanapari nisäkire häuikini. Ätxipa inakori auama hite sauaki. Iua säpiretapikari nisäkire käkitimoni. Ikara xika okapeëka ereë Satanasi auiniätaä. Iuaritika kona häsikano. !Hitakanapari nisäkire häuikini.

¹⁴ Txamari auapitika hikerokakiti. Aua käkiti hite sauaki Paraäo inakori säkire auiäkani. Kitzakapirika iua oerekari Paraki inakori käkiti Iseao auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana käkiti kaminiri maerekati iito nireëkiti äti käkiti itokata. ! Apakata käkiti auikiniri Paraäo säkire. ¹⁵ Hite sauaki aua käkiti Nikoraito inakoni säkire auiäkani. Nota omanatari ninoa auiäkiti säkiretxiti. ¹⁶ Hitakanapariko ikinika himaerekani. Hikanapiriäko

notamoni. Ikara atoko himakamakaniã, patimari hîtemoni napokini. Ininiã nineena-mauata maerekati kamakanikata mitaro iouataã ninamaã auakaroã.

¹⁷ Kakenakokii hîte, ininiã hîkenakotariko Erekarî Matamatakoti sâkire Teoso sâkire auiañkanimoni. Maerekati makamakati nisikariko komiri iaxitikiñi kipatakori. Apaka nisikariko kai kasarori maerekati makakanimoni. Iua kai nopini iõkataãka kãkiti uãka amaneri apanakini mimarotakiniti. Apakapakarînanî imarotari iuãka amaneri, –itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸ Eereka Xesosi iuañkana misãkiretari Xoão:

–Piokanatariko ia nisãkire Teoso nitirimoni, Teoso sâkire auiañkanikata auakarimoni Txiatxira sitatxitiã:

Teoso ãkirirano nota. Noki xamina tirinakari atoko itxa. Nikiti mëkorïka pirõsi atoko itxa. Ia nota sâkire. ¹⁹ Nimarotari ikinika hîkamakiti. Nimarotari hîtiraõki. Nimarotari iteene hãuikari nisãkire. Nimarotari iteene hîparïkauata nota ïkapani, apanakini ïkapani apaka. Hîparïka nota ïkapani pasãpaniri inakasaaki, iuaritika hîkamapanikari nota ïkapani. Uatxa apiaãpota hîparïka nota ïkapani.

²⁰ Itxama, nisãpiretaiko hîkerokakiti. Hîte auiritaro sito, Xesapeo inakoro, maerekati okamini hîte sauaki. Oa txa: “Teoso sâkire sãpiretakarono nota.” Ôtxama, omisirienetana ninitiriakori. Oa xika, ninõa kamari maerekati iñtona nireëkiti apanakinikata isirïkinina. Apaka ninõa nikari nipokori teoso kamakori sikakori. ²¹ Niãtapari otakanapiniri omaerekani, txamari kona onirekari otakanapiniri omaerekani. ²² Ininiã nota kamari oamianatini. Oakata sirïkakani matakapanakaniãro, iteene ninõa atatsiirauata. ²³ Oa anaakori nokapitikako. Ikara atoko inakasaaki, ikinimane Teoso sâkire auiañkani imarotariko nimarotari ikinika kãkiti ãkixinire, ikinika ixinikakiti pakini. Ininiã erekari nisikako erekari kamakanimoni. Apaka nimisiritari maerekati kamakani. Hîkamakiti iaõka niñkitxitai hîte.

²⁴ Uatxa nimisãkiretai hîte apanakini Txiatxira sitatxiti auakani. Hîte auikari Teoso sâkire. Hîte ! auikari Xesapeo sâkire. Hîte kona apaiaõkari Satanasi oerekakiti, iua imarore. Kona ninirekari nisikinii apikomoni parïkatxi nota ïkapani, kotxi uatxa iteene hîparïkauata nota ïkapani. ²⁵ Ianoka ninireka hîkamini. Hîte auikari nisãkire, ininiã hãuikiniritika nisãkire, nikanapiriãko.

²⁶ Iua maerekati makamakati, ãtipirika nipaniãtakiti kamakari, iuamoni nisikariko niposotiire itixi auakani auñte ininiua. ²⁷ Teoso sâkire kixakapirïkari txari:

Auñtetxi itxauako. Itapararitika ipaniãtana ninõa inireëkiti ikaminina. Imakamakaniãrina inireëkiti, imisiritana ninõa, tiitxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. ²⁸ Apaka nisikariko iõriki ïkanõkapanikero iuamoni, ininiã notaka nisikaua iuamoni, kotxi iua iõriki atoko nitxaua. ²⁹ Kakenakokii hîte, ininiã hîkenakotariko Erekarî Matamatakoti sâkire Teoso sâkire auiañkanimoni, –itxa Xesosi Txiatxira auakanimoni.

3

Xesosi Iokanapirena Satxi Auakanimoni

¹ Iuañkana Xesosi misãkiretari Xoão:

–Piokanatariko ia nisãkire ninitirimoni, Teoso sâkire auiañkanikata auakarimoni, Satxi sitatxitiã:

Notamoni aua ninõa setxi Matamatakoni Teoso nakiti. Notamoni aua ninõa setxi iõriki. Ia nota sâkire. Nimarotari hîparïka. Apanakini sãpiretai hîte auãki hinini hîxinire, txamari Teosomoni koriãkanipekarai hîte. ² Himereka. Araõkire hîtxapaniko. Hîsikataratari erekari hãkixinireë auakari, kotxi iua erekari ipinaariãpota. Ininiã hîtxikitakari iua erekari auãki inini iuañkana. Notamoni hîparïka Teoso apisatoõ na atão. ³ Hîxinikariko hãpakapakiti, apaka hîkenakotakiti. Hîkïpitariko hîkenakotakiti. Hitakanapariko maerekati. Erekarî hîkamako, kotxi kiñtiriri apokini atoko napokako uai. Kãkiti kona imarotari kiñtiriri apokini manapi. Ikara atokokana nitxako nikanapiriãkasaaki.

⁴ Hîte Satxi sitatxiti auakani sauaki auapanika apanakini maerekati makamakani. Ninõa auikapitikari nisãkire. Ninõa kãkiti imãka matxikotakani atoko itxana. Ininiã notakata isanako. Imãkana kasarori. Ikara atoko nikaminana, kotxi ninõa kamari erekari nipaniãtakiti.

⁵ Maerekati makamakani ieretakariko mãkatxi kasarori. Kona noakapaniriko iuãkana naãtsopateë. Kãkiti iuãkana ikara aãtsopaã auakani ãtipirika auapikako Teosokata. Ikara

atoko ininiã, nisãpiretari iuãkana nirimoni, initiriakori iaxitikini pakinimoni. Nitxana: “Nota nakitiakori itxauana ninoa.”

⁶ Kakenakokii hïte, ininiã hïkenakotariko Erekarî Matamatakoti sãkire Teoso sãkire auiãkanimoni,
–itxa Xesosi Satxi auakanimoni.

Xesosi Iokanapirena Piratëopia Auakanimoni

⁷ Iuaïkana Xesosi misãkiretari Xoão:

–Piokanatariko ia nisãkire Teoso nitirimoni, Teoso sãkire auiãkanikata auakarimoni Piratëopia sitatxitiã:

Nota maerekati makamakaturano. Atão inakaranini sãpiretakarîkarano nota. Kaposotireri auitexi Tavii inakori atoko nitxa, kotxi nota matakakakiti, kona ãti totari. Nota totakiti kona ãti matakakari. ⁸ Nimarotari hïte parïka. Hãtamata. Hïparïka nota ikapani aapokotxi tore matakakakori atoko itxa. Kona ãti posotari iseretiniri. Ininiã kãkiti ! iposotari iotokakinii hïte nisãkire hïspiretini. Ikara atoko nikaminii hïte, kotxi kona kataparai hïte. Ikara atoko nikaminii hïte, kotxi hïkïpitari nisãkire. Kona hïkïpatari nisãkire apanakini apisatoõ. ⁹ Apanakini txari: “Atão Xoteoakori atxaua.” Txamarî Satanasi nakitiakori itxauana. Paxirari ninoa sãkire. Nikamariko ninoa kapotoreëkiniãua hïte apisatoõ. Iuasaaki ninoa txako: “Atãopitikara Xesosi tiretapitikai.” ¹⁰ Hïkïpitapekari nisãkire. Kamonõkoniri inakasaaki, kona hitakanapari nisãkire, ininiãkara apia maerekati ikini itixiti apokasaaki, iuasaaki ninikataiko hïte. Iua maerekati kona misiritai hïte. Iua maerekati apokako itixi auakani atamakaerekatini ikapani.

¹¹ Erepaniko, patimapaniriko napokini ereë. Ætipirika hïkamariko erekari. Hitakanapapikariko maerekati. Ininiã iuasaaki ãti kona posotari imaktxakiniri auitexi saporietane hïtemoni nisakakiti. ! Imaktxakarina ikara hïparïka ïki. ¹² Nikamariko maerekati makamakati itïkare mina atoko inini niTeosone misãkiretiko aikoti ãki. Auapika Teoso misãkiretiko aikoti ãki, ininiã ! itakanapari Teoso sãkire. Niõkatariko niTeosone uãka iua nopini. Apaka niõkatariko Teoso sitatxine uãka iua nopini. Ininiã apanakini imarotari Teoso nakitiakori ininiuana ninoa. Iua Teoso sitatxine Xerosareë amaneri iua tixine katxakakari. Iua maerekati makamakati nopini niõkatariko apaka nota uãka amaneri.

¹³ Kakenakokii hïte, ininiã hïkenakotariko Erekarî Matamatakoti sãkire Teoso sãkire auiãkanimoni,
–itxa Xesosi Piratëopia auakanimoni.

Xesosi Iokanapirena Araotxisëia Auakanimoni

¹⁴ Iuaïkana Xesosi misãkiretari Xoão:

–Piokanatariko ia nisãkire Teoso nitirimoni, Teoso sãkire auiãkanikata auakarimoni Araotxisëia sitatxitiã:

Niuãka “Ameë.” Nota atão sãkiretxiti sãpiretakarîkarano. Nikamari ikinika nisãpiretakiti. Merepanika nikamari ikinipoko. Ininiã ikinipoko auite nitxaua nota. ¹⁵ Nimarotari ikinika hïparïka. Hïtxari: “Nauikapitikari Xesosi sãkire.” Txamari kona iteene hinirekari hïkaminiri nipaniãtakiti. Apaka kona iteene hinirekari hitakanapiniri nisãkire. Kona kapataraki atokoni hitxaua hïte. Kona katxïkareri atokoni hitxaua hïte. Poomari atoko hitxaua. Notamoni apiaerekata kapataraki atoko hininiua hïte. Iuasaaki iteene hinirekari hïparïkauatini nota ikapani. Iteene himanirekakaniãri hïparïkauatini nota ikapani, api-aerekata katxïkareri atoko hininiua hïte, nisãkire ikinika hitakanapini. ¹⁶ Notamoni hïte ãparaã poomari atoko hitxa. Ininiã kona ãparaã kapatakaãri atoko ! hitxa. Apaka kona ãparaã katxïkareëri atoko ! hitxa. Ikara atoko inakasaaki ! ninirekai. Ininiã mapara nikanakai hïte. ¹⁷ Hïte txa: “Katxineiroteua ate. Katiua ate. Apikomoni anirekakiti ! auari,” hitxa. Txama kona himarotari hãkixinireë iteene himatinaniuatini. Hãkixinireë minakati ! auari. Hãkixinireë mokiri atoko hitxaua. Kasarari atoko hitxaua hãkixinireë. Ikara atoko hininiã, kona himarotari Teoso. ¹⁸ Nõtãkikai hïte hiamotiniri notamoni auakari oro atoko inakari. Oa oro xamina oeretakito. Ikara atoko hïkaminii, ikinika hinirekakiti auako hïtemoni. Hiamotariko mãkatxi kasarori notamonikiri hïeretakini ikapani, ininiã kona hïpëtauta kasar hinini xika. Ikara atoko hïkaminii, hãkixinire ! auari maerekati. Hiamotariko apaka pinïtxi notamoni auakari hõki ikapani, ininiã atão hïposota hãtamarauatini.

¹⁹ Nitiretakini nõtkika, apaka noerekana. Ininiã ikinipoko atão hïkamako maerekati hitakanapini ikapani. ²⁰ Hãtamatako. Hãkixinire toreë nota auapeka. Nota haãpoko maparakiri akiritakari atoko. Hïkenakotiniãri nakiritinii, hõsereiniãri hãkixinire tore, niãroã hïtekata nikaikotini ikapani. Iuasaaki ninipokota hïtekata. Hïte nipokota notakata.

²¹ Nauiritari maerekati makamakati topākini notakata auñteti topanere nopini. Iua auñteti topanere nota nakiti. Iua atokotxikana nota topāka nirikata auñteti topanere nopini iua nakiti nopini, kotxi maerekati makamakati nota apaka txaua. ²² Kakenakokii ñite, ininiã hikenakotariko Erekar Matamatakoti sãkire Teoso sãkire auñkanimoni, –itxa Xesosi Araotxisiã auakanimoni.

4

Iaxiti Auñteti Topanere

¹ Eereka natamatari iaxiti tore. Itore imatakakaãka. Merepanika nikenakotari trõpeta atoko inakari. Kãkiti sãkire atoko itxa. Imisãkiretano:

–Uai pina notamoni. Noerekaiko katana auakari ñikane.

² Iuasaakipeka Erekar Matamatakoti anikano. Iuasaaki natamatari auñteti topanere iaxiti. Topãkakari aua iua nopini. ³ Iuaã topãkakari kai peereri pomẽkoriri atoko itxa. Iua kai satõnia inakori atoko. Apaka ãti kai sãtxio inakori atoko itxa iua topãkakari. Kisi ãkitari iua auñteti topanere. Iua kisi kai esimerõta inakori atoko itxa.

⁴ Iua ñinikata aua vñxi koatro pakini topaneretxi. Vñxi koatro pakini totiakori topãka iua topaneretxi nopini. Ninoa mãka kasarori. Ikiina aua saporieãta oro kamakori. ⁵ Auñteti topanereãtaã atamataãka ito mẽkokari. Iotxira, iokaamori aua iuaãtaã. Iteene poenexitiri. Iua auñteti topanere apisatoõ aua setxi tirikapi. Setxi Matamatakoni Teoso nakitiakori itxauana ninoa setxi tirikapi.

⁶ Iua auñteti topanere apisatoõ ipoa ãtakaãri atoko itxa. Auñteti topanere ñinikata aua koatro Teoso tixine auakani. Ninoa okñtxinoka xãpokañtotakini. Auana okina ikini ñitoãna. Itorotaãna aua okina. Iporikiãna apaka aua okina. ⁷ Okñtxinoka xãpokañtotakiti ãti, ãkiti atoko itxa. ãtipekana kema auñte atoko itxa. ãtipekana aua kiki toõ atoko. ãtipekana kokoi araãkari atoko itxa. ⁸ Ninoa ikininape aua imñkitana seisi pakini. Imñkitana nopini, ipatapi apaka okina aua. Kona itomatana. Ikini pokamarariti, ikini ñkanõkati itxana:

“Erekar. Erekar. Erekar. Teoso Apiananiri pitxaua. Kaposotiiñeri pitxaua. ãtipirika auakarii. Kitxakapirika auakarii. Uatxa auakarii. Katana apaka pite auapanika,” itxana ãtipirika.

⁹ Ninoa okñtxinoka xãpokañtotakini xipoãtakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate ñkapani erekarinoka. Peerekari iua auñteti topanere topãkakari, ãtipirika auapika inakari.” Ninoa xikaretari ikara Teoso ñkapani. ¹⁰ Ninoa vñxi koatro pakini totiakori xikarauatakasaaki, ikapotoreẽkauana ixitimoni iua auñteti topanere nopini topãkakari apisatoõ. “Ateosone,” itxana iua ãtipirika auapika inakaronimoni. Itakarina isaporieãtane Apiananiri apisatoõ, kotxi Teosonokara ikinimane auñte. Iuasaaki itxana:

¹¹ “Apiananiri, aTeosone pitxaua. Erekar pite, ininiã apakatapitika apaxitinii. Apakatapitika ikinimane sãpiretinii: ‘Peerekai.’ Apakatapitika pite apakapiniri ikini posotiiñetxi. Ikara atão, kotxi pite kamari ikinika. Pite kamari ikinika, kotxi pite nirekari pikaminiri. Pite nirekari ikinipoko auini,” itxana ninoa vñxi koatro pakini totiakori.

5

Aãtsopa Iapiriãkari Pirena

¹ Iuasaaki natamatari aãtsopa iapirikakori iua auñteti topanere nopini topãkakari uakoã. Iuako ikikomnikiriã aua. Iua aãtsopa auari iõka ãkiriko, inopinimoni pakini. Iua aãtsopa aua setxi popitari kãkiti makatamẽkakaniri ñkapani. ² Iuasaaki natamatari ãti Teoso nitiri iaxitikiri. Kataparari iua. Itaparasãkireritika itxa:

–Kiripa apakata imaktxakiniri ia popitari? Kiripa posotari ikatamẽkiniri ia aãtsopa? –itxa.

³ Itxama, kona auari iaxiti auakari, kona auari itixi auakari, apaka kona auari itixi patapi auakari, iua aãtsopa katamẽkakari !auari. Ninoa !iposotari ikatamẽkinirina iua aãtsopa. !Iposotarina atamatinirina iua aãtsopa ãki.

⁴ Ininiã iteene nitxiapata, kotxi iua aãtsopa iapiriãkari katamẽkakari !auari. Erekar kamakari !apokaãka ikatamẽkiniri ñkapani, atatsopatiniñiri ñkapani. ⁵ Iuasaaki ninoa totiakori ãti txari notamoni:

–Kona pitxiapatape. Patamata ikiraã. ãkiti atoko inakari iua. Xotaa apika mekaniriakori auñte iua. Tavii apika mekaniri iua. Oerekepekari Satanasi poiãori inini. Iua apiata. Ininiã iuanani posotari ikatamẽkiniri iua aãtsopa iapiriãkari. Iuanani posotari imaktxakiniri ninoa setxi popitari –itxa iua toti.

⁶ Iuasaaki natamatari soti auîte okakori atoko. Iua itima iua auîtetxi topanere apisatoõ. Ninoa ipi ipi pakini okîtxinoka xâpokaîtotakini, ninoa totiakori pakini âkitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanatana ninoa ikini itixitimoni. ⁷ Iua soti auîte atoko inakari sari iua auîtetxi topaneremoni. Imaîkari aâtsopa topaneretxi nopini topâkakari uakoã auakari. Iuako ikikomnikiriã aua. ⁸ Imaîkasaakiri, ninoa koatro okîtxinoka xâpokaîtotakini, ninoa vîtxi koatro totiakori pakini patimari ipamakinina soti auîte apisatoõ. Ikinikana auari arpa inakori xikari ikaminina îkapani. Imakinikana auari kopitipaki oro kamakori. Naia kopitipaki xâpoka koria atoko inakari peeremariri. Ia kamariãro Teoso sâkire auiãkani sâkire iuamoni.

Amaneri Xikariti

⁹ Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aâtsopa iapiriãkori. Pitenani apakata pimakatxakiniri popitari, kotxi pitenanira erekari. Pite okaãka. Piarêkaã piamotaua ate Teoso îkapani. Piamotapekaua ikini uãkati kãkiti sauaki. Ikini âti uãka sâkire sâkiretakani sauaki piamotapekaua. Ikinika itixiti auakani sauaki piamotapekaua ate.

¹⁰ Pite txîkitakaua ate auîtetxiakori aniniua, sasetotxiakori apaka aniniua, Teoso îkapani aparîkauatini. Ininiã itixi auakani auîte atxauako ate.”

¹¹ Iuasaaki natamatari itomaneri Teoso nitiriakori. Nikenakotari ninoa sâkire. Kaiãopokori ninoa. Seî mio, apikomoni seî mio, apikomoni seî mio itxaãpokatana. !Apakata ninoa iaõtiko. Ninoa âkitari iua auîtetxi topanere, okîtxinoka xâpokaîtotakini, totiakori pakini. ¹² Itaparasaãkireritika ixikarauatana. Itxana:

“Soti auîte okaãka kãkiti îkapani. Ininiã âtipirika apakata iua apakapiniri posotiiretxi, ikinika erekari, imaroretxi, taparãtxi pakini. Apakata ikinimane paxitiniri iua. Apakata ikinimane sãpiretiniri iua ereka inini. Apakata ikinimane iuikiniri iua.”

Ikara atoko ninoa xikarauata.

¹³ Ikara eereka nikenakotari ikinika iaxiti auakani, ikinika îkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti âki auakani pakini xikarauatini. Itxana:

“Ikinika erekari âtipirika aua iua auîtetxi topanere topâkakarimoni, iua soti auîte pakini-moni. Ikinika âtipirika paxitana. Ikinika âtipirika txari: ‘Peerekana ninoa.’ Ikinika taparãtxi âtipirika aua ninoamoni.”

¹⁴ Ininiã ninoa koatro, okîtxinoka xâpokaîtotakini txana:

—Ameẽ.

Iuasaaki ninoa vîtxi koatro totiakori patimari pamakini.

—ATEosone pitxaua —itxana iua âtipirika auakarimoni.

6

Soti Auîte Makatxakari Popitari

¹ Natamatari soti auîte makatxakiniri âti popitari. Ikara natamatakasaaki, nikenakotari okîtxinoka xâpokaîtotakiti sâkire. Isâkire ikarokirauatini atoko itxa.

—Uai pinako. Patamata —itxa.

² Iuasaaki natamatari kavaro kasarori. Kiki aua oporikiã. Iua tapotxi aua. Auîtetxi saporietane sikaãka iuamoni. Iua sari ikini itixitimoni kãkiti auîte ininiua îkapani.

Âti Popitari Makatxakiko

³ Eereka soti auîte makatxakari âti popitari aâtsopaã, ininiã ipi auape. Iuasaaki nikenakotari âtipekana, okîtxinoka xâpokaîtotakiti sâkire:

—Uai pinako. Patamata —itxa.

⁴ Ikara eereka natamatari kavaro põkamarari. Kiki aua oporikiã. Iua kiki sikaãka posotiiretxi neenamtxi ikamini ikini itixitiã, ininiã neenamtxi mauakaniãtaã ! auari. Itxîkitakari kãkiti okakakinua. Isikaãka iouata mitapoari ineenamauatini îkapani.

Âti Popitari Makatxakiko

⁵ Eereka soti auîte makatxakari âti popitari, ininiã ipi âti auape. Iuasaaki âtipekana, okîtxinoka xâpokaîtotakiti txari:

—Uai pina. Patamata —itxa.

Ininiã iuasaaki natamatari kavaro pomamari. Kavaro nopini topâkakari aua minari iaõtiko iuakoã. ⁶ Eereka nikenakotari âti sãkirauatini okîtxinoka xâpokaîtotakini sauaki. Itxa:

—Ipixini kiro triko îki, âti õti kãkiti parîka îkitxikana. Âti, ipixini pakini kiro atarokiri atoko inakari îki, âti õti kãkiti parîka îkitxikana. Iitxiã îki, ovaã îki pakini poiãopanikako.

Áti Popitari Makatxakiko

⁷ Eereka soti auíte makatxakari áti popitari, ininiã ipi ipi pakini auape. Iuasaaki nikenakotari imapotökirekiri, okÿtxinoka xãpokaïtotakiti sãkire. Itxari:

–Uai pina. Patamata –itxa.

⁸ Iuasaaki natamatari kavaro posëtakari. Inopini topãkakari uãka “Ipÿkitxi” inaãka. Áti iua tikini sa. Iua akiritaãka “Maerekani Misiritikoãtaã” inaãka. Isikaãkana posotiiretxi kaiãopokori itixi auakani okiniua ikapani, ininiã koatro kãkiti auiniãtaã áti okaãka. Ninoa okana kãkiti neenamatiã, natxiã, amianariã, kaxipiri kaneenamariã pakini.

Áti Popitari Makatxakiko

⁹ Ininiã soti auíte iuaãkana makatxakari áti popitari, ininiã ipi ipi áti pakini auape. Iuasaaki natamatari Teosomoni sikakori takikoãtaã patapi kãkiti okakoni. Ninoa okaãka Teoso sãkire isãpiretinina xika. Kona itakanaparina isãpiretinina Teoso kamakiti ninoa ikapani, ininiã ikara xika okaãkana. ¹⁰ Itaparasãkireritika akirikatarina Teoso. Itxana:

–Apiananiri, átipirika erekari kamakarii pite. Atãonoka pisãkire. Kirisaakipa pimisiritari itixi auakani? Kirisaakipa pixikatxitaue ate, kotxi ninoa okaua ate? –itxana.

¹¹ Ininiã mãkatxi kasarori sikaãka ninoamoni. Eereka isãpiretaãkana:

–Hiãtapariko apikomoni. Teoso nirekari apanakini hÿtariakori, initiriakori okiko hÿte atoko iniko. Hÿtariakori okaãka atoko, Teoso xikatxitaue hÿte. Hiãtapariko ikara òti –itxa.

Áti Popitari Makatxakiko

¹² Eereka nitikari soti auíte makatxakiniri áti popitari, ininiã seisi pakini auape. Iuasaakipeka itixi iteene iakeëkata. Atokatxi mamãka, sako mata pomamari potxi iãko kamakori atoko. Kasiri kamarãka arëkatxi atoko. ¹³ Iõriki itori iaxiti auakaro irika ÿkorapokoritimoni. Amãtiiri ÿtima iokatxaãkiti atoko otxa. ¹⁴ Natamatari iaxiti aãtsopa iapirikiniua atoko. Ikinika ixirata mitari, ikinika ipokomiriã pakini makatxakaãka. Átiãtaã itakaãka.

¹⁵ Iuasaaki ÿkorapokoriti auÿtëtxiakori, kãkiti kaposotiirerini, katiirini, sotato auÿteakori, kãkiti katapararini, nitiritxi amotakoni, nitiritxi minakanua pakini kipataua aarikoã, kai mitari sauaki ixirataã. ¹⁶ Iuasaaki itxana ixirata auÿtemoni apaka kai mitarimoni:

–Hÿrikako ate nopini. Hÿkipataua, kotxi topanerëtxi nopini topãkakari, soti auíte pakini nirekari imisiritiniua ate. ¹⁷ Soti auíte misirikare òti manapi apopeka. Kona kãkiti mÿteenekari ikara misirikaretxi.

7*Sëto Koarëta Koatro Mio Teoso Nitiriakori Itixi Auakani*

¹ Eereka natamatari Teoso nitiri iaxitikiri timini atokatxi pokÿkinimoni, áti atokatxi ereëkokinimoni, áti atokatxi kimapore sanaremoni, áti atokatxi kimapore kikomoni. Ininiã ipi ipi pakinipe ninoa. Ninoa maãkari ÿtima ipi ipi pakini itixi auakari ÿtimati. Ininiã ÿtima kona inapaika itixiã. Kona kãuaãriã ! inapaika ÿtima. Kona aaminaã ! inapaika ÿtima. ² Natapari áti Teoso nitiri iaxitikiri inaãpotini atokatxi pokÿkinimoni. Teoso átipirika auakari takaõtxikare aua uamoni. Itaparasãkireritika akiritana ninoa ipi ipi pakini Teoso nitiriakori. Ninoa parÿka itixi, potxoari uiniti pakini imisiritinina. ³ Iua Teoso takaõtxikare auakiti txari ninoamoni:

–Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaõtxikare initiriakori itixi auakani teëtaã.

⁴ Eereka nimarotari Teoso takaõtxikare apakapakani. Itakaõtxikaãkana sëto koarëta koatro mio kãkiti. Ikini uãka Isaeo tixinikini takaõtxikaãka.

⁵ Tosi mio Xotaa apika mekani takaõtxikaãka.

Tosi mio Hopë apika mekani takaõtxikaãka.

Tosi mio Katxi apika mekani takaõtxikaãka.

⁶ Tosi mio Asee apika mekani takaõtxikaãka.

Tosi mio Natarii apika mekani takaõtxikaãka.

Tosi mio Manasee apika mekani takaõtxikaãka.

⁷ Tosi mio Simião apika mekani takaõtxikaãka.

Tosi mio Arevii apika mekani takaõtxikaãka.

Tosi mio Isakaa apika mekani takaõtxikaãka.

⁸ Tosi mio Seporõ apika mekani takaõtxikaãka.

Tosi mio Xosee apika mekani takaõtxikaãka.

Tosi mio Pëxamiã apika mekani takaõtxikaãka.

Itomaneri Kãkiti Teoso Apisatoõ

⁹ Ikara eereka natamatari itomaneri kākiti apotiitakaniua. !Apakata kākiti iaōtiniri ikinikana. Aua kākiti ikini itixitikini, kākiti ikini sereti. Aua ikini uāka sākire sākiretakani. Ikinikana ninoa timanāta Apiananiri apisatoō, soti auīte pakini apisatoō. Ninoa māka kasarori. Aātape aua iuakoāna. ¹⁰ Itapasāsākireritika itxana:

—Ateosone topāka auītetxi topanere nopini. Iuara, soti auīte pakini makatxakapekari amaerekani.

¹¹ Iuasaaki ikinika Teoso nitiriakori iaxiti auakani tima. Ninoa ākitana auītetxi topanere, totiakori, ninoa ipi ipi okītxinoka xāpokaītotakini pakini. Ikapotoreēkauana itoōna xitimoni, auītetxi topanere apisatoō. “Ateosone pite,” itxana Teosomoni. ¹² Ixipoātana Teosomoni:

—Ameē. Ātipirika ikinimane sāpiretai ereka pinini. Peerekai. Kimarorei. Erekarī pikamakiti ate Ikapani. Ikinimane paxitai. Kaposotiirei. Pataparai. Ātipirika ikara atoko atxai. Ameē.

¹³ Ininiā eereka ninoa totiakori āti pimaāno nota:

—Kiripa ninoa kākiti mākatxi kasarori ieretakani? Namonipa inana ninoa? —itxa iua.

¹⁴ Ininiā nota txari iua:

—Pitera imarotari.

Ininiā iua txano:

—Ninoa iteene misiritaākapeka. Uatxa ixipope ninoa misiritiko. Soti auīte makatxakapekari imaerekani. Ininiā imākana soti auīte arēkaā arokakori atoko itxauana. Uatxa kasarori imākana, kotxi itxiko !auari. Soti auīte makatxakapekari kākiti maerekani ipīkasaaki, ininiā mākatxi kasarori atoko itxa ninoa ākixinire.

¹⁵ —Ininiā ninoa aua Teoso topanere apisatoō. Imisākiretiko aikoti āki iparīkauatana Teoso Ikapani ikiniōtika pokamara, İkanōka pakini. Ininiā iua auītetxi topanere nopini topākakari auapikako ninoa sauaki. ¹⁶ Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. ¹⁷ Kotxi soti auīte auītetxi topanereātaā auakari nīkatanako ninoa. Iua anikana ninoa sōtoārimoni. Iuaā auakari sōtoāri iātakani ātipirika auapikako. Teoso makatxakariko ikinika iātsaāna. !Itxiapataikana.

8

İmapotōkire Popitari Makatxakiko

¹ İmapotōkire popitari imakatxakasaaki, ikinipoko tsorīkaxitita Teoso tixineē. Ikara atoko ipixini oara. ² Eereka natamatana setxi Teoso nitiriakori, iua apisatoō timakani. İsikaākana setxi xikari kamiko trōpetā inakori.

³ Eereka āti Teoso nitiri apoka. İtima Teosomoni sikakori takikoātaā. Kamariāro arikiko koanati oro kamakori iuamoni aua. Kamariāro ito sikaāka iuamoni, Teosomoni isikini İkapani, ikinika Teoso nakitiakori amanaākiti sākirexitikata. Ininiā arikari iua kamariāro Teosomoni sikakori takikoātaā nopini. Oro kamakori iua Teosomoni sikakori takikoātaā auītetxi topanere apisatoō. ⁴ Ininiā iuakoā kamariāro txiā, Teoso nakitiakori amanaākiti sākirexitikata kanīka Teoso apisatoō. ⁵ Ininiā eereka iua Teoso nitiri kosekari okoana. İxāpokakari xaminaminiki mēkorīkakariā, Teosomoni sikakori takikoātaā nopini auakariā. Eereka okari itiximoni. Iuasaakipeka aua karokirauari, mēkokari pakini. Apaka iuasaaki itixi iakeēkata.

Koatro Trōpetā Pirena

⁶ Ininiā ninoa setxi Teoso nitiriakori setxi trōpetā auakini iposope itrōpetane ixōkinina İkapani.

⁷ Ininiā ninoa Teoso nitiriakori āti xikarauata itrōpetaneē. Iuasaaki katxīkareri kai soro atoko inakari, apaka xaminaminiki mēkorīkakari arēkatxiā koketakori okaāka itiximoni. Ikara xika apanakini aamina itixi auakari arika, ininiā ipi āti pakini aamina auiniātaā ātika arikaāka. İkinika katsotati arika apaka.

⁸ Eereka āti Teoso nitiri xikarauata itrōpetaneē. Ininiā ixirata auīte atoko inakari arikatxikata okaāka potxoari uinitimoni. Ininiā ipixini potxoari uiniti arēkatxi itxapekaua. ⁹ Ininiā apanakini potxoari uiniti āki auakani ipīpe, ininiā ipi āti pakini potxoari uiniti auakani auiniātaā ātika ipīpe. Iuasaaki apanakini maporonni apaka xīpokaāka, ininiā ipi āti maporo auiniātaā ātoka xīpokaāka.

¹⁰ Eereka āti Teoso nitiri xikarauata itrōpetaneē, ininiā ipi āti pakini initiriakori xikarauatape. Iuasaaki iōriki mitari iaxitikero katxaākata. Otirika tirikapi atoko. Oirika ipixini uini nopini. Oirika ipixini sōtoāri nopini apaka. ¹¹ İōriki uāka, “Kapixiro,” otxaua. Ininiā ipixini āparaā kapixiā. İpi āti pakini sōtoāri auiniātaā, ātinoka sōtoāri kapixiā. İto kākiti iātari iua āparaā, eereka ikoriāna, kotxi kapixiāri āparaā.

¹² Ininiā āti Teoso nitiri xikarauata itrōpetaneē, ininiā ipi ipi pakini initiriakori xikarauatape. Iuasaaki atokatxi ponikare, kasiri, iōriki pakini kona iteene !iponikaika. İmamākapeka.

Ininiãkara pokamara ipi ipi pakini oara atokatxi !iponikaika. Iua atokotxikana ìkanõka ipi ipi pakini oara kasiri, iõriki pakini !iponikaika. ¹³ Ininiã eereka nitikarauatakasaaki, nikenakotari ãti Teoso nitiri sãkire. Iua araaãpota Teoso tixine. Itapasãkireritika itxari:

–Erepaniko. Erepaniko. Erepaniko itixi auakanii. Auapanika apikomoni ipi, ãti pakini trõpeta Teoso nitiriakori xõkini ìkapani.

9

Ãti Trõpeta Xõkiko

¹ Ininiã ãti Teoso nitiri xikarauata itrõpetaneë. Iuusaaki nitikari ãto iõriki iaxitikero katxakini itiximoni. Iõrikimoni osikaãka xavi aariko mamapotõkire irikoti tore ìkapani. ² Ininiã iõriki atoko inakari mataakari iua aariko. Eereka katxiãri kaiãopoko pokõka. Katxiãri tokori arikikosaaki atoko itxa. Eereka iaxiti, atokatxi pakini piãka itxiã xika. ³ Iposo atoko txitxiri atoko inakari pokõka itxiã. Posotiiretxi isiãkana, ininiã kaxipiro itixi auakari posotiire atoko aua txitxirimoni, kãkiti ioãkini ìkapani. ⁴ Ipaniãtaãkana katsotati imokakanina, apaka takari, aamina pakini imokakanina. Ipaniãtaãkana imisiritinina Teoso takaõtxikare iteëtaã mauakini. ⁵ Kona isikaãkana posotiiretxi kãkiti okinina ìkapani. Siko kasiritinina ninoa paniãtaãka imisiritinina ninoa. Imisiritarina kaxipiro ioãkini atoko. ⁶ Iuusaaki kãkiti nirekariko ipinini. Itxama, kona iposotarina ikoriinina. Initarina ipikiti, txamari iuusaaki ipikiti mitekapeka.

⁷ Iua txitxiri kavaro atoko itxana. Kavaro neenamatzhi kamakani atoko itxana. Ikiãna aua saporieãta atoko oro kamakori. Itoõna kãkiti toõ atoko itxana. ⁸ Ninoa iãko sito iãko atoko itxana. Itsiriãna ãkiti tsiriã atoko itxana. ⁹ Itorota ipatinina koana metao kamakori atoko. Imãkitana ene kavaro itomaneri miteëkani ene atoko. Mitekaã ene atoko itxana. ¹⁰ Ninoa xipi kaxipiro xipi atoko itxana. Oko aua ixipiãna. Ninoa posotari kamatsiitini kãkiti siko kasiriti. ¹¹ Ninoa auite aua. Iua Satanasi nitiri. Mitxi aariko mamapotõkire irikoti ãki auakari iua. Xoteo sãkireë iua uãka Apatõ itxaua. Kreko sãkireë iua uãka Aporioõ itxaua. Popikari sãkireë “Ikinipoko Xipokakari,” itxaua.

¹² ãti misirikaretxi napapeka. Txama auapanikako apikomoni ipi misirikaretxi.

Ãti Trõpeta Xõkiko

¹³ ãti Teoso nitiri xikarauata itrõpetaneë. Iuusaaki seihi trõpeta xõkapeëkaika. Teosomoni sikakori takikoãtaã oro kamakori aua ipi ipi pakini iko. Ikara Teoso apisatoõ. Nikenakotari iko takote auakari sãkirauatini. ¹⁴ Ininiã iua txari Teoso nitiri iua trõpetaã xikarauatakari:

–Pisikakanako ipi ipi pakini Teoso nitiriakori iaxirikakoni Eoparatxi inakori uiniti auakani.

¹⁵ Naia ipi, ipi pakini Teoso nitiriakori iposopekana ia anokanani, ia kasiriti, ia õti, ia oara manapi ìkapani. Ininiã ninoa sikakaãka kaiãopokori kãkiti okinina ìkapani. Ininiã ipi ãti pakini kãkiti auiniãtaã auiritaãka ãtika okinina. ¹⁶ ãti sãpiretano ninoa sotatone kavaro nopini auakani tosëtos mirão aua. Kaiãopokori.

¹⁷ Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana põkamarari xamina tirinakari atoko itxa. Apanakini poporeri. Apanakini posëtakari ëxõpiri atoko. Ikiãna ãkiti kii atoko. Inamaãna ipokõka xamina tirika, katxiãri, ëxõpiri pakini. ¹⁸ Ikara xamina tirinakari, ikara katxiãri, ikara ëxõpiri pakini inamaãna pokõkakari, okari kaiãopokori kãkiti itixi auakani. Ininiã ipi ãti pakini kãkiti auiniãtaã ninoa okari ãtika. ¹⁹ Kavaro posotiire inamaã, ixipiã pakini aua. Ninoa xipi imini atoko itxa. Ixipiãna aua ito kiiri. Ninoa kii misiritari kãkiti.

²⁰ Ininiã itomane kãkiti koriã ia misirikari xika. Iuaritika kãkiti mokakoni maerekati kamakani !inirekari itakanapinirina imaerekani. Ninoa kapotoreëkapanikaua Satanasi nitiriakorimoni. Ikamapanikarina ninoa amanaãkiti. Iteosonetari aamina kamakori, oro kamakori, pirata kamakori, pirõsi kamakori, kai kamakori pakini. Ninoa teosone kona posotari atamarauatini. Kona iposotarina ikenakoruatini. Kona iposotarina iõpokotinina. ²¹ Ninoa kãkiti okapanikari apanakini. Ikamapanikarina miiti parõka. Isirikapanikana apanakinikata. Iitirikapanikarina apanakini kãkiti tii. Kona inirekarina maerekati itakanapinina.

10

Aãtsopa Axapitiri Iapirikakori

¹ Iuusaaki natamatari Teoso nitiri iaxitikiri katxakini ìkorapokoritimoni. Kataparari iua. Iua katxiãri iaxitikiri ãki. Katxiãri imãka atoko itxa. Kisi ikii nopini aua. Itoõ atokatxi atoko itxa. Itapike aãtsota tirinakari atoko itxa. ² Imaikanãtari aãtsopa iapirikakori

axapitiri. Iuaokã aãtsopa ikatamêka. Itakari ikiti ikikomunikiri potxoari uiniti nopini. Isanaremonikiri ikiti itakari imiriî. ³ Akiripoakata âkiti atoko. Iuasaaki setxi iokaamori kenakotaãka. ⁴ Iuasaaki niôkatsopaaritari ninoa setxi iokaamori sâkire. Txamari nikenakotari âti iaxitikiri sâkire. Itxano:

—Kona piôkatsopatapiri ninoa setxi iokaamori sâkire —itxa iaxitikiri.

Aãtsopa Axapitiri Nikiko

⁵ Iuasaaki Teoso nitiri aua âti ikiti imiriî. Potxoari uiniti nopini âti ikiti aua. Iua ôtanôkari iuako iaxiti. ⁶ Iuasaaki itxa:

—Uatxa nisâpiretakiti Teoso âtipirika auakari sâkire. Ikamari ikinika iaxiti, iaxiti auakani pakini. Ikamari ikinika ikorapokoriti, ikorapokoriti auakani pakini. Ikamari potxoari uiniti, ikinika iua âki auakani pakini. Teoso misiritinina maerekati kamakani !okananiikari apokini. ⁷ Apikomoni âti trôpeta xikarauatapanika. Iuasaaki kitxakapirika Teoso kipatakiti oerekaãkako. Teoso sâpiretakiti iniritiakori ikorapokoritimoni, isâkire sâpiretakanimoni paîtiki oerekaãkako —itxa Teoso nitiri.

⁸ Eereka iuaïkana nikenakotari iaxitikiri sâkirauatini:

—Pisa. Papariko aãtsopa iapirikakori, Teoso nitiri uakoã auakari. Iua âti ikiti imiriî, âti ikiti potxoari uiniti pakini aua kititakari.

⁹ Ininiã nisa iuamoni, ininiã nitxari iua:

—Pisikano ere aãtsopa iapirikakari.

Iuasaaki itxano:

—Papakapariko, nika pitxari ia aãtsopa. Pitikakoã kapixiriko ia pinikakiti, iuaritika pinamaã potxoariko. Mapa atoko itxako —itxano nota.

¹⁰ Ininiã nimaïkari ikora aãtsopa, nika nitxari. Ninamaã potxoari. Mapa atoko itxa. Txamari nitikakoã kapixiri iua aãtsopa ninikakiti. ¹¹ Iposo atoko isâpiretano:

—Iuaïkana pisâpiretariko apikomoni Teoso sâkire, kaiãopokori kâkitimoni, kaiãopokori âti uâkamoni, kaiãopokori âti uâka sâkire sâkiretakanimoni, kaiãopokori auîtetxakorimoni pakini pisâpiretariko nisâkire —itxano.

11

Ipi Teoso Sâkire Sâpiretakani

¹ Aãke niaôrauutini ikapani nisikaãka. Iuasaaki Teoso nitiri txano:

—Pisa. Piaôtariko Teoso misâkiretiko aikoti. Piaôtariko Teosomoni sikakori takikoãtaã. Piaôтана Teoso misâkiretakani iuaã auakani. ² Kona piaôtapiri Teoso misâkiretiko aikoti pirikere, kotxi Xoteo minakaniua apotiitiniãtaãua iuaã. Iuaã ninoa ikapani. Ninoa misiritariko Teoso sitatxine koarêta toisi kasiriti. Ikara Teoso sitatxine, Xerosareê inakori. ³ Nisikaposotiiretanako ipi kiki. Teoso sâkire sâpiretakani ninoa. Ninoa ieretakariko sako mata. (Sako mata kâkiti ieretakasaaki oerekari imatinianuatini.) Ininiã mio tosêtosî sesêta ôti pakini ninoa sâpiretariko nisâkire.

⁴ Ninoa ipi oriva mina atoko itxana. Apaka ipi tirikapi topâkini atoko itxana. Ikini itixiti auakani auite apisatoô, Teoso apisatoô ninoa aua. ⁵ Kâkiti nirekasaakiri imisiritinina ninoa, iuasaaki xamina tirinakari pokika inamaãna. Ininiã iuasaaki imokaïakarini xipope. Kâkiti nirekasaakiri imisiritinina, ikara atoko itxa okikona. ⁶ Teoso sâkire isâpiretakasaakina, iposotarina iaxiti itotini. Ininiã iuasaaki âparaã kona ikipaika ikorapokoriti. Ninoa posotari âparaã arêkatxi inïkitakini. Iposotarina itxïkitakiniri ikini sereti maerekati apokini ikorapokoriti auakanimoni. Inirekasaakina, ninoa posotari ikara ikinika ikaminina.

⁷ Teoso sâkire isâpiretinina xipoka atoko, monôkori aariko mamapotôkire irikoti âki potoriãkari pokika. Iuasaaki iua kamari neenamatzxi ninoa ipi Teoso sâkire sâpiretakanikata. Eereka iua okapena ninoa. ⁸ Ininiã ninoa îto sirikako kimaporiãtaã, mitari sitatxitiã. Iua sitatxitiã Apiananiri tokakitaãka aamina ipiriãmitakari nopini. Iua sitatxi akiriãkatakãka Sotoma, Exito pakini, kotxi Sotoma, Exito pakini atoko itxa Xerosareê. ⁹ Ininiã iuaã ikini kâkiti, ikini inirimane, ikinimane âti uâka sâkire sâkiretakani, ikini âti uâka atamatanako ninoa îto kimaporiãtaã. Iuaã ikalkotanako ipi ôti, âti ôti, ipixini ôti pakini. Kâkiti kona auiritari ikatikona. ¹⁰ Ininiã ikini kâkiti atamatariko ninoa koriãkani îto. Ininiãkara ikinimane enenïkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ikapani. Ninoa kamariko ikara atoko inakari, kotxi ninoamoni naia ipi Teoso sâkire sâpiretakani misiritana ninoa. Ininiã ninoa enenïka, kotxi Teoso sâkire sâpiretakani koriãpeka.

¹¹ Iuaritika ipi ôti, âti ôti, ipixini ôti pakini napaka atoko, Teoso txïkitakana ninoa iuaïkana auãki ininina ikapani. Ôkitakauana. Iuasaaki kâkiti atamatana, ininiã ipikarauatana. ¹² Ikara eereka ninoa ipi Teoso sâkire sâpiretakani kenakotari iaxitikiri sâkirauatini:

—Uaimoni hina.

Ininiã ninoa kanîka katxiãriã Teoso tixinemoni. Ninoa mokaiakariakori itikana ninoa kanîkaãpotini Teoso tixinemoni. ¹³ Iuasaakipeka itixi iteene iakeêkata. Ininiã iua sitatxiãtîã kaiãopokori aapokotxi irika. Tesi aapokotxi auiniãtaã âtika irika. Iuasaaki setxi mio kâkiti ipîna. Kâkiti auapanika inakani pîkarauata. Iuasaaki itxana:

–Teoso iaxiti auakari apiatakari itxaua –itxana.

¹⁴ Îkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi paîtiki âti misirikaretxi apiari apokapanikako.

Trôpetâ Imapotôkirekiri Xôkiko

¹⁵ Iuasaaki Teoso nitiri mapotôkirekiri xikarauata itrôpetaneê. Itomane iaxiti auakani iteene akiritari:

–Ikini itixiti auakani auîte itxapekâua aãuîte Teoso, Kristo pakini. Âtipirika iua ikinimane auîte itxauako –itxana.

¹⁶ Iuasaaki vîtxi koatro totiakori Teoso topâkiniãtaã apisatoô topâkakani pamaka Teoso apisatoô. Itxana:

¹⁷ “Erekapitikari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirîka aua. Katana âtipirika pauapika. Erekapitika, kotxi kaposotiirei, ininiã âtipirika ate auîte pitxaua.

¹⁸ Kâkiti ikini itixiti auakani omanâkarauata. Uatxa piteka omanâkarauatini manapi apope. Uatxa apokapeka ipîkani misiritiko mereîko ôti. Pinitiriakori, pisâkire sâpîretakani, apaka pinakitiakori pite paxitakani pakini îkixitiko ôti apokapeka. Ikinimane kâkiti poiãorini, kâkiti kaposotiirerini pakini apakapariko ikamakitina îki. Iuasaaki pixipokariko îkorapokoriti xipokakani,” itxana.

¹⁹ Eereka natamatari iuaã Teoso tixineê imisâkiretiko aikoti tore imataakaãka. Iua aiko âki natamatari Teoso kaixane, iua apokiniãtaã. Iuasaaki natamatari ito mêkokari. Nikenakotari ito okaratxirari, ito iokaamori pakini. Itixi iakeêkata. Ito âparaã kai soro katxîkareri atoko katxaka.

12

Imini Mitapoari, Sito Pakini

¹ Eereka nitaponeê nitikoka. “Kipa atxiîti?” nitxa nâkixinireê. “Natokopa itxa Teoso oerekiniri kâkiti?” Kotxi sito tokiã Teoso tixine. Atokatxi iotximere iakirokaro oa omãka atoko inakari. Kasiri aua okiti patapi. Okiiã aua auîtetxi saporîêtane, tosi îoriki kamakori. ² Oa kamixiro. Oa akiripoakata oâtatsirauatini xika, kotxi kaiamapeka amarini oãuãkitakini.

³ Eereka iuaîkana nitikoka, kotxi imini mitapoari tokiã Teoso tixineê. Pôkamarari. Iua setxi ikîi aua. Aua tesi iko. Ikininape ikîi aua auîtetxi saporîêtane. ⁴ Ixipiã ikosekari kaiãopokori îoriki iaxitikero, uai iixiti oka itxaro îoriki. Itima oa sito apisatoô, kotxi paîtiki amarini oãuãkitaka. Inirekari iixirâkiniri amarini, amarini auakasaaki. ⁵ Eereka oa sito auãkitakari amarini, kiki. Oa sito âkiri aneêkasaaki ikini itixiti auakani auîte itxauako. Auîtetxi kataparari itxauako iua amarini. Auakasaaki, imini îixirâkari amarini. Patimari maîkiko iua amarini. Teoso auinimoni anikaãka amarini. Iuaãtaã Teoso topâkanãta auîtetxi itopanere nopini. ⁶ Oa sito miteka âparaã makipakaniãtaã. Teoso oerekatapekari iuaã okaikotini îkapani. Iuaã oinîkataãkako mio tosêtosî sesêta ôti. Ipi anokanani, âti anokanani ipixini pakini itxa.

⁷ Eereka aua neenamati Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸ Teoso nitiriakori tapara apiata, ininiã imini initiriakorikata !auritaãkaika Teoso tixine ikaikotinina. ⁹ Iua imini mitapoari iokanataãka maparamoni. Iua imini kitxakapirîkaripekara. Iua Txiapo inakori. Iua Satanasi inakori. Iua misirienetari kâkiti ikini itixiti auakani. Maparamoni iokanatikosaaki, iua, initiriakori pakini okaãkana uai îkorapokoritimoni.

¹⁰ Eereka nikenakotari Teoso tixinekiri sâkire kataparakieneri:

–Kâkiti maerekani makatxakiko apokapeka uatxa. Teoso makatxakari kâkiti maerekani. Uatxa Kristo posotiire oerekaãka. Uatxa oerekari ikinimane auîte ininiua. Teoso mereêkiti ikinimane auîte itxaua uatxa, kotxi âitariakori kamapiretakari iokanatapeêkaika mapara. ! Ikaikotaika Teoso tixine. Mitxi ikamapiretari âitariakori Teoso apisatoô. Pokamara, îkanôka ikamapiretana. ¹¹ Âitariakori iokanatapekari Satanasi isini. Ninoa posotari iokanatiniri Satanasi, kotxi Teoso Soti Auîtene ipîna ninoa îkapani. Iarêka xiketa ninoa îkapani. Ninoa posotari Satanasi iokanatinina, kotxi ninoa sâpîretari atão inakari Teoso sâkire. Ninoa iposope okikona Teoso îkapani. ¹² Hîte Teoso tixine auakani hîpoxokoniuatako. Txamari hîte itixi auakani, potxoari uiniti auakani, erepaniko, kotxi Satanasi apopeka ereê hîte sauaki. Iua iteene naiataua, kotxi imarotari paîtiki Teoso !auritaikari iua maerekati apikomoni ikamini –itxa iua Teoso tixinekiri sâpîrena.

¹³Uai itiximoni okikosaaki, imini mitapoari asikatikinitaro oa sito amarini auákitakakaro okiniro Ikapani. ¹⁴Oa osikaáka ipi mikitaxi kokoi mitari míkita, oáraini Ikapani. Oa araá áparaá makipakanimoni. Teoso oerekinimoni osa. Iuaá Teoso nĭkataro oa ipi anokanani, áti anokanani, ipixini pakini. Iuaá imini mitapoari !iposotari oamoni apokini. ¹⁵Oa araáksaaki, imini mitapoari koporikaátari áparaá inamaákiri oa tikini. Uini atoko itxĭkitakari áparaá, oa sito axápoátini Ikapani. ¹⁶Kipatxi !auiritari áparaá sini oamoni. Ixoreka. Ixorekasaaki, ikinika áparaá imini namaákiri kipatxi áki isa. ¹⁷Ininiá imini iteene omanataro oa sito. Ininiá asikatikinitana apanakini oa anaakori inaiatinina Ikapani. Kákiti Teoso paniátakiti kamakani oa anaakori itxauana. Kákiti Xesosi Kristo sákire auíákani oa anaakori itxauana.

13

Monōkori Potxoari Uiniti Pokĭkaátakari

¹Ininiá nitaponeē nitima ikipatxite nopini. Iuaá nitikari monōkori potxoari uiniti pokĭkaátini, kanĭkĭta itxa. Iuamoni auari ĭko tesi pakini. Apaka ikii setxi aua. Ikinika ĭko aua auítetxi saporiétane. Ikini ikii aua uákatxi Teoso misákirepiretakari. ²Iua monōkori nitikakiti ákiti kaiōkari atoko itxa ĭto. Ikiti oso kiti atoko itxa. Inama ákiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiá iua auítetxi itxaua. Imini auítetxi ininiua atoko itxa. Imini txĭkitakari iua potxoari uinitikiri sákire kaposotiire inini, isákire kákiti auikini ikapani. ³Nota atamataru ikiniiri. Ikii áti ipĭpe ikaro mitari xika. Eereka ikaro tximōka. Iuaíkana auáki itxa ikii ipinakari. Kákiti ikini itixitikini atamatakasaakiri, itxorĭkaátana. Ininiá auikarina isákire. Ikamarina iua nireékiti. ⁴Ikinimane auikari imini mitapoari sákire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sákire. Ninoa teosonetari iua apaka. Ninoa sákire:

—Áti kaposotiireri potxoari uiniti pokĭkaátakari atoko inakari !auari. Kákiti !iposotari inaiatiniri iua —itxana.

⁵Iua potxoari uinitikiri auiritaáka isápiretiniri maerekati sákiretxiti. Imisákirepiretari Teoso. Auiritaáka auítetxi ininiua koarĕta toisi pakini kasiriti. ⁶Iua misákirepiretari Teoso. Imisákirepiretari Teoso uáka. Imisákirepiretari Teoso auiniátaá. Imisákirepiretari Teoso tixine auakani. ⁷Iua auiritaáka inaiatiniri kákiti Teoso nakitiakori. Apaka auiritaáka ninoa imaákini. Auiritaáka kákiti ikini uákati auíte ininiua, ikini itixiti auakani auíte ininiua, ikini kákiti sákire sákiretakani auíte ininiua. Ikinimane auítetari iua maerekati kamakari. ⁸Ikini itixiti auakani, Teoso nakitiakori minakanua, auikariko iua potxoari uiniti pokĭkaátakari sákire, kotxi iteosonetarina iua. Itixi kamiko apisapanika ninoa uáka !iōkataká Soti Auíte okari aátsopateē. Iua aátsopae auauákatakani auapikako Teosokata mapĭkaninoka ininina.

⁹Hĭte, ia atatsopatakani kakenakokii, ininiá hĭkenakotariko nisákire. ¹⁰Teoso nirekiniári kateia áki pitakiko, ininiá erekapitikari kateia áki pauini. Teoso nirekiniári pokiko iouata mitariá, erekapitikari pokiko. Ininiá pokaákkako iouata mitariá. Ininiá hĭte Teoso nakiti inakanua himiteenekariko himisiritiko. Kona hĭtakanapapiri Teoso kimapore. Átipirika hĭkamariko Teoso nirekakiti.

Monōkori Itixiákiri

¹¹Eereka nota itikari áti monōkori. Itixiá ipokĭka. Aua ipi ĭko. Soti auíte ákiri ĭko atoko itxa, iuaritika isákirauata imini sákire atokokana. ¹²Potxoari uiniti pokĭkaátakari nitiri itxaua iua itixiá pokĭkakari. Potxoari uinitikiri sikaposotiiretari iua, ininiá isari ikini itixitimoni. Itxĭkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximōka. ¹³Iua itixiá pokĭkakari kamari posotiiretxi mitxi mimarotakoti. Ipaniátari xamina tirinakari iaxiti auakari ĭkorapokoriti apokini ikinimane atamatiniri Ikapani. ¹⁴Iua potxoari uinitikiri auiritari itixiákiri kaminiri posotiiretxi iua Ikapani. Posotiiretxi xika itixiákiri misirienetari ikinimane itixiá auakani. Itxĭkitakari kákiti kaminiri potxoari uinitikiri ĭto atoko inakari kai kamakori. Ikara atoko ipaxitarina potxoari uinitikiri, kotxi ikarotaáka iouata mitariá, iuaritika iuaíkana auapanika ikii. ¹⁵Itixiá pokĭkakari auiritaáka itxĭkitakiniri potxoari uiniti pokĭkaátakari atoko inakari kai kamakori kosekasinaniretinua, ininiá iua kai kamakori posotari isákirauatinu kákitekata. Ipaniátari kákiti okiko imanirekakanisaakiri iteosonetiniri iua. ¹⁶Itixiá pokĭkakari paniátari ikinimane kákiti apakapiniri Satanasi takaōtxikare iuaokóana ikikomoni, minakaná iteétaána. Ipaniátari ikinimane kákiti auítetxi inakanua, auítetxi minakanua, katiini, matini, nitiritxi, nitiritxi minakanua pakini, apakapiniri Satanasi takaōtxikare. ¹⁷Kákiti iua takaōtxikari mauakiniti !auiritaáka iamotiitininina. !Auiritaákana ivĕtxirauatinina. Iua takaōtxikari potxoari uinitikiri uáka. Iuáka mauakanisaaki, aua nómero iua nakiti.

¹⁸ Kimarore h̄txako, ikara himarotini ikapani. Kimarore hiniñā himarotari potxoari uinitikiri nomerone kiki uāka itxa. Número 666.

14

Soti Aūte S̄eto Koar̄eta Koatro Mio K̄akitikata

¹ Eereka nionakaāta nitaponeē. Natamatari Soti Aūte. Ōtanoxiratarari nopini auanāta. Ixirata uāka Siāo inaāka. K̄akiti s̄eto koar̄eta koatro mio pakini aua iuakata. Kaiāopokori k̄akiti. Iteētaāna Soti Aūte iri uāka iōkatsopatapeēkaika. ² Eereka nikenakotari ninoa xikarauatini. Itorōkani ene atoko itxa, kotxi ama eneeneri. Ikarokirauatini ene atoko itxa ninoa xikare. Viorāo ene atoko itxa iua xikari ene. ³ Ninoa k̄akiti s̄eto koar̄eta koatro mio pakini tima aūtetxi topanere apisatoō, ok̄txinoka x̄āpokāitotakini ipi ipi pakini apisatoō. Totiakori v̄itxi koatro pakini apisatoō apaka itimana. Ninoa s̄eto koar̄eta koatro mio xikaretari xikari amaneri. Apanakini !imākari iua xikari amaneri. Ninoa s̄eto koar̄eta koatro mio ikorapokoriti Teoso amotakini, ninoanoka posotari ixikaretiniri iua amaneri xikariti. ⁴ Ninoa kiki !isir̄kana sitokata. !Auiritarina ītona kaminiri maerekati. Soti Aūte sinimoni ninoa apaka sa. Ikorapokoriti auakasaakina, Teoso amotana ninoa. Ninoa merepanika sikaāka Teosomoni, Teoso Soti Aūtene pakinimoni. ⁵ !Ikamarina maxikat̄iika isākirena. Atāo inakarinoka isāpiretana. !Ikerokarina isākirena Teoso iaūtena apisatoō.

Ipi Āti Pakini Teoso Nitiri S̄akire

⁶ Eereka nit̄kari Teoso nitiri araāpotini iaxiti itanoxiti. Iua s̄āpiretari Teoso iokanapirena erekari k̄akitimoni ikini it̄xiti auakanimoni. Iua iokanapirenatxi kona xipoka. Is̄āpiretari Teoso iokanapirena erekari ikini ūakatimoni. Āti uāka s̄akire ipinimoni. Āti uāka s̄akire ipinimoni. Itxāpota, itixi auakani s̄akire, iuaritika is̄āpiretari Teoso iokanapirena ikini ūakatimoni. ⁷ Itaparas̄akireritika itxari:

–H̄ip̄kariko Teoso. H̄is̄āpiretariko, iua Apiananiri ininiua. Apokapeka k̄akiti maerekati kamakani misiritiko ōti. H̄iteosonetariko Teoso, kotxi iua kamari iaxiti, ikoraxiti, potxoari uiniti, s̄ōtoāri pakini –itxa iua Teoso nitiri araākari s̄akire.

⁸ Iua s̄akirauataka atoko, āti Teoso nitiri txari:

–Papur̄onia sitatxiti xipokapeka. Iuaā auakani kaposotiirerini, iuaritika ixipokapena. Papir̄onia sitatxiti auakani paniātari imakinika itixi auakani maerekati ikaminina, maerekati itotxi nireēkiti. Ininiā ninoa kamari maerekati Papir̄onia auakani paniātakiti.

⁹ Ninoa Teoso nitiriakori ipi s̄akirauataka atoko, āti Teoso nitiri txari itaparas̄akireritika:

–Teoso misiritanako k̄akiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako k̄akiti Satanasi takaōtxikare iteētaāna takakani, iuakoāna takakani. ¹⁰ K̄akiti iua atoko inakani misiritaākako, kotxi Teoso itene omanākarauata maerekati ninoa kamakiti xika. Teoso misiritanako ninoa, ininiā atatsiirauatana xamina tirinakariā. Ēx̄opiri arikanako ninoa. Teoso nitiriakori erekarini, itixine auakani, Teoso Soti Aūtene pakini itikariko ikara k̄akiti misiritiko. ¹¹ Iua xamina tx̄ikitakari k̄akiti atatsiirauatini. Iua xamina tirinapikako. !Ixipoka. Itirinapika. Itxiākapika. Ninoa misiritiko !iotoka. Pokamara, ikanōka auapika ninoa misiritiko. K̄akiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuāka ītoāna aūitotakini misiritaākako ikara atoko –itxa iua Teoso nitiri s̄akire.

¹² Ininiā h̄ite Teoso nakitiakori, h̄ite ipaniātakiti k̄ipitakani, h̄ite Xesosi nireēkiti ātipirika kamakani, kataparaxinire h̄txako. Him̄iteenekariko k̄akiti misiritini.

¹³ Eereka nikenakotari Teoso tixine auakari s̄akire. Itxano:

–Nis̄āpiretakiti piōkatsopata. K̄akiti ip̄kasaaki Apiananiri ikapani ipar̄kauatakasaaki, Teoso sikari erekari iuamoni.

Iua Erekari Matamatakoti txari:

–Ia atāo. Mitxi pas̄apaniri Teoso par̄ka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴ Eereka nitaponeē nionakaāta iaxiti. Iuaaaki natamatari katxiāri kasarori iuaā. Āitari iaxitikiri atoko inakari top̄aka iua katxiāri nopini. Ikiā aua aūtetxi sapor̄ētane oro kamakori. Iuakoā saasara ātoiāo aua. Pauanaro. ¹⁵ Iposo atoko āti Teoso nitiri pok̄ika Teoso aapoko. Iua itaparas̄akireritika akiritari iua katxiāri nopini top̄akakari:

–Pikosekariko pisaasarate. Pamariko takari, kotxi takari amiko manapipekara. Takari ikini itixitikiri amiko manapipekara.

¹⁶ Ininiā iua katxiāri nopini top̄akakari isaasarateē isauakari ikini itixiti nopini auakari. Amari takari imakinika.

¹⁷ Iposo atoko nitikari āti Teoso nitiri pok̄ika Teoso aapoko Teoso tixineē. Iuamoni apaka aua saasara ātoiāo iuakoā. Pauanaro.

¹⁸ Iuaíkana áti Teoso nitiri apoka. Teosomoni sikakori takikoátaã ipotorika iua. Iníkatari xamina tirinakari iuaã. Iua itaparásákireritika akiritari Teoso nitiri saasara auakiti:

—Pimañkaroko pisaasarate. Pimaktxakaroko ova ikini itixitikero, kotxi ova oionapeka —itxa.

¹⁹ Ininiã Teoso nitiri isaasarateẽ isauakaro ova ikini itixitikero. Itsotakitataro ovatsa. Iposo atoko okaro ova ori ova iopetiko mitari áki. Okatsonakaãka. Teoso omanãkare iua ova iopetiko atoko itxa, kotxi Teoso iteene omanãkaraúata kãkiti maerekani xika. ²⁰ Ova ori kãkiti kitiã iopetikoátaã sitatxi mapotókire. Txamari na ovapeẽni ikara atoko itxa. Arẽkatxiãra ikara atoko itxa. Iua arẽkatxi uini panaã atoko itxa. Tresẽtosi kirómetro arẽkatxi aua. Arẽkatxi ípanaã kavaro namaãpeka apoka arẽkatxi. Áti metro ipixini ípanaã arẽkatxi.

15

Teoso Misirikare Míkani Setxi

¹ Eereka nitaponeẽ nitikoka iuaíkana.

—Kípa atxiíti? —nitxa iuaíkana nãixinireẽ, kotxi natamatari Teoso nitiriakori setxi itixineẽ.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

² Eereka natamatari ípoa atoko inakari. Átakaãri, xamina tirinakarikata koketakori atoko itxa ípoa. Kãkiti tima ípoa ítinikata. Ninoa iokanatapekarí Satanasi sini, kotxi likamarina iua potxoari uinitikiri paniãtakiti. Iua potxoari uinitikiri atoko inakari kai kamakori paniãtakiti likamana. !Apakaparina Satanasi takaõtxikare, iuãka nomerone. Ikininape aua viorão atoko inakari Teoso sikakiti. ³ Ninoa xikaretari Moisesi xikare, Teoso nitiri uai itixi auakari xikare. Ixikarenãtari Teoso Soti Auítene xikare. Ia ixikaretana. Itxana:

“Teoso Apiananiri, ikini posotíretxi auakítii pite. Peerekari piparíka. Pite kaposotírerri. Pite atãonani pikamakiti. Ikini uãkati auíte pitxaua pite.

⁴ Ikinimane paxitaiko pite ípíkareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka !auari maerekati. Kãkiti ikini uãkati apokako pitemoni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.”

Ikara atoko itxa ninoa xikaretakiti.

⁵ Eereka natamatari Teoso aapoko áki. Natamatari iua auiniãtaã. ⁶ Iposo atoko ninoa Teoso nitiriakori setxi, misirikaretxi setxi míkani, pokíka Teoso aapoko. Ninoa mãka katsopiri, pomẽkoriri. Ninoamoni aua oro kamakori. Itinimaĩ nopini inapa. ⁷ Ninoa ípi ípi pakini okítxinoka xãpokaítotakini iuaã aua. Okítxinoka xãpokaítotakiti sikari iãtatxi setxi pakini oro kamakori ninoa setxi Teoso nitiriakorimoni. Teoso auapininiika inakari xãpokakapekari iua setxi pakini iãtatxi omanãkareẽ. ⁸ Teoso iotximere xãpoka iua aapoko áki. Katxiãri kasarori atoko itxa. Iuusaaki kãkiti !auiritaãka Teoso aapoko íroini, ninoa Teoso nitiriakori, misirikaretxi míkani setxi pakini, misiritakasaakina kãkiti.

16

Iãtatxi Teoso Omanãkare Auakiti

¹ Eereka nikenakotari Teoso aapoko áki auakari sãkire. Itaparakieneritika imisãkiretana ninoa Teoso nitiriakori setxi. Itxana:

—Hísa. Híkítakari Teoso omanãkare iãtatxi áki auakari itixi auakanimoni —itxa.

² Ininiã ninoa Teoso nitiriakori sari. Merepaníka átika initari kitakari iãtatxi ákikiri itixi auakanimoni. Iuusaaki kimiti mitari, katsiiri, apoka kãkiti Satanasi takaõtxikare auakini ítomoni. Potxoari uinitikiri atoko inakari kai kamakori teosonetakani ítomoni apoka ikara atoko inakari amianari.

Áti Iãtatxi

³ Iposo atoko átipekana Teoso nitiri kitakari iãtatxi ákikiri potxoari uinitimoni. Iuusaaki áparaã arẽkatxi itxapekaua. Kãkiti ípíkari arẽka atoko itxa iuusaaki. Ininiã íkinipoko potxoari uiniti auakani iuusaaki xipoka.

Áti Iãtatxi

⁴ Iposo atoko átipekana Teoso nitiri kitakari iãtatxi ákikiri uinimoni, sãtoãri pakinimoni. Iuusaaki áparaã arẽkatxinoka itxapekaua. ⁵ Iuusaaki nikenakotari Teoso nitiri áparaã níkatakari sãkire. Itxari Teosomoni:

—Pite maerekati makamakati. Átipirika auakarii pite. Atão pikamakiti pimisiritinina maerekati kamakani íkora atoko. ⁶ Kotxi ninoa okari kãkiti pite nakitiakori. Okarina

pisâkire sâpiretakani. Ninoa oxiketari ninoa arêka. Ininiâ uatxa pite sikana arêkatxi iâtinina. Atâo imisiritikona kotxi maerekati ikamana –itxa Teoso nitiri.

⁷ Iposo atoko nikenakotari âti sâkire. Teosomoni sikakori takikoâtaâ auakari iua. Itxari Teoso:

–Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atâo inakarinoka pikama –itxa.

Âti Iâtatxi

⁸ Eereka âtipekana Teoso nitiri kitakari iâtatxi âkikiri atokatximoni. Iuasaaki atokatxi apiata patakata. Auiritaâka kâkiti arikini itaparapatakaâ. ⁹ Ininiâ kâkiti arikaâka atokatxi patakaâ. Iuaritika linirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaâ akiritari Teoso uâka.

Âti Iâtatxi

¹⁰ Ininiâ ipi ipi pakini Teoso nitiriakori kitakapekari iâtatxi âkikiri itiximoni. Eereka iuaikana âti Teoso nitiri kitakari iâtatxi âkikiri auîtetxi topaneremoni iua potxoari uinîti pokîkaâtakari topaneremoni. Iuasaakipeka iua potxoari uinîtikiri auîtetxi ininiâtaâua patimari ipiâkini. Kâkiti iuaâtaâ auakani akatsaninitaua itsii xika. ¹¹ Iuaritika linirekarina maerekati ikamakitina itakanapinina. Imisâkirepiretarina Teoso iaxiti apiko nopinixiti auakari, atatsiirena xika, kimiti xika.

Âti Iâtatxi

¹² Eereka iuaikana Teoso nitiri âti kitakari iâtatxi âkikiri mitari uinitimoni Eoparatxi inakorimoni. Iuasaaki uini auaâ. Isonâka. Kimapori itxaua, auîtetxiakori atokatxi pokîkinimoni ikani inapinina ikapani. ¹³ Iposo atoko nitikari maerekani matamatakoni ipi âti pakini. Atinoro atoko itxana. Âto pokîka mitapoari imini namaâ. Âto pokîka iua potxoari uinîti pokîkaâtakari namaâ. Âto pokîka iua itixi pokîkakari namaâ. Iua itixi pokîkakari iua Satanasi sâkire sâpiretakari itxaua. Na atâoene isâkire. Poxirari ikama. ¹⁴ Ninoa maerekani matamatakoni ipi âti pakini Satanasi nitiriakori. Ninoa kamari posotiiretxi. Isana auîtetxiakorimoni, ikini itixiti auakanimoni. Akiritana kâkiti apotiitiniua ineenamauatatinina ikapani. Teoso kaposotiireri naiatanako ninoa itixi xipokini ôtiisaaki.

¹⁵ Hîte ia atatsopatakani, Apiananiri txai hîte:

–Erepaniko. Napokako kîitiriri apokini atoko, kâkiti mimarotakinitipanika. Napokasaaki ereê, pikoatiniâ, kamâka pininiâ, pipoxokoniua. Ikara atoko pininiâ, kona kasarai ikinimane apisatoô pisini, ininiâ kona kapêtai –itxa Apiananiri sâkire.

¹⁶ Eereka ninoa ipi âti pakini Satanasi nitiriakori maerekani matamatakoni, apotiitari auîtetxiakori Amaketô inakoriâtaâ. Iuaâtaâ akiritaâka Amaketô Xoteo sâkireê.

Imapotôkire Iâtatxi

¹⁷ Ninoa setxi Teoso nitiriakori, seisi kitakapekari iâtatxi âkikiri. Âtinoka !ikitapanikari. Iuasaaki iua kitakari iâtatxi âkikiri itimamoni. Iuasaaki nikenakotari auîtetxi itopanereâtaâ auakari sâkire:

–Ixipokapeka –itxa itaparakieneritika.

¹⁸ Iposo atoko iotxira mêkoâkata. Ikarokirauata. Pataparaeneri. Itixi iakeêkata. Mitxi ! auari itixi iakeêkatini Ikora atoko inakari. Iuasaakiikarako apiatako. ¹⁹ Iua sitatxi apiari Papirónia inakori xoreka. Ipkata ixoreka, ininiâ ipi âti pakini sitatxiti atoko itxaua. Ikini itixiti auakari sitatxi xipokaâka iuasaaki. Teoso !imaxinîkaretari Papirónia sitatxiti auakani kamakiti, ininiâ iteene imisiritana ninoa, kotxi iteene omanâkarauata imaerekanina xika. ²⁰ Iuasaaki ikini ipokomirî !auaika. Ôtanoxiratarari ikinipoko xipoka iuasaaki. ²¹ Katxîkareri iaxiti auakari, kai mitari atoko inakari, katxaka itiximoni. Apanakini kai minani koarêta sîko kiro. Iua irika kâkiti nopini. Ikara katxakakari pamonôkonipaniri. Iua xika kâkiti iteene misâkirepiretari Teoso.

17

Sito Potxoari Uinîtikiri Nopini Topâkakarô

¹ Ninoa Teoso nitiriakori setxi pakini iâtatxi setxi auakini, seisi kaikota. Âtika ina notamoni. Itxano nota:

–Notakata pisa. Noerekai sitatxi miramaneri. Sito kanokarero kaposotiirero atoko itxa iua sitatxi. Oa topâkanâta uini itori nopini. Iuaâ auakani misiritiko noerekaiko pite. ² Auîtetxiakori ikini itixiti auakani kamari maerekati iua sitatxiti auakanikata isirîkinina. Iua sitatxi auakani txîkitakari kâkiti ikini itixiti auakani maerekati ikaminina. Kapoârôâ

poātakari nirekini atokokana, ninoa nirekari iua maerekati iua sitatxiti auakani kamakiti —itxa notamoni.

³ Eereka iua Erekari Matamatakoti paniātano iua Teoso nitirikata nisini. Iua Teoso nitiri anikano āparaā makipakaniātaā. Iuaā natamataro sito topākanāta iua potxoari uinitikiri nopini. Pōkamařitori iua. Iitoā aua iōkatakori kaiāopokori Teoso imisākirepiretini iōka. Ikii setxi aua. Iko tesi aua. ⁴ Oa sito māka pomamari ipixini. Pōkamarari itxa omāka. Pakaroneri omāka. Oitoā aua oro, pērorra, kai soro pomēkoriri pakini aua. Omaikari iākoanatxi oro kamakori. Iua iākoanatxi āki aua maerekati okamakiti itxiko atoko inakari. Maerekati oīto kamakiti ikara atoko itxa. ⁵ Oteētaā aua sākiretxi iōkatakori. Itxari: “!Kimarotikori. Kanokareroakoro inoro itxaua Papirōnia sitatxiti miramaneri. Maerekati kamakani inoro itxaua Papirōnia.” ⁶ Nitikaro oa sito opoātini, Teoso nakitiakori arēka oātini xika. Xesosi sākire auikinina xika, okaākana. Natamatakasaakiro nitikoka.

—Kipa atxīiti? —nitxa.

⁷ Iua Teoso nitiri txano:

—Kininiāpa pitikoka? Nisāpiretaiko oa sito pirena. Apaka nisāpiretaiko iua potxoari uinitikiri pirena, ikii setxi, iko tesi auakiti pirena, oa porikitakari pirena nisāpiretai, kotxi kona pimarotari. ⁸ Iua potxoari uinitikiri patamatakiti mitxi aua, txamari uatxa !auaika. Iua eereka ipokapanikako aariko mamapōkire irikotiā. Eereka anikaākako ixipokikomoni. Ikini itixiti auakani Teoso aātsopateē iuākana maiōkatakoni tikokako iua potxoari uinitikiri atamatakasaakinako. Itixi kamiko apisa iuākana !iōkatsopataāka Teoso aātsopateē. Iua aātsopāā iōkauākatakonioka ātipirika auapikako Teosokata. Kākiti tikokako iua potxoari uinitikiri atamatakasaakina, kotxi mitxi auāki itxa, eereka !auaika, eereka iuākana auākipeka itxa.

⁹ —Ikara inakari pimarotini ikapani, iteene pimixinikariko. Kinirepa ikii setxi aua? Kotxi ōtanoxiratarari setxi apaka aua. Oa sito topākanāta iua ōtanoxiratarari nopini. ¹⁰ Kinirepa ikii setxi aua? Kotxi auētetxiakori setxi apaka auako. Auētetxi !itxaikauana ninoa sīko. Ātinoka auētetxi txapanikaua. Āti kona apokapanika. Iua apokasaaki mapaōtinoka auētetxi itxauako. ¹¹ Iua potxoari uinitikiri mitxi auāki inakari, iposo atoko !auaika inakari, iua apokako. Iuara auētetxi txauako. Iua mitxi apotiūtaua ninoa setxi auētetxiakorikata. Āti ōti iua xipokaākako.

¹² —Patamatari iko tesi pakini. Kinirepa iko tesi aua? Kotxi auētetxi tesi aua. Ninoa auētetxiakori kākiti auēteakori !itxapanikauana. Ninoa sikaposotiiretaākako auētetxi ininiuana iua potxoari uinitikirikata. Ninoa auētetxi itxauanako āti oaranoka. ¹³ Ikininape ninoa tesi auētetxiakori parīkauata iua potxoari uinitikiri ikapani. Iposotiireēna, itaparaāna iparīkauatana iua potxoari uinitikiri ikapani. ¹⁴ Inaiatarinako Teoso Soti Auētene. Teoso Soti Auētene iokanatana ninoa isinina, kotxi iuanani Apiananiri itxaua. Auētetxiakori auēte itxaua. Ātipirika iuakata sikani, iua akiritakini, imereēkini, ātipirika iua nireēkiti kamakani, ninoa moianatarari iua Soti Auēte ineenamauatini —itxa Teoso nitiri sākire.

¹⁵ Iua Teoso nitiri apikomoni txari notamoni:

—Pite atamataro oa kanokarero topākanāta kāuaāri nopini. Kinirepa kāuaāri nopini oāua? Kotxi iuaātaā kākikipokoni, ikini uāka, ikini itixiti auakani, ikini āti uāka sākire sākiretakani pakini. Iua kāuaāri mitari atoko itxana. ¹⁶ Iua potxoari uinitikiri, ninoa tesi auētetxiakori pakini omanataroko oa kanokarero. Ninoa makatxakariko ikinipoko oa nakiti. Imaktxakarinarako omāka. Kasarapeka otxako. Oxini inikanako. Ninoa xipokaroko oa xaminā. ¹⁷ Teoso txīkitakari Teoso nireēkiti ikaminina, kotxi ninoa auētetxiakori parīkauata iua potxoari uinitikiri ikapani Teoso nireēkiti iaōka. Ininiā Teoso sākire mitxi auakari auapeka. Isākire iaōka ikamana. Ininiā ninoa nirekari iparīkauatinina iua potxoari uinitikiri ikapani. Ininiā ninoa auētetxiakori itxauana iua potxoari uinitikiri ikapani.

¹⁸ —Oa sito kanokarero patamatakito kona atō sitioni. Sitatxi miramaneriā auakani oa sito kanokarero atoko itxana, kotxi iua sitatxiā auakani paniātana ikini auētetxiakori itixi auakani maerekati inireēkitina ikaminina.

18

Papirōnia Sitatxiti Xipokini

¹ Ikara inaāka atoko nitikari āti Teoso nitiri Teoso tixine auakari katxakaāpotini ikorapokoriti Teoso tixine potoriākari. Iua kaposotiireri. Iotximere iopinikari imakinika itixi. ² Iua sākirauata itaparasākireritika. Itxari:

—Ixipokapeka Papirōnia sitatxiti miramaneri. !Auaika. Uatxa Satanasi nitiriakori aua iuaā. Ikini sereti maerekani matamatakoni aua iuaā. Araākari ikini sereti arakakari nikakani, kākiti mapokaerekatakiniti, iuaā apoka. ³ Oa sito kanokarero atoko itxa iua sitatxi, kotxi iua sitatxi auakani txīkitakana ikini itixiti auakani maerekanitxi ninoa kamakiti iaōka ikaminina. Papirōnia sitatxiti auakani kamari maerekati iūtona nireēkiti.

Itixi auakani nirekari ikara maerekati ikaminina kapoõroã poãtakari nirekini atokokana. Auãtetxiakori ikini itixiti auakani kamari ikara maerekati Papirõnia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirõnia sitatxiti auakani amotari tiitxipokoni –itxa Teoso nitiri säkire.

⁴ Eereka nikenakotari äti Teoso tixine auakari säkire. Itxari:

“Hïte nota nakitiakori inakani takanapariko iua sitatxi. !Hïkamapiri maerekati ninoakata. Ininiã !himisiritaãka ninoakata.

⁵ Kotxi maerekati ninoa kamakiti apiaãpota. Tiitxi tsorinatakori atoko itxana ninoa maerekani. Iaxitipeka apokaãpota ninoa maerekani. Teoso xinikari ninoa maerekani, ininiã iua misiritanako ninoa.

⁶ Himisiritanako ninoa. Hïte imisiritinina atokokana, hïte misiritana ninoa. Ipikata himisiritanako ninoa, ninoa maerekani xika. Ninoa misiritapekari apanakini, ininiã ia imisirikarena xika ipikata himisiritanako ninoa.

⁷ Hïtxïkitakanako ninoa atatsiuruatinina. Hïtxïkitakanako ninoa maerekaxiniretinoka ininina. Ikara atoko ninoamoni hïkaminia, atãopitikara hïkamakiti, kotxi iteene iuikauana ninoa. Itomaneri itiina, ininiã ninoa iarinouata. Ninoa säkire: ‘Ate uai topãkanãta, kotxi auãtetxi kaposotiireni atxaua. Tikinitakoro atoko !atxaua, ininiã maerekaxiniretika !atxa,’ itxana äkixinireëna.

⁸ Ikara isäkirena xika äti ninoa misiritaãkako. Amianari, maerekaxinirentixi, natxi pakini apokako ninoamoni. Arikatxi xipokanako ninoa, kotxi Teoso iuasaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,”

itxa iua Teoso tixine auakari säkire.

Käkiti Txiapatini Sitatxi Xipokini Xika

⁹ Auãtetxiakori ikini itixiti auakani, Papirõnia sitatxiti auakanikata sirïkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatanako. Ninoa auãtetxiakori txiapata iua sitatxi arikasaaki, xamina txiã itikasaakina. ¹⁰ Ôtakoxiti itimana, kotxi ipïkarina sitatxi auakani xipokini. Iuasaaki itxanako:

–!Erekari. !Erekari. Ia sitatxiti miramaneri !auaika. Papirõnia sitatxiti !auaika. Käkiti kaposotiirerini xipokaepka. Äti oaranoka arikatxi xipokapena ninoa imaerekanina xika.

¹¹ Ikini itixiti tiitxi vëtxitakani apaka txiapatako. Ninoa maerekaxiniretinoka itxanako sitatxi auakani xipokasaaki.

–Kiripa amotatari atii uatxa? –itxana.

¹² Mitxi ninoa vëtxitari oro, pirata, kai soro pomëkoriri, kai soro kasarori përora inakori. Mitxi ivëtxitarina mäkatxi mata arinio inakori, mäkatxi mata seta inakori, mäkatxi mata pökamarari, mäkatxi mata pomamari pakini, ivëtxitana. Ivëtxitarina ikini sereti aamina eremari inakari. Ivëtxitarina ikini sereti tiitxi iko kamakori, aamina pakaroneri kamakori, pirõsi kamakori, metao kamakori, kai kamakori. ¹³ Ivëtxitarina kanera, koketxi pakini. Ivëtxitarina kamariãro miha inakori. Ivëtxitarina kamariãro pirãkïsësi inakori. Ivëtxitarina iãriã, aseitona iï, triko, triko pani pakini. Ivëtxitarina kema auïte, soti auïte, kavaro, mitekaï kavaro anikakiti pakini. Käkiti apaka ivëtxitana, nitiritxi ikapani. Käkiti ito, käkiti xinire apaka inirekana ivëtxitinina. ¹⁴ Ninoa tiitxi vëtxitakani säkire sitatximoni:

–Ikinika hïtii erekari hinireëkiti xipokaãkapeka. Ikinika hïtxineirote !auaika. !Auaika häpokaerekatakiti. Hïtii arikapeka –itxana ninoa säkire.

¹⁵ Ninoa tiitxi vëtxitakani katxineiroterini itxauana, kotxi käkiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi vëtxitakani timanãta ôtakoxiti, kotxi ipïkarina sitatxi arikini. Itxiapatana. Imatinaniuatana. ¹⁶ Itxana:

–!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito mäka pakaroneri, pomamari, pökamarari pakini. Oïtoã aua oro, kai soro pomëkoriri. Përora pakini aua. Oia sito atokokana ia sitatxi. ¹⁷ Äti oara napa atoko ia sitatxiã auakani tii kakaroneri xipokaepka –itxana.

Sitatxi arikasaaki, maporo auakini, maporo äki sikani, maporo äki parïkauatakani apaka ôtakoxiti atamatarina iua sitatxi arikini. ¹⁸ Ninoa itikasaakiri katxiãri iua sitatxi arikini, itxana:

–Ia sitatxi miramaneri atoko inakari !auari –itxana ninoa.

¹⁹ Iuasaaki itakarina atapani ikiiãna imatinaniuatiniãna. Itxiapatana iuasaaki. Imatinaniuatana iuasaaki. Itxarina:

–!Erekari. !Erekari. Kamatinanipitikari sitatxi miramaneri xipokini. Mitxi iuaã ikini mane maporo auakini apakapari kaiãopokoro txineiro, kotxi iuaã auari txineiropokoni. Eereka äti oara napaka atoko ixipokaepka ikinika –itxana isäkirena.

²⁰ Hítepekana Teoso tixine auakanii hîpoxokoniuatoko iua sitatxi xipokiniã. Híte Teoso nakitiakori hîpoxokoniuatoko. Híte Xesosi moianariakorii, híte Teoso sãkire sãpiretakanii pakini hîpoxokoniuatoko, kotxi Teoso arikapekari iua sitatxiã auakani híte imisiritinina xika.

Kai Miramaneri Potxoari Uinitimoni Okiko

²¹ Eereka ãti Teoso nitiri kataparari maïkari kai meraminapoari. Kai triko kamiriãkari atoko itxa iua kai. Okari potxoari uinitimoni. Iua txari:

—Itapararitika kai nokini atoko, Papirónia sitatxiti miramaneri xipokini. !Atamataãkaika sitatxi iuaã —itxa isãkire.

²² Itxari iua sitatximoni:

—Xikari !ikenakotaãkaika ereë. !Auaika xikari viorãokata, koitxikata, trõpeta pakinikata. Ereë kãkiti parïkauatini !auaika. Atarokiri kamiko ene !kakenakotikoikari. ²³ Tirikapi kamara !katamatikoikari ereë. Taniriuatakani kiinirite ene !kakenakotikoikari. Ereë mitxi vëtxirauatakani apiari itxauana. Ninoa atoko inakari !auari ikini itixiti. Kãkiti ereë auakani misirienetana ikini kãkiti ikini itixiti auakani, kotxi ninoa sãkire maerekatinoka —itxa Teoso nitiri sãkire.

²⁴ Papirónia sitatxiti misiritaãka, kotxi iuaã auakani okapena Teoso sãkire sãpiretakanii kãkiti Teoso nakitiakori. Ikinimane kãkiti itixi okakoni xika Papirónia sitatxiti xipokaãka.

19

Areroia, Peerekari Teoso

¹ Eereka nikenakotari kãkiti sãkire, kaiãopokori kãkiti Teoso tixine auakani. Ita-parasãkireritikana itxana:

—Areroia. Peerekari Teoso. Ate Teosone makatxakari kãkiti maerekani. Kaiotximereri aTeosone. Kaposotiireri. ² !Ikerokari ikamakiti, kotxi atão inakarinoka ikama, ininiã atão imisiritinina maerekati kamakani. Erekarinoka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kãkiti xinire ikini itixiti auakani xinire, kotxi oerekarina maerekati itotxi nireëkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sãkire.

³ Iuaïkana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiãri iuaãkiri itimatxiãtapikako ãtipirika —itxana.

⁴ Iuasaaki ninoa totiakori vïtxi koatro pakini, ninoa okïtxinoka xãpokaïtotakini ipi ipi pakini apaka, ipamakana Teoso apisatoõ. Iuasaaki Teoso topãkanãta auïttxi topanere nopini. Ninoa misãkiretari iua:

—Pite aTeosone. Peerekai pite. Ameë, areroia —itxana ninoa.

Soti Auïte Ìtanorouatini Kiiniriti

⁵ Eereka nikenakotari Teoso topanereë auakari sãkire. Itxari:

—Híte Teoso nitiriakori ikini itixiti auakanii, “Peerekari aTeosone” hïtxako. Híte auïttxi inakanii, auïttxi minakanii apaka, hîpikiniãri Teoso, “Peerekari aTeosone,” hïtxako —itxa.

⁶ Iposo atoko nikenakotari itomaneri kãkiti sãkire ene atoko itxa, ãparaã kai auiniãtaã auakari ene atoko itxa, ikarokirauatini ene atoko itxa. Nikenakotari ninoa sãkire:

—Areroia, peerekari Teoso, kotxi aTeosone, Apiananiri, kaposotiireri, ikinimane auïte itxaua —itxana ninoa.

⁷ —Mapoxokoniua. Apoxokoniritika masãkirauata. Matxari: “Peerekari Teoso.” Teoso Soti Auïtene Ìtanorouatini iketo apokapeka. Ìtaniriuatakaro iua ikapani oãiamatapeka. ⁸ Osikaãka mãkatxi ereri, kasarori oieretaãkiti ñkane —itxana ninoa sãkire.

Teoso nakitiakori kamakiti atão inakari oa mãka atoko itxa.

⁹ Iposo atoko iua Teoso nitiri txano nota:

—Ia piõkatsopata. Iua Soti Auïte Ìtanorouatini kiiniriti kemaïtxitakoni poxokoniua —itxa notamoni.

Iuaïkana itxano:

—Ia nisãpiretakiti Teoso sãkire atão itxa.

¹⁰ Ikara nikenakotakasaaki nipamaka iua Teoso nitiri apisatoõ, Teoso apisatoõ pamãkarino atoko nitxaua. Txamari iua txano:

—Kona pipamakape nota apisatoõ. Nota Teoso nitiri pite atoko, pitariakori Xesosi sãpiretakiti auïãkani atoko. Teoso apisatoõnani pipamakako. Xesosi sãpiretakiti iopinikari Teoso sãkire sãpiretakanii ãkixinire. Ininiã ninoa sãpiretari kãkiti atão Teoso sãkire —itxa.

Kavaro Kasarori Nopini Topãkakari

¹¹ Eereka natamatari Teoso tixineë auakari. Natamatari kavaro kasarori. Iua kavaro nopini topâkakari ikamaenetakiti kamakari itxaua. Isâkire atâonoka. Atâo imereëri kâkiti misiritiko imaerekani xika, kotxi iua imarotari ikinipoko kâkiti kamakiti, ininiâ ikamari atâo. Inaiatana maerekati kamakani, kotxi iua kamari atâo. ¹² Oki xamina tirinakari atoko itxa. Ikiîâ ito auîtetxi saporîêtane aua. Iuâka iôkatakori iîtoâ aua. !Kimarotikori iua uâka. Iuanoka imarotari iuâka. ¹³ Arêkatxinoka imâkaâ aua. Iua akiritaâka, “Teoso Sâkire” inakori. ¹⁴ Isotatoneakori, Teoso nitiriakori Teoso tixine auakani, saâpota iuakata. Iua îkiika. Ninoa apaka topâka kavaro kasarori nopini. Imâkana peereri, kasarori. ¹⁵ Iua “Teoso Sâkire” inakori namaâ opokîka iouata mitaro neenamatzxi ikamini îkapani. Kauanaro. Iua iouataneë okanako imokaiakarini ikini âti uâka, ininiâ ikini âti uâka auîte kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanâkare ova katxaratiko atoko itxako. Teoso iteene omanâkaruata iusaaki kâkiti maerekani xika. ¹⁶ Iua “Teoso Sâkire” inakori mâkaâ, itapikeë apaka iôkataâka: “Auîtetxiakori auîte. Apiananiri,” iôkataâka.

¹⁷ Iposo atoko natamatari âti Teoso nitiri. Atokatxi iotximereë itima. Iua itaparakieneritika akiritari ikinika itano araâkani:

—Hina. Hâpoka Teoso kiiniritemoni. Mitari ikiinirite —itxa.

¹⁸ —Hina. Auîtetxiakori xini hinika. Sotatoakori auîteakori xini hinika. Sotato xini apaka hinika. Kavaro xini hinika. Hinikari kikiâkini kavaro nopini topâkakani xini apaka. Hinikari ikini kâkiti xini, nitiritxi iamotakoni xini, nitiritxi minakanîua xini, kâkiti apiatakani xini, kâkiti mapiatakani xini apaka hinika —itxari itano araâkani.

¹⁹ Eereka nitikari iua potxoari uinitikiri. Iuakata aua itixi auakani auîteakori, isotatoneakori apaka. Ninoa apotiitaua, iua kavaro kasarori nopini topâkakari isotatoneakorikata inaiatinina îkapani. ²⁰ Iua neenamatzxi xipoka atoko, iua potxoari uinitikiri maîkaâka. Isâkire sâpiretakari, atâo minasâkiretakati, imaîkaâka apaka. Mitxi iua kamari posotiiretxi iua potxoari uinitikiri îkapani. Ikara posotiiretxi xika imisirienetana ninoa potxoari uinitikiri takaôtxikare auaîtotakani. Imisirienetana ninoa iua kai kamakori teosonetakani. Iua potxoari uiniti pokîkaâtakari, isâkire sâpiretakari pakini, auâkipanika okaâka ipoa atoko inakarimoni, êxôpiri arikiniâtaâ. ²¹ Isotatoneakori okapeêka iouataâ, kavaro kasarori nopini topâkakari namaâkeroâ. Iusaaki ikinika maiori nikapena ninoa xini. Kamitopekana. ! Iposotaikarina ikinika okakoni xini inikinina.

20

Mio Anokananisaaki

¹ Eereka nitikari Teoso nitiri katxakaâpotini Teoso tixine îkari. Iuakoâ iua minaro xavi iua mamapotôkire irikotimoni. Apaka iminari kohêtxi mitari. ² Iusaaki imaîkari iua imini mitapoari. Kitxakapirîkarikara iua imini. Iua maerekani matamatakoni auîte, Satanasi inakori. Iua maîkari Satanasi. Iaxirikari kohêtxiâ, mio anokanani imatîpokotakani îkane. ³ Iua Teoso nitiri okari Satanasi iua aarikoâ, tota itxari itore. Ikakiriokari oa xavi itore sonaâ, ininiâ !apakata itore matakakiko. Ininiâ mamapotôkire irikoti âki ikalkota Satanasi. ! Iposotaikari imisirienetiniri ikini itixiti auakani. Mio anokanani auako iriko âki iua Satanasi. Mio ano napaâka atoko auiritaâka ipokîkani. Mapaôtinoka auiritaâka mapara auini.

⁴ Eereka natamatari auîtetxiakori topanere. Kaiâopokori auari iuaâ. Natamatari iua topaneretxi nopini topâkakani. Ninoa txîkitaâka auîtetxi ininiuana. Iusaaki natamatari apanakini kâkiti. Mitxi saukanopitakoni. Okapeêkana Xesosi iokanapirena, Teoso sâkire pakini isâpiretinina xika. ! Iteosonetarina iua potxoari uinitikiri. Iua kai kamakori ! iteosonetana. Iua potxoari uinitikiri takaôtxikare ! itakana iteêtaâna, iuakoâna pakini. Iuaîkana auapekana. Auîtetxi itxapekauana Kristokata. Mio anokanani auîtetxi itxauana. ⁵ Ikara ipikani ôkitikiko merepanika ipikani ôkitikiko. Iua mio anokanani napaâka atoko apanakini ipikani ôkitikaâka. ⁶ Ipîkani merepanika ôkitikiko iuaîkana auâki ininina îkapani, Teoso nakitiakori itxauana ninoa. Teoso sikari erekari ninoamoni. ! Atatsitarina âtiâo ipîkitxi Teoso misiritakasaakina maerekati kamakani. Sasetotxi itxauana, kotxi Teoso nireêkiti ikamana. Kristo nireêkiti apaka ikamana. Mio anokanani auîtetxi itxauana Teosokata.

Satanasi Xamina Mitapoarimoni Okiko

⁷ Mio ano napaâka atoko, Satanasi kateia âki auakari, sikakaâkako. Ipokîka mapara. ⁸ Iusaaki Satanasi îpirixititari itixi kâkiti ikini âti uâka imisirienetiniri îkapani. Iua misâkiretari âti uâka Koki inakori, Makoki inakori pakini. Txamari na atâo isâkire. Inirekari ninoa neenamauatini iuakata. Apitiitana ninoa Teoso nakitiakori inaiatinina îkapani. Itori kâkiti Satanasi apotiitakini. Uini ikapatxite atoko itxana.

⁹ Īpirixititarina itixi. Iakirokarina Teoso tiretakiti sitatxiti, kākiti Teoso nakitiakori auiniātaā. Iuasaaki xamina iaxitikiri katxaka. Ixipokana ninoa ikinikana. ¹⁰ Iuasaaki Satanasi, kākiti misirienetakari, okaāka arikatxi mitapoarimoni ēxópiri arikikoātaā. Iua potxoari uinitikiri, isākire sápiretakari pakini okapeēkaika iuaā. Iuaā ninoa atatsirauat-apikako pokamara, ikanōka ātipirika. Ixipoka ninoa atatsirauatini.

Ipinakani Apakapari Iparíkana Īki

¹¹ Eereka natamatari auñtetxi topanere kasarori mitari. Natamatari iua inopini topākakari. Iuasaaki patimari iaxiti, itixi pakini ereēkokini iua topākakari apisatoō. Iaxiti, itixi pakini kona katamatikoikari. ¹² Iposo atoko natamatari kākiti mitxi ipinakani timini Teoso topanere apisatoō. Kākiti apiarini, kākiti poiāorini pakini tima Teoso apisatoō. Iposo atoko itori aātsopa katamēkitataāka. Iua aātsopaā aua ikinika kākiti kamakiti. Apaka āti aātsopa katamēkaāka. Kākiti uāka aua iua aātsopaā Teosokata auakani ikapani. Iuasaaki ninoa mitxi ipinakani apakapari ikamakitina ĩki uai itixiā auakasaakina. ¹³ Ninoa mitxi potxoari uiniti āki ipinakani apoka iuaā. Mitxi kipatxiā ikatakoni apaka apoka iuaā. Īkini kākiti ipīkani auiniātaā auakani apoka iuaā. Īkinika apakapari ikamakitina ĩki, ikamakitina itixiā auakasaakina. ¹⁴ Eereka ipīkitxi, ipīkani auiniātaā pakini okaāka iua arikatxi mitapoarimoni. Iua arikatxi mitapoarimoni iuaīkana kākiti ipina ātiāo ipīkitxi maxipokatimoni. ¹⁵ Kākiti ātipirika Teosokata auakani uāka aua Teoso aātsopateē. Kākiti iuaā mauauākatakani okaāka iua arikatximoni.

21

Iaxiti, Itixi Pakini Amaneri Txapekaua

¹ Eereka natamatari iaxiti amaneri, itixi amaneri pakini. Iaxiti mitxiri ereēkokape. Īkora itixi mitxiri ereēkokape. Potxoari uiniti !auaika. ² Natamatari Teoso sitatxine Xerosareē amaneri. Iua sitatxi Teoso tixinekiri. Teoso paniātari iua sitatxi ikorapokoriti apokini. Natamatari ikatxakaāpotini. Iua sitatxi peereri. Sito itaniriuatakasaaki, omāka peereri oitanirimoni osini ikapani. Oa sito erero atoko itxa iua sitatxi. ³ Nikenakotari Teoso topanereē auakari sākire. Itapasākireritika itxari:

—Uatxa Teoso kamari iua auini kākiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. ⁴ Iuasaaki iua kaxipokariko ninoa oki ātsaā. !Itxiapataikana. Ipīkitxi !auaika. Matinanitxi !auaika. Ātsaātxi !auaika. Katsiiri !auaika. Īkinipoko mitxiri ereēkokapeka uatxa —itxa.

⁵ Iua auñtetxi topanere nopini topākakari txari:

—Uatxa nikamari ĩkinipoko amaneri —itxa.

Apikomoni itxari notamoni:

—Piōkatsopatari nisākire, kotxi nisākire atāo. Nisāpiretakiti apokapitikako.

⁶ Apikomoni itxano:

—Uatxa niparīka xipopeka. !Auaika. Merepitpanika iōka Aopa inakori atoko nitxa, kotxi nota merepitpanika aua. Imapotōkire iōka Ómika inakori atoko nitxa, kotxi ĩkinipoko mapotōkire nitxaua apaka. Nisikari kākiti posonatakani iātni ikapani. Na ninirekari ĩki. Iātarinako āparaā amomoākiri. Iua āparaā txīkitakari kākiti ātipirika Teosokata auini. ⁷ Nisikariko iua āparaā kākiti Satanasi nireēkiti makamakanimoni. Ninoa Teosone nitxaua nota. Nota anaakori itxauanako ninoa. ⁸ Kākiti mataparaxinireni okaākako xamina mitarimoni. Teoso sākire mauikakani apaka okaākako iua xaminamoni. Maerekati potxitakani, kokanirini, maerekati iitoāna potxitakiti kamakani apaka okaākako xamina mitapoarimoni. Miiti apaka okaākako iuamoni. Teoso kamakori teosonetakani okaākako iuamoni. Īkinika kākiti maxikatīka sápiretakani apaka okaākako xamina mitarimoni. Ninoa kākiti ĩkinikana misiritaākako arikatxi mitariā, ēxópiri arikikoātaā. Iuaā kākiti iuaīkana ipina, ātiāo ipīkitxi maxipokatimoni —itxa iua auñtetxi topanere nopini topākakari sākire.

Xerosareē Sitatxiti Amaneri

⁹ Ninoa Teoso nitriakori setxi, iātatxi setxi auakini, āti ina notamoni. Iua txari:

—Uai pina. Noerekaiko pite iua Soti Auñte tiretakito itanoro ikapani —itxa.

¹⁰ Iua Erekeri Matamatakoti anikano nota. Itxīkitakari Teoso nitiri anikinino oxiratarini nopini. Mitaxiratarīā oerekano sitatxi Teoso nakiti Xerosareē inakori. Natamatari iua sitatxi Teoso tixine potorikakari katxakaāpotini ikorapokoritimoni. ¹¹ Teoso iotximeretxikana aua iua sitatxi. Kai pomēkoriri kakaroneri xásipi inakori mēkorīkini atoko itxa iotximere. Iua sitatxi iotximere peereri. Kristao mēkori atoko itxa. ¹² Pirikeri kai kamakori piriketari iua sitatxi. Iua pirikeri mitapoari, pañtanori. Iua pirikeri tosi itore aua. Teoso nitriakori iaxitikini tosi nīkatari iua tosi itore. Īkinika itore nopini iōkataāka Isaeo anaakori uāka, kotxi Isaeo tosi imiakori aua. ¹³ Ipi āti pakini iua itore atokatxi pokīkinimoni. Ipi āti pakini

iaua itore atokatxi pokĩkini sanaremoni. Ipi āti iua itore atokatxi pokĩkini ikikomoni. Ipi āti pakini iua itore atokatxi ereēkokinimoni. ¹⁴ Iua sitatxi pirikere tosi kai mitari nopini ikamaāka. Ikinika iua kai nopini Soti Auīte moianariakori uāka iōkataāka, kotxi Soti Auīte moianariakori tosi aua.

¹⁵ Iua Teoso nitiri notakata sākirauatakari aua aāke oro kamakori iuaakoā. Iua aāke iua sitatxi, itore, ipirikere pakini iaōtiko. ¹⁶ Sitatxi tore atokatxi pokĩkinimoni ipotorika. Itore atokatxi ereēkokinimoni apoka. Iaōtari ipi mio, koatrosētosi pakini kirómetro. Maioakari. Iuaikana ipotorika sitatxi itore atokatxi pokĩkini sanaremoni. Itore atokatxi pokĩkini ikikomoni apoka. Iaōtari iua atokotxikana ipi mio, koatrosētosi pakini kirómetro. Eereka iaōtari sitatxi itano timakari. Iua atokotxikana ipi mio, koatrosētosi pakini kirómetro. Iua Teoso nitiri iaōtari iua sitatxi iua aākeē. ¹⁷ Iua Teoso nitiri iaōtari pirikeri timakari. Sesēta metro itano. Teoso nitiri iaōrauata kākiti iaōrauadini atokokana. ¹⁸ Iua pirikeri kai kamakori xāsipi inakori. Iua sitatxi oro kamakori. Kristao erero atoko itxa oa oro. ¹⁹ Iua kai mitari pirikeri patapi auakari ipataāka ikini sereti kai soroā. Pomēkoriri, kakaroneri iua kai soro.

Āti iua kai mitari aua kai soro xāsipi inakori.

Āti iua kai mitari aua kai soro sapira inakori.

Āti aua ákata inakori.

Āti aua esimeráota inakori.

²⁰ Āti kai mitari aua kai soro satónia inakori.

Āti kai mitari aua kai soro sátxio inakori.

Āti aua krisórito inakori.

Āti aua periro inakori.

Āti aua topásio inakori.

Āti aua krisópraso inakori.

Āti aua xasíto inakori.

Āti aua ametxísita inakori.

²¹ Iua tosi itore tosi kai kasarori kamakori. Iua kai kasarori pérora inakoro. Iua itore ātika, pérora ātoka kamakori. Oro kamakori itxaua kimapori. Peereri. Pomēkoriri. Kristao atoko itxa ahoa.

²² Kona natamatari Teoso misākiretiko aikoti. !Auari iua aiko iua sitatxiā, kotxi Teoso Apiananiri kaposotiireri, iua Soti Auīte apaka iuaā auapikana. ²³ Iuaā linirekaāka atokatxi, kasiri pakini sitatxi iopinikini ikapani, kotxi Teoso iotximere iopinikari ikinipoko. Iua Soti Auīte sitatxi tirikapite atoko itxaua. ²⁴ Kākiti maerekanitxi mauakini ikini āti uāka auari iua kamaraā. Kākiti ikini itixiti auakani auīteakori apokako iuaā Teoso ipaxitinina ikapani, inirekakitina Teosomoni isikinina ikapani. ²⁵ Iua sitatxi tore imatakakaākapika. Īroāpikana kākiti. !Itotaāka, kotxi Īkanōkari !auari iuaā. ²⁶ Kākiti ikini itixiti auakani anikariko ikinipoko erekari iua sitatximoni Teoso ipaxitinina ikapani. ²⁷ Kākiti maerekati kamakani !auritaākana Īroinina. Ītotxi nireēkiti kamakani !auritaākana Īroinina. Atāo masāpiretakani apaka !auritaākana Īroinina. Kākiti Teoso iōkauākatakini aātsopateē, ninoanokara auritaāka Īroinina iua sitatxiā. Iua Soti Auīte aātsopateē auauākatakani auapikako Teosokata.

22

Iua Āparaā Īatakari Aua Teosokata Ātipirika

¹ Eereka iua Teoso nitiri oerekano sōtoāri. Iua sōtoāri mapotōkire ikiitaā Teoso itopanere aua. Apaka iua Soti Auīte itopanere aua iuaā. Iua āparaā peereēri. Kristao mēkori atoko itxa iua āparaā. Iua āparaā Īatakari !ipina. Ātipirika auapika. ² Iua sitatxi apanīkaki iua ahoa mitapoari. Iua sōtoāri sa ahoa apanīkaki. Sōtoāri Ītinikata aua amātiirinape. Iua amātiiri tximakanani !ipina. Auapikana. !Ipanaikana. Kasiri iaōka iriuata iua amātiiri. Āti kasiriti iri ātiāo, eereka āti kasiriti ātiāo. Iuaikana āti kasiriti ātiāo. Itxaāpota iua amātiiri iriuatini iuaxiti. Tosi pakini kasiriti amātiiri iriuata. Amātiiri tospa sikataparatarari kākiti Īto, ikinimane kākiti itixi auakani Īto.

³ Teoso misiritiniri kākiti !auaika. Teoso, Soti Auīte pakini auītetxi itxauana iuaā. Teoso nitiriakori itixi auakani kamari iua nireēkiti. ⁴ Ninoa atamatariko itoō. Teoso uāka iteētaāna auako. ⁵ Īkanōka !auaika iuaxiti. Kākiti iuaā kona nirekaikari tirikapī, atokatxi kamara pakini, kotxi Teoso Apiananiri iopinikari ikinika iuaā. Kākiti iuaā auakani auītetxiakori itxauana ātipirika.

⁶ Eereka iua Teoso nitiri txari notamoni:

—Atāo nisākire. Ia iaōka apokapitakako. Teoso Apiananiri sikari Erekari Matamatakoti isākire sāpiretakanimoni. Iua paniātari initiri itixine auakari oerekinina initiriakori itixi auakani Teoso kamakiti apokini apisapanika —itxa iua Teoso nitiri sākire.

Xesosi Kanapiriini Pirena

⁷ —Hikenakota —itxa Xesosi. —Patimariko napokini ereë. Ia aätsopa säpiretari ereë nikanapiriini pirena. Käkiti auikiniäri Teoso säkire ia aätsopa säpiretakiti, apakapari erekari Teoso sikakiti —itxa Xesosi.

⁸ Nota Xoão säpiretai hïte nitïäkiti. Nikenakotakiti apaka nisäpiretai hïte. Ikinika nikenakotaka atoko, ikinika natamataka atoko, iuasaaki nipamaka iua Teoso nitiri apisatoõ, kotxi iua oerekari ikinipoko notamoni. Nipamaka iua apisatoõ Teoso apisatoõ nipamakini atokokana. ⁹ Txamari iua Teoso nitiri txari notamoni:

—Kona pipamakape nota apisatoõ. Nota Teoso nitiri pite atokokana nitxa. Pitariakori Teoso säkire säpiretakani Teoso nitiriakori itxauana. Ninoa atokokana nitxa nota. Ikinï käkiti ia aätsopa säpiretakiti auïäkani Teoso nitiriakori itxauana. Ninoa atokokana nitxa nota. Teoso apisatoõnoka pipamakiniä atão —itxa Teoso nitiri säkire.

¹⁰ Iuaïkana itxano nota:

—Ia aätsopa säpiretari Teoso kamakiti apokini apisapanika. Na pikipatapiri ia aätsopa säpiretakiti, kotxi païtiki Teoso säkire iaõka apokapitikako. ¹¹ Maerekati pikamapanika pinakasaaki, ininiä apikomoni maerekati pikama. Maerekati piïto nireëkiti pikamapanika pinakasaaki, ininiä apikomoni pikama. Atão inakari pikaminiä, apikomoni atão inakari pikama. Teoso nireëkitinoka pikaminiä, ininiä apikomoni Teoso nireëkitinoka pikama —itxa.

¹² —Hïkenakota —itxa Xesosi. —Patimapaniriko napokini ereë. Niminariko ikinimane parïka ïki ninoa apakapini ïkapani. ¹³ Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Ikinipoko auini apisapanika nota aua. Ikinipoko xipokaäka atoko nota auapanika. Itixi kamiko apisapanika naua. Itixi xipoka atoko nauapanika nota —itxa Xesosi.

¹⁴ Teoso sikari erekari iua nireëkiti kamakanimoni. Ninoa käkiti auiritaäkako Teoso amätiirite itximinina auapika ininina tïkane. Auiritaäkanako ïroinina Teoso sitatxineë. ¹⁵ Käkiti maerekati ïtona nireëkiti kamakani !auiritaäka ïroinina iua sitatxitiä. Miïti, ïtanoro minakatokatika sirïkakani, kokanirini pakini !auiritaäka ïroinina iua sitatxitiä. Apaka käkiti ikamakatika teosonetakani !auiritaäka ïroinina iua sitatxitiä. Aäpirena potxitakani, atão minasäkiretakani pakini !auiritaäka ïroinina iua sitatxitiä.

¹⁶ —Nota, Xesosi txaua. Nota paniätari ninitiri nitixine auakari säpiretiniri ia nisäkire pitemoni, ininiä ikara pite säpiretanako Teoso misäkiretikoätaä apotiitakaniua. Tavii apika mekanirirano nota. Iõriki mitaro pokamara iatokopeka inakasaaki ïkaro atoko nitxa nota —itxa Xesosi.

¹⁷ Erekari Matamatakoti txari Xesosi:

—Uai pina.

Xesosi nakitiakori txari iua:

—Uai pina.

Hïte ia nisäkire kenakotakanii, hïtxariko:

—Uai pina.

Hïte posonatakaniï, uai hina. Hinirekiniäri, ia äparaä hiätako, kotxi ia äparaä käkiti auapininiika inïkitaäkari. Ia äparaä Teoso sikakiti käkitimoni. Na piïkitxtari.

¹⁸ Nota, Xoão, õtäkikari käkiti ia Teoso säkire iõkatsopatakori kenakotakani. Ia Teoso säpiretakiti apokini apisapanika, isäpiretaua. Ia aätsopa säpiretari käkiti misiritiko. Ninoa misiritiko atokotxikana Teoso misiritai hïte, hïkokekiniäri hïteka säkire Teoso säkirekata. ¹⁹ Käkiti kipatiniäri ipixini ia Teoso säpiretakiti iõkatsopatakori, Teoso !auiritari iua tximiniri iua amätiiri käkiti auapininiika inïkitaäkari. !Auiritari iua ïroini isitatxineë. Ia aätsopa säpiretapekari iua amätiiri, iua sitatxiti pakini.

²⁰ Xesosi txari:

—Ia niokanapirena atão. Iposopeka napokini tïkane.

Atxari iuamoni:

—Ameë. Ari, uai pina Xesosi, Apiananiri.

²¹ Xesosi Apiananiri sikari ikinipoko erekari ikinimane Teoso nakitiakorimoni. Ameë.